

# Bëngbe Bëtsa Cabëngaftaca Entsoyebuambna

El Nuevo Testamento  
en el idioma  
camsá



El Nuevo Testamento  
en el idioma  
cansá

Segunda edición  
Publicado por  
©Wycliffe Bible Translators, 2009

Primera edición  
©Sociedad Bíblica Internacional, 1990

**Creative Commons**

*Atribución-No Comercial-No Derivadas 3.0 Unported*



**Eres libre de:**

copiar, distribuir y comunicar públicamente la obra

**Bajo las condiciones siguientes:**

- **Atribución** — Debes reconocer la autoría de la obra en los términos especificados por el propio autor o licenciente.
- **No comercial** — No puedes utilizar esta obra para fines comerciales.
- **No Derivadas** — No está permitido que alteres, transformes o generes una obra derivada a partir de esta obra.

**Entendiendo que:**

- **Renuncia** — Alguna de estas condiciones puede no aplicarse si se obtiene el permiso del titular de los derechos de autor.
- **Otros derechos** — Los derechos siguientes no quedan afectados por la licencia de ninguna manera:
  - Los derechos derivados de *usos legítimos* u otras limitaciones reconocidas por ley no se ven afectados por lo anterior;
  - Los derechos *morales* del autor;
  - Derechos que pueden ostentar otras personas sobre la propia obra o su uso, como por ejemplo *derechos de imagen* o de privacidad.
- **Aviso** — Al reutilizar o distribuir la obra, tiene que dejar bien claro los términos de la licencia de esta obra.

<http://creativecommons.org/licenses/by-nc-nd/3.0>

# CONTENIDO

	Página
San Mateo . . . . . Mt . . . . .	1
San Marcos . . . . . Mr . . . . .	76
San Lucas . . . . . Lc. . . . .	121
San Juan . . . . . Jn . . . . .	195
Hechos . . . . . Hch . . . . .	251
Romanos . . . . . Rom . . . . .	323
1 Corintios . . . . . 1 Co . . . . .	364
2 Corintios . . . . . 2 Co . . . . .	403
Gálatas . . . . . Gál . . . . .	428
Efesios . . . . . Ef. . . . .	443
Filipenses. . . . . Flp . . . . .	457
Colosenses . . . . . Col . . . . .	467
1 Tesalonicenses . . . . . 1 Ts . . . . .	477
2 Tesalonicenses . . . . . 2 Ts . . . . .	485
1 Timoteo. . . . . 1 Ti . . . . .	490
2 Timoteo. . . . . 2 Ti . . . . .	501
Tito . . . . . Tit . . . . .	509
Filemón. . . . . Flm . . . . .	514
Hebreos. . . . . Heb . . . . .	516
Santiago . . . . . Stg . . . . .	549
1 San Pedro. . . . . 1 Pe . . . . .	559
2 San Pedro. . . . . 2 Pe . . . . .	570
1 San Juan . . . . . 1 Jn . . . . .	577
2 San Juan . . . . . 2 Jn . . . . .	587
3 San Juan . . . . . 3 Jn . . . . .	589
San Judas . . . . . Jud . . . . .	591
Apocalipsis . . . . . Ap . . . . .	595
Mapas . . . . .	634



# San Mateo

## Jesusbe bêts taitanga

(Lc 3.23-38)

**1** <sup>1</sup> Quemënga immamna Jesucristbe bêts taitanga: Jesucristna Rey David y Abrahábentšana entšá inamna.

<sup>2-6</sup> Abraham yojamna Isaacbe taitá; Isaacna Jacobëbe taitá y Jacob, Judá y chabe catsátangbe taitá.

Judá, Fares y Zarabe taitá; y chatbe mamá Tamar yojamna; Fares Esrombe taitá y mua Arambe taitá. Aram Aminadabëbe taitá; Aminadab Naasonbe taitá y Naasón Salmonbe taitá. Salmón Boozbe taitá y muabe mamá Rahab yojamna; Booz Obedbe taitá y muabe mamá Rut yojamna; y Obedna Isaíbe taitá. Isaí Rey Davidbe taitá; David Salomonbe taitá y muabe mamá yojamna chë Uríasbe shema inamná.

<sup>7-11</sup> Salomón Roboambe taitá; Roboam Abíasbe taitá y Abíasna Asabe taitá; Asa Josafatbe taitá; Josafat Jorambe taitá y Joramna Uzíasbe taitá. Uzías Jotambe taitá, Jotam Acazbe taitá

y Acazna Ezequíasbe taitá. Ezequías Manasesbe taitá; Manasés Amonbe taitá y Amón Josíasbe taitá. Josíasna Jeconías y chabe catsátangbe taitá yojamna.

Chë Babilonioca entšanga chë israelitënga tmojánishëche y choca imojanëtámëna ora, Josías chë básënga yojánabamna.

<sup>12-16</sup> Ya Babilonioca ndutámenënga ora;

Jeconías Salatielbe taitá; Salatiel Zorobabelbe taitá. Zorobabel Abiudbe taitá; Abiud Eliaquimbe taitá y Eliaquimna Azorbe taitá. Azor Sadocebe taitá; Sadoce Aquimbe taitá y Aquimna Eliudbe taitá. Eliud Eleazarbe taitá; Eleazar Matanbe taitá y Matán Jacobëbe taitá. Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámána Uabuayaná, chë Cristo ca uabainá.

<sup>17</sup> Chcasna, Abrahábentšana Davidbentscoñë bnëtsana canta bêts pamíllanga imojëftsemna. Davidbentšana y chë israelitënga Babilonioca imojanëtamenëntsçuana inÿe bnëtsana canta bêts pamíllanga;

y inÿe bnétsana canta bëts  
pamíllanga chë Israeoca entšanga  
imojanëtamementšana, chë Cristo  
tojanonÿnántsoñe.

### Jesucristo tojanonÿná

(Lc 2.1-7)

<sup>18</sup> Jesucristo jónÿnamna mëntšá  
tojanopasá: María tbojanšbuachená  
Joséftaca jobouamayama, pero  
cabá ndoñe cánÿiñe ibontsiyena ora,  
tojanopasá Mariyna ngomamaná  
yojoquéda chë Uámana Espíritbe  
obenánaca. <sup>19</sup> José, Mariybe boyá,  
canÿe nÿetsca soyënguñe tšabá  
jamama bošá inamna. Cha ndoñe  
yontseboše entšangbe delante cha mal  
jaquédana; chíyecna tojanjuabó nÿe  
iytëcana Maríybentšana jtsojuánañana.  
<sup>20</sup> Y chca yojtsejuabnantscuana, mo  
otjenayoquécá canÿe Bëngbe Bëtsabe  
ángel tbojáninÿe y chana Josébioye  
tbojaniyana: “José, Davidbentšana  
entšá, ndoñe matenócochinÿenana  
Maríaftaca jobouamayama, er  
chë bochántsebmna šešona chë  
Uámana Espíritbe obenánaca cha  
bochántsebmna. <sup>21</sup> María canÿe  
šešona bochántsebmna y cha Jesús  
ca cochjuabaye. Chca echantsabaina  
er cha chabe entšanga chëngbe bacna  
soyënguentšana echanjätsebacaye ca”  
—chë ángel tbojaniyana.

<sup>22</sup> Lempe chca tojanochnëngo, cachcá  
chaotsemnama ntšamo Bëngbe Bëtsá  
chabe juabna oyebuambnayëngbiajana  
tojanayancá. Chë oyebuambnayá  
mëntšá tojánayana:

<sup>23</sup> Chë cabá boyabása nduabuatmá  
ngomamaná echanjoquéda  
y canÿe šešona boyabásetema  
bochántsebmna,  
y cha mochanjuabaye Emanuel ca.  
(Emanuel endayana “Bëngbe Bëtsá  
béngaftaca ca”).

<sup>24</sup> José chë otjénayentšana  
tojanofšená ora, tojanma ntšamo chë  
Bëngbe Bëtsabe ángel tbojanmandacá  
y Maríaftaca tojanobouamá. <sup>25</sup> Pero  
ndoñe cánÿiñe ibontsaniyena, sinó nÿe  
chë šešonatema tojanonÿná orscana.  
Chë šešonatema tojanonÿná orna, José  
chábioye Jesús ca tbojanabaye.

### Reyes Magos Jesúsbioye tmojána

**2** <sup>1</sup> Herodes judiëngbe rey  
yojamna ora, canÿe pueblo  
Judeoca, Belén ca uabáinentše Jesús  
tojanonÿná. Chentšana, báseftanga,  
estrellënga uatsjëndayënga, magos  
ca uabáinënga, canÿe bëts puebloye  
Jerusalén ca uabáinoye tmojánashjajna.  
Chënga tmojánabo shinÿe bocanoye  
luarëngocana. <sup>2</sup> Jerusalemocna  
chënga, Heródesbioye tmojána y  
tmojanënoticiá: “¿Ndayentše yojtsemna  
chë judiëngbe rey jtsemnama  
tojonÿná cha ca? Bëngbe luarëngoca  
shinÿe bocanoye chabe onÿnana  
estrella fsënjinye y as muentše cha  
jaboadorama tifjabo ca.”

<sup>3</sup> Rey Herodes chca tojanuena ora,  
corente yojtsenócochinÿena, y nÿetsca  
chë Jerusalemëntše oyenëngnaca.

<sup>4</sup> Chentšana chë rey tojánachembo  
nÿetsca chë judiëngbe bachnangbe  
amëndayënga y chë judiëngbe ley  
abuátambayënga jenoyeunayëngama.  
Mëntšá tojanatjá: —¿Ndayentše chë  
Bëngbe Bëtsabe Uámana Uabuayaná,  
chë Cristo ca uabainá, jónÿnama  
ibomna ca?

<sup>5</sup> Chënga tmojanjuá: —Judeoca, Belén  
pueblentše ca. Bayté entsemna chë  
Bëngbe Bëtsabe juabna oyebuambnayá  
Miqueas mëntšá tojanábema:

<sup>6</sup> Y tšëngaftanga, Judeoca  
Belenëntše oyenënga,  
canÿe mandayá  
tšëngaftangbentšana echanjabo.

Cha nýetsca chë Judeoca  
 mándayëngbiama más uamaná  
 echántsemna,  
 y atšbe entšanga Israeloca  
 echántsanýena.  
 Chýyeca tsëngaftangbe pueblo  
 ndoñe nýe batšá uámana pueblo  
 quenátsmëna ca.

<sup>7</sup>Chora Herodes iytëcana chë  
 maguënga tojánachembo y cuedádoca  
 tojanatjá ntseco ora chë estrella  
 tmojáninýama. <sup>8</sup>Herodes chë soyënga  
 yojtsetátšëmbo ora, Belenoye chë  
 maguënga tojanichamó, y mëntšá  
 tojanéyana: “Choye motsajna y tsábá chë  
 šešona šmochjánguango. Chašmojinýena  
 ora, šmochjabëuenaye, as átšnaca  
 chayobená jama chë šešona jadórana ca.”

<sup>9</sup>Rey Herodes chë soyënga  
 tojánëyanentsana, chë maguënga  
 tmojtsatanoñe. Chora cachiñe  
 tmojtandinýe chë chëngbe luarëngoca  
 tmojáninýe estrella y yojtsanebnatsana  
 chë šešona yojtsemnéntscóñe. Chentša  
 juatsbuacá chë estrella yojójaiye. <sup>10</sup>Chë  
 maguënga chë estrella tmojáninýe  
 orna, corente oyejuayënga imojtsemna.  
<sup>11</sup>Chë yebnoye tmojánamashjna ora,  
 chë šešona tmojáninýe chabe mamá  
 Mariáftaca. Chorna, tmojanoshamentšé  
 y chë šešonatema tmojanadorá. Chora  
 chëngbe cajontëmënga tmojanëtsécaca  
 y tmojanatštá castellano, incienso  
 y canýe botamana uanguëtše soye,  
 mirra ca uabáiniye. <sup>12</sup>Chentšana,  
 mo canýe otjenayoquëcá Bëngbe  
 Bëtsá chë maguënga tojanabuayená  
 rey Herodesbiajana ndoñe  
 chamondesshëcuanama. As chënga  
 chentšana inýe benachëjana cachëngbe  
 luarëngoye tmojésanshëcuana.

### **Egiptó luaroye tmojtsanachá**

<sup>13</sup>Chë maguënga tmojtsatanoñe  
 ora, otjénayoca José canýe Bëngbe

Bëtsabe ángelbioye tbojáninýe  
 y cha mëntšá tbojanianyana:  
 “Motsbaná, chë šešonatema y chabe  
 mamá mesébiatše y Egiptoye  
 motsachá. Herodes chë šešonatema  
 bochanjánguango jtsóbama,  
 chýyeca choca cochtsoquedañe atše  
 chacbochjábuaenantscuana ca.”

<sup>14</sup>As José tojantsbaná, chë šešonatema  
 y chabe mamá tojesanébiatše y ibeta  
 Egiptó benache tojéftsanbocna.  
<sup>15</sup>Y choca imojtsanomñe Herodes  
 tojanóbanëntscuana. Chca  
 tojanopasá, cachcá chaotsemnama  
 ntšamo Bëngbe Bëtsá chabe juabna  
 oyebuambnayabiajana tojanayancá.  
 Chë oyebuambnayá mëntšá  
 tojánayana: “Egiptocana atšbe uaqiñá  
 sënjanchembo ca.”

### **Herodes tojanmandá basetëmënga jtsëbáyama**

<sup>16</sup>Chë maguënga tmojtsaningñema  
 Herodes tojántatšëmbona ora, puerte  
 tbojánetna, y tojanmandá lempe  
 jtsëbáyama base boyabásetëmënga  
 uta uata bomnënga y cabá uta  
 uata ndbomnënga, Belén y chë  
 juachañe pueblënguentšënga. Uta  
 uatama cha tojanjuabó, er uta uata  
 yojtsemna chë maguënga chë estrella  
 tmojáninýama. <sup>17</sup>Ntšamo chë Bëngbe  
 Bëtsabe juabna oyebuambnayá  
 Jeremías tojanoyebuambacá, cachcá  
 tojanochnëngo:

<sup>18</sup>Ramá ca uabaina pueblentše canýe  
 oyebuambnayana tmojanuena,  
 ngmënaca ošachiyana y becá  
 tsetšanánaca oyebuambnayana.  
 Raquel yojamna chabe  
 básëngbiama ošachiyiñe,  
 pero ndoñe yontseboše  
 chamuatebiajuama,  
 chabe básënga ya obanënga causa  
 ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentsána, otjénayoca José canye Bëngbe Bëtsabe ángelbioye tbojáninye y cha mentsá tbojanianyana: <sup>20</sup>“Motsbaná, chë šešonatema y chabe mamá mesébiatše y Israeloye cochtá. Chë šešonatema jóbama bošenga ya obanenga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanébiatše. <sup>22</sup> Arquelao Judeoca yojanmánda chabe taitá Heródesbe cuentañe, y José chca tojántatšëmbona orna, yojsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Joseña Galilea ca uabaina luaroye tojána. <sup>23</sup> Choye tojánashjango ora, José tojána canye pueblo Nazaret ca uabáinoye chentše joyénanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyeuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

### Juan chë Ubayaná entsanga yojanabuayiná

(Mc 1.1-8; Lc 3.1-9, 15-17; Jn 1.19-28)

**3** <sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. <sup>2</sup> Mentsá cha yojanëtsëtšnaye: “Bëngbe Bëtsabe améndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiamama chë Bëngbe Bëtsabe juabna oyeuambnayá Isaiás mentsá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca; mo nda canye benache tojtseprontacá canye uamana entsá jashjanguama, tšëngaftángnaca cachcá, Bëngbe Utabná jabama ainaniñe tšabe juabnéngaca šmochtseprontana ca” —cha tojánayana.

<sup>4</sup> Juanbe entsáyá inauapormana camellbe stjënasheca y bobache yojanasnana. Cha inasaye chapulinatëmënga y tjoca tjouangbe méloye. <sup>5</sup> Jerusalemoca entsanga, nýetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. <sup>6</sup> Bëngbe Bëtsábioye chëngbe bacna soyëngama jaimpáda chentsána, Juan chë Jordán béjayiñe chënga yojanébáyana.

<sup>7</sup> Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “iMëtscuaye entsanga! ¿Nda tcmënjáuyana chë echanjóshjango uobouana castigüentsána šmochjotsbocá ca?”

<sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtsajbanama.

<sup>9</sup> Y ndoñe šmattsejuabnaye cach tšëngaftangbiama jayanama: ‘Abrahábentšana entsanga fsëndmëna ca’. Er atše šcuayana, Bëngbe Bëtsá quem ndëtšbéngacnaca Abrahábentšana entsanga nanjábiamama. <sup>10</sup> Chë tatsnía ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tontseshajo, jtseshatëtšana y inoye jtsatmetšana.



Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

<sup>11</sup> “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiana más obenana bomná comna, y atše merecido taitsatobuajoñe ni mo chabe shecochëtjonëshe jtsámbañama. Chë chabe benache añe chamojtishachëngbiana Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháuamashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnama, mo inëshequécá.

<sup>12</sup> Canye entšá chabe mëtštá cucuatšinë jiyëbana, chabe trigo jtsóbobemana y chë ndoservena shácuanënga jtsejashsëtsana. Chabe trigo chë grano uaquëcjnaye tsañe jtsabuájuana, y chë ndoservena shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entšanga echanjúbuaja, y chë bacna entšangna canye inëshiñe echantsacastigaye, y chë inë ndocna te queochátsfsana ca” —cha tojanéyana.

#### Juan, Jesúsbiyoye tbojanabaye

(Mc 1.9-11; Lc 3.21-22)

<sup>13</sup> As Jesús, Galileocana tojána Jordán béjayoye, Juan yojtsemnoye, cha chabuabayama. <sup>14</sup> Pero Juan ndoñe yontseboše Jesús juabáyama, y mëntšá tbojaniana: —Atše šontsemna aca chašcuabaye, y čmás atše aca cbochjuabaye ca?

<sup>15</sup> Chora Jesús tbojanjá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama. <sup>16</sup> Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontješiyey y tojáninye chë celoca atëfjniñe y chë Uámana Espíritu mo canye palomatemcá chábioyey yojtsastjajuana. <sup>17</sup> Chora celocana Bëngbe Bëtsá mëntšá tojánayana: “Mua atšbe bonshana uaquiniá endmëna. Chabiana corente sëntsoyejuá ca.”

#### Jesús tojanobená Satanás jayéjjanama

(Mc 1.12-13; Lc 4.1-13)

**4** <sup>1</sup> Chentšana chë Uámana Espíritu entšanga ndoyena luaroye Jesús tbojanánatse, as Satanás chauábama cha jisháchichiyama.

<sup>2</sup> Chentše canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëntsena. <sup>3</sup> As Satanás tbojanobobeconá y tbojaniana: —Aca ndegombre Bëngbe Bëtsabe Uaquiniá tcomnëse, momandá quem ndëtšbenga tandëse chaobiana ca.

<sup>4</sup> Pero Jesús tbojanjá: —Bëngbe Bëtsabe uabemana palabrënguini mëntšá endayana: “Entšá nyë tandëseca ndoñe vida ntsebomnana, sinó entšá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

<sup>5</sup> Chentšana Satanás, Jerusalén, chë uámana bëts pueblo ca uabainoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá. <sup>6</sup> Chentše Satanás mëntšá tbojaniana: —Aca ndegombre Bëngbe Bëtsabe Uaquiniá tcomnëse, muentšana fshantoye montsënja, er Bëngbe Bëtsabe uabemana palabrënguini endayana:

Bëngbe Bëtsá chabe  
angelënga echanjichamuá,  
chacmotsinjenama.

Chënga buacuatšëngaca  
cmochanjishache,  
shecuatsë ndëtšbeñe ndocá  
chacondomama ca —cha  
tbojaniana.

<sup>7</sup>Chora Jesús tbojanjuá: —Cach  
Bëngbe Bëtsabe uabemana  
palabrënguiñe mëntšá endayana:  
“Ndoñe matsbošana acbe Bëtsá  
chë Utabná bacna soyëngama  
jacochënguama ca.”

<sup>8</sup>Cabana, Satanás tbojanánatse  
canye bëts tjoye y betscó nÿetsca  
quem luarentša amëndayëngbenache  
y chentša nÿetsca uamana  
soyënga Jesúsbioye tbojaninÿinÿe.

<sup>9</sup>As Satanás tbojaniana: —Aca  
chacojoshëntsamentšë y chašcojadorase,  
lempe chë soyënga cbochjatštaye ca.

<sup>10</sup>Y Jesús tbojanjuá: —iSatanás,  
átšbentšana mojuaná! Bëngbe  
Bëtsabe uabemana palabrënguiñe  
mëntšá endayana: “Bëngbe  
Bëtsá cochtsadorana y nÿe cha  
cochtseservena ca.”

<sup>11</sup>As Satanás cachcá tbojanonÿá.  
Cachora Bëngbe Bëtsábicocana  
angelotëmënga tmojánabo Jesús  
jtseservënama.

**Jesús tojanontšë Galileoca chabe  
trabajo jamana**  
(Mc 1.14-15; Lc 4.14-15)

<sup>12</sup>Juan chë Ubayaná cárceloye  
tmojanëtámiaa Jesús tojanuena  
ora, Galilea luaroye cha tojtaná.

<sup>13</sup>Pero ndoñe tonjanoquedá Nazaret  
pueblentšë, sinó Capernaumoca,  
uafjajónaye tsachañe; choye tojána  
joyënanama, chë uamana bëts taitata  
Zabulón y Neftalibe luariñe. <sup>14</sup>Chca  
tojanochnëngo, cachcá chaotsemnama  
ntšamo chë Bëngbe Bëtsabe juabna  
oyebuambnayá Isaías tojanayancá.  
Isaías tojánayana:

<sup>15</sup>Zabulón y Neftalibe luare,  
Jordán béjaye chenguánoica,  
uafjajónaye tsachañe;  
Galilea luariñe, ndoñe judío  
entšanga oyenentšë.

<sup>16</sup>Chë mo ibetiñe cuaftsiyencá  
imojoyena entšanga, Bëngbe  
Bëtsabe soyënga nduabuatma  
causa, tmojinÿe canÿa entšangbe  
juabnënga binÿnayá.

Chë chëngbe juabnënga  
binÿnayá entsebuashinÿinÿana  
chë Bëngbe Bëtsábioye  
nduabuatmëngbiama,  
y chë causa chabiana imonna  
mo obanëngcá, ndoñe binÿniñe  
jtsiyenëse ca —cha tojanábema.

<sup>17</sup>Cach orscana Jesús tojanontšë  
entšanga jábuayenama: “Bëngbe  
Bëtsabe amëndayana ya echanjóshjango.  
Ngmënaca šmochtenójuaboye  
tšëngaftangbe bacna soyëngama y chca  
amana šmochtsajbaná ca.”

**Jesús tojánachembo canta  
boyabásenga beonga  
ashebuánayënga cha chamuastama**  
(Mc 1.16-20; Lc 5.1-11)

<sup>18</sup>Canÿe te, Jesús chë Galilea  
uafjajónaye tsachajana vojtsaye y  
ndeolpe uta boyabásata tojanÿe:  
canÿa yojamna Simón, chë Pedro  
cánaca uabainá, y chabe uabentsá  
Andrés. Chatna atarraiešhangá  
ibnetsashbuëtsetšañe, er beonga  
ashebuánayata ibnamna. <sup>19</sup>Jesús  
tojanéyana: “Atšëftaca mabata; atšë  
cbochanjábiana Bëngbe Bëtsabiana  
entšanga anguayata, y morscana  
nÿe beonga ashebuánayata ya ndoñe  
quešochátsmëna ca.” <sup>20</sup>Cachora  
chatbe atarraiešhangá cachcá  
tbojésanaboshjuana y Jesús tmojanasto.

<sup>21</sup>Y más chcoye, Jesús inÿe uta  
catšátata tojánanÿe: Santiago y Juan,

chë Zebedeobe uaqiñata. Chata ibojtsomñe canye barquëshañe, chatbe taitáftaca, chëngbe atarraiešhangá atapórmayañe. Jesús tojánachembo, <sup>22</sup>y cachora chë barquëshata tbojésanaboshjona, chë taitá cachentše imojéseboshjona y Jesús tmojanasto.

**Jesús ba entsanga yojanabuatambá  
y yojánashnaye**  
(Lc 6.17-19)

<sup>23</sup>Jesús nyets Galilea luarējana yojánana, chentše judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayina y nyetsca šocanëngama y tsetšanëngama yojánashnaye.

<sup>24</sup>Nyets Siria luarējana entsanga cha imojtsebáyana. As entsanga nyetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nyetscanga yojánashnaye.

<sup>25</sup>Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanocana Jesús imojústona.

**Ndayá Jesús tjoca tojanabuatambá**

**5** <sup>1</sup>Jesús chë mallajta entsanga tojánanye ora, batsjoye tojántsjua y tojanótbema. Chabe ústonënga tmojanobobconá y <sup>2</sup>Jesús tojanontsé mëntšá jabuátambana:

**Ndëmuanyënga imomna chë  
ndegombre oyejuayana bomnënga**  
(Lc 6.20-23)

<sup>3</sup>“Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsanga

mochántsemna chë Bëngbe Bëtsabe amëndayoca mochtsiyenënga.

<sup>4</sup>“Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

<sup>5</sup>“Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soyca quem luare mochanjójyëngacñe.

<sup>6</sup>“Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe tšabá jamama bošënga mochanjobenaye jëftsinýana lempe ntšamo tmojtsebošcá.

<sup>7</sup>“Puerte oyejuayënga mochántsemna chë ínýëngbiana ongmiaiyënga, er Bëngbe Bëtsá chëngbiana bochanjóngmia.

<sup>8</sup>“Puerte oyejuayënga mochántsemna chë nye tšabe juabnënga ainaniñe bomnënga; chënga Bëngbe Bëtsá mochanjinýe.

<sup>9</sup>“Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

<sup>10</sup>“Puerte oyejuayënga mochántsemna chë ínýënga tmojama chamotsesufrínënga, ntšamo Bëngbe Bëtsá yobošcá bétsamama; chca entsanga mochántsemna chë Bëngbe Bëtsabe amëndayoca mochtsiyenënga.

<sup>11</sup>“Puerte oyejuayënga tšëngaftanga šmochtsemna, entsanga chacmojóyánguango y chacmojtšécamena ora y nyetscna soyëngaca chacmojtšëbuayatsenaye ora, atšbe ústonënga bëtsemnama.

<sup>12</sup>Móyejuanga, puerte móyejuanga,

tšëngaftanga celoca becá  
šmochanjóyëngacñe. Er ntšamo  
entšanga tšëngaftanga cmécamena,  
cachcá chë Bëngbe Bëtsabe  
juabna oyebuambnayëngbioye,  
chë tšëngaftangbe natsana  
monjanienëngbioye entšanga  
monjanëcamena ca” —Jesús  
tojánayana.

**Ošbuáchiyënga jtsemnana mo  
tamocá y binýnayënga quem  
luarentša entšangbiana  
(Mc 9.50; Lc 14.34-35)**

<sup>13</sup> “Tšëngaftanga, quem luarentša  
entšanga jtsëjabuáchanëse  
šmojtšiyena, Bëngbe Bëtsabe soyënga  
chamotsetatšëmbuama, as chëngbiana  
šmochántsemna mo chë mëntšena  
ndoñe chaondónbemama tcojatboto  
tamocá. Pero chë tamó fténana  
tojtsóbemëse, ndoñe ntšopodénana  
tempcá sanana cachiñe jtësmënana.  
Chca, ya tondayama ntšoservénana;  
chíyeca chë tamó tsáshenoye  
jtsëtšënanana y entšanga jtsebotájayana.

<sup>14</sup> “Tšëngaftanga, ntšamo  
tšabá yomncá šmojtšiyenëse, as  
quem luarentša entšangbiana  
šmochántsemna mo chë ibetiñe  
tojtsebínýna soycá. Canýe bëts  
pueblo batsjo juatsbuañe tomnëse,  
ndoñe ntšopodénana iytëmencá  
jtsemnana. <sup>15</sup> Canýe uajuinýanësha  
tcojuajuinýena ora, ndoñe cajonëshe  
tajsoye jtsabuájuama, sinó tšbanánoca  
juajájuama, chca, nyetsca entšanga  
chë yebnentšë tmojtsemnëngbiana  
chaotsebínýnama. <sup>16</sup> Cachcá  
tšëngaftanga, entšangbe delante mo  
binýnayëngcá šmochtsemna, as chënga  
tšëngaftanga tšabe soyënga šmuamama  
chamuinýama, y chca, chënga  
chamuinýanyë chë Taitá, Bëngbe Bëtsá  
celoca endmëná, corente uamaná

y obená bëtsemnana ca” —Jesús  
tojánayana.

**Chë Moisesbe leyama  
Jesús tojanabuatambá**

<sup>17</sup> “Ndoñe šmattsejuabnaye, ntšamo  
Moisesbe leyinë iuayancá y chë Bëngbe  
Bëtsabe juabna oyebuambnayënga  
tmojanayancá jabëtsepochochama  
atšë tijabo ca. Atšë ndoñe chiyátabo  
chë soyënga jabëtsepochochama,  
sinó jabábuayenama ndayá chë  
soyënga ndegombre bëtsayanama.  
<sup>18</sup> Ndegombre šcuayana: Celoca y  
quem luare chaojtšëmnëntscuana,  
ndocná queochatobenaye ni  
canýe punto, ni canýe letra chë  
leyënguëntšana jtsejuánana, lempe  
ntšamo jochnënguama yomncá  
chaojtšëmnëntscuana. <sup>19</sup> Chíyeca, nda  
nyë mo canýe mando chë leyënguini  
ndoñe tonjoyeuná cha, masque nyë  
base soye chë mando tojtsemna, y  
chë ínýenga cachcá tojtsabuatambá,  
cha Bëngbe Bëtsabe amëndayoca chë  
más nduamaná echántsemna. Pero  
ndëmuanýenga tmojtsama ntšamo  
Bëngbe Bëtsá tojamëndacá y chë  
ínýenga cachcá chamotsamama  
tmojtsabuátambase, chënga Bëngbe  
Bëtsabe amëndayoca uámanënga  
mochántsemna. <sup>20</sup> Chë soyëngamna  
mëntšá šcuayana: Tšëngaftanga chë  
ley abuátambayënga y fariseúngbioye  
ndoñe šmontsayëñjanase, jtsamama  
ntšamo Bëngbe Bëtsá tmojamëndacá,  
ndocna te Bëngbe Bëtsabe amëndayoye  
quešmochátamashjna.

**Ndayá chë ínýengaftaca tbojetnama  
Jesús tojanabuatambá**

<sup>21</sup> “Tšëngaftanga šmojouena ntšamo  
Bëngbe Bëtsá tšëngaftangbe bëts  
taitanga tojanamëndacá: ‘Ndoñe  
catjóba ca. Chca ochjajnayá bontsemna

jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca.’<sup>22</sup> Pero atše šcuayana, nda cachabe catsátaftaca tbojetna, chánaca bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catsábtioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catsábtiana opjema ca tojayana, ntšamo cha bétsamama, cha bontsemna chë infiernoca ñeshoye jama.

<sup>23</sup> “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catsáta ácaftaca etonaná yojtsemna ca,<sup>24</sup> as chë tcojiyëbo soye chë altarentša natsanoica cochjéseboshjona, cochtá y acbe catsátaftaca cochtenoyántsia. Chentsána cocayé altaroye cochjá y chë tcojuamba sóyeca Bëngbe Bëtsá cochjëtschuaye.

<sup>25</sup> “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšinë cmochanjáboshjona y chënga cárceloye cmochanjutame.<sup>26</sup> Ndegombre cbëyana: Chentsána ndoñe quecochtëtsbocna lempe candesopagantscuana ca” —Jesús tojánayana.

**Chë boyá o shémbioye ínÿaftaca ingñayama Jesús tojanabuatambá**

<sup>27</sup> “Tšëngaftanga šmojouena ntšamo Bëngbe Bëtsá tojanmandacá: ‘Acbe

boyá o acbe shémbioye ínÿaftaca ndoñe catjaingña.’<sup>28</sup> Pero atše cbëyana: Nderado canÿe boyabása ndëmuanyë shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shémbioye tbojtseingñé.

<sup>29</sup> “Chíyeca, nderado acbe catsábioica bomínÿeca bacna soye tcojinÿe y cachca soye tcojamëse, más tšabá nántsemna chë bominÿe cochtsenobuchjatsëca y cochtsëtsëna. Nÿets cuerpo jtsebomnana y lëmpeca infiernoye jama chacmotsëtsënamna, acbiana más tšabá nántsemna nÿe canÿe soye acbe cuerpentšana chacoperdé.<sup>30</sup> Nderado acbe catsábioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtsëna. Nÿets cuerpo jtsebomnana y lëmpeca infiernoye chacmotsëtsënamna, acbiana más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

**Chë bouamnata enëtšanama Jesús tojanabuatambá**

(Mt 19.9; Mc 10.11-12; Lc 16.18)

<sup>31</sup> “Mëntšánaca leyiñe enduábemana: ‘Ndëmuanyë boyá chabe shémaftaca tbojtsenëtšëna, chë boyá bontsemna chabe shema canÿe tsbuanácha juiiyana, ndayéchañe chaotsayana cha ya ndoñe chabe shema yontsemna ca.’<sup>32</sup> Pero atše cbëyana: Nda chabe shémaftaca tbojtsenëtšëna y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útšëna shémaftaca tojtóbouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

**Chë entsànga júrayama  
Jesús tojanabuatambá**

<sup>33</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojyana: De Dios chë soye chanjama ca; ojal chë soye ndoñe catjama ca.’ <sup>34</sup> Pero atše cbëyana: Tondayama šmattsejúraye; ni celocama, er choca Bëngbe Bëtsabe tbemaniñe endmëna. <sup>35</sup> Ni quem luarama, er Bëngbe Bëtsabiama mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. <sup>36</sup> Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canye stjénashe ftsenguëshe o fjantsëshe jabemana. <sup>37</sup> Tšëngaftanga añe ca jayanama šmojtsebošëse, nye añe ca šmochjayana, y ndoñe casna nye ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

**Chë entsànga  
mondbátenachnënguama Jesús  
tojanabuatambá  
(Lc 6.29-30)**

<sup>38</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebomna canyëbé cha jëtsbuchjatsëcama ca; y nderado nda canye juatsaše tcmojtsášiye, ácnaca derecho contsebomna cányëšë cha jtašiyama ca.’ <sup>39</sup> Pero atše cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catsbioica tcmojajuebjantšetase, cochjomiye chë ínyoica cachcá chacmomama.

<sup>40</sup> Nderado nda tcmojademandá y tojtsebošë acbe shabuanguanëjua jtsabocñama, cha molesenciá acbe quëfsaiyanaca chauetsácñama.

<sup>41</sup> Nderado nda tcmojuasímá y tcmojamandá bnëtsana cuadroca juyambama, inye bnëtsana cuadroca cochjuyamba. <sup>42</sup> Nda ndaye soye tcmojotjanëšë, cochjatštaye; y nda ndaye soye tcmojuatjase, cha ndoñe stëtšoye catjaquéda ca” —Jesús tojánayana.

**Chë uayayëngbiama bonshánana  
jtsebomnana  
(Lc 6.27-28, 32-36)**

<sup>43</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’ <sup>44</sup> Pero atše cbëyana: Tšëngaftangbe uayayënga šmochtsababuányëshana, y chë cmécamenëngbiama Bëngbe Bëtsá šmochtseimpadana. <sup>45</sup> Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entšángbeñe chabe shinje chaotsebinynayama, y endbëtsama chë nyëtsca soyënguñe tšabá jamama bošënga y ndoñe chca entšángbeñe chauaftema.

<sup>46</sup> Tšëngaftanga nye chë tšëngaftanga tcmojtsababuányëshanënga šmojtsababuányëshanëšë, ¿Bëngbe Bëtsábiocana ndayá šmochjuacaná? Romocama crocénana entšángbioye atjanayëngnaca chca monduamana. <sup>47</sup> Y nye chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama. <sup>48</sup> Tšëngaftangbe Taitá, Bëngbe Bëtsá celoca endmëna, nyëtsca tšabe soyënga bomná y amá

endmëna. Tšëngaftángnaca cachcá šmochtsemna ca” —Jesús tojánayana.

**Jesús tojanabuatambá ntšamo tšabe soyënga ínÿengbiana jamana**

**6** <sup>1</sup>“Cuedado šmochtsebomna ndoñe ntsamama entšángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtétatšataye.

<sup>2</sup>“Chcasna, nderado nda caridá tcojábemëse, chca ndoñe šmatjama chë ntšamo šmojtšamama nÿetscanga chamotsetatšëmbuama, mo canÿe trompetéřjua cuaftšajatëtanca, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinÿinÿnayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entšanga tšabá chëngbiana tmojtsoyebuambná ora. <sup>3</sup>Chcasna, nda caridá tcojábema ora, ndocná más chaondétsetatšëmbo, mo chë uañicuayoica cucuatše ndoñe queondbatstatšëmbcá ndayá chë catsbioica cucuatše tojtšamama, <sup>4</sup>chca, acbe caridá iytëcana chaotsemnama. As, tšëngaftangbe Taitá, nda bominÿe endbëtsequëcjnaye chë iytëmencá tcojtšama soye, acbe uacanana soye cmochántatštaye ca” —Jesús tojánayana.

**Jesús tojanabuatambá ntšamo Bëngbe Bëtsáftaca jencuëntana**  
(Lc 11.2-4)

<sup>5</sup>“Bëngbe Bëtsáftaca šmojtšencuënta ora, ndoñe šmattsama chë bacna

entšanga ntšamo ndegombre tmojuabnacá ndinÿinÿnayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuëntayana, chca, nÿe entšanga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtšama ca entšanga tmojayana ora. <sup>6</sup>Pero aca Bëngbe Bëtsáftaca jencuëntama orna, acbe tsoye cochtamáshëngo, bëšáša cochtatame y cháftaca cochjencuënta. Chánaca chë iytëmenentšë ácaftaca echántsemna. Bëngbe Taitá lempe bominÿe endetsequëcjná, masque cánÿenga šmojtsemna ora šmojtšama soyëngnaca. As Bëngbe Bëtsá, chca cháftaca chacojtšencuënta ora, cachá acbe uacanana soye cmochántatštaye.

<sup>7</sup>“Bëngbe Bëtsáftaca šmojtšencuënta ora, ndoñe nÿe cachcá ndoservena palabrënga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtšchámëсна, Bëngbe Bëtsá chënga más yochjóyaunaye ca. <sup>8</sup>Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtšëjabotcá. <sup>9</sup>Chamna tšëngaftanga mëntšá cmontsétocana Bëngbe Bëtsáftaca jencuëntana:

Bëngbe Taitá, celoca icotsomñe.

Acbe uabaina chë más uamana uabainana chauesomñe.

<sup>10</sup> Acbe amëndayana chaóshjango. Celoca yojtsemna ntšamo icobošcá; quem luaríñnaca cachcá chaotsemna.

<sup>11</sup> Mënté šmiyatšatá cada te šnetsëjaboto tandëse.

<sup>12</sup> Bacna soyënga bënga fsënjama: šmotsaperdónaye;

cachcá ntšamo chë bëngbiana  
bacna soyënga amënga  
fsëndbetsaperdonaycá.

<sup>13</sup> Bacna soyënga jamama  
šojocochëngo ora,  
šochhujabuache chca  
ndenobuíyama.

Nyetsca bacna soyënguentsana  
šmatsebacye.

<sup>14</sup> “Chë tšëngaftangbiana bacna  
soyënga amënga šmojtsaperdónasna,  
Bëngbe Taitá chë celoca endëtsomñá,  
tšëngaftanga cmochanjáperdonaye.  
<sup>15</sup> Pero chë tšëngaftangbiana  
bacna soyënga amënga ndoñe  
šmontsaperdónasna, Bëngbe  
Taitá cachcá, tšëngaftanga ndoñe  
quemochátaperdonaye ca” —Jesús  
tojánayana.

#### **Chë Bëngbe Bëtsáftaca jencuéntama tondaye ntjascá**

<sup>16</sup> “Y nderado tšëngaftanga inye  
ora tondaye ntjascá šmojtsemna  
Bëngbe Bëtsáftaca jencuéntama,  
juebëngménënga ndoñe šmattsemna,  
ntšamo chë bacna entšanga  
chë ndegombre tmojuabnacá  
ndinýinýayënga mondbetsamcá,  
as chca, chënga imojtsayúnama  
entšanga chamuinýama. Ndegombre  
šcuayana, chëngbe uacanana  
soye ya tmojóyëngacñe, chënga  
tmojayunáyeca entšanga tšabá  
chëngbiana tmojtsoyebuambná  
ora. <sup>17</sup> Aca nderado tcojtsayúna ora,  
cochtsojuebjabebiye y aceitýeca  
botamana cochtenochquëca, <sup>18</sup> as chca,  
entšanga ndoñe chamondëtsetatšëmbo  
aca tondaye ntjascá cojtsemnama. Nýe  
acbe Taitá, lempe chë mo iytëmcá  
yomna soyëngama tatšëmbuá, chama  
echántsetatšëmbo. Y cha, chë  
iytëmcá tcojama soye bominýe  
endbetsequëcñayá, acbe uacanana

soye cmochántatštaye ca” —Jesús  
tojánayana.

#### **Chë celoca bomnana**

(Lc 12.33-34)

<sup>19</sup> “Bomnana quem luarentšë  
ndoñe šmattsëjuabaye. Muentšna  
chë mejojón y inye pochócaye  
soyënga lempe jtsendbiamana, chë  
atbëbanënga jtsamashjnana y chë  
juabana soyënga jesatbëbana. <sup>20</sup> Más  
tšabá tšëngaftangbiana entsemna,  
mora quem luarentšë tšabe soyënga  
šmojtsamamna, uacanana soyënga  
celoca chaotsójuabaye. Chentšë  
ni chë mejojón, ni chë inye  
pochócaye soyënga acbe soyënga  
quemochatspochóca, ni atbëbanënga  
quemochátamashjna jatbëbama.  
<sup>21</sup> Er chë ndayentšë acbe bomnana  
tojtsemnentša soyëngama acbe  
ainánaca cochántsejuabnaye ca”  
—Jesús tojánayana.

#### **Chë cuerpama uajuinýanëshá**

(Lc 11.34-36)

<sup>22-23</sup> “Acbe bominýe tšabá  
totsomñëse, mo canýe  
uajuinýanëshacá acbe cuerpama  
jtsemnana, chíyeca aca jtsobenana  
ntšamo tcojtsamcá chë bominýeca  
jtsonýayana. Chë bominýe ndoñe  
tšabá tontsemnëсна, chë bominýe  
tondaye ntsoebenana jamana,  
ntšamo tcojtsamcá chacobená  
jinýama. Cachcá, acbe ainaniñe  
tšabe juabnënga tcojtsebomnëse,  
lempe ntšamo chacojtsamcá tšabá  
echántsemna. Y acbe ainaniñe ndocna  
tšabe juabnënga tcontsebomnëсна,  
lempe ntšamo chacojtsamcá ndoñe  
tšabá queochátsmëna. Y chca, aca  
cochantsiyena soyënga jtsamëse  
mo puerte ibetiñcá ca” —Jesús  
tojánayana.



**Chë Bëngbe Bëtsabiama bonshánana  
o chë nye quem luarentša soyënga  
jtsebošana**  
(Lc 16.13)

<sup>24</sup>“Ndocná ntsobenana uta mandayata jtsaservénana: cânÿabioye bochantšáboyënja y chë ínÿabioyna bochantšebobonshana, o cânÿabiama tšabá echántsetrabajaye y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nye quem luarentša soyënga jtsebonnama yapa tcojtsebošëse ca” —Jesús tojánayana.

**Bëngbe Bëtsá chabe básenga  
jtsanÿenana**  
(Lc 12.22-31)

<sup>25</sup>“Chcasna atše šcuayana: Ndoñe šmattsenócochinÿena ndayá šmochjase o šmochjofšiye vida jtsebonnama, ni ndaye entšayá šmochjuíchëtjuama cach ndoñe. Ndegombre, vida chë sanama más enduámana y cuerpo chë entšayama más. <sup>26</sup>Šmochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguine quemnatsquëcjná; pero Bëngbe Bëtsá, celoca endmëná, chënga saná jtsatšatnayana. iY tšëngaftanga chë shloftšëtëmëngbiama puerte más šmonduámana! <sup>27</sup>Masque chca endmëna, canÿa masque tša tojtsenócochinÿena, ðntšamo nanjobenaye jamana chë ntsachetšá vida yochtsebonnentšana, canÿe hora vida más jabotiyana?

<sup>28</sup>“Y ndayá šmochjuíchëtjuama, ðndáyeca šmojtsenócochinÿena? Šmochjinÿe chë jajañe lirio uantšëfjushangá jtsajuajnana: ndoñe ntsetrabájayana, ni ntšeshabiamnayana. <sup>29</sup>Pero atše

cbéyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantšëfjushangacá quenjatspormana. <sup>30</sup>Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tšëngaftangbiámnaca Bëngbe Bëtsá echanjama entšayá chašmotsábomnama, ientšanga nye batšá Bëngbe Bëtsábeñe ošbuáchiyënga! <sup>31</sup>Ndoñe šmattsenócochinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofšiye?’ o ‘¿Ndayá mochtichëtjo ca?’ <sup>32</sup>Chë soyëngama, chë Bëngbe Bëtsábioye nduabuátmënga mondbësenocochinÿena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabortama endétatšëmbo. <sup>33</sup>Chíyeca, tšëngaftangna natsana šmochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjabortcá cmochanjátšataye. <sup>34</sup>Ndoñe matenócochinÿenana ndayá yëfse yochjochnënguama. Yëfse luare cochántsebonna chë soyënga jinÿama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

**Ndoñe ntsichámuana chë ínÿenga  
tšabá o ndoñe tšabá tmonjamama**  
(Lc 6.37-38, 41-42)

**7** <sup>1</sup>“Ndocá ínÿengbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. <sup>2</sup>Chë

ntsamo tsëngaftanga ínÿengbiana  
šmojtsichamcá tšabá o ndoñe tšabá  
tmontsamama, cachcá Bëngbe  
Bëtsá tsëngaftangbiana chë ntsamo  
šmojamama echántsichamo. Y ntsamo  
ínÿengbioye chašmojábiama, uabouana  
o ndoñe jabuache soyënga, cachcá  
Bëngbe Bëtsá tsëngaftangbioye  
cmochanjábiama.

<sup>3-5</sup>“Nderado canÿa chabe bominyíne  
canÿe niñëfja tojtsebomñese, cha  
ndoñe ntsobenana chabe catšata  
jauyanama: ‘Acbe bominyëntšana  
canÿe polvëštema jtsebujátsécama  
šmolesenciá ca’. Natsana cha  
bontsemna cachabe bominyëntšana  
chë niñëfja jtšenobuchjátsécana  
tšabá jinÿama jobenayama, chabe  
catšatbe bominyëntša polvëštema  
jtsebujátsécama. Cachcá  
entsemna acbiama, ibacna entšá  
chë ntsamo ndegombre tcojuabnacá  
ndinÿinÿnayá!, chë tša bacna soye  
cojtsama ca acbe catšata tcojauyana  
ora, cach aca tša bëts bacna soyënga  
cojtsamama ntjenjuaboycá; y  
chca, aca jamana canÿe bacna soye.  
Natsana cmontsemna chë cach aca  
ndoñe tšabe soyënga cojtsamama  
ngménaca jshatenójuaboyana y chca  
amana jtsajbanana, y chentsana  
cocayé cochantsobena acbe catšata  
juajabuáchana ntsamo tšabá yomncá  
chaotsamama.

<sup>6</sup>“Chë Bëngbe Bëtsabe soyëngama  
josértama ndéboše entšanga  
ndoñe šmattsabuayinaye. Añese  
nántsemna mo chë Bëngbe Bëtsabe  
bëts yebnoca uátšëmbona mëntšena  
quešënga cuaftsëbuajocá; chorna  
chënga jobuértanana, jobotjajuana  
y jtsáshantsana. O mo chë uámana  
ndëtšëtëmënga cotšëngbioye  
cuaftsëtšancá, chënga nÿe  
jtsebotájayana ca” —Jesús tojánayana.

**Šmochjotjañe, šmochjúanguo y  
šmochjachembo**  
(Lc 11.9-13; 6.31)

<sup>7</sup>“Šmochjotjañe y Bëngbe Bëtsá  
cmochanjátsataye; šmochjúanguo  
y šmochanjínÿena; šmochjachembo  
y bëshása cmochanjébëtafjo. <sup>8</sup>Er  
ndánaca tojtsotjanañá, jóyëngacñana;  
y nda tojtsenguá cha, jónÿenana;  
y nda tojtsechembuanábioye  
jebiatëfjuana.

<sup>9</sup>“¿Ndëmuanyë boyabása  
tsëngaftanguentsá, canÿe tandëse  
chabe uaqiñá tbojtsotjanañe ora,  
canÿe ndëtšbé chábioye buanjatštaye?  
<sup>10</sup>¿O canÿe mëtscuaye buanjatštaye,  
beona tbojtsotjanañe ora? <sup>11</sup>Y chca,  
tsëngaftanga, bacna soye amënga,  
tsëngaftangbe basetëmënga tšabe  
soyënga jatšatayama šmojtsamanëse,  
imás tsëngaftangbe Taitá, Bëngbe  
Bëtsá celoca endmëná, chë  
tmojtsotjanañënga tšabe soyënga  
echanjátsataye!

<sup>12</sup>“Inÿengaftaca šmochtsama  
ntsamo chë ínÿenga tsëngaftangaftaca  
chamotsamama šmojtsebošcá. Chca  
endmëna ntsamo Moisesbe leyíne  
y chë Bëngbe Bëtsabe juabna  
oyebuambnayëngbe buatëmbana  
soyënguiñe endayancá ca” —Jesús  
tojánayana.

**Chë base utëntšá bëshása**  
(Lc 13.24)

<sup>13</sup>“Chë base utëntšá bëshásajana  
šmochjámashjna. Chë utëntšá  
bëshásajana y chë paselo jóyënama  
benache, infiernoye cmochanjuánatse  
y banga chëjana mondámashjuana.  
<sup>14</sup>Chë tšabe vida binÿnoye jamna base  
utëntšá bëshásajana endmëna y ndoñe  
paselo jóyënama benache, y chiñe  
báseftanga mondbínÿena.

**Chë Bëngbe Bëtsabe  
ndoñe ndegombre juabna  
oyebuambnayënga**  
(Lc 6.43-44)

<sup>15</sup>“Cuedado šmochtsebomna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. <sup>16</sup>Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentshana ndoñe uvas ntjuátabebiana, ni higuëbé cardo betiyentshana. <sup>17</sup>Chca, nyëtsca tšabe betiyiñe tšabe soye jashájonana; y chë ndoñe tšabeshiñna podesca soye. <sup>18</sup>Canye tšabe betiyiñe quenátopodena podesca soyënga jashájonana, ni canye ndoñe tšabe betiyiñe tšabe soyënga jashájonana. <sup>19</sup>Ndaye betiye podesca shajuanëshe jtseshatëtšana y iñoye jtsatmetšana. <sup>20</sup>As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

**Bëngbe Bëtsabe amëndayoye ndoñe  
nyëtscanga jamashjnana**  
(Lc 13.25-27)

<sup>21</sup>“Ndoñe nyëtscanga chë ‘iUtabná! iUtabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna añe. <sup>22</sup>Quem luare jopochócama te banga atše šmochanjauyana: ‘iBëngbe Utabná! iBëngbe Utabná! Aca jótšëmbonëse, ácheñe betsošbuáchema, bënga

fsëndoyebuambná, y ácbeyeca bacna bayëjëngbe juabna entšángbentšana fsëndëtabocana, y ácbeyeca bëts soyënga fsëndama ca.’ <sup>23</sup>Chora atše chanjójuaye: ‘Ndocna te checbaisëbuátmana. Atšbentšana mojuánanga, bacna soye ama entšanga ca’ ” —Jesús tojánayana.

**Chë uta ucuatjoniñe**  
(Mc 1.22; Lc 6.47-49)

<sup>24</sup>“Chcasna, nda atše šojoyeuná y chë ntšamo sentsichamcá tojtsama, endmëna mo canye tšabá juabnaye boyabasacá. Chë boyabásana ndëtšbeñe chabe yebna vojajebo. <sup>25</sup>Uaftena yojúashjango, chë béjayënga yojóftajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtšbeñe inajéboyeca. <sup>26</sup>Pero nda atšbe palabra tojouena y ntšamo sentsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuñe vojajebo. <sup>27</sup>Uaftena yojúashjango, chë béjayënga yojóftajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

<sup>28</sup>Jesús chë soyënga jóyebuambayama tojanpochocá ora, chë entšanga ojanánënga imojtsemna ntšamo cha tojánabuatambama. <sup>29</sup>Jesús tojanabuatambá nyëts obenánaca, mo canya mando bomnacá y ndoñe nye mo chë ley abuatambayëngcá.

**Jesús, canya bacna nguayanánaca  
šocábioye tbojanshná**  
(Mc 1.40-45; Lc 5.12-16)

**8** <sup>1</sup>Jesús tjoicana tojtantsmá ora, ba entšanga tmojanasto. <sup>2</sup>Chora canye boyabása bacna nguayanánaca

šocá Jesúsbioye tojanobeconá, chabe delante vojoshamentšiyi y tbojaniyana: —Utabná, aca tcojtsebošese, catjobenaye atšbe šocana jtsebojuánana ca.

<sup>3</sup> As Jesús tojanacuenyanéjaná, chë boyabásabioye tbojánbojajo y tbojaniyana: —Aíñe, séntseboše. Šocana cbotsebojuaná ca.

Y cachora chabe šocana tbojtšanóbojuanañe. <sup>4</sup> Jesús chë shnanábioye tbojaniyana: —Mouena, ndocnábeñe cattsecuéntaye; nye chë Jerusalenoca báchnëbioye motsa, y cha cochjinñinyiye mora aca ya tšabá cojtsatsmënema. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatšëmbona mora aca ya ndoñe šocá contsemnama ca —Jesús tbojaniyana.

**Jesús canye Romano soldadëngbe  
amëndayabe bochichnayábioye  
tbojanshná  
(Lc 7:1-10)**

<sup>5</sup> Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama. <sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chë soldadëngbe amëndayá tbojaniyana: —Señor, atšbe merecido taitsatobuajoñe atšbe yebnentše chacuamashënguama; nye mayana y atšbe bochichnayá tšabá echántsatsmëna. <sup>9</sup> Atšbioye mándayënga atše sëndábamna y átsnaca soldadëngbe amëndayá

sëndmëna. Atše canye soldado stjauyana “motsa ca”, cha cachora jana; y inyá stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjnaná y chë ústonënga tojanéyana: —Ndegombre cbéyana, ni mo nyets Israelentše ni canya quem boyabasacá Bëngbe Bëtsábeñe nyëtšá ošbuachiyá chiyátinýena.

<sup>11</sup> Y šcuayana, shinýe bocanoicana y shinýe uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiama Bëngbe Bëtsabe amëndayoca, cányiñe juasama.

<sup>12</sup> Ba Israeloca entšanga, chë ndëmuanýëngbiama Bëngbe Bëtsabe amëndayana natsana yochtsanmëna, chocana mochantëbuacana chë ndëbinýna luaroye, infiernoye. Chentše puerte mochanjenóbošachna y chë tsetšanama juatsašënga mochantseoftëšjojnaye ca —Jesús tojánayana.

<sup>13</sup> Chora Jesús chë soldadëngbe amëndayábioye tbojaniyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá vojtsatsmëna.

**Jesús, Pédrëbe uambén mamábioye  
tbojanshná  
(Mc 1:29-31; Lc 4:38-39)**

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca vojtsajutsajona.

<sup>15</sup> Chora Jesús chë uambén mamabe cucuatšë tojánbojajo y cachora chë calentora tbojtšanóbojuanañe. Chorna

chë uambén mamá tojtantsbaná y tojanontsé chënga jobuácuedana.

**Jesús ba šoquënga tojanashná**

(Mc 1.32-34; Lc 4.40-41)

<sup>16</sup> Chë te jaibétatama ora, Jesús yojtsemnoye banga bacna bayëjëngbe juabna uambaye entšanga tmojanënatse. Chora, nÿe canÿe Jesús jöyebuambayëse chë bacna bayëjënga imojtsaisëbocana y nÿetsca šoquënga tojanashná. <sup>17</sup> Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaiás tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

**Chë Jesús juastama bošënga**

(Lc 9.57-62)

<sup>18</sup> Jesús tojánanÿe mallajta entšanga chabe shëconana; as tojanmandá uafjajónaye chenguana jama. <sup>19</sup> Chorna, canÿe ley abuatambayá Jesúsbioye tbojanobobëconá y tbojanianyana: —Buatëmbayá, atšë séntseboše aca juastama, ndëmoye chacojtsá choye ca.

<sup>20</sup> As Jesús tbojanianyana: —Chë zorrënga mondbomna cuevëšhënga ndayentšë jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentšë jóchnama ca.

<sup>21</sup> Chora inÿa, cach uatsjendayënguëntšá, Jesúsbioye tbojanianyana: —Bëngbe Utabná, šmolesenciá atšbe taitá chjshesabotbontsañe ca.

<sup>22</sup> Chora Jesús tbojanjuá: —Nÿe šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe ca.

**Jesús chë binÿia y chë béjaye bonguana yojétsbema**

(Mc 4.35-41; Lc 8.22-25)

<sup>23</sup> Chentšana Jesús canÿe barquëshoye tojánamashëngo y chabe uatsjëndayënga imojtsetjëmbambnaye.

<sup>24</sup> Ndeolpe tša jabuache binÿia chë uafjajónaye béjayiñe yojóshjango; nÿetšá jabuachana yojtsemna, chë olëshënga barquëshá imojtsétsbotsana. Y Jesús chora inétsomañe. <sup>25</sup> As chabe uatsjëndayënga tmojána Jesús jetsefsënama y tmojanianyana: —iBëngbe Utabná, šmatsebacá. Montsenatjëmbambana ca!

<sup>26</sup> Chora Jesús tojanéyana: —¿Ndayeca tša šmojtsauatja? ¿Tša batšatema šmojtsosbuaché, Bëngbe Bëtsá tšëngaftanga jujuabuáchama yobenama ca?

Chca tojanéyana y tojantsbaná. Chora tojanmandá chë binÿia y chë býyeshe bonguana chaotsatsmënama, y lempe natjëmbana yojtsatsmëna.

<sup>27</sup> Chabe uatsjëndayënga ojnanánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binÿia y chë býyeshe tmonjoyeuná ca.”

**Chë Gadara luaroca entšata, bacna bayëjbe juabna uambayata**

(Mc 5.1-20; Lc 8.26-39)

<sup>28</sup> Jesús uafjajónaye chenguana tojánashjango, canÿe luare Gadara ca uabáinentšë. Chorna chë utabuantsánëngbentšana útata, bayëjbe juabna uambayata, tojánbocna y Jesúsbioye tbojanobobëconata. Puerte tšatjayata ibnamna, chíyeca entšanga ndoñe ntsobenana chëjana jtsachñëjuanana; <sup>29</sup> y chora tbojanontsé chë bacna bayëjëngbeyeca mëntšá uayebuáchana: —¿Ndayá béngaftaca

cojtseboše, Jesús, Bëngbe Bëtsabe Uaquíñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

<sup>30</sup>Chentša béconana ba cotšënga imnajena y chënga imnétsosañe. <sup>31</sup>Y chë bayëjënga Jesús tmojanimpadá: —Muentšana jésecocanama aca tcojamëse, cochjama bënga chë cotšëngbeñe fchayamashjna ca.

<sup>32</sup>Y Jesús tojanéyana: —Motsajna ca.

Chora chë bayëjënga chë boyabásatbentšana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjájónayoye imojtsoshbuetse y yojsatajo.

<sup>33</sup>Chora chë cotšënga anýenënga tmojtsanacheta, y chë puebloye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca.

<sup>34</sup>Chora nyetsca entšanga chë pueblentšana tmojánbocana y Jesús yojtsemnoye tmojána. Chë entšanga Jesús tmojáninýe ora, tmojanimpadá chë luarentšana chaueseboचना.

**Jesús, canýe jama ndobenábioye tbojanshná**

(Mc 2.1-12; Lc 5.17-26)

**9** <sup>1</sup>Chca tojanopasá chentšana, Jesús canýe barquëshoye tojánamashëngo, uafjájónaye chenguana tojána y cachabe puebloye Capernaumoye tojtanashjango. <sup>2</sup>Chora, canýe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninýe chënga tša imojtsošbuáchema chë šocábioye jáshnama cha bëtsobenama; as chë šocábioye tbojaniyana: “Sobreno, añemo matsca; acbe bacna soyënga tcbontseboperdoná ca.”

<sup>3</sup>Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafjoyenguangcá entsemna ca.”

<sup>4</sup>Pero Jesús yojtsetátšëmbo ntšamo chënga imojtsejuabnaycá; chíyeca tojanéyana: “¿Ndáyeca nyëtšá bacna juabnënga ainaniñe šmojtsebomna ca? <sup>5</sup>¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca?’ <sup>6</sup>Atše cbochanjínýanyíye ntšamo chë Bëngbe Bëtsá Entšá tbojanbemá quem luarentše mando yobomnana, entšanga bacna soyëngama jáperdonama ca” —Jesús tojanéyana.

As chë jama ndobenábioye tbojaniyana: “Matëtsbaná, acbe tjuashe mesocíe y acbe yebnoye motsatoñe ca.”

<sup>7</sup>Chorna chë jama ndobená tojtantsbaná y cachabe yebnoye yojsatoñe. <sup>8</sup>Chca tmojáninýama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

**Jesús, Matéobioye tbojanchembo chabuastama**

(Mc 2.13-17; Lc 5.27-32)

<sup>9</sup>Jesús chentšana tojtsonoñe y canýe entšábioye tbojáninýe, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojaniyana: “Šmasto ca.” As Mateo chentšana tojéftsantsbaná y tbojanasto.

<sup>10</sup>Jesús cach Mateobe yebntše yojtseye ora, banga Romocama impuesto entšángbioye atjanayënga y inýenga bacna soye amënga tmojánashjajna y mesëshentše

Jesús y chabe uatsjéndayëngaftaca imojotbiama. <sup>11</sup> Chë fariseunga chca tmojáninÿe ora, Jesusbe uatsjéndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë šoquënga aïñe. <sup>13</sup> Šmochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrenguiñe:

Atše séntseboše tšëngaftanga  
lastemadënga chašmotsemna,  
y ndoñe nÿe bayënga  
chašmotsëbánaye Bëngbe Bëtsá  
jëtschuayama ca.

Atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

**Jesús tmojantjá chë Bëngbe  
Bëtsáftaca jencuéntama tondaye  
saytescama**

(Mc 2.18-22; Lc 5.33-39)

<sup>14</sup> Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

<sup>15</sup> As Jesús tojanéjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana

mochantsánatseñe; chora cocayé chë ófjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjéndayëngaftacna.

<sup>16</sup> “Ndocná canÿe uatanguá entšayá base tsëm entšëjuaca jtarmëndana. Er chë tsëm entšëjua jtsabëconana y chë uatanguá entšayá más jtsatanëcanana, y chca chë uátanëcniñe más bëtsiñe jtsabemana. <sup>17</sup> Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámama; y chca, chë jasabenga y chë vínoye jtsoservénana ca” —Jesús tojánayana.

**Jesús canÿe shembásabioye  
tbojanshná y tojanma Jairëbe  
bembetema cháuatayenama**  
(Mc 5.21-43; Lc 8.40-56)

<sup>18</sup> Jesús entšanga yojtsëtsëntscuana, chë judiëngbe enefjuana yebnentša canÿe mandayá tojánashjango y Jesusbe shecuatšëntše vojoshamentšiyë. Chë mandayá tbojaniana: “Atšbe bembe tontsóbana. Diosmanda atšbe yebnoye mabo; cochjabojojajo y cha echántayena ca.”

<sup>19</sup> Chentšana Jesús y chabe uatsjéndayënga chë mandayá tmojanasto. <sup>20-21</sup> Imojtsaye ora, canÿe shembása stëtšoiçana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nÿe mo chabe entšayá sibiájua chajjuábojojajo, salud

chantinýena ca.” Chentšana chë šocá Jesuſbe entšayá tojanábojajo.

<sup>22</sup> Tojanábojajo ora, Jesús tojanobuértana, chë shembásabioye tbojáninýe y tbojanianyana: “Añemo matsca, shembása. Bëngbe Bëtsábeñe icošbuachéyeca, mora tšabá contsatšmëna ca.” Y cach orscana cha tšabá yojtšatsmëna.

<sup>23</sup> Chënga tmojtëtanontšë ayana y chora chë mandayábioca chënga tmojánashjajna. Chentše Jesús tojánanýe, ínýengna chë veloriama imojtsanflautaye y ínýengna tša imojtšoſachiye. <sup>24</sup> Chora Jesús tojanéyana: “Muentšana mobocnënga. Chë shembásetema cabá ndoñe obaná quenátšmëna; nýe endëtsomañe ca.”

Pero chë entšanga Jesúsbioye nýe imojtsáfchaye. <sup>25</sup> Pero Jesús pronto chënga chë yebnentsšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. <sup>26</sup> Y nýets chë luarëjana ndayá Jesús yojamama nýetsca entšanga imojátatšëmbona.

### Jesús uta jtanata tojanashná

<sup>27</sup> Jesús chentšana tojéftsanbocna ora, uta jtanata tbojanasto y mëntšá ibojtsaiuáyebuache: —iDavídbentsšana Entšá, bëndata šmotsalastemá ca!

<sup>28</sup> Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtšoſbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanéyana: —Ntšamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinýama ibojtsobena. Jesús bëtscá chata mëntšá

tojanamëndá: —Ndocná más quem soye chaondëtsetatšëmbo ca.

<sup>31</sup> Pero chata chentšana tbojéftsanbocna y cachora tbojanontšë ndayá Jesús chátaftaca tojanmama nýets chë luarëjana jacúntana.

### Jesús, canýe ndëbiábioye tbojanshná

<sup>32</sup> Chë jtanata ibojtsebocanëntscuana, básefta entšanga canýe ndëbiá, bacna bayëjbe juabna uambayá, Jesúsbioye tmojanamba. <sup>33</sup> Jesús chë bacna bayëja chábensšana tbojtanaóbocna y cachora chë ndëbiá tojtanontšë oyebuambnayana. Entšanga ojnánánënga imojtsichamo: “iNdocna te Israelentše chca bëts soye chemuáisinýe ca!”

<sup>34</sup> Pero chë fariseunga imojtsichamo: “Cach bacna bayëjëngbe amëndayá, Satanás, muábioye obenana tbojatštá chë bayëjënga entšángbentsšana jtëbuacanama ca.”

### Jesús entšangbiana tbojanongmé

<sup>35</sup> Jesús nýetsca pueblënguëjana y luarënguëjana yojtšachnëjuana y chë judiëngbe enefjuana yebnënguenache entšanga yojtšabuátambaye.

Yojanabuayiná chë tšabe noticiënga Bëngbe Bëtsabe amëndayama, y nýetsca šocanëngama y tsetšanama yojánashnaye. <sup>36</sup> Y chë entšanga tojánanýe ora, puerte tbojanongmé. Er chënga imojtsemna mo abujénýa ndbomna oveshëngcá, puerte uamëntšnayënga ba soyëngama padecena causa, y chaújabuachama ndocná ntsebmncá. <sup>37</sup> Chora chabe uatsjëndayënga tojanéyana: “Canýe bëts jajañe bëtscá játbanama entsemna, pero peonga nýe báseftanga. Cachcá quem luarentše, bëtscá entšanga Bëngbe Bëtsábioye nduabuátmënga



montsemna, y chéngbioye chabiamá  
abuayinayènga nÿe báseftanga.  
<sup>38</sup>Peonga tmojtsashbenèse chë  
nduínbioye jaimpádana ba peonga  
chauichamoma chë jaja saná  
játbanama. Cachcá, Bèngbe Bètsábioye  
moimpadanga ba abuayinayènga  
chauichamoma, quem entsànga  
chábioye chamúbuajama ca” —Jesús  
tojanéyana.

**Jesús chë bnétsana uta  
uatsjéndayènga tojanabacá**  
(Mc 3.13-19; Lc 6.12-16)

**10** <sup>1</sup>Chentsána Jesús  
tojánachembo chabe bnétsana  
uta uatsjéndayènga, y obenana  
tojanatsatá bacna bayèjèngbe juabna  
entsángbentsána jtabocnama y  
nyetsca šocanèngama y tsetšanama  
jashnayama.

<sup>2</sup>Chë bnétsana uta uatsjéndayènga  
mèntšá imojanabaina: chë natsaná  
Simón, Pedro cánaca uabainá y chabe  
uabentsá Andrés; Santiago y chabe  
uabentsá Juan, Zebedeobe uaquiñata;  
<sup>3</sup>Felipe y Bartolomé; Tomás y Mateo,  
chë Romocama impueste entsángbioye  
atjanayá; Santiago, Alfeobe uaquiñá  
y Tadeo; <sup>4</sup>Simón, chë celote ca  
uabobainá y Judas Iscariote, chë  
uayayèngbe cucuatšíne Jesúsbioye  
boshjuaná.

**Jesús, chabe bnétsana uta  
uatsjéndayènga tojanichamó,  
Bèngbe Bètsabe améndayama  
jábuayenama**  
(Mc 6.7-13; Lc 9.1-6)

<sup>5</sup>Jesús chë bnétsana uta  
boyabásenga tojanichamó chë tšabe  
noticiènga entsànga jabuátambama, y  
mèntšá tojanabuayená: “Chë ndoñe  
judièngbeñe ndoñe šmattsana y  
ndaye pueblentše Samaria luaroca

ndoñe šmatjéftsamashjna. <sup>6</sup>Nÿe  
Israeloca pueblèngoye šmochjá. Choca  
entsànga mo ótšena oveshèngcá  
montsemna, Bèngbe Bètsábioye  
corente nduabuatma causa. <sup>7</sup>Šmochjá  
y entsànga šmochjábuayenaye  
Bèngbe Bètsabe améndayana  
echanjóshjanguama. <sup>8</sup>Chë šoquènga  
šmochjášhnaye, šmochjama chë  
obanènga chámuatayenama,  
bacna nguayanánaca šoquènga  
šmochjášhnaye y bacna bayèjèngbe  
juabna entsángbentsána šmochtábocna.  
Chë obenana šmonjóyèngacñe tondaye  
ntjètsajuacá; cachcá, chë soyènga  
šmojtsamama tondaye entsànga  
šmattsayèngacaye.

<sup>9</sup>“Ndoñe šmattsambaye crocénana  
uasnanèchiñe. <sup>10</sup>Ni shecnaja sanaca  
benachiñama, ni inÿe entsáyá  
jtse nomódama, ni shecochëtjonèshènga,  
ní jatjonèfja, er chë tšabe trabajayá  
jtsomerecénana ntšamo tbojtsajabotcá  
jóyèngacñama.

<sup>11</sup>“Nderado canÿe bèts pueblentše  
o base pueblentše chašmojášhajna  
ora, šmochjáanguango canÿe tšabe  
entsá, inÿèngbioye ndaingñayá, y  
chabe yebnentše šmochtsoquedañe,  
inÿe pueblote játantscuana. <sup>12</sup>Canÿe  
yebnoye chašmojámashjna ora,  
nyetsca chentsa oyenènga mèntšá  
šmochjácheuaye: ‘Chë bèngbe  
ainaniñe tšabe ebionana tšèngaftangbe  
ainaniñe chaotsemna ca.’ <sup>13</sup>Chë  
yebnentša entsànga ainaniñe tšabe  
ebionana jtse bomnama merecido  
tmojtsebuajonèse, chë tšèngaftangbe  
ainaniñe tšabe ebionana chéngaftaca  
chaotsemna. Ndoñesna, nÿe cach  
tšèngaftangaftaca chaotsemñe.  
<sup>14</sup>Y nderado canÿe pueblentše  
o bèts pueblentše chë entsànga ndoñe  
tcmónjúbuaja y ndoñe tcmónjóyaunase,  
chentsána šmochjésebocana y chë

shecuatšentša polvêshe šmochjésenstoto. Chca, chë entsanga mochántsetatšëmbo chënga tšëngaftangafatacanda nõne tšabá tmonjamama. <sup>15</sup>Ndegombre šcuayana, quem luare jopochócama te, chë nõne chacmonjúbuaja y nõne chacmonjoyauná entsanga Bëngbe Bëtsá puerte jabuache echantsacastígaye, y chë bacna entsanga Sodomay Gomorra luaroquëngna nõne nýa nyëtšá jabuache queochatacastígaye ca” —Jesús tojánayana.

**Ntšamo chë uatsjëndayënga mochjansúfria**

<sup>16</sup>“Šmochjouena. Atšë cbontsachamná mo oveshënga cuenta tjañe quešëngbeñe. Chíyeca studio bomnënga mo mëtšcuayëngcá šmochtsemna y uamanënga mo palomatemëngcá. <sup>17</sup>Entšangbiama cuedado šmochtsebomna, chëngbe pueblentša amëndayëngbe cucuatšinë tšëngaftanga cmochanjábashejuana y chëngbe enefjuana yebnënguenache cmochanjátsetšenaye. <sup>18</sup>Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë nõne judiëngbeñe ntšamo atšbiama šmotatšëmbcá jóyebuambayama. <sup>19</sup>Pero chë mandadëngbe cucuatšinë chacmojábashejuana ora, ntšamo o ndayá šmochjayanama nõne šmattsenócochinýena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama. <sup>20</sup>Tšëngaftanga nõne chë oyeuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espiritu, tšëngaftangbiajana echantsóyebuambnaye.

<sup>21</sup>“Y canýe entsá cachabe catsátbioye uayayëngbe cucuatšinë bochanjáboshjona chamotsóbama; y canýe taitá cachabe uauquiñábioynaca. Y chë básenga chëngbe bëtšétsangbe contra mochántsemna y uayayëngbe cucuatšinë mochanjábashhejuana chamotsëbáyama. <sup>22</sup>Tšëngaftanga atšbe ústonënga bëtsemnama, nyëtscas entsanga cmochantsëbuayënja; pero nda nyëtstempo átšbeñe ošbuachiyá chaotsomñá, atsbocaná echántsemna. <sup>23</sup>Canýe pueblentšë chacmojtšécamena ora, nyë puebloye šmochtsacheta. Ndegombre cbéyana, Israalentša nyëtscas pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

<sup>24</sup>“Ni canýe uatsjëndayá chabe buatëmbayabiama más uamaná ntsemnana, ni chë oservená chabe nduiñbiama más uamaná. <sup>25</sup>Chë uatsjëndayá ya cachabe buatëmbayacá jtsemnama tojashjáchëse, ndayá más nanjátšboše. Cachcá endmëna chë oservenáftaca, cachabe nduiñcá tojtsemnëse. Atšë sëndmëna mo canýe yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobuatma ca?” —Jesús tojanéyana.

**Nda ndegombre cuantsebiauatja**  
(Lc 12.2-7)

<sup>26</sup>“Chíyeca entsangbiama nõne matauatjëngana. Chë yoiytëmena soyentsana tondaye ntjinýcá queochaisoquëda, y chë ndótatšëmbo soye, ntšotatšëmbcá queochaisoquëda. <sup>27</sup>Chë mora cbontsëtsëtsná soyënga, chë entsangbiama mo ibetiñe cuaftsemncá soyënga, tšëngaftanga

šmochjama entsānga botamana  
chama chamotsetatšēmbuama.

Y chē iytēcana cbontsētsētná  
soyēnga n̄yetsca entsānga

šmochtsabuayiynaye, mo nda  
can̄ye yebnentša tsbanánocana  
noticiēnga tojtsayebuachcá.

<sup>28</sup>Ndoñe matauatjēngana n̄ye chē  
tšēngaftangbe cuerpo japochócama  
imobenēngbiama y ainana  
jtsepochócama ndoñe ntsobenana.  
Más šmochtsebiauatja chē nda  
endobena tšēngaftangbe cuerpo y  
tšēngaftangbe ainana jtsepochócama,  
n̄yetsca tescama infiernoca.

<sup>29</sup>“Uta jaja shloftšetémata  
n̄ye can̄ye denario crocenánama  
mondbétsena. Masque chca, ni  
cán̄yetema obanatemala fshantsoye  
jotsatsana, tšēngaftangbe Taitá,  
Bēngbe Bētsá ndoñe tontsebošēse.  
<sup>30</sup>Y tšēngaftangbiama, Bēngbe  
Bētsá botamana jtsantješnana, y  
chca, cha lempe tšēngaftangbiama  
jtsetatšēmbuana, bueta stjēnashēnga  
tšēngaftangbe bestšasiñe  
yomnámna. <sup>31</sup>Chíyeca ndoñe  
matauatjēngana, tšēngaftanga ba jaja  
shloftšetémēngbiama corente más  
šmonduámna ca” —Jesús tojánayana.

**Ndabiama Jesucristo yochjayana**

**chabe entsá yomna ca**

*(Lc 12.8-9)*

<sup>32</sup>“Nda atšbe entsá yomna ca  
entsāngbe delante tojayanabiama,  
átšnaca, atšbe Taitá, chē celoca  
endmēnabe delante chanjayana cha  
atšbe entsá yomna ca. <sup>33</sup>Pero nda  
entsāngbe delante atšbe entsá ndoñe  
yondmēna ca tojayanabiama, átšnaca,  
atšbe Taitá, chē celoca endmēnabe  
delante chanjayana cha atšbe  
entsá ndoñe yondmēna ca” —Jesús  
tojanéyana.

**Jesube causa, entsāngbeñe más  
jtsentsjanayana**

*(Lc 12.51-53; 14.26-27)*

<sup>34</sup>“Ndoñe šmattsejuabnaye atše  
quem luaroye tijabo n̄yetsca entsānga  
natjémbana chamotsiyenama. Atše  
chama ndoñe chiyátabo; atše  
sēnjabo causa, entsānga más  
mochántsejtsjanaye. <sup>35</sup>Atše sēnjabo  
chē uaqiñá cachabe taitabe contra  
chaotsemnana, chē bembe cachabe  
mamabe contra y chē bebinuá  
chabe uambén mamabe contra  
chaotsemnana. <sup>36</sup>Y chca, ba entsāngbe  
uayayēnga cachēngbe pamíllanga  
mochántsemna.

<sup>37</sup>“Nda cachabe taitá o mamábioye  
atšbiama más tbojtsebobonshánēse,  
cha ndoñe ntsomerecénana atšbe  
entsá jtsemnana. Nda cachabe  
uaquiñá o bēmbēbioye atšbiama más  
tbojtsebobonshánēse, cha cach ndoñe.  
<sup>38</sup>Y nda n̄yetsca chabe quem luare  
soyēnga ndoñe tonjésebohshjona atše  
juastama, y atšbiama jasúfriama ndoñe  
tontseprontana y cruciñe jobanámna,  
cha ndoñe ntsomerecénana atšbe entsá  
jtsemnana. <sup>39</sup>Nda tojtsentšena quem  
luarentše bētscá soyēnga jtsebomnana  
y atšbiama jasúfriama ndoñe  
tontseprontana, chē n̄yetsca tescama  
yomna tsabe vida echanjobuetše. Pero  
nda quem luarentša soyēnga cachcá  
tojesonýá atše juastama, masque  
chaóbana, chē n̄yetsca tescama yomna  
tsabe vida echántsebomna ca” —Jesús  
tojánayana.

**Chē uacanana soyēnga**

*(Mc 9.41)*

<sup>40</sup>“Nda tšēngaftanga chacmojúbuaja,  
átšnaca cha šochanjofja; y nda atše  
chašojofja, chē nda šojichmóbioynaca  
cha bochanjofja. <sup>41</sup>Nda can̄ye Bēngbe

Bëtsabe juabna oyebuambnayábioye tbojyeyuná, cha chca bétsemnama, chábioye Bëngbe Bëtsá canye uacanana soye bochántatšetaye, mo cach Bëngbe Bëtsabe juabna oyebuambnayabe uacanana soycá. Y nda canye nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canye uacanana soye bochántatšetaye, mo cach nyetsca soyënguiñe tšabá amabe uacanana soycá. <sup>42</sup> Y ndánaca, tšëngaftanguentšá canye nduamanábioye masque nje mo base býeshtema tbojuabuatšetá, atšbe ustoná bétsemnayeca, ndegombre Bëngbe Bëtsá canye uacanana soye chábioye bochántatšetaye ca” —Jesús tojánayana.

#### Juan chë Ubayanabe ichmónënga

(Lc 7.18-35)

**11** <sup>1</sup> Jesús tojanpochocá chabe bnétsana uta uatsjédayënga jábuayenama, y chentšana tojtsanoñe chë luariñe pueblënguenache oyena entšanga Bëngbe Bëtsabe palabra jabuátambama y jábuayenama.

<sup>2</sup> Chë tempo Juan chë Ubayaná cárceloye tmojanëtame. Choca cha vojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, <sup>3</sup> mëntšá jatjayama: —¿Aca ndegombre cojtsemna chë jabama ibojanmëná, chë Uámana Uabuyaná, o šojtsamna ínñabiama jatobátmama ca?

<sup>4</sup> Chca tmojantjá orna, Jesús tojanéjua: —Šmochjá y Juan šmochjauyana ntšamo šmououena y šmojinýcá. <sup>5</sup> Cha šmochjacuénta: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë

obanënga tmontayena y chë ndbomnjëmëngbioye chë tšabe noticiënga montsabuyayná ca.

<sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojánëyana.

<sup>7</sup> Chënga tmojtsatanoñe ora, Jesús tojanontšé Juanbiana chë entšanga jáuyanana, mëntšá: “Juan jinýama šmojánbocana ora, ¿ndayá jinýama chë entšanga ndoyena luaroye šmojánbocana? ¿Canye entšá ainaniñe tondaye añemo ndbomná, mo canye šëše bínýiaca shatiyeynëšcá?

<sup>8</sup> Y ndoñese, ¿ndayá jinýama choye šmojánbocana? ¿Canye boyabása uámana entšayaca bopormaná? Ndoñe. Tšëngaftanga šmondétatšëmbo chë boyabásenga uámana entšayaca bopormánëngna chë mándayëngbe yebnënguiñe mondbétsiyenama. <sup>9</sup> Y asna, ¿ndayama choye šmojánbocana? ¿Canye Bëngbe Bëtsabe juabna oyebuambnayá jinýama? Ndegombre, aínë; y cbéyana, ndegombre cha canye Bëngbe Bëtsabe juabna oyebuambnayabiama más bëtsá endmëna. <sup>10</sup> Cha, Juan, endmëna ndabiama Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana  
sënjichmó acbiana  
chaóyebuambama,  
entšanga jábuayenama aca jabama  
ainaniñe tšabe juabnéngaca  
chamotseprontánama ca.

<sup>11</sup> Ndegombre cbéyana: Nyets tempo entšángbeñe, ndocná quenátšmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná,

más bĕtsá echántsemna ntšamo mora Juan yomnama.

<sup>12</sup>“Juan chĕ Ubayaná tojánabo orscana méntscóñama, bĕtscá entšanga tša mondboše Bĕngbe Bĕtsabe améndayoye jamashĕnguama, y chĕ Bĕngbe Bĕtsabe améndayama contra imomnĕngna, chĕngbe nĕyets añémoca montseboše chĕ mándayana jtsepochoćama. <sup>13</sup>Juan candabĕntscuana, nĕyetsca Bĕngbe Bĕtsabe juabna oyebuambnayĕnga y Moisesbe Ley nĕye Bĕngbe Bĕtsabe améndayama tmonjanobuambá.

<sup>14</sup>Y tšĕngaftanga chĕ soyĕnga jóyĕngacñama šmojtsebošĕse, Juan entsemna chĕ Bĕngbe Bĕtsabe juabna oyebuambnayá Eliascá, chĕ jabama ibojamná. <sup>15</sup>Chĕ jouenama tmojtsobenĕnga, chamouena ca” —Jesús tojánayana.

<sup>16</sup>Mĕntšánaca Jesús tojánayana: “¿Ndayacá morsca entšanga imomna? Chĕnga mondmĕna mo chĕ plazĕngoca mondbetsetbiámama basetemĕngcá; chĕnga chĕngbe enutĕngbioye jtsayebuáchana <sup>17</sup>y mĕntšá jtschámuaana: ‘Tšĕngaftangbiamá fsĕnjaflautá y ndoñe chešmatslantsá; ngmĕnaca fsĕnjaversiá y ndoñe chešmatošachna ca.’ <sup>18</sup>Juan tonjánabo, y bĕtscá entšángbeñe ndoñe quenjatamana ni jasana, ni jofšiyana, y entšanga montsanichamo chana bacna bayĕjbe juabna uambayá yojamna ca. <sup>19</sup>Morna, chĕ Bĕngbe Bĕtsá Entšá tbojanbemá tonjabo, y chana añĕ entsamana bĕtscá entšángbeñe jtsesayana y jtsofšĕšnayana, y entšanga montsichamo chana yapa uasayá y vínoye tmoýá entsemna ca y Romocama impuesto entšángbioye atjanayĕnga y bacna soye amĕngbe amigo ca. Pero Bĕngbe Bĕtsá endbĕtsinĕyanĕyaye cha nĕyets

osertánana bomná yomnama, chĕ ndayá cha tojama ora ndayá chentšana tojóbozna soyĕngaca ca” —Jesús tojánayana.

### Chĕ nduauenana entšanga

(Lc 10.13-15)

<sup>20</sup>Chentšana Jesús tojanontšĕ jucácana chĕ entšanga, ndĕmuanĕyenga imojoyena chĕ pueblĕnguĩñe ndayenache ba chabe bĕts soyĕnga tojanma, chĕnga bacna soyĕnga amana ndoñe tmontsanajbanama y Bĕngbe Bĕtsabe benache ndoñe tmontanishachama. Mĕntšá yojsichamo: <sup>21</sup>“iTša lastema, Corazín puebloca entšángbiamá! iTša lastema, Betsaida puebloca entšángbiámna! Chĕ chentšĕ sĕnjama bĕts soyĕnga, Tiro y Sidón bĕts pueblĕnguentšĕ matĕnjochnĕnguse, chentša bacna entšanga ya tempo ngmĕnaca matmĕntenojuabó chĕngbe bacna soyĕngama y Bĕngbe Bĕtsabe benache matmĕntishache; y chca tmojamama chaotsótatšĕmbuama uajojšĕha entšayangaca matmĕntoportomanga y chĕngbe bestšašĩñe jatinyá matmĕnjenotbótoto. <sup>22</sup>Pero ndegombre cbĕyana, ntšamo entšanga tmojamama, tšabá o ndoñe tšabá bĕtsemnama jayanama chaojobuache ora, tšĕngaftanga más bĕts castigo šmochántsebomna, chĕ Tiro y Sidonoca bacna entšángbe castiguama. <sup>23</sup>Y tšĕngaftanga, Capernaumoca entšanga, ¿šmojtsejuabná celóntscoca atsebánanĕnga šmochtsemna ca? ¡Chĕ uabouana infiernoye cmochantsĕsetjanglo! Chĕ muentšĕ sĕnjama bĕts soyĕnga Sodomoca matĕnjochnĕnguse, choca entšanga ya tempo ngmĕnaca chĕngbe bacna soyĕngama matmĕntenojuabó y Bĕngbe

Bëtsabe benache matméntishache, y chë bëts pueblo cabá cachá mëntscuana mantomñe. <sup>24</sup> Pero ndegombre cbéyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nyëtšá jabuache quemochatacastígaye ca” —Jesús tojánayana.

“Atšbioye mabënga y šmochjóchna”

(Lc 10.21-22)

<sup>25</sup> Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nÿe batšá tatšëmbënga tcojanÿanÿé, chë tša tatšëmbënga y osertánëngbiana tcojaiytëme soyënga. <sup>26</sup> Aíñe, chama cbontsadorana, Taita, chca chaotsemnama tcojábosenayeca.

<sup>27</sup> “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndábioye chë Uaquiñá tojtseboše nda chë Taitá yomnama jinÿanÿiyama, chánaca chë Taitábioye bochantsábuatma.

<sup>28</sup> “Atšbioye mabënga nyëtšca tšëngaftanga uamëntšnayënga y bëts cá trabajo uangménënga, y atše chanjama tšëngaftanga chašmochnama. <sup>29</sup> Ntšamo canÿe entšá, uacná yuguëšiñe juabatsécana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentšana šmochjuatsjinÿe: atše uantado méná šëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmoma. <sup>30</sup> Mo canÿe uacnacá, ndoñe tishuta yuguëseca

o ndoñe uauta uasmanéshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyëtšca soyënga jamama echántsemna ca” —Jesús tojánayana.

Jesusbë uatsjëndayënga ochnayté

trigo tmojanátabebe

(Mc 2.23-28; Lc 6.1-5)

**12** <sup>1</sup> Chë tempo, Jesús canÿe ochnayté canÿe jajajana yojtsachñëjuana. Chabe uatsjëndayëngna shëntseca imojtsemna, chíyeca tmojanontsé trigo juatabebiana y chë meshënga jasana.

<sup>2</sup> Chë fariseunga chca tmojáninÿe ora, Jesús tmojanianya: —Minÿe, acbe uatsjëndayënga canÿe soye montsama y chë soye ochnayté jamama ndoñe quenátslesenciana ca.

<sup>3</sup> As Jesús tojanéyana: —¿Ndoñe šmëndualía y šmondétátšëmbo ndayá David y chabe enutënga tmojanmama, shëntseca imojtsemna ora? <sup>4</sup> Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inÿinÿnaye tandëšënga yojase. Chë tandëše nÿe ndánaca jasama ndoñe yonjalesenciana, ni Davidbiana, ni chabe enutëngbiana. Nÿe bachnangbiana belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca. <sup>5</sup> ¿O ndoñe šmëndualía y šmondétátšëmbo, Moisesbe leyinÿe, chë bachnanga ochnayté Bëngbe Bëtsabe bëts yebntšë jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? <sup>6</sup> Y atše šcuayana: Muentše canÿa entsemna, cha chë

Bëngbe Bëtsabe bëts yebnentša bachnangbiama más uamaná endmëna y chabe amëndayoca soyënga más entsámána chë bachnangbe mándayentša soyëngama. <sup>7</sup>Bëngbe Bëtsabe uabemana palabrënguine mëntšá endayana:

Atše sëntseboše tšëngaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuayama ca.

Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiama. <sup>8</sup>Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

**Chë buashana cucuatše bomna entšá**

(Mc 3.1-6; Lc 6.6-11)

<sup>9</sup>Chentšana Jesús tojtsanoñe y chentša judiëngbe enefjuana yebnoye tojánamashëngo. <sup>10</sup>Chentše yojtsemna canÿe boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canÿe ochnayté sóca jáshnama ca?

<sup>11</sup>Y Jesús tojanéjua: —¿Nda tšëngaftanguentšá, canÿe oveshá tbojtsebomna y nÿa chë ochnayté canÿe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? <sup>12</sup>iEntšá oveshabiana puerte más uamaná endmëna! Chcasna, entelesenciana chë ochnayté tšabe soye jamama ca —Jesús tojanéyana.

<sup>13</sup>Chora Jesús chë buashana buacuatše bomnábioye tbojanayana:

“Macuenÿanéjaná ca.” Y chë boyabásana tojanacuenÿanéjaná y chora chëtšá tšabá yojtsatamna mo cach inÿetšacá. <sup>14</sup>Pero chë fariseunga tmojésanbocana ora, tmojanontšë juabnayana ntšamo jamëse Jesús jóbama.

**Ndayá chë Bëngbe Bëtsabe juabna oyebuambnayá Jesusbiana tojánayana**

<sup>15</sup>Jesús chë soye tojántatšëmbona ora, chentšana tojtsanoñe y ba entšanga tmojanasto. Nÿetsca šoquënga tojanashná, <sup>16</sup>y tojanamëndá chabiana entšangbeñe ndoñe chamondëtsóyebuambnama. <sup>17</sup>Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

<sup>18</sup>Muentše atšbe oservená entsemna.

Atše cha sënjabocacá, atšbe bonshaná, y atše corente chabiana sëntsoyejuá.

Atše chanjama atšbe Espíritu chabe ainaniñe chaotsemnama y entšanga echanjabuayená, Bëngbe Bëtsá nÿetsca luarënguentshana entšangbiama yochjayanama chënga tšabá o ndoñe tšabá tmonjamama.

<sup>19</sup>Cha ndoñe queochátayajuatsana, ni queochátschembumbuana. Chabe oyebuambnayana tsáshenañe ndocná queochatuena.

<sup>20</sup>Mo nda chë atcana šëše ndoñe más jatsndbemana, chë ndobenënga cha ndoñe queochátapochocaye. Mo nda chë quinÿenëfjua nÿe uabojátšena uajuinÿnëfjua ndoñe ntsafsánana, chë Bëngbe Bëtsábeñe jtsošbuáchiyama

imojtsebojátšangbe obatmanana  
chábeñe, cha ndoñe  
queochátabuajuanaye.

Cha nyets añemoca  
echanjéftsetrabája,  
entsanga chéngbe ainaniñe Bèngbe  
Bètsabe ndegombre soyènga  
chamóyèngacñèntscuana.

<sup>21</sup> Y nyetsca luarènguentšana  
entsanga chábeñe  
mochantsobátmana ca —cha  
tojánayana.

**Fariseunga tmojánayana Jesús  
Satanásbentšana obenana  
tojanóyèngacñe ca**

(Mc 3.20-30; Lc 11.14-23; 12.10)

<sup>22</sup> Chora, Jesús yojtsemnoye canye  
boyabása jtaná y ndébiá tmojanánatse.  
Chana bacna bayèbe juabna  
uambayá inamna; y Jesús chábioye  
tbojanshná, chabuatabínynama y  
chabuatauénanama. <sup>23</sup> Y nyetsca  
entsanga ojanánènga imojtsichamo:  
“¿Mua yojtsemna chë Davídbentšana  
Uámana Entśá, chë Cristo ca?”

<sup>24</sup> Pero chë fariseunga chca  
tmojanuena ora, imojtsichamo:  
“Beelzebú, cach Satanás, chë bacna  
bayèjèngbe améndayá, quem  
boyabásabioye obenana tbojatštá chë  
bayèjènga chauatèbuacnama ca.”

<sup>25</sup> Y Jesús yojtsetátšëmbo ntšamo  
chènga imojtsejuabnayama; as  
tojanéyana: “Canye améndayentše  
entsanga tmojtsenojátá y  
tmojtsenáyase, cachènga  
jenpochócana. Cachcá, canye  
bèts pueblentša entsanga o canye  
yebnentša pamíllanga tmojtsenojátá  
y ndoñe tmonseneyeunanèse,  
chènga ndoñe tšabá nyets tempo  
quemochátsmèna. <sup>26</sup> Cachcá, Satanás  
cachabe bayèjènga jtèbuacnama  
tojtsebošèse, chana tojtsenojátá y

cachabe contra yojtsemna. Y chca,  
¿ntšamo nantsobena chabe mándayana  
quem luarentše jéftsebojnana?

<sup>27</sup> Tšèngaftanga šmotsichamo  
atše Beelzebube obenánaca chë  
bayèjènga stsatèbuacana ca; pero chca  
ndegombre tojtsemnèse, ¿ndábeyeca  
tšèngaftangbe usetonènga obenana  
imojtsebojna chë bacna bayèjènga  
jtèbuacnama? Chíyecna, chènga  
montsinýinýná ntšamo ndegombre  
yomnana y tšèngaftanga ndoñe  
ndegombre soye šmotsichámuama.  
<sup>28</sup> Y atšana, chë Bèngbe Bètsabe  
Espíritbeyeca chë bayèjènga  
entsángbentšana sèndètèbuacana;  
y chë soye entsinýinýná Bèngbe  
Bètsabe améndayana tšèngaftangbioye  
tojóshjanguama.

<sup>29</sup> “¿Ntšamo nda nanjobenaye  
canye corente añemo bomna entsabe  
yebnoye jamashènguana y chabe  
soyènga jtsebocana, ndoñe natsana  
chábioye tconjshètsebatsèquèse?  
Nye tcojshètsebatsèquèсна aíñe  
cuanjobenaye cha jefcana. Atše ya chca  
Satanássoftaca sènjama.

<sup>30</sup> “Nda ndoñe átšeftaca tontsemná,  
atšbe uayayá jtsemnana. Y nda  
átšeftaca ndoñe tontsetrabája, chana  
atšbe contra jtsetrabájayana.

<sup>31</sup> “Chíyecna cbéyana, Bèngbe Bètsá  
entsanga echanjáperdonaye nyetsca  
chèngbe bacna soyènga y chë Bèngbe  
Bètsabiana puerte bacá oyeuambnayana,  
mo chábioye cuafjoyenguangcá; pero  
ndoñe queochátaperdonaye chë Uámana  
Espíritbiana puerte bacá ichámènga.

<sup>32</sup> Bèngbe Bètsá bochanjaperdóna  
chë Cha Entśá tbojanbemabiana  
ndoñe tšabá ichamuábioye; pero chë  
Uámana Espíritbiana ndoñe tšabá  
ichamuábioyna, ni quem luarentše, ni  
ndocna te queochatsperdóna ca” —Jesús  
tojánayana.



**Tšabe betiye o ndoñe tšabe betiye  
tondmënama, jtsotatsëmbuana  
ntšamo tojashajoncá**  
(Lc 6.43-45)

<sup>33</sup>“Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá. <sup>34</sup>iMëtscuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnama entsá jtsóyebuambnayana. <sup>35</sup>Chë tšabe entsá, chë ainanoca tšabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana. <sup>36</sup>Y ndegombre cbëyana, chë entsangbiama tšabá o ndoñe tšabá tmonjamama jayanama tempo chaojobuache ora, ndaye ndoserverna palabra šmojóyebuambama, Bëngbe Bëtsabe delante šmochanjayana ndáyeca chca ca. <sup>37</sup>Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana afñe o ndoñe cmontsemna castiganá jtsemnana ca” —Jesús tojánayana.

**Chë bacna entsanga Jesús  
tmojanimpadá canÿe bëts soye  
chaoma, chabe obenana jinÿama.**  
(Lc 11.29-32)

<sup>38</sup>Chentsana, básefta fariseunga y Moisesbe ley abuátambayënga Jesús tmojantjá: —Buatëmbayá, bënga fsëntseboše aca canÿe bëts soye chacoma, acbe obenana chašcuinÿanjëma ca.

<sup>39</sup>As Jesús tojanëjua: —Quem puerte bacna entsanga y ndošbuáchiyënga montseboše atše canÿe bëts soye chaima, atšbe obenana jinÿanÿiyama; pero chca soye ndoñe quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soy cá.

<sup>40</sup>Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entsá tbojanbemá unga te y unga ibeta fshantse jashenoye echanjëftsemna.

<sup>41</sup>Morsca entsanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsanga mochanjotsaye y morsca entsangbiama mochanjayana ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna. <sup>42</sup>Morsca entsanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiama más uamaná endmëna ca —Jesús tojánayana.

**Ndayá inopása chë bacna  
entsángaftaca**  
(Lc 11.24-26)

<sup>43</sup>Jesús mëntšánaca tojánayana: “Canÿe bacna bayëja canÿe entsábentsana tojësebocna ora, chë bayëjna bojojo luarënguenache jtsanana ndayentše jóchnama onguayíñe, y canÿe luare ndoñe tonjínÿena ora cha jenójuaboyana:

<sup>44</sup>‘Atsbe oyenoye, chë ndayentšana sënjëftseboconoye chanjesshécona ca’. Y choye tojtashjango orna, jinÿenana lempe tsábá cha jtesamashënguama, mo chentse ndocná tontsiyencá, tsjajniñe y lempe botamaniñe cuaftsemncá. <sup>45</sup>Chorna chë bayëjna jana y inÿe canÿsëfta bayëjenga chabiamá más opëjenga jobiatšana y nÿetscanga choye jamashjnana chë boyabásabeñe joyënanama. Y chca, chë boyabása tempscama más bacna entsá jtsemnana, chora chë natsanama más bayëjenga abamna causa. Morsca puerta bacna entsángaftaca cachcá echanjochnëngo ca” —Jesús tojánayana.

**Chë Jesusbe ndegombre  
pamíllanguentsënga  
(Mc 3.31-35; Lc 8.19-21)**

<sup>46</sup>Jesús cabá entsanga yojtsëtsësnayé ora, chabe mamá y catsátanga tmojánashjajna y imojtseboşe Jesúseftaca jóyebuambayama. Nÿe shjoca imojtsemna; <sup>47</sup>asna, canÿe boyabása Jesúsbioye tbojanbuayená: —Acbe mamá y acbe catsátanga shjoca montsemna y montseboşe ácaftaca jóyebuambayama ca.

<sup>48</sup>Pero Jesús chë jauenayama tojánabioye tbojanianayana: —¿Nda atsbe mamá yomna, y ndëmuanÿenga atsbe catsátanga ca?

<sup>49</sup>Y cachora chabe cucuatşe tojanatsbaná, chabe uatsjëndayënga tojanënyanÿé y tojánayana: —Quemënga montsemna mo atsbe mamacá y mo atsbe catsatangcá. <sup>50</sup>Er ndánaca, ntšamo atsbe Taitá, celoca endmëná yobošcá tojtsama, jtsemnana atsbe catsáta, atsbe uabena y atsbe mamá, atsbe ndegombre pamíllanguentsá ca —Jesús tojánayana.

**Chë jenabe cuento  
(Mc 4.1-9; Lc 8.4-8)**

**13** <sup>1</sup>Cach te, Jesús yebnentšana tojëftsanbocna y uafjajónayé tsachoca tojanótbema. <sup>2</sup>Mallajta entsanga choye tmojanobeconá; as Jesús, chë uafjajónayentşe yojanamna canÿe barquëshoye tojánasëngo, tojanótbema; y chë entsangna tsachoca imojtsemna. <sup>3</sup>Chorna ba soyëngama cuentëngaca chënga tojanabuatambá.

Mëntsá tojanéyana: “Canÿe jená chë jénayé jaujquëshama yojëftseboconá. <sup>4</sup>Yojtsëjquëshaye orna, básëfta jénaye benache juachañe yojuatquécjána, pero chë jaja shloftšënga imojástjajna y lempe imojtsósasne. <sup>5</sup>Inÿe meshëngna ndëtsbenguine yojuatquécjána, ndoñe yapa fshantse binÿnentşe. Chiñna betscó yojuábocna, fshantse ndoñe jashenocana yonjanmëna causa, <sup>6</sup>pero shinÿe yojábocna ora, puerta yojojënyána y yojtsancta; y yojtsábojo, bëtscá tbëtëjënga tondaye causa. <sup>7</sup>Inÿe meshëngna uhmëshangañe yojuatquécjána, y chë uhmëshangá yojuájua orna, lempe yojtsatscué. <sup>8</sup>Y inÿe meshëngna, uanguanëshiñe yojuatquécjána y puerta botamana chiñe yojuashajo: inÿenache nÿe canÿe jénayentšana mo patse meshënga yojuashájona, inÿeñna mo chnënguana bnëtsana meshe y inÿeñna mo unga bnëtsana meshe.”

<sup>9</sup>Jesús chca jacuéntama tojanpochocá ora, mëntsá tojánayana: “Chë jounama tmojtsobenënga, šmochjouena ca.”

**Ndáyeca Jesús cuentëngaca  
yojánabuatambayé  
(Mc 4.10-12; Lc 8.9-10)**

<sup>10</sup>Chora chë uatsjëndayënga tmojanobeconá y Jesús tmojantjá: —¿Ndáyeca entsanga cuentëngaca cojtsabuatambá ca?

<sup>11</sup> As Jesús tojanéjua: —Bèngbe Bètsá tsèngaftanga cmontsinñanýná nyetsca chë mo iytëmcá yomna soyënga chabe amëndayama, pero chë ñnyengbioyna ndoñe. <sup>12</sup> Nda tojtsebomnábioye más jatstayana y chca cha corente bètsá jtsebomnana; pero chë tondaye tondbomnábioyna, chë batšatema tobomna sóynaca mochántseboca. <sup>13</sup> Chíyeca atše cuenténgaca chënga sentsëtsëtsná. Chca, masque corente chamotsafšna, ndoñe chamondobená Bèngbe Bètsabe soyënga jinýama; y masque beca chë soyënga chamouena, ndoñe tsábá quemochátuenana, ni queochátësertana. <sup>14</sup> Chcáyecna, chéngbeñe entsemna cachcá ntšamo chë Bèngbe Bètsabe juabna oyebuambnayá Isaías tojanayancá:

Masque beca chamouena, ndoñe queochátësertana.

Masque puerte chamotsantješna, ndoñe quemochátinýe

<sup>15</sup> Quem entšanga ndoñe quemátsboše botamana jajuaboyana; chënga uamatsáchtonënga montsemna y chëngbe bomínýnaca cachcá. Chca ndóñesna, chënga muantsobena jinýama, jouenama y ainaniñe josértama; y chca, chënga bacna soyënga amana muantsajbaná y atšbe benache muantishache, as atše chënga chayatsebacama ca —cha tojéftsanbema.

<sup>16</sup> “Tsèngaftangna oyejuayënga šmochanjoyena, er šmondobomna bomínýe y matscuašënga Bèngbe Bètsabe soyënga jinýama y jouenama. <sup>17</sup> Ndegombre cbéyana, banga Bèngbe Bètsabe juabna oyebuambnayënga y nyetsca soyënguñe tsábá amënga

tmonjánbošena chë tsèngaftanga šmontsonýá soyënga jinýama, y ndoñe chemátaninýe; tmonjánbošena chë tsèngaftanga šmontsuenana soyënga jouenama, y ndoñe chemátanuena ca” —Jesús tojanéyana.

**Jesús chë jenabe cuentama tojanabuayená**

(Mc 4.13-20; Lc 8.11-15)

<sup>18</sup> “Chcasna, oído šmochjajajo; chë jenabe cuento mëntšá endayana: <sup>19</sup> Chë Bèngbe Bètsabe amëndayama tmojouena y ndoñe tontsësertana entšanga mondëmna mo chë benache juachañe yojuatquécjana jenaycá; Satanás jabana Bèngbe Bètsabe palabra chëngbe ainanentšana jabétsabuajuanama, chënga chiñe ndoñe chamondëtsošbuáchema. <sup>20</sup> Y chë ndëtšbenguiñe yojuatquécjana jénaye entsemna mo chë aíñe Bèngbe Bètsabe palabra tmojouena y Bèngbe Bètsabeñe jtsošbuáchiyama oyejuayënga tmojtsemna entšangcá; <sup>21</sup> pero ndoñe nyets tempo chana jocochájuana, y chca, ndoñe bayté Bèngbe Bètsáftaca ntjéftsemnëngana, ndoñe yapa tmontsašbuaché causa. Inýenga chëngbioye mochantsébuayënja y Bèngbe Bètsabeñe betsošbuáchiyama mochanjasúfrianga; chíyeca chënga Bèngbe Bètsabe palabra cachcá mochanjesonýaye. <sup>22</sup> Chë uchmëšhangañe yojuatquécjana jénaye entsemna mo chë Bèngbe Bètsabe palabra tmojouena entšangcá, pero quem luarentša soyéngaca oyejuayënga jtsemnama yapa mochántsenojuabnaye y mallajta crocënana y ba soyënga jtsebomnana mochántseboše. Chíyeca chënga Bèngbe Bètsabe palabra jtsebnëtjombana y ntšamo cha tojayancá ndoñe ntsamana. <sup>23</sup> Pero chë

uanguanëshiñe jojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyëngna inyëngbiama más bëtscá soyënga mochántsama, y chca, ínÿenga jtsemnana mo chë patse meshënga tojanshajo jenaycá, ínÿenga mo chë chnénguana bnëtsancá y ínÿengna mo chë unga bnëtsana meshënga tojanshajo jenaycá ca” —Jesús tojanabuayena.

**Chë tríguañe bacna shacuanama cuento**

<sup>24</sup> Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje. <sup>25</sup> Pero nyëtscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. <sup>26</sup> Y chë trigo yojúajua y ya yojtseshajuana orna, chë bacna shácuañenaca yojúábocna. <sup>27</sup> As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, índáyeca chë bacna shácuana chiñe tojuábocna ca?’ <sup>28</sup> Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’ <sup>29</sup> Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnaca šmattsejashtse ca. <sup>30</sup> Más tšabana, cachcá mochjonÿaye cánÿiñe chaójuama, chë jaja saná játbanama tempo chaobjuáchëntsuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y

chamotsentsacuacjuá jtsejuinÿiyama, y chentšana chë shajuana chamuatbaná y atšbe grano uaquëcjnaye yebniñe chamotsatsuamá ca’ ” —Jesús tojánayana.

**Chë mostaziye jenayama cuento**

(Mc 4.30-32; Lc 13.18-19)

<sup>31</sup> Jesús mëntšánaca tojanacuntá: “Bëngbe Bëtsabe amëndayana endmëna mo canye mostaza betiye jenaycá, canye boyabása chabe jajañe yojáje. <sup>32</sup> Ndegombre, nyëtsca jenayëngama chë mostaza jénaye chë más bāsetema endmëna, pero tojójua orna, chë jajañentšë chë más bëtš betiye jóbemana. Tša bëtš betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

**Chë levadurama cuento**

(Lc 13.20-21)

<sup>33</sup> Quem inÿe cuéntnaca tojanéyana: “Bëngbe Bëtsabe amëndayana endmëna mo levadurcá; canye shembása chana jenájua bāna unga medida arninÿañe, nyëtsana chauabochama ca.”

**Ndáyeca Jesús entšanga cuenténgaca yojanabuayiná**

(Mc 4.33-34)

<sup>34</sup> Jesús nyëtsca chë soyëngama lempe cuenténgaca entšanga jtsëtsëtsnayana, y cuenténgaca ndóñesna ndoñe yonjanoyebuambná. <sup>35</sup> Chca yojamna ndayá cachcá chaochnënguama ntsāmo chë Bëngbe Bëtsabe juabna oyebuambnayá tojanayancá, mëntšá: Jabuátambamna cuenténgaca chanjóyebuambaye; chanjayana chë iytémena soyëngama y chë entšanga

ndoñe mondétatšëmbo  
soyëngámnaca;  
Bëngbe Bëtsá quem luare tojanma  
orscana chë soyënga yomna ca  
—cha tojánayana.

**Chë tríguañe bacna shácuana  
cuentama Jesús tojanabuayená**

<sup>36</sup>Chentšana Jesús chë  
entšanga tojtanicamá y yebnoye  
tojtanamáshëngo. Chentšana chabe  
uatsjëndayënga tmojanimpadá  
ndayá chë bacna shacuanama cuento  
betsayancá chauabuayenama. <sup>37</sup>As  
Jesús tojanéyana: “Chë tšabe jénaye  
jená endmëna chë Bëngbe Bëtsá Entšá  
tbojanbemá, <sup>38</sup>y chë jajañna, quem  
luare. Chë tšabe jénaye entsemna  
chë Bëngbe Bëtsabe amëndayoye  
mochjámashjna entšanga, y chë  
bacna shácuana entsemna chë bacna  
bayëjëngbe amëndayabe entšanga,  
<sup>39</sup>y chë uayayá, chë bacna shácuana  
yojáje chana, Satanás. Chë jaja saná  
atbanayana entsemna chë quem luare  
jopochócama chaojobuache ora, y chë  
trabájayëngna chë angelotëmënga.  
<sup>40</sup>Ntšamo chë bacna shácuana  
jtsejashtsëtsana y iñoeye jtsatmetšana  
jtsejuinñiyama, cachcá echántsemna  
quem luare jopochócama te. <sup>41</sup>Chorna,  
chë Bëngbe Bëtsá Entšá tbojanbemá  
chabe angelotëmënga echanjichamuá  
chë inýënga bacna soye chamomama  
amënga y chë bacna soyënga  
amënga chabe amëndayentšana  
chamotsajuanayama. <sup>42</sup>Y chora  
chëngbiöye chë uabouana inëshoye  
mochantsésetjango y chentše puerte  
mochanjenóbošachna y chë tsetšanama  
juatsašënga mochantsenofhtëšjojnaye.  
<sup>43</sup>Chora, chë ntšamo Bëngbe Bëtsá  
yomandacá amëngna corente mo  
shinýcá mochantsebuashinñiyana  
chëngbe Taitá, Bëngbe Bëtsabe

amëndayoca. Chë jouenama  
tmojtsobenënga, šmochjouena ca”  
—chora Jesús tojánayana.

**Chë fshantsiñe uaiytëmëna  
bomnanama cuento**

<sup>44</sup>“Bëngbe Bëtsabe amëndayana  
endmëna mo chë fshantsiñe  
uaiytëmëna bomnancá. Canýe  
boyabása chë bomnana yojuinýëna  
y chentšana iytëcana cachentše  
yojesatbontsá. Corente oyejuayá  
yojtá, nyetsca chabe bomna soyënga  
yojetsatobuiye y chentšana chë  
fshantse yojtobuámiñe ca” —Jesús  
tojánayana.

**Chë corente uámana fjtantse  
ndëtšëtëmama cuento**

<sup>45</sup>“Mo canýe entšá uámana fjtantse  
ndëtšëtëmënga obuamnañacánaca  
endmëna chë Bëngbe Bëtsabe  
amëndayana. <sup>46</sup>Chana, canýe corente  
uámana ndëtšëtëma yojinýëna ora,  
yojtá y lempe chë inabomna soyënga  
yojetsatobuiye y chë ndëtšëtëma  
yojtohuámiñe ca” —Jesús tojánayana.

**Chë atarraiešhama cuento**

<sup>47</sup>“Bëngbe Bëtsabe amëndayana  
endmëna mo canýe atarraiešhacá,  
buyeshoye jutšenana y nyetsca  
beonga jashebuáyana. <sup>48</sup>Chë  
atarraiešha jútjena tojtsamna orna,  
chë beonga ashebuánayënga  
jtsashëbjátsëcana, tsachoye juyambana  
y chentše juatbemana chë beonga  
jabocacayama; chë tšábënga  
sbarëquënguiñe juatsuámana y  
chë ndoñe tšábëngna jtsëtšanana.  
<sup>49</sup>Cachcá echanjochnëngo quem luare  
jopochócama tempo chaojobuache ora.  
Chë angelotëmënga mochanjábocana  
chë tšabe entšángbentšana bacna  
entšanga jaluárama, <sup>50</sup>y chë bacna

entsangna chë uabouana ññeshoye mochántsatsquécjaye, y chentše puerte mochanjenóbošachna y chë tsetšanama juatsašënga mochantseoftésjójnaye ca” —Jesús tojanacuntá.

#### Anteo y tsëm uámana bomnana

<sup>51</sup> Chora chabe uatsjéndayënga Jesús tojanatjá: —¿Lempe chama quecmojtsésertana ca?

Y chënga tmojanjuá: —Arseñor, aínë ca.

<sup>52</sup> As Jesús tojanéyana: —Canyë ley abuatambayá jtsetatsëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjendá orna, mo canyë yebnentša nduiñcá cha jtsemnana. Chë nduiña chabe grano uaquécjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëgnaca Bëngbe Bëtsabe amëndayama ca —tojanéyana.

#### Jesús Nazaretoca

(Mc 6.1-6; Lc 4.16-30)

<sup>53</sup> Jesús chë soyënga jacuéntama tojanpochocá ora, chentšana tojtsanoñe. <sup>54</sup> Y cachabe luaroye tojtanashjango y chentša judiëngbe enefjuana yebnentše tojanontšë jabuátambama. Entšanga ojnanánënga imojtsichamo: —¿Chë lempe yojtsetatsëmbcá ndémoca mua tojuatsjinýe ca? ¿Ntšamo nantsobena chca bëtš soyënga jamama ca? <sup>55</sup> ¿Mua ndoñe yondmëna chë calpinterbe uaqiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, <sup>56</sup> y chabe

uabénanga ndoñe muentše béngaftaca mondoyena? ¿Ndayentšana lempe chca mua yojtsebmna ca? —chënga imojtsichamo.

<sup>57</sup> Y chë causa chë entsanga tmojanotjayaná y ndoñe imontseboše cha joyeunayana. Pero Jesús tojanéyana: —Nyetsquénache canyë Bëngbe Bëtsabe juabna oyebuambnayá bëtšá jabemëngana, pero cachabe luarentše, cachabe yebnentše ndoñe ca.

<sup>58</sup> Chýyeca chentše Jesús ndoñe tonjétsanma ba bëtš soyënga Bëngbe Bëtsabe obenánaca, chë entsanga chábeñe ndoñe montsanošbuaché causa.

#### Ntšamo Juan chë Ubayaná tojanóbana

(Mc 6.14-29; Lc 9.7-9)

**14** <sup>1</sup> Chë tempo, Rey Herodes, chë Galileoca mandayá tojanuena ntšamo nyetsca entsanga Jesucristbiana imojtsichamcá. <sup>2</sup> As cha chabe oservénënga tojanéyana: “Mua Juan chë Ubayaná ctsemna, obanënguentšana tojtayena, chýyeca chca obenana bëtš soyënga jamama yojtsebmna ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipe shema. <sup>4</sup> Juan Heródesbioye mëntšá ibnauácacana: “Ndoñe quenátslesenciana aca acbe catšatbe shëmaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entsangbiana yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca. <sup>6</sup> Pero

Heródesbe cumpleño oboyejuaye ora, Herodíasbe bembe entsangbe delante tojanlantsá y Herodes puerte chama yojtsóyejuaye. <sup>7</sup>Chíyeca Herodes, jajúrase, tbojanšbuachená ndayánaca jatsetayana, ntšamo tbojotjañcá.

<sup>8</sup>Y Herodíasna lempe bémbébioye ibojabuayená ntšamo Herodes jojuama. As chë bembe tbojaniana: “Canÿe šcneniñe Juan chë Ubayanabe bestšaše šmatšetá ca.”

<sup>9</sup>Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama. <sup>10</sup>Y as tojanmandá chë Juan yojanëtámenoca chabe bestšaše chamuetséstjanguama. <sup>11</sup>Chentshana, canÿe šcneniñe chë bestšaše tmojanamba y chë tobiaše tmojanëntšabuaché y chana, chabe mamábioye.

<sup>12</sup>Chentshana, Juanbe ústonënga tmojánashajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

**Jesús shachna uaranga boyabásenga saná tojanacaredadó**

*(Mc 6.30-44; Lc 9.10-17; Jn 6.1-14)*

<sup>13</sup>Jesús chca tojanuena ora, canÿe barquëshañe tojtsanoñe canÿe bën luaroye, entsanga ndoyena luaroye. Pero entsanga chama imojátatšëmbona y chë poblënguentshana tmojánbocana shecuátšeca cha juastama. <sup>14</sup>Chentshana, chë barquëshoicana tojtanastjango ora, Jesús ba entsanga tojánanÿe, chë cha tmojánguanguënga. Chëngbiana tbojanongmé y chë entsanguentshana ba šoquënga tojanashná. <sup>15</sup>Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaniana: —Ya

jetiñe entsemna y quem luariñe ndocná quenatiyena. Entšanga cuantichamuá, pueblotémëngoye chamotsoñama, saná chamobuámiñama ca.

<sup>16</sup>As Jesús tojanéjua: —Ndoñe quenátseyta chënga chamotsatoñama. Tšëngaftanga saná šmochjacaredádaye ca.

<sup>17</sup>Y chënga tmojanjúa: —Muentše tondaye queftsátsbomna; ñye shachna tandëše y uta beónata ca.

<sup>18</sup>As Jesús tojanéyana: —Chë soyënga moye miyëbo ca.

<sup>19</sup>Chentshana Jesús tojanmandá entsanga chamoshëntsjatbiamama. Chorna, chë shachna tandëše y chë uta beónata tojanca, celoye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanëjåtaye, y chëngna ñyetsca entsanga tmojanacaredadó. <sup>20</sup>Ñyetsca entsanga tmojanse jtoshachaye ñyetsá y cabá chë ojamnëtémëngaca bnëtsana uta sbarécua tmojanajutjé. <sup>21</sup>Chë tmojansënga imojamna mo shachna uaranga boyabásenga, shembásenga y básenga ntjacuntacá.

**Jesús béjaye juatsbuacá yojtsaye**

*(Mc 6.45-52; Jn 6.16-21)*

<sup>22</sup>Chentshana, Jesús chabe uatsjëndayënga tojanamëndá chë barquëshoye jtamashinama y chë uafjajónaye chenguánoica chabe natsana jashajmana. Chëntscuana Jesús entsanga yojtichamuá. <sup>23</sup>Ñyetscanga tojtanichamó orna, Jesús canÿe tjoye tojántsjua canÿa jtsemnama, Bëngbe Bëtsáftaca jencuéntama. Yojaibétata ora, cha canÿa chentše yojtsemna, <sup>24</sup>y chë barquëshana tsachocana bënoca yojtsamna. Y chë olëshënga chë barquëshana yojtsájantšetaye, chë

binÿia chëngbe contra yojtsemna causa. <sup>25</sup>Ya bínÿanoyna, Jesús chëngbioye vojbeconá; béjaye juatsbuacá yojtsaye. <sup>26</sup>Chabe uatsjéndayënga chca cha tmojáninÿe orna, tša imojocochauatjaná y puerte auatjanánënga tmojanoyó: —iCanÿe añemëse entsemna ca!

<sup>27</sup>Pero chora Jesús tojanéyana: —iAñemo šmochtsebomna, atše Jesús sëndmëna; ndoñe matauatjëngana ca!

<sup>28</sup>Chora Pedro, Jesúsbioye tbojaniyana: —Bëngbe Utabná, ndegombre aca tcojtsemnëse, momandá atše béjaye juatsbuacá ácbioye chayá ca.

<sup>29</sup>Y Jesús tbojaniyana: —Mabo ca. Chora Pedro chë barquëshoicana tojánastjango y tojanontsé béjaye juatsbuacá Jesúsbioye jama. <sup>30</sup>Pero chë binÿia tša jabuache yojtsemnana tojáninÿe ora, Pedro puerte yojtsauatja y tbojanontsé jtsenatjémbambana. Chíyeca cha jabuache tojanchembo:

—iBëngbe Utabná, šmatsbocá ca! <sup>31</sup>Y cachora Jesús tbojtanoúacuetëntsiye y tbojaniyana: —iTša batšatema ošbuachiyá! ¿Ndáyeca ndoñe bëtscá átsbeñe contsošbuaché ca?

<sup>32</sup>Chentšana chë barquëshoye chata tbojtanamáshëngo y cachora chë binÿia bonguana yojtsatmëna. <sup>33</sup>Y chora, chë barquëshoye imojtsemnënga Jesusbe shecuatšentše tmojanoshamentšé y tmojaniyana: —iAca ndegombre Bëngbe Bëtsabe Uaquiñá comna ca!

**Genesaret ca uabáinoca, Jesús ba  
šoquënga tojanashná**  
(Mc 6.53-56)

<sup>34</sup>Chë uafjájónaye tmojánenashbuachengo y canÿe luare Genesaret ca uabáinoye tmojánashjajna.

<sup>35</sup>Chentša entsanga Jesús tmojtantëmbá ora, chë luarentša nyetsca entsanga chama tmojántatšëmbona. As chë entsanga chëngbe šoquënga Jesúsbioye tmojanënatse. <sup>36</sup>Y imojtseimpadana nÿe mo chabe entsáyá sibiájuanaca juabojajuama chë šoquënga chaualesenciama. Y nyetscanga chabe entsáyá sibiájua tmojanábojajënga, shnánënga imojtsatoquédaye.

**Ndáyeca canÿe entsá Bëngbe  
Bëtsabe delante ndoñe tšabia  
nántsemna**  
(Mc 7.1-23)

**15** <sup>1</sup>Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioye tmojanobeconá y tmojaniyana: <sup>2</sup>—¿Ndáyeca acbe uatsjéndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndáyá jasama ora, ntšamo bënga chë judiënga fsënduamancá, Bëngbe Bëtsabe delante tšábenga jtsatsmënama ca?

<sup>3</sup>As Jesús tojanéjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsétsanga imnétsama soyënga jtsamama ca? <sup>4</sup>Bëngbe Bëtsá mëntšá tojanmandá: “Acbe bëtsétsata stëtšoye ndoñe catjáquedaye”, y “nda cachabe bëtsétsatbiana podescá tojóyebuambase, chana jóbanama jtsemnana ca.” <sup>5</sup>Pero tšëngaftanga šmondbétsichamo canÿe entsá canobena chabe taitá o chabe mamá jauyanana: “Lempe ntšamo sëndmncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; <sup>6</sup>y šmondbétsichamo nÿe ndánaca chca tojayanëse, ya ndoñe ntsemnana



chabe taitá o chabe mamá stëtsoye ndoñe ntjaquédana, ni ntjuajabuáchana ca. Y chca, tsëngaftangbiana tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tsëngaftangbe bëtsétsanga imojanamancá. <sup>7</sup>iBacna entšanga, ntšamo ndegombre šmojuabnacá ndinýinýnaye! Nye tšabá chë Bëngbe Bëtsabe juabna oyebuambnayá Isaías tsëngaftangbiana tojanoyebuambá, mëntšá tojánayana ora:

<sup>8</sup> Bëngbe Bëtsá tonjayana: “Quem entšanga mondbétsichamo Bëngbe Bëtsá tša tšabia yomna ca; chca nye uayášaca, pero chëngbe ainantšë atšbiana ndocna tšabe juabnéngaca.

<sup>9</sup> Chënga nye bonamente mondbétsichamo: Bëngbe Bëtsá tša tšabia yomna ca; chënga nye entšangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

<sup>10</sup> Chentšana Jesús entšanga tojánachembo y tojanéyana: —Šmochjouena y chacmésertá.

<sup>11</sup> Ndayá entšá tojtšesacá, ndoñe quebohátsbema Bëngbe Bëtsabe delante ndoñe tšabia. Inýetsá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

<sup>12</sup> Chora chë uatsjëndayënga Jesúsbiyoe tmojanobeconá y tmojanijana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

<sup>13</sup> As Jesús tojanéjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nye entšangbe

buatëmbana soyéngaca. <sup>14</sup> Cachcá mónýaye; chënga montsemna mo jtanënga inýe jtanënga unachayëngcá. Y canýe jtaná inýe jtaná tbojtsánachase, nýets útata canýe tbuabentšë bochanjetsótsatše ca —Jesús tojánayana.

<sup>15</sup> Chora Pedro, Jesúsbiyoe tbojanijana: —Ntšamo chë cuento bëtsayanama šmabuayená ca.

<sup>16</sup> As Jesús tojanéjua: —¿Tsëngaftángnaca cabá ndoñe cmontsésertana ca? <sup>17</sup> ¿Cabá ndoñe cmontsésertana lempe ntšamo šmojascá uafsbioye jomashënguana y chentšana cuerpentšana jtabocnana?

<sup>18</sup> Pero ntšamo šmojtsoyebuambnacana lempe ainanocana jtsóbocanana y chë soye endobena tsëngaftangbiyoe Bëngbe Bëtsabe delante ndoñe tšábenga jábiamana. <sup>19</sup> Ainanocana jtsóbocanana bacna juabnénga: jenóbama, shema o boyábiyoe inýaftaca jaingñama, shembása o boyabásaftaca bacna soye jamama, jatbëbama, jobostérama y inýabiama jtsayátsenayama. <sup>20</sup> Chë soyënga cocayé jtsobenana entšábiyoe Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

**Canýe shembása inýe luarocana ashjanganá Jesúsbeñe vojtsošbuaché**  
(Mc 7.24-30)

<sup>21</sup> Jesús chentšana, Tiro y Sidón luarëngoye tojtšanoñe. <sup>22</sup> Canýe shembása Caná luarocá chentšë inoyena; cha Jesúsbiyoe vojbeconá y mëntšá vojtsáyebuache: —iUtabná, Rey Davídbentšana Entšá, šmotselastemá!

iAtšbe bembe puerte entsesufrina, bacna bayějbe juabna entsebmna causa ca!

<sup>23</sup> Jesús ndocá tbojanjuá. As chabe uatsjéndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

<sup>24</sup> As Jesús tojánayana: —Bëngbe Bëtsá atše šonjichmó jtsanýenama nýe chë entsanga, chë mo ótšena oveshëngcá imomnënga Israeloquënga, y chë ndoñe judiëngna ndoñe ca.

<sup>25</sup> Pero chë shembása tojána, Jesusbe shecuatšentšë tojanoshamentšë y tbojaniyana: —iUtabná! Diosmanda pavor šmotsebema. išmotsajabuache ca!

<sup>26</sup> Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndóñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátšmëna ca.

<sup>27</sup> As cha tbojanjuá: —Arseñor. Pero chë quešëgnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtšesá ora. Chcasna, Diosmanda šmotsajabuache ca.

<sup>28</sup> Chora Jesús tbojaniyana: —iShembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtšatsmëna.

### Jesús ba šoquënga tojanashná

<sup>29</sup> Jesús chentšana tojéftšanbocna y chë Galilea uafjónayë tsachoye tojána. Chentšana, canýe batsjoye tojántšjua y choca tojanótbema.

<sup>30</sup> Mallajta entsanga Jesús

yojtsemnentšë tmojánashajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtšënachaye. Jesusbe shecuatšentšë tmojanéshejango y cha nýetscanga tojanashná. <sup>31</sup> Y chca orna, chë entsanga tmojáninýe: chë ndëbianga imojtšatoyebuambná, chë tšabá jobónjuama ndobenënga tšabá imojtšatsmëna, chë coshetënga tšabá imojtšatana y chë jtanënga yojtšëbinýna; y chama chënga corente ojanánënga imojtšemna. Chora chënga tmojanontšë jëtschuayana chë Israelentša entsanga imojánadorana Bëngbe Bëtsá.

### Jesús canta uaranga boyabásenga saná tojanacaredadó

(Mc 8.1-10)

<sup>32</sup> Chentšana Jesús, chabe uatsjéndayënga tojánachembo y tojanéyana: —Quem entsangbiamá šontsengmena, er ya unga te chënga átšeftaca muentšë montsemna y jasama tondaye quemátšbomna. Atše ndoñe quetsátšboše ntjascá cachëngbe yebnoye chënga jtichamuana, er benachiñe šhëntsama nantsabuátëcja ca.

<sup>33</sup> As chabe uatsjéndayënga tmojantjá: —¿Ntšamo muatjobenaye quem luarentšë, ndocna entšá ndoyenentšë, chëfta entsangbiamá saná jinýenama ca?

<sup>34</sup> Y Jesús tojanatjá: —¿Bueta tandëše šmojtsebomna ca?

Y chënga tmojanjuá: —Canýšëfta tandëše y básefta beonatëmënga ca.

<sup>35</sup> Chora Jesús tojanamëndá nýetsca entsanga fshantsiñe chamotbiamama.

<sup>36</sup> As chë canýšëfta tandëše y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjéndayënga

tojanëjatá. Chentšana nyetsca entšángbioye tmojanacaredadó.

<sup>37</sup>Nyetsca entsanga tmojanse jtoshachaye nyetšá. Y chentšana cabá canýsëfta bëts sbarécua tmojanajutjé chë tojanójamëtemëngaca. <sup>38</sup>Chë tmojansënga imojamna canta uaranga boyabásenga, shembásenga y básenga ntjacuntacá. <sup>39</sup>Chentšana Jesús, chë entsanga tojtanichamó, barquëshoye tojánamashëngo y Magadán luaroye tojtsanoñe.

**Chë fariseunga y saduceunga  
tmojánbošena Jesús chaoma canýe  
bëts soye**

(Mc 8.11-13; Lc 12.54-56)

**16** <sup>1</sup>Fariseunga y saduceunga tmojána Jesús jinýama, y jisháchichiyama imojtseimpadana canýe bëts soye chaoma, as jtsetatšëmbuama Jesusbe obenana ndegombre Bëngbe Bëtsábiocana tainóbocanama.

<sup>2</sup>Pero Jesús tojanéjua: “Tšëngaftanga jetiñoje šmondbétsichamo: ‘Yëfse tšabe te echántsemna, er celoca buánganiñe entsemna ca.’ <sup>3</sup>Y cachëse šmondbétsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnana tša tšabá jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinýanýnama? <sup>4</sup>Quem puerte bacna entsanga y ndošbuáchiyënga montseboše atše canýe bëts soye chaima, obenana jinýanýiyama; pero ndoñe chca quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soyca ca”  
—Jesús tojánayana.

Chora Jesús tojésanabashejuana y chentšana tojtsanoñe.

**Jesús tojanabuayená chë  
fariseunge buatëmbana soyëngama  
(Mc 8.14-21)**

<sup>5</sup>Chë uafjajónaye chenguanoicana chënga tmojtanabo ora, chë uatsjëndayënga yojësebnëtjomba tandëse jesocñana. <sup>6</sup>Chora Jesús tojanéyana: —Šmochtsantješna; cuedado šmochtsebomna chë fariseunga y saduceunge levadurama ca.

<sup>7</sup>Pero chë uatsjëndayënga imojtsenatsëtsnaye: —Chca entsichamo, bënga tandëse ndoñe tmonjesocñama ca.

<sup>8</sup>Jesús chë soye yojtsetátšëmbo; chíyeca mëntšá tojanéyana: —¿Ndáyeca tandëšama šmojtsenatsëtsná ca? ¡Tša batšatema ošbuáchiyana šmobomna! <sup>9</sup>¿Cabá ndoñe cmontsésertana y ndoñe šmontsabouínýna chë shachna tandëšentšana shachna uaranga entsanga sënjanëjuatšema y bnëtsana uta sbarécua šmonjánajutjema? <sup>10</sup>¿Y ndoñe šmontsabouínýna chë canýsëfta tandëšentšana canta uaranga entsanga sënjanëjuatšema y canýsëfta sbarécua šmonjánajutjema? <sup>11</sup>¿Ndáyeca ndoñe cmontsésertana atše tandëšama ndoñe sëntsóyebuambnama? Cuedado šmochtsebomna fariseunga y saduceunge levadurama ca —Jesús tojanéyana.

<sup>12</sup>As chora chë uatsjëndayënga tojanësertá, Jesús ndoñe tonjánayana chë tandëšentša levadurama cuedado jtsebomnana ca, sinó ndayá chë fariseunga y saduceunge buatëmbana soyëngama.

**Pedro tojánayana, Jesús chë Cristo  
bétsemnama**

(Mc 8.27-30; Lc 9.18-21)

<sup>13</sup> Jesús, Cesarea de Filipino luaroye tojánashjango ora, chabe uatsjéndayënga tojanatjá: —¿Nda ca entsanga imojtsichamo chë Bëngbe Bëtsá Entšá tbojanbemá yojtsemna ca?

<sup>14</sup> Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca ínÿe Bëngbe Bëtsabe juabna oyebuambnayá ca.

<sup>15</sup> As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

<sup>16</sup> Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

<sup>17</sup> Y Jesús tbojaniana: —Simón, Jonasbe uaquiñá, oyejuayá cochanjoyena. Ndocna quem luarentša entsá chë soye checmatinÿinyë, sinó atšbe Taitá, celoca endmëná. <sup>18</sup> Y mëntšánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëts yebna chanjajebo, y ni Satanás, chabe obenánaca entsá jóbanama, queochatobenaye jtsepochoćama. <sup>19</sup> Atše cbochanjátsetaye obenana, mo llavëfjá, entsanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachá echanjayana. Y cháftaca chacojtsencuénta ora, canÿe soye aññe chaotsemna ca chacojayanëse, Bëngbe Bëtsá echanjayana aññe chca chaotsemna ca —Jesús tbojaniana.

<sup>20</sup> Chentšana chabe uatsjéndayënga tojanamëndá ndocnábeñe

ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bétsemnama.

**Jesús tojánayana cha ibojamna  
jóbanana y jtayenana ca**

(Mc 8.31-9.1; Lc 9.22-27)

<sup>21</sup> Chorscana Jesús tojanontsé chabe uatsjéndayënga jábuayenana cha ibojtsemna Jerusalemoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanéyana cha mochjanóba, pero unga tianoye yochtanayena ca. <sup>22</sup> Chora Pedro, Jesúseftaca tojanoluaré y tojanontsé mëntšá uatsëtsnayana: —iAtšbe Utabná, Bëngbe Bëtsá ndoñe chaondëlesenciá chca chaopasama! iNdocna te quenaisopodena chca ácaftaca jopásana ca!

<sup>23</sup> As Jesús tojanobuértana y Pédrëbiyoye tbojaniana: —iSatanás, átšbentsana mojuaná! iAca contseboše atše canÿe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó ñÿe entsángbentsana ca.

<sup>24</sup> Chentšana Jesús chabe uatsjéndayënga tojanéyana: —Nda atšbe uatsjendayá jtsemnama tojtseboše, cháuyana ñÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiama jasúfriama chaotseprontana y cruciñe jobanámna. <sup>25</sup> Nda tojtsama quem luarentše bëtscá soyënga jtsebojnana y atšbiama jasúfriama ndoñe tontseprontana, chë ñÿetsca tescama yomna tšabe

vida echanjopérdia. Pero nda quem luarentša soyënga cachcă tojëftsonyá atše juastama, masque chaóbana, chë nyetsca tescama yomna tšabe vida echántsebomna. <sup>26</sup>¿Ndayama entsá buanjoservia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? Ndegombre, canye entsá chë nyetsca tescama yomna tšabe vida tojtsoperdese, ndocna soye quenátsmëna cha chaobená joiyama, chë nyetsca tescama yomna tšabe vida jtsebomnana. <sup>27</sup>Chë Bëngbe Bëtsá Entšá tbojanbemá, chabe Taitabe obenánaca y puerte buashinýinýaniñe echanjabo chabe angelotémëngaftaca, y chora cada cánýabioye bochántatšetaye cachcă ntšamo cada ona tojëftsemcă. <sup>28</sup>Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinýca ca —Jesús tojánayana.

### Jesús inýetšá tojanobinýná

(Mc 9.2-13; Lc 9.28-36)

**17** <sup>1</sup>Chentšana chnënguana tianoye, Jesús tojëftsanëbiatše Pedro, Santiago y chabe catšata Juan, y inýoye tojanënatse nye chënga, canye bëts tjoye. <sup>2</sup>Chentše, chëngbe delante inýetšá cha tojanobinýná. Chabe jubiá shinýca yojtsebuashinýinýana, y chabe uichëtjonéjuangana mo binýniñcá uafjantsëjuangá yojtsamna. <sup>3</sup>Chca orna, chabe uatsjëndayënga tmojáninýe Moisés y Elías tbojanobinýná, Jesúseftaca encuëntaye.

<sup>4</sup>Chora Pedro, Jesúsbioye tbojanianana: “Bëngbe Utabná, itša tšabá bëngbiana cuanmëna muentše jtsemnana ca! Tcojtsebošëse, unga tambotémënga atše chjapórma:

cánýetema acbiana, inýetema Moisesbiana y inýetemna Elíasbiana ca.”

<sup>5</sup>Pedro chca yojtsóyebuambnantscuana, canye buashinýinýana jantšetëshe nyetscanga yojáutsbotse. Y chë jantšetëšhoicana canye oyebuambnayana tmojanuena mëntšá: “Mua atšbe bonshana Uaquiná endmëna, atše chabiana sëntsoyejuá. Cha šmochtseyeunana ca.”

<sup>6</sup>Y chë uatsjëndayënga chca tmojanuena ora, tmojanoshamentšë y jubiaca fshantsóntscoñe tmojanotsejbëna, puerte auatjanánënga. <sup>7</sup>Chora Jesús chabe uatsjëndayëngbioye tojanobeconá, tojánabojajo y tojánéyana: “Matëtsbananga; ndoñe matauatjëngana ca.”

<sup>8</sup>Y tsbanánoye tmojanontjësë ora, Jesús nye canya tmojáninýe, ndocná inya más.

<sup>9</sup>Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentshana candétayenëntscuana, ndocnábeñe chë šmonjinýe soyama šmatseuëntaye ca.

<sup>10</sup>As chë uatsjëndayënga Jesús tmojantjá: —¿Ndayeca chë ley abuátambayënga mondbëtsichamo, canmëna Elías jabana chë Bëngbe Bëtsabe Uámana Uabuayanabe natsana ca?

<sup>11</sup>Chora Jesús tojanéjuu: —Ndegombre canya Eliascá natsana echanjabo y ntšamo jtsemnana yomncá, lempe echánjabatsma ca. <sup>12</sup>Pero atše cbéyana, canya mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo tmojanbošëncá. Y cachcă, chë Bëngbe Bëtsá Entšá tbojanbemá entšangbe cucuatšiniñe echanjasúfria ca —Jesús tojánayana.

<sup>13</sup> Chora chë uatsjéndayënga tojanësertá, Juan chë Ubayanabiama Jesús chca yojtsëtsëtsnama.

**Jesús, canÿe bacna bayëja tbojanbojuaná**

(Mc 9.14-29; Lc 9.37-43)

<sup>14</sup> Entsanga imojtsemnoye chënga tmojtanashjajna ora, canÿe boyabása tojanobeconá, Jesusbe natsanoica yojshamentsiye y tbojaniyana: <sup>15</sup>—Utahná, atšbe uaquiñá motselastemá. Cha ataque bontsësháchichana y puerte entsesufrina, er cha inÿe ora iñoye jtseshajayana y inÿe orna, buyeshoye jtsoshbuetsána. <sup>16</sup> Acbe uatsjéndayëngbioye cha sënjuánatse y ndoñe chematobená jtseboshnama ca —cha tbojaniyana.

<sup>17</sup> As Jesús tojánayana: —iNÿetšá ndošbuáchiyënga y bacna entsanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

<sup>18</sup> Chora Jesús, chë basetémeñe bacna bayëjbioye tbojánacana y chábensána cha tojésanbocna. Cach orscana chë básetema tšabá yojtsatsmëna.

<sup>19</sup> Chentsána, chë uatsjéndayënga luaroca Jesúseftaca tmojanoyebuambá y tmojaniyana: —¿Ndáyeca bënga ndoñe fsënjobená chë bacna bayëja jtabocnama ca?

<sup>20</sup> Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñese, masque nÿe mo canÿe mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca

nanjama, y tšëngaftanga lempe jamama šmattsobena. <sup>21</sup> Pero chca bayëjënga jtëbuacnamna jobenayana nÿe Bëngbe Bëtsáftaca jencuéntase y chama tondaye ntjascá jtsemñese ca —Jesús tojanéyana.

**Jesús cachiñe tojánayana cha ibojamna jóbanana y jtayenana ca**

(Mc 9.30-32; Lc 9.43-45)

<sup>22</sup> Jesús y chabe uatsjéndayënga cánÿiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entsangbe cucuatšíñe mochanjáboshjona, <sup>23</sup> mochanjóba, pero unga tianoye echántayena ca.” Chë causa chë uatsjéndayënga puerte ngménaca imojtsemna.

**Chë Bëngbe Bëtsabe bëts yebnama impuesto jtsatsquëcñayama**

<sup>24</sup> Jesús y chabe uatsjéndayënga Capernaumoye tmojánashjajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonÿbetsatsquëcñayaca?

<sup>25</sup> Y Pedro tojanéjua: —Añe, cha endbetsatsquëcñayaca.

Chentsána, Pedro chë yebnoye tojánamashëngo ora, Jesús natsana mëntšá chábioye tbojaniyana: —Simón, ¿ntšamo catjájuaboje? ¿Quem luarentša reyënga ndémuanÿengbioye impuesto imnétsayëngacaye y crocénana imnétsatjanaye: cach luarentše oyenëngbioye o chë inÿe luarocana ashjajnëngbioye ca?

<sup>26</sup> As Pedro tojanjúá: —Chë inÿe luarocana ashjajnëngbioye ca.

Y Jesús tbojaniyana: —Chcasna, ndoñe quešnátsmëna chë atšbe

Taitabe bëts yebnama impuesto jtsatsquécjnayana ca. <sup>27</sup>Pero ndocná mal chabonduínynanamna uafjajónayoye motsa, anzueléfjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiana y acbiana jëtsjájuaama. Cochjëftsejatsëca y cochjatsboshjona ca —Jesús tbojaniana.

**¿Nda chë más uamaná yomna?**

(Mc 9.33-37; Lc 9.46-48)

**18** <sup>1</sup>Chentshana chë uatsjédayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup>Chora Jesús canÿe basetëmbioye tbojanchembo y chëngbe tsëntsaca tbojanatsá. <sup>3</sup>Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama. <sup>4</sup>Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. <sup>5</sup>Y nda átšbeñe ošbuachiyá bëtsemnayeca, tbojofja canÿa mo quem basetëmbioycá, chana atše jofjana ca —Jesús tojánayana.

**Resjo yomna, nderado bacna soyënga cuanjama**

(Mc 9.42-48; Lc 17.1-2)

<sup>6</sup>“Nda canÿe básetema átšbeñe ošbuachiyábioye tbojaingñé bacna soye jamama, chabiana más tsábá nántsemna canÿe bëts nantsnëbé chamotsetamošëntšbua

y chë mar béjaye shbuatsëntsoye chamotsashbuetše chabotsenatjëmbama. <sup>7</sup>iTša lastema quem luarentša entšangbiana, chë ínÿenga bacna soye jamama chaócochënguama tmojtsamëngbiana! Nÿets tempo chca amënga mochanjëftsemna. Pero, ipayajema chë inÿa bacna soye chaomama tojtsamá ca!

<sup>8</sup>“Chíyeca, acbe cucuatšëca o acbe shecuatšëca bacna soye tcojamëse, cochtsenástjango y bënoye cochtsëtšëna. Acbiana más tsábá nántsemna celoye jamashënguana chë nÿetsca tescama yomna tsábe vida jtsebomnama, cucuatše ndbomná o cosheto, y ndoñe nÿets uta cucuatšëca o shecuatšëca chë nÿets tempo echanjesomñe iñeshoye chacmotsëstjango. <sup>9</sup>Nderado acbe bomínÿeca bacna soye tcojinÿe y cachca soye tcojama, chë bomínÿe cochtsenobuchjatsëca y bënoye cochtsëtšëna. Acbiana más tsábá nántsemna, celoye jamashënguana nÿe canÿe bomínÿeca, y ndoñe nÿets uta bomínÿeca infiernoye chacmotsëstjango, chë bëts iñeshoye ca” —Jesús tojánayana.

**Chë ótsëna oveshabiana cuento**

(Lc 15.3-7)

<sup>10</sup>Mëntšánaca Jesús tojánayana: “Ni mo cánÿabioye quem tsëm ošbuáchiyënguentshana, chë mo basetemëngcá mondmënënga, mo nduamanacá šmattsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondetsemna ca. <sup>11</sup>Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnënga jabátsebacama.

<sup>12</sup>“¿Ntšamo tsëngaftanga šmatjájuabo? Canÿe boyabása patse

oveshënga tojtsabamna y ndeolpe canÿe chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesëñÿaye, jama chë ótsena oveshá jetsenguanguama? <sup>13</sup>Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsena oveshabiamo, y ndoñe nÿa chca chë inÿe esconëfta bnëtsana y esconëfta oveshëngbiamo chë ndoñe tmonjanotsëngbiamo. <sup>14</sup>Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátsboše ni canÿa quem basenguëtsana mo otšenacá chaotsemna, bacna soyënga jtsamëse oyena causa ca” —Jesús tojánayana.

**Ntšamo cuanjama inÿa  
japerdónama**  
(Lc 17,3)

<sup>15</sup>“Nderado acbe catšata, bacna soye tcmojaborlase, cochjá, cánÿata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsatsmëna. <sup>16</sup>Pero ndoñe tcmojóyeunasna, inÿe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama. <sup>17</sup>Y chata ndoñe tonjóyaunase, chentša Bëngbe Bëtsábeñe ošbuáchiÿënga macuntá. Y chënga ndoñe tonjóyaunasna, cochjayana cha yomna mo canÿa Bëngbe Bëtsábioye nduabatmacá, mo canÿe ndoñe judiycá ca o canÿe bacna entšá mo canÿa Romocama impuesto entšángbioye atjanayacá yomna ca.

<sup>18</sup>“Ndegombre cbëyana: Tšëngaftanga Bëngbe Bëtsáftaca

chašmojtsencuénta ora, chašmojayana canÿe soye ndoñe chaondësemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canÿe soye aínë chaotsemna ca, Bëngbe Bëtsá echanjayana aínë chca chaotsemna ca.

<sup>19</sup>“Mëntsánaca cbëyana: Nderado útata tšëngaftanguëtsana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. <sup>20</sup>Ndayentše útata o únganga tmojënefjna, átšbeñe ošbuáchiÿënga bëtsemnama, chentše atše chëngbe tsëntsaca chántsemna ca” —Jesús tojánayana.

<sup>21</sup>As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canÿsëfta soye ca?

<sup>22</sup>Y Jesús tbojanjúá: —Ndoñe nÿe canÿsëfta soyama quecbatatsëtsná, sinó canÿsëfta bnëtsana soye canÿsëfta ca.

**Ndayá inopása chë japerdónama  
ndëbošëngaftaca**

<sup>23</sup>Mëntsánaca Jesús tojanëyana: “Cbochanjúayana ntšamo Bëngbe Bëtsabe amëndayana yomnana. Endmëna ntšamo canÿe réyëftaca tojanopasacá. Cha yojábošena chabe oservëñënga crocénana jtsëtjañana. <sup>24</sup>Jtsëtjañama yojóntša orna, canÿe boyabása imojuánatse, chë réybioye mallajta crocénana ibnandebena. <sup>25</sup>Chë oservëná tondaye yonjábomna chë ndebënama jëtsájauama; asna chë rey yojamánda cha chamotsiye nÿets tempo nÿe inÿabiamo chaotsooservënama, chabe shema y chabe básëngnaca, y lempe ntšamo



yojanbomncánaca, y chca chë ndebénama jtopágama. <sup>26</sup>Chora chë oservená chë reybe shecuatšentše yojošamentšiye y ibojtseimpáda: ‘Taita, Diosmanda šmotsëuantajema. Atše lempe cbochanjëtšéntšabuachiye ca.’ <sup>27</sup>Chë reyna chë boyabásabiama ibojóngmia; as chë ndebénana ibojtseperdóna y ibojëtšboshjona.

<sup>28</sup>“Chë oservenana chentšana yojësebocna y benachiñe inÿe oservenáftaca ibojenbetše, cach mandadbiama trabajayá. Chë inÿe oservenana nÿe batsátema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y mëntšá ibojauyana: ‘iNdebénana šmatsëntšabuaché ca!’ <sup>29</sup>Chora cha chë oservenabe shecuatšentše yojošamentšiye y ibojtseimpáda: ‘Diosmanda šmotsëuantajema. Atše lempe cbochanjëtšéntšabuachiye ca.’ <sup>30</sup>Pero chë oservená ndoñe yonjábosena, sinó yojama chë inÿe oservenábioye cárceloje chamóšétámia, chë ndebénana candëtsjájëntscuana. <sup>31</sup>Chë inÿe oservénënga chca imojinÿe ora, puerte yojóngmia y imojá lempe ntšamo yojopasacá chëngbe rey jacuéntama. <sup>32</sup>As chë rey yojamánda chë boyabása jobetšana, y ibojauyana: ‘iPuerte bacna oservená! Šconjaimpadáyeca, nÿets ndebénana tcbontseperdoná. <sup>33</sup>Acnaca cachcá cmondmëna chë cach aquëcá muentša trabájayabiama jóngmiana, ntšamo atše acbiama šonjongmecá ca.’ <sup>34</sup>Y tša chë rey ibojtsetna; as yojamánda jabuache chamotsetsetšená nÿets ndebénana candëtsjájuantscuana ca” —Jesús tojanacuntá.

<sup>35</sup>Chora Jesús tojánayana: “Atšbe Taitá, celoca endmëná, cachcá

tšëngaftangaftaca echanjama, tšëngaftangbe catšata ndoñe ndegombre nÿets ainánaca šmonjaperdonase ca.”

**Ndayá Jesús tojanabuatambá chë bouamnënga tmojtšenëtšenama**

(Mc 10.1-12; Lc 16.18)

**19** <sup>1</sup>Chë soyënga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica. <sup>2</sup>Ba entšanga tmojanasto y chentše šoquënga tojanashná.

<sup>3</sup>Básefta fariseunga Jesúsbioye tmojanobeconá y jisháchichiyama mëntšá tmojtjántj: —¿Queojtselesenciana canÿe boyá nÿe ndayámnaca chabe shémbioye cachcá jesonÿayama ca?

<sup>4</sup>As Jesús tojanéjua: —¿Tšëngaftanga ndoñe chë Bëngbe Bëtsabe uabemana palabrënguñe šmëndualía, Bëngbe Bëtsá, chë entšanga tojanabiamá, quem luare jobojátšama ora “boyá y shema tojánabiamama”? <sup>5</sup>Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canÿacá bochántsemna ca.” <sup>6</sup>Y chca, ya ndoñe útata quebochátsmëna, sinó mo nÿe canÿacá. Chcasna, entšá ndoñe chaondënbema ndayá Bëngbe Bëtsá mo canÿiñcá tojëftsema soye ca —Jesús tojánayana.

<sup>7</sup>Chora chë fariseunga tmojanianana: —¿As, ndáyeca Moisés tojanmandá, chë shémbioye canÿe uabemana tsbuanácha juiyiyana jtsenëtšenama y cachcá jesonÿayana ca?

<sup>8</sup>Y Jesús tojanéyana: —Tšëngaftanga Bëngbe Bëtsabe mandënga jójyëngacñama ndoñe quešmátsboše causa, Moisés tmojanalesenciá

shémbioye jesétšenana. Pero quem luare jobojátšama orna, ndoñe chca quenjatsmëna. <sup>9</sup>Atše cbéyana, nda chabe shémaftaca tbojtsenétšena y chca tojopasá ndoñe chë shema chabe boyábioye ínÿaftaca tbontseingné causa, y chë boyá ínÿaftaca tojtóbouamasna, cha chë natsana shémbioye ínÿaftaca jtseingñayana ca —Jesús tojánayana.

<sup>10</sup>Chora chabe uatsjéndayënga tmojanianyana: —Chca chë boyá y shémaftaca tojtsemnësna, ndoñe tsábá yontsemna jobouamayana ca.

<sup>11</sup>Y Jesús tojanéyana: —Nyetscanga ndoñe quemátobena chë palabrénga jóyëngacñana, nÿe chë Bëngbe Bëtsá tojama jóyëngacñama chamobenama, chëngna aíñe. <sup>12</sup>Ba soyënga comna ndaye causa chë boyabásenga ndoñe ntsobenana jobouamayana. Inÿenga jónÿnana jobouamayama ndobenënga, ínÿengbioye cach entsanga jábiamana jobouamayama ndobenënga y ínÿengna, nÿets tempo nÿe Bëngbe Bëtsabe amëndayama oservena causa ca —tojanéyana.

**Jesús, basetémëngbiama Bëngbe  
Bëtsábioye tbojanimpadá  
(Mc 10.13-16; Lc 18.15-17)**

<sup>13</sup>Entšanga basetémënga Jesúsbioye tmojanënatse, cha chauabojajuama y Bëngbe Bëtsábioye chëngbiama chaboimpadama. Pero chë uatsjéndayëngna tmojanontšë chë basetémënga unachayënga jtsëcácanana. <sup>14</sup>Chora Jesús tojanéyana: “Cachá mónÿaye chë basetémënga átsbioye chamuabo y ndoñe matéuyanana; er Bëngbe Bëtsabe amëndayana endmëna mo quem basetémëngcá imomnëngbiama ca.” <sup>15</sup>As chë basetémënga tojánabojajo, Bëngbe Bëtsá jaimpádase; y chentshana cha tojtsanoñe.

**Canÿe bomna bobontse Jesúsbioye  
tojána**

*(Mc 10.17-31; Lc 18.18-30)*

<sup>16</sup>Chentshana, canÿe boyabása tojáná Jesús jinÿama y mëntšá tbojantjá: —Buatëmbayá, ñndaye tsabe soye chjama chë nÿetsca tescama yomna tsabe vida jtsebomnama ca?

<sup>17</sup>Y Jesús tbojanjúá: —¿Ndáyeca chë tsabe soye ndayá bëtsemnama sçojtsetjaná ca? Tsabia nÿe canÿa endmëna: Bëngbe Bëtsá. Aca chë nÿetsca tescama yomna tsabe vida jtsebomnama tçojtsebošëse, mandënga cochtsobedecena ca.

<sup>18</sup>Chora chë bobontse tbojantjá: —¿Ndaye mandënga ca?

Y Jesús tbojanjúá: —“Ndoñe catjóba, acbe shema ínÿaftaca ndoñe cattseingñaye, ndoñe catjatbëba, ndoñe catjuaboínÿena. <sup>19</sup>Acbe bëtsétsata stëtšoye ndoñe catjáquedaye y ndëmua entsánaca cochtsebobonshana ntšamo cach aca cuenobobonshancá ca” —Jesús tbojanianyana.

<sup>20</sup>Chora chë bobontse tbojanjúá: —Atše lempe chca nÿets tempo sëndocumplina. ¿Ndayá más sçojtsebuáshbena ca?

<sup>21</sup>As Jesús tbojanianyana: —Aca lempe tsábá jamama tçojtsebošëse, motsa, acbe bomna soyënga cochjetsatobuiye y chë crocénana, ndbomnëjëmënga cochtsatšataye; chca, bëts uacanana soye celoca cochántsebomna. Chentshana cochjabo y sçochjuasto ca.

<sup>22</sup>Chë bobontse chca tojanuena ora, ngménaca yojtsatoñe, cha corente bomná bemna causa.

<sup>23</sup>Chora Jesús chabe uatsjéndayënga tojanéyana: —Ndegombre cbéyana, puerte totcá entsemna canÿe bomnabiama Bëngbe Bëtsabe amëndayoye jamashënguama ca. <sup>24</sup>Chë

bomnabiama cachiñe šcuatayana: Más paselo entsemna canye camello chë coshufjentša atëfjnëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>25</sup> Chabe uatsjëndayënga chca tmojanuena ora, puerte ojnánänënga imojtsemna y imojtsichamo: —As, ¿nda yochjobenaye atsbočaná jtsemnama ca?

<sup>26</sup> Jesús chënga tojanënyäné y tojanéyana: —Entsanga ndoñe quemátobena jamama canya atsbočaná chaotsemnama, pero Bëngbe Bëtsá añe, er cha nyetsca soyënga jamama endobena ca.

<sup>27</sup> Chora Pedro tbojaniana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjýyëngacñe ca?

<sup>28</sup> As Jesús tojanéyana: —Ndegombre cbéyana, nyetsca quem luarentša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšenëšiñe reycá echanjót'bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentsá entsangbiama jayanama tšabá o ndoñe tšabá tmonjamama. <sup>29</sup> Y ndëmuanýënga, atše jaserviama tmojëftseboshjona cachëngbe yebna, catsátanga o uabënanga, befta o bebmá, básenga o fshantsënga, chë soyëngama patse soye más mochanjýyëngacñe y chë nyetsca tescama yomna tšabe vídnaca. <sup>30</sup> Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

### Chë trabájayëngbiama cuento

**20** <sup>1</sup> Mëntšánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiña canye te cabá cachëse vojábocna peonga janguanguama, chabe uvas betiyënga jajañe chamotrabajama. <sup>2</sup> Chë nduiño peonga vojányena orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabájama. <sup>3</sup> Mo base mošenana ora, chë nduiño cachiñe vojábocna y plazoca atanënga ínýënga yojanyë, tondaye ntsamcá. <sup>4</sup> As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. <sup>5</sup> Nyetsto ora y bëts mošenana ora, chë nduiño cachiñe vojábocna y cachiñe cachcá vojopása. <sup>6</sup> Mo la cinco ora, chë nduiño cachiñe vojábocna y chenache ínýënga yojányena, tondaye ntsamcá. As yojátjaye: ‘¿Ndáyeca tšëngaftanga nyets día ntjatrabajacá muentše šmotsomñe ca?’ <sup>7</sup> Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’ <sup>8</sup> “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshhajñënguentšana cochjabojátša y chë natsana tmojáshhajñënga ústonoye ca.’ <sup>9</sup> Y chë mo la cinco ora imojáshhajñënga imojobëconá, y cada ona canye denario crocénana yojtáyentšbuachiye. <sup>10</sup> Chentšana, chë natsana jatrabájama imojáshhajñënga yojtsamna jobéconama y chënga

imoyétsejuabnaye más crocénana mochanóyèngacñe ca. Pero chéngnaca cach canye denario crocénana yojtëbuénaye. <sup>11</sup> Chca imojóyèngacñe orna, chénga imojóntša chë nduiñbiana bacá ichámuana, <sup>12</sup> mëntša: ‘Quemënga chë ústonoye tmonjášhajnënga nÿe canye horatema tmonjatrabajá; ntšamo bënga šcontëbuenacá, cachcá chénga contëbuená y bëngna nÿets día jabuache fsënjatrabajá y corente jënÿá fsënjauantá ca.’

<sup>13</sup> “Pero chë nduiño canÿa chca yojsichamuábioye ibojojuá: ‘Sobreno, acbiana ndocna ndoñe tšabe soye chiyatsma. ¿Ndoñe canÿe denario crocénana canÿe tescama tbonjenoyeuná ca? <sup>14</sup> Chcasna, acbe uacanana crocénana mesocñe y motsatoñe. Atše séntseboše chë ústonoye jatrabájama tojashjanguá jtabuénayana, cachcá ntšamo aca tbojtabuenacá. <sup>15</sup> Chca entsemna, er atše sëndobena atšbe crocénana nÿe ndayánaca jamana. ¿O aca envidia cojtsebozna, atše tšabia tsmënama ca?’ —cha yojayana.

<sup>16</sup> Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

**Jesús cachiñe tojánayana cha jóbanama y jtayenama**  
(Mc 10.32-34; Lc 18.31-34)

<sup>17</sup> Chénga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanéyana: <sup>18</sup> “Tšëngaftanga šmontsonÿá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley

abuátambayëngbe cucuatšinë mochanjáboshjona, y chénga mochanjayana jóbanama cha ibojtsemna ca, <sup>19</sup> y chë ndoñe judiëngbe cucuatšinë mochanjáboshjona chénga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

**Chë Santiago y Juanbe mamabe impadana soye**  
(Mc 10.35-45)

<sup>20</sup> Chentšana, Zebedeobe uaqiñatbe mamá chabe uaqiñátaftaca Jesúsbioye tojanobeconá, chabe shecuatšëntše yojoshamentšiyë canÿe pavorama jaimpádama. <sup>21</sup> As Jesús tbojantjá: —¿Ndayá cojtseboše ca?

Y chë shembása tbojanayana: —Aca reycá chacojtsemánda ora, cochjamánda atšbe uaqiñata chabótbema canÿa acbe catšbioica y chë inÿa acbe uañicuayoica, ácaftaca chabotsemándama ca.

<sup>22</sup> Y Jesús tojanéjua: —Ntšamo šmontsotjanañama, tsëndata ndoñe quešnáttatšëmbo ca. Ntšamo atše chjasufriacá, útsëndátnaca cachcá jasúfriama tašatjobenaye ca?

Y chata tbojanjuá: —Añie, fchanjobenaye ca.

<sup>23</sup> Chora Jesús tojanéjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanÿëngbiana atšbe Taitá tojaprontacá ca.

<sup>24</sup> Chë inÿe bnëtsana uatsjëndayënga chca tmojanuena ora, chë uta catšátaftaca tmojanotjayaná. <sup>25</sup> Chora Jesús chë uatsjëndayënga tojánachembo y tojanéyana:

—Tšëngaftanga šmondétatšëmbo, chë ndoñe judiëngbeñe chë reyënga lempe jtsemándayana nÿa mo nduiñënga cuaftsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inÿe entsanga sempre chamotsayaunanama. <sup>26</sup> Pero tšëngaftangbeñina ndoñe chca chaondëtsemna. Inÿëtšá; masna, nda tšëngaftanguentšë chë más uamaná jtsemnama tojtsebošá bontsemna chë inÿënga jtsaservénana. <sup>27</sup> Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nÿe inÿabiana nÿets tempo oservenacá. <sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inÿënga jabáserviama. Y mo nda inÿënga játsebacama cuafjëtšajocá, cha echanjóbana, ba entsanga atsebácanënga chamotsemnana ca —Jesús tojánayana.

#### Jesús uta jtanata tojanashná

(Mc 10.46-52; Lc 18.35-43)

<sup>29</sup> Chënga, Jericó bëts pueblentšana tmojánbocana ora, ba entsanga Jesús imojtséstona. <sup>30</sup> Uta jtanata benache juachañe ibnatbemana. Jesús chëjana yojtsachñëjuanama chata tbojanuena ora, tbojanontšë uayebuáchana: —iUtabná, Davídbentšana Entšá, šmotsalastemá ca! <sup>31</sup> Entšanga chë jtanátbioye tmojtsanëcácana iytëca chabotsemnana, pero chatna más ibojtsáyebuache: —iUtabná, Davídbentšana Entšá, šmotsalastemá ca! <sup>32</sup> As Jesús yojtsaye, chë jtanata tojánachembo y tojanatjá: —¿Ndayá šojtseboše atšë tsëndatbiama chjamama ca? <sup>33</sup> Y chata tbojanjuá: —Utabná, bëndata chabuatëbínÿnana ca.

<sup>34</sup> Jesús chatbiama tbojanongmé y tojánabuchbojajo. Cachora chë jtanata tšabá yojtëbinÿna y Jesús tmojanasto.

#### Jesús Jerusalenoye tojánashjango

(Mc 11.1-11; Lc 19.28-40; Jn 12.12-19)

**21** <sup>1</sup> Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentšë. Chora Jesús uta chabe uatsjëndayata tojanichamó, <sup>2</sup> y mëntšá tojanéyana: “Tsëndatbe natsana entsemna base pueblotémoye motsata. Cachora canÿe burrá utsbuaná šochanjñëna y cháftaca canÿe burrotema echántsemna. Šochjuajafjoná y šochjuánatse. <sup>3</sup> Nderado nda ndayánaca chacmojúayanëse, šochjuayana: ‘Bëngbe Utabná bontsájaboto y chentšana camuentšë echanjabáibashejuana ca.’ ”

<sup>4</sup> Chca tojanopasá, cachcá chaotsemnana ntšamo chë Bëngbe Bëtsabe juabna oyebuambnayá tojanayancá. Cha mëntšá tojanábema:

<sup>5</sup> Jerusalén bëts pueblentšë oyenënga mëyana: “Minÿënga, tšëngaftangbe Rey chentšë tšëngaftangbioye entsabó, ndoñe mo canÿa cachá bëtsá enobiamnayacá; canÿe búrrbeñe enjaquená; canÿe burrotëmiñe, canÿe uatrabájaye bayabe šëšónbeñe ca.”

<sup>6</sup> Chora chë uatsjëndayata tbojána y tbojanma ntšamo Jesús tojanamëndacá. <sup>7</sup> Chë uatsjëndayatna chë burrá y chë burrotema tmojanënatse, entsáyëjuangá chátbeñe tojanájatse y chora Jesús chábeñe tojanenoyayé. <sup>8</sup> Bëtscá entsanga chëngbe entsáyá chë benachëjana imojtsëtétsatsana,

y ínÿengna betiyeshënguĩne buacuafjënga imojtsetcoye y chiñe imojtsequëcñná. <sup>9</sup>Y chë natsana imojtsajñënga y chë ústonoyënga mëntšá imojtsaiuáyebuache: “iRey Davídbentšana Entšá matschuanga ca! iCorente bendición bomná, chë Bëngbe Utabnabe obenánaca tojabá! iBëngbe Bëtsá celocá matschuanga ca!”

<sup>10</sup>Jesús Jerusalenoye tojánamashëngo ora, nÿetsca entšanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup>Y chë entšanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

**Jesús, Bëngbe Bëtsabe  
bëts yebnentšana enënga y  
obuámnyënga tojtanëbuacna**

*(Mc 11.15-19; Lc 19.45-48; Jn 2.13-22)*

<sup>12</sup>Chentšana Jesús, Bëngbe Bëtsabe bëts yebnoye tojánamashëngo y chë entšanga chentše imojtsena y imojtsobuámnañënga chentšana tojtanëbuacna. Chéntšnaca imojtsemna entšanga canÿe crocénana enënga, y chë crocénana nÿe Bëngbe Bëtsabe bëts yebnentšama inoservena. Chëngbe mesëshangá tojtсанenásatajchquëca y chë palomatema enëngbe tšenëšëgnaca. <sup>13</sup>Y tojanéyana: “Bëngbe Bëtsabe uabemana palabrënguĩne cha mëntšá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanéyana.

<sup>14</sup>Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. <sup>15</sup>Chë bachnangbe

más uámána amëndayënga y ley abuátambayënga, Jesús bëts soyënga yojtсамama tmojáninÿe ora, y chë basetëmënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyananga. Chë basetëmënga mëntšá imojtsáyebuache: “iChë Rey Davídbentšana Entšá matschuanga ca!” <sup>16</sup>As Jesús tmojaniyana: —¿Ntšamo chë basetëmënga montsichamcá quectsuenana ca?

Y Jesús tojanéjua: —Aíñe, sëntsuenana. Pero, tšëngaftanga Bëngbe Bëtsabe uabemana palabrënguĩne chë soyama ndoñe šmëndualía? Chiñe mëntšá endayana: Chë basetëmënga y ochóchaye šëšonatëmëngbe canténgaca aca tcojama entšanga chacmotsatschuanama ca.

<sup>17</sup>Chora Jesús chënga tojésanabashejuana y Jerusalenentšana Betania puebloye tojtсanoñe; y chentše chë ibeta tbojánbobinÿna.

**Jesús tojánayana canÿe higo betiye  
ndoñe más chaondëshájona ca**  
*(Mc 11.12-14, 20-26)*

<sup>18</sup>Chë te cachëse, Jesús cach bëts puebloye yojtésa ora, tbojánishëntsena. <sup>19</sup>Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojínÿena. As Jesús chë higo betiyoje tojánayana: “iNdocna te más chacondëshájona ca!” Y betscó chë higo betiye tojtсанbuashá.

<sup>20</sup>Chë uatsjëndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

<sup>21</sup>Y Jesús tojanéjua: —Ndegombre cbéyana, tšëngaftanga Bëngbe Bëtsábeñe ošbuáchiyana šmojtsebmna

y chabiamaninaniñe ndoñe inyetšá šmonjatsjuabnase, šmochantsobena jamama ndoñe nye ntšamo atše quem higo betiyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanēse, chca jochnēnguana. <sup>22</sup> Y Bēngbe Bētsáftaca chašmojtsencuénta ora, chábeñe jtsošbuáchiyēse, lempe ntšamo chašmojtjañcá šmochanjóyēngacñe ca —Jesús tojánayana.

### Jesusbē obenana

(Mc 11.27-33; Lc 20.1-8)

<sup>23</sup> Chca tojanopasá chentšana, Jesús Bēngbe Bētsabe bēts yebnoye tojánamashēngo. Chentše yojtsabuátambantscuana, bachnangbe améndayēnga y judiēngbeñe bētsējemēngcá améndayēnga tmojanobobconá y tmojantjá: —¿Ndaye deréchoca chē contsama soyēnga aca cojtsama ca? ¿Chca jtsamama nda mando tcmēnjatštá ca?

<sup>24</sup> As Jesús mēntšá tojanējua: —Atšnacá canye soye séntsebmoma tšēngaftanga jatjayama, y quešmojojuase, átšnacá cbochjáuyana ndaye deréchoca atše chca stsama. <sup>25</sup> ¿Nda Juan chē Ubayaná tbojanichmó entšanga jubáyama, Bēngbe Bētsá o entšanga ca? —Jesús tojanējyana.

Chama chēnga tmojanontsé mēntšá enatsētsnayana: “‘Bēngbe Bētsá ca’ chamojojuase, cha šochanjáuyana: ‘As, ¿ndáyeca chē tmojanabuayená soyēnguñe ndoñe šmonjanošbuaché ca?’” <sup>26</sup> Pero ndoñe quemuátobena jayanana ‘entšanga ca’; muentša entšangbiama bēnga montsauatja, er nyetscanga mondējuabná Juan ndegombre Bēngbe Bētsabe juabna oyebuambnayá yomna ca.” <sup>27</sup> Chcasna

chēnga Jesús tmojanjúá: —Bēnga ndoñe queftsátstatšēmba ca.

Y as Jesús tojanējyana: —Atše cach ndoñe quebochatējyana ndaye deréchoca chca stsama ca.

### Chē uta uaquiñátbiaman cuento

<sup>28</sup> Chora Jesús entšanga tojanatjá: —¿Ntšamo tšēngaftanga quem soyama šmatjayana? Canye boyabása uta uaquiñata yojánabamna, y cánýabioye ibojauyana: “Uaquiñá, mēnté motsa atšbe uvas betiyēnga jajoye jatrabájama ca.” <sup>29</sup> Chē uaquiñá ibojajuá: “¡Jama ndoñe quetsátsboše ca!” Pero botamana yojenójuaboye y pronto choye yojá. <sup>30</sup> Chentšana chē taitá chē inye uaquiñábioye cachcá ibojauyana. As cha ibojajuá: “Arseñor, añe chanjá ca.” Pero ndoñe yonjá. <sup>31</sup> ¿Chē útatentšana ndēmuanýá tojanma ntšamo chē taitá yojabošcá ca? —Jesús tojanatjá.

Y chēnga tmojanjúá: —Chē natsaná ca.

Chora Jesús tojanējyana: —Ndegombre cbéyana, chē Romocama entšángbioye impuesto atjanayēnga y chē bacna vida bomna shembásēnga, tšēngaftangbiama más montseprontana Bēngbe Bētsabe améndayoye jamashēnguama. <sup>32</sup> Juan chē Ubayaná tonjánabo tšēngaftanga jábuayenama ntšamo jtsiyenana cmamnama, ntšamo Bēngbe Bētsá yobošcá, y tšēngaftanga chē tmojanabuayená soyēnguñe ndoñe chešmatanošbuaché; y chē cuenta, chē Romocama entšángbioye impuesto atjanayēnga y bacna vida bomna shembásēnga añe chábeñe montsanošbuaché. Y tšēngaftanga, masque ntšamo chēnga Bēngbe Bētsábeñe imojtsošbuáchema lempe šmojinýēse, chē juabnayana ndoñe

šmonjatrocá, chábeñe jtsošbuáchiyama ca —cha tojanéyana.

**Chê puerte bacna trabájayëngbiam  
cuento**

(Mc 12.1-12; Lc 20.9-19)

<sup>33</sup> Mëntšánaca Jesús tojánayana: “Inyê cuento šmochjatuena chašmuatsjínýama: Canyê jajañe nduiño uvas betiyënga yojáje y chë shéconana yojajétja. Chë uvasëšangá juantsëtetjamna canyê base luare yojajutjo y canyê tsbanana jebna soye yojapórma chentše jtsaishanyama. Chentsána, inyê trabájayënga chë jajañe yojárrendaye y chana inyê luaroye yojtsoñe. <sup>34</sup> Chë uvasëšangá juashacama tempo yojobuache orna, chë jajañe nduiño básefta oservënënga yojichamuá chë arrëndayënga jáuyanama ntsachetsá chë nduiño ibojtsotocánama. <sup>35</sup> Pero chë arrëndayëngna chë oservënënga imojishëche: ínýengbioyna imojtsajantšetaye, ínýengbioye imojtsëbaye y chë ínýengbioyna ndëtšbéngaca imojtsatëchénganja. <sup>36</sup> As chë jajañe nduiño chë natsanama más ba oservënënga yojichamuá. Pero chë arrëndayëngna, ntšamo chë natsanéngaftaca imojamcá, cachcá chora imojama. <sup>37</sup> “Cabana, chë jajañe nduiño cachabe uaquiñá ibojíchmuá; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’ <sup>38</sup> Pero chë arrëndayënga chë uaquiñá imojinye orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiam echanjoquéda ca.’ <sup>39</sup> As chë uaquiñá imojishache, chë uvas betiyënga jajañentsána imojtsábocna y imojtsóba.”

<sup>40</sup> Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ñntšamo šmojtsejuabná chë arrendayëngaftaca cha yochjama ca?

<sup>41</sup> Y chënga tmojanjuá: —Chë puerte bacna arrëndayënga ni mo batšatema ntjalastemaycá echantsëbaye. Chë jajañe ínýenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtsotocancá chënga mochantíyie ca.

<sup>42</sup> Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana: Chë yebna jebuanënga tmojtsanaboté ndëtšbé, mora chë más bëts uashacuanëšentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.

<sup>43</sup> Ntšamo chë nduiño chë arrëndayënga chë fshantse echantsabaca y ínýenga echantsatšataye y chënga chabiam bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínýengbioye mochantšatšataye. Chënga Bëngbe Bëtsabe soyëngama mochanjouena y chë soyëngama ínýengbioye mochanjabuayená, Bëngbe Bëtsabe amëndayoye jamashënguama. <sup>44</sup> Ndánaca chë ndëtšbeñe chaojtsatsá, chëbé bochantšacacaye; y chë ndëtšbé ndábeñnaca chaojtsatše, polvëshe bochantšebema ca —Jesús tojánayana.

<sup>45</sup> Chë bachnangbe amëndayënga y fariseunga, Jesús chë jabuátambama cuentënga yojtsëtsëtsnama, tmojanenótatšëmbona chëngbiam



chca yojtsóyebuambnama. <sup>46</sup> Chora chënga tmojánbošena Jesús jishachana, pero entšangbiama imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

**Chë casamento fiestama cuento**  
(Lc 14.15-24)

**22** <sup>1</sup> Chentšana Jesús tojanontšë cachiñe cuenténgaca chënga jabuátambana. Mëntšá tojánayana: <sup>2</sup> “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canyë réyefraca tojanopasacá. Chë rey yojamánda canyë bëts fiesta jamama, chabe uaquiñabe casamentama. <sup>3</sup> Chora chë rey chabe oservénënga yojichamuá chë ófjanënga jobiatšama, pero chë ófjanëngna ndoñe imonjouena jama. <sup>4</sup> As chë rey inyë oservénënga yojichamuá y mëntšá yojámëndaye: ‘Chë ófjanënga šmochjáuyana, ya saná stseboprontana ca. Sëñjamandá, atšbe uacnënga y uamna bayënga minyícanënga jobáyama y lempe entseprontana; y chamuabo chë casamento fiestama ca.’

<sup>5</sup> “Pero chë ófjanënga ndoñe imonjouena. Canyã, cachabe fshantse inabomnoye yojtsoñe; ínñana chabe obuámnayíñe trabajuama yojtsoñe; <sup>6</sup> y ínýengna, chë reybe oservénënga imojishëche, jabuache imojtsatsetšenaye y imojtsëbaye. <sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservénënga obánayënga chamuetsëbáyama y chëngbe bëts pueblo jetsángbotjuama. <sup>8</sup> Chora chabe oservénënga yojáyana: ‘Lempe entseprontana chë casamento fiestama, pero chë ófjanënga

ndoñe quenjatëmerecena moye jabama. <sup>9</sup> Motsajna tsashenangoye y ndëmuanýéngnaca chašmojánýenënga, chë casamento fiestama šmochjúbuaja ca.’ <sup>10</sup> As chë oservénënga tsashenangoye imojábocana y nyetscanga imojánýenënga imojáchembo, cánýiñe tšabe y bacna entšanga, y chca, chë tsocnanaoica jútjena yojtsemna entšángaca.

<sup>11</sup> “Chë ófjanënga jányama chë rey yojámashëngo ora, chentšë cánýabioye ibojinyë y chana ndoñe yontsemna ntšamo canyë casamento fiestama endbetsemncá uichëtjoná. <sup>12</sup> As chë rey ibojauyana: ‘Sobreno, ntšamo canyë casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nye iytëca yojtsemna. <sup>13</sup> As chë rey chë fiestentšë ujuatšnayënga yojámëndaye: ‘Shecuatše y cucuatše motsebatsëca y chë ndëbinýna luaroye, infernoye motsábocna. Chentšë puerte echanjenóbošachna y chë tsetšanama juatsašënga echantsenoftëšojnaye ca’ —cha yojayana.”

<sup>14</sup> Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nye báseftanga. Er Bëngbe Bëtsá banga jáchembuana chabe amëndayoye jamashënguama, pero nye báseftanga choca mochántsemna ca.”

**Chë Romoca bëts mandadbiana impuesto jtsatsquécnayama**  
(Mc 12.13-17; Lc 20.20-26)

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadéngbeñe cha mal jaquédama.

<sup>16</sup> Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndétatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entsanga tmojatichamcá, er acbiamá tondaye quenatámana nda más uamaná o nduamaná tomnana.

<sup>17</sup> Chcasna, ¿ntšamo catjájuaboye? ¿Tšabá tayojtsemna, César, chë Romoca bëts mandadbiama, bënga impuesto jtsatsquécjnayana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanéyana: —Bacna entsanga, ntšamo ndegombre šmojuabnacá ndinÿinÿnayënga. ¿Ndáyeca tšëngaftanga šmojtseboše chë sóyeca atše jisháchichiyama? <sup>19</sup> Chë šmatsquécjná crocénana šminÿinÿé ca.

As canÿe crocénana tmojanoyé.

<sup>20</sup> Jesús tojanatjá: —¿Ndabe jubíá quem crocénaniñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: —Césarbe jubíá; cha chca enduabaina ca.

As Jesús tojanéyana: —Césarbioye šmochtoyíye cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojnánänënga imojtsemna. As chënga cachcá Jesús tmojanonÿá y tmojtsatanoñe.

### Obanënga jtayenama Jesús tmojantjá

(Mc 12.18-27; Lc 20.27-40)

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna

te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá: <sup>24</sup> —Buatëmbayá, Moisés tojánayana nderado canÿe boyá tojóbana básenga ntjéftsabashejuancá, ana chabe uabentsá jtsemnana chë shëmaftaca jtobouamayana, chca, chabe uabochená obanabiama básenga jtsabamnama ca. <sup>25</sup> Chcase, canÿe bëngbentše canÿsëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. <sup>26</sup> Y cháftaca cachcá tonjanopasá, chë inÿe uabentsáftaca cachcá, y cachcá chë ínÿengaftaca y chë ústonoca uabentsáftacnaca. <sup>27</sup> Y chentšana chë shembásanaca tontsanóbana. <sup>28</sup> Y morna, chë obanënga chamojtayena ora, ¿ndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

<sup>29</sup> As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. <sup>30</sup> Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>31</sup> Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguiñe tojánayanama? Cha tonjánayana: <sup>32</sup> “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga

tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>33</sup> Chë entsãnga chca tmojanuena ora, ojnanánënga imojtsemna ntšamo Jesús vojtsabuátambama.

**Chë más bëts uámana mando**  
(Mc 12.28-34)

<sup>34</sup> Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna, <sup>35</sup> y canya chënguentšá, ley abuatambayá, Jesúsbioye jisháichiyama tbojantjá: <sup>36</sup> —Buatëmbayá, ¿Moisesbe leyinë ndayá chë más bëts uámana mando yomna ca?

<sup>37</sup> As Jesús tbojanjuá: —“Utabná Bëngbe Bëtsá cochtsebobonshana nyëts acbe ainánaca, nyëts espíritoca y nyëts juábna.” <sup>38</sup> Chë soye endmëna chë más bëts uámana mando y nyëtsca mandëngama chë natsanoca entsemna.

<sup>39</sup> Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” <sup>40</sup> Chë uta mandentšana endóbobocana lempe ntšamo Moisesbe leyinë endayancá y ntšamo chë Bëngbe Bëtsabe juabna oyebuambnayënga mondbetsabuatabacá ca —Jesús tbojanayana.

**¿Cristo, ndabe entsábentšana yomna?**

(Mc 12.35-37; Lc 20.41-44)

<sup>41</sup> Chë fariseunga cabá cachentšë imojtsemnëntscuana, <sup>42</sup> Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamá, chë Cristo? ¿Ndábentšana cha iuabó ca?

Y chënga tmojanjuá:  
—Davidbentšana ca.

<sup>43</sup> As Jesús tojanéyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

<sup>44</sup> Bëngbe Bëtsá, atšbe Utabná Crístbioye tbojanayana: atšbe catšbioica mótbema, atšbe obenánaca acbe uayayënga acbe cucuatšinë chamoquedama chjamëntscuana ca.

<sup>45</sup> ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

<sup>46</sup> Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

**Jesús chë fariseungbiamá y ley abuatambayëngbiamá tojánayana, chënga ndoñe tšabá montsama ca**  
(Mc 12.38-40; Lc 11.37-54; 20.45-47)

**23** <sup>1</sup> Chora Jesús, entsãnga y chabe uatsjëndayënga mëntšá tojanéyana: <sup>2</sup> “Chë fariseunga y chë ley abuatambayënga cmondbëtsabuatabayë ntšamo Moisesbe leyënguinë iuayancá. <sup>3</sup> Chcasna, tšëngaftanga cmonsamna chënga joyaunayana y ntšamo tmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatabacá. <sup>4</sup> Mo canye entsá, couáybioye uauta uasmanësha juamayana y cachá tondaye tontsasmancá, chënga entsãnga jtsamëndayana bëtscá mandënga chamótsocumplínama, pero cachënga ni mo batšatema ntsamana chë mandënga jtsocumplínama. <sup>5</sup> Chënga lempe jtsamana nye entsãnga chamótsënyama.

Chënga chë ñnyengbiana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguïñe juabemana ntšamo Bëngbe Bëtsabe uabemana palabrenguïñe endayancá, y juentsaca y buacuatsiñe chëjënga jenábatsëcana y sibiajana nya tëntša uasebtotonanëjuangá jtsichëtjonana.

<sup>6</sup> Chënga jtsebošana chë fiestënguïñe nya quëfseroca jtsetbiámanama, y chë judiëngbe enefjuana yebnënguenache chë más uámana luarënguïñe. <sup>7</sup> Chënga jtsebošana tsáshenañe entsãnga nya respëtoca chamotsacheuanama, y ‘abuátambayënga ca’ chamotsachembuanámna chënga jtsebošana.

<sup>8</sup> “Pero tsëngaftangna ndoñe šmattseboše entsãnga ‘abuátambayënga ca’ chacmotsachembuanama, er nyetsca tsëngaftanga mo catšatangá šmondmëna, Bëngbe Bëtsabeñe betsošbuachéyeca, y nye canya endmëna tsëngaftangbe Buatëmbayá. <sup>9</sup> Tsëngaftanga ‘taitá ca’ chë ley abuátambayënga šmondbëtsachembuana, pero tsëngaftanga ndocna quem luarentšá ‘taitá ca’ šmattsechembuana; tsëngaftanga nye canye Taitá šmondbomna, chë celoca endmëná. <sup>10</sup> Ndoñe šmattseboše entsãnga ‘mándayënga ca’ chacmotsachembuanama; er nye canye Mandayá endmëna y cha Cristo endmëna. <sup>11</sup> Nda tsëngaftangbeñe chë más uamaná tojtsemná bontsemna chë ñnyënga jtsaservénana. <sup>12</sup> Nda cachá bëtsá tojtsenobiámná, nduamaná mochántsebema; y nda cachá nduamaná tojtsenobiámna, más bëtsá mochanjábema.

<sup>13</sup> “iTša lastema tsëngaftangbiana, bacna entsãnga ntšamo ndegombre

šmojuabnacá ndinñinyñayënga fariseunga y ley abuátambayënga! Tsëngaftanga šmontsama entsãngbiana puerte totcá chaotsemna Bëngbe Bëtsabe amëndayoye jamashënguama, mo bëššá cuaftsebiatamiancá. Pero ni cach tsëngaftanga choye quešmátamashjuana, ni ñnyënga choye jamashënguama bošëngbioye chama quešmátalesenciana.

<sup>14</sup> “iTša lastema tsëngaftangbiana, ntšamo ndegombre šmojuabnacá ndinñinyñayënga fariseunga y ley abuátambayënga! Tsëngaftanga chë viudángbioye chë tmobomna soyënga jtsabacayana, y entsãngbe delante tsábá chacmotsënyama y chënga šmojtšaiñgñayama ndoñe chamondëtsetatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tsëngaftanga más jabuache ñnyengbiana cmochanjácastigaye.

<sup>15</sup> “iTša lastema tsëngaftangbiana, bacna entsãnga ntšamo ndegombre šmojuabnacá ndinñinyñayënga fariseunga y ley abuátambayënga! Tsëngaftanga ba luarënguenache jtsajnana canya tsëngaftangbe ustoná onguayiñe, y šmojñyëna ora, tsëngaftanga jamana cha chaotsemna tsëngaftangbiana uta soye más merecido buajoná infiernoye chaotsama.

<sup>16</sup> “iTša lastema tsëngaftangbiana; tsëngaftanga šmondmëna mo jtanënga entsãnga unachayëngcá! Tsëngaftanga šmondbëtsichamo: ‘Nda ñnyabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aññe

jtsemnana chë tbojašbuachená soye jamama ca.' <sup>17</sup>iObëjémënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiama josérviaama jtsemnana, nÿe Bëngbe Bëtsabe bëts yebnocca chë castellano tojtsemnayeca. <sup>18</sup>Tšëngaftanga mëntšánaca šmondbétsichamo: 'Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiama altaroca tojtsejájona soyëngama tojajurasna, añe jtsemnana chë tbojašbuachená soye jamama ca.' <sup>19</sup>iNduabínÿnënga! ¿Ndayá más uámana soye yomna, chë Bëngbe Bëtsabiama tmojajá soyënga o chë altar? Chë tmojajá soyënga Bëngbe Bëtsabiama josérviaama jtsemnana, nÿe chë altaroca chë soyënga tmojajáyeca. <sup>20</sup>Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámna cha jtsejúraryana. <sup>21</sup>Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiama cha jtsejúraryana, cha chë chentše oyená. <sup>22</sup>Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámna, chentše yotbemanabiama.

<sup>23</sup>“iTša lastema tšëngaftangbiama, bacna entsãnga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga Bëngbe Bëtsabiama jtsequëcñayana chë jajañentša sananga bnëtsanentšana canÿe soye; chë binche matatémënga menta, anis

y chë cominentša sanágnaca. Pero tšëngaftanga nÿe batšá jtsamana chë leyentša más uámana soyënga, mo chë nÿetsca entsãnga cachca derechënga chamotsebomnama, ínÿyënga jtsalastemánana y chë tšabe soyënguiñe jtsiyenana, chca, entsãnga tšëngaftangbeñe chamotsošbuáchemo. Chë soyënga cocayé cmontsamna jtsamama, chë inÿe tšabe soyënga amana ntjajbanacá. <sup>24</sup>iTjanënga entsãnga unachayënga! Tšëngaftanga chë base soyënga jamama puerte jtseñócochinÿenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tšëngaftanga šmontsemna mo canÿe entsá ndayá tojtsabuchetjácá bayëfja jtsejuánama, ndoñe ntjasama, jasama ndoñe yondëlesenciana ca chë leyinÿe iuayana causa. Pero šmondmëna mo entsãngcá ndëmuanÿyënga camellbe mëntšena jasana, y chë leyinÿe endayana chcana jasama ndoñe yondëlesenciana ca.

<sup>25</sup>“iTša lastema tšëngaftangbiama, bacna entsãnga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo entsãngcá ndëmuanÿyënga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentšënanana entsãngbiama mo tšabëngcá jtsinÿyënga, pero tšëngaftangbe ainantšë jútjena entsemna nÿe jtsatbëbanama y nÿe bëtscá soyënga jésebomnama juabnéngaca. <sup>26</sup>iNduabinÿna fariseo! Cochjshetsajbaná ainainÿe bacna soyënga bomnana. Chamna nÿe tšabe juabnénga chentše cochtsebomna, y lempe ntšamo chacojtsamcá y entsãnga chamojtsonÿacá tšabá echántsemna.

<sup>27</sup>“iTša lastema tšëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashéngaca y janjuana soyéngaca. <sup>28</sup>Tšëngaftanga chca šmondmëna: entsangbe delante tšëngaftanga jtsinÿnana mo nyetsca soyënguiñe tšabá amëngcá, pero ndoñe chca quešmátsmëna. Tšëngaftangbe inchantšna chë bacna entsanga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

<sup>29</sup>“iTša lastema tšëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nyetsca soyënguiñe tšabá amëngaftaca, chë chëngbiama jtenójuaboyama pormániñe jtsatsbótamnyëse; <sup>30</sup>y chentšana šmondbétsichamo: ‘Bënga chë bëngbe bëtsëjémëngbe tempo maftsjanienëse, chëngbiocyte ndoñe matmënjánéjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana.

<sup>31</sup>Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioyce tmojanëbayëngbe entsanguentšana šmomnama. Y mora cach

tšëngaftangbe bëts taitangcá tšëngaftanga šmontsama.

<sup>32</sup>iMopochocanga jamama chë bacna soyënga, chë tšëngaftangbe bëts taitanga tmojanbojatšë jamama soyënga!

<sup>33</sup>“iMëtšcuayënga, mëtšcuaye entsanga! ¿Ndayá šmochjama chë infiernocua uabouana castigiëntšana jótsbocama? <sup>34</sup>Chíyeca atšë tšëngaftangbioyce chanjichamuá Bëngbe Bëtsabe juabna oyebuambnayënga, tšabe soye tatšëmbënga y abuátambayënga. Pero tšëngaftangna, ínÿyëngbioyce šmochantsëbaye y šmochanjácrucificayey; ínÿyëngbioyna chë enefjuana yebnënguenache šmochanjátsetšenaye y nyetsca bëts pueblënguenache chënga šmochandúcama. <sup>35</sup>Chíyeca, tšëngaftangbiama nyets castigo echántsemna chë nyetsca soyënguiñe tšabá amënga tmojëfšóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentšë tmojanóba, altar y chë entsanga Bëngbe Bëtsábioyce imojánadorana luariñe. <sup>36</sup>Ndegombre cbéyana, lempe chë soyëngama castigo morsca entsangbiama echántsemna ca” —Jesús tojánayana.

**Jesús tojanošachna Jerusalenoca  
entsangbiama  
(Lc 13.34-35)**

<sup>37</sup>Mëntšánaca Jesús tojánayana: “iJerusalenentša entsanga, Jerusalenentša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtšbëngcaca jtsatëchénganjana jtsëbáyama. Bueta soye atšë

sénjábosena tsëngaftanga átsbiroye júbuajana, mo canÿe tuamba chabe bolletotémënga chabe juatëngmiáša tajsoye cuaftajayecá, pero tsëngaftanga ndoñe chešmátsbošena. <sup>38</sup> Y šmochjinÿe, atše mora cachcá cbochanjesénÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y énañe tcojeseboshjoncá. <sup>39</sup> Y atše cbéyana, ndegombre tsëngaftanga morscana atše ndoñe más quešmochátinÿe; y atše šmochátinÿe mëntšá chašmojtsichamo ora: ‘iCorente bendición bomná, Bëngbe Utabnabe obenánaca tojabá ca!’ ”

**Jesús tojánayana chë Bëngbe  
Bëtsabe bëts yebna lempé  
mochjánpochocama  
(Mc 13.1-2; Lc 21.5-6)**

**24** <sup>1</sup> Jesús Bëngbe Bëtsabe bëts yebnentšana tojéftsanbocna y ya yojtsaye. Chorna chë uatsjéndayënga chábioye tmojanobeconá y tmojanontšé nyetsca chentša bëts yebnënga cha jinÿinÿiyana. <sup>2</sup> Chora Jesús tojanéyana: “Tsëngaftanga lempé šmontsonÿá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canÿe ndëtšbé inÿe ndëtšbé juatsboye. Lempé mochantsepochóca ca.”

**Ntšamo yochtsemna quem luare  
jopochócama tempo chaojtsobeco  
ora  
(Mc 13.3-23; Lc 21.7-24; 17.22-24)**

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uatsjéndayënga tmojanobeconá nÿe chëngbiama jatjayama, mëntšá: —Šmëyana. ¿Mocna ora chë soyënga Bëngbe

Bëtsabe bëts yebnocá yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnama y quem luare jopochócama tempo yojtsobecuama ca?

<sup>4</sup> As Jesús tojanjuá: —Cuedado šmochtsebomna ndocná chacmondáingñema. <sup>5</sup> Banga mochanjabo y mochantsabíchamo chënga atše imomna ca. Mochántsihomo: “Atše chë Cristo sëndmëna ca” y chca, ba entšángbioye mochanjáingñaye. <sup>6</sup> Tsëngaftanga šmochanjouena canÿe luarentša entšanga inÿe luaroca entšángaftaca imojtsentsjanama y nderado mochjentsjámnaca. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochátsmëna. <sup>7</sup> Canÿe luarentša entšanga inÿe luaroca entšángaftaca mochántsientsjanaye, y canÿe amëndayábentša entšanga inÿe amëndayábioica entšángaftácnaca; y ba luarënguine shëntsana echanjóshjango y chentša fshantsënga echanjuangmëmema. <sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entšanga ínÿengbe cucuatšine cmochanjábashejuana chacmatsetsenama y cmochantsëbaye; y atšbe ústonënga bëtsemnayeca nyetsca luarënguentša entšanga cmochantsébuayënja. <sup>10</sup> Chë tempo, banga mora átsbeñe ošbuáchiyënga, ošbuáchiyana mochantsajbaná y mochantsenáboyënja y jóbanama ínÿengbe cucuatšine mochántsenboshjuana. <sup>11</sup> Banga Bëngbe Bëtsabe ndoñe ndegombre juabna oyebuambnayënga mochanjábocana y ba entšanga mochanjáingñaye. <sup>12</sup> Nyëtšá bacna juabnënga entšangbe

ainaniñe echanjésemna, y chë causa banga ndoñe quemochátenbobonshana.

<sup>13</sup> Pero nda nyets tempo átsbeñe ošbuachiyá totsomñe, atsbočaná echántsemna. <sup>14</sup> Y quem tsabe noticiénga Bëngbe Bëtsabe améndayama nyets quem luariñe entšángbioye mochántsbuayiyñaye, chca, chë ndegombre soyénga Bëngbe Bëtsabiana chénga chamotsetatšëmbuama. Chentšana cocayé quem luare jopochócama tempo echántsemna.

<sup>15</sup> “Chë Bëngbe Bëtsabe juabna oyebuambnayá Daniel chë puerte uabouana soye tojéftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinýe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; <sup>16</sup> entšanga Judeoca chamojtsemnënga, batsjabengoye chamotsacheta. <sup>17</sup> Y nda cachabe yebnentša tsbanánoca chaojtsemna, chaotsachá chocana ntjastjangcá ndayá tsoicana jéftsábocnama. <sup>18</sup> Y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. <sup>19</sup> iTša lastema chë tempo ngomámanënga chamojtsemnëngbiama o ochóchaye šešonga chamojtsabamnëngbiama! <sup>20</sup> Bëngbe Bëtsá šmochtseimpadana chë tšëngaftanga jachetama, uaftena tempo ora o canýe ochnayté ndoñe chaondétsemnama. <sup>21</sup> Chca, chora puerte ngménana echántsemna. Tša jabuache ngmenancá, quem luare jabojátšama orscana y méntscoñama y más chcoye, cachcá ngménana ndoñe ntjamnana. <sup>22</sup> Chë puerte ngménana tempo yapa bën ndoñe chaondétsemnama Bëngbe

Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanýeshanayeca, echanjama yapa bën tempo ndoñe chaondétsemnama.

<sup>23</sup> “Chora nderado nda cmochanjáuyana: ‘Minýënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>24</sup> Chora mochanjábocana ndoñe ndegombre uámana ubuáyanënga, chénga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chénga mochanjama bëts soyënga chëngbe obenana jinýanýiyama, entšanga jáingñama, y tmojobenase, chë Bëngbe Bëtsabe bocacánëngnaca. <sup>25</sup> Atše ya chama tcbonjabuayená chë tempo cabá ndóshjango ora. <sup>26</sup> Chíyeca, nderado chénga chacmojáuyana: ‘Minýënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canýe tsoaca entsemna ca’, chama ndoñe šmattsayaunana. <sup>27</sup> Er ntšamo chë tojatcuinýe ora, shinýe bocanoicana y shinýe uenatjëmbambanénstcoñe jabaushinýinýenancá y ba luarënguenache entšanga jobenayana jinýama, cachcá, Bëngbe Bëtsá Entšá tbojanbemá quem luaroye chaojésabo te, entšanga nyets luarentše mochanjobenaye cha jinýama. <sup>28</sup> Canýe obanabe cuerpo tojtsemnama chë gallinacënga tmojátatšëmbona y cachora chë béconana jojotana. Cachcá, chë castigo echántsemna nýa chama chë tempo chaojtsemna ora ca” —Jesús tojánayana.



**Bëngbe Bëtsá Entšá tbojanbemá  
quem luaroye echanjésabo**

(Mc 13.24-37; Lc 21.25-33; 17.26-30, 34-36)

<sup>29</sup>Mëntšánaca Jesús tojánayana:

“Chë puerte ngménana tempo chaojochngüentšana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmëmana. <sup>30</sup>Chora canÿe soye celoca echanjónÿna entšanga jinÿanÿiyama Bëngbe Bëtsá Entšá tbojanbemá ya iuaisaboma, y nÿets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantšetšehiñe echántsaboye, puerte obenánaca y corente buashinÿinÿaniñe. <sup>31</sup>Y canÿe trompetéjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntscoñe.

<sup>32</sup>“Ntsamo higo betíyeca endbétsopasanama šmochjuatsjinÿe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatšëmbuana.

<sup>33</sup>Cachcá, lempe chë ndayama tšëngaftanga tcbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnana. <sup>34</sup>Ndegombre cbéyana, lempe chca echanjochnëngo, morsca entšanga cabá ndóbana ora.

<sup>35</sup>Celoca y quem luare echanjopochóca, pero atšbe palabra ndocna te queochaisopochóca.

<sup>36</sup>“Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatšëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>37</sup>“Ntsamo Noé yojéftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. <sup>38</sup>Noebe tempo, chë uabouana uaftena cabá nduáshjango ora, entšanga imnasaye, imnofšëšnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguëntscuana. <sup>39</sup>Chënga tondaye imonjántatšëmbo, nÿe chë uabouana uaftena tojánashjango y nÿetscanga tojtsanëyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entšanga chama mochanjátatšëmbona. <sup>40</sup>Chora uta boyabásata jajoca bochántsemna; canÿa mochanjesbetše y chë ínÿana ndoñe. <sup>41</sup>Uta shembásata bochántsejanÿcoye; canÿa mochanjesbetše y chë ínÿana ndoñe.

<sup>42</sup>“Chíyeca cuedado šmochtsebmna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama. <sup>43</sup>Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatšëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama. <sup>44</sup>Chíyeca, tšëngaftángnaca šmochtseprontana, er Bëngbe Bëtsá Entšá tbojanbemá echanjésabo, entšanga chama tondaye chamontsejuabná ora ca” —Jesús tojánayana.

**Chë tšabe oservená y chë ndoñe  
tšabe oservená**  
(Lc 12.41-48)

<sup>45</sup> “¿Nda yomna chë oservená ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjéftsebošhona chë yebnentsšënga chaotsanýenama y jasama tojtsemna ora chaújuatšema. <sup>46</sup> Chë nduiño tojtashjango ora, chë oservenábioye tbojínýena ntšamo ibomncá jtsemá, chë oservená puerte oyejuayá echántsemna. <sup>47</sup> Ndegombre chéýana, chë nduiño chábioye bochanjaimpáda lempe chabe soyënga chabotsinýeñama. <sup>48</sup> Pero chë oservená bacna entsá tomnësna, jajuaboyana chë nduiño ndoñe betesco yochantabo ca, <sup>49</sup> y as, cha jóntšana chë inýe oservénënga jtsajantšetayana, becá jtsesana y jtsetmuana inýe tēmiëngaftaca. <sup>50</sup> Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. <sup>51</sup> Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinýinýnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftéšjojnaye ca” —Jesús tojánayana.

**Chë bnétsana  
tobiašëngbiama cuento**

**25** <sup>1</sup> Mēntšánaca Jesús tojánayana: “Chë te chaojóshjango ora, Bëngbe Bëtsabe améndayana echántsemna mo ntšamo canýe casamento fiestentše tojanopasacá. Mēntšá yojopása: Bnétsana tobiašënga chëngbe querosine uajuinýanëshangá imojéftsájaca y imojábocana

chë casamento boyabása jajébenguama. <sup>2</sup> Chë bnétsana tobiašënguentšana, shachnënga sempre enójuabnayënga imnamna, y chë inýe shachnëngna, ndenójuabnayënga. <sup>3</sup> Chë ndenójuabnayëngna chëngbe uajuinýanëshangá imojéftsájaca, pero querosine ndoñe imonjuabuyamba chë uajuinýanëshangañe cachiñe jtaftsuámama. <sup>4</sup> Pero chë sempre enójuabnayëngna chëngbe uajuinýanëshangá imojéftsájaca y querosinënaca botellëšënguiñe imojuabuyamba. <sup>5</sup> Chë casamento boyabásana ndoñe betesco yonjabo, chíyeca nyetsca tobiašënga ocnayana yojubua che y imojtsomaná. <sup>6</sup> Mo tséntseto orna, chënga imojouena mēntšá uayebuáchana: ‘iChë casamento boyabása ya endabó! iJajébenguama mobocana ca!’ <sup>7</sup> Asna, nyetsca tobiašënga imojotsbaná y imojóntša chë uajuinýanëshangá juabopróntana. <sup>8</sup> Chorna, chë shachna ndenójuabnaye tobiašënga chë inýe shachnënga siempre enójuabnayëngbióye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinýanëshangá tojontsé jtsafsanana ca.’ <sup>9</sup> Pero chë siempre enójuabnayëngna imojayana: ‘Ndoñe. Tcbojubuatšatase, tšëngaftangbiama y bëngbiámnaca querosine echántashbe. Más tšabá entsemna, chë querosine mondbétsenoye chašma y tšëngaftangbiama chašmauábua miñe ca.’ <sup>10</sup> “Chorna, chë shachna ndenójuabnaye tobiašënga imojá chë querosine jauabuámiyama; pero chëntscuana chë casamento boyabása yojáshjango y chë siempre enójuabnayënga cháftaca chë

casamento fiestoye imojámashjna, y chentša bëshása imojtatame.

<sup>11</sup> Chentšana chë inÿe tobiašënga imojáshjajna y mëntšá imojtsichamo: ‘iTaita, Taita, šmebëtafjo ca!’ <sup>12</sup> Pero chë casamentero boyabása yojójua: ‘Ndegombre cbéyana, tšëngaftanga ndoñe quecbatëbuatma ca.’

<sup>13</sup> “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

### Chë crocenánama cuento

(Lc 19.11-27)

<sup>14</sup> “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama. <sup>15</sup> Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe. <sup>16</sup> Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye. <sup>17</sup> Chë uta uaranga yojoyëngacñá cachcá yojama y inÿe uta uaranga yojábotiye. <sup>18</sup> Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

<sup>19</sup> “Chentšana baytese chë oservénëngbe amëndayana yojtashjango y yojóntša chë crocenánama chënga jatjayana. <sup>20</sup> Natsana yojáshjango chë shachna uaranga yojoyëngacñá y chabe mandayábioye inÿe shachna

uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’ <sup>21</sup> As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tbojamandacá tcojámayeca, atše cbochanjaimpáda más bëtscá chašcotsinÿënama. Mamáshëngo y átšeftaca cochjóyejuaye ca.’ <sup>22</sup> Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’ <sup>23</sup> As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tbojamandacá tcojámayeca, atše cbochanjaimpáda más bëtscá chašcotsinÿënama. Mamáshëngo y átšeftaca cochjóyejuaye ca.’

<sup>24</sup> “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canÿe tšátjaye entšá cmonama; acna chë ndoñe tconjajé chentše saná jocñana y chë ndoñe tconjujqüeshe luarentše jobuátbanana. <sup>25</sup> Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ <sup>26</sup> As chë mandayá ibojajuá: ‘iBacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse, <sup>27</sup> aca cmonajna atše crocénana bancoca jetsobuájua y atše matijtabo ora, atše crocénana matijtoyëngacñe y chë chentšana tojoboté crocénanëna ca.’ <sup>28</sup> Y as yojamënda: ‘Chë uaranga

motseboca y chë bnétsana uaranga entsebomnábioye chana motsatsetá ca. <sup>29</sup>Er nda tojtsebomnábioye, más jatsetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

<sup>30</sup>“Y chora cha vojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftéšjojnaye ca’ ”  
—Jesús tojanéyana.

**Ntšamo chë quem luare  
jopochócama ora, nyetsca  
entšangbiama mochjayana**

<sup>31</sup>Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinýinýaniñe y nyetsca chabe angelotémëngaftaca chaojésabo ora, chë reybiama puerte buashinýinýana tbemaniñe echanjót'bema. <sup>32</sup>Chora nyets luarëngoca entšanga chabe natsanoica mochanjénefjna, y cha, entšanguentsana inýenga echanjábacacaye, mo chë oveshënga abujénýa oveshënga chivéngbentšana endbetsabacacnaycá. <sup>33</sup>Chë abujénýana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entšangna chabe uañicuayoica echanjátsaye.

<sup>34</sup>“Chorna chë Rey, Bëngbe Utabná, chabe catšbioica chamojtsemna entšanga echanjúyana: ‘Tšëngaftanga, Atšbe Taitá tšábeñe cmétabna, mabënga ca; atšbe amëndaye luare mo tšëngaftangbiama otocana soycá mosháchinñënga; tšëngaftangbiama endëprontana, Bëngbe Bëtsá quem

luare tonjanma orscana. <sup>35</sup>Er atšë šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšé; inýe luarocana ashjanganocá sënjánana y posada šmonjanántšame. <sup>36</sup>Enašá sënjánana y entšayá šmonjanëtsetá jtichëtjuama; šocá sënjanjájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

<sup>37</sup>“As chë Bëngbe Bëtsá chabe bominýiñe tšábënga tojábiamënga mochanjatjaye: ‘Bëngbe Utabná, čntseco shëntseca tcbënjáninýe y tcbënjanajuatšé? čNtseco uajuendayá tcbënjáninýe y tcbënjanašé? <sup>38</sup>čO ntseco inýe luarocana ashjanganocá tcbënjáninýe y posada tcbënjanašame, o enašá y entšayá jtichëtjuama tcbënjanaštsetá? <sup>39</sup>čO ntseco šocá o cárceloca utamená tcbënjáninýe y jauatsëtsayama tifjána ca?’

<sup>40</sup>“As chë Utabná echanjóju: ‘Ndegombre cbéyana, lempe ntšamo chë atšbe catsátanguentsana chë más batšá uámanëngaftaca šmojamcá, cach átšëftaca šmonjanma ca.’

<sup>41</sup>“Chentšana chë Utabná chabe uañicuayoica chamojtsemna entšanga echanjúyana: ‘Atšbentšana mojuánanga atšbe Bëtsabe uaboténënga. Infernoye motsajna, chë ndocna te queochátsfsana inëshoye; choca endëprontana Satanás y chabe ustonëngbiama. <sup>42</sup>Er atšë shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanašé; <sup>43</sup>inýe luarocana ashjanganocá sënjánana y ndoñe posada chešmatanášame. Enašá sënjánana y ndoñe entšayá chešmatanaštsetá; šocá sënjanjájona y cárceloca sënjanëtámena y ndoñe chešmatanaštsé ca.’

44 “As chënga mochanjatjaye: ‘Bëngbe Utabná, òntseco tcbënjáninÿe shéntseca o uajuendayá, o inÿe luarocana ashjangonacá, o enašá, o šocá o cárceca utamená y ndoñe tcbënjanajabuache ca?’

45 “Y chë Utabná echanjóua: ‘Ndegombre cbéyana, tsëngaftanga ntšamo chë atšbe catsátanguentsana chë más batsá uámanëngaftaca, ndoñe šmonjanmcá, átšëftaca cach ndoñe chešmátanma ca.’

46 “Chëngna infiernoye nyetsca tescama mochantsésetjango, y chë Bëngbe Bëtsá chabe bominÿiñe tsábenga tojábiamëngna chë nyetsca tescama yomna tsábe vida mochántsebomna ca” —Jesús tojánayana.

**Entšanga tmojanjuabó ntšamo jamëse Jesús jishachama**

(Mc 14.1-2; Lc 22.1-2; Jn 11.45-53)

**26** <sup>1</sup>Lempe chca tojánayanentšana, Jesús chabe uatsjëndayënga tojanéyana: <sup>2</sup>“Tsëngaftanga šmondétatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá ínÿengbe cucuatšinë mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

<sup>3</sup>Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentše. <sup>4</sup>Tmojanenojuabó y tmojanenoyeuná jtšëingñase Jesús jishachama, y jtsóbama. <sup>5</sup>Pero imojtsichamo: “Quem fiestëntscuana ndoñe, entšanga yapa muanjóntša enbouenanana ca.”

**Canÿe shembása botamana uanguëtše bėjaye Jesusbe bestšašinë tbojanbuešcja**  
(Mc 14.3-9; Jn 12.1-8)

<sup>6</sup>Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. <sup>7</sup>Chëntscuana canÿe shembása Jesúsbiye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtše bėjayeca. Jesús mesëshentše yojtsemnëntscuana, chë shembása chabe bestšašinë chë botamana uanguëtše bėjaye tbojanbuešcja.

<sup>8</sup>Chë uatsjëndayënga chca tmojáninÿe orna, tmojanotjayaná y tmojanontšé ichámuana: —¿Ndáyeca nÿe bonamente chë soye chca yojtsemna ca? <sup>9</sup>Chamna, matmënjobenanga chë bėjaye becá crocenánama juiyana y chánaca ndbomnjëmënga matmënjújabuache ca.

<sup>10</sup>Jesús chë soye tojanuena; as tojanéyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tsábá entsemna.

<sup>11</sup>Er chë ndbomnjëmëngna nyets tempo tsëngaftangbeñe mochanjëftsemna, pero atšë tsëngaftangaftaca ndoñe nyets tempo quichásemna. <sup>12</sup>Ntšamo chë shembása tojamcá, chë botamana uanguëtše bėjaye atšbe cuerpiñe jabuëšcjëse, cha šontseprónta atšë juatbontsa tescama. <sup>13</sup>Ndegombre cbéyana, quem luariñe ndayéntsna Bëngbe Bëtsabe soyëngama chamojtsabuayiyná chentše, ntšamo quem shembása tojamámna becá mochanjëftsóyebuambaye, chca, entšanga chabiamá

chamotsenójuabnama ca —Jesús tojanéyana.

**Judas tojána bachnangbe améndayëngbiye, Jesús chamuëshachama**

(Mc 14.10-11; Lc 22.3-6)

<sup>14</sup> Canya chë bnétsana uta uatsjéndayënguentsá, Judas Iscariote ca uabainá, tojána bachnangbe améndayëngaftaca jencuéntama. <sup>15</sup> Y tojanatjá: “¿Ntsachetśá śmatjtabuénaye y Jesús tšëngaftangbe cucuatśiñe bochjayentśbashejuana ca?”

As chëngna, unga bnétsana ralbenga tmojtanabuéná. <sup>16</sup> Y cach orscana Judas yojtsenguaye ntšámose y ntseco ora, Jesús chëngbe cucuatśiñe jayentśbáshejuana.

**Jesús chabe uatsjéndayëngaftaca Bashco saná tojanse**

(Mc 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Chë Bashco fiesta bojatsënté, chë lewadúraca ndëpormana tandëše jasama fiestëntscuana, chë uatsjéndayënga Jesúsbiye tmojanobeoná y tmojantjá: —¿Ndémoca aca cojtseboše bënga fchauptontama Bashco saná chacosama ca?

<sup>18</sup> Y Jesús tojanéyana: —Chë bëts pueblöye motsajna canye bacobe yebnoye y cha śmochjauyana: “Buatëmbayá tonjayana: ‘Atśbe ora ya echanjobuache, y atśe acbe yebnoye sëntśá, Bashco fiesta jamama atśbe uatsjéndayëngaftaca ca.’ ”

<sup>19</sup> As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

<sup>20</sup> Y tojanibétata orna, Jesús chë bnétsana uta uatsjéndayëngaftaca mesëshentše yojtsemna. <sup>21</sup> Y

imojtsesantscuana, Jesús tojanéyana: —Ndegombre cbéyana, canya tšëngaftanguentsá uayayëngbe cucuatśiñe šochanjáboshjona ca.

<sup>22</sup> Chora chë uatsjéndayënga puerte ngménaca imojtsemna y tmojanontśe canyánya Jesús jatjayama: —Bëngbe Utabná, nderado atśe cha chtsemna ca?

<sup>23</sup> As Jesús tojanéjua: —Canya nda chabe tandëše entsefchecuacná cach atśe sëntsefchecuacná ścnenentśe, cha uayayëngbe cucuatśiñe šochanjáboshjona. <sup>24</sup> Ndegombre, Bëngbe Bëtsá Entśá tbojanbemáftaca echanjopása ntšamo Bëngbe Bëtsabe uabemana palabrënguine chabiana iuayancá; pero, itśa lastema chë bochjáboshjonabiana! Más tśabá chabiana manjamna ndoñe ntjónynana ca.

<sup>25</sup> As Judas, chë boshjuaná, Jesúsbiye tbojantjá: —Buatëmbayá, nderado atśe chtsemna ca?

Y Jesús tbojanjuá: —Ndegombre tcjayana ca.

<sup>26</sup> Imojtsesantscuana, Jesús tandëše tojanca, Bëngbe Bëtsáböiye chama tbojtanchuá, tojanjatá y chë uatsjéndayënga tojanatśatá. Y mëntśá tojánayana: “Mocñënga, mosënga. Atśbe cuerpo entsemna ca.”

<sup>27</sup> Chentśana, canye coptema vínoyeca tojanaca, Bëngbe Bëtsáböiye tbojtanchuá y chë uatsjéndayënga tojanëśśaśë. Y mëntśá tojánayana: “Nyetscanga quem coptémentśana mofšënga. <sup>28</sup> Quem vínoye atśbe buiñe entsemna. Atśbe buiñe echanjuábuashana entśanga chamotsetatśëmbuama ntšamo Bëngbe Bëtsá entśanga tojanašëbuachenacá añe yochjochnënguama. Chë buiñe bëtscă entśangbiana echanjuábuashana, chëngbe

bacna soyèngama perdonánènga chamotsemnana. <sup>29</sup>Y ndegombre cbéyana, morscana atše ya ndoñe más chë uvasentshana obocniye quichaisofsiye. Chë tsëm vínoye tšèngaftangaftaca chanjofsiye, atšbe Taitabe améndayoca chamojtsemna ora ca” —Jesús tojánayana.

**Jesús tojánayana, chábioye  
ndoñe bonjanabuátma ca Pedro  
yochjánayanama**  
(Mc 14.26-31; Lc 22.31-  
34; Jn 13.36-38)

<sup>30</sup>Bèngbe Bètsá jètschuayama tmojancantá chentshana, Olivos tjashoye tmojéftsanbocana. <sup>31</sup>Choca Jesús tojanéyana: —Tšèngaftanga nyetscanga quem ibeta átšbeñe ošbuáchiyana šmochantsobuetše y šmochántsacheta, er Bèngbe Bètsabe uabemana palabrenguine, cha mèntšá tojánayana: “Chë oveshèngbe abujénya chanjóba y chë oveshènga mochantsáshana ca.” Chca tšèngaftangaftaca echanjopása, uayayènga chašmojišhache ora. <sup>32</sup>Pero obanènguentšana chaitayenentshana, tšèngaftangbe natsana Galileoye chanjá ca —cha tojanéyana.

<sup>33</sup>Chora Pedro tbojanjuá: —Masque nyetscanga ábeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

<sup>34</sup>As Jesús tbojanayana: —Ndegombre cbéyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

<sup>35</sup>Pero Pedro tbojanayana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetsca uatsjéndayèngnaca cachcá imojtsichamo.

**Getsemaní luarentše Jesús Bèngbe  
Bètsáftaca tbojanencuentá**  
(Mc 14.32-42; Lc 22.39-46)

<sup>36</sup>Chentshana, Jesús chabe uatsjéndayèngaftaca canye luare Getsemaní ca uabáinoye tojána. Choca tojanéyana: “Muentše motbiamá, chèntscuana atše choye chanjá Bèngbe Bètsáftaca jencuéntama ca.”

<sup>37</sup>Y Pedro y chë Zebedeobe uta uaquiñata tojéftsanèbiatše. Choca yojóntša puerte ngménaca y corente cochtsetšenaná jtsemnana. <sup>38</sup>Jesús tojanéyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

<sup>39</sup>Chora Jesús más natsanoye tojána, tojanoshamentšé y fshantsóntscoca yojotsejbéna, y mèntšá Bèngbe Bètsáftaca tbojanencuentá: “Atšbe Taitá, jopódianése moma atše japadésama ndoñe chašondétsemnana. Pero ntšamo atše stsebošcá ndoñe chaondétsemna, sinó ntšamo aca cojtsebošcá ca.”

<sup>40</sup>Chentshana, Jesús chabe unga uatsjéndayèngbioye tojtanabo y chèngna imnétsomañe. Chca tojánanyèna ora, Pédrèbioye tbojanayana: “¿Ni mo canye horatema tšèngaftanga šmonjobená átšeftaca jtsefšnana ca? <sup>41</sup>Šmochtsefšna y Bèngbe Bètsáftaca šmochtsencuéntaye, chca, bacna soye jamama ndoñe chacmondóochènguama. Tšèngaftanga ndegombre šmontseboše espíritoca Bèngbe Bètsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

<sup>42</sup>Uta soyama tojtésaná y mèntšá Bèngbe Bètsáftaca tbojanencuentá: “Atšbe Taitá, atše japadésama ndoñe

chašondétsemnama jamama ndoñe jopódianësna, ñye ntšamo aca cojtsebošcá chaotsemna ca.”

<sup>43</sup> Y tojtanabo ora, chë uatsjéndayënga cachiñe imnétsomañe; yapa ocñaye causa ñye imojtsefshétana.

<sup>44</sup> As Jesús cachcá yojéftsénñaye, y ungama cachiñe tojtesaná Bëngbe Bëtsáftaca jencuéntama, y cach palabrënga tojánayana.

<sup>45</sup> Chora chë uatsjéndayëngbiöye tojtanabo y tojanéyana: “¿Cabá šmotsomañe y šmotsocñañe ca? Ya ora tocjobuache, Bëngbe Bëtsá Entšá tbojanemá bacna soye amëngbe cucuatšične mochanjáboshjona.

<sup>46</sup> Motsbananga, cuajna. Minjyënga, chë boshjuaná ya entsebeconá ca.”

**Uayayënga Jesús tmojánishache**  
(Mc 14.43-50; Lc 22.47-53; Jn 18.2-11)

<sup>47</sup> Jesús cabá yojtsóyebuambnantscuana, Judas, canye chë bnétsana uta uatsjéndayënguentsá, tojánashjango, y cháftaca imojtsemna ba entšanga espadéjangaca y ngarotbéngaca prontánënga. Chënga imojamna chë bachnangbe amëndayënga y chë judiéngbeñe bëtsëjemëngcá amëndayëngbe ichmónënga. <sup>48</sup> Judas, chë boshjuaná, tojanjuabó ntšamo jamana entšanga jinñanyiyama ndëmua Jesús bétsemnana. Chíyeca yojáuyana: “Nda chajjauámocho, cha echántsemna. Šmochjishache ca.” <sup>49</sup> Cachora Judas Jesúsbiöye tojanobeconá y tbojanчуá: —Buajtana, Buatëmbayá ca.

Y tbojtanámocho.

<sup>50</sup> Jesús tbojanayana: —Enutá, moma chë ndayá jabomama tcojabo ca.

Chorna, chë entšanga tmojanobeconá, Jesús tmojánishache y tmojanánatse.

<sup>51</sup> Chca orna, canye enutá Jesúseftaca yojtsemná, chabe espadéja tojanenoséngbotëntšena, y chë bachnangbe más uámana amëndayabe oservenábioye canye matscuáše tbojtsanéstjango.

<sup>52</sup> As Jesús tbojanayana: “Espadéja matosëngbuajonýá. Nda espadéjaca tbojóba chana, cach espadéjaca echanjóbana. <sup>53</sup> ¿Aca ndoñe condétatšëmbo, atše atšbe Taitábioye stjaimpádase, cha cachora atšbiama nanjichamuá bnétsana utama más ejércitënga angelotémëngaca?

<sup>54</sup> Pero chcasna, ¿ndayá Bëngbe Bëtsabe uabemana palabrënguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

<sup>55</sup> Cachora Jesús entšanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canye bacá uamana entšá cuaftsemncá ca? Atše cada te Bëngbe Bëtsabe bëts yebno ca tšëngaftangaftaca sënjántbemana abuátambaye, y choca ndoñe chešmánishache. <sup>56</sup> Pero lempe quem soyënga chca entsopasana, cachcá chaotsemnama ntšamo Bëngbe Bëtsabe uabemana palabrënguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora ñyetsca uatsjéndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonýá.

**Jesús tmojanánatse chë judiéngbe más uámana amëndayëngbiöye**  
(Mc 14.53-65; Lc 22.54-55, 63-71; Jn 18.12-14, 19-24)

<sup>57</sup> Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye.



Chentše chë ley abuátambayënga  
y chë judiëngbeñe bëtsëjemëngcá  
amëndayënga tmojánenefjna. <sup>58</sup> Pedro  
bënocana Jesús tbojanasto, chë  
bachnangbe más uámana amëndayabe  
chashjónscoñe; choye tojánamashëngo  
y chë Bëngbe Bëtsabe bëts yebnoca  
josticiëngaftaca yojótbema,  
chca, jtsetatšëmbuama ntšamo  
yochjopásama.

<sup>59</sup> Chë bachnangbe amëndayënga,  
chë bëtsëjemëngcá amëndayënga  
y ín'yënga judiëngbe amëndayënga  
imojtsenguaye ndánaca masque  
uayátsenaye soye Jesusbe contra  
cháuyanama, as chënga jobenayama  
cha chaóbana ca jayanama, <sup>60</sup> pero  
ndoñe tmonjánin'yëna, masque  
banga tmojánashjajna Jesusbe contra  
uayátsenaye soyënga jayanama.  
Cabana, útata tbojánashjango, <sup>61</sup> y  
chata tbojánayana: “Quem boyabása  
tonjayana canobena Bëngbe Bëtsabe  
bëts yebna jtsenásatajchcana y n'ye  
unga tese jtëtsjebuana ca.”

<sup>62</sup> As chë bachnangbe más uámana  
amëndayá tojantjá y Jesúsbioye  
tbojantjá: —¿Ndocá cochanjayana?  
¿Ndayase yojtsemna chë acbe contra  
montsichamo soye ca?

<sup>63</sup> Pero Jesús n'ye iytëca yojtsemna.  
Chíyeca chë bachnangbe más uámana  
amëndayá tbojanayana: —Bëngbe Bëtsá  
Ainabe mándoca cbomandá chašcuyana  
aca ndegombre chë Cristo, chë Bëngbe  
Bëtsabe Uaquiñá comna o ndoñe ca.

<sup>64</sup> Chora Jesús tbojanjuá: —Aca  
ndegombre yomncá tcjayana. Y quem  
sóynaca cbéyana: Tšëngaftanga  
šmochanjin'ye, atše, Bëngbe Bëtsá  
Entsá tbojanbemá, chë n'yets obenana  
bomnabe catšbioica jtsëtbemanana y  
celoca jantšetëshiñe jtsaboyana ca.

<sup>65</sup> Chora chë bachnangbe  
más uámana amëndayá chabe

uichëtjonëjuangá yojtsenántšajatanëca,  
puerte ibojtsetna causa, y tojánayana:  
—iNtšamo quem boyabása  
tonjoyebuambacá, Bëngbe Bëtsabiana  
entsemna mo cha cuafjyenguangcá,  
chë chabe Uaquiñá yomna ca cha  
tonjayana ora! ¿Ndayama más  
entšanga šochjätëjaboto Jesusbe  
contra chamuayanama? <sup>66</sup> ¿Ntšamo  
šmatjayana ca? —cha tojanatjá.

As chë entšanga tmojanjuá:  
—Ndegombre cha bëts bacna soye  
entsebomna; jóbanama bontsemna ca.

<sup>67</sup> Chora tmojanontšë Jesús  
juebëbuashëtjnayana, jabuache  
jantšetayana y ín'yënga  
imojtsejuëbjantšetaye,  
<sup>68</sup> y imojtsatsëtsnaye: “Cristo, aca  
ndegombre Bëngbe Bëtsabe juabna  
oyebuambnayá tcomnëse, imomalisiá  
nda tcmënjajantšëta ca!”

**Pedro tojánayana Jesúsbioye ndoñe  
bonjanabuátma ca**

(Mc 14.66-72; Lc 22.55-  
62; Jn 18.16-18, 25-27)

<sup>69</sup> Chëntsucana Pédrëna shjoca  
yojtsemna, chashjoca yojtsetbëmana.  
Chora, can'ye shëmbása chentša oservená  
tbojanobobeconá y tbojanayana: —Acnaca,  
Jesús chë Galileocáftaca conjánana ca.

<sup>70</sup> Pero Pédrëna, n'yetscangbe  
delante tojánayana chábioye ndoñe  
bonjanabuátma ca, mëntsá jayanëse:  
—Ntšamo contsichamcá, ndoñe  
quešnátësertana ca.

<sup>71</sup> Chora Pedro bëšoye yojábocna.  
Chentšna, in'ye shëmbása oservená  
chábioye tbojánin'ye y chë in'ye  
entšanga tojanéyana: —Cha, Jesús chë  
Nazaretocáftaca enjánana ca.

<sup>72</sup> Pedro cachiñe tojánayana  
ndoñe bonjanabuátma ca, y mëntsá  
yojtsejúraye: —iChë boyabása ndoñe  
quetsatabuatma ca!

<sup>73</sup> Chentšana, chë chentše imojtsemnënga Pédrëbioye tmojanobeconá y tmojanianyana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyatëmbana ca.

<sup>74</sup> Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúrayer y yojtsichamo: —iChë boyabása ndoñe quetsatabuatma ca!

Y cachora canye ngallo yojacánta. <sup>75</sup> Y Pedro yojenójuabo ye ntšamo Jesús tbojanianyana. Cha mëntšá tbojanianyana: “Cabá ngallo ndëcánta ora, aca unga soye cochanjayana ndoñe sconduabuatma ca.” Y chentšana tojésanbocna y corente ngménaca yojtsenóbošachna.

#### Jesús, Pilátbioye tmojanánatse

(Mc 15.1; Lc 23.1; Jn 18.28-32)

**27** <sup>1</sup> Tojanbinýna ora, nyetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. <sup>2</sup> As, Jesús tmojanëcuébatšëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

#### Ntšamo Judas tojanóbana

<sup>3</sup> Judas, chë boshjuaná, Jesús jóbanama ibojtsemnama tojanuena ora, puerte yojtsenócochinýena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba, <sup>4</sup> y mëntšá tojanényana: —Puerte bacna soye tijama. Atše canye bacna soye ndbomná tšëngaftangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiama? Cach aca cochátotatšëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojesëtsana, y yojá y yojétsentsešaye.

<sup>6</sup> Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcnyayëtëmiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canye luare jtsebomnama ndayentše chë inye luarëngocana entšanga áshjajnënga jutabuantsama.

<sup>8</sup> Chíyeca, chë fshantse mëntšcoñama Buiñe Luare ca iuabaina. <sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntšá tojánayana: “Y chë unga bnëtsana ralbenga tmonjanca, ntsachetšá chë Israeloca entšanga cha tmojanamananacá, <sup>10</sup> y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

#### Jesús Pilatbe delante

(Mc 15.2-5; Lc 23.2-5; Jn 18.33-38)

<sup>11</sup> Chentšana Jesús, chë mandado Pilátbioye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>12</sup> Chë bachnangbe amëndayënga y chë bëtsëjemënga Jesús mal imojtsequédantscuana, cha ndocá

ntjojuana. <sup>13</sup> Chíyeca Pilato tbojantjá: —¿Ndoñe contsuenana lempe ntšamo acebe contra montsichamcá ca?

<sup>14</sup> Pero Jesús ni canýe palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

### Jesús chaóbana ca tmojánayana

(Mc 15.6-20; Lc 23.13-25; Jn 18.38-19.16)

<sup>15</sup> Bashco fiesta ora, chë mandado yojanamana canýe utamená jëtsboshjonana, nda entšanga tmojuabuayaná. <sup>16</sup> Chë tempo canýe uachuana utamená inamna, Jesús Barrabás ca uabainá. <sup>17</sup> Nýetsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšíñe tmojánboshjonama.

<sup>19</sup> Pilato chë tribunal ca uabáinentše yojtsetbemanëntscuana, chabe shema canýa tbojanichmó mëntšá cha jauyanama: “Chë nýetsca soyënguñe tšabá ama entšábioye ndocá matsborlánana; chabe causa ibeta otjénayoca puerta sënjasufrí ca.”

<sup>20</sup> Pero chë bachnangbe amëndayënga y chë bëtsëjëmënga entšanga tmojanayëñjaná, Barrabás jëtsboshjonama y Jesús chaóbana ca chamuayanama. <sup>21</sup> Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —iBarrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nýetscanga tmojanjúá:

—iMotsecrucificá ca!

<sup>23</sup> Chora Pilato tojtëtanatjá:

—¿Ndayeca? ¿Ntšamo cha tojobuachjanguá ca?

Pero chënga cachiñe

tmojanáyebuachena: —iMotsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninýe ora, cha tojanmandá býeshe juabuífýëboñana y nýetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

<sup>25</sup> Chora nýetsca entšanga tmojanjúá: —iQuemuá yochjóbanama, bënga y bëngbe básengbiana castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšíñe tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nýetsca soldadënga chabe shëconana tmojanójoto.

<sup>28</sup> Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo.

<sup>29</sup> Canýe coronëshá tmojanapormá uchmašëfjangaca y tmojanabestšajó, y catsbioica cucuatšíñe canýe niñëfja. Chorna, chabe shecuatšëntše imojtsofshëntsaméntšenaye y imojtsáboyejuaana. Mëntšá imojtsichamo: “iBayté judiëngbe Rey cochtsemna ca!”

<sup>30</sup> Chëngnaca imojtsanbuashëtjnaye y cach niñëfjaca bestšašëntše

imojtsétsjanjnaye. <sup>31</sup> Y chca imnaftsáboyejuantéšana, chë shbuenda uafjatsenga entšayá tmojtanichétjo, y chora, jacrucificama tmojanánatse.

### Jesús tmojancrucificá

(Mc 15.21-32; Lc 23.26-43; Jn 19.17-27)

<sup>32</sup> Chë entšanga chentšana tmojánbocana ora, tmojánenbetše canýe bacóftaca, Simón ca uabainá, Cirene pueblóca. As, cha tmojanmandá Jesusbe cruz chauetsocutsama.

<sup>33</sup> Canýe luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”), <sup>34</sup> Jesúsbioye vínoye hiéloyeca enájuañbiye tmojanabuiyé chaofšema; pero yojaftántia y ndoñe yonjábošena chiye jofšiyama.

<sup>35</sup> Ya tmojancrucificá orna, chë soldadënga Jesusbe entšayamna, tsbanánoye tmojanétsëna, chca, jtsetatšëmbuama ndabiamá yochjanáquedama. <sup>36</sup> Y chora chënga chentše tmojanotbiamá Jesús jtsebojanýama. <sup>37</sup> Y chabe bestšaše juatsboicna canýe uabemana soye tmojananjo. Chiñe yojetsayana ndáyeca cha tmojancrucificama, mëntšá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayatnaca chënga chentše tmojanacrucificá, canýa Jesusbe catšbioica y chë ínýana chabe uañicuayoica.

<sup>39</sup> Y chëjana imojtsachñëjuana entšangna, Jesús imojtsóyenguaye, imojtsobestšfshananaye <sup>40</sup> y imojtsatsaye: “iAca chë icobena Bëngbe Bëtsabe bëts yebna jtsenásatajhcana y nýe unga tese jëtsjebuana, cach aca mentsbocá! iNdegombre Bëngbe Bëtsabe Uaquiñá tcomñese, chë cruzocana matastjango ca!”

<sup>41</sup> Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: <sup>42</sup> “Cha ínýenga tojëftsatsebacá, pero cachá jéntsbecama ndoñe quenátobena. Cha Israeloca entšangbe Rey tojtsemñese, chë cruzocana chauatastjango, y chca, bënga chábeñe fchtsošbuáchiye. <sup>43</sup> Cha tojayana Bëngbe Bëtsábeñe puerte yojtsošbuaché ca. iMora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

<sup>44</sup> Y chë bacna soye ochjajnayata, Jesúsëftaca ibojtsecrucificanánaca cachcá ibojtsóyenguaye.

### Jesús tojanóbana

(Mc 15.33-41; Lc 23.44-49; Jn 19.28-30)

<sup>45</sup> Nýetsto orscana las treséntscoñe, nýets quem luare yojtseibëtata.

<sup>46</sup> Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

<sup>47</sup> Chca tmojanuena ora, báseftanga chentše imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

<sup>48</sup> As chora, chentša canýa tojëftsanótjajo canýe esponjëshe janguanguama, untja vínoyeca chëshe tojanfchecuacuá, canýe niñëfjiñe tojananguësetjo y Jesúsbioye tojanbeconá chaofšema. <sup>49</sup> Pero ínýengna tojánayana: “Cachcá mochjonýaye, er Elías tayochjabo jabátsbocama ca.”

<sup>50</sup> Pero Jesús cachiñe jabuache tojanoyó y tojanóbana. <sup>51</sup> Y cachora,

Bëngbe Bëngbe Bëtsabe bëts yebnoca yojújonýana entšéjua tséntsaca yojtsenájataye, tsbanánocana fshantsoye. Chëjua bënëjua inauamna y chë tsatséntsaca inajúnýana. Fshantse yojuangmémana, ndëtsbenga yojtsashtëtšana, <sup>52</sup> y chë cuevēshënga obanëngaca yojtsëtëfjo y banga Bëngbe Bëtsabe entšanga tmojtanayena. <sup>53</sup> Y chënga, Jesús tojtanayenentšana, chë cuevēshënguentsana tmojánbocana, y Jerusalén, chë uamana bëts pueblo ca uabáinoe tmojánamashjna y ba entšángbioye tmojánëbëbuacana.

<sup>54</sup> Chë soldadënge amëndayá y chë ínýenga, Jesús jtsebojanýama cháftaca tmojanoquedanga, chë fshantse yojuangmémanama tmojáninýe ora, y nyetsca chë yojtsëchnëjuana soyëngama, puerte auatjanánënga imojtsemna y tmojánayana: “iNdegombre quem boyabása Bëngbe Bëtsabe Uaquiñá yomna ca!”

<sup>55</sup> Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana. <sup>56</sup> Chë shembásengbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

**Jesús tmojanatbontsá**  
(Mc 15.42-47; Lc 23.50-56; Jn 19.38-42)

<sup>57</sup> Ya yojtseibétatana ora, canýe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. <sup>58</sup> José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchemá. <sup>59</sup> José chë cuerpo tojanca y canýe nduatsenga lino entšéjuaca tbojanandmaná. <sup>60</sup> Y canýe chabe tsëm cuevēshiñe

tbojanajó. Tempo cha inamánda chë cuevēshna ndëtšbenguíñe chamopormama. Canýe bëts ndëtšbé tojansjoná y chë cuevēshoye amashjuanentše tojánachto; y chentšana José yojtsatoñe. <sup>61</sup> Pero María Magdalena y chë inýe Mariyna chentše tbojtsanoquedañe y chë cuevēshe ndirichiñe tbojanótbema.

**Soldadënga tmojána Jesús yojtsatbontsánentše jtsebojanýama**

<sup>62</sup> Yëfsana, chë ochnayté, chë bachnangbe amëndayënga y chë fariseunga cánýiñe tmojána Pilato jinýama. <sup>63</sup> Tmojaniana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. <sup>64</sup> Chíyeca, momandá chë cuevēshe soldadënga chamotsashanyá unga tentscuana. Chca, chabe uatsjëndayënga ndoñe ibeta chamondabo chabe cuerpo jabëtsatbëbama, y chentšana chënga entšanga chamúyana, Jesús tojtayena ca. Y chca, chabiamá quem ústonoye bostero soye, chë cachabiamá tojánayana soyëngama puerte más bacá nántsemna ca —chënga tmojaniana.

<sup>65</sup> As Pilato tojanéyana: —Tšëngaftanga cach tšëngaftangbiamá soldadënga šmondábamna. Motsajna y chë cuevēshe cuedádoca šmochtsashanyá, ntšamo šmondëtatšëmbcá ca.

<sup>66</sup> Chora chënga tmojána chë cuevēshe jtsashanyama; chë ndëtšbena, tsengájašeca imojuinýnaná, ntsoatšëmbcá ndocná choye chaondámashënguama, y soldadënga chentše tmojëftsanabashejuana.

**Jesús tojtanayena**  
(Mc 16.1-8; Lc 24.1-12; Jn 20.1-10)

**28** <sup>1</sup> Ochnayté chentšana, chë inýe semana bojatsënté yojtsebínýana

ora, María Magdalena y chë inÿe  
 María tbojána cuevëshoye jarrepárama.  
<sup>2</sup>Ndeolpe fshantse tojanangmémána, er  
 Bëngbe Bëtsabe canÿe ángel celocana  
 tojántsmá, chë cuevëshoye tojanobeconá,  
 chë atamiana ndëtšbé tojtsanjuaná y  
 chiñe tojanótbema. <sup>3</sup>Chë ángelna mo  
 canÿe tcuinÿējćá yojtsebuashinÿinÿana, y  
 chabe uichëtjonējuangá uafjantsējuangá  
 mo jantšetēšćá yojtsamna. <sup>4</sup>Chë  
 soldadēnga chca tmojáninÿe ora, de  
 auatja yojtsangmēmñaye y mo obanēngćá  
 imojtsemna.

<sup>5</sup>Chora chë ángel chë shembásatbioye  
 tojanéyana: “Ndoñe batauatjana. Atše  
 sēntsetatšēmbó tšēngaftanga Jesús, chë  
 tmonjanrucificá cha šmojtsenguama.  
<sup>6</sup>Cha muentše ndoñe quenátsmēna;  
 cha tontayena, ntšamo cachá  
 tonjanayancá. Mabata y šochjinÿe cha  
 endétsesegorantšē. <sup>7</sup>Betsco motsata y  
 chë uatsjéndayēnga šochjáuyana: ‘Jesús  
 tontayena y tšēngaftangbe natsana  
 Galileoye echanjá; choca šmochanjinÿe  
 ca.’” Y chora cha tojánayana: “Chca  
 šondmēna tšēngaftanga jauyanana ca.”

<sup>8</sup>Cachora chë shembásata chë  
 cuevëshentšana tbojēsanbocna,  
 auatjanánata pero puerta oyejuayata,  
 y tbojēftsanotjajo chë soye chë  
 uatsjéndayēngbeñe jobuambayama. <sup>9</sup>Y  
 ndeolpe Jesús chata tojábēbēbuacna  
 y tojanacheuá. Chatna, chábioye  
 tbojanobēconata, tbojtanadorata y chabe  
 shecuatše shēconana imojtobojćuá. <sup>10</sup>Y  
 Jesús tojanéyana: “Ndoñe batauatjana.  
 Motsata atšbe uatsjéndayēnga, atšbe  
 catšátanga jáuyanama Galileoye  
 chamotsá y choca atše šmochjinÿe ca.”

**Ntšamo chë soldadēnga  
 tmojánayana ndayá  
 tojanochñēnguama**

<sup>11</sup>Chë shembásata ibojtsayēntscuana,  
 básefta soldadēnga chë bēts puebioye

tmojána y ntšamo tojanopasacá lempe  
 chë bachnangbe améndayēngbeñe  
 tmojanobuambá. <sup>12</sup>As chë bachnangbe  
 améndayēnga, chë judiēngbeñe  
 bētsējemēngćá mandayēngaftaca  
 tmojánenefjna jenóyeunayama.  
 Chēngna chë soldadēngbioye  
 bētsćá crocénana tmojtanatšatá,  
<sup>13</sup>y mēntšá tmojanabuayená:  
 “Tšēngaftanga šmochjayana, ibeta  
 šmotsomáñēntscuana, Jesusbē  
 uatsjéndayēnga tmojabo y chabe  
 cuerpo tmojabētsatbēba ca.  
<sup>14</sup>Y chë mandado chë soyama  
 chaojátatšēmbonēse, bēnga  
 lempe cháftaca fchjenóyeunaye,  
 chca, tšēngaftangaftaca ndocá  
 chaondopasama ca” —chēnga  
 tmojanéyana.

<sup>15</sup>As chë soldadēnga chë crocénana  
 tmojanóyēngacñe y tmojanma ntšamo  
 chë mándayēnga tmojanabuayenacá.  
 Ba entšanga chë cuento tmojanuena  
 y mēntsoñama judiēnga cachćá  
 mondbētsichamo.

**Jesús chë uatsjéndayēnga  
 tojanichamó, Bēngbe Bētsabe  
 soyēngama nÿetsquénache  
 jábuayenama**

(Mc 16.14-18; Lc 24.36-49; Jn 20.19-23)

<sup>16</sup>Chentšana, chë bnētsana canÿe  
 uatsjéndayēnga Galileoye tmojána,  
 chë ndēmua tjoye Jesús chēnga  
 tojanabuayená choye. <sup>17</sup>Y Jesús  
 tmojáninÿe ora, tmojtanadorá. Pero  
 báseftangna imojtēsejuabñaye  
 nderado cha ndoñe Jesús yontsemna  
 ca. <sup>18</sup>Jesús chēngbioye tojanobeconá  
 y tojanéyana: “Bēngbe Bētsá nÿets  
 mando atše šonjatšētá celoca  
 y quem luarentše. <sup>19</sup>Chcasna,  
 motsajna, nÿets luarēnguenache  
 oyenēnga atšbe uatsjéndayēnga  
 šmochjábiamá. Entšanga šmochjubaye

atšbe Taitá, atše chabe Uaquiñá  
 y chë Uámana Espiritbe uabaina  
 jayanëse, átšbeñe šmošbuachéyeca,  
<sup>20</sup>y šmochjabuatambá lempe  
 ntšamo atše tbojamëndacá chënga

chamóyeunama. Y ndegombre atše  
 nyets tempo tšëngaftangaftaca  
 chanjéftsemna, quem luare  
 jopochócantscuana ca” —Jesús  
 tojanéyana.

# San Marcos

## Juan chë Ubayaná entsànga yojanabuayiyná

(Mt. 3.1-12; Lc 3.1-9, 15-17; Jn 1.19-28)

**1** <sup>1</sup>Mëntšá tojanoboajtšé chë tšabe  
noticiënga Bëngbe Bëtsabe  
Uaquiñá Jesucristbiana.

<sup>2</sup>Ntšamo bayté entsemna, chë  
Bëngbe Bëtsabe juabna oyebuambnayá  
Isaías chabe librëšañe yojëftsayancá,  
ntšamo Bëngbe Bëtsá chabe  
Uaquiñábioye ibojauyanama cha  
tojanábema ora:

Minýe, atšbe abuayinyayá acbe  
natsana sentsichamná,  
chë aca jabama lempe  
echanjaprónta cha.

<sup>3</sup>Entšanga ndoyena luaroca cha  
enduáyebuache mëntšá:  
“Bëngbe Utabná echanjabo ca;  
mo nda canýe benache  
tojtseprontacá canýe uámana  
entšá jashjanguama,  
cachá tšëngaftanga, cha jabama  
ainaniñe tšabe juabnéngaca  
šmochtseprontana ca” —cha  
tojanábema.

<sup>4</sup>Chcase, Bëngbe Bëtsá Juan  
tbojanichmó, y cha tojánbocna  
entsànga ndoyena luaroca, Bëngbe  
Bëtsabe soyëngama abuayinyaye  
y entsànga ubáyana. Cha entsànga  
yojanëtsëtsnaye: “Tšëngaftangbe  
bacna soyëngama ngménaca  
šmochtenójuaboje, chca amana

šochtsajbaná, y Bëngbe Bëtsabe  
benache šmochtishache. Chora  
cbochjúbaye, y Bëngbe Bëtsá  
tšëngaftangbe bacna soyëngama  
cmochanjáperdonaye ca.” <sup>5</sup>Nýets  
Judea luarocana chábioye entsànga  
imojánbocana, y Jerusalenentsána  
nyetsca entsángnaca, y Bëngbe  
Bëtsábioye chëngbe bacna soyëngama  
jaimpáda chentsána, Juan Jordán ca  
uabaina béjajiñe chënga yojanébáyana.

<sup>6</sup>Juanbe entsáyá inauapormana  
camellbe stjënasheca y bobache  
yojanasnana; chapulinatémënga y  
tjañe méloye inasaye. <sup>7</sup>Y mëntšá  
entsànga yojanëtsëtsnaye: “Atšbe  
ústonoye inýa echanjabo, atšbiana más  
obenana bomná; chíyeca atše mercedo  
taitsatobuajoñe, ni mo jotsejbiyana  
chabe shecochëtjonëshentša  
corriëja jajafjonama. <sup>8</sup>Atšna  
búyesheca cbondëubáyana, pero  
chë echanjabábeyecna, Bëngbe  
Bëtsá bochanjíchmua chë Uámana  
Espíritu tšëngaftangbe ainaniñe  
cháumashënguama ca.”

## Juan, Jesúsbioye tbojanabaye

(Mt 3.13-17; Lc 3.21-22)

<sup>9</sup>Chë tempo, Galilea luarocana  
Nazaret pueblentsána Jesús  
yojëftsebocna, y Juan yojtsemnoye  
tojána; y Jordán béjajiñe Jesúsbioye  
cha tbojanabaye. <sup>10</sup>Bejajoicana  
yojtashëbëbocna orna, tojáninýe



celoca atëfjniñe, y chë Uámana Espíritu chábioye mo palomatemcá yojtsastjajuana. <sup>11</sup> Y celocana Bëngbe Bëtsá mëntšá tbojaniana: “Acna atšbe bonshana Uaquiñá condmëna; acbiana corente sëntsoyejuá ca.”

**Jesús tojanobená Satanás  
jayénjanama**

(Mt 4.1-11; Lc 4.1-13)

<sup>12</sup> Chentšana chë Uámana Espíritu Jesúsbioye entšanga ndoyena luaroye tbojanánatse. <sup>13</sup> Canta bnëtsana te chë entšanga ndoyena luaroca tbojanjëtana, y Satanasma yojanabó jisháchichiyama. Chë luarentšë tsátjaye bayënga imnajena; chentšana, Bëngbe Bëtsabe angelënga cha imojtseserverna.

**Jesús tojanontšë Galileoca chabe  
trabajo jamana**

(Mt 4.12-17; Lc 4.14-15)

<sup>14</sup> Juan cárceloye tmojanëtámentšana, Jesús Galileoye tojesaná; y chiñe cha yojanabuayiyá chë tsabe noticiënga Bëngbe Bëtsabiama.

<sup>15</sup> Jesús entšanga yojanëtsëtsnaye: “Ora tocbuache, Bëngbe Bëtsabe amëndayana echanjóshjango. Tsëngaftangbe bacna soyëngama ngménaca šmochtenójuaboje, y chca amana šmochtsajbaná y Bëngbe Bëtsabe benache šmochtishache; y ainaniñe chë tsabe noticiënga Bëngbe Bëtsabiama šmochjóyëngacñe ca.”

**Jesús tojánachembo canta  
boyabásenga beonga  
ashebuánayënga cha chamuastama**

(Mt 4.18-22; Lc 5.1-11)

<sup>16</sup> Galilea uafjajónaye tsachajana Jesús yojtsaye ora, cha tojánanyë Simón y chabe uabentsá Andrés; chatna atarraiešhangá ibnëtsashbuëtsetšañe, er beonga

ashebuánayata chata ibnamna.

<sup>17</sup> Chora Jesús tojanéyana: “Atšeftaca mabata. Atše chochanjábiama Bëngbe Bëtsabiama entšanga anguayata; y morscana, nje beonga ashebuánayata ndoñe quešochátsmëna ca.”

<sup>18</sup> Y cachora chatbe atarraiešhangá cachcá tbojésanaboshjuana y Jesús tmojanasto.

<sup>19</sup> Más hcoye yojátaye orna, Jesús tojánanyë Santiago y chabe uabentsá Juan, Zebedeobe uaquiñata; chatna barquëshañe ibnëtsotbemañe, chatbe atarraiešhangá atapórmayañe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúsftaca tbojtsanoñe.

**Jesús, bacna bayëjbe juabna  
cányabioye tbojanbojuaná**

(Lc 4.31-37)

<sup>21</sup> Chentšana, Jesús y chabe uatsjëndayënga Capernaum ca uabaina puebloca tmojánashajna. Chë ochnayté, Jesús chë judiëngbe enefjuana yebnentšë tojánamashëngo y yojóntša entšanga jabuátambama.

<sup>22</sup> Entšanga imojtsenjanayë ntšamo Jesús yojtsabuatambacá, er chama mo canye mando bomnacá yojtsóyebuambnaye, ndoñe nje ntšamo Moisesbe ley abuátambayënga imojanabuatambacá. <sup>23</sup> Chë pueblëntšë judiëngbe enefjuana yebnentšë yojtsemna canye entšá bacna bayëja uambayá, y chábeyeca chë boyabása yojóntša mëntšá uayebuáchana:

<sup>24</sup> —¿Ndayama béngbioye təcjabo, Jesús Nazaretocá? ¿Tcojabo bënga jabëtsapochocama? Atšë sëndétatšëmbo nda aca comnama, aca chë Bëngbe Bëtsabe Uamaná ca.

<sup>25</sup> Chora Jesús chë bayëjbioye tbojtsanácacana, y tbojaniana:

—iIytēca móbema y chábentšana  
maisebocna ca!

<sup>26</sup>Chora chē bacna bayējna tojanma  
chē boyabása ataque chaboshachama,  
jabuache tojanoyó y chábentšana  
tojésanbocna. <sup>27</sup>Chama, nýetsca  
entšanga ojanánēnga imojtsemna,  
y mēntšá imojtsentjanaye: “¿Ndayá  
chca yojtsemna? ¿Canýe tsēm  
buatēmbana soye? ¡Quem boyabása  
mando bomnacá y obenacá  
entsabuatambá, y chca, chē bayējēnga  
cha jtsaméndayana y chéngnaca  
joyeunayana ca!”

<sup>28</sup>Y betscó nýets Galilea luarentša  
pueblēnguenache Jesusbiamá  
yojtsótatšēmbó.

**Jesús, Simón Pédrēbe uambén  
mamábioye tbojanshná**  
(Mt 8.14-15; Lc 4.38-39)

<sup>29</sup>Chentšana, chē enefjuana  
yebnentsšana tmojánbocana y Santiago  
y Juánoftaca Jesús tojána, Simón  
y Andresbe yebnoye. <sup>30</sup>Simonbe  
uambén mamá šocá inajájona,  
jabuache calentóracá, y Jesúsbioye  
chē šocábiamá tmojaníyana.  
<sup>31</sup>As chora, Jesús tojanobeconá, chē  
šocábioye tbojanábuacueshache y  
tbojanatsbaná. Cachora chē calentora  
tbojtsanóbojuanañe; y cachora cha  
tojtantsbaná y tojanontsé chēnga  
jobuácuedana.

**Jesús ba šoquēnga tojanashná**  
(Mt 8.16-17; Lc 4.40-41)

<sup>32</sup>Chē te jetiñe, shinýe ya  
yojuenatjēmba ora, chē luarentša  
nýetsca šoquēnga y bacna  
bayējēnga uambayēnga Jesúsbioye  
tmojanēnatse; <sup>33</sup>y nýetsca entšanga  
bēšoye imojobeconá. <sup>34</sup>Jesús banga  
tojanashná, nýetsca šocana bomnēnga,  
y ba bacna bayējēnga entšanguentšana

tojtanébuacna; y ndoñe tonjanalesenciá  
chē bayējēnga chamóyebuambama, er  
chēnga imnatátšēmbó cha chē Cristo  
bétsemnama.

**Chē judiēngbe enefjuana  
yebnēnguenache Bēngbe Bētsabe  
soyēngama Jesús yojanabuayíyná**  
(Lc 4.42-44)

<sup>35</sup>Yēfsana cabá cachēse, cabá  
ibetcá, Jesús tojēftsantsbaná, chē  
pueblentsšana tojēftsanbocna  
y entšanga ndoyena luaroye  
tojtsanoñe, choca Bēngbe Bētsáftaca  
jencuéntama. <sup>36</sup>Pero Simón y chabe  
enutēngna tmojána jetsenguanguama;  
<sup>37</sup>y tmojtsaninýena ora tmojaníyana:  
—Nýetscanga cmontsenguá ca.

<sup>38</sup>Y Jesús tojanéyana: —Inýoye  
cuajna, cam béconana pueblēngoye,  
chíñnaca Bēngbe Bētsabe soyēngama  
entšanga chayábuayenama; er chama  
atše sēnjabo ca.

<sup>39</sup>Y chentšana, Jesús yojánana  
Bēngbe Bētsabiamá entšanga  
abuayíynaye chē judiēngbe enefjuana  
yebnēnguenache, nýets Galileiñe, y  
entšángbentšana bacna bayējēnga  
yojtēbuacana.

**Jesús, canýa bacna nguayanánaca  
šocábioye tbojanshná**  
(Mt 8.1-4; Lc 5.12-16)

<sup>40</sup>Chentšana, canýe boyabása  
bacna nguayanánaca šocá Jesúsbioye  
tojanobeconá; y joshaméntsase mēntšá  
tbojanimpadá: —Aca tcojtsebošēse,  
aca catjobenaye atšbe šocana  
jtsebojuánama ca.

<sup>41</sup>Jesús chabiamá tbojanongmé;  
cucuátšeca tbojánbojajo y tbojaníyana:  
—Añe sēntseboše. ¡Šocana  
cbotsebojuaná ca!

<sup>42</sup>Y cachora chē šocana  
tbojtsanóbojuanañe y tšabá

yojtsatsmëna. <sup>43</sup> Chora Jesús chábioye tbojtanichmó, pero puerte mëntšá tbojanmandá: <sup>44</sup>—Mouena; ndocnábeñe quem soye cattsecuëntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyinë tojanmandacá, Bëngbe Bëtsábioye chama jëtschuayama, chca, nÿetsca entšanga chamotátšëmbona mora ya tšabá cojtsatsmënama ca.

<sup>45</sup> Pero chë boyabásana, chentšana tojéftsanbocna y cachora yojóntša nÿetsquénache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nÿe chë pueblënga béconana y nÿetsca chë entšanga ndoyena luarënguiñe yojánana; pero nÿets luarëngocana chábioye entšanga imojánashjajuana.

**Jesús, canÿe jama ndobenábioye  
tbojanshná**

(Mt 9.1-8; Lc 5.17-26)

**2** <sup>1</sup> Chentšana, Jesús Capernaumoye tojtanashjango; y entšanga imojátatšëmbona, Jesús yebnentše yojtsatsmënama. <sup>2</sup> Mallajta entšanga chentše tmojanójoto; chë causa chë yebnentše ya tondaye más luare entšangbiama yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiyñaye.

<sup>3</sup> Chora tojanopasá, canta boyabásenga tmojánashjango, canÿe entšá jama ndobená imojtsaismana.

<sup>4</sup> Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsooca batsá tmojánatëfjo y chëjana chë jama ndobená tjuashiñe

tmojanéštjango. <sup>5</sup> Jesús tojáninÿe chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniyana: “Sobreno, mouena; acbe bacna soyënga tcbontseboperdoná ca.”

<sup>6</sup> Chentše báseftanga judiëngbe ley abuátambayënga imnatbemana; chënga chora mëntšá imojtsejuabñaye: <sup>7</sup> “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena inÿabioye bacna soyëngama japerdónana; nÿe Bëngbe Bëtsana añe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngaftanga ainaniñe šmojtsejuabná? <sup>9</sup> ¿Tšëngaftangbiama ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’? <sup>10</sup> Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniyana: <sup>11</sup> “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojësebocna. Chama nÿetsca entšanga imojenjanáná y Bëngbe Bëtsábioye imojtsatschuanaye, y mëntšá imojtsichamo: “Nÿa ndocna te tša bëtš soye chemuáísinÿe ca.”

**Jesús, Levíbioye tbojanchembo  
chabuastama**

(Mt 9.9-13; Lc 5.27-32)

<sup>13</sup> Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. <sup>14</sup> Chentšana yojtsataye orna, Jesús tbojáninýe Levíbioye, Alfeobe uaquiñá, yojtsanotbemañe, entšanga impuesto atjanayacá inétsotrabajañe. Chora Jesús tbojaniyana: “Šmasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levice yebnentše yojtsesaye, y banga Romocama entšanga impuesto atjanayënga y inýe bacna entšanga, mesëshentše cánýiñe imojtsetbiámana, Jesús y chabe uatsjéndayëngaftaca; er ba entšanga cha imojústona.

<sup>16</sup> Chë fariseunga y chë ley abuátambayënga, chë entšángaftaca Jesús yojtsesama tmojáninýe ora, chabe uatsjéndayëngbioye tmojanatjá: —¿Ndáyeca tsëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

<sup>17</sup> Jesús chca tojanuena; as mëntšá tojanéjua: —Chë salud tmotsobomñënga, ashnayá ndoñe ntsëjabótana, pero chë šoquëngna añe. Y atše ndoñe chiyátabo chë Bëngbe Bëtsabe bominýiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

**Jesús tmojantjá chë Bëngbe  
Bëtsáftaca jencuéntama tondaye  
saytescama**

(Mt 9.14-17; Lc 5.33-39)

<sup>18</sup> Canýe, Juan chë Ubayanabe ústonënga y chë fariseungbe usetonënga, Bëngbe Bëtsáftaca

jencuéntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojaniyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

<sup>19</sup> As Jesús tojanéjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëtscuana, chë ófjanënga bëtscá jasana y cháftaca oyejuayënga jtsemnana. <sup>20</sup> Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ófjanëngaftaca endmëncá, cachcá endmëna atše y atšbe uatsjéndayëngaftacnaca.

<sup>21</sup> “Ndocná, canýe tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabëconana y chë tanguá entšayá más jtsatanëcanana, y chca, chë uátanëcniñe más bëtsiñe jtsabemana. <sup>22</sup> Y cach ndoñe, chë tojtseshayana vínoye tanguá jasabenguíñe ntjataftsuámayana; er chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservënana. Chíyeca comna, chë tojtseshayana vínoyna tsëm jasabenguíñe juaftsuámama; chca, chë jasabenga y chë vínoye josérviana ca” —Jesús tojánayana.

**Jesusbe uatsjéndayënga canýe  
ochnayté trigo tmojanátabebe**

(Mt 12.1-8; Lc 6.1-5)

<sup>23</sup> Canýe ochnayté, Jesús canýe jajajana yojtsaye; y

chabe uatsjéndayënga chëjana imojtsachnëjuana ora, tmojanontsé trigo juatabebiana. <sup>24</sup> Chë fariseunga chca imojinÿe ora, Jesúsbioye tmojaniana: —Minÿe. ¿Ntšamo acbe uatsjéndayënga montsamcá, ndoñe quenátslesenciana ochnayté jtsamama ca?

<sup>25</sup> Pero cha tojanéjua: —¿Ndoñe šmëndualía y šmondétatšëmbo ntšamo Rey David y chabe enutënga tmojanmama shéntseca imojtsemna ora y jasama yojsëjaboto ora? <sup>26</sup> Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentšë Bëngbe Bëtsá yojamnama inÿinÿnaye tandëšënga yojase; y chë cháftaca imojánajna entšágnaca yojátšataye. Y chë tandëšna nÿe bachnangbiana belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

<sup>27</sup> Y Jesús más tojánayana: —Bëngbe Bëtsá ochnayté entšabiana tojama y entšá ndoñe tbonjábema nÿe chë ochnayté ndoñe chaondëtrabajama. <sup>28</sup> Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

**Chë buashana cucuatše bomna  
entšá**

(Mt 12.9-14; Lc 6.6-11)

**3** <sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canÿe boyabása yojtsemna, buashana cucuatše bomná. <sup>2</sup> Chë fariseunga chiñe imojtserrondana jinÿama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal

jaquédana. <sup>3</sup> Chora Jesús chë buashana cucuatše bomnábioye tbojaniana: —Chentše, entšangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochoçama ca?

Pero chënga ndocá tmonjanjuá, nÿe iytëca imojobiana. <sup>5</sup> Chora Jesús rábiaca y ngménaca chë fariseunga tojanëñyanÿé, chënga ainaniñe josértama ndoñe montseboše causa; y chë buashana cucuatše bomnábioye tbojaniana: —Macuenÿanëjaná ca.

As chë boyabása tojanacuenÿanëjaná, y chora tšabá chëtša yojtšatamna cach inÿetšacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonéngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

**Mallajta entšanga Jesúsbioye  
tmojanobeconá**

<sup>7</sup> Chentšana, Jesús chabe uatsjéndayëngaftaca tojanoluaré mar béjaye tsachoye, y Galileocana bëtscá entšanga tmojanasto. <sup>8</sup> Inÿe entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón pueblëngocana. Chënga tmojanobeconá, Jesús tša bëts soyënga yojtšamama tmojanuena ora. <sup>9</sup> Jesús chabe uatsjéndayënga tojanéyana: “Motsajna y canÿe barquësha atšbiana šmochjuapróna, tša entšanga ndoñe chašmondëtsatsëntšnama ca.” <sup>10</sup> Er cha banga tojanashná, y chë causa, nÿetscanga šocana bomnënga chábioye tmojanajuatsëntšëná cha jabojuama.

<sup>11</sup> Y chë bacna bayëjënga uambayëngna, Jesús tmojinÿe

ora, betesco chabe shecuatšentšë imojtsofhëntsaméntšenaye, y chë bacna bayëjéngbeyeca mëntšá imojtsáye buache: “iAca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bétsemnama entšangbe delante ndoñe chamondëtsichámuama.

**Jesús chë bnëtsana uta  
uatsjéndayënga tojanabacacá**  
(Mt 10.1-4; Lc 6.12-16)

<sup>13</sup> Chentšana, Jesús canye batsjoye tojántsjua, y ndëmuanýënga tšabá tbojanínýnanënga tojánachembo. Y chëngna chábioye tmojanobeconá.

<sup>14</sup> Chora, chënguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entšanga chámabuayenama; <sup>15</sup> y chënga obenana tojanatšatá entšángbentšana bacna bayëjénga jtëbuacanama.

<sup>16</sup> Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye; <sup>17</sup> Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; <sup>19</sup> y Judas Iscariote, chë chentšana ndoñe baytesna, Jesús uayayëngbe cucuatšifne bochjanboshjoná.

**Ley abuátambayënga tmojánayana,  
Jesús Satanásbentšana obenana  
tojanóyëngacñe ca**  
(Mt 12.22-32; Lc 11.14-23, 12.10)

<sup>20</sup> Chentšana, Jesús yebnoye tojtanamáshëngo, y tša entšanga chentšë tmojanójoto; chë causa, ni cha ni chabe uatsjéndayënga, ni mo

jasama luare ndoñe imontsebomna.

<sup>21</sup> Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entšanga imojtsencuéntaye cha opá tojtsanóbema ca.

<sup>22</sup> Y chë ley abuátambayënga Jerusalenocana tmojánashjajnëngna Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjénga amëndayá, Jesúsbioye obenana tbojatšetá entšángbentšana bacna bayëjénga chauatëbuacnama ca.”

<sup>23</sup> Chënga chca imojtsichámuama, Jesús chënga tojánachembo, y cuentëngaca tojanontšë jáuyanana, jinýanýiyama chënga canye ndoñe ndegombre soyifne imojtsemnama, mëntšá: “¿Ntšamo Satanás nantsobena cachá jtenábocnama ca?”

<sup>24</sup> Canye amëndayábentšë entšanga tmojtsenajatá y tmojtsenáyase, chë amëndayana ndoñe ntjatotonana.

<sup>25</sup> Cachcá, canye yebnentšë pamíllanga tmojtsenajatá y tmojtsenáyase, chë pamíllanga ndoñe tšabá nyets tempo quemochátsmëna. <sup>26</sup> Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá quemochátsmëna.

<sup>27</sup> “Ndocná quenátobena canye corente añemo bomna entšabe yebnoye jamashënguana y chabe soyënga jtsebecana, ndoñe natsana tconjshëtsebatsëquëse. Nýe tcojshëtsebatsëquëse cocayé cuanjobenaye cha jefcana.

<sup>28</sup> “Ndegombre cbëyana, Bëngbe Bëtsá entšanga nýetsca bacna soyënga echanjáperdonaye, y ntšamo Bëngbe Bëtsabiana y inýengbiana ndoñe tšabá tmontsichamo soyëngnaca;

<sup>29</sup> pero chë Uámana Espíritbiana ndoñe tšabá ichámèngna ndocna te queochátaperdonaye, er nyetsca tescama castigánènga jtsemnana chènga jtsamnana ca” —Jesús tojánayana.

<sup>30</sup> Jesús chca tojanéyana, er chènga imojtsichamo cha bacna bayèja ibojtsambá ca.

**Chë Jesusbe ndegombre  
pamillanguentsènga**  
(Mt 12.46-50; Lc 8.19-21)

<sup>31</sup> Chèntscuana, Jesusbe mamá y catsátanga choye tojánashjajna, pero nÿe shjoca imojtsemna; y canÿa tmojanichmó cha jachembuama.

<sup>32</sup> Chë ba entsànga chentše chabe shéconana imojtsetbiámanèngna, chora tmojanianana: —Acbe mamá, acbe catsátanga y uabéngana shjoca montsemna; aca cmontsenguá ca.

<sup>33</sup> Chora cha tojanéjua: —¿Nda atšbe mamá yomna, y ndèmuanyènga atšbe catsátanga ca?

<sup>34</sup> Chentšana, chë chabe shéconanana tbiamanèngbioye jarreparase, tojánayana: —Quemènga mondmèna atšbe mamá y atšbe catsátanga. <sup>35</sup> Er ndánaca, ntšamo Bèngbe Bètsá yobošcá tojtsamá, jtsemnana atšbe catsata, atšbe uabena y atšbe mamá, atšbe ndegombre pamillanguentsá ca.

**Chë jenabe cuento**  
(Mt 13.1-9; Lc 8.4-8)

**4** <sup>1</sup> Chentšana, uafjájónaye tsachoca Jesús tojtétanontšé Bèngbe Bètsabe soyèngama jabuátambama. Mallajta entsànga tmojanobeconá causa, chë uafjájónayentše yojanamna canÿe barquëshoye Jesús tojánasèngo y tojanótbema; y chë entsànga tsachoca imojtsemna. <sup>2</sup> Chora cuenténgaca ba soyèngama tojanabuatambá.

Mèntšá tojanéyana: <sup>3</sup> “Šmochjouena; canÿe jená chë jénaye jaujquëshama vojéftsebocna. <sup>4</sup> Yojséjquëshaye orna, básefta jénaye benache juachañe yojuatquécjana; pero jaja shloftšènga imojástjajna y lempe imojtsósane. <sup>5</sup> Inÿe meshèngna ndètšbenguine yojuatquécjana, ndoñe yapa fshantse binÿnentše. Chiñna betesco yojuábocna, ndoñe yapa jashenocana fshantse yojanmèna causa; <sup>6</sup> pero yojuábocna orna, puerte yojojènyána y yojsancta; y yojsábojo yapa tbètèjènga tondaye causa.

<sup>7</sup> Inÿe meshèngna uchemshangañe yojuatquécjana; chë ucmashá yojuájua ora, lempe yojsatscué, y chca, chë jénayentsana tondaye yonjuashájona. <sup>8</sup> Pero inÿe meshèngna, uanguaniñe yojuatquécjana, y bètscá tšabe shajuanènga chiñe yojóbcna: ínÿenache, canÿe meshentsana unga bnètsana meshènga yojóbcna; ínÿenachna, chnénguana bnètsana meshènga; y ínÿenachna patse meshènga ca” —cha tojánayana.

<sup>9</sup> Y chentšana, Jesús más tojánayana: “Chë jouenama tojtsobenènga, šmochjouena ca.”

**Ndáyeca Jesús cuenténgaca  
yojánabuatambaye**  
(Mt 13.10-17; Lc 8.9-10)

<sup>10</sup> Chentšana, Jesús canÿa yojoquéda ora, chë chabe béconana imojtsemnènga chabe bnètsana uta uatsjéndayèngaftaca, tmojantjá ndayá chë cuento bétsayanama.

<sup>11</sup> As Jesús tojanéjua: “Bèngbe Bètsá tšèngaftanga cmontsinÿanÿná nyetsca chë mo iytèncayá yomna soyèngaca chabe améndayama, pero chë ínÿengbioye ndoñe; chë soyèngama chènga lempe cuenténgaca séntsètsètsná. <sup>12</sup> Chca, masque becá

chamotsafšna, ndoñe chamondobená chë Bëngbe Bëtsabe soyënga jin'yama; y masque beca chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

**Jesús chë jenabe cuentama tojanabuayená**

(Mt 13.18-23; Lc 8.11-15)

<sup>13</sup>Chentšana, Jesús tojanéyana: “¿Quem cuentama ndoñe tcmónjósertase, ntšamo chc case nyetsca cuentëngama cmochjóserta ca? <sup>14</sup>Chë jená endmëna chë tšabe noticiëngama abuyayinayá. <sup>15</sup>Básefta entšanga mondmëna mo chë benache juachañe yojuatquécjana jenaycá. Chëngna Bëngbe Bëtsabiana soyënga jouenana; pero chora Satanás betesco jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema. <sup>16</sup>Inyë entšanga mondmëna mo chë ndëtšbenguinë yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; <sup>17</sup>pero ndoñe nyets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga mochantsébuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjeson'yaye. <sup>18</sup>Inyënga mondmëna mo chë ucméshangañe yojuatquécjana jenaycá. Chënga Bëngbe Bëtsabe palabra mochanjouena, <sup>19</sup>pero quem luarentša soyëngaca oyejuayënga jtsemnana yapa mochántseboše, y nyë bomnana jëftsebomnana

yapa mochanjésenojuabnaye. Chë soyama y inyë ba soyëngama yapa enócochin'yena causa, Bëngbe Bëtsabe soyëngama echantsebnétjomba, y ndoñe quemochátama ntšamo Bëngbe Bëtsá tojayancá. <sup>20</sup>Pero inyënga mondmëna mo chë uanguniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyets ainánaca mochántseprontana chiñe jtsošbuáchiyama. Mo canyë betiye beca tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyënga inyëngbiana más bëtscá soyënga mochanjama; y chca, inyënga mochántsemna mo chë unga bnëtsana meshe tojanshajo jenaycá, inyënga mo chë chnénguana bnëtsancá, y inyëngna mo chë patse meshënga tojanboté jenaycá ca” —Jesús tojanayana.

**Chë uajuin'yánëshama cuento**

(Lc 8.16-18)

<sup>21</sup>Mëntšánaca Jesús tojanayana: “Ndocná juiyëbana canyë uajuin'yánëshaca cajonëshe o jutsnëshatajsoye juajájuama. Ndoñe; uajuin'yánëshaca juiyëbana tsbanánoca juajájuama, lempe chaotsebínynama. <sup>22</sup>Ndocna yoiytëmena soye ntjin'yencá queochaisoquéda, y chë ndótatšëmbo soye ntsoatšëmbcá queochaisoquéda. <sup>23</sup>Chë jouenama tmojtsobenënga, šmochjouena ca.” <sup>24</sup>Y mëntšánaca Jesús tojanéyana: “Tšabá šmochjájua boye ntšamo šmojtsuenanama. Nyë batšatema šmojouenëshe, nyë batšatema cmochanjósertaye; pero añe tšabá šmojouenëshe, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama. <sup>25</sup>Er nda



Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nyë batsá ibosertana soyëngama bochántsebnatjëmba ca” —cha tojánayana.

#### Chë ojuajna jenayama cuento

<sup>26</sup> Jesús mëntšánaca tojanéyana: “Bëngbe Bëtsabe amëndayana endmëna mo ntšamo canyë boyabása jénaye tojuatbontsá ora ehandbopasacá: <sup>27</sup>masque cha cada ibeta jtsojájuana y bnëtë jotsbanama, ibeta o bnëtë, chë jénayentsána juabocnana y juájuaana, ntšamo chca yojsájuaajnama chë boyabása ntjatstatsëmbcá. <sup>28</sup>Chë fshantse cachabe ponto jamana ndayánaca chiñe chaójuama; natsana tsbuanachëtema jóbocnana, chentšana chë espiga, y chentšana chë meshënga jashájonana. <sup>29</sup>Y chë meshënga ya tojtsebóchichna orna, játbanama juabocnana, chë saná josháchiñama ora ya tojobuácheyeca ca” —Jesús tojánayana.

#### Chë mostaziye jenayama cuento

(Mt 13.31-32; Lc 13.18-19)

<sup>30</sup> Jesús mëntšánaca tojanéyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? <sup>31</sup>Endmëna mo canyë mostaza jénaye jajoca tcojajecá. Ndegombre, nyetsca quem luarentša jenayëngama, mostaza jénaye chë más básetema endmëna; <sup>32</sup>pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

#### Ndayeca Jesús cuentëngaca entšanga yojanabuayiná (Mt 13.34-35)

<sup>33</sup> Chca Jesús Bëngbe Bëtsabe soyëngama entšanga yojanabuatambá, ba cuentënguentšana, mo chë tmonjouena cuentcá, ntsachetsá chë entšanga josértama tmojobenacá. <sup>34</sup>Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiná, cányenga tmojtsemna ora.

#### Jesús chë binýia y chë béjaye bonguana jojétsbema (Mt 8.23-27; Lc 8.22-25)

<sup>35</sup> Cach te, yojtseibétatana ora, Jesús chabe uatsjëndayënga tojanéyana: “Uafjónaye chenguana cuajna ca.”

<sup>36</sup> Chorna, chë entšanga jesabáshejuanëse, chë uatsjëndayënga Jesús tmojtsanánatseñe, cach yojänenjaquena barquëshañe; y inyë entšángnaca inyë barquëshangañe tmojanasto. <sup>37</sup>Chentšana, chë uafjónayebéjayiñe tša jabuache binýia yojóshjango; olëshënga chë barquëshá imojtsétsbotsana, y chë causa chë barquëshá yojóntša búyeshca jtsobuajújtjana. <sup>38</sup>Y chëntscuana, barquëshá stëtšoica, tsëntšënëshañe Jesús yojtsomañe. Chora chë uatsjëndayënga tmojtsanfšená y tmojanianayana: —iBuatëmbayá! ¿Tondayana cmontsentšamna bënga chašotsënatjëmbama ca?

<sup>39</sup> As Jesús tojantsbaná, chë binýia tbojanácacana, y chë bëts uafjónayoye tojánayana: —iNatjëmbana cochtsemna! iBonguana ca!

Y cachora chë binÿia yojëttëcÿa, y lempe bonguana yojtsatsmëna. <sup>40</sup> Chora chabe uatsjëndayënga tojanëyana: —¿Ndayëca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binÿia y chë bëjaye tmonjoyeuná ca.”

**Chë Gerasa luaroca bacna bayëja uambayá**

(Mt 8.28-34; Lc 8.26-39)

**5** <sup>1</sup> Chentšana, uafjájónaye chenguánoica tmojánashjajna, Geraseno ca uabaina entšangbe luaroye. <sup>2</sup> Jesús barquëšhoicana tojánastjango, y cachora, chë obanëngbe cuevëšhënguentsana canÿe entšá, bacna bayëjbe juabna uambayá, tojánbocna y tbojanjëbengo. <sup>3</sup> Chë boyabásana, obanëngbe cuevëšhënguenache inoyena, y ndocná yonjobena cha jtsebátsëcana, ní mo cadenëjuangaca; <sup>4</sup> er ba soye cadenëjuangaca y inÿe soyëngaca cha nÿetsá tmojanbatsëca, pero cha nÿetsca soye yojtsátabebe y yojtsenájaca, y ndocná yonjobenaye cha bonguana chaotsemnama. <sup>5</sup> Nÿets tempo, bnëté y ibeta, obanëngbe cuevëšhënguenache y tjañenache yojánana yoye, y ndëtšbëngaca enotsetšenaye.

<sup>6</sup> Jesúsbiyoye bënëcana tbojáninÿe ora, chábiyoye tojanótjajo y chabe natsanoica yojoshëntsamentšiyey; <sup>7</sup> y mëntšá yojtsáyebuache: —¿Ndayá átšëftaca tojtseboše, Jesús, celoca Bëngbe Bëtsabe Uajoñiná? ¡Bëngbe Bëtsabe delante cboimpadá, ndoñe šcatjatsetšená ca!

<sup>8</sup> Chca tbojaniyana, er Jesús chábiyoye tbojaniyana: —¡Bacna bayëjbe juabna, chábentšana maisebocna ca!

<sup>9</sup> Chentšana Jesús tbojantjá: —¿Ntšamo cabaina ca?

Y chë bacna bayëjëngbe juábna cha tbojanjuá: —Atšna Legión ca sënduabaina, bëtsçanga fsëndmëna causa ca.

<sup>10</sup> Y tša Jesús ibojtserruana chë luarentšana ndoñe chaondëtëbuacanama. <sup>11</sup> Chentša bëconana ba cotšënga imnajena, batsjoca imnëtsosañe; <sup>12</sup> as chë bacna bayëjënga Jesúsbiyoye tmojanimpadá: —Chë cotšëngbiyoye šmichamó, chëngbeñe fchayamashjna ca.

<sup>13</sup> Y Jesús añie tojanalesenciá; as chë bacna bayëjënga chë entšábentšana tmojësambocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjájónayoye imojtsoshbuetše y yojtsatajo.

<sup>14</sup> Chora, chë cotšënga anÿenënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinÿama. <sup>15</sup> Jesús yojtsemnoye chë entšanga tmojánashjajna ora, tmojáninÿe chë tempo bacna bayëjënga uambayá, inëtsoybemañe, entšayá uichëtjoná y chabe nÿets juábna. Y chë entšanga chama imojtsëuatjaná. <sup>16</sup> Chë tmojáninÿënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca. <sup>17</sup> Chora chë entšanga tmojanontšé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. <sup>19</sup> Pero ndoñe tbonjanlesenciá, sinó mëntšá

tbojaniana: “Acbe yebnoye motsatoñe, acbe pamfllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

<sup>20</sup> Chentšana, chë entsá yojtatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmcá; y nyetscanga imojtsenjanaye.

**Jesús canye shembásabioye  
tbojanshná y Jairëbe  
bembetémbioye tbojtananaya  
(Mt 9.18-26; Lc 8.40-56)**

<sup>21</sup> Chentšana, Jesús cachiñe chë uafjajónaye chenguana tojesaná barquëshañe. Chocna ba entsanga tmojanobuashconá, y Jesús chë uafjajónaye tsachañe yojtsemna.

<sup>22</sup> Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninye ora, chábentše tojanoshëntsamentsé, <sup>23</sup> y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjájajua, salud chauatinýenama y cháuatayenama ca.

<sup>24</sup> As Jesús cháftaca tojána; pero bëtsá entsanga imojtséstona, chábioye imojtsenatséntsenaye.

<sup>25</sup> Chë entsanguentše yojtšaye canye shembása šocá; cha ya bnëtsana uta uata oboftjajuanánaca inapadecena. <sup>26</sup> Cha puerte tojansufrí, ba ashnayëngbe cucuatšinë, y lempe ntsachetšá inabomncá tojanpochocá jenóshnama; pero ndoñe ibontsatstécacjana, nye más peor ibojtsobiamnaye. <sup>27</sup> Chë shembása yojouena ntšamo Jesús ba šoquënga tojánashnama, y as stëtšoicana entsangbe tsëntsajana yojobeconá, y Jesusbe entsáyá yojauábojajo. <sup>28</sup> Cha

chca tojanma, er yojtsejuabnaye: “Masque nye mo chabe entsáyá sibiájua chaijuábojajo, y salud chantsatsbomna ca.” <sup>29</sup> Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtšatsmënama. <sup>30</sup> Chora Jesús yojaséntia chábentšana obenana yojóbcnoma, mo ndábioye tbojashná orcá; as cha tojanobuértana entsángbeñe y tojanatjá: —¿Nda atšbe entsáyá tojuabojajo ca?

<sup>31</sup> Chabe uatsjëndayënga tmojanjuá: —Aca contsonyá chë entsanga cmontsatsëntšená, y cabá cochjátsnoticiaye nda entsáyá tojuabojajo ca.

<sup>32</sup> Pero Jesús cátoye yojtserreparana jinýama nda tbojánbojajuama.

<sup>33</sup> As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentsé, y lempe ntšamo ndegombre cháftaca tojanopasacá Jesúsbioye tbojaniana. <sup>34</sup> Chora Jesús tbojaniana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

<sup>35</sup> Jesús cabá yojtšóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásatembe taitá tmojaniana: —Acbe bembe tontsóbana; ¿ndayama más Buatëmbayá chama cochjátebëyaboma ca?

<sup>36</sup> Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniana: —Ndoñe matauatjana. Nye Bëngbe Bëtsábeñe cochtsošbuáchiye cha tšabá chaotsatsmënama ca.

<sup>37</sup>Y Jesús ndoñe tonjanalesenciá Jairêbe yebnoye banga chamuastama; nÿe Pedro, Santiago y Juan, Santiagbe uabentsana, aíñe. <sup>38</sup>Chentšana, chë mandayabe yebnoye tmojánashjajna ora, Jesús tojánanÿe entsanga tša imojtsenbouenana, entsanga imojtsošachiye y puerte ngménaca imojtseyoye. <sup>39</sup>As chë yebnoye tojánamashëngo y chë entsanga tojanéyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nÿe endëtsomañe ca.”

<sup>40</sup>Pero entsanga nÿe imojtsáfchaye. As Jesús nÿetsca entsanga shjoye tojtanëbuacna, y tojéftsanëbiatšë chë basetembe bëtsétsata y chabe enutënga; y chë shembásetema yojtsemnoye tojánamashëngo.

<sup>41</sup>Chora Jesús tbojanábuacueshache y cachëngbe biyañe tbojaníyana: “Talita, cum ca.” (Chca endayana “Shembásetema, matëtsbaná ca”.)

<sup>42</sup>Cachora, chë bnëtsana uta uata bomna shembásetema tojtantsbaná y yojtsobena jama. Y chë entsanga chama imojtsenjnanaye. <sup>43</sup>Pero Jesús corente tojanamëndá ndocnábeñe chama ntsecuéntayana ca, y tojanamëndá chë bássetema saná chamuiyé chaosama.

#### Jesús Nazaret puebloca

(Mt 13.53-58; Lc 4.16-30)

**6** <sup>1</sup>Chentšana Jesús tojéftsanbocna y cachabe luaroye tojtanashjango, y chabe uatsjéndayënga cháftaca tmojána. <sup>2</sup>Ochnayté tojanobuache ora, Jesús tojanontšë chë judiëngbe enefjuana yebnentšë entsanga jabuátambana.

Chë ba entsanga cha jóyebuambayama tmojanuenënga,

imojenjnaná y tmojánayana: “¿Ndémoca quem boyabása lempe chca tojuatsjinÿe? ¿Ndaye osertánana mua tmojatšeta, y ntšámoyeca cha yojtsobena chca bëts soyënga jtsamana ca? <sup>3</sup>¿Mua ndoñe chë calpintero yondmëna, Mariybe uaquiniá, y chabe catšátanga ndoñe mondmëna Santiago, José, Judas y Simón; y chabe uabëngnaca muentšë ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. <sup>4</sup>As Jesús tojanéyana: “Nÿetsca luarënguenache canÿe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentšë, ni cachabe pamíllangbenache, ni cachabe yebnentšë ca.”

<sup>5</sup>Chë entsanga chentšë chábeñe ndoñe montsanošbuaché causa, Jesús ndoñe tonjanobená ni canÿe bëts soye Bëngbe Bëtsabe obenánaca chentšë jëftsemana; nÿe básefta šoquëngbeñe cucuatšënga tojanajó y tojanashná. <sup>6</sup>Jesús ojnananá yojtsemna cachábentša entsanga chábeñe ndoñe montsanošbuaché causa.

#### Jesús, chabe uatsjéndayënga tojanichamó Bëngbe Bëtsabe amëndayama jábuayenama

(Mt 10.5-15; Lc 9.1-6)

Chentšana, chë chaboye base publënguenache Jesús yojánana, Bëngbe Bëtsabe soyëngama abuátambaye. <sup>7</sup>Y chë bnëtsana uta uatsjéndayënga Jesús tojánachembo, y utáta ínÿoye tojanichamó, entsángbentšana bacna bayëjenga jtëbuacnama obenana jatšatayëse; <sup>8</sup>y mëntšá yojáuyana: “Benachiñama tondaye šmattsambaye, nÿe canÿe

jatjonéjja; ndoñe šmattsambaye saná, ni shecnaja, ni crocénana uasanéchiñe. <sup>9</sup>Nduámanêshe šmochjesóshecochétjo, y nÿe canÿájua šmochjesíchétjo ca.”

<sup>10</sup>Mëntśánaca tojanéyana: “Posada chacmojúyentsame yebnentše šmochtsoquedañe inÿe puebløye játantscuana. <sup>11</sup>Canÿe luaroye chašmojáshajna y ndocná posada chacmonjuyentsame, y joyeunayama ndoñe chamontsebošese, chentsana šmochjésebecana, y shecuatsentša polvêshe šmochjésenstoto, chca, chéngbioye jinÿanÿiyama chénga ndoñe tšabá tšéngaftangaftaca tmonjamama ca.”

<sup>12</sup>Chentsana, chë uatsjéndayénga tmojëfťsanbocana y entsánga imojánabuayiyayana, chë tšabe benache chámuatishachama, bacna soyénga amana jtsajbanase. <sup>13</sup>Entśángbentśana ba bacna bayéjénga tmojtanébuacna, y ba šoquénga aceitíyeca tmojananéťotjo y tmojanashná.

### **Ntśamo Juan chë Ubayaná tojanóbana**

(Mt 14.1-12; Lc 9.7-9)

<sup>14</sup>Rey Herodes Jesusbiamá yojátatšémbona, er nÿetsquénache nÿetsca entsánga chabiamá imojtsóyebuambnaye. Entśanga Jesusbiamá imojtsichamo: “Juan chë Ubayaná obanénguentśana tojtayana, chíyeca cha chca obenana yojtsebomna ca.”

<sup>15</sup>Inÿéngna imojtsichamo: “Cha entsemna chë Běngbe Bětsabe juabna oyeuambnayá Elías ca.”

Y inÿéngna: “Muana canÿa Běngbe Bětsabe juabna oyeuambnayá, mo chë tempsquéngcá ca.”

<sup>16</sup>Heródesna ntśamo entsánga Jesusbiamá imojtsichamcá tojanuena

ora, tojánayana: “Mua Juan entsemna, chë atše sěnjánmandá bestšaše chamotsěstjanguamá, mora obanénguentśana tojtayana ca.”

<sup>17</sup>Juan cabá ainá ora, Herodes tojanmandá cha chamishache, cadenéjuangaca chamobátsēca y chca cárceløye jutámiamá. Herodes chca tojanma Herodíasbe causa, chabe uabentsá Felipbe shema. Herodes chë shémaftaca tojanobouamá, Felipe cabá ainá ora. <sup>18</sup>Y chama, Heródesbioye Juan ibojánbuayiyayana: “Ndoñe quenátslesenciana acbe uabentsabe shema acbe shema chaotsemnama ca.”

<sup>19</sup>Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, <sup>20</sup>er Herodes yojántatšémbo, Juan canÿe nÿetsca soyénguiñe tšabá amá, nÿe Běngbe Bětsábioye sempre oservená inamnama. Chama cha yojánauatja y ndoñe yonjanalesencia cha chamóbama. Y Juan Běngbe Bětsabe soyéngama Heródesbioye tbojtsebuayiyá ora, ntśamo jajuaboyana ndoñe yontsetátšémbo, pero masque chca, oyejuayá Juánbioye ibnayeunana.

<sup>21</sup>Pero Herodías tojáninÿena mocna ora Juan chamóbama. Heródesbe cumpleañø oboyejuaye ora, bětscá saná tmojanprontá, y Herodes yojúbuaja chabe améndayénga, soldadéngbe améndayénga y Galileoca uámana entsánga. <sup>22</sup>Chora, chë oboyejuaye luaroye Herodíasbe bembe tojánamashéngo, tojanlantsá, y Herodes y nÿetsca ófjanénga chama tša imojtsóyejuaye. As chë rey, chë tobiášbioye tbojaniyana: —Ndayánaca šmotjañe y atše cbochjátšetaye ca.

<sup>23</sup>Y jajúruse, mentsá tbojanšbuachená: —Ntśamo chašojotjañcá cbochjátšetaye, masque atšbe améndayentša bomnantśana tsěntsáñnaca ca.

<sup>24</sup> Chentshana, chë tobiáše vojéftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

<sup>25</sup> Cachora chë tobiáše betscó chë rey vojtssemnoye tojtanamáshëngo, y tbojanianyana: —Atše séntseboše, cam ora Juan chë Ubayanabe bestšaše canye šcnenëšiñe chašcuatšetá ca.

<sup>26</sup> Herodes chama corente tbojanongmé, pero chë entsangbe delante y jajúrase tbojansbuachená causa, ndoñe yonjobenaye ntšamo tbojanianyancá jebëbuetámenana. <sup>27</sup> Cachora chë rey canye soldado ibojíchmua, Juanbe bestšaše chauiyëbama. <sup>28</sup> As chë soldado cárceloye tojána, Juánbioye bestšaše tbojtsanéštjango, y canye šcnenëšiñe tojanamba. Chë tobiášbioye tbojanëntsabuaché, y chana, chabe mamábioye.

<sup>29</sup> Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

**Jesús shachna uaranga boyabásenga saná tojanacaredadó**

(Mt 14.13-21; Lc 9.10-17; Jn 6.1-14)

<sup>30</sup> Chë Jesús tojánichamonga chábioye tmojtanasjajna ora, lempe ntšamo tmojanmama y tmojanabuatambama cha tmojancuentá. <sup>31</sup> Chora Jesús tojanéyana: “Cuajna ínÿoye, entsanga ndoyena luaroye, batšatema jóchnama ca.” Cha chca tojanayana, er tša entsanga imojtsaye y imojtsabëbana; ni mo jasama ndoñe luare imontsebomna.

<sup>32</sup> As cánÿenga barquëshañe tmojtsanoñe, entsanga ndëbínÿnoye.

<sup>33</sup> Pero chënga imojtsoñama entsanga

tmojánanyë, y ndëmuanÿenga imojamnama imojtsetátšëmbo; chcasna, chë entsanga shecuátšeca betscó tmojána, nÿetsca pueblënguentšana, y chëngbe natsana choye tmojánashjajna.

<sup>34</sup> Chentshana, chë barquëshoicana tojánastjango ora, Jesús ba entsanga tojánanyë; chëngbiama tbojanongmé, er imojtsemna mo abuajénÿa ndbomna oveshëngcá; y tojanontšé ba soyëngama jabuátambana.

<sup>35</sup> Ya jetiñe vojtssemna orna, chabe uatsjëndayënga tmojanobobeconá y tmojanianyana: —Ya jetiñe entsemna, y quem luariñe ndocná quenatiyena.

<sup>36</sup> Entšanga cuantichamuá, pueblotëmëngoye y inÿe luarëngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanéyana: —Tšëngaftanga saná chëngbioye šmochjacaredádaye ca.

Chora chënga tmojanianyana: —Crocénana queftsátsbomna, uta patse denario nÿetsá, chëfta entsangbiama saná jabuámiyama ca.

<sup>38</sup> As Jesús tojanéyana: —¿Bueta tandëše šmojtsebomna? Marrepárange ca.

Ya imojtsetátšëmbo ora, tmojanianyana: —Shachna tandëše y uta beónata fséntsebomna ca.

<sup>39</sup> Chora Jesús entsanga tojanamëndá ínÿoca ínÿoca chamoshëntsjatbiamama.

<sup>40</sup> As chënga tmojanotbiamama patse patsënga y shachna bnëtsátsanënga.

<sup>41</sup> Chora Jesús chë shachna tandëše y chë uta beónata tojanca, y celoye jontjesiyëse, Bëngbe Bëtsábioye chama tbojtanchuá. Chentshana chë tandëšënga tojanjatá y chabe uatsjëndayënga tojanayentsbuaché chë entsanga jatsatayama. Y chë uta beónatnaca nÿetscanga tojanëjätaye.

<sup>42</sup> Nÿetscanga tmojanse jtoshachaye

nÿetsá. <sup>43</sup>Y chentsana, chë tandëse y chë beonentsana ojamnëtmënga tmojanatbaná, y bnëtsana uta sbarëcua tmojanajutjé. <sup>44</sup>Chë saná tmojansënga imojamna shachna uaranga boyabásënga, shembásënga y básënga ntjacuntacá.

**Jesús béjaye juatsbuacá yojtsaye**  
(Mt 14.22-27; Jn 6.16-21)

<sup>45</sup>Chentsana, Jesús chabe uatsjëndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Betsaida ca uabaina puebloca jashjajnana. Chënga imojtsebocanëntscuana, Jesús chë entšanga yojtichamuá. <sup>46</sup>Nÿetscanga tojtanadiošoftá ora, tjoye cha tojtsanoñe Bëngbe Bëtsáftaca jencuëntama.

<sup>47</sup>Yojtseibétatana ora, chë barquëshu uafjajónaye tsëntsaca yojtsamna, y Jesús, canÿa fshantsoca. <sup>48</sup>Jesús tojáninÿe chëngbiana totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿiana ora, chëngbiyoe vojbeconá, béjaye juatsbuacá yojtsaye, y ya chëngbiajana nÿe ndericho jachnënguama yojtsemna. <sup>49</sup>Y chënga, chë béjaye juatsbuacá cha yojtsayama tmojáninÿe ora, tmojanjuabó cha canÿe añemëse yojtsemna ca, y tmojanontšé yoyana; <sup>50</sup>er nÿetscanga chca tmojáninÿe y cochauatjanánënga imojtsemna. Pero Jesús cachora tojanéyana: “iAñemo šmochtsebomna; atše Jesús sëndmëna; ndoñe matauatjëngana ca!” <sup>51</sup>Chorna, chënga imojtsemna barquëshoye cha tojánasëngo, y chë jabuache binÿia tojanéjbane, y nÿetscanga puerte auatjanánënga y ojnanánënga imojtsemna. <sup>52</sup>Chënga

tmojáninÿe chëfta entšanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

**Genesaret ca uabáinoca Jesús ba  
šoquënga tojanashná**  
(Mt 14.34-36)

<sup>53</sup>Chë uafjajónaye tmojánenashbuachengo ora, Genesaret ca uabaina luaroye tmojánashjajna, y chë uafjajónaye tsachoca chë barquëshu tmojanétsbua. <sup>54</sup>Chë barquëshoicana tmojánastjajna y cachora entšanga Jesús tmojantëmbá. <sup>55</sup>Chíyeca, chë luariñe yebnënguenache betscó chënga tmojána, y tmojanontšé chë šoquënga tjuashënguine juyambana, chë ndémoye tmojanuena Jesús yojtsemna luaroye. <sup>56</sup>Y ndayentše cha tojámashëngüentše, pueblënguine, bëtš pueblënguine y base pueblotëmënguine, chë šoquënga benachoye imojtsëbuacana, y Jesús corente imojtseimpadana chë šoquënga chaualesencia, nÿe mo chabe entšayá sibuájua juabojajuana. Y nÿetscanga tmojuábojajënga tšabá imojtsatsmëna.

**Ndáyeca canÿe entšá Bëngbe  
Bëtsabe delante ndoñe tšabia  
nántsemna**  
(Mt 15.1-20)

**7** <sup>1</sup>Chentsana, fariseunga Jesúsbiyoe tmojanobeconá y béseftanga ley abuátambayëngnaca, Jerusalenocana áshjajnënga. <sup>2</sup>Chënga tmojáninÿe bésefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. <sup>3</sup>Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe

bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tsábenga jtsatsmënama ca. <sup>4</sup>Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojanamánayeca, mo chë béjayeca juabáyana tazësënga, matbajënga, calderëshënga y jutsnëshangá. <sup>5</sup>Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo Bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tsábá jtsatsmënama ca?

<sup>6</sup>Chora Jesús tojanéyana: —Nÿe tsábá chë Bëngbe Bëtsabe juabna oyebuambnayá Isaías tsëngaftangbiama tojánayana, bacna entšanga chë ntšamo ndegombre šmojuabnacá ndinÿinÿayënga ca, mëntšá enduabemanentše:

Quem entšanga mondbëtsichamo  
Bëngbe Bëtsá tša tsábia yomna  
ca; chca nÿe uayásaca,  
pero chëngbe ainanentše ndocna  
tsábe juabnéngaca.

<sup>7</sup>Pero chënga nÿe bonamente  
mondbëtsichamo Bëngbe Bëtsá  
tša tsábia yomna ca;  
chënga nÿe entšangbe mandënga  
jtsabuátambayana, y Bëngbe  
Bëtsabe mandënga ndoñe ca  
—cha tojánayana.

<sup>8</sup>Chora Jesús tojanéyana: —Ntšamo Bëngbe Bëtsá tojanmandacá stëtšoye tsëngaftanga šmojtsequedá, nÿe ntšamo entšanga monduamancá jtsamama ca.

<sup>9</sup>Y mëntšánaca tojanéyana:  
“Tsëngaftanga ntšamo Bëngbe Bëtsá

tojanmandacá stëtšoye jtsequédana, nÿe ntšamo tsëngaftangbe anteunga imojanamancá jtsamama. Tsëngaftanga jtsejuabnayana tsábá šmojtsama ca chca šmojtsama ora. <sup>10</sup>Moisés tonjánayana: ‘Acbe bëtsétsata ndoñe stëtšoye catjáquedaye’, y ‘nda chabe bëtsétsatbiama ndoñe tsábá tonjoyebuambá chana, jóbanama jtsemnana ca.’ <sup>11</sup>Pero tsëngaftanga šmondbëtsichamo, canÿe entšá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiama uátšëmbona soyënga ca”). <sup>12</sup>Tsëngaftanga šmondbëtsichamo, nda chca tojayanëse, ya ndoñe obligacónaca ntsemnana chabe taitá o mamabiama ndayánaca jamama ca. <sup>13</sup>Chca, tsëngaftanga šmontsama entšanga Bëngbe Bëtsabe palabra stëtšoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšangbeñe tempscana y mëntsoñama yochnéjuancá. Y ba soyënga tsëngaftanga cachcá šmontsama ca”  
—Jesús tojánayana.

<sup>14</sup>Chora Jesús, cachiñe entšanga tojtanachembo y tojanéyana: “Nÿetscanga šmochjouena y chacmësertá. <sup>15</sup>Ndayá entšá tojtšesacá, ndoñe ntjábemana ndoñe tsábia Bëngbe Bëtsabe delante. Inÿetšá comna: ntšamo entšá tojtsejuabná y tojtsoyebuambnacá endobena jabemana ndoñe tsábia Bëngbe Bëtsabe delante. <sup>16</sup>Chë jouenama tmojtsobenënga, šmochjouena ca”  
—cha tojánayana.

<sup>17</sup>Jesús entšanga tojéftsanabashejuana y yebnoye tojtanamáshëngo ora, chabe



uatsjédayénga tmojantjá ntšamo cha tojánayanama. <sup>18</sup> As cha tojanéyana: “¿Tšéngaftángnaca cabá ndoñe cmontsésertana ca? ¿Cabá ndoñe cmontsésertana, lempe ntšamo entšá tojascá ndoñe ntsoobenana chábioye jabemana ndoñe tšabia Bèngbe Bètsabe delante; <sup>19</sup> er ainanoye ndoñe ntjómashènguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nyetsca sananga tšabá jasama yomna ca y ché saná ndoñe ntjamana canye entšá bacna soye chaotsamama ca. <sup>20</sup> Y mēntšánaca tojánayana: “Ntšamo chē entšá tojtsejuabná y tojtsoyebuambnacá, chē soye cocayé endobena entšá jabemana ndoñe tšabia Bèngbe Bètsabe delante. <sup>21</sup> Er ainanocana jtsóbocnana bacna juabnēnga: shembásaftaca o boyabásaftaca bacna soye jamama, jatbēbama, jóbama, <sup>22</sup> bacna juabnēnga boyá o shémbioye ínŷaftaca jáingñama, jtsatbomnayama, nyetsca bacna soyēnga jamama, ínŷenga jáingñama, nŷe cachá jenomándama ntsoencá jtsiyenama, ínŷabioye jtsántšabošama, ínŷabiama jtsayátsenayama, jtsenábotamnayama y nŷe opēnga jtsobiamnayama. <sup>23</sup> Nyetsca quem bacna soyēnga entšabe ainanocana jóbocnana, y cha jabemana ndoñe tšabia Bèngbe Bètsabe delante ca” —cha tojánayana.

**Canŷe shembása inŷe luarocana  
ashjangoná Jesúsbeñe  
yojtsošbuaché  
(Mt 15.21-28)**

<sup>24</sup> Jesús chentšana, Tiro ca uabaina luaroye tojtsonoñe, y canŷe yebnentše tojánamashēngo. Cha yojtseboše ndocná chama

chaondétsetatšēmbuama; pero ndoñe yonjobenaye iytēmenana jatsmēnana. <sup>25</sup> Y betscó, canŷe shembása, canŷe bembe bacna bayējbe juabna uambayá ibnabomná, Jesusbiamá oyebuambnayana vojouena ora, chábioye tojánabo y chabe shecuatšentše tojanoshēntsamentšé. <sup>26</sup> Chē shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetēmbentšana bacna bayēja chabuátábocnana. <sup>27</sup> Pero Jesús tbojanayana: —Atšē šondmēna natsana judío entšangbiamá chē soyēnga jamana; chentšana cocayé chanjobenaye chca inŷe entšangbiamá jamana. Atšē acbiamá, canŷe ndoñe judiá, soyēnga stjámēse, nántsemna mo chē básengbe saná quešēnga cuaftšēbuajocá ca.

<sup>28</sup> Y cha tbojanjuá: —Arseñor, chca jtsemnana. Pero chē quešēgnaca mondbase chē básenga tmojtšesá ora tmojatquécjanatemēnga. Chcasna, Diosmánda átšnaca šmotsajabuache ca.

<sup>29</sup> As Jesús tbojanayana: —Tšabá tcjayana; chcasna, acbe yebnoye motsatoñe. Chē bacna bayēja acbe bembetēmbentšana tonjésebcna ca.

<sup>30</sup> Chentšana, chē shembása chabe yebnoye tojtaná, y tbojáninŷena chē bembetema jutsnéshentše yojtsojájoiñe, y chē bacna bayēja ya ndoñe chábeñe yontsemna.

**Jesús, canŷe boyabása tšesmá  
y ndēbiábioye tbojanshná**

<sup>31</sup> Tiro pueblentšana Jesús tojtštsanbocna, y Sidón y Decápolis laurentša pueblēnguējana jachnēnguse, Galilea uafjajónayoye tojánashjango.

<sup>32</sup> Cha chentše yojtsemna ora, chábioye tmojanánatse canŷe entšá tšesmá y ndēbiá, y tmojanimpadá chabe

cucuatšënga chë šocábeñe chaojájoma, chaboshnama. <sup>33</sup> Chorna Jesús entšángbentšana luaroye tbojanánatse, cányata. Chora chë šocabe matscuašoye ntšabuafjënga vojajué, cucuatšinë yojabuashëtjo, y chë šocabe bichtaja yojábojajo. <sup>34</sup> Chentšana, Jesús celoye tojanontješé, jabuache vojáshachna, y hebreo palabriñe tbojaniyana: “iEfata ca!” (Chca endayana “iChacmotsauenana ca!”)

<sup>35</sup> Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. <sup>36</sup> Y Jesús chë entšanga tojanamëndá chama ndocnábeñe ntsecuéntayana. Pero masque tša chama yojtsamëndaye, entšanga más chabiana imojtsencuéntaye. <sup>37</sup> Chama chë entšanga puerte imojtsenjanaye, y mëntšá imojtsichamo: “iLempe tšabá entsama! Chë tšëmënga chamouenama, y chë ndëbianga chamóyebuambama entsama ca.”

**Jesús canta uaranga entšanga saná tojanacaredadó**  
(Mt 15.32-39)

**8** <sup>1</sup> Chë tempo, ba entšanga Jesúsbioye cachiñe tmojanobeconá, y jasama tondaye imontsebmoma. As Jesús chabe uatsjëndayënga tojánachembo y tojanéyana: <sup>2</sup> —Quem entšangbiana šontsengmena, er ya unga te átšeftaca montsemna y mora jasama tondaye quemátsbmoma. <sup>3</sup> Cachëngbe yebnoye tondaye ntjascá stichamuase, shëntsama benachëjana nantsabuátëcja; y báseftanga bën luarocana tmojabo ca.

<sup>4</sup> As chabe uatsjëndayënga tmojaniyana: —¿Ntšamo nda nanjobenaye quem luarentše,

ndocna entšá ndoyenentše, chëfta entšangbiana saná jinýenama ca?

<sup>5</sup> Chora cha tojanatjá: —¿Bueta tandëše šmojtsebmoma ca?

Y chënga tmojanjuá: —Canýsëftaše ca.

<sup>6</sup> Chentšana, Jesús tojanamëndá entšanga chamoshëntsjatbiamama. Chorna, chë canýsëfta tandëše tojanca y Bëngbe Bëtsábioye chama tbojtanchuá. Chentšana tojanjatá, chabe uatsjëndayënga tojanëjatá, y chëngna chë entšángbioye. <sup>7</sup> Básefta beonatëmëngnaca imnabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entšanga jujátayama. <sup>8</sup> Njëtscanga tmojanse jtoshachaye njëtšá. Chentšana cabá canýsëfta bëts sbarécua tmojanajutjé chë ojamnëtëmëngaca. <sup>9</sup> Chë tmojansënga imojamna mo canta uaranga njëtšá. Chentšana Jesús chë entšanga tojtanadiošoftá. <sup>10</sup> Chora Jesús barquëshañe tojánenoyaiye chabe uatsjëndayëngaftaca, y tmojtsanoñe Dalmanuta ca uabaina luaroye.

**Chë fariseunga tmojánbošena, Jesús chaoma canýe bëts soye, chabe ndegombre obenana jinýama**  
(Mt 16.1-4; Lc 12.54-56)

<sup>11</sup> Chentšana, fariseunga tmojánabo y tmojanontšé Jesúseftaca enatsëtsnayana. Y jisháchichiyama, imojtseimpadana canýe bëts soye chaoma, as jtsetatšëmbuama Jesusbe obenana Bëngbe Bëtsábioyana ndegombre tainóbocanama. <sup>12</sup> Y Jesús ngmënaca, jabuache yojáshachnëse, mëntšá tojánayana: “¿Ndayeca tšëngaftanga, chë mora oyenënga, šmojtseboše canýe bëts soye chaimama tšëngaftanga atšbe obenana jinýanjíyama ca? Ndegombre cbéyana,

quem entsānga ndocna chca soye quemochátinye ca.”

<sup>13</sup> Chorna chē entsānga cachcá tojesanēnyá, chē barquéhoye yojtamáshēngo, y uafjájónaye chenguana yojtsoñe.

**Jesús tojanabuayená fariseungbe  
buatēmbana soyēngama**

(Mt 16.5-12)

<sup>14</sup> Chē uatsjéndayēnga yojésebnētjomba ndaye soye jasama jesocñama, y chē barquéhoye n̄ye can̄ye tandēse imojtsebomna. <sup>15</sup> Jesús tojanéyana: —Šmochtsantješna; cuedado šmochtsebomna fariseunga y Heródesbe levadurama ca.

<sup>16</sup> Chora chē uatsjéndayēnga tmojanontsé enatsētsnayana: —Chca entsichamo, bēnga tandēse ndoñe tmonjesocñama ca.

<sup>17</sup> Jesús yojtsetátšēmo, chabe uatsjéndayēnga imojtsejuabnaye chana tandēsama yojtsētsēsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyēnga jtsamēse imojyenama. Chcasna, mēntšá tojanéyana: —¿Ndáyeca tandēsama šmojtsoyebuambná? ¿Cabá ndoñe cmontsésertana, ni šmontsetátšēmo? ¿Ainanoca ndoñe šmontseboše chacmésertama?

<sup>18</sup> Bomin̄ye šmondobomna, pero ndoñe quešmátobena jin̄yana; jounama šmondobena, y ndoñe quešmátuenana, y ndayá tijamama ndoñe quešmatsjuabná.

<sup>19</sup> Chē shachna uaranga entsānga shachna tandēšentsāna sēnjanējatá chentšana, ¿bueta sbarécua chē ojamnētémēngaca šmēnjanajutjé ca? —cha tojanatjá.

Y chēnga tmojanjuá: —Bnétsana utácua ca.

<sup>20</sup> —Y chē can̄yēsēfta tandēšentsāna canta uaranga entsānga sēnjanējatá

chentšana, ¿bueta bēts sbarécua chē ojamnētémēngaca šmēnjanajutjé ca?

Y chēnga tmojanjuá: —Can̄yēsēftácua ca.

<sup>21</sup> As Jesús tojanéyana: —¿Y cabá ndoñe cmontsésertana ca?

**Jesús can̄ye jtanábioye  
tbojanshná, Betsaida puebloca**

<sup>22</sup> Chentšana tmojánashjajna Betsaida puebloca; y chora, entsānga can̄ye boyabása jtaná Jesúsbioye tmojanánatse, y tmojanimpadá cha jabojuana chabotseshnama. <sup>23</sup> As, chē jtanábioye tbojanábuacueshache, y chē pueblo chaboye tbojanánatse. Chorna, yebuáyeca ibojabuchanētjo, y chábeñe cucuatšēnga yojajájua, y tbojantjá nderado ndayá jin̄yama tayojsanobena ca. <sup>24</sup> As chē jtaná yojontješiyē y tojánayana: —Boyabásenga sēntsén̄ya; mo betiyēngcá montsemna, pero montsobonjná ca.

<sup>25</sup> Chora Jesús, chē jtanabe fšnēbeñe cachiñe cucuatšēnga yojajájua. Y chē boyabása yojtsobena lempe tsábá jin̄yama; ya shnaná yojtoquéda. Y yojtsobena n̄yetsca soyēnga botamana jin̄yana. <sup>26</sup> Chentšana, Jesús cachabe yebnoye tbojtanichmó y mēntšá tbojaniyana: —Chē puebloye ndoñe catjéftsamashēngo ca.

**Pedro tojánayana, Jesús chē Cristo  
bétsemnama**

(Mt 16.13-20; Lc 9.18-21)

<sup>27</sup> Chentšana, Jesús tojánbocna chabe uatsjéndayēngaftaca Cesarea de Filipo luaroca pueblēngoye, y benachiñe chabe uatsjéndayēnga tojanatjá: —¿Nda atše bétsemnama ca entsānga imojtsichamo ca?

<sup>28</sup> Y chēnga tmojaniyana: —In̄yēnga montsichamo Juan chē Ubayaná ca, ín̄yēngna Elías ca, y ín̄yēngna, can̄ye

Bëngbe Bëtsabe juabna oyebuambnayá ca.

<sup>29</sup>As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

<sup>30</sup>Chentšana Jesús corente chënga tojanamëndá, chë nda cha yojamnama ndocnábeñe ntsecuéntayana.

**Jesús tojánayana cha ibojamna  
jóbanana y jtsayenana ca**  
(Mt 16.21-28; Lc 9.22-27)

<sup>31</sup>Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entšá tbojanbemá, ibojamna puerte jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. <sup>32</sup>Nyetscanga catafjosertaycá chama yojsóyebuambnaye. As Pedro, Jesúsbiyoe luaroye tbojanánatse, y tojanontsé jtsáuyanana. <sup>33</sup>Pero Jesús vojobuértana, chabe uatsjéndayënga tojanënyanyé, y Pédrëbiyoe mëntšá tbojtsanbochembo: “iSatanás, átšbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nye entšángbentšana ca.”

<sup>34</sup>Chentšana, Jesús chabe uatsjéndayënga y chë inye entšanga tojánachembo chamouenama, y tojanéyana: “Nda atšbe uatsjendayá jtsemnana tojtseboše, cháuyana nye Bëngbe Bëtsá yobena siempre chabe vidíne jtsemándayana ca, chabe quem luarentša soyënga cachcá chauesonýá atše juastama, y atšbiama

jasúfriama chaotseprontana y cruciñe jobanámna. <sup>35</sup>Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nyetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiama abuátambaye causa, masque chaóbona, chë nyetsca tescama yomna tšabe vida echántsebomna. <sup>36</sup>¿Ndayama entšá buanjósërvia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? <sup>37</sup>Er canye entšá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnama.

<sup>38</sup>Chcasna, nda mora atšbiama y atšbe buayenana soyëngama tojtsëuatja entšángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entšá tbojanbemánaca chabiama echantsëuatja, chabe Taitabe bëts obenánaca y chabe angelëngaftaca chaojésabo ora ca” —cha tojanéyana.

**9** <sup>1</sup>Mëntšánaca Jesús tojanéyana: “Ndegombre cbéyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinýcá ca.”

**Jesús inyetsá tojanobinýna**  
(Mt 17.1-13; Lc 9.28-36)

<sup>2</sup>Chentšana chnénguana tianoye, Jesús tojëftsanëbiatše Pedro, Santiago y Juan, y inýoye tojanënatse nye chënga, canye bëts tjoye. Y chëngbe delante Jesús inyetsá tojanobinýná; <sup>3</sup>chabe uichëtjonëjuangá tša

yojtsabuashinÿinÿana; corente uafjantséjuangá yojtsamna; nÿa chca juafjantsama ndocná quem luarentse quentatobenaye. <sup>4</sup> Chca orna, chë uatsjéndayënga tmojáninÿe, Moisés y Elías tbojanobinÿná Jesúseftaca encuéntaye.

<sup>5</sup> Chora Pedro, Jesúsbioye tbojanianyana: “¡Buatëmbayá, tša tšabá bëngbiana cuanmëna muentše jtsemnana ca! Mora fchanjapórma unga tambotëmënga: cánÿetema acbiana, ínÿetema Moisesbiana y ínÿetema Elíasbiana ca.”

<sup>6</sup> Chca tojánayana, chë uatsjéndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana.

<sup>7</sup> Chora canÿe jantšeteshe yojóbema, y chëngbioye yojáutsbotse; y chë jantšetëshoicana canÿe oyebuambnayana tojanóbocna, mëntšá: “Mua atšbe bonshana Uaquiñá endmëna; cha šmochtseyeyana ca.”

<sup>8</sup> Y ndeolpe, chëngbe shéconana tmojanrrepará ora, ya ndocná más tmojáninÿe; nÿe Jesús canÿa chéngaftaca yojtsemna.

<sup>9</sup> Chë tjocana imojtsatstsmaye ora, Jesús chë uatsjéndayënga tojanamëndá: —Bëngbe Bëtsá Entšá tbojanbemá obanënguentsana candétayenëntscuana, chë mënté tjoca šmonjinÿe soyama ndocnábeñe šmattsecuéntaye ca.

<sup>10</sup> Chë uatsjéndayënga aínë chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora. <sup>11</sup> Y Jesúsbioye imojtsetjanaye: —¿Ndáyeca chë ley abuátambayënga mondétsichamo, cuanmëna Bëngbe Bëtsabe Uámana Uabuayanabe natsana Elías jabana ca?

<sup>12</sup> As cha tojanéjua: —Ndegombre, canÿa Eliascá natsana echanjabo, y

ntšamo jtsemnana yomncá lempe echánjabatsma. Pero ntšamo Bëngbe Bëtsabe uabemana palabrenguine endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyënja ca. <sup>13</sup> Ndegombre cbéyana, canÿa Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrenguine endayancá.

**Jesús, canÿe basa bayëjbe juabna uambayábioye tbojanshná**  
(Mt 17.14-21; Lc 9.37-43)

<sup>14</sup> Chentšana, chënga tmojtjaná chë inÿe uatsjéndayëngbioye. Chora, Jesús tojáninÿe ba entšanga chë uatsjéndayëngbe shéconana imojtsemnana, y básefta ley abuátambayëngna chéngaftaca imojtsenatsëtsnaye. <sup>15</sup> Nÿetsca entšanga cha tmojáninÿe ora, imojenjaná y tmojanójtjajo cha jachuayama. <sup>16</sup> Chora Jesús chënga tojanatjá: —¿Ndayama chéngaftaca šmenatsëtsná ca?

<sup>17</sup> Y canÿa entsanguentsá tbojanjúa: —Buatëmbayá, muentše ácbioye sënjuánatse atšbe uaqiñá; bacna bayëjbe juabna entsambá, y chë causa, jóyebuambayama ndoñe quenátobena. <sup>18</sup> Nÿe ndayéntšnaca cha tojtsemnentše, chë bayëja chábioye jishachana y jtsenajuáchesënjana; chentše uayoicana shashiye jtsabocanana, jtsenoftéšfjojnayana y obanacá jtsatsjájonana. Acbe uatsjéndayënga sënjaimpadá chë bacna bayëja chamuatábocnana, pero ndoñe chematobená ca —cha tbojanayana.

<sup>19</sup> As Jesús tojánayana: —iNÿetšá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado

tšengaftangaftaca chjéftsemna? iMoye chë básetema mánatse ca!

<sup>20</sup> Chora chë básetema chábioye tmojanánatse; y chë bayëja Jesúsbioye tbojáninÿe ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana. <sup>21</sup> As Jesús chë básabe taitábioye tbojantjá:

—¿Buetayté chca yojtsepása ca?

Y cha tbojanjúá: —Básetema orscana chca; <sup>22</sup> ba soye, chë bayëja chábioye iñoie jtsatmetsána y buyeshoye jtashbuetšana, jtsóbama. Chýyeca, nderado ndayá chabiamma jamama tcojtsobenëse, bënga šmotsalastemá y šmotséjabuache ca.

<sup>23</sup> Chora Jesús tbojanianya: —¿Ndáyeca “ndayá jamama tcojtsobenëse ca” šcjayana? Nda Bëngbe Bëtsábeñe tojtsošbuáchebiamma lempe endopodena ca.

<sup>24</sup> Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, imás jtošbuáchiyama šmajabuache ca!

<sup>25</sup> Y bëtscá entsánga imojtsótotoma Jesús tojáninÿe ora, chë bacna bayëja tbojtsanbochembo mëntšá: —iBacna bayëja, chë básetema tësmá y ndëbiá biamnayá; chábentšana maisebocna y ndocna te más chábeñe catjésamashëngo ca!

<sup>26</sup> Y chë bayëja chábentšana yojésebocna, yojtseyoye y chë básabioye jabuache ibojeseshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. <sup>27</sup> Pero Jesús tbojanábuacueshache y tbojtanatsbaná; y chë básana yojtëtsaye.

<sup>28</sup> Chentšana, Jesús canÿe yebnoye tojánamashëngo, y chabe uatsjéndayëngna luaroca cha

tmojantjá: —¿Ndáyeca bënga ndoñe fsënjobená chë bayëja jtabocnana ca?

<sup>29</sup> Y Jesús tojanéjua: —Chca bayëjënga jtëbuacanamna jobenayana nÿe Bëngbe Bëtsáftaca jencuéntase, chabuájabuachama jaimpádase ca.

**Jesús cachiñe tojánayana cha ibojamna jóbanana y jtayenana ca**  
(Mt 17.22-23; Lc 9.43-45)

<sup>30</sup> Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama, <sup>31</sup> er cha chabe uatsjéndayënga yojtsabuátambaye. Mëntšá cachabiamma yojanëtsëtsnaye: “Bëngbe Bëtsá Entšá tbojanbemá entsangbe cucuatšinë mochanjáboshjona; mochanjóba, pero chentšana unga tianoye echántayena ca.”

<sup>32</sup> Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

**¿Nda chë más uamaná yomna?**  
(Mt 18.1-5; Lc 9.46-48)

<sup>33</sup> Chora Capernaum puebloye chënga tmojánashajna; y cach yebnentše imojtsemna ora, Jesús chë uatsjéndayënga tojanatjá: “¿Ndayama benachiñe šmabáyenatsëtsnaye ca?” <sup>34</sup> Chëngna nÿe iytëca tmojanobiama, er benachëjana chënga imnayénatsëtsnaye, chënguentšá nda chë más uamaná bëtsemnama.

<sup>35</sup> As Jesús tojanótbema, chabe bnëtsana uta uatsjéndayënga tojánachembo y tojanéyana: “Ndánaca nÿetscangbiamma chë más uamaná jtsemnama tojtsebošëse, cha chë más nduamaná chaóbema y nÿetscanga chaotsaserverna ca.” <sup>36</sup> Chora Jesús canÿe básetema tbojánishache,

chëngbe tsëntsaca tbojanatsá, tbojantbá y chënga tojanéyana: <sup>37</sup>“Ndánaca, átsbeñe ošbuachiyá bétsemnayeca, tbojofja canya mo quem basetemcá, chana atše jofjana; y nda atše šojofja, chora cha nje atše ndoñe ntjofjana, sinó chë šojichmó chábioynaca jofjana ca.”

**Nda ndoñe bëngbe contra tontsemná, béngaftaca jtsemnana**  
(Mt 10.42; Lc 9.49-50)

<sup>38</sup> Juan, Jesúsbioye tbojaníyana: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entšangbentsana endëtëbuacana; pero cha béngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjúá: —Ndoñe šmatjuauyaná; er ndocná quenátobena canye bëtš soye jamana Bëngbe Bëtšabe obenánaca, atše jótšëmbonëse, y chentšana atšbe contra jatóyebuambnayana. <sup>40</sup> Ndegombre, nda ndoñe bëngbe contra tontsemná, béngaftaca jtsemnana. <sup>41</sup> Y ndánaca, masque nje býyshtema tšëngaftanga tcmojubuatšatá, tšëngaftanga átsbenga bétsemnayeca, chábioye Bëngbe Bëtšá canye uacanana soye bochántatšetaye, cha chë tšabe soye tojamama ca.

**Resjo yomna, nderado bacna soyënga cuanjama**  
(Mt 18.6-9; Lc 17.1-2)

<sup>42</sup> Chentšana Jesús tojánayana: “Canya átsbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabíama nántsemna canye bëtš nantsnëbé chamotsetamosëntšbua y mar béjayoye asentoye chamotsashbuetše chabotsenatjëmbama. <sup>43</sup> Nderado

acbe cucuatšëca bacna soye tcojama, más tšabá nántsemna chë cucuatšë chacotsenacuéstjango. Acbíama más tšabá endmëna celoye jamashënguana nyetsca tescama vida jtsebomnama, nje canye cucuatšë bomná, y ndoñe nyets útatšëca infiernoye chacmotocá jama, chë ndocna te yochanjáfsana íñeshoye; <sup>44</sup> choca útšëngä puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>45</sup> “Nderado acbe shecuatšëca bacna soye tcojama, acbíama más tšabá nántsemna chë shecuatšë chacotsenashecuástjango. Acbíama más tšabá endmëna cosheto celoye jamashënguana nyetsca tescama vida jtsebomnama, y ndoñe nyets útatšëca infiernoye chacmotsëtšëna; <sup>46</sup> choca útšëngä puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>47</sup> “Nderado acbe bomínýeca bacna soye tcojinýe y cachca soye tcojama, más tšabá nántsemna chë bomínýe chacotsenobuchjátsëca. Acbíama más tšabá endmëna Bëngbe Bëtšabe amëndayoye jamashënguana nje canye bomínýe bomná, y ndoñe nyets útabeca infiernoye chacmotsëtšëna; <sup>48</sup> choca útšëngä puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>49</sup> “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtšá echanjama nyetsca tšëngaftangbíama tšábenga chašmotsemnana, chë átsbeñe betsošbuáchema šmojtsepapadecena

ora šmojuantase. <sup>50</sup>Tamó tšabe soye endmëna. Pero chë tamó ftënana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiana šmochtsemna, chëngbeñe jtsiyenëse ntšamo Bëngbe Bëtsá yobošcá, y nyetscángaftaca natjëmbana šmochtsiyena ca” —cha tojánayana.

**Ndayá Jesús tojanabuatambá  
bouamnënga tmojtšenétsenama**  
(Mt 19.1-12; Lc 16.18)

**10** <sup>1</sup>Chentšana, Jesús chë luarentšana tojéftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá. <sup>2</sup>Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shëmbioye cachcá jesonýayama ca?

<sup>3</sup>Chora cha tojanéjua: —¿Ntšamo Moisés chë soyëngama tcmënjanamëndaye ca?

<sup>4</sup>Y chënga tmojánayana: —Moisés tojanalesenciá chë boyá chabe shëmbioye chabuiyé canye tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonýá ca.

<sup>5</sup>Chora Jesús tojanéyana: —Tšëngaftanga Bëngbe Bëtsabe mandënga ainaniñe jóyëngacñama ndoñe quešmátšboše causa, Moisés chca tšëngaftanga tmojéftsanamëndá. <sup>6</sup>Pero quem luare jobojátšama orna, “Bëngbe Bëtsá canye boyabása y canye shembása tonjánabiana. <sup>7</sup>Chíyeca, chë boyabása chabe taitá y chabe

mamá echanjébasashejuana, chabe shëmaftaca jenútanama, <sup>8</sup>y chë útata mo canýacá bochántsemna.” Y chca, ya ndoñe útata quebochátsmëna, sinó nýe mo canýacá. <sup>9</sup>Chcasna, entšá ndoñe chaondëndbema ndayá Bëngbe Bëtsá mo canýiñcá tojéftsema soye ca —cha tojánayana.

<sup>10</sup>Ya cach yebnoca imojtsatsmëna ora, chabe uatsjëndayënga cach soyama imojtëstjaye. <sup>11</sup>Y Jesús tojanéyana: “Nda chabe shëmbioye cachcá tbojesonýá y ínÿaftaca tojtóbouamase, cha chë natsana shëmbioye inýe shembásaftaca jtseíngñayana; chana canye uabuamá jtsebomnana. <sup>12</sup>Y chë shema chabe boyábioye cachcá tbojesonýá, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canye uabuamá jtsebomnana ca” —Jesús tojánayana.

**Jesús, basetëmëngbiana Bëngbe  
Bëtsábioye tbojanimpadá**  
(Mt 19.13-15; Lc 18.15-17)

<sup>13</sup>Entšanga, basetëmënga Jesúsbioye tmojanënatse, chauabájajuama y Bëngbe Bëtsábioye chëngbiana chaboimpadama; pero chabe uatsjëndayëngna tmojanontšë chë basetëmënga unachayënga jtsëcácanana. <sup>14</sup>Jesús chca tojáninýe ora, tbojánetna y chë uatsjëndayënga tojanéyana: “Cachcá mónýaye chë basetëmënga átšbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetëmëngcá imomnëngbiana. <sup>15</sup>Ndegombre cbëyana, nda Bëngbe Bëtsabe soyënga ndoñe tonjyëngacñe mo canye basetëmá jtošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”



<sup>16</sup>Y chë basetémenga tojanchebá, y chéngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chéngbeñe chaotsemnana.

**Canÿe bomna entšá Jesúsbioye tojána**

(Mt 19.16-30; Lc 18.18-30)

<sup>17</sup>Jesús jama tojtëtanontšë ora, canÿe boyabása chábioye tojanótjajo, chabe shecuatšentšë tojanoshëntsamentšë, y mëntšá tbojantjá: —Tšabe Buatëmbayá, éndayá šojtsemna jamana chë nyetsca tescama yomna tšabe vida jtsebomnana ca?

<sup>18</sup>Y Jesús tbojanjuá: —éNdáyeca “tšabia ca” šcjayana? Tšabia nÿe canÿa endmëna: Bëngbe Bëtsá.

<sup>19</sup>Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínÿena, ínÿengbioye ndoñe catjáingñaye ndayánaca jabacama, y acbe bëtsétsata ndoñe stëtsoye catjáquedaye ca.”

<sup>20</sup>Chora chë boyabása tbojanjuá: —Buatëmbayá, atšë lempe chë mandënga básetema orscana sëndocumplina ca.

<sup>21</sup>Jesús bonshanánaca tbojanonÿinÿé y mëntšá tbojanianaya: —Canÿe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomñëjémënga cochtsatšataye; chca, celoca canÿe bëts bomnana cochántsebmoma. Chentšana, cochjabo y šcochjuasto ca.

<sup>22</sup>Pero chë bobóntsbioye ínÿetšá ibojtsínÿnana Jesús chca tbojanianama; y puerte ngmënaca yojtá, cha puerte bomná inamna causa.

<sup>23</sup>Chora Jesús cátoye tojanrrepará y chabe uatsjédayënga tojanéyana:

—iPuerte totcá entsemna bomnëngbiama Bëngbe Bëtsabe améndayoye jamashënguama ca!

<sup>24</sup>Chca imojouena ora, chë uatsjédayënga ojnánánënga imojtsemna, pero Jesús cachiñe tojanoyebuambá y mëntšá tojanéyana: —Atšbe básenga; ipuerte totcá entsemna Bëngbe Bëtsabe améndayoye jamashënguama!

<sup>25</sup>Ndegombre, más paselo endmëna chë coshufjentša atëfñëjana canÿe camello chauachnëngo, y ndoñe canÿe bomná Bëngbe Bëtsabe améndayoye jamashënguana ca.

<sup>26</sup>Pero chë uatsjédayënga nÿe más imojtsenjnanaye y imojtsentjanaye: —éAs, nda yochjobenaye atsbočaná jtsemnana ca?

<sup>27</sup>Chora Jesús tojanënyanjé y tojanéyana: —Entšanga ndoñe quemátobena jamana canÿa atsbočaná chaotsemnana, pero Bëngbe Bëtsá añe; er Bëngbe Bëtsá lempe jamama endobena ca.

<sup>28</sup>Chora Pedro tbojanianaya: —Aca contsonÿá, bënga lempe chë fsëndbomna soyënga fsënjéshoshjona y ácaftaca fsëntsajna ca.

<sup>29</sup>As Jesús tojánayana: —Ndegombre cbéyana, ndánaca átšbioye jaserviama y chë tšabe noticiënga jábuayenama, tojëshoshjona chabe yebna, catšátanga o uabénanga, bebmá o befta, o básenga, o fshantsënga, <sup>30</sup>cha mora quem luarentšë echanjójyëngacñe chama patse soye más yebnënga, catšátanga, uabénanga, bebmanga, básenga y fshantsënga, masque puerte chaosufrima ínÿenga mochántsama; y chë ínÿe luarocna, chë nyetsca tescama yomna tšabe vida echanjónÿena. <sup>31</sup>Pero banga, mora uámanënga imomnënga, nduámanënga mochántsemna; y banga,

mora nduámanënga imomnëngna, uámanënga mochántsemna ca —Jesús tojánayana.

**Jesús cachiñe tojánayana cha jóbanama y jtayenama**  
(Mt 20.17-19; Lc 18.31-34)

<sup>32</sup> Chentšana Jerusalenoye imojtsaye, y Jesús yojtsebnsana. Chë uatsjédayënga puerte ojnánanënga imojtsemna, Jesús ndauatjá choye yojtsayama; y inye becá entsanga ústonoye imojtsajnënga, imojtsayúatja. Jesús cachiñe chabe bnétsana uta uatsjédayënga barie tojánachembo y tojanontsé jáuyanana ntšamo cháftaca jopásama yojtsemnana. <sup>33</sup> Mëntšá tojanéyana: “Tšëngaftanga šmontsonyá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe améndayënga y ley abuátambayëngbe cucuatšinë mochanjáboshjona, y chënga mochanjayana cha chaóbana ca; y ndoñe judiëngbe cucuatšinë mochanjáboshjona. <sup>34</sup> Chënga mochantsáboyejuana, mochántsebuashëtotojo, mochántsetjanja y mochanjóba, pero chentšana unga tianoye cha echántayena ca.”

**Santiago y Juan, Jesús tmojanimpadá canye pavor cháubiamama**  
(Mt 20.20-28)

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobconá y tmojanayana: —Buatëmbayá, bëndata fsëntseboše pavor cháscuabiamama ntšamo chacbojaimpadacá ca.

<sup>36</sup> Y Jesús tojanatjá: —¿Ndayá šojtseboše atše tsëndatbiamama chjamama ca?

<sup>37</sup> Y chata tbojanayana: —Aca reyca chacojtsemánda ora, cochjaleséncia bëndata fchayobená jótbemana, canya acbe catsbioica y inya acbe uañicuayoica ca.

<sup>38</sup> As Jesús tojanéjua: —Ntšamo šmontsotjanañama tsëndata ndoñe quešnátstatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entsanga puerte bacá chacmojtsebuatsená ora, tašochjauánta, ntšamo atše chjauantacá ca?

<sup>39</sup> Y chata tbojanayana: —Aíñe fchanjobenaye ca.

Y Jesús tojanéyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfria. <sup>40</sup> Pero atše ndoñe quetsátobena jamándana nda atšbe catsbioica y atšbe uañicuayoica chaótbemama. Chë útentše entsemna ndëmuanyëngbiama atšbe Taitá tojaprontacá ca.

<sup>41</sup> Chë inye bnétsana uatsjédayënga chca tmojanuena ora, tmojanontsé Santiago y Juánoftaca jotjáyana.

<sup>42</sup> Pero Jesús nyetsca uatsjédayënga tojánachembo y tojanéyana:

“Tšëngaftanga šmondétatšëmbo, quem luarentša améndayënga lempe jtsemándayana, nya mo nduiñënga cuaftsemncá; y chë bëtsetsa entsanga chëngbe obenánaca jtsemándayana, ntšámnaca jtsamëse, chë inye entsanga sempre chamotsayaunanama.

<sup>43</sup> Pero tšëngaftangbeñe ndoñe chca chaondëtsemna. Inyëtšá; masna, nda tšëngaftangbeñe chë más uamaná jtsemnana tojtseboše, cha bontsemna chë ínýenga jtsaservénana; <sup>44</sup> y ndánaca tšëngaftanguentšá chë más uamaná jtsemnana tojtsebošá, bontsemna jtsemnana nyetscangbiama, mo nye ínýabiama nyets tempo

oservenacá. <sup>45</sup> Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínyenga jabáserviama. Y mo nda, ínyenga játsebacama cuafjopagacá, cha echanjóbana ba entsंगा atsebácanénga chamotsemnama ca” —cha tojánayana.

**Jesús canye jtanábioye tbojanshá**  
(Mt 20.29-34; Lc 18.35-43)

<sup>46</sup> Chentsána, Jesús y chabe uatsjédayénga Jericó uabaina puebloye tmojánashajna. Y Jesús chabe uatsjédayéngaftaca y bëtscá entsángaftaca Jericó pueblentsána yojttsaisebocana ora, Timeobe uaquiñá, Bartimeo ca uabainá, canye jtaná lemošna otjanañá, benache juachañe yojtsetbemana. <sup>47</sup> Y Jesús Nazaretocá chējana yojttsachñejuanama cha yojátatsēmbona ora, tojanontsé mēntšá uayebuáchana: —iJesús, Davídbentsána Entšá, šmotselastemá ca!

<sup>48</sup> Chorna, banga chē jtaná imojtsácacana iytēca chaóbmama. Pero cha más yojttsáyebuache: —iDavídbentsána Entšá, šmotselastemá ca!

<sup>49</sup> Chora Jesús tojantsá y chē ínyenga tojanéyana: —Chē jtaná mochembo ca.

As chē jtaná tmojanchembo, y mēntšá tmojaniana: —iAñemo cochtsebmoma; motsbaná! Jesús cmontsechembuana ca.

<sup>50</sup> Y chē jtaná, quefsaiya jtsenátsejqüese, yojonsēnja y betscó Jesúsbioye yojobeconá. <sup>51</sup> Chora, Jesús chē jtanábioye tbojantjá: —¿Ndayá cojtseboše atše acbiama chjamama ca?

Y chē jtaná tbojanjuá: —iBuatēmbayá, šmoleseñcía atše chašuatábínynama ca!

<sup>52</sup> As Jesús tbojaniana: —Motsatoñe. Tšabá jtsatsmēnama Bëngbe Bëtsábeñe icošbuachéyeca, tšabá contsatsmēna ca.

Y cachora cha tšabá ibojtabinyna, y Jesúsbioye benachējana ibojtséstona.

**Jesús Jerusalenoye tojánashjango**  
(Mt 21.1-11; Lc 19.28-40; Jn 12.12-19)

**11** <sup>1</sup> Ya Jerusalenoye imojtsebeconá ora, Betfagē y Betania pueblēnga béconana, Olivos ca uabaina tjashe juachañe, Jesús uta chabe uatsjédayata tojanichamó, <sup>2</sup> y mēntšá tojanéyana: “Tšēndatbe natsana entsemna base pueblotémoye motsata. Chašojáshjango y cachora šochanjínynena canye burrotema utsbuaná; chábeñe cabá ndocná tonjenojayé. Šochjuafjoná y šochjuánatse. <sup>3</sup> Nderado nda, ¿ndáyeca šmojttsanachá ca? chacmojtjtjase, šochjojuá: ‘Bëngbe Utabná bontsájaboto y chora bochantabáiseboshjona ca.’ ”

<sup>4</sup> As chata tbojáná, y tbojáninynena chē burrotema tsáshenañe, canye bēšásañe utsbuaná, y imojuafjoná.

<sup>5</sup> Y básefta entsंगा chiñe imojtsemnēnga, chátbioye tmojanéyana: “¿Ndayá šojtsama? ¿Ndáyeca chē burrotema šojtsajafjná ca?”

<sup>6</sup> As chata tbojanjuá ntšamo Jesús tojanéyancá; y chē entsंगा tmojanalesenciá chē burrotema chamuánatsama. <sup>7</sup> Chentsána, chē burrotema Jesúsbioye tmojanánatse; chē burrotēmbēñe chatbe entsáyá tbojanátatse, y Jesús chábeñe tojanenojayé. <sup>8</sup> Bëtscá entsंगा chēngbe entsáyá chē benachējana imojtsanētētsatsana, y ínyengna chē jajoca imojuatētsetše buacuashangá chiñe imojuacjaye. <sup>9</sup> Y chē natsana imojtsajnēnga y chē ústonoyēnga mēntšá imojtsaiuíyebuache: “iBëngbe Bëtsá matschuanga! iCorente bendición bomná, chē Bëngbe Utabnabe

obenánaca tojabá! <sup>10</sup> iTša tšabá chë echanjóshjango amëndayana, bëngbe bëts taitá David yojëftsemánda orcá! iBëngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shéconana lempe yojëftserrepárase, y ya yojtseibétatana causa, chabe bnétsana uta uatsjéndayëngaftaca tojëftsanbocna, Betania puebloye.

**Jesús tojánayana canye betiye ndoñe más chaondëshájona ca**  
(Mt 21.18-19)

<sup>12</sup> Yëfsana, Betaniocana Jerusalenoye chënga imojtésajna ora, Jesús tbojánishëntsena. <sup>13</sup> Bënocana canye higo betiye yojinÿe; as tojána jontjësiyama tainashajo o ndoñe. Pero nÿe tsbuanáchënga chiñe yojinÿena, chora ndoñe shajo tempo bësemna causa. <sup>14</sup> As Jesús chë higo betiyoye tojánayana: “iNdocna te más chacondëshájona entsanga chamosama ca!”

Y chabe uatsjéndayënga imojouena ntšamo cha tojanayancá.

**Jesús, Bëngbe Bëtsabe bëts yebnentšana enënga y obuámnayënga tojtanëbuacna**  
(Mt 21.12-17; Lc 19.45-48; Jn 2.13-22)

<sup>15</sup> Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámnañënga. Chéntšnaca imojtsemna entsanga canye crocénana enënga, y chë crocénana nÿe Bëngbe Bëtsabe bëts yebnentšana inoservena. Chë entsanga crocénana atrocayëngbe mesëshangá tojtsanenásatajchquëca, y chë palomatémënga enëngbe

tšenëshëngnaca; <sup>16</sup> y ndoñe tonjanalesenciá ndocná Bëngbe Bëtsabe bëts yebnejana chë soyënga chaotsëchnëjuanama. <sup>17</sup> Y tojanontsé entsanga mëntšá jabuátambana: “Ndegombre, Bëngbe Bëtsabe uabemana palabrënguiñe cha mëntšá tojánayana: ‘Atšbe bëts yebna echantsabaina nÿetsca luarentša entsangbiana átšëftaca encuëntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanéyana.

<sup>18</sup> Chë bachnangbe más uámana amëndayënga y chë ley abuátambayënga tmojátantšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nÿetsca entsanga imojtsenjnanaye ntšamo cha yojanabuátambama. <sup>19</sup> Pero yojtseibétatana ora, Jesús chabe uatsjéndayëngaftaca chë bëts pueblentšana yojesóbocñe.

**Chë higo betiye tojtsanbuashá**  
(Mt 21.20-22)

<sup>20</sup> Yëfsana cachëse, cachëjana imojtésachnëjuana ora, tmojáninÿe chë higo betiye parejo tbëtëjéngaca yojtsebuashá. <sup>21</sup> Chora Pedro yojenójuaboye ntšamo yojopásama; as Jesúsbiyoye tbojanianyana: —iBuatëmbayá, minÿe; chë tconjayana ndocna te más tšabe betiye chaotsemnama betiye tojtsebuashá ca!

<sup>22</sup> Y Jesús tbojanianyana: —Bëngbe Bëtsabeñe šmochtsosbuáchiye. <sup>23</sup> Ndegombre chëyana, nderado nda quem tjoye tojayana, “ichentšana mojuaná y bëts uafjajónayoye motsëshbuetše ca!” y chca tojayana ainaniñe inÿetšá juabna ntjatsbomncá, y ainaniñe puerte

tojtsošbuaché ntšamo tojayancá aíñe yochjochñenguama, ndegombre chca echanjochñengo. <sup>24</sup> Chíyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebomna. <sup>25</sup> Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiama tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endméná, tšëngaftangbe bacna soyëngama chacmotsaperdonama. <sup>26</sup> Pero inya ndoñe šmonjaperdonasna, Bëngbe Taitá, celoca endméná, cach ndoñe tšëngaftanga quecmochátaperdonaye ca —cha tojánayana.

#### Jesusbe obenana

(Mt 21.23-27; Lc 20.1-8)

<sup>27</sup> Chca tojanopasá chentsána, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntsucana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, <sup>28</sup> y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšeta ca?

<sup>29</sup> As Jesús tojanéyana: —Atšnaca séntsebomna canye soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. <sup>30</sup> ¿Nda Juan chë Ubayaná tojanichmó entšanga jubáyama, Bëngbe Bëtsá o entšanga? Šmëyana ca.

<sup>31</sup> Chora chënga tmojanontšë mëntšá enatsëtsnayana: “ ‘Bëngbe

Bëtsá ca’ chamojojuase, cha šochanjáuyana: ‘As ñndáyeca chë cha tmojanabuayená soyënguiñe ndoñe šmonjanošbuaché ca?’ <sup>32</sup> Pero ndoñe quemuátobena jayanana ‘entsanga ca.’” Chca tmojánayana, er chënga entsangbiama imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnama. <sup>33</sup> Chcasna, chënga tmojanjúá: —Bënga ndoñe queftsátstatšëmbo ca.

Y Jesús tojanéyana: —As atše cach ndoñe quebochatéyana ndaye deréchoca atše chca stsama ca.

#### Chë puerte bacna trabájayëngbiama cuento

(Mt 21.33-46; Lc 20.9-19)

**12** <sup>1</sup> Chora Jesús tojanontšë cuentëngaca jabuátambana. Mëntšá tojanéyana: “Canye entšá bëtscá uvas betiyënga yojáje, y chë shëconana yojajétja. Chë uvasëšangá juantšëtetjamna canye base luare yojajutjo; y canye tsbanana jebna soye yojapórma chiñe jtsashanyama. Chentšana, inye trabájayënga chë jajañe yojýventšame, y chana inye luaroye yojtsoñe. <sup>2</sup> Chë uvasëšangá juashacama tempo yojobuache orna, chë jajañe nduiño canye oservená ibojíchmuá chë arrëndayënga jáuyanama ntsachetsá chë nduiño ibojtsotocánama. <sup>3</sup> Pero chëngna, cha imojishache, imojtsejantšetaye, y tondaye ntajatacá imojtichmuá. <sup>4</sup> Chentšana, chë nduiño inye oservená ibojíchmuá; pero chana, bestšaše imojtselisia y podesca imojtsóyenguango. <sup>5</sup> Chentšana inya ibojatichmuá, y chana chë arrëndayënga imojtsóba. Y bángnaca yojichamuá; pero chëngna, inyëngna imojtsajantšetaye y inyëngna imojtsëbaye.

6 “Chë nduiño cabá canya ibojtsábojamna jichmuama: cachabe bonshana uaquiniá. Cabana, cha ibojíhmua y mëntšá yojtsejuabnaye: ‘Atšbe uaquiniá cocayé mochanjóyeunaye ca.’ 7 Pero chë arréndayënga cha imojinjë ora, imojenyana: ‘Mua chë fshantse nduiñbe uaquiniá entsemna. Lempé chabe soyënga mua echanjóyëngacñe. Cuajna, motsóbanga, y lempé chabe otocana soyënga bëngbiama echanjoquéda ca.’ 8 Chcasna, cha imojishache, imojtsóba y chë uvas betiyënga jajañentsana más chcoye imojetsëtsëna ca” —Jesús tojancuentá.

9 Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

10 “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga  
tmojtsanaboté ndëtsbé,  
mora chë más bëts  
uashacuanëšentše entsejájona.

11 Chë soye Bëngbe Utabná, Bëngbe Bëtsá chca tojama, y bënga chama ojnanánënga fsëntsemna ca.”

12 Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinyanjyama chënga mo chë puerte bacna trabájayëngcá imojanmënama. Pero entsångbiama imojtsauatja, chíyeca cachcá tmojanonjá y chentsana imojtsónënga.

**Chë Romoca bëts mandadbiama impuesto jtsatsquécjnayama**  
(Mt 22.15-22; Lc 20.20-26)

13 Chentšana chënga, básefta fariseunga y Heródesbe ústonënga Jesúsbioye tmojanichamó, ndayá cha tojanyiñe jisháchichiyama, as chca jtsebomnama ndaye sóyeca mandadëngbeñe cha mal jaquédana. 14 Chënga tmojána y Jesús tmojanayana: —Buatëmbayá, bënga fsëndétatšëmbo aca ndegombre soyënga cnetsabuátambama, y ndoñe jatuenanana nye ntšamo entsãnga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquécjnayana? ¿Fchtsatsquécjnaye o ndoñe ca? —chënga tmojantjá.

15 Jesús yojtsetátšëmbo, chënga bacna entsãnga ntšamo ndegombre tmojuabnacá ndinjinynayënga imojamnama; chíyeca tojanéyana: —¿Ndáyeca tšëngaftanga šmojtseboše chë sóyeca atše jisháchichiyama? Canye denario crocénana šmíyëboñe, atše chayobená jinjyama ca.

16 As canye crocénana tmojanoyé y Jesús tojanéyana: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

17 Chora Jesús tojanéyana: —Chcasna, César šmoctoyiye cha ibotocana soye; y Bëngbe Bëtsana cha ibotocana soye ca.

Y njetscanga chama imojenjnaná.

**Obanënga jtuyenama Jesús  
tmojantjá**

(Mt 22.23-33; Lc 20.27-40)

<sup>18</sup> Chentshana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Chíyeca, Jesús mëntšá tmojaniana: <sup>19</sup>—Buatëmbayá, Moisés tojéftsanabema, nderado canýe boyá tojóbana y básenga ndoñe tonjëftsabáshejuanësna, canmëna chë uabentsá chë shëmaftaca jtobouamayana, chca, chabe uabochená obanabiana básenga jtsabamnama ca.

<sup>20</sup> Y chcase, canýe, canýsëfta catsátanga monjamna. Chë natsaná tonjanobouamá y tontsanóbana básenga ntjëftsabashejuancá.

<sup>21</sup> Chentshana, chë ústona uabentsá chë shëmaftaca tonjanobouamá, pero chana tontsanóbana, básenga ntjëftsabashejuancá; chë inýe uabentsáftaca cachcá tonjanopasá. <sup>22</sup> Chca, nýetsca canýsëfta catsátangaftaca cha tonjanobouamá, pero ndocná básenga ntjëftsabáshejuanana. Y chentshana chë shembásanaca tontsanóbana. <sup>23</sup> Y morna, chë obanënga chamojtayena ora, ñndabe chë canýsëfta catsátanguentsábe shema chë shembása yochtsemna, nýetscanga cháftaca tmojanobouamase ca? —chënga tmojantjá.

<sup>24</sup> As Jesús tojanéyana: —Ntsámo Bëngbe Bëtsabe uabemana palabrenguñe endayancá ndoñe tmonjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. <sup>25</sup> Er obanënga chamojtayena ora, ni boyabásenga ni shembásenga

quemochatóbouamnaye, y chca, chënga mochántsemna mo celoca angelotemëngcá. <sup>26</sup> Y chë obanënga jtuyenama, ¿Moisesbe librësáñe ndoñe šmëndualía ntšamo Bëngbe Bëtsá tbojanianama, chë betiyetema yojtsángbototjuana ora? Bëngbe Bëtsá mëntšá tbojaniana: “Atše sëndmëna Abraham, Isaac y Jacobëbe Bëtsá ca.” <sup>27</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canýe ndoñe ndegombre soyiñe šmontsemna ca —tojanéyana.

**Chë más bëts uámana mando**

(Mt 22.34-40)

<sup>28</sup> Chentsë yojtsemna canýe ley abuatambayá. Cha yojouena ntšamo Jesús y chënga imojtsenatsësnayana, y yojtsetátšëmbo Jesús tšabá tojanéjuama. As, tojanobconá y Jesúsbiye tbojantjá: —¿Ndayá chë más bëts uámana mando yomna ca?

<sup>29</sup> Y Jesús tbojanjúá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nýe canýe Bëngbe Utabná endmëna, ndocná más. <sup>30</sup> Utabná Bëngbe Bëtsá cochtsebobonshana nýets acbe ainánaca, nýets espíritoca, nýets juábnaca y nýets añémoca.” <sup>31</sup> Y chentshana quem inýe mándnaca: “Ndëmua entsánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

<sup>32</sup> Chora, chë ley abuatambayá Jesúsbiye tbojaniana: —Buatëmbayá, puerte tšabá tcjayana. Ndegombre

yomncá contsichamo, nÿe canÿe  
 Utabná endmëna y ndocná más. <sup>33</sup>Y  
 cha jtsebobonshánana nÿets ainánaca,  
 juábnaca y añémoca, y ndëmua  
 entsánaca jtsebobonshánana cachá  
 cuenobobonshancá, puerte cuámana.  
 Cach nÿetsá ndoñe quenatámana  
 bayënga jtsëbánayana, ni chë  
 uátšëmbona soyënga Bëngbe Bëtsá  
 jëtschuayama ca.

<sup>34</sup>Cha nÿets juábnaca tbojanjuama  
 Jesús tojáninÿe ora, tbojaniana:  
 —Batšatema cmontsebuáshbena  
 jtseprontánama, Bëngbe Bëtsá  
 chacolesciamama acbe ainanentšë  
 jtsemándayama ca.

Y chentšana, ya ndocná  
 yonjenñëmua Jesús más  
 jatstjanayama.

**¿Cristo ndabe entsábentšana  
 yomna?**

(Mt 22.41-46; Lc 20.41-44)

<sup>35</sup>Jesús Bëngbe Bëtsabe bëts  
 yebnentšë yojtسابuátambaye ora,  
 tojánayana: “¿Ndáyeca chë ley  
 abuátambayënga mondbëtsichamo  
 chë Uámana Uabuayaná  
 Davídbentšana iuabó ca? <sup>36</sup>Cach  
 David, chë Uámana Espíritbe  
 mándoca mëntšá tojánayana:

Bëngbe Bëtsá, atšbe Utabná  
 Crístbioye tbojaniana:  
 atšbe catšbioica mótbema,  
 atšbe obenánaca, acbe  
 uayayënga acbe  
 cucuatšinë chamoquedama  
 chjamëntscuana ca.

<sup>37</sup>¿Ntšámose Cristo Davídbentšana  
 Entšá nántsemna, cach  
 David ‘Utabná ca’ chábioye  
 tbojtسابuátmëse ca?” —cha  
 tojanéyana.

Y chë bëtsá entsanga, oyejuayënga  
 imojtsuenana.

**Jesús chë ley abuátambayëngbiama  
 tojánayana, chënga ndoñe tšabá  
 montsama ca**

(Mt 23.1-36; Lc 11.37-54; 20.45-47)

<sup>38</sup>Mëntšánaca Jesús chënga  
 yojtسابuátambaye: “Cuedado  
 šmochtsebomna y ndoñe šmattsama  
 chë ley abuatambayëngcá.  
 Chënga jtsogetánana bënëna  
 entsayangaca jtsajmana y jtsebošana  
 tsáshenañe entsanga nÿa respétoca  
 chamotsacheuanama. <sup>39</sup>Chë  
 judiëngbe enefjuana yebnënguenache,  
 chë más uámana luarënguñe  
 jtsetbiámanana, y chë fiestënguenache  
 nÿa quëfseroca. <sup>40</sup>Pero chënga,  
 viudángbioye chë tmobomna  
 soyënga jtsabacayana, y entsangbe  
 delante tšabá chamotsënyama, y  
 chëngbioye imojtsaíngñama ndoñe  
 chaondëtsótatšëmbuamna, Bëngbe  
 Bëtsáftaca tša jtsencuéntayana. Chë  
 causa, Bëngbe Bëtsá ínÿengbiama más  
 chënga echanjácastigaye ca” —Jesús  
 tojánayana.

**Jesús yojtšënyaye chë crocénana  
 quëcnyayënga**

(Lc 21.1-4)

<sup>41</sup>Jesús jabuátambama tojanpochocá  
 ora, tojanótbema Bëngbe Bëtsabe  
 bëts yebnentšë, chë crocénana  
 quëcnyayëtëma ndirichiñe; y chë  
 crocénana quëcnyayënga yojtšënyaye.  
 Bëtsá bomnëngna becá crocénana  
 imojtsequëcnyaye. <sup>42</sup>Chora, canÿe  
 viudá ndbomnëjëmna yojobconá  
 y nÿe uta crocénana chëtëmiñe  
 yojaftsesegóra. <sup>43</sup>Chora Jesús chabe  
 uatsjëndayënga tojánachembo  
 chamobéconama, y mëntšá  
 tojanéyana: “Ndegombre cbéyana,  
 quem viudá ndbomnëjema, Bëngbe  
 Bëtsabiama nÿetscangbiama más



tonjëftsesegorá. <sup>44</sup>Chê bomnëngna chë yojtsoýentsjamentšana tmonjëftsesegorá, y cabá bomnana imotsóbomñe; y chë viudana tonjëftsesegorá lempe ntsachetšá yobomncá; masque tša ndbomñejema, chë vida jtsebomnama lempe ntsachetšá yobomncá tonjëftsesegorá ca.”

**Jesús tojánayana chë Bëngbe  
Bëtsabe bëts yebna lempe  
mochjánpochocama  
(Mt 24.1-2; Lc 21.5-6)**

**13** <sup>1</sup>Jesús Bëngbe Bëtsabe bëts yebnentšana tojëftsanbocna ora, canýe chabe uatsjendayá tbojanianana: —Buatëmbayá, minýe, itša bëts ndëtsbenga, y tša botamana bëts yebnënga ca!

<sup>2</sup>Chora Jesús tbojanianana: —Tšabá cochjinýe tša botamana bëts yebnënga. Pero muentše ndoñe queochaisoquéda ni mo canýe ndëtsbé inýebé juatsboye. Lempe mochantsepochóca ca.

**Ntšamo yochtsemna quem luare  
jopochóca te chaojtsobeco ora  
(Mt 24.3-28; Lc 21.7-24; 17.22-24)**

<sup>3</sup>Chentšana, Olivos tjashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, <sup>4</sup>ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

<sup>5</sup>Chora Jesús tojanéjua: “Cuedado šmochtsebomna ndocná chacmondáingñema. <sup>6</sup>Banga mochanjabo y mochantsabíchamo chënga Jesús imomna ca. Mochántsihomo: ‘Atše chë Cristo

sëndmëna ca’, y chca, ba entšanga mochanjáingñaye.

<sup>7</sup>“Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochóca tempo cabá ndoñe queochátmëna. <sup>8</sup>Canýe luarentša entšanga inýe luaroca entšángaftaca mochántsientsjanaye, y canýe amëndayábentša entšanga inýe amëndayábioca entšangaftácnaca; ba luarënguenache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup>“Pero tšëngaftangna cach tšëngaftangbiama šmochtsantješna; entšanga cmochanjšhëche y amëndayëngbe cucuatšinë cmochanjábashējuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbiocyte y reyëngbiocyte cmochanjuntatse, choca, chëngbe delante ntšamo atšbiama šmotatšëmbcá chašmuayanama.

<sup>10</sup>Er entseyta, quem luare cabá ndopochóca ora, Bëngbe Bëtsabe tšabe noticiënga nýetsca luarënguentša entšángbiocyte chaóshjanguama. <sup>11</sup>Y inýengbe cucuatšinë jabáshējuanama chacmojtsënachá ora, ndoñe šmattsenócochinýena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánýenga ndoñe chora quešmochátoyebuambnaye, ndayá chë Uámána Espiritu tšëngaftangbiájana echantsóyebuambnaye.

<sup>12</sup>“Canýe catšata cachabe catšata inýengbe cucuatšinë

bochanjáboshjona chamotsóbama,  
y bêtsétsanga cachèngbe básenga  
mochanjábashejuana chamotsébáyama;  
y chë básengna chèngbe  
bêtsétsangbe contra mochántsemna y  
chamotsébáyama mochanjábashhejuana.  
<sup>13</sup> Atsbe ústonènga bétsemna causa,  
nyetsca luarènguentša entsànga  
cmochantsébuayènja; pero nda nyets  
tempo átsbeñe ošbuachiyá totsomñe,  
atsbocaná echántsemna.

<sup>14</sup> “Chë Bèngbe Bètsabe juabna  
oyebuambnayá Daniel, chë  
puerte uabouana soye quem luare  
jopochócama tojéftsanabema.  
Chë puerte uabouana soye, chca  
jtsemnama ínÿoca tsèngaftanga  
chašmojinÿe ora (nda tojtsalía,  
chabosertá), šmochántsetatsšëmbo  
chë puerte ngménana tempo  
tojóshjanguama; chorna, chë Judeoca  
chamojtsemna entsànga, batsjabengoye  
chamotsacheta; <sup>15</sup> chama, nda cachabe  
yebnentša tsbanánoca chaojtsemna,  
chocana ndoñe chaondétastjango,  
ni chaondétamashèng tsoicana  
ndayá jesábocnama; <sup>16</sup> y nda jajoca  
chaojtsemna, yebnoye ndoñe  
chaondéta ni mo chabe quèfsaíya  
jesácñama. <sup>17</sup> iTša lastema chë tempo  
ngomámanènga o ochóchaye šešonga  
chamojtsabamna shembásengbiama!  
<sup>18</sup> Bèngbe Bètsá šmochtseimpadana  
chë ngménana tempo ndoñe  
chaondóshjango uaftena tempo  
ora, <sup>19</sup> er chora puerte ngmenancá  
echántsemna. Tša jabuache ngmenancá,  
quem luare jobojátšama orscana y  
méntscoñama y más chcoye, cachá  
ngménana ndoñe ntjamnana. <sup>20</sup> Chë  
puerte ngménana tempo, yapa bèn  
ndoñe chaondétsemnama Bèngbe  
Bètsá ndoñe tonjalesenciase, ndocná  
quentatsbocá; pero cha, chabe  
ubuáyanènga, chabe bocacánènga

corente endábabuanÿeshanayeca,  
echanjama yapa bèn tempo ndoñe  
chaondétsemnama.

<sup>21</sup> “Chora nderado nda  
chacmojáuyana: ‘Minÿe, muentše  
chë Cristo entsemna’, o ‘Choca  
cha entsemna ca’, chë soyèngama  
ndoñe šmattsayaunana. <sup>22</sup> Er  
mochanjábocana ndoñe ndegombre  
uámana ubuáyanènga, chènga Cristo  
imomna ca jtsichámese, y Bèngbe  
Bètsabe ndoñe ndegombre juabna  
oyebuambnayèngnaca; y chènga  
mochanjama bêts soyènga chèngbe  
obenana jinÿanÿiyama, entsànga  
jáingñama, y tmojobenase, chë  
Bèngbe Bètsabe bocacánèngnaca.  
<sup>23</sup> ¡Cuedado šmochtsebmna! Cabá  
chca ndochnèngora, lempe  
tcbonjabuayená ca” —Jesús tojanéyana.

**Bèngbe Bètsá Entšá tbojanbemá  
quem luaroye echanjésabo**  
(Mt 24.29-44; Lc 21.25-36)

<sup>24</sup> Mèntšánaca Jesús tojanéyana:  
“Pero chë tempo, entsànga puerte  
chamojasufrí chentsána, shinÿe ndoñe  
queochátsbuashinÿinÿana, juashcona  
ndoñe queochátsbinÿnaye, <sup>25</sup> celocana  
estrellènga echanjatquécjiana, y quem  
luarentša tsbanánoca espíritènga  
obenana bomnènga echanjángmëmmana.  
<sup>26</sup> Y chora, entsànga mochanjinÿe,  
Bèngbe Bètsá Entšá tbojanbemá  
jantšetèshiñe echántsaboye, corente  
obenánaca y corente buashinÿinÿaniñe.  
<sup>27</sup> Chora cha chabe angelènga  
echanjámèndaye chë Bèngbe Bètsabe  
ubuáyanènga júbuajama, nyets  
luarèngocana, quem fshantsoca  
cánÿoica juachociana, celoca ínÿoica  
juachóntscóne.

<sup>28</sup> “Chë higo betiyama  
šmochjuatsjinÿe: Tsèm buacuafjènga  
tojtssebmna ora y tojtsaiséjotsana,

jtsotatsëmbuana chë tsabe tempo ya tojtsaisobecuama. <sup>29</sup> Cachcá, chë soyënga ndayama tsëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama. <sup>30</sup> Ndegombre cbéyana, lempe chca echanjochnëngo, morsca entšanga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>33</sup> “Chíyeca, cuedado šmochtsebmna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tbojanbemá jésabama tempo. <sup>34</sup> Echántsemna mo canÿe entšacá; chana inÿe luaroye ya jëftsebocnama ora, chabe oservénënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama. <sup>35</sup> Chcasna, cuedado šmochtsebmna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatsëmbuana, mo nderado jétatana, tséntseto ora, bínÿanoye o cachëse, tsëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo; <sup>36</sup> ndoñe cuedado šmontsebmnešna, nderado cha nÿe ndeolpe nántashjango, tsëngaftanga ndëprontánënga šmojtsemna ora, mo ftsomañe cuenta. <sup>37</sup> Chíyeca, ntšamo tsëngaftanga cbochanjauyancá, nÿetscanga chanjáuyana: ¡Puerte

cuedado šmochtsebmna ca!” —Jesús tojánayana.

**Entšanga imojtsejuabnaye ntšamo jamëse Jesús jishachama**  
(Mt 26.1-5; Lc 22.1-2; Jn 11.45-53)

**14** <sup>1</sup> Bashco fiestama uta te yojetsájamna, chë Bëngbe Bëtsá Egipcocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtojeíngñase, y jtsóbama. <sup>2</sup> Báseftanga imojtsichamo: “Quem fiestëntscuana ndoñe, er nderado entšanga yapa muanjóntša enbouenanana ca.”

**Canÿe shembása botamana uanguëtse béjaye Jesusbe bestšašinë tbojanbuešcja**  
(Mt 26.6-13; Jn 12.1-8)

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentšë; mesëšhentšë Jesús yojtsemna ora, canÿe shembása tojánashjango. Chë shembása yojúshjango canÿe alabastro jarrëtema jútjena canÿe becá uámana y botamana uanguëtse béjaye, ena nardana uanguëtšÿe; chana chë jarrëtema yojátsba y chë béjaye Jesusbe bestšašinë tbojanbuešcja. <sup>4</sup> Chca tmojáninÿe ora, báseftanga chentšë imojtsemnënga tmojanotjyaná y mëntšá imojtsenatsëtsnaye: —¿Ndáyeca nÿe bonamente chë soye yojtsemna ca? <sup>5</sup> Chamna, matmënjobenanga chë béjaye unga patse denario crocénánama juiyana, y chánaca ndbomnjëmënga matmënjújabuache ca.

Y chë shembásabiama podescas imojtsichamo.

<sup>6</sup> Chora Jesús tojanéyana:  
—¿Ndáyeca quem shembása ndoñe cachcá šmochanjonÿaye ca? ¡Ndocá matatsana! Atšbiana tšabe soye tonjama.  
<sup>7</sup> Er ndbomñémenga nyets tempo tšëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiana jamana; er atše tšëngaftangaftaca ndoñe nyets tempo quichásemna. <sup>8</sup> Quem shembása lempe ntšamo tojobenacá atšbiana tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná séntsemna ora. <sup>9</sup> Ndegombre cbéyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyiná chentše, ntšamo quem shembása tojamámnaca becá mochanjëftsóyebuambaye, chca, entšanga chabiana chamotsenójuabnama ca —cha tojanéyana.

**Judas tojána bachnangbe  
amëndayëngbiöye, Jesús  
chamuishachama  
(Mt 26.14-16; Lc 22.3-6)**

<sup>10</sup> Chentšana, Judas Iscariote, canÿe chë bnétsana uta uatsjendayënguentsá, tojána chë bachnangbe amëndayëngaftaca jencuéntama, Jesús chëngbe cucuatšinë jaboshjonama.  
<sup>11</sup> Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšinë jaboshjonana.

**Jesús chabe uatsjendayëngaftaca  
Bashco saná tojanse  
(Mt 26.17-29; Lc 22.7-23; Jn  
13.21-30; 1 Co 11.23-26)**

<sup>12</sup> Chë Bashco fiesta bojatšenté, chë levadúraca ndëpormana tandëše

sayté, chë uatsjendayënga Jesús tmojantjá: —¿Ndémoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canÿe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

<sup>13</sup> As Jesús uta chabe uatsjendayata tojanichamó y mëntsá tojanéyana: —Chë bëts puebloye motsata. Chašojáshjango ora, canÿe bacó cmochanjóbiatše, matbajiñe býyeshe echantsabuambaye; cha šochjuasto y šochtserreparana ndëmuanÿe yebnentše yochjámashënguama; <sup>14</sup> y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjendayëngaftaca jasama ca?”

<sup>15</sup> As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjaprónta bënga mochjasama ca.

<sup>16</sup> As chë uatsjendayata tbojána y tbojáninyëna lempe ntšamo Jesús tojanéyancá; y chentše chë Bashco saná tbojanprontata.

<sup>17</sup> Tojanibétata ora, Jesús chë yebnoca tojánashjango, chabe bnétsana uta uatsjendayëngaftaca. <sup>18</sup> Y mesëshentše imojtsesaye ora, Jesús tojanéyana: —Ndegombre cbéyana, canÿa tšëngaftanguentsá, átšeftaca entsesá cha, uayayëngbe cucuatšinë šochanjáboshjona ca.

<sup>19</sup> Chorna chë uatsjendayënga ngménaca imojtsemna, y tmojanontšë canÿánÿa cha jatjayana: —¿Atše chtsemna ca?

<sup>20</sup> Y Jesús tojanéjua: —Canÿa chë bnétsana utatentšá entsemna. Chabe tandëše cach atše sëntsefcheucacná

šcnenentše cha entsefchecuacná.

<sup>21</sup> Ndegombre, Bëngbe Bëtsá Entšá tbojanbemáftaca echanjopása ntšamo chabiamá Bëngbe Bëtsabe uabemana palabrenguine endayancá. Pero, itša lastema chë bochjáboshjonabiamá! Chabiamá más tšabá manjamna ndoñe ntjónynana ca —Jesús tojánayana.

<sup>22</sup> Imojtsesantscuana, tanděše tojanca, Bëngbe Bëtsábioye chama tbojtanchuá, tojanjataye y chabe uatsjéndayënga tojanëjatá, y mëntšá tojánayana: “Mocñënga, mosënga, atšbe cuerpo entsemna ca.”

<sup>23</sup> Chentšana, canye coptema vínoyeca tojanaca, Bëngbe Bëtsábioye tbojtanchuá, chabe uatsjéndayënga tojanëfšasé, y nyetscanga tmojanofšé.

<sup>24</sup> Mëntšá tojánayana: “Quem vínoye atšbe buiñe entsemna. Atšbe buiñe echanjuábuashana entsanga chamotsetatšëmbuama ntšamo Bëngbe Bëtsá entsanga tojašëbuachenacá ndegombre yochjochnënguama. Chë buiñe bëtsá entsangbe tšabiamá echanjuábuashana. <sup>25</sup> Y ndegombre cbëyana, morscana ya ndoñe más chë uvasëšentšana obocniye quichaisofšiyë. Chë tsëm vínoye tšëngaftangaftaca chanjofšiyë, Bëngbe Bëtsabe amëndayoca chamojtsemna ora ca” —tojánayana.

**Jesús tojánayana, chábioye  
ndoñe bonjanabuátma ca Pedro  
yochjánayanama**

(Mt 26.30-35; Lc 22.31-  
34; Jn 13.36-38)

<sup>26</sup> Bëngbe Bëtsábioye jëtschuayama tmojancantá chentšana, Olivos tjšahoye tmojëfšsanbocana. <sup>27</sup> Jesús tojanëyana: —Nyetsca tšëngaftanga quem ibeta átšbeñe ošbuáchiyana šmochantsobuetše y šmochántšacheta, er Bëngbe Bëtsabe uabemana

palabrenguine, cha mëntšá tojánayana: “Chë oveshënga abujënyá chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. <sup>28</sup> Pero obanënguentšana chaitayenentšana, tšëngaftangbe natsana Galileoye chanjá ca —cha tojanëyana.

<sup>29</sup> Chora Pedro tbojanayana: —Masque nyetscanga ábeñe ošbuáchiyana chamotsobuetše y chamotsacheta, atše nya ndocna te ca.

<sup>30</sup> Chora Jesús tbojanayana: —Ndegombre cbëyana, cam ibeta, ngallo cabá uta soye ndëcánta ora, aca unga soye cochanjayana ndoñe šconduabatma ca.

<sup>31</sup> Pero Pedro más yojsichamo: —Masque chašotsemna ácaftaca jóbanama, atše ndoñe quichátayana ndoñe cbonduabatma ca.

Y nyetscanga cachcá imojtsichamo.

**Getsemaní luarentše Jesús, Bëngbe  
Bëtsáftaca tbojanencuánta  
(Mt 26.36-46; Lc 22.39-46)**

<sup>32</sup> Chentšana, canye luare Getsemaní ca uabáinoye tmojána. Chocna Jesús tojanëyana: “Muentše motbiamá, chëntscuana atše choye chanjá, Bëngbe Bëtsáftaca jencuántama ca.”

<sup>33</sup> Y tojëfšsanëbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná. <sup>34</sup> Chëngbioye tojanëyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshëntsamentšé y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadësa ora ndoñe chaondóshjanguama. <sup>36</sup> Mëntšá

yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondétsemnama. Pero ntšamo atše stsebošcá ndoñe chaondétsemna, sinó ntšamo aca cojtsebošcá ca.”

<sup>37</sup>Chentšana, chabe unga uatsjéndayëngbiøye tojtjanabo, y chëngna immétsomañe. Chca tojánanÿena ora, Pédrëbiøye tbojaniyana: “Simón, ¿cotsomañe? ¿Ni mo nÿe canÿe hora jtsefsnama ndoñe tconjobená? <sup>38</sup>Šmochtsefsna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espírituca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

<sup>39</sup>Jesús cachiñe tojesaná y Bëngbe Bëtsáftaca tbojanencuentá, cach palabrenga jayanëse. <sup>40</sup>Yojtabo orna, chë uatsjéndayënga cachiñe immétsomañe; chënga imojtsefshétana ocnyae causa, y ndoñe imontsobena ntšamo jojuana.

<sup>41</sup>Chentšana, tojesaná y tojtjanabo ora tojanéyana: “¿Cabá šmotsomañe y šmotsochnañe? Nÿe nÿetšá; hora tojjobuache, Bëngbe Bëtsá Entšá tbojanbemá bacna soye amëngbe cucuatšinë mochanjáboshjona.

<sup>42</sup>Motsbananga, cuajna. Minÿënga, atše boshjuaná ya entebeconá ca.”

**Uayayënga Jesús tmojánishache**  
(Mt 26.47-56; Lc 22.47-53; Jn 18.2-11)

<sup>43</sup>Jesús cabá yojtsóyebuambnantscuana, Judas, canÿe chë bnëtsana uta uatsjéndayënguentšá, tojánashjango y cháftaca ba entšanga espadéjangaca y ngarotbéngaca prontánënga. Chënga imojamna

chë bachnangbe amëndayënga, ley abuátambayënga y judiéngbeñe bëtsëjemëngcá mándayëngbe ichmónënga. <sup>44</sup>Judas, chë boshjuaná, tojanjuabó ntšamo jamana entšanga jinÿanÿiyama ndëmua Jesús bëtsemnana. Chíyeca, yojáuyana: “Nda chajjauámocho, cha echántsemna; šmochjishache y cuedádoca šmochjuánatse ca.” <sup>45</sup>Chcasna, Judas Jesúsbiøye tojanobeconá y tbojaniyana: “¡Buatëmbayá ca!”

Y tbojanámocho. <sup>46</sup>Chora chë entšanga tmojánishache y tmojanánatse.

<sup>47</sup>Pero canÿa chentše Jesúseftaca yojtsemná, chabe espadéja yojenosëngboténtsena, y chë bachnangbe más uámana amëndayabe oservená canÿe matscuaše tbojtsanéstjango.

<sup>48</sup>Y Jesús chë entšanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canÿe bacá uamana entšá cuaftsemncá ca? <sup>49</sup>Atše cada te tšëngaftangbeñe sëndétsemna Bëngbe Bëtsabe bëts yebnoa abuátambaye, y ndocna te choca chešmánishache. Pero tšëngaftanga chca átšeftaca šmotsama, cachcá ntšamo Bëngbe Bëtsabe uabemana palabrenguiñe endayancá chaotsemnama ca” —tojánayana.

<sup>50</sup>Chorna, nÿetsca uatsjéndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonÿá. <sup>51</sup>Canÿe bobontse Jesúsbiøye ibojtséstona, nÿe canÿe uafjantse entšëjua uichëtjoná. Cha chë entšanga tmojánishache, <sup>52</sup>pero chëngbe cucuatšinë chë entšëjua jesáboshjonëse, chë bobontsna enašá yojtsachá.

**Jesús tmojanánatse chë judiëngbe uámana amëndayëngbioye**

(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nyetsca chë bachnangbe amëndayënga, bëtsëjemëngcá amëndayënga y ley abuatambayënga tmojánenefjna.

<sup>54</sup> Pedro bënocana Jesús tbojanasto, chë bachnangbe más uámana amëndayabe yebnentsá chashjónscoñe; y chentse tojanocuedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

<sup>55</sup> Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninyana.

<sup>56</sup> Er masque banga Jesusbe contra uayátsenaye soyënga imojtsichamo, nyetscanga ndoñe cachca soye montsanichamo.

<sup>57</sup> Báseftanga imojtsaye y mëntsá Jesusbe contra, ndoñe ndegombre betsemncá tmojánayana: <sup>58</sup> “Bënga cha fsënjoyeuná mëntsá: ‘Atse quem Bëngbe Bëtsabe bëts yebna, entsangbe pormana yebna, chantsepochóca; y unga tese inye Bëngbe Bëtsabe bëts yebna, entsángbeyeca ndëpormana yebna chanjëtsjebo ca.’ ”

<sup>59</sup> Pero masque chca imojtsichamo, nyetscanga ndoñe cachca soye montsanichamo.

<sup>60</sup> Chorna, chë bachnangbe más uámana amëndayá yojtsbaná, nyetscangbe tsëntsaca yojtsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>61</sup> Pero cha nye iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntsá: —¿Caca chë Cristo icomna, Bëngbe Bëtsá chë nda fsëndadoranabe Uaquiñá ca?

<sup>62</sup> Y Jesús tbojanjá: —Arseñor, atse cha sëndmëna; y tsëngaftanga šmochanjinye, atse, Bëngbe Bëtsá Entsá tbojanbemá, chë nyets obenana bomnabe catšbioica chantsetbemana, y celoca jantsetëshiñe chántsaboye ca.

<sup>63</sup> Chora, chë bachnangbe más uámana amëndayá chabe uichëtjonëjuangá yojtsenátšajatanëca, puerte ibojtsetna causa, y tojánayana: —¿Ndayama más entsanga šochjátëjaboto Jesusbe contra chamuayanama ca?

<sup>64</sup> Tsëngaftanga šmonjouena ntšamo chë entsá entsichamcá, y chca Bëngbe Bëtsabiana entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nyetscanga tmojánayana, cha ndegombre bacna soye yojtsebomna y jóbana ibojtsemna ca.

<sup>65</sup> Chorna báseftanga tmojanontšë Jesús buashëtjnyana; jubiá imojútsbotse, imojtsejantšetaye y imojtsetjanaye: “iMomalisiá nda tcmënjajantšëtá ca!” Y chë Bëngbe Bëtsabe bëts yebnoca josticiëngna imojtsajuebjantšetaye.

**Pedro tojánayana Jesúsbioye ndoñe bonjanabuátma ca**

(Mt 26.69-75; Lc 22.56-62; Jn 18.15-18, 25-29)

<sup>66</sup> Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; <sup>67</sup>y Pédrëbioye

tbojáninÿe ora, cha iñe juachaca  
yojtsansbonena, yejuana ibojonÿinÿiye  
y tbojaniyana: —Acnaca, Jesús  
Nazaretocáftaca conjánana ca.

<sup>68</sup> Pero Pedro tojánayana  
chábioye ndoñe bonjanabuátma  
ca; y mentsá tojánayana:  
—Ndayama cojtsichámuama ndoñe  
quetsátstatšëmbo, ni quešnátésertana  
ca.

Y shjoye, amashjuanóntscoñe  
yojábocna; y chora canÿe ngallo  
yojacánta. <sup>69</sup> Chë oservená cachiñe  
Pédrebioye tbojáninÿe y tojanontsé  
chë ínÿenga jauyanana: —Muánaca  
Jesusbe uatsjendayënguentsá entsemna  
ca.

<sup>70</sup> Pero chana cachiñe tojánayana  
Jesúsbioye ndoñe bonjanabuátma ca.  
Chentšana, chë chentse imojtsemnënga  
Pedro tmojántaniyana: —Ndegombre  
aca chënguentsá contsemna; ácnaca  
Galileocá contsemna ca.

<sup>71</sup> Pero Pedro tojanontsé ichámuana:  
—iBëngbe Bëtsá chašotsecastigá ndoñe  
ndegombre soye stsichámese ca! —y  
yojóntsa júrayana— iAtše chë entsá  
ndoñe quetsatabuatma, ndabiamá  
tšëngaftanga šmontsatsétsná ca!

<sup>72</sup> Y cachora chë ngallo uta soyama  
yojacánta, y Pedro yojenójuaboje  
ntšamo Jesús tbojaniyanama: “Ngallo  
cabá uta soye ndécánta ora, aca  
unga soye cochanjayana ndoñe  
šconduabuatma ca.” Y tojanontsé  
enóbošachiyana.

#### Jesús Pilátbioye tmojanánatse

(Mt 27.1-2, 11-14; Lc 23.1-  
5; Jn 18.28-38)

**15** <sup>1</sup> Tojanbinÿna ora, chë  
bachnangbe amëndayënga,  
chë judiéngbeñe bëtsëjemëngcá  
amëndayënga y ley abuátambayënga  
cánÿentse tmojánenefjna, nÿetsca

chë luarentša más uámana  
mandayëngaftaca, jenóyeunayama  
ntšamo jamëse Jesús jóbama. Jesús  
tmojanëcuébatseca y tmojanánatse,  
y Pilato, chë Judeoca mandadbe  
cucuatšinë tmojánboshjona.

<sup>2</sup> Pilato Jesúsbioye tbojantjá: —¿Aca  
chë judiéngbe rey cojtsemna ca?

Y Jesús tbojanjuá: —Aíñe, aca  
ndegombre yomncá tcjayana ca.

<sup>3</sup> Chë bachnangbe amëndayënga  
bëtscá soyënga Jesusbe contra  
imojtsichamo; <sup>4</sup> chíyeca Pilato cachiñe  
Jesúsbioye tbojantjá: —¿Ndocá  
šcochanjojuá ca? Minÿe; bëtscá  
soyënga acbe contra montsichamo ca.

<sup>5</sup> Pero Jesús ndoñe más  
tbojanjuá; chë causa, Pilato ndoñe  
yontsetátšëmbo ntšamo jajuaboyana.

#### Jesús chaóbana ca tmojánayana

(Mt 27.15-31; Lc 23.13-  
25; Jn 18.38-19.16)

<sup>6</sup> Cada Bashco fiesta ora, Pilato  
yojanamana canÿe utamená  
jëtsboshjonana, ndánaca entsanga  
tmojuabuayaná. <sup>7</sup> Chë tempo yojamna  
canÿa Barrabás ca uabainá; cárceloye  
inautámena chabe enutëngaftaca.  
Chëngna entsanga tmojtsanëbaye,  
mandadëngbe entsángaftaca  
imojtsjaná ora. <sup>8</sup> Chora, entsanga  
tmojánashjajna y tmojanontsé  
Pilátbioye jauyanana, ntšamo Bashco  
fiesta ora jamama yojanamancá  
chaomama. <sup>9</sup> Y Pilato tojanéjuá:  
—¿Tšëngaftanga šmojtseboše  
tšëngaftangbe rey atše chjëtsboshjona  
ca?

<sup>10</sup> Chca tojánayana, er Pilato  
yojtsatátšëmbo, chë bachnangbe  
amëndayëngna envidia causa Jesús  
chabe cucuatšinë tmojánboshjonama.  
<sup>11</sup> Pero chë bachnangbe amëndayëngna  
entsanga tmojanañemó



chamuenbouéнанama, Pilato jauyanama chëngbiana Barrabás chabuatsboshjona ca. <sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojanáyebuachena: —iMotsecrucificá ca!

<sup>14</sup> Y Pilato entšanga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtétanayebuachena: —iMotsecrucificá ca!

<sup>15</sup> As Pilato, entšángaftaca tšabá joquédama yojtsebóseyecna, Barrabás tojtanboshjona. Yojámëndaye soldadënga jabuache Jesús chamotsetsenama; y chentšana soldadëngbe cucuatšine tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëts yebnentša chashjoye, y nyëtsca soldadënga tmojánachembo chamobéconama. <sup>17</sup> Shbuenda uafjatsenga uinýna entšayá mo reycá tmojanichëtjo; canýe coronésha tmojanapormá uchmaséšfjangaca y tmojanabestšajó. <sup>18</sup> Y chentšana tmojanontsé jachuyana: “iBayté judiëngbe Rey cochtsemna ca!”

<sup>19</sup> Canýe niñéfjaca Jesús bestšasiñe imojtsétsjanjnaye, imojtsebuashëtjnaye, y chabe delante imojtsofshëntsaméntšenaye. <sup>20</sup> Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

#### Jesús tmojanrucificá

(Mt 27.32-44; Lc 23.26-43; Jn 19.17-27)

<sup>21</sup> Chora, canýe entšá chëjana yojtšatashjajuana, Simón ca uabainá,

Cirene pueblóca, Alejandro y Rufbe taitá; jajocana yojtšatachñëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); <sup>23</sup> y tmojanabuyié vínoye mírraca enájubniye, pero Jesús ndoñe yonjuáyëngacñe.

<sup>24</sup> Y chentšana tmojanrucificá; y chabe entšayangamna, tsbanánoye tmojanétsena jinýama ndayá cada ona yochjëftsanácnama.

<sup>25</sup> Cachëse, base mošenana ora Jesús tmojanrucificá. <sup>26</sup> Y chabe bestšaše juatsboicna canýe uabemana soye tmojananjo. Chiñe yojëtsayana ndáyeca cha tmojanrucificama, mëntšá: MUA CHË JUDIËNGBE REY ENDMËNA ca.

<sup>27</sup> Y cháftaca útata bacna soye ochjajnayátnaca tmojanrucificá, canýa chabe catšbioica, y ínýana chabe uañicuayoica. <sup>28</sup> Chca cháftaca tmojanma, chaochnënguama ntšamo Bëngbe Bëtsabe uabemana palabrénguiñe chabiana iuayancá, mëntšá: “Y chábioye tmonjaninýe mo chë puerte bacna soye amënguentšá canýa cuaftsemncá ca.”

<sup>29</sup> Y chëjana imojtsachñëjuana entšanga, Jesús imojtsóyenguaye, imojtsobestšfshanenaye y imojtsatsaye: “iAca chë Bëngbe Bëtsabe bëts yebna cochtsánenasatajchca y nýe unga tese cochtanjebo, <sup>30</sup> cach aca mentsbocá y cruzocana matastjango ca!”

<sup>31</sup> Cachá chë bachnangbe amëndayënga y chë ley abuátambayënga imojtsáboyejuana, y chënga imojtsenatsëtsnaye: “Cha ínýenga tojëftsatsëbacá, pero cachá jéntsbecama ndoñe quenátobena.

<sup>32</sup> iChë Cristo, chë Israeloca Rey! iCruzocana chauatastjango, bënga

jin'yama y chábeñe chaftsošbuachema ca!"

Y cháftaca ibojtsecrucificanánaca ibojtsóyenguaye.

### Jesús tojanóbana

(Mt 27.45-56; Lc 23.44-49; Jn 19.28-30)

<sup>33</sup> N'yetsto orscana y las treséntscoñe, n'yets quem luare yojtseibétata.

<sup>34</sup> Chca orna, Jesús chabe biyañe tojanáyebuachena: "Eloi, Eloi, ¿lema sabactani ca?" (Chca endayana "Atšbe Bětsá, atšbe Bětsá, ¿ndáyeca cachcá šcojonýa ca?")

<sup>35</sup> Chca tmojanuena ora, bášeftanga chentše imojtsemnēnga imojtsichamo: "Mouenēnga, chē Bēngbe Bětsabe juabna oyebuambnayá Elías bontsechembuana ca."

<sup>36</sup> As chora, canýa tojanótjajo, untja vínoyeca canýe esponjēshe tojanfchecuacuá, canýe niñěfjiñe tojananguēsětjo y Jesúsbioye tojanbeconá chaofšema; y tojánayana: "Cachcá mochjonýaye, er Elías tayochjabo jabátěštjanguama ca."

<sup>37</sup> Pero Jesusna, jabuache tojanoyó y tojanóbana. <sup>38</sup> Y chē Bēngbe Bětsabe běts yebnoca yojújonýana entšėjua tsěntsaca yojtsenájataye, tsbanánocana fshantsoye. Chējua bēñėjua inauamna y chē tsatsěntsaca inaújonýana. <sup>39</sup> Chē romano soldadēngbe amēndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: "iNdegombre quem boyabása Bēngbe Bětsabe Uaquiniá yomna ca!"

<sup>40</sup> Bášefta shembásengnaca chentše imojtsemna, bēnocana imojtserreparana; chēnguentše imojtsemna María Magdalena; María, Santiago chē más basa y Josebe mamá; y Salomé. <sup>41</sup> Chē shembásengna Jesús tmojanasto y tmojanájabuache cha

Galileoca yojamna ora; y inýe ba shembásengnaca chentše imojtsemna, chē cháftaca Jerusalenoye tmojánanga.

### Jesús tmojanatbontsá

(Mt 27.57-61; Lc 23.50-56; Jn 19.38-42)

<sup>42</sup> Chē yěfsana ochnayté yojtsémnayeca, cach te yojánamna saná japróntana chē yěfsana jasama. Ya yojtseibétatana ora, <sup>43</sup> Pilato yojtsemnoye tojána canýe boyabása, José ca uabainá, Arimatea pueblócá; cha inamna canýe chē luarentša uámana mandayēnguentšá. Cha Bēngbe Bětsábeñe yojtsošbuáchiye y yojanobátmana chabe amēndayana chaóshjanguama. Ndauatjcá Pilátbioye Jesusbe cuerpo tbojanotjañe.

<sup>44</sup> Pilato yojenjaná Jesús tša betesco yojóbanama; as tojanmandá chē soldadēngbe amēndayá chamuachembo, jatjayama Jesús ya bēn obaná tayojtsemnama. <sup>45</sup> Chē soldadēngbe amēndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámabañama.

<sup>46</sup> Chora, José canýe uafjantse lino entšėjua tojanabuamé, Jesusbe cuerpo cruzocana tbojanéstjango, chē lino entšėjua tbojanandmaná, y canýe cuevēshiñe ndětsbeñe pormáněshiñe tbojanjajó; chentšana canýe ndětsbé tojansjoná, y chē cuevēshoye amashjuantše tojánachto. <sup>47</sup> María Magdalena y María, chē José y Santiagbe mamá, tbojáninýe ndayentše Jesusbe cuerpo tbojanjájoma.

### Jesús tojtanayena

(Mt 28.1-10; Lc 24.1-12; Jn 20.1-10)

**16** <sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguětše bėjaye

tmojanabuamé, chíyeca jama Jesusbe cuerpo janëtjuama; <sup>2</sup> y tmenguse, chë semana bojatséntena, cabá cachëse, shinÿe yojábocna ora, chë cuevëshoye tmojána. <sup>3</sup> Imojtsaye ora imojtsayénatsëtsnaye: “¿Chë cuevëshoye amashjuanentša ndëtsbé nda bochtsabuajuána ca?”

<sup>4</sup> Pero imojontješiyé ora, tmojáninÿe chë cuevëshoye amashjuanentša bëts ndëtsbé, chentšana juanániñe. <sup>5</sup> As chënga choye tmojánamashjna y choye tmojáninÿe canÿe bobontse bën uafjantse entšëjua uichëtjoná, chë cuevëshentša catšbioica inétsotbemañe; y chë shembásenga imojouatjaná. <sup>6</sup> Pero chë bobontse tojanéyana: “Ndoñe matauatjéngana; tšëngaftanga šmondëngú Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minÿenga cha enjëftsejajonentše. <sup>7</sup> Motsajna, y Pedro y chë inÿe uatsjéndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinÿe, ntšamo cachá tmojanéyancá ca.’ ”

<sup>8</sup> As chë shembásenga betscó chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaníyana.

**Jesús, María Magdalénbioye  
tbojánébëbocna**

*(Jn 20.11-18)*

<sup>9</sup> Jesús tojtanayenentšana, chë semana bojatsénté, Jesús natsana María Magdalénbioye tbojánébëbocna. Tempo Jesús chábentšana canÿsëfta bacna bayëjenga tojtanébuacana. <sup>10</sup> Cha Jesúsbioye ainá tbojáninÿentšana, tojána Jesúseftaca imojánajnënga

chama jaúnayama; chëngna ngmënaca y šachénaca imojtsemna. <sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninÿe ca tmojanuena ora.

**Uta ustonata Jesúsbioye tbojáninÿe**  
*(Lc 24.13-35)*

<sup>12</sup> Chentšana, uta ustonátbioye, básefta yebnënga yojamna luaroye ibojétsaye ora, Jesús tojánébëbuacna, mo inÿa cuaftsemncá. <sup>13</sup> Chora chata tbojésanshëcona chë inÿenga chama jacúntama; pero chëngna cach ndoñe ndegombre ca tmojanjuabó.

**Jesús chë uatsjéndayënga  
tojanichamó, Bëngbe Bëtsabe  
soyëngama nÿetsquénache  
jábuayenama**

*(Mt 28.16-20; Lc 24.36-49; Jn 20.19-23)*

<sup>14</sup> Cabana, Jesús chë bnétsana canÿe uatsjéndayënga tojánébëbuacna, chënga imojtsesaye ora; y tojanécácana chë cha ainá yojtsemnama ndoñe ndegombre yontsemna ca tmojánjuaboma y nÿets ainánaca chábeñe ndoñe montsanošbuachema, er cha ainá tmojáninÿënga chama tmojanacuntá ora, chca ndoñe ndegombre yontsemna ca chë uatsjéndayënga tmojánayana.

<sup>15</sup> Chentšana Jesús tojanéyana: “Nÿets luarëngoye motsajna, y nÿetsca entšanga chë tšabe noticiëngama šmochtsabuayiyayey. <sup>16</sup> Nda chiñe chaojtsošbuaché y tšëngaftanga chašmojuabaye, cha atsbočaná echántsemna; pero nda ndoñe tontošbuaché, cha nÿets tempo castiganá echántsemna. <sup>17</sup> Chë átšbeñe ošbuáchiyënga ndegombre soyënga imojtsabuayiyayenama, entšanga mëntšá mochántsetatšëmbo: atše jótšëmbonëse,

átšbeñe betsošbuachéyeca,  
entšángbentsšana bacna bayējēngbe  
juabna mochantábocna; tempo chēnga  
ndmabiyañe mochantsóyebuambnaye.

<sup>18</sup>Masque nderado cucuatšīñe  
mētšcuayēnga tmojishache o veneno  
tmojofšēnga, ndocá quemochatspása;  
y šoquēngbeñe cucuatšēnga  
chamojacjá ora, chēnga shnánēnga  
mochántatsmēna ca” —Jesús  
tojanéyana.

**Jesús Bēngbe Bētsábioye tojtaná**  
(Lc 24.50-53)

<sup>19</sup>Bēngbe Utabná Jesús  
jóyebuambayama tojanpochocá

chentsšana, celoye cha  
tmojtánatsbaná, y uámana  
luarentše, Bēngbe Bētsabe catšbioica  
yojtótbema jtsemándayama.

<sup>20</sup>Y chē uatsjéndayēngna  
tmojánbocana y Bēngbe Bētsabe  
soyēngama nyetsquénache  
entšanga tmojanabuayená.  
Cach Bēngbe Utabná chēnga  
yojanējabuáchana, y yojánama  
entšanga chamotsetatšēmbuama chē  
buayenana soye ndegombre Bēngbe  
Bētsabe soyēnga bētsemnama, chē  
uatsjéndayēnga bēts soyēnga jamama  
obenana chamotsebomnama cha  
jtsamēse.

# San Lucas

## Jabojátšama

**1** <sup>1</sup>Ba entšanga Jesusbe historia tmojuábema, ntšamo béngbeñe ndegombre tojopasacá. <sup>2</sup>Chë historia juabemamna, chënga tmojanuena ntšamo Jesusbe uatsjéndayënga y inye entšanga chabiana immnencuentaycá. Chë entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiënga entšángbioye tmojanabuayená. <sup>3</sup>As, átšnaca sënjontšé cuedádoca juanotíciana lempe ntšamo Jesusbiana imojtsichamcá, tojanobojaťsentšana méntscoñe. Mora šontsinýana tšabá yojtsemna acbiana juabemana ntšamo ndegombre yomncá, uámana taitá Teófilo, chë tijuanoťiciá soyëngama, ntšamo ndegombre béngbeñe tojopasacá. <sup>4</sup>Ba soyënga Jesusbiana tcmojabuátëmbanga, y atše sëntseboše aca chacotsetátšëmbo, ntšamo tcojouencá ndegombre yomnama.

### Canye ángel tojanabuayená Juan chë Ubayaná jónýnama

<sup>5</sup>Herodes Judea luaroca rey inamna ora, yojamna canye judiëngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chë más uámana bachnangbe

natsana amëndayá). <sup>6</sup>Chatna tšabá amata ibnamna Bëngbe Bëtsabe bominyiñe, y ntšamo Bëngbe Bëtsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. <sup>7</sup>Básenga tondaye ibonjánabamna, Isabel šešona jtsebomnama ndobena causa, y chatna ya bëtsanánata ibojtsemna.

<sup>8-9</sup>Chë bachnanga Bëngbe Bëtsabe bëts yebnentše tmojtsoserverna ora, sempre imojanamana jabocacayana, nda tšabá tbojtsonyená, Bëngbe Bëtsábioye atschuanaye luaroye cháuama incienso jajuinýiyama. Canye, Zacaríasbe entšanga Bëngbe Bëtsabe bëts yebnoca, Bëngbe Bëtsábentše imojtsoserverna orna, Zacaríasbioye tšabá ibojonyena; y chca, cha ibojotóca jana incienso jajuinýiyana. <sup>10</sup>Zacarías, incienso yojtsejuinýnantscuana, ba entšanga shjoca imojtsemna, Bëngbe Bëtsáftaca encuëntaye. <sup>11</sup>Nye ndeolpe, Bëngbe Utabnabe canye ángel tojanonýná chë incienso jajuinýiyama altarentša catšbioica. <sup>12</sup>Zacarías chábioye tbojáninye ora, tojanenjnana y corente uatjana tbojanábuahe.

<sup>13</sup>Chora chë ángel tbojaniana: —Zacarías, ndoñe matauatjana. Bëngbe Bëtsá tonjouena ntšamo tconjaimpadacá. Acbe shema Isabel canye šešona bochántsebomna, boyabásetema, y chana Juan ca cochjuabaye. <sup>14</sup>Chama aca corente oyejuayá cochántsemna,

y bëtsca entšanga mochanjôyejuaye acbe uaquiñá tojonýnama. <sup>15</sup> Er cha, Bëngbe Bëtsabiana canýe uamana entšá echántsemna. Ndocna te queochaisofsiye vínoye, ni jabuáchiye. Chë Uamana Espiritu chabe ainaniñe echantsemándaye, cha cabá ndonýna orscana. <sup>16</sup> Banga Israeloca entšanga, ntšamo cha chaojayanama mochanjontšé joyeunayana Bëngbe Bëtsá, chëngbe Utabná. <sup>17</sup> Cha echanjášhango chë Bëngbe Bëtsabe Uamana Uabuayanabe natsana, y echántsebmna obenana y canýe espíritu ntšamo chë Bëngbe Bëtsabe juabna oyebuambnayá Elías inabomncá. Chabe natsana echanjášhango, bëtsétsanga chëngbe básengaftaca ndoñe chamondétsentsjanama, y chë nduauenanënga cachiñe chamotsatsjuabnama ntšamo chë Bëngbe Bëtsabe bominyiñe tšabá amënga mondbetsejuabnycá. Y chca, entšanga cha echantsapróntaye Bëngbe Utabná jabama orscama ca —chë ángel tbojaniana.

<sup>18</sup> As Zacarías chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bëtsemnama? Er atše ya bëtsëjema séntsemna y atšbe shémnaca cachá ca.

<sup>19</sup> Chora chë ángel tbojanjá: —Zacarías, atše ángel Gabriel sëndmëna; atše Bëngbe Bëtsábioaca sëndoservena. Cha šonjichmó chë tšabe noticiënga aca jauyanama y juenayama. <sup>20</sup> Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jôyebuambayama cochantobenaye ca.

<sup>21</sup> Chë ángel Zacaríaseftaca joytsóyebuambnantscuana, entšanga

shjoca Zacaríasbiana imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?” <sup>22</sup> Zacarías tojtanbocna ora, ndoñe yontsobena chë entšángaftaca jôyebuambayana. Chënga tmojántatšëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábiocana canýe soye tojáninyama, er chëngbioye jatšëmbombonana yojáuyana, ndëbiá yojoquéda causa.

<sup>23</sup> Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná. <sup>24</sup> Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinýe cach tsoca yebnentše totanoquedá. <sup>25</sup> Cha mëntšá joytsichamo: “Bëngbe Utabná mora atšbiana tojtenojuabó, entšángbentše atšbe ngmënana jtsebojuánama, básenga tondaye béntsabamna causa ca.”

#### Canýe ángel tojanabuayená Jesús jónýnama

<sup>26</sup> Isabel chnénguana ishinýe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye, <sup>27</sup> canýe shembása María ca uabainá jauatsëtsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josená, rey Davídbentšana entšá inamna. <sup>28</sup> Chë ángel Maríybioye tojána y mëntšá tbojanчуá: —iMouena. Bëngbe Bëtsá tšabe bendición acbiana tonjama! iBëngbe Utabná ácaftaca entsemna ca!

<sup>29</sup> Chca tojanuena ora, María yojenjaná chë soyama, y yojtsejuabnaye ndáyeca chë ángel chca tbojanчуama.

<sup>30</sup> Chora chë ángel tbojaniyana:  
—María, ndoñe matauatjana, Bëngbe  
Bëtsá entsama tšabe bendicionënga  
chacotsebomnama. <sup>31</sup> Aca ngomamaná  
cochanjoquéda y canye šešona  
boyabásetema cochántsebomna, y  
chana Jesús ca cochjuabaye. <sup>32</sup> Cha  
puerte echantsámana, y entsangna  
Bëngbe Bëtsabe Uaquiñá ca chábioye  
mochantsábobuatma. Y Bëngbe  
Bëtsá chë Utabná, chábioye canye  
rey bochanjábema, ntšamo David  
yojamncá, <sup>33</sup> y Jacóbëbentsana  
entsanga nyetsca tescama  
echántsamëndaye, y chabe mándayana  
ndocna te queochaisopochóca ca —chë  
ángel tbojaniyana.

<sup>34</sup> Chentsana María chë ángelbioye  
tbojantjá: —¿Ntšamo chca yochjopása,  
cabá ndoñe boyá séntsebomnëse ca?

<sup>35</sup> Y chë ángel tbojanjuá: —Chë  
Uámana Espíritu echanjabo nyets  
ábeñe, y Bëngbe Bëtsabe obenánaca  
ngomamaná cochanjoquéda.  
Chabe obenana mo jantšetëshcá  
cmochanjabouútsbotse; chíyeca  
chë echanjónýna šešona Uamaná  
echántsemna, y chábioye Bëngbe  
Bëtsabe Uaquiñá ca mochantsábobuatma.  
<sup>36</sup> Mouena, Isabel, acbe primá, canye  
šešona bochantsebomna, masque ya  
bëtsananá cha entsemna; chë “šešona  
ndbomná ca” monjanabobuatmá, mora  
ya chnénguana ishinýe ngomamaná  
entsemna, <sup>37</sup> er Bëngbe Bëtsá lempe  
jamama endobena ca —cha tojánayana.

<sup>38</sup> Chora María chë ángelbioye  
tbojaniyana: —Bëngbe Bëtsabe oservená  
atše séntsemna. Bëngbe Bëtsá átšeftaca  
chaoma ntšamo šcojauyancá ca.

Y chentsana chë ángel tojtsatanoñe.

#### María tojána Isabel jabuáchama

<sup>39</sup> Chentsana, María tojanoprontá  
y tojanochëmo canye puebloye,

Judeoca tjañenache luariñe.

<sup>40</sup> Chocna cha, Zacaríasbe yebnentše  
tojánamashëngo y Isabélbioye  
tbojanchuá. <sup>41</sup> Isabel ntšamo María  
tbojanchuama tojanuena ora, Isabelbe  
šešona chabe uafsbioye tojanobonjó,  
y chë Uámana Espíritu Isabélbeñe  
tojánamashëngo chabe ainaniñe  
jtsemándayama. <sup>42</sup> Chcasna, Isabel  
jabuache tojánayana: —iBëngbe Bëtsá  
acbiama más tšabe bendicionënga  
entsama nyetsca shembásengbiamá, y  
chë cochántsebomna šešonbiámnaca  
cachcá! <sup>43</sup> Atše mercedo  
taitsatobuajoñe, atšbe Utabnabe  
mamá chašúabobuáchama; <sup>44</sup> er  
atše sënjouena ntšamo šconjachuá,  
y cachora atšbe šešona oyejuayá  
atšbe uafsbioye tonjobonjó. <sup>45</sup> ¡Aca  
Bëngbe Bëtsábeñe tcojošbuaché;  
cojtsetátšëmbo Bëngbe Bëtsá ntšamo  
tcmojašbuachenacá yochjamama;  
chíyeca puerte oyejuayá cochántsemna  
ca!

<sup>46</sup> Chora María tojánayana:  
“Nyets ainánaca Bëngbe Utabná  
chantsadorana,

<sup>47</sup> y Bëngbe Bëtsá, atšbe  
Atsbocayabiamá corente  
chanjóyejuaye.

<sup>48</sup> Bëngbe Bëtsá atšbiama tojtenojuabó,  
atše chabe oservénëjema.

Er morscana muentša entsanga  
nyetscanga puerte oyejuayá ca  
šmochantsábobuatma.

<sup>49</sup> Bëngbe Bëtsá, chë nyets obenana  
bomná, chabe obenánaca bëts  
soyënga atšbiama tonjama.  
iBëngbe Bëtsá puerte Uamaná ca  
entsabaina!

<sup>50</sup> ¡Morsca entsanga y más chcoyënga,  
chábioye yeunanëngbiamá, cha  
sempe bochantsengmena!

<sup>51</sup> Cha, chabe obenánaca bëts  
soyënga tojama,

y chë nÿe cachënga bëtsëtsanga  
enobiamnayëngbe juabna  
tojtsepochoçá;

<sup>52</sup> reyëngbioye chëngbe  
mándayentšana tojtsatsatše;  
pero chë nÿe cachënga bëtsëtsanga  
ndenobiamnayëngbioye,  
uámanënga tojábiama.

<sup>53</sup> Chë shëntseca imomnéngbioye,  
chamosama bëtsçá cha tojatsatá,  
pero chë bomnéngbioyna tondaye  
tonjatsatá.

<sup>54</sup> Cha tojanéjabuache chabe  
entšanga Israeloca, chabe  
oservénënga,  
y ndoñe tbonjánebnatjëmbe  
jtsalastemánana,

<sup>55</sup> nÿetsca tescama chë Abraham y  
chábéntšana entšángbioye,  
ntšamo bëngbe bëts  
taitanga Bëngbe Bëtsá  
tojanašebuachenacá ca” —cha  
tojánayana.

<sup>56</sup> Mariyna unga ishinÿe Isabélaftaca  
tojanouedá, y chentšana cachabe  
yebnoye tojtaná.

#### Juan chë Ubayaná tojanonÿná

<sup>57</sup> Isabel jtsešócanama  
tojanóntšabuache ora, canÿe  
šešona boyabásetema tojanonÿná.

<sup>58</sup> Isabelbe juachañe oyenënga y  
chabe pamíllanga tmojántatšëmbona  
ntšamo Bëngbe Bëtsá chábioye  
ibojalastemama, y chama corente  
Isabélaftaca tmojanoyeuanga. <sup>59</sup> Chë  
šešona posuftayté yojtsebomna ora,  
tmojánashjango y chëtémbioye chë  
más delicadentše base bobachtema  
tmojantëtše, ntšamo chë judiënga  
imojanamancá. Chënga imojétseboše  
chë šešónbioye Zacarías ca juabáyana,  
cach beftçá; <sup>60</sup> pero chabe mamá  
tojanéyana: —Ndoñe. Quem šešona  
echantsabaina Juan ca.

<sup>61</sup> As chënga Isabélbioye  
tmojaniana: —Acbe pamíllangbeñe  
ndocná chca quenatabaina ca.

<sup>62</sup> Chora chënga jatšëmbombonana  
Zacaríasbioye tmojantjá, ntšamo chë  
šešona chaotsabainama cha yojtseboše  
ca. <sup>63</sup> Zacaríasna jatšëmbombonana  
canÿe tablëbé tojanëyá y chiñe  
tojanábema: “Cha entsabaina Juan ca”.  
Y chë causa, nÿetscanga ojnánänënga  
imojtsemna. <sup>64</sup> Y cachora Zacarías  
jóyebuambayama yojtobenaye,  
y yojontšé Bëngbe Bëtsábioye  
jëtshuayana. <sup>65</sup> Chë juachañe  
oyenënga nÿetscanga tmojanëuatjaná,  
y Judeoca nÿetsca chë tjañenache  
luariñe entšanga chë soyëngama  
imojtsencuëntaye. <sup>66</sup> Nÿetscanga  
chë soyëngama tmojántatšëmbona  
ora, chéngnaca corente chama  
imojtsejuabnaye y mëntšá  
imojtsichamo: “¿Chë básetema, bëtsá  
ora nda yochtsemna ca?” Y ndegombre,  
Bëngbe Bëtsabe obenana cháftaca  
yojtsemna.

#### Zacarías, Bëngbe Bëtsábioye jëtshuayama

<sup>67</sup> Chë Uámana Espiritu tbojanmandá  
ora, Zacarías, chë basetembe  
taitá, Bëngbe Bëtsabe mándoca  
jtsóyebuambnayëse, mëntšá tojánayana:

<sup>68</sup> “iChë Utabná, chë Israeloca  
entšangbe Bëtsá matschuanga,  
er cha tonjabo chabe  
entšanga jabújabuachama y  
jabátsebacama!

<sup>69</sup> Cha bochanjíchmuca canÿe  
atsebacayá puerte obenana  
bomná,  
y cha ehántsemna Bëngbe Bëtsabe  
oservená Davídbentšana entšá;

<sup>70</sup> ntšamo Bëngbe Bëtsá bayté  
entsemna, chë chabe juabna  
oyebuambnayëngbiajana,



chê chábenga imomnëngbiajana  
bënga šojanašebuachenacá,  
mëntšá:

- <sup>71</sup> Cha canya bochjanichmuá  
bëngbe uayayënga y nyetsca  
uaboyënjëngbiama bënga  
jabátsebacama;
- <sup>72</sup> bëngbe bëtsétsangbioye  
jálستمama,  
y jenójuaboyama y jamama chabe  
uámama trato,
- <sup>73</sup> ntšamo Bëngbe Bëtsá, bëts taitá  
Abrahámbioye tbojanšbuachenacá.
- <sup>74</sup> Cha tbojanšbuachená bëngbe  
uayayëngbiama bënga  
jabátsebacama,  
chca, bënga nduatjca Bëngbe  
Bëtsá jaserviama,
- <sup>75</sup> y chabe entšangcá, nyetsca  
soyënguine tšabá amënga, Bëngbe  
Bëtsabe delante nyetsca te bëngbe  
vidënguine jëftsiyena.
- <sup>76-77</sup> Y aca, atšbe básatemna, Bëngbe  
Bëtsabe juabna oyebuambnayá  
ca cmochantsábobuatma,  
entšangbioye Bëngbe Bëtsabe  
soyëngama cochtsabuayiynama,  
Bëngbe Utabná cabá ndáshjango  
ora, bacna soyënga amana  
chamuajbanama;  
as Bëngbe Bëtsá chëngbe bacna  
soyënga echanjáperdonaye,  
y Bëngbe Utabná jabama  
mochantsopróntaye.
- <sup>78-79</sup> Bëngbe Bëtsá bënga puerte  
šualastemánayeca,  
canya bëngbe juabnënga binynayá  
bochanjíchmuá,  
bënga chë bacna soyënga causa  
mo ibetiñcá y obanëngbe  
luarentšcá vida bomnëngbioye  
jabátsebacama,  
y jabuátambama ntšamo  
natjëmbana jtsiyenana ca” —cha  
tojánayana.

<sup>80</sup> Chë básetema vojontšë jobóchana  
y chabe espíritnaca puerte. Bayté,  
entšanga ndoyena luarënguenache cha  
vojëftsiyena, Bëngbe Bëtsá Israeloca  
entšangbioye cha tojáninyanjentscuana.  
Chentšana, chamuábuatmanamna  
tojanontšë Israeloca entšangbeñe  
jóyebuambayana.

### Jesucristo tojanonýná

(Mt 1.18-25)

**2** <sup>1</sup> Chë tempo yojamna canye Romoca  
bëts mandado, Augusto ca uabainá;  
y cha, chë natsanama tojanmandá  
nyetsca entšanga chamuenábemama.  
<sup>2</sup> Chë soye tojanochñëngo Cirenio ca  
uabainá Siroica mandado yojamna  
ora. <sup>3</sup> Chamna, nyetscanga tojanotocá  
jtangana jenábemëngama, cada  
ona ndémoca chëngbe bëts taitanga  
imojëftsiyena puebloye.

<sup>4</sup> As, Josénaca Galilea luarentšana  
Nazaretocana vojëftsebozna y Judeoye,  
Belén puebloye, tojtaná. Tempo,  
Josebe bëts taitá rey David, Belenoca  
inoyena. Y José, Davídbentsana entšá  
inámnayecna, choye jenábemama  
tojtaná. <sup>5</sup> Mariaftaca tojáná  
jenábemama, y muana tbojanšbuachená  
Josëftaca jobouamayama. María  
ngomamaná yojtsemna, <sup>6</sup> y Belenoca  
ibojtsemnëntscuana, chë ora  
tbojanóntšabuache jtsešócanama.  
<sup>7</sup> Y chentšë María ibojtsebomna chabe  
natsana šešona, canye boyabássetema.  
Posadoca tondaye luare yontsemna  
causna, chata nýe uacnëngbe átana  
tambuentšë tbojanoqedá. Y Jesús  
tojanonýná orna, María tbojtanëntsacjuá  
y canye bachetémiñe tbojanajó.

### Chë angelotëmënga y chë oveshënga abujénýanga

<sup>8</sup> Belén béconana, chë ibeta,  
oveshënga abujénýanga shëntsjoaca

cachëngbe oveshëngaftaca imojtsemna. <sup>9</sup>Nÿe ndeolpe, Bëngbe Bëtsábiocana canÿe ángel tojánébëbuacna, y Bëngbe Bëtsábentšana corente yojtsebuashinÿinÿana chëngbe shëconániñe. Chama chënga puerte imojocochauatjaná.

<sup>10</sup>Chora chë ángel tojanéyana: “Ndoñe matauatjëngana. Sënjabo tšabe soyënga tonjopasama jábuayenama, nÿetscanga chamóyejuama. <sup>11</sup>Mora chë David tonjanonÿná pueblentše canÿe šešona tonjonÿná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. <sup>12</sup>Ndegombre chca entsemnama mëntšá šmochanjátatšëmbona: canÿe šešona ntsacjuaná y uacnëngbe bachetémiñe jajoná šmochanjínÿena ca” —cha tojanéyana.

<sup>13</sup>Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsatschuanaye:

<sup>14</sup>“¡Bëngbe Bëtsá, celoca entsemná matschuanga!

Bëngbe Bëtsábioye  
yeunanëngbiama, Bëngbe  
Bëtsá corente entsoyejuá; quem  
luariñe chëngbeñe puerte tšabá  
chaotsemna ca.”

<sup>15</sup>Chentsana chë angelënga celoye tmojésanshëcuana. Y chora chë oveshënga abujéñyanga tmojanontšé jeniyanana: “Belenoye cuajna, chë quem tojopasá soye jinÿama. Ndegombre, Bëngbe Bëtsá chë soye šojanÿanÿé ca.”

<sup>16</sup>As betso tmojána y tmojánanÿena María, José y chë šešonatema bachetémiñe jajoná. <sup>17</sup>Chë šešona tmojáninÿe ora, chënga tmojanacuntá

Jesusbe bëtsétsata y chë ínÿengbioye, ntšamo chë šešonbiama chë ángel tojanéyancá. <sup>18</sup>Nÿetscanga chë tmojanuenënga tmojanenjaná ndayá chë oveshënga abujéñyanga imojtsacúntama. <sup>19</sup>Pero Mariyna nÿe cachabe ainanoca quem soyëngama más bën inétsenojuabnañe.

<sup>20</sup>Chentsana, chë oveshënga abujéñyanga tmojtaná Bëngbe Bëtsá atschuanaye, ndayá tmojáninÿama y tmojanuenama. Nÿetšá tojanopasá lempe ntšamo chë ángel tojanéyancá.

### Bëngbe Bëtsabe bëts yebnoye Jesús tmojanamba

<sup>21</sup>Posufta te tojánashjache ora, chë basetémbioye chë más delicadentše base bobachtema tmojantëtše, Bëngbe Bëtsabe entšá bëtsemnama chaotsinÿnama, ntšamo judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

<sup>22</sup>Y chë tempo tojanóshjango, ndaye ora José y María yojtsamna jamana ntšamo Moisesbe leyinÿe iuayancá, ndayá jamama yojanmëncá, canÿe shembása Bëngbe Bëtsabe delante tšabia jtsatsmënama, canÿe šešona tbojtsebomnentšana. Asna, Jerusalemoye tbojánata y chë básetema tmojanamba, Bëngbe Bëtsabe bëts yebnoca jinÿinÿiyama, <sup>23</sup>ntšamo chë Bëngbe Utabná Moisésbioye tbojaniyé leyënguiñe iuayancá, mëntšá: “Canÿe yebnentše chë natsana šešona boyabása tojtsemnëna, Bëngbe Bëtsábioye cha jinÿinÿiyana chábioye chabotseservénama ca.” Chcasna, chë básetema Bëngbe Bëtsabe bëts yebnoye tmojanamba. <sup>24</sup>Y tmojanamba janshana uta shloftše, Bëngbe Bëtsá jëtschuayama, ntšamo Bëngbe

Utabnabe leyíne yomandacá. Chiñe mēntšá endayana: “Chē natsana šešona chaojōnā ora, boyabásetema tojtsemnēse, janshana šmochjuamba uta fchetnatémata o uta šešona palomatémata, Bēngbe Bētsá jētschuayama ca.”

<sup>25</sup> Jerusalemoca inamna canye bacó, Simeón ca uabainá; cha inamna nyetsca soyēnguiñe tšabá amá, y yojaniyena ntšamo Bēngbe Bētsá yomandacá. Cha yojanóbátmana chē tempo ndaye ora, Bēngbe Bētsá bochjanichmuá canya Israeloca entšanga cháuatsebacama. Y chē Uámana Espírítu chabe ainaniñe yojtsemna; <sup>26</sup> chíyeca, cabá lempe chca ndopása ora, cha yojtsetátšēmbó cha ndoñe yochjanóbanama, chē Bēngbe Bētsabe Uámana Uabuayaná ntjéftsinyá. <sup>27</sup> Chē Uámana Espírítu tbojanmandáyeca, Simeón Bēngbe Bētsabe bēts yebnoye tojána; y Jesusbe bētsétsata chē bāsetema tmojanamba ora, ntšamo Moisesbe leyíne iuayancá chabíama jamama ora, <sup>28</sup> Simeón tbojanocutsá y Bēngbe Bētsábíoye tbojtanchuá. Cha mēntšá tojánayana:

<sup>29</sup> “Bēngbe Utabná, mora šmoleseñciá, atše acbe oservená natjémbana jóbanana, er ya tconjama ntšamo šconjanšbuachenacá;

<sup>30</sup> atše chē entšangbe Atsebacayá sēnjinye.

<sup>31</sup> Aca cha tcojichmó nyets luarenache entšangbíama.

<sup>32</sup> Cha chē ndoñe judiēngbe juabnēnga binynayá echántsemna; y chábeyeca, nyets quem luarentše mochanjátatšēmbona, chē acbe entšangbíama, Israeloquēngbíama ca” —cha tojánayana.

<sup>33</sup> José y María ibojenjanata ntšamo Simeón Jesusbíama yojtsichámuama. <sup>34-35</sup> Chentšana, Simeón Bēngbe Bētsábíoye tbojanimpadá tšabe bendicionēnga chata chabotsebomnama chaomama; y María, chē Jesusbe mamábíoye tbojaniyana: “Quem soyēnga corente cmochanjacochtsetšenaná, mo ainana espadéjaca cuafjenēchnēngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatšēmbó. Israeloca banga quem bāsetema mochantšábotena y chabe palabréngnaca ca” —cha tbojaniyana.

<sup>36</sup> Chéntšnaca yojtsemna canye shembása Bēngbe Bētsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentsá; ya bētsananá cha inamna. Nye canyēsēfta uata cha yojéftsebouamna; <sup>37</sup> y chabe boyá tojanóbanentsana, cha posufta bnētsana y canta uata viudá inamna. Ndocna te Bēngbe Bētsabe bēts yebnentsana yonjábocana, y chentše tojanoquedá bnēté y ibeta, Bēngbe Bētsáftaca encuéntaye y cha atschuanaye; y chama, ba soye yojanamana tondaye ntjascá jtsemnana. <sup>38</sup> Simeón, María y Josébíoye yojtsétsētsnaye ora, Ana chēngbíoye vojobeconá, y chē Atsebacayá tojanonynama Bēngbe Bētsábíoye tbojtanchuá chentšana, Jerusalemoca entšangbíoye, chē canye atsebacayá Israeloca entšangbíama imojanobatmanēngbíoye tojanéyana, chana Jesús yojtsemna ca.

#### Jesús Nazaret puebloca

<sup>39</sup> José y María lempe ntšamo chē Utabnabe leyēnguiñe iuayancá

tbojanma ora, Galilea luaroye tbojtanata, cachëngbe puebloye, Nazaretoye. <sup>40</sup>Y chë bâsetema yojtsobóchaye, y más añemo yojtsejacana y más osertánana yojtsebmoma. Y Bëngbe Bëtsá yojánama cha bëtscá tšabe bendicionënga chaotsebmoma.

#### Jesús Bëngbe Bëtsabe bëts yebnoca

<sup>41</sup>Chabe bëtsétsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta. <sup>42</sup>Jesús bnétsana uta uata tojánashjache ora, Jerusalenoye tmojána, ntšamo imojanamancá.

<sup>43</sup>Chë fiesta tojanopochocá chentsana, chabe bëtsétsata yebnoye ibojtsataye, y chata ntsetatšëmbcá, Jesusna Jerusalenoca yojtsoquedañe. <sup>44</sup>Chata ibojétsejuabnaye Jesús chë inÿe entšángaftaca yojtsataboye ca; chcasna, canÿe te nÿetsá benachëjana tbojánata ora, tbojanontsé chabe pamíllangebeñe y ubuatméngbeñe jtsenguanguana, <sup>45</sup>pero ndoñe ibonjobenaye jtsinÿenana. As, chata chora Jerusalenoye tbojësanshëcona choca cha jetsenguanguama.

<sup>46</sup>Unga tianoye chata tbojanobená Bëngbe Bëtsabe bëts yebnentše cha jetsinÿenana. Chana chë Moisesbe ley abuátambayëngbe tsëntsaca inétsotbemañe, chëngbioye inayaunana, inatjanaye. <sup>47</sup>Nÿetsca ouenanënga imojtsenjnanaye Jesús tša osertaná inamnama, y tša tšabá jojuama cha yojtsobenama. <sup>48</sup>Chabe bëtsétsata chca tbojáninÿe ora, chátnaca ibojenjaná. Chora, chabe mamá tbojanianana: —Uaquiná, ¿ndáyeca chca bëndátaftaca tcojama? Taitá y atše corente enócochinÿenata cbondënguá ca.

<sup>49</sup>As Jesús tojanëyana: —¿Ndáyeca atše šmonguá? ¿Ndoñe šondétatšëmbo atše šomna atšbe Taitabe yebnentše jtsemnana ca?

<sup>50</sup>Pero chë bëtsétsata ndoñe tonjanësertá ntšamo cha tojanëyancá.

<sup>51</sup>Chentsana Jesús chë bëtsétsataftaca Nazaretoye tojtaná y chata yojtsayaunana. Y chabe mamana nÿe cachabe ainanoca chë soyëngama más bën inétsenojuabnañe. <sup>52</sup>Jesús yojtsobóchaye y más juabna yojtsebmoma; y Bëngbe Bëtsá y nÿetsca entšanga corente oyejuayënga chabiamá imojtsemna.

#### Juan chë Ubayaná entšanga yojanabuayiná

(Mt 3.1-12; Mc 1.1-8; Jn 1.19-28)

**3** <sup>1</sup>Bnétsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catsata Felipe Iturea y Traconitoca rey, y Lisániasna Abilinioca rey. <sup>2</sup>Anás y Caifás chë bachnangbe más uamana amëndayata ibojamna. Cach tempo, canÿe luare entšanga ndoyentše Bëngbe Bëtsá tbojanatsétsá Juánbioye; Juan, Zacaríasbe uaquiná. <sup>3</sup>As Juan nÿetsca luarënguëjana Jordán bėjaye béconana tojánachnëngo, entšanga mëntšá utsétsnaye: “Tšëngaftangbe bacna soyëngama ngménaca šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” <sup>4</sup>Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojéftsabemcá. Cha mëntšá tojanábema:

entsanga ndoyena luaroca canya  
enduáyebuache:  
“Bëngbe Utabná echanjabo  
ca; mo nda canye benache  
tojtseprontacá canye uamana  
entśá jashjanguama,  
cachcá, tšëngaftángnaca, Bëngbe  
Utabná jabama ainanentše tšabe  
juabnéngaca šmochtseprontana.

<sup>5</sup> Nyetsca jachañe echantojútjia,  
y tjañe y batsjabenga  
mochantenájachibiaye.  
Chë scundma benachënga  
ndirichëjënga echántsatsmëna,  
y chë bacá mana benachënga  
mochantenájachibiaye.  
Mo chë chca tmojtšamëngcá,  
canye benache japróntana canye  
rey cháúashjanguama,  
tšëngaftángnaca bëtscá  
šmochtseprontana  
tšëngaftangbe ainaniñe, Bëngbe  
Utabná jabama.

<sup>6</sup> Y nyetsca entsanga mochanjinje  
chë Atsebacyá Bëngbe  
Bëtsábentsana jabana ca” —cha  
tojanábema.

<sup>7</sup> Chë entsanga Juan chaubáyama  
imojánbocana ora, Juan  
yojanëtsësnaye: “iMëtšcuaye  
entsanga! ¿Nda tcmënjáuyana  
chë echanjóshjango uabouana  
castigüentsana šmochjotsbocá ca?

<sup>8</sup> Bëngbe Bëtsábeñe ndegombre  
ošbuáchiyënga šmochtsemna, as  
chca chaotsinýna, tšëngaftanga  
chë bacna soyënga amana  
ndegombre šmojtšajbanama. Y  
ndoñe šmattsejuabnaye cach  
tšëngaftangbiama jayanama: ‘Bëngna  
Abrahámbentsana entsanga, Bëngbe  
Bëtsabe entsanga fsëndmëna ca’. Er  
atše chanjayana, Bëngbe Bëtsá quem  
ndëtsbéngacnaca Abrahámbentsana  
entsanga nanjábiana. <sup>9</sup>Tatśnía ya

entsaprontana chë betiyeshënga  
tbëtëjëngocana jtseshatëtsetšama.  
Ndaye betiye ndoñe tonjashájona,  
jtseshatëtšana y iñoye jtsatmetšana;  
tšëngaftangaftácnaca cachcá, tšabe  
soyënga ndoñe šmontsamëse, Bëngbe  
Bëtsá cmochanjácastigaye ca” —cha  
yojanëtsësnaye.

<sup>10</sup> —¿Y as, ndayá jamama šojtsamna  
ca? —chora chë entsanga tmojtantjá.

<sup>11</sup> Y Juan tojanéjua: —Chë uta  
quëfsaiya uabomná bontsemna canjiiyá  
jutštayana chë tondaye tonduabomná.  
Saná bomná bontsemna juajatayana  
chë tondaye saná tondbomnábiocyte ca.

<sup>12</sup> Romocama entšángbiocyte  
impuesto atjanayëngnaca jenábayama  
tmojánabo. Chënga Juánbiocyte  
tmojtantjá: —Buatëmbayá, ¿ndayá  
jamama šojtsamna ca?

<sup>13</sup> Y Juan tojanéyana: —Nye ntšamo  
chë leyiñe yomandancá entšángbiocyte  
crocéñana šmochtsayëngacaye ca.

<sup>14</sup> Básefta soldadëngnaca chábiocyte  
tmojtantjá: —¿Ndayá jamama  
šojtsamna ca?

Y Juan tojanéyana: —Ndocnábiocyte  
tondaye šmatjáboca, ni jauátjanase,  
ni nye ndayámnaca bonamente  
jobuáchëse; y nye ntsachetśá  
šmacaná crocëñanaca oyejuayënga  
šmochtsomñe ca.

<sup>15</sup> Entšanga chë Bëngbe Bëtsabe  
Uámana Uabuayanabiama  
imojtšobátmana, y chëngna  
Juanbiama imojétsejuabnaye nderado  
cha chë Bëngbe Bëtsabe Uámana  
Uabuayaná nanjamna ca; <sup>16</sup> pero  
Juan tojanéyana: “Ndegombre, atše  
béjayeca cbondubáyana. Pero chë  
echanjabá atšbiana corente más  
obenana endbomna, y atše mercedo  
taitsatobuajoñe ni mo jotsejbiyana  
chabe shecochëtjonëshentša corriëja  
jajafjonama. Chë Bëngbe Bëtsabe

benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë ndoñe chamontishachëngbiama, Bëngbe Bëtsá echanjama chë echanjabábeyeca, chënga corente castigánënga chamotsemnana, mo ñeshëquëcá.

<sup>17</sup>Canÿe entšá chabe mëtštá cucuatsiñe jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcñaye tsañe jtsabuájuaana, y chë ndoservena shácuanënga ñeshoye jtsatmetšana. Cachcá, chë átsbentšana echanjabá, chë tsabe entšanga echanjúbuaja, y chë bacna entšangna ñeshiñe echantsacastígaye, y chë ñe ndocna te queochátsfsana ca” —cha tojanéyana.

<sup>18</sup>Chca y inÿe palabréngaca Juan chë tsabe noticiëngama yojanabuayiná.

<sup>19</sup>Tempo, Juan Heródesbioye tbojanácacana, cha tojanobouamama cachabe catšata Felipebe shémaftaca, Felipe cabá oyena ora; chana Herodías ca uabainá. Chama Juan tbojanácacana y nyetsca bacna soyënga Herodes tojanmámnaca. <sup>20</sup>Pero Herodes Juánbioye joyeunaye luariñna, cabá inÿe más bëts bacna soye tojátanma: Juánbioye cárceloye tbojtsanëtame.

**Juan, Jesúsbioye tbojanabaye**

(Mt 3.13-17; Mc 1.9-11)

<sup>21</sup>Pero Herodes Juánbioye cabá ndutame ora, Juan ba entšanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, <sup>22</sup>y chë Uámana Espíritu mo canÿe palomatemcá Jesúsbioye yojtsastjajuana; y celocana Bëngbe

Bëtsá tbojaniyana: “Acna atšbe bonshana Uaquiñá condmëna. Acbiama corente sëntsoyejuá ca.”

**Jesusbe bëts taitanga**

(Mt 1.1-17)

<sup>23-38</sup>Jesús unga bnëtsana uata yojtsebomna, entšángbeñe Bëngbe Bëtsabe soyëngama jóyebuambayama yojontsé ora. Entšanga imojanjuabná Jesús Josebe uaqiñá yojamna ca.

José yojamna Elibe uaqiñá.

Elí Matatbe uaqiñá

y Matatna Levibe uaqiñá.

Leví yojamna Melquibe uaqiñá,

Melqui Janabe uaqiñá

y Jana Josebe uaqiñá.

José yojamna Matatíasbe uaqiñá,

Matatíasna Amosbe uaqiñá.

Amós Nahumbe uaqiñá,

Nahúm Eslibe uaqiñá

y Esli yojamna Nagaiube uaqiñá.

Nagai yojamna Maatbe uaqiñá,

Maatna Matatíasbe uaqiñá.

Matatías Semeibe uaqiñá,

Semei Josecbe uaqiñá

y Josec yojamna Judabe uaqiñá.

Judá yojamna Joanabe uaqiñá

y Joanán Resabe uaqiñá.

Resa Zorobabelbe uaqiñá,

Zorobabel Salatielbe uaqiñá,

y Salatielna Neribe uaqiñá

yojamna.

Neri yojamna Melquibe uaqiñá,

Melqui Adibe uaqiñá.

Adi Cosambe uaqiñá,

Cosam Elmadambe uaqiñá,

y Elmadamna yojamna Erbe

uaqiñá.

Er yojamna Jesusbe uaqiñá

y Jesús Eliezerbe uaqiñá.

Eliezer Jorimbe uaqiñá

y Jorimna Matatbe uaqiñá.

Matat yojamna Levibe uaqiñá,

Leví Simeonbe uaqiñá

y Simeón Judabe uaquiñá.  
 Judá Josebe uaquiñá,  
 José Jonambe uaquiñá,  
 y Jonamna yojamna Eliaquimbe  
 uaquiñá.  
 Eliaquim yojamna Meleabe  
 uaquiñá,  
 Melea Menabe uaquiñá.  
 Mena Matatbe uaquiñá,  
 y Matata yojamna Natanbe  
 uaquiñá.  
 Natán yojamna Davidbe uaquiñá,  
 David Isaíbe uaquiñá  
 y Isaína Obedbe uaquiñá.  
 Obed Boozbe uaquiñá,  
 Booz Salabe uaquiñá  
 y Sala yojamna Naasonbe uaquiñá.  
 Naasón yojamna Aminadabêbe  
 uaquiñá,  
 Aminadab Adminbe uaquiñá  
 y Admin Arnibe uaquiñá.  
 Arni Esrombe uaquiñá,  
 Esrom Fáresbe uaquiñá  
 y Fáresna yojamna Judabe  
 uaquiñá.  
 Judá yojamna Jacobêbe uaquiñá,  
 Jacob Isaacbe uaquiñá  
 y Isaacna Abrahambe uaquiñá.  
 Abraham Tarebe uaquiñá  
 y Taré yojamna Nacorbbe uaquiñá.  
 Nacor yojamna Serugbe uaquiñá,  
 Serug Ragaube uaquiñá  
 y Ragauna Pelegbe uaquiñá.  
 Peleg Heberbe uaquiñá,  
 y Heber yojamna Salabe uaquiñá.  
 Sala yojamna Cainanbe uaquiñá,  
 Cainán Arfaxadbe uaquiñá  
 y Arfaxadna Sembe uaquiñá.  
 Sem Noebe uaquiñá  
 y Noé yojamna Lamecbe uaquiñá.  
 Lamec yojamna Matusalenbe  
 uaquiñá,  
 Matusalén Enoebe uaquiñá  
 y Enočna Jaredbe uaquiñá.  
 Jared Mahalaleelbe uaquiñá,

y Mahalaleelna yojamna Cainanbe  
 uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

**Jesús tojanobená Satanás  
 jayénjanama**

(Mt 4.1-11; Mc 1.12-13)

**4** <sup>1</sup> Juan, Jesúsbioye  
 tbojanabáyentsana, chë  
 Uámána Espíritu Jesusbe ainaniñe  
 yojtsemándaye. Jesús Jordán  
 bejajoicana tojtaná y chë Uámána  
 Espíritna entsanga ndoyena luaroye  
 tbojanánatse. <sup>2</sup> Chentse canta bnétsana  
 te tbojanjétana, y Satanasma yojanabó  
 Jesús jisháchichiyama. Chë canta  
 bnétsana tentscuana Jesús tondaye  
 tonjanse, y cabana ibojeshéntsena.

<sup>3</sup> Chora Satanás tojésanabo y  
 tbojaniyana: —Aca ndegombre Bëngbe  
 Bëtsabe Uaquiñá tcomñese, momandá  
 quem ndëtšbenga tandëse chaobiama  
 ca.

<sup>4</sup> As Jesús tbojanjuá: —Bëngbe  
 Bëtsabe uabemana palabrenguiñe  
 mëntšá endayana: “Entšá nÿe  
 tandéseca ndoñe vida ntsebomnana ca.”

<sup>5</sup> Chentsana, Satanás canÿe bëts  
 tjoye tbojanánatse y betscó nÿetsca  
 quem luarentša amëndayëngbenache  
 tbojaninÿinÿé. <sup>6</sup> Chora Satanás  
 tbojaniyana: —Atšë nÿets obenana  
 cbochjátsetaye y lempe quem  
 amëndayëngbenache yobinÿna  
 soyëngnaca. Atšë lempe chca  
 sënjóyëngacñe y sentsobena  
 jatšetayama nda stebošábioye.

<sup>7</sup> Aca chacojoshëntsamentšé y  
 chašcojadorase, lempe nÿetsá acbiama  
 echántsemna ca.

<sup>8</sup> Chora Jesús tbojanjuá: —Bëngbe  
 Bëtsabe uabemana palabrenguiñe

mëntšá endayana: “Acbe Bëtsá, chë Utabná cochtsadorana y nÿe cha cochtseserverna ca.”

<sup>9</sup>Chentsšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, <sup>10</sup>er Bëngbe Bëtsabe uabemana palabrenguiñe endayana:

Bëngbe Bëtsá chabe  
angelënga echanjichamuá,  
chacmotsinÿenama.

<sup>11</sup>Chënga buacuatšëngaca  
cmochanjishache,  
shecuatše ndocá ndëtšbeñe  
chacondomama ca —cha  
tbojaniyana.

<sup>12</sup>Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>13</sup>Cabana, Satanás tojanajbaná bošana Jesúsbioye bacna soyëngama jacochënguama, y bënama Jesús bentshana tojtsanojuánañe.

**Jesús tojanontšë Galileoca chabe  
trabajo jamana**

(Mt 4.12-17; Mc 1.14-15)

<sup>14</sup>Chentsšana, Jesús Galileoye tojesaná chë Uámana Espíritbe obenánaca, y nÿetsca entsanga chë luariñe chabiamana imojtsencuëntaye.

<sup>15</sup>Jesús yojtsabuátambaye chë judiëngbe enefjuana yebnënguenache, y nÿetscanga cha imojtsatschuanaye.

**Jesús Nazaret puebloca**

(Mt 13.53-58; Mc 6.1-6)

<sup>16</sup>Chentsšana Jesús Nazaretoye tojtanashjango, chë pueblentše cha tojanoboché, y ochnayté, ntšamo cha

yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualíama. <sup>17</sup>Chë Bëngbe Bëtsabe juabna oyebuambnayá Isaiasbe librëša tmojaniyé chaualiama. Chë librëša yojutëfjona orna, tojáninÿena mëntšá uábemanentše:

<sup>18</sup>“Chë Utabnabe Espiritu átšeftaca entsemna,  
er atše uabuayaná stsemna  
chë Bëngbe Bëtsabe tšabe  
noticiënga chë ndbomnéngbeñe  
jóyebuambayama.  
Cha šonjichmó jábuayenama,  
chë utámënënga chentsšana ya  
chamuáisebocanama;  
jamama chë jtanënga  
chamobenama tšabá  
jubínÿnama;

jamama chë ínÿengbe causa  
imosufrínënga, tempcá cachcá  
tšabá chamotsatsmënënga;

<sup>19</sup>y entsanga jáuyanama ndëmua  
ora chë Utabná chabe entsanga  
yochjatsebacaye ca.”

<sup>20</sup>Jesús jualíama tojanpochocá y chora chë uajabuachanábioye chëša tbojtaniyé y tojtanoítbema. Nÿetsca entsanga chë enefjuana yebnentše imojtsemnënga Jesúsbioye imojtsobuáuatja. <sup>21</sup>Chora Jesús tojanontšë mëntšá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

<sup>22</sup>Nÿetscanga Jesusbiamana tšabá imojtsencuëntaye y ojnanánënga imojtsemna tša botamana cha yojtsóyebuambnama. Y chënga imojtsentjanaye: —¿Quem boyabása ndoñe Josebe uaquiñá yondmëna ca?

<sup>23</sup>Jesús yojtsatšëmbo ntšamo cha tojánayaniñe chënga ndoñe tmonjanóšbuachema. As tojanéyana: —Ndegombre tšëngaftanga ntšamo



entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

<sup>24</sup>Y cachora Jesús más tojanoyebuambá, mëntšá: “Ndegombre cbéyana, ni canýe Bëngbe Bëtsabe juabna oyeubuambnayábioye cachabe pueblentše tšabá quematonýá.

<sup>25</sup>Ndegombre cbéyana, Elías, chë Bëngbe Bëtsabe juabna oyeubuambnayá, Israeloca inamna ora, ba viudanga chentše imojamna. Chë tempo, unga uata y tséntsane nýetšá ndoñe tonjanafté y bëts shëntsana chë luariñe yojtsebinýna. <sup>26</sup>Pero Bëngbe Bëtsá, Elíasbioye ndoñe tbonjanichmó ni mo canýe Israelentša viudábioye, y aíñe tbojanichmó ínýoye, Sarepta ca uabáinoye, Sidón béconana, canýe chentša viudábioye. <sup>27</sup>Eliseo, chë Bëngbe Bëtsabe juabna oyeubuambnayá, Israeloca inamna ora, chentše banga imojamna bacna nguayanánaca šoquënga, y ni mo canýa chentša šocábioye tbonjanshná, pero aíñe canýe šocábioye, Naamán ca uabainá, cach bacna nguayanánaca, Siriocá ca” —cha tojánayana.

<sup>28</sup>Chë judiëngbe enefjuana yebnentše imojtsemna entšanga chca tmojanuena ora, puerte tojánëtna. <sup>29</sup>As, chora chënga tmojantsbaná, chë pueblëntšana Jesús imojtábocna y más tsjuanoye canýe peñëšëjana imojuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana. <sup>30</sup>Pero Jesusna chëngbe tsëntsajana tojánachnëngo y ínýoye tojtsanoñe.

**Jesús, bayëjbe juabna cánýabioye  
tbojanbojuaná  
(Mc 1.21-28)**

<sup>31</sup>Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entšanga jabuátambana. <sup>32</sup>Entšanga imojtsenjnanaye ntšamo Jesús yojtsabuátambama, er chamna mo canýe mando bomnacá yojtsóyeubuambnaye.

<sup>33</sup>Chë enefjuana yebnentše, canýe boyabása bacna bayëja uambayá yojtsemna, y chabe causa chë boyabása tojanontsé mëntšá uayebuáchana: <sup>34</sup>—iCachcá šmonýá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

<sup>35</sup>Chora Jesús chë bacna bayëjbioye tbojtsanácacana y tbojaniyana: —iIytëca móbema y chábëntšana maisebocna ca!

As chora chë bayëja entšanguentše chë boyabásabioye tbojanshajayé, y ndocá ntjëftsemcá chábëntšana yojësebocna. <sup>36</sup>Chë soyama nýetsca entšanga imojénjnanaye y mëntšá imojtsenatsëtsnaye: “iTša chca palabrënga! ¡Quem entšá mandayacá y obenacá chë bayëjënga entsamënda, y chënga montsaisëbocana ca!”

<sup>37</sup>Y Galileoca nýetsca pueblënguñe Jesusbiamá yojtsótatšëmbo.

**Jesús, Simón Pédrëbe uambén  
mamábioye tbojanshná  
(Mt 8.14-15; Mc 1.29-31)**

<sup>38</sup>Chentšana, Jesús chë judiëngbe enefjuana yebnentšana tojëftsanbocna y Simonbe yebnentše tojánamashëngo. Simonbe uambén mamá šocá inajájona

jabuache calentóraca, y chë chentšë imojtsemna entšanga chabiamá Jesúsbioye tmojanimpadá. <sup>39</sup>Chora Jesús chë šocábioye yojtsejbéna y tojánayana: “iCalentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontšé chënga jobuácuedana.

**Jesús ba šoquënga tojanashná**

(Mt 8.16-17; Mc 1.32-34)

<sup>40</sup>Shinýe yojuenatjëmba ora, banga inýe y inýe šocana bomnënga Jesúsbioye tmojanënatse, y cha nyëtsca šoquëngbeñe cucuatšënga tojanjájó y tojanashná. <sup>41</sup>Chora, ba šoquëngbentsana bacna bayëjënga imojtsaisebocana y mëntšá imojtsanchembumbuana: “iAca chë Bëngbe Bëtsabe Uaquiñá condmëna ca!” Pero Jesusna yojtsëcácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

**Chë judiëngbe enefjuana  
yebnënguenache, Bëngbe Bëtsabe  
soyëngama Jesús entšanga  
yojanabuayiná**

(Mc 1.35-39)

<sup>42</sup>Yëfsana tojanbinýna ora, Jesús chë pueblentsana tojéftsanbocna, y canýe luaroye, entšanga ndoyenoye tojtsanoñe. Pero entšanga tmojána cha jetsenguanguama, y cha yojtsemnoye tmojánashjajna. Chënga imojétseboše Jesús cach pueblentšë chaotsoquedáñama, <sup>43</sup>pero Jesús tojanéyana: “Atše šontsemna chë tšabe noticiënga Bëngbe Bëtsabe amëndayama inýe pueblënguenáchnaca jábuayenana. Chama Bëngbe Bëtsá šonjichmó ca.”

<sup>44</sup>Y chentšana, Jesús yojánana Bëngbe Bëtsabiamá entšángbioye

abuayinayae, chë judiëngbe enefjuana yebnënguenache Judeoca.

**Canýe te mallajta beonga  
ashebuánaye te**

(Mt 4.18-22; Mc 1.16-20)

**5** <sup>1</sup>Canýe te, Jesús, Genesaret ca uabaina uafjájónaye tsachañe yojtsemna ora, ba entšanga tmojánashjajna, y chënga tša imojtsenajuatsëntšnaye Bëngbe Bëtsabe palabra jouenama. <sup>2</sup>Jesús, chë uafjájónaye tsachañe bécoñe tojáninýe uta ena barquësha; chë beonga ashebuánayëngna barquëshanguentsana tmojéftsanbocna atarraiešhangá jetsáboshabiamá. <sup>3</sup>Jesús canýe barquëshañe tojánamashëngo; chësha Simónbesha inauamna. Chora Simónbioye mëntšá tbojanianya: “Quem tsachañentšana chcoye mëyamba ca.”

<sup>4</sup>Tojanótbema ora, Jesús chë barquëšhoicana tojanontšé entšanga jabuátambama. Jabuátambama tojanpochocá orna, Simónbioye tbojanianya: —Shbuatsëntsoye barquësha mëyamba y tšëngaftangbe atarraiešhangá šmochjushbuetše, beonga jashebuáyama ca.

<sup>5</sup>Pero Simón tbojanjuá: —Buatëmbayá, nyëts ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraiešha chantëtëshbuetše ca.

<sup>6</sup>Tmojanëshbuetše orna, bëtscá beonga tmojánishëche y chëngbe atarraiešhangá tojanontšé jtsatanécanana. <sup>7</sup>As, chë inýe barquëshañe imojtsemna enutëngbioye tmojánëfjatšëmbo, jabújabuachama chamuábama. Chora chënga tmojánabo, y nyëts uta barquësha beóngaca tmojanajutjé. Tša chëftanga causa, tojanontšé chë uta barquësha

jtsenatjémbambana. <sup>8</sup> Simón Pedro chca tojáninÿe ora, Jesús bentsé tojanoshéntsamentšé y tbojaniyana: —iBéngbe Utabná, atšé bacna soye amá sèndmèna, chíyeca átšbentsana mojuaná ca!

<sup>9</sup> Chè tša beonga jashebuáyama Jesús tojanmama, Simón y chë cháftaca imojtsemnënga imojouatjaná.

<sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: —Ndoñe matauatjana. Morscana, entsànga Béngbe Bètsabiana cochántanguaye, y nÿe beonga ashebuanayá ndoñe quecochátmèna ca.

<sup>11</sup> As chora chë barquëshangá tsachoye tmojtanéyamba y lempe jéseboshjonèse, Jesús tmojanasto.

**Jesús, canÿa bacna nguayanánaca  
šocábioye tbojanshná**  
(Mt 8.1-4; Mc 1.40-45)

<sup>12</sup> Jesús canÿe pueblentšé yojtsemna ora, chentšé tojánashjango canÿe entsá bacna nguayanánaca šocá. Chë šocá Jesúsbioye tbojáninÿe ora, tojanoshéntsamentšé y jubiacá fshantsóntscoñe yojotsejbéna y tbojanimpadá: —Béngbe Utabná, aca tcojtsebošèse, aca catjobenaye atšbe šocana jtsebojuánana ca.

<sup>13</sup> As Jesús cucuátšeca tbojánbojajo y tbojaniyana: —Añe, sèntseboše. iŠocana cbotsebojuaná ca!

Y cachora chë šocana tbojtsanóbojuanañe. <sup>14</sup> Chora Jesús tbojanmandá: —Ndocnábeñe chë soye cattsecoéntyaye; nÿe Jerusalenoca báchnèbioye motsa, y cha cochjinÿinÿiye aca mora ya tšabá cojtsatsmènama; y chora cochjuátšëmbona ntšamo Moisés chabe leyinè tojanmandacá, Béngbe

Bètsábioye chama jètschuayama, chca, nÿetsca entsànga chamotatsëmbona mora ya tšabá cojtsatsmènama ca.

<sup>15</sup> Pero ndayá Jesús yojtsamama más entsànga imojátatsëmbona, y ba entsànga imojtsójoye chábioye joyeunayama y chëngbe šocanëngama chauashnama. <sup>16</sup> Pero Jesús yojanamana jtsoñana entsànga ndoyena luarëngoye y choca Béngbe Bètsáftaca ibnécuentaye.

**Jesús, canÿe jama ndobenábioye  
tbojanshná**  
(Mt 9.1-8; Mc 2.1-12)

<sup>17</sup> Canÿe te, Jesús yojtsabuatambá ora, chentšé básefta fariseunga y ley abuátambayënga imojtsetbiámana, Galileoca nÿetsca pueblënguentsana áshjajnënga, Judeoquënga y Jerusalemquënga. Y chora Jesús šoquënga yojtsashnaye, Béngbe Bètsabe obenánaca. <sup>18</sup> Chora tojanopasá, básefta boyabásenga canÿe šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye, <sup>19</sup> pero jamashjnama ndoñe tmonjanobená, tša entsànga causa. Chcasna, gradasëšënguëjana chë yebnentša tsbanánoye tmojánasëngo y batsá tejèshe tmojtsanjuaná. Chorna, chë atëfjnëjana chë šocá tjuashiñe tmojanéstjango, entsàngbe tsèntsaca, Jesusbe natsanoica. <sup>20</sup> Jesús tojáninÿe cha chë šocá jáshnama bétsobenama chënga puerte imojtsošbuáchemá. As, chë jama ndobenábioye tbojaniyana: “Bacó, acbe bacna soyënga tcbontseboyperdoná ca.”

<sup>21</sup> Chora chë ley abuátambayënga y chë fariseunga mëntšá tmojanontšé juabnayana: “Quem boyabása ndoñe tšabá Béngbe Bètsabiana quenátichamo; mo chábioye

cuafjoyenguangcá entsemna. Ndocna entśá quenátobena bacna soyëngama inya japerdónana; nye Bëngbe Bëtsá aíne ca.”

<sup>22</sup> Pero Jesús yojtsetátšëmbo ntšamo chënga imojtsejuabnayama; as tojanéyana: “¿Ndáyeca tšëngaftangbe ainaniñe chca šmojtsejuabná?

<sup>23</sup> ¿Tšëngaftangbiama ndayá má paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? <sup>24</sup> Y chca, morna atše cbochanjínyanýiye, chë Bëngbe Bëtsá Entśá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanianyana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entšangbe delante, chë cha inajájona tjuashe yojescñe y Bëngbe Bëtsábioye atschuanaye chentšana yojtsatoñe. <sup>26</sup> Chama nyetsca entšanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

**Jesús, Levíbioye tbojanchembo chabuastama**

(Mt 9.9-13; Mc 2.13-17)

<sup>27</sup> Chca vojochnëngüentšana, Jesús chentšana tojéftsanbocna y canýe entśábioye tbojáninýe, Leví ca uabainá, chë entšangbioye impuesto Romocama atjanayentše inétsotbemañe. Chora Jesús tbojanianyana: “Šmasto ca.”

<sup>28</sup> Y Leví lempe tojésanboshjona, tojtantsbaná y Jesús tbojanasto.

<sup>29</sup> Chentšana, Levina bëts fiesta chabe yebnentše Jesusbiam

yojama. Y chë fiestentše imojtsemna banga impuesto atjanayënga; y inýe entšangnaca mesëshentše imojtsetbiámana.

<sup>30</sup> Chora, chë fariseunga y chë ley abuátambayënga tmojanontšë chë Jesusbe uatsjëndayëngbiama podesca oyebuambnayana; y chëngbioye mëntśá tmojanéyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojtseśá y šmojtsofšëśná ca?

<sup>31</sup> Y Jesús tojanéjua: —Salud bomnënga ashnayá ndoñe ntsëjabótana, pero šoquëngna aíne.

<sup>32</sup> Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

**Jesús tmojantjá chë Bëngbe Bëtsáftaca jencuéntama tondaye saytescama**

(Mt 9.14-17; Mc 2.18-22)

<sup>33</sup> Chora chënga Jesúsbioye tmojanianyana: —Juan chë Ubayanabe uatsjëndayënga y chë fariseunge usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nye nyets tempo jesosañana y jesofšëśnañana ca.

<sup>34-35</sup> Chora Jesús tojanéjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ofjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentšana

mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá cha y chë ofjanéngaftaca endmëncá, cachcá endmëna atše, atšbe uatsjendayéngaftacnaca ca —cha tojanéjua.

<sup>36</sup> Jesús mëntsánaca tojanacuntá jabuátambama: “Ndocná queonybatatëtše basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtše entšéjua chë tanguájuañe ndoñe tšabá ntsinýnana. <sup>37</sup>Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana; y chca, chë vínoye y chë jasabenga tondayama ntjatoservénana. <sup>38</sup>Chíyeca co, chë tojtseshayana vínoyna tsëm jasabenguiñe juaftsuámama. <sup>39</sup>Ndocná, chë bóchena vínoye tojatëmo y chentsána játsbošana chë tojtseshayana vínoye jatofšiyana; cha jayanana: ‘Chë bóchena vínoye tša tšabeye ca.’”

**Jesusbe uatsjéndayënga ochnayté trigo tmojanátabebe**

(Mt 12.1-8; Mc 2.23-28)

**6** <sup>1</sup>Canye ochnayté, Jesús canye jajajana vojtsaye; chabe uatsjéndayënga trigo imojtsaiuatabnaye, imojtsaiúshenëcaye, y imojtsaiuasaye. <sup>2</sup>Chë causa, básefta fariseunga tmojanatjaye: —¿Ndáyeca šmojtsama chë ochnayté jamama ndoñe quenátslesenciana soye ca?

<sup>3</sup>Y Jesús tojanéjua: —¿Ndoñe šmëndualía y šmondétatšëmbo, ntšamo rey David y chabe enutënga tmojanmama shéntseca imojtsemna ora y jasama vojtsëjaboto ora? <sup>4</sup>Chca

orna, David Bëngbe Bëtsabe bëtš yebnentše yojámashëngo y chë Bëngbe Bëtsá chentše yojamnama inýinýnaye tandëšënga vojase, y chë cháftaca imojánajna entšángnaca yojátšataye. Y chë tandëšna nýe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canye bacna soye tojanma ca —Jesús tojanéjua.

<sup>5</sup>Y Jesús más tojanéyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

**Chë buashana cucuatše bomna entšá**

(Mt 12.9-14; Mc 3.1-6)

<sup>6</sup>Inýe ochnayté, chë judiëngbe enefjuana yebnoye Jesús tojánamashëngo y tojanontšë jabuátambana. Y chentše yojtsemna canye entšá, catšbioica cucuatše buashanëtše bomná; <sup>7</sup>y chë ley abuátambayënga y fariseunga chíñe imojtserrondana jinýama nderado Jesús chë ochnayté chábioye tabuanjashna, as chca chënga jtsebomnana ndaye sóyeca Jesús mal jaquédana. <sup>8</sup>Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojanianyana: “iMotsbaná y chentše tsëntsaca motsa ca!” Y chë entšá vojotsbaná y entšangbe tsëntsaca vojotsaye. <sup>9</sup>Chora Jesús chë inýengbioye tojanéyana: “¿Ndayá yojtselesenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochócana ca?”

<sup>10</sup>Y nyëtscanga chabe chabuajana imojtsemnënga tojanënyané, y chë buashana cucuatše bomnábioye tbojanianyana: “Macuenýanéjaná ca.” Y chë boyabása tojanacuenýanéjaná, y

tšabá chětša yojtsatamna. <sup>11</sup> Pero chë inyengna puerte tmojanotjayaná, y tmojanontšé enatsëtsnayana ndayá muanjobenaye Jesusbe contra jamana ca.

**Jesús chë bnétsana uta  
uatsjédayënga tojanabacacá**  
(Mt 10.1-4; Mc 3.13-19)

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nyëts ibeta cháftaca tbojanencuentá.

<sup>13</sup> Tojanbinýna ora, chabe ústonënga tojánachembo, y chënguentšana tojanëbuáyana bnétsana uta uatsjédayënga, chë ndëmuanýënga “chabe ichmónënga cánaca” tojanébobaye. <sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, <sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá; <sup>16</sup> Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšinë bochjanboshjoná.

**Jesús ba entšanga yojanabuatambá  
y yojánashnaye**  
(Mt 4.23-25)

<sup>17</sup> Chentšana, Jesús chéngaftaca chë tjocana tojtantsmá y canýe jachañe tojanoquedá ba chabe ustonëngaftaca y ba inýe entšángaftaca. Ba entšanga choye tmojánabo Judeocana, Jerusalenocana y Tiro y Sidón, chë mar bėjaye béconana pueblënguentšana, Jesúsbioye oído jabuájuaama y chëngbe šocanëngama chauashnama. <sup>18</sup> Y chábeyeca chë bacna bayëjbe juabna uambayënga tšabá imojtsatsmëna. <sup>19</sup> Nyëtsca entšanga tša imojtseboše y ndayánaca imojtsama Jesús jabojajuama, er chábentšana bëts

obenana yojtsóbecana y nyëtscanga yojtsashnaye.

**Chë ndegombre oyejuayana  
bomnënga y ndëmuanýëngbiama  
tša lastema yochtsemna**  
(Mt 5.1-12)

<sup>20</sup> Jesús chabe uatsjédayëngbioye tojanontješé y tojanéyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

<sup>21</sup> “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsatënbijauye ca.

<sup>22</sup> “Puerte oyejuayënga šmochtsemna, entšanga chacmojtšëbuayënja ora, chacmojtsatëbuacana ora, chacmojtsëyanguá ora, y tšëngaftanga ndoñe tšabá šmotsama ca chënga chamojtsichamo ora, tšëngaftanga atšbe ústonënga bëtsemnama. <sup>23</sup> Chë te puerte šmochjóyejuaye, er celoca canýe bëts uacanánana šmochántsebomna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

<sup>24</sup> “Pero itša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

<sup>25</sup> “iTša lastema tšëngaftanga chë mora shachanëngbiama, er shëntsana šmochántsebomna ca!

“iTša lastema tšëngaftanga chë mora oyejuayëngbiama, er ngmënama šmochanjenóbošachna ca!

<sup>26</sup> “iTša lastema tšëngaftangbiama nyëtsca entšanga tšabá chamojtsoyëbuambná ora; er cachcá chëngbe bëts taitanga monjánama

chë Bëngbe Bëtsabe ndoñe ndegombre juabna oyebuambnayéngaftaca ca!”  
—Jesús tojanéyana.

**Chë uayayëngbiana bonshánana  
jtsebomnana**  
(Mt 5.38-48; 7.12)

<sup>27</sup>“Pero tsëngaftanga, átšbioye ouenanënga cbéyana: Tsëngaftangbe uayayënga šmochtsababuánjeshana; chë tcmojtsébuayënjëngbiana tšabe soyënga šmochtsama;

<sup>28</sup>chë tsëngaftangbiana bacna soyënga bošëngbiana, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana.

<sup>29</sup>Nderado ndánaca cányoica tcmojajuebjantsetase, cochjomiye chë ínyoica cachcá chacmomama; nderado ndánaca quéfsáya tcmojúabocana, cachcá cochjonjaye acbe shabuanguanéjuanaca chauetsácñama. <sup>30</sup>Ndánaca chacmojtjañábioyna, jatsetayana; y nda ndayánaca chacmojefcábioyna, ndoñe catjontšínjena chacmatoyema.

<sup>31</sup>Inyëngaftaca šmochtsama, ntšamo chë ínýenga tsëngaftangaftaca chamotsamama šmojtsebošcá.

<sup>32</sup>“Tsëngaftanga, nýe chë tcmojtsababuánjeshanënga šmojtsababuánjeshanëse, ¿ndaye tšabe soye chca šmattsama?; er chë bacna entšágnaca chca mondbétsama. <sup>33</sup>O nderado, nýe chë tsëngaftangbiana tšabe soyënga tmojtsamëngbiana tšabe soyënga šmojtsamëse, ¿ndaye tšabe soye chca šmattsama?; er bacna entšágnaca chca mondbétsama.

<sup>34</sup>O nýe chë cmochtëchenanguama šmojtsejuabnángbioye šmojúyentsámëse, ¿ndaye tšabe soye chca šmattsama?; er chë bacna

entšágnaca mondbetsenántsamiana, chëngbentsána cachcá jtóyëngacñama jtsobátmanëse. <sup>35</sup>Pero tsëngaftangna cmontsamna chë uayayënga jtsababuánjeshanana; y tšabe soyënga chëngbiana jtsamana y júyentsámiana, chëngbentsána ndayánaca jtóyëngacñama ntjatobatmancá. Chca, tsëngaftanga uacanánana cuenta canýe bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayéngaftaca y bacna entšangaftácnaca tšabia comna. <sup>36</sup>Inyëngbiana lastemadënga šmochtsemna, ntšamo tsëngaftangbe Taitá yomncá ca” —Jesús tojánayana.

**Ndoñe ntsichámuana chë ínýenga  
tšabá o ndoñe tšabá tmonjamama**  
(Mt 7.1-5)

<sup>37</sup>“Ndocá ínýengbiana šmattsichamo chë ndoñe tšabá tmonsamama, y Bëngbe Bëtsá ndoñe queochátichamo tsëngaftanga ndoñe tšabá šmonjama ca. Inyëngbiana ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tsëngaftanga ndoñe tšabá šmonjama ca. Inyënga šmochjáperdonaye y Bëngbe Bëtsá cmochanjáperdonaye. <sup>38</sup>Inyëngbioye šmochjatsataye y Bëngbe Bëtsá cmochántatsataye. Mo nda canýe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatsataye. Ntšamo tsëngaftanga ínýengbioye chašmojábiama, uabouana o ndoñe jabuache soyënga, Bëngbe Bëtsá cachcá tsëngaftangbioye cmochanjábiana ca” —Jesús tojánayana.

<sup>39</sup>Jesús quem cuétnaca tojánayana jabuátambama: “¿Canýe jtaná nantsobena inyë jtaná jtsanachayama? ¿Chca ndoñe nýets útata ndaye

tbuabentše buanjótsatše? <sup>40</sup> Chë uatsjendayá ndoñe ntsemnana chë buatëmbayabiama más bëtsá. Pero chabe uatsjendayana chaojapochocá ora, cach buatëmbayacá jtsemnana.

<sup>41-42</sup> “Canÿa chabe bominiÿiñe canÿe niñëfja tojtsebomñese, cha ndoñe ntsobenana chabe catšátbioye jauyanana: ‘Acbe bominiÿëntšana canÿe polvështema jtsebuchjátsęcama šmolesenciá ca’. Natsana cha bontsemna cachabe bominiÿëntšana chë niñëfja jtse nobuchjátsęcana, tšabá jinÿyama jobenayama, chabe catšátbe bominiÿëntšana chë polvotema jtsebuchjátsęcama. iCachcá entsemna acbiama, bacna entšá chë ntšamo ndegombre tcojuabnacá ndiniÿinÿayá! Chë tša bacna soye cojtsama ca acbe catšátbioye tcojauyana ora, cach aca tša bëts bacna soyënga cojtsamama ntjenjuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jshétsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama ca” —Jesús tojánayana.

**Tšabe betiye o ndoñe tšabe betiye  
tondmënama, jtsoatšëmbuana  
ntšamo tojashajoncá**  
(Mt 7.17-20; 12.34-35)

<sup>43</sup> “Ndoñe queonÿbatsmëna, chë canÿe tšabe betiÿiñe podesca soye jashájonana; ni canÿe ndoñe tšabe betiÿiñe tšabe soye jashájonana.

<sup>44</sup> Betiÿënga jtsabatmana ntšamo cada betiÿe tojtseshajcá. Uchmašëshëntšana quenátopodena higuëbé jocñana; ni uvašëša, shëshëntša betiÿëntšana.

<sup>45</sup> Chë tšabe entšana, chabe ainanoca tšabe juabnënga bomnëntšana

jtsóyebuambnayana; y chë bacna entšana, chabe ainanoca ndoñe tšabe juabnënga bomnëntšana jtsóyebuambnayana. Er ndayá becá ainanoca tomnama entšá jtsóyebuambnayana ca” —Jesús tojánayana.

**Chë uta ucuatjoniñe**  
(Mt 7.24-27)

<sup>46</sup> “¿Ndáyeca tšëngaftanga atšë šmnëtsatsaye, ‘Utabná, Utabná ca’, y ntšamo atšë stsichamcá ndoñe ntsamana? <sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: <sup>48</sup> Cha endmëna mo canÿe entšacá, nda canÿe yebna jajebuamna becá fshantse jashenoye yojajutjo y ndëtšbenguiñe yojúcuatjoye. Bëjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtšbenguiñe jabuache yojáucuatjona. <sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canÿe entšacá, nda canÿe yebna yojajebo nÿe fshantsiñe, tondayiñe ntjucuatjoycá. Bëjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

**Jesús canÿe Romano soldadëngbe  
amëndayabe bochichnayábioye  
tbojanshná**  
(Mt 8.5-13)

**7** <sup>1</sup> Entšángbioye chca jáuyanana tojanpochocá ora, Jesús Capernaum puebloye tojana. <sup>2</sup> Chentšë yojoyena canÿe romano soldadëngbe amëndayá. Cha ibnabomna canÿe bochichnayá puerte bonshaná, y chora cha šocá yojtsemna, ya jtsóbanama.



<sup>3</sup> Jesús ba šoquéngbioye yojáshnama encuéntayana chë amëndayá yojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. <sup>4</sup> Chënga Jesúsbioye tmojánashjango y tša imojtseimpadana, mëntšá: “Quem soldadëngbe amëndayá mercedo entsebuájona chacotsájabuachama; <sup>5</sup> er cha bëngbe luarentša entšángbioye corente endábabuanëshana, y cachá chë bëngbe nefjuana posada šonjayentšjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinÿenana átšbioye jabama. Atše mercedo taitsatobuajoñe aca atšbe yebnoye chacuamashënguama; <sup>7</sup> chíyeca ni mo añemo chiyatentšetá jama aca jajébenguama. Morna nÿe cochjayana y atšbe bochichnayá tšabá echántatsmëna. <sup>8</sup> Er atše sëndábamna átšbioye mándayënga y átšnaca soldadëngbe amëndayá sëndmëna. Atše canÿe soldádbioye stjauyana ‘motsa ca’, cha cachora jana; y ínÿabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiana yojenjnaná, y jobuértanëse chë ba entšanga cha ustonéngbioye tojanéyana: “Ndegombre cbëyana, ni mo nÿets Israelentše, ni canÿa quem boyabasacá tša ošbuachiyá chiyátinÿena ca.”

<sup>10</sup> Y chë ichmónënga yebnoye tmojtaná orna, tmojáninÿena chë bochichnayá ya tšabá yojtsatsmëna.

### Jesús tojanma canÿe viudabe uaquiñá cháuatayenama

<sup>11</sup> Chca tojanopasá chentššana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye. <sup>12</sup> Chë pueblo amashjuanoye yojtsebeconá orna, entšanga chë pueblentššana canÿe obaná imojtsábocana jauábtontsama; chë obaná canÿe viudabe uaquiñá inamna y nÿe cha uaquiñá. Bëtšcá entšanga chë obanabe mamá imojtsetjëmbambnaye. <sup>13</sup> Bëngbe Utabná chë viudábioye tbojáninÿe ora, chabiana tbojanongmé y tbojanianya: “Ndoñe matošachena ca.”

<sup>14</sup> Y jobéconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojanianya: “Bobontse, atše cbëyana: iMatëtšbaná ca!”

<sup>15</sup> Chora chë obaná tojtantsbaná y tojanontšë oyebuambnayana; y chabe mamábioye Jesús chë bobontse tbojtánatse. <sup>16</sup> Nÿetsca entšanga tša uatjana yobuache chca tmojáninÿe ora, y Bëngbe Bëtšá imojtsatschuanaye, mëntšá jayanëse: “Bëngbentše canÿe Bëngbe Bëtšabe juabna oyebuambnayá cuatënjonÿná ca.” Y mëntšánaca: “Bëngbe Bëtšá tojabo chabe entšanga jabújabuachama ca.”

<sup>17</sup> Y nÿets Judea luarëjana y chë chábuañe luarenache entšanga imojátatšëmbona ndayá Jesús tojanmama.

### Juan chë Ubayanabe ichmónënga

(Mt 11.2-19)

<sup>18</sup> Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentsšana útata tojánachembo, <sup>19</sup> y Jesúsbioye

vojichamuá jatjayama cha tayojamna chë Cristo, chë jabama ibojanmëná, chë Uámana Uabuayaná, o ínÿabiama jatobátmama tayojétsamna ca. <sup>20</sup> As chë Juanbe ichmónënga Jesúsbioye tmojanobeconá y tmojaniyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiama jatobátmama ca.

<sup>21</sup> Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinÿa. <sup>22</sup> Chora Jesús mëntšá tojanéjua: —Motsata y Juánbioye šochjauyana ntšamo šojinÿe y šojouencá: Chë jtanënga tšabá entsatëbinÿa, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjémëngbioye chë tšabe noticiënga montsabuayiná. <sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejubayëse, átsbeñe ošbuáchiyana ndoñe tontsajbaná cha ca! —Jesús tojanéyana.

<sup>24</sup> Chë Juanbe ichmónata chentšana tbojésanbocnentsana, Jesús tojanontsé Juanbiama entsanga jáuyanana, mëntšá: “Juan jinÿama šmojánbocna ora, ¿ndayá jinÿama šmojánbocana entsanga ndoyena luaroye? ¿Canÿe entsá ainaniñe tondaye añemo ndbomná, mo canÿe šëše bínÿiaca shatiyeynëšcá? <sup>25</sup> Y ndoñese, ¿ndayá jinÿama choye šmojánbocana? ¿Canÿe boyabása uámana entsáyaca bopormaná? Ndoñe. Tšëngaftanga šmondétatšëmbo chë uámana entsáyaca bopormánënga y chë bëtscá bomnánaca nÿe

tondayama ntsecochinÿencá vida bomnëngna, reyëngbe yebnënguiñe mondbëtsiyenama. <sup>26</sup> Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna oyebuambnayá? Ndegombre; y cbéyana, canÿa Bëngbe Bëtsabe juabna oyebuambnayabiama más bëtsá. <sup>27</sup> Cha, Juan, endmëna ndabiama Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora:

Cristo, atšbe entsá natsana  
sënjichmó acbiama  
chaóyebuambama,  
entsanga jábuayenama aca jabama  
ainaniñe tšabe juabnéngaca  
chamotseprontánama ca.

<sup>28</sup> Ndegombre cbéyana: Nÿets tempo entsángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

<sup>29</sup> “Nÿetsca entsanga chca Juánbioye tmojanóyeunanga y chë Romocama entsángbioye impuesto atjanayéngnaca, nÿets ainánaca tmojánayana Bëngbe Bëtsá nÿetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá. <sup>30</sup> Pero chë fariseunga y ley abuátambayënga, ntšamo jubáyama Juan yojanamancá jóyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiama jamama yojanjuabnacá.”

<sup>31</sup> Jesús mëntšánaca tojánayana: “Cbochanjáuyana ndayacá morsca entsanga imomna, y ndayëngcá chënga imomna. <sup>32</sup> Chënga mondmëna mo chë plazëngoca mondbetsetbiámana basetemëngcá; chëngna mëntšá jabuache jtseñatsayana:

‘Tšëngaftangbiamá fsënjaflautá y ndoñe chešmatslantsá; ngménaca fsënjaversiá y ndoñe chešmatenóbošachna ca.’

<sup>33</sup> Juan chë Ubayaná tonjánabo y ndoñe quenjatamana bëtscá entsángbeñe jtsemnana, ni tandëše jasana, ni vínoye jofšiyana; y tšëngaftanga šmontsichamo chana bacna bayëjbe juabna uambayá inamna ca. <sup>34</sup> Morna, chë Bëngbe Bëtsá Entšá tbojanbemá tonjabo y chana aíñe entsamana bëtscá entsángbeñe jtseyayana y jtsofšëšnayana, y tšëngaftanga chabiamá šmontsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca’. <sup>35</sup> Pero Bëngbe Bëtsá endbëtsinjinynaye cha nyets osertánana bomná yomnama, chë ndayá cha tojama ora ndayá chentsana inobocna soyëngaca ca’ —cha tojánayana.

**Jesús, chë fariseo  
Simonbe yebnentše**

<sup>36</sup> Canye fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema. <sup>37</sup> Chë pueblentše yojamna canye shembása, bacna vida bomná. Jesús chë fariseobe yebnentše yojtsesama chë shembása yojátatsëmbona; as cha chë yebnoye tojánashjango y tojanamba canye alabastro botellëše, jútjena canye botamana uanguëtše béjayeca. <sup>38</sup> Jesusbe shecuatšëntše yoJoshëntsamentšiyë, šachénaca; shëchbuíyeca chabe shecuatšënga yojtsefchecuacná y cachabe stjënashaca ibojtsatsshëchojuaye. Chabe shecuatšënga yojtonguëtsëntšiyë y chë botamana uanguëtše béjaye ibojtashëcbuëšcaja. <sup>39</sup> Chë fariseo

Jesúsbioye ofjaná chca tojáninye ora, mëntšá Jesusbiamá yojtsejuabnaye: “Cha ndegombre canye Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canye bacna vida bomna shembása ca.” <sup>40</sup> As Jesús chë fariseóbioye tbojanayana: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

<sup>41</sup> Y Jesús tojánayana: —Canye entsá crocénana uyentšamianá, uta ndebénata yojánabamna. Canya shachna patse denario crocénana ibojandebena, y chë inýana, shachna bnëtsana. <sup>42</sup> Pero chë útata tondaye ibontsebomna ndayentsana cha jëtsëntšabuáchiyama; as chë uyentšamianá nyets útata chë ndebénana yojtsaperdónaye.

Chora chë fariseóbioye tbojanayana: —Mora šmëyana, ¿chë útatentšana nda más chë uyentšamianábioye buantsebobonshana ca?

<sup>43</sup> Y Simón tbojanjuá: —Atše šontsinýana chë más bëtscá ndebená ca.

Y Jesús tbojanayana: —Ndegombre, ntšamo endmëncá tcjayana ca.

<sup>44</sup> Jesús, chë shembásabioye jontješiyëse, Simónbioye tbojanayana: —Minye quem shembása. Atše acbe yebnoye sënjamashëngo y aca búyeshe ndoñe chešcatatuatšëtá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecbojó. <sup>45</sup> Ndoñe chešcatámocho, pero cha tonjámashëngo orscana ndoñe ntjájbanana atšbe shecuatšënga onguëtsëntšnaye.

<sup>46</sup> “Aca bestšašinë aceitiye ndoñe chešcatsbuešcja, y chana

aíñe botamana uanguëtse béjaye šonjashecbuešcja. <sup>47</sup>Chcasna atše cbëyana, cha šonjinÿanÿé atšbiana corente bonshánana yojtsebomna, er atše chabe bëtscá bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

<sup>48</sup>Y chora Jesús chë shembásabioye tbojaniyana: “Acbe bacna soyëngama perdonaná contsemna ca.”

<sup>49</sup>Chora chë ófjanënga chentšë innatbiámanëngna tmojanontšë enatsëtsnayana: “¿Nda quem entšá yojtsemna, chë bacna soyëngámnacna entšángbioye jtsaperdónayana ca?”

<sup>50</sup>Y Jesús más chë shembásabioye tbojaniyana: “Aca átšbeñe icošbuachéyeca, atsbočaná cochántsemna; natjëmbana motsatoñe ca.”

#### Chë Jesúsbioye imojanájabuachana shembásenga

**8** <sup>1</sup>Chca tojanopasá chentšana, Jesús bëtš y base pueblënguëjana yojánana, tšabe noticiënga Bëngbe Bëtsabe amëndayama entšanga abuátambaye y abuayinyaye. Chë bnëtšana uta uatsjëndayëngna cháftaca imojtsajna. <sup>2</sup>Básefta shembásengnacna imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿsëfta bacna bayëjënga tojtanëbuacna; <sup>3</sup>Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

#### Chë jenabe cuento (Mt 13.1-9; Mc 4.1-9)

<sup>4</sup>Ba pueblënguentshana mallajta entšanga tmojánbocana Jesús jinÿama. Ba entšanga jounama tmojanobeconá ora, Jesús mëntšá tojanacuntá: <sup>5</sup>“Canÿe, canÿe jená jénaye jaujuquëshama yojéftsebocna. Yojtsëjquëshaye orna, básefta jénaye benache juachañe yojuatquécjána; chiñna entšanga imojtsebotájaye, y jaja shloftšënga imojásttajna y imojtsósañe. <sup>6</sup>Inÿe meshëngna ndëtšbenguinë yojuatquécjána. Yojuábocna orna, betso yojtsábojo, chë fshantsiñe ndoñe yapa búyeshe yonjamna causa. <sup>7</sup>Inÿe meshëngna uchmëshangañe yojuatquécjána y chë uchmëshangá lempe yojtsatscué, chë jénayeca canÿiñe yojuábocna ora. <sup>8</sup>Inÿe meshëngna, uanguaniñe yojuatquécjána. Yojuájua orna, bëtscá yojuashájona; canÿe jénayentshana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jounama tmojtsobenënga, šmochjouena ca.”

#### Ndáyeca Jesús cuentëngaca yojánabuatumambaye (Mt 13.10-17; Mc 4.10-12)

<sup>9</sup>As chora chabe uatsjëndayënga tmojantjá: —¿Ntšamo chë cuento yojtsayana ca?

<sup>10</sup>Y Jesús tojanëyana: —Bëngbe Bëtsá tšëngaftanga cmontsinÿanÿna nÿetsca chë mo iytëmencá yomna soyënga chabe amëndayama, pero chë ínÿëngbioyna ndoñe; chë soyëngama chënga lempe cuentëngaca sëntšëtsšná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá quem soyënga

chamouena, ndoñe queochátësertana ca.

**Jesús chë jenabe cuentama tojanabuayená**

(Mt 13.18-23; Mc 4.13-20)

<sup>11</sup>“Chë cuento mëntšá endayana: Chë jénaye Bëngbe Bëtsabe palabra entsemna. <sup>12</sup>Chë benache juachañe yojuatquécjana básefta jénaye endayana chë básefta entsànga Bëngbe Bëtsabiama soyënga tmojouenënga; pero chora Satanás betscó jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsošbuáchemá y bacna soyënguentsána ndatsebácanënga chamotsemnama. <sup>13</sup>Inye entsànga mondmëna mo chë ndëtšbenguiñe yojuatquécjana jenaycá. Chë entsàngna Bëngbe Bëtsabe palabra jouenana y oyejuayënga jtsemnana. Pero ndoñe nyëts tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmonsasëbuaché causa. Inyënga mochantsëbuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye. <sup>14</sup>Inye entsànga mondmëna mo chë uchmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnama yapa jesenójuabnayana, y mallajta crocénana y ba soyënga jtsebomnama yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá. <sup>15</sup>Inye entsàngna mondmëna mo chë uanguaniñe yojuatquécjana jenaycá. Chëngna

Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canýe betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Chca mochántsama, Bëngbe Bëtsábeñe jtsošbuáchiyëse y nyëtsca soyënguiniñe puerte uantadënga jtsemnëse ca” —Jesús tojanabuayená.

**Chë uajuinýanëshama cuento**

(Mc 4.21-25)

<sup>16</sup>“Ndocná canýe uajuinýanëshá juajuinýenana, chentšana ndaye sóyeca chësha jtsëstama o jutsnëshá tajsoye jtsajájuama; juajuinýenana ndayá tsbanánoca juajájuama, chë luarentšë amashjuanëngbiama chaotsebínýnama. <sup>17</sup>Er ndocna yoiytëmena soye, ntjinýcá queochaisoquéda, y chë entsàngbiama ndótatšëmbo soye, ntsotatšëmbcá queochaisoquéda.

<sup>18</sup>“Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nyë batšá ibosertana soyëngama bochántsebnatjëmba ca” —Jesús tojánayana.

**Chë Jesusbe ndegombre pamíllanguentsënga**

(Mt 12.46-50; Mc 3.31-35)

<sup>19</sup>Chora, chabe mamá y chabe catšátanga chë Jesús yojtsemnentšë tmojánashjajna, pero ndoñe imontsobena chábiyë jobëconana, yapa entsànga causa. <sup>20</sup>As canýa Jesúsbiyë mëntšá tbojaniana: —Acbe mamá y acbe catšátanga shjoca montsemna y montseboše aca jinýama ca.

<sup>21</sup> As Jesús tojánayana: —Chê Bêngbe Bêtsabe palabra tmojouenênga y ntšamo tmojouencá tmojtsamênga jtsemnana atšbe mamá y atšbe catšátanga, atšbe ndegombre pamíllanguentsênga ca.

**Jesús chê binÿia y chê bėjaye  
bonguana vojétsbema**  
(Mt 8.23-27; Mc 4.35-41)

<sup>22</sup> Canÿe te, Jesús chabe uatsjéndayêngaftaca canÿe barquêshoye tojánamashêngo y chênga tojanéyana: “Uafjajónaye chenguana cuajna ca.”

As tmojána; <sup>23</sup> y imoitsenachnêjyanentscuana Jesús vojtsomaná. Ndeolpe, chê bėjayiñe corente jabuache binÿia vojóshjango y vojontsé bėjaye chê barquêshoye jtsobuajútjiana. Y chca, chêngbiana puerte resjo vojtsemna. <sup>24</sup> Chora chê uatsjéndayênga tmojána Jesús jetsefsenama y mēntšá tmojaniana: —iBuatēmbayá! iBuatēmbayá! iMontsenatjémbambana ca!

Chora Jesús tojantsbaná y chê binÿia y chê bêts olêshêngoye tojanmandá: “Bonguana šochtsemna ca.” Y chê binÿiayana tojanéjbana y lempe bonguana vojtsatsmēna.

<sup>25</sup> Chentšana Jesús chabe uatsjéndayênga tojanéyana: —¿Bêngbe Bêtsá tšêngaftanga jujabuáchama yobenama, cabá ndoñe šmontsošbuaché ca?

Y chênga auatjanánênga y ojnanánênga mēntšá imojtsenatsétsnaye: —¿Nda quem boyabása yomna? iChá tojamandá ora, masque chê binÿia y chê bėjaynaca joyeunayana ca!

**Chê Gerasa luaroca bacna bayēja  
uambayá**  
(Mc 8.28-34; Mc 5.1-20)

<sup>26</sup> Chentšana Gerasa ca uabaina luaroye tmojánashajna, Galilea

ndirichiñe. <sup>27</sup> Jesús fshantsoye tojánastjango ora, chê pueblcana canÿe entšá chábioye tojánabo. Cha ya bayté bayėje juabna vojtsobomma, ndocna entšayá yonjanichétjona; y yebniñe ndoñe yonjaniana, sinó obanêngbe cuevêshênguenache. <sup>28</sup> Chê entšá, Jesúsbioye tbojáninÿe ora, chabe natsanoica vojoshéntsamentsiye y mēntšá vojtsáyebuache: —¿Ndayá átšeftaca cojtseboše, Jesús chê celoca Bêngbe Bêtsabe Uaquiñá? iDiosmandá ndoñe šcatjatsetšená ca!

<sup>29</sup> Chca tbojaniana, er Jesús tojanmandá chê bacna bayėje juabna chábentšana chauesebocnama. Ba soye chê bayēja vojánama chê entšá ndoñe tšabá chaotsemnama. Chê entšanga imojuamana cucuatšentšana y shecuatšentšana cha jtsétsbuayana bonguana chaotsemnama, pero chana jtsatabebiana, y chê bacna bayėje mândoca entšanga ndoyena luarêngoye vojánachana. <sup>30</sup> Jesús chê boyabásabioye tbojantjá: —¿Ntšamo cabaina ca?

Y cha tbojanjá: —Atše sênduabaina Legión ca.

Cha chca tojánayana, er chábeñe ba bacna bayêjênga tmojánamashjna. <sup>31</sup> Y chê bayêjênga Jesús tmojanimpadá, chê corente uabouana tboye ndoñe chaondíchamuama. <sup>32</sup> Chentša béconana ba cotsênga imnajena, tjoca imnétsosañe; as chê bayêjênga Jesús tmojanimpadá chê cotsêngbeñe jamashjna chualesenciana, y Jesús aínne chca tojanalesenciá. <sup>33</sup> As chê bayêjênga chê entšábentšana tmojésanbocana y chê cotsêngbeñe tmojánamashjna; y chentšana, chê cotsênga batsjocana peñéšejana uafjajónayoye imojtsoshbuetsé y vojtsatajo.

<sup>34</sup> Chê cotsênga anÿenênga chca vojopásama tmojáninÿe ora, chentšana

tmojtsanacheta y tmojána chë soye jacuéntama chë puebloca y chiñe luarenache. <sup>35</sup>Entšanga tmojánbocana ndayá tojanopasacá jinŷama, y Jesús yojtsemnoye tmojánashjajna ora, tmojáninŷe chë entšá chë ndábentsana bayëjenga tmojtanbocna, Jesusbe shecuatšentše yojtsótbemañe, entšayá uichëtjoná y chabe nŷets juábnaca. Y chë entšanga chama corente imojouatjaná. <sup>36</sup>Ntšamo yojopasacá tmojáninŷengna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmëñana. <sup>37</sup>Chentšana, nŷetscanga chë Gerasa luarentše oyenënga Jesúsbioye imojtseimpadana chë luarentšana ínŷoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. <sup>38</sup>Chë entšá chë ndábentsana bacna bayëjenga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chautuocuedama y mëntšá tbojanianana: <sup>39</sup>“Acbe yebnoye motsatoñe y cochjácuntaye lempe ntšamo Bëngbe Bëtsá acbiamá tojamcá ca.”

Chentšana chë boyabása yojtsatoñe, y nŷets pueblëjana tojanacuntá ntšamo Jesús chabiamá tojanmcá

**Jesús canŷe shembásabioye  
tbojanšná y tojanma Jairëbe  
bembetema cháuatayenama  
(Mt 9.18-26; Mc 5.21-43)**

<sup>40</sup>Jesús chë uafjájonaye chenguánoica tojtanashjango ora, nŷetsca entšanga oyejuayënga tmojtanofja, er nŷetscanga chabiamá imojanobátmana. <sup>41</sup>Chora tojánashjango canŷe entšá, Jairo ca

uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše yojoshëntsamentšiyey iyojtseimpadana chabe yebnoye cháuama; <sup>42</sup>er chë nŷe canŷe bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entšanga chábioye imojtsojuatsëntšenaye. <sup>43</sup>Chë entšanguentše yojtsaye canŷe shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayinë yojtsepochóca, y ndocná yonjobenaye cha jáshnana. <sup>44</sup>Chë shembásana stëtšicoicana Jesúsbioye yojobeconá y chabe entšayá sibuájua tojanábojajo. Y cachora chë oboftjajuanana ibojtsobojuána. <sup>45</sup>Chora Jesús tojanatjá: —¿Nda šjabojajo ca?

Nŷetscanga imojtsichamo ndoñe ca; as Pedro tojánayana: —Buatëmbayá, entšanga cmontsatsëntšená y cmontsayájuatsëntšenaye ca.

<sup>46</sup>Pero Jesús cachiñe tojánayana: —Pronto nda šjábbojajo, er atše sënjasentë obenana átšbentsana jóbocnana, mo nda stjashna orcá ca.

<sup>47</sup>Chë shembása tojáninŷe Jesús yojtsetátšëmbo cha tbojánbojajuama. As chora, ngmëmnyáj tojána y Jesusbe shecuatšentše yojoshëntsamentšiyey; y nŷetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama.

<sup>48</sup>Chora Jesús tbojanianana: —Bembe. Bëngbe Bëtsábeñe icošbuachéyeca shnaná cantsatsmëna. Natjëmbana motsatoñe ca.

<sup>49</sup>Jesús cabá yojtsóyebuambnantscuana, chë judiëngbe enefjuana yebnentša

mandayábíocana canya tojánashjango, y chë mandayábíoye tbojanianyana: —Acbe bembe ya tontsóhana; ndoñe más chë Buatëmbayábíoye matébëyabomana ca.

<sup>50</sup> Pero Jesús chë soye tojanuena; as chë mandayábíoye tbojanianyana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tsábá echántsatsmëna ca.

<sup>51</sup> Chë yebnoye tmojánashajna ora, Jesús ndoñe tonjanalesenciá banga choye jamashjna, nye Pedro, Juan y Santiago y chë shembásetembe bëtsétsatna aña. <sup>52</sup> Nyetscanga imojtsenóbošachiye y ngmënaca imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

<sup>53</sup> Chë entsanga Jesúsbiyoye nye imojtsáfchaye, er chënga imojtsetátšëmbo chë shembásetema obaná yojétsemnana. <sup>54</sup> Chora Jesús chábiyoye tbojanábuacueshache y jabuache tbojanianyana: “iShembásetema, matëtsbaná ca!”

<sup>55</sup> Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatésé, chaosama. <sup>56</sup> Chë shembásetembe bëtsétsata puerte ojanánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

**Jesús, chabe uatsjédayënga tojanichamó, Bëngbe Bëtsabe amëndayama jábuayenama**  
(Mt 10.5-15; Mc 6.7-13)

**9** <sup>1</sup> Chentsana, Jesús chabe bnëtsana uta uatsjédayënga tojánachembo, y mando y obenana tojanatšatá bacna bayëjënga entsángbentsana jtëbuacanama y šocanëngama

jashnayama. <sup>2</sup> Tojanichamó Bëngbe Bëtsabe amëndayama jábuayenama y entsángbiyoye jashnayama. <sup>3</sup> Y mëntsá tojanéyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entséjua jenotrócama cach ndoñe. <sup>4</sup> Canye yebnentše posada chacmojúyentsame ora, chentše šmochjoquëda inye puebloye játantscuana. <sup>5</sup> Nderado ndayentše posada ndoñe chacmonjuyentsame, chentsana šmochjësebocana y shecuatšentsa polvëshe šmochjësenstoto, chca, chëngbiyoye jinýanýiyama chënga ndoñe tsábá tšëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjédayënga tmojéftsanbocana y tmojána, nyetsca chë base pueblotëmënguenache chë tsábe noticiënga abuayinyaye y entsanga šocanëngama áshnaye.

**Herodes y Jesús**  
(Mt 14.1-12; Mc 6.14-29)

<sup>7</sup> Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsana tojtanayena ca, <sup>8</sup> inyënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inyëngna canya chë tempo imojanmëna Bëngbe Bëtsabe juabna oyebuambnayënguentsá obanënguentsana tojtanayena ca. <sup>9</sup> Pero Heródesna tojánayana: “Cach atše sënjanmandá Juanbe bestšaše chamotséstjanguama. ¿As, nda cha nántsemna, chë ndabiamá chca soyënga jtsóyebuambnayana sentsuenana ca?”



Chíyeca Herodes yojtsenguaye  
ntšamo jamése Jesús jinýama.

**Jesús shachna uaranga boyabásenga  
saná tojanacaredadó**

(Mt 14.13-21; Mc 6.30-44; Jn 6.1-14)

<sup>10</sup> Chë Jesús tojánichamonga  
chábioye tmojtanashjango ora,  
lempe ntšamo chënga tmojanmama  
tmojancuentá. Y Jesús, nýe chënga  
jëftsëbiatšese ínýoye tojtsanoñe,  
Betsaida ca uabaina puebioye.

<sup>11</sup> Pero chë entsanga chë soye  
tmojántatšëmbona, y as tmojanasto;  
y Jesusna tšabá chënga tojanébuaja,  
y Bëngbe Bëtsabe amëndayama  
yojtsëtsësnaye, y chë šoquënga  
imojtsemnéngbioye tojanashná.

<sup>12</sup> Ya jetiñe yojtsobiamná orna,  
chë bnëtsana uta uatsjëndayënga  
Jesúsbioye tmojanobeconá y mëntšá  
tmojaniana: —Chë entsanga  
cuantichamuá, jóchnama y saná  
jonguangoñama chamotsama chë  
béconana pueblotémënguenache y  
luarënguenache; er quem luariñe  
ndocná quenatiyena ca.

<sup>13</sup> Jesús chora tojanéyana:  
—Tšëngaftanga saná chëngbioye  
šmochjacaredádaye ca.

Pero chënga tmojanjuá: —Nýe  
shachna tandëse y uta beónata  
fséntsebomna; nýetscangbiana saná  
jabuámiyama nderado nda tojasna,  
añe cuanjacaredádaye ca.

<sup>14</sup> Er mo shachna uaranga  
boyabásenga immamna. Pero  
Jesusna chabe uatsjëndayënga  
tojanéyana: —Mamëndá nýetscanga  
chamotbiamama shachna  
bnëtsátsanënga ca.

<sup>15</sup> As chënga cha tmojanma y  
nýetsca entsanga tmojanotbiana.

<sup>16</sup> Chora, Jesús chë shachna tandëse  
y chë uta beónata tojanca, y celoye

tojanontješé, Bëngbe Bëtsábioye  
chama tbojtanchuá, tojanjatá y  
chabe uatsjëndayënga tojanantregá  
entsángbioye chamuatšatama.  
<sup>17</sup> Nýetsca entsanga tmojanse  
jtoshachaye nýetsá, y cabá bnëtsana  
uta sbarëco tmojanajutjé chë  
ojamnëtëmëngaca.

**Pedro tojánayana, Jesús chë Cristo  
bétsemnama**

(Mt 16.13-19; Mc 8.27-29)

<sup>18</sup> Canýe te, Jesús canýa Bëngbe  
Bëtsáftaca ibojtsencuentaye orot, chabe  
uatsjëndayënga cháftaca imojtsemna.  
Chora tojanatjá: —¿Nda atšë  
bétsemnama entsanga imojtsichamo  
ca?

<sup>19</sup> Y chënga tmojanjuá: —Báseftanga  
montsichamo Juan ca, ínýengna Elías  
ca, y ínýengna canýe Bëngbe Bëtsabe  
juabna oyebuambnayá tempscá mora  
tojtayena ca.

<sup>20</sup> As Jesús tojanatjá: —Y  
tšëngaftangna, ¿nda atšë bétsemnama  
ntšamo šmochjayana ca?

Y Pedro tbojanjuá: —Acna chë  
Cristo condmëna, chë Bëngbe Bëtsabe  
Uámana Uabuayaná ca.

**Jesús tojánayana cha ibojamna  
jóbanana y jtayenana**

(Mt 16.20-28; Mc 8.30-9.1)

<sup>21</sup> Pero Jesús corente chënga  
tojanamëndá ndocnábeñe chama  
ntsecuëntayana. <sup>22</sup> Y mëntšá  
cachabiana tojánayana: —Chë  
Bëngbe Bëtsá Entšá tbojanbemá  
bontsemna puerta jasúfria, chë  
judiëngbeñe bëtšëjemëngcá  
amëndayëngbiana, chë  
judiëngbe bachnangbe más  
uámana amëndayëngbiana y ley  
abuátambayëngbiana uabotená  
jtsemnana. Entšanga mochanjóba,

pero unga tianoye cha echántayena ca.

<sup>23</sup> Chentšana nÿetsca entšanga tojanéyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidinë jtsemándayama, chabe quem luarentša soyënga cachcá chauesonÿá atše juastama, y cada te chaotseprontana átšbeyeca jasúfriama, y crucinë jobanámna. <sup>24</sup> Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebomna. <sup>25</sup> Er ñndayama entšá buanjosérvia nÿetsca quem luarentša soyënga jtsebomnana, cha pochocaná jtsemnama tojtsá y chë nÿetsca tescama yomna tšabe vida tojtsoperdese? <sup>26</sup> Er ndëmuanÿe entšá, atšbiama o atšbe buayenana soyëngama tojtséuatja, chë Bëngbe Bëtsá Entšá tbojanbemánaca chabiana echantséuatja, cha chabe bëts buashinÿinÿaniñe chaojésabo ora, chabe Taitabe bëts obenánaca y chabe angelotémëngaftaca adoraná. <sup>27</sup> Ndegombre cbéyana, báseftanga muentše montsemnënga quemochatóbana, Bëngbe Bëtsá chabe obenánaca entšángbeñe jabomándama jabana ntjëftsinÿcá ca” —cha tojánayana.

**Jesús inÿetšá tojanobinÿná**  
(Mt 17.1-8; Mc 9.2-8)

<sup>28</sup> Mëntšá tojanopasá: Chca palabrënga tojanoyebuambá chentšana posuftaytese, Jesús tojëftsanëbiatše Pedro,

Santiago y Juan, y canÿe tjoye tojántsua, Bëngbe Bëtsáftaca jencuéntama. <sup>29</sup> Bëngbe Bëtsáftaca ibojtsencuéntantscuana, chabe jubiá inÿetšá yojtsinÿna, y chabe uichëtjonëjuangá tša uafjantsëjuangá yojtsamna y tša yojtsabuashinÿinÿana. <sup>30</sup> Chora uta boyabásata tbojanonÿná, Jesúseftaca ibojtsencuéntaye. Chata ibojamna Moisés y Elías; <sup>31</sup> corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana. <sup>32</sup> Masque Pedro y chabe enutata tša ocnayënga imojtsemna, nÿe imojtsefšna y tmojáninÿe Jesusbe juachañe tša yojtsebuashinÿinÿana y chë uta boyabásata cháftaca ibojtsemna. <sup>33</sup> Chë uta boyabásata Jesúsbentšana ibojluára ora, Pedro, Jesúsbiye tbojanianya: “Buatëmbayá, itša tšabá bëngbiama cuanmëna muentše jtsemnana ca! Mora fchanjapórma unga tambotémënga: cánÿetema acbiana, ínÿetema Moisesbiana y ínÿetema Elíasbiana ca.”

Pero Pedro ndoñe yontsetátšëmbo ntšamo yojtsichámuama. <sup>34</sup> Y chca yojtsóyebuambnantscuana, canÿe jantšeteshe yojóbema, y chëngbiye yojáutsbotse, y chënga chë tsoye imojtsemnana tmojáninÿe ora, chë uatsjëndayënga chama imojtsauatja. <sup>35</sup> Chora chë jantšetëshoicana canÿe oyebuambnayana tojanóbocna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

<sup>36</sup> Chë oyebuambnayana tmojanuენტšana, tmojáninÿe Jesús canÿa yojtsemna. Chë uatsjëndayënga iytëca imojtsemna, y chë tempo ndocnábiye chama imonjuyenaye.

**Jesús, canÿe basa bacna bayëjbe  
juabna uambayábioye tbojanshná**  
(Mt 17.14-21; Mc 9.14-29)

<sup>37</sup>Yëfsana, chë tjocana tmojtantsmá ora, ba entsanga tmojánbocana Jesús jajébenguama. <sup>38</sup>Chora, chë entsanguentsana canÿe boyabása tojanontsé mëntsá uayebuáchana: —Buatëmbayá, Diosmanda atšbe uaquiñá minÿe. Nÿe cha atšbe uaquiñá endmëna; <sup>39</sup>y mora, bayëjbe juabna chábioye bontsësháchichana, y nÿe ndeolpe jóntšana yoyana, ataque jshachana y uayoicana shashiye jtsabocanana. Y chábentsana chë bayëja ndoñe betesco ntjésebocnana, y cuerpiñe corente maltrataná jeseboshjonana. <sup>40</sup>Acbe uatsjédayënga sënjaimpadá chë bayëja chábentsana chamuatábocnama, pero ndoñe chematobená ca.

<sup>41</sup>As Jesús tojánayana: —iNÿetšá ndošbuáchiyënga y bacna entsanga! ¿Buetayté šojtsemna tšëngaftangaftaca jëftsemnana y jtsëuantánana ca?

Chora chë boyabásabioye tbojanayana: —Moye chë uaquiñá mánatse ca.

<sup>42</sup>Chë basa yojtsebeconá ora, chë bacna bayëja chábioye tbojanshajayé y inÿe ataque tbojanëshache. Pero Jesús chë bayëjbioye tbojanácacana, chë basetémbioye tbojanshná y chabe taitábioye tbojtantëregá. <sup>43</sup>Y nÿetscanga puerte ojanánënga imojtsemna, Bëngbe Bëtsá tša obenana bomná inamnana.

**Jesús cachiñe tojánayana cha  
ibojamna jóbanana y jtayenana ca**  
(Mt 17.22-23; Mc 9.30-32)

Nÿetsca entsanga, ndayá Jesús yojtsamama ojanánënga imojtsemnëntscuana, chabe

uatsjédayënga cha tojanéyana: <sup>44</sup>“Quem soye tšabá šmochjouena y ndoñe chacmondëbnëtjomba: Chë Bëngbe Bëtsá Entšá tbojanbemá entsangbe cucuatšinë mochanjáboshjona ca.”

<sup>45</sup>Pero chënga ndoñe yontsósertana ntšamo Jesús yojtsëtsëtsnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpadana chama chauabuayenama.

**¿Nda chë más uamaná yomna?**  
(Mt 18.1-5; Mc 9.33-37)

<sup>46</sup>Chë tempo, chë uatsjédayënga tmojanontsé enatsëtsnayana, nda chë más uamaná bëtsemnana.

<sup>47</sup>Jesús yojtsetátšëmbo ntšamo chënga imojtsejuabnayama; asna, canÿe básetema tbojánishache, chabe juachaca tbojántbema, <sup>48</sup>y chëngbioye tojanéyana: “Nda átšbeñe ošbuachiyá bëtsemnana, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentšë chë más nduamaná, cha chë más uamaná entsemna ca.”

**Nda bëngbe contra ndoñe  
tontsemná, béngaftaca jtsemnana**  
(Mc 9.38-40)

<sup>49</sup>Juan, Jesúsbioye tbojanayana: —Buatëmbayá, bënga fsënjinÿe canÿe boyabása y cha aca jótšëmbonëse, entsángbentsana bacna bayëjbe juabna endëtëbuacana; pero cha béngaftaca ndoñe quenátšmëna causa, chama fsënjesauyaná ca.

<sup>50</sup>As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, béngaftaca jtsemnana ca.

**Santiago y Juánbioye  
Jesús tojanécacana**

<sup>51</sup> Jesús celoye jtama yojtsobeco ora, nyëts añémoca cha yojtsejuabnaye Jerusalenoye jama. <sup>52</sup> Natsana báseftanga tojanichamó, y chënga tmojána canye base pueblotémoye Samaria luaroca, posada chabiamanga janguangoñama; <sup>53</sup> pero chë luarentša entsanga ndoñe tmonjánbošena posada juantsãmiana, er tmojántatšëmbona cha Jerusalenoye yojetsayama, chë chëngbe uayayëngbe uamana puebloye. <sup>54</sup> Chabe uatsjëndayata, Santiago y Juan, chë soye tbojáninye ora, Jesús tmojaniana: “Bëngbe Utabná, ¿quetseboše bëndata fchaimandá celocana ñeshe chaótsatše y quem entsanga chaotsapochócaye ca?”

<sup>55</sup> Pero Jesús yojobuértana y chátbioye tojtsanécacana, chca juabna bomna causa. <sup>56</sup> Chentshana chënga inye pueblotémoye tmojtsanoñe.

**Chë Jesús juastama bošënga  
(Mt 8.19-22)**

<sup>57</sup> Benachëjana imojtsajna ora, canye boyabása Jesúsbioye tbojaniana: —Atšbe Utabná, atše séntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

<sup>59</sup> Jesús inye entsábioye tbojaniana: —Šmasto ca.

Pero cha tbojanjuá: —Atšbe Utabná, šmoleseñciá atšbe taitá chjshesabotbontsañe ca.

<sup>60</sup> As Jesús tbojaniana: —Chë Bëngbe Bëtsabiamanga mo obanëngcá imomnënga, ntšamo Bëngbe Bëtsá yomandacá ndoñe tmontsama

causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entsanga cochjabuayená ca.

<sup>61</sup> Inyana Jesúsbioye tbojaniana: —Atšbe Utabná, atše séntseboše aca juastama, pero šmoleseñciá natsana atšbe pamíllangbiamanga jaisodiósoftamanga ca.

<sup>62</sup> As Jesús tbojaniana: —Nda cachabe soyëngamanga tbojtsengmena, Bëngbe Bëtsabe amëndayocamanga ndoñe ntsoservénana; er cha jtsemnana mo canye arayacá, chë tojtsetrabája ora, stëtšoye tojtsaisantjësncá ca.

**Jesús canyëšfta bnëtsana y uta  
entsanga tojanichamó Bëngbe  
Bëtsabe soyëngamanga jábuayenama**

**10** <sup>1</sup> Chë soyënga chentshana, Bëngbe Utabná Jesús inye canyëšfta bnëtsana y útatnaca tojanabacacá, y utáta chabe natsana tojanichamó, chë cha ibojtsemnanga jama pueblëngoye y luarëngoye.

<sup>2</sup> Mëntšá chënga tojanéyana: “Canyë bëts jajañe bëtscá játbanamanga entsemnanga, pero peonga báseftanga; chíyeca, chentshana nduñbioye jaimpádanga ba peonga chauichamó chë jaja saná játbanamanga. Cachcá, quem luarentše bëtscá entsanga montsemnanga Bëngbe Bëtsábioye nduabuátmëngna, y chëngbioye chabiamanga abuayinyayënganga nye báseftanga. Chíyeca, Bëngbe Bëtsá moimpadanga ba abuayinyayënganga chauichamó quem entsanga chábioye júbuajama. <sup>3</sup> Motsajna; šmochjinýe, atše tšëngaftanga cbontsichamná mo oveshënga cuenta, tjañe quešëngbeñe. <sup>4</sup> Ndoñe šmattsambayehecnaja, ni crocénana šmattsaiuábuenana, ni shecochëtjonësheshe; y nda chacmojacheuá ora, ndoñe yapa bën chentše šmatjáisënobiamnaye.

<sup>5</sup>“Ndaye yebnentše chašmojámarshjna ora, natsana šmochjayana: ‘Lempe tšabá quem yebnentše chaotsomñe ca.’ <sup>6</sup>Y chë yebnentše chca juabna bomna entšanga tmomñesna, chë tšabiana ndegombre chentše echántsemna; pero ndoñese, chca tšabiana chentše ndoñe queochátsmëna. <sup>7</sup>Canÿe yebnentše šmochjoquëda, y šmochjase y šmochjofsiye ntšamo chentše chacmojacaredadaycá; er chë trabajayá merecido jtsebuájonana chca juacánama. Canÿe pueblentše nÿe inÿe y inÿe yebñenguenache ndoñe matajnana.

<sup>8</sup>“Ndaye pueblentše chašmojámarshjna y tšabá chacmojúbuajentše, šmochjase ntšamo chentše chacmojacaredadaycá; <sup>9</sup>chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca.’ <sup>10</sup>Pero canÿe pueblentše chašmojáshjango y ndoñe chacmonjúbuaja, chentša tsashenangoye šmochjábocana y mëntšá šmochjayana: <sup>11</sup>‘iChë tšëngaftangbe pueblentša polvëshe, chë bëngbe shecuatšënguinië tojuanjëshe, camuentše fšcuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetatšëmbo chë Bëngbe Bëtsabe amëndayana tšëngaftangbeñe entsemnama ca.’ <sup>12</sup>Ndegombre cbëyana, quem luare jopochócama te, chë luarentša entšangbiroye Bëngbe Bëtsá puerte jabuache echantsacastígaye, y Sodoma puebloca bacna entšangbiroye ndoñe nÿa nÿetšá jabuache ca” —Jesús tojánayana.

### Chë nduauenana entšanga

(Mt 11.20-24)

<sup>13</sup>“iTša lastema Corazín puebloca entšangbiama! iTša lastema

Betsaida puebloca entšangbiama! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entšanga ya tempo chëngbe bacna soyëngama ngmënaca matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entšayangaca matmëntopormanga y jatinÿashiñe matmëntotbiama. <sup>14</sup>Pero ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebomna, chë Tiro y Sidonoca bacna entšangbe castiguama. <sup>15</sup>Y tšëngaftanga, Capernaum pueblentša entšanga, čcelóntscoca atsebánanënga šmochtsemna ca šmojtsejuabnanga? iChë uabouana infernoye cmochantsésetjango!

<sup>16</sup>“Nda tšëngaftanga tcmojoyauná, chana atše joyeunayana; y nda tšëngaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábiroye jtsabotena.”

### Chë canÿsëfta bnëtsana y uta entšanga tmojtanashjajna

<sup>17</sup>Chë canÿsëfta bnëtsana y útatna Jesús yojtsemnoye tmojtanashjajna, puerte oyejuayënga; y chábiroye mëntšá tmojanianana: —iBëngbe Utabná, aca jótšëmbonëse, chë bacna bayëjëngnaca šonjoyauná ca!

<sup>18</sup>Y Jesús tojanëyana: —Ndegombre. Y tšëngaftanga Satanásbiroye chca šmontseyëñjaná ora, entsemna mo Satanás celocana canÿe tcuinÿcá jtsotsatšana stjinÿcá. <sup>19</sup>Atšna obenana tcbonjatšatá mëtšcuayënga y alacranëngbeñe chašmotsajnama,

y bēngbe uayayá Satanásbe  
n̄yets obenana jáyēnjanama,  
tšēngaftanga ndocá ntjapasacá.

<sup>20</sup> Pero móyejuanga, ndoñe chē bacna  
bayējēnga chacmóyaunama obenana  
šmojtsebmoma, sinó tšēngaftangbe  
uabaina celoca ya yojtšábemanama,  
er tšēngaftanga chē n̄yetsca tescama  
yomna tšabe vida šmochántsebmoma  
ca —cha tojanéyana.

**Jesús puerte tojanoyejuá**

(Mt 11.25-27; 13.16-17)

<sup>21</sup> Chora Jesús, chē Uámana  
Espíritbeyeca, corente oyejuayá  
tojánayana: “Atše cbatschuá, Taita,  
celoca y quem luarentša Utabná.  
Aca, chē n̄ye batšá tatsēmbēnga  
tconjan̄yan̄yé, chē tša tatsēmbēnga y  
osertánēngbiama tcojaiytēme soyēnga.  
Añe, chama cbontsadorana, Taita, aca  
chca chaotsemnama tcojábosēnayeca.

<sup>22</sup> “Atšbe Taitá lempe chca šonjatšetá.  
Chē Uaquiñábíoye ndocná corente  
quebnatábuatma; n̄ye chē Taitá añe.  
Y chē Taitábíoye ndocná corente  
quebnatábuatma; n̄ye chē Uaquiñá  
añe, y ndémuan̄yēngbíoye chē  
Uaquiñá tojtseboše nda chē Taitá  
yomnama jin̄yan̄iyama, chēngnaca  
chē Taitábíoye mochantsábuatma ca.”

<sup>23</sup> Chentšana, Jesús chabe  
uatsjēndayēngbíoye tojanobuértana  
y n̄ye chēngbíoye tojanéyana:  
“¡Puerte oyejuayēnga chē ntšamo  
tšēngaftanga šmontson̄yacá  
jin̄yama tmojtsoebenēnga! <sup>24</sup> Er atše  
cbēyana, banga Bēngbe Bētsabe  
juabna oyebuambnayēnga y reyēnga  
tmojánbošena chē tšēngaftanga  
šmontson̄yá soyēnga jin̄yana, pero  
ndoñe tmonjánin̄ye; y tmojánbošena  
chē šmontsuenana soyēnga jouenana,  
pero ndoñe tmonjanuena ca” —cha  
tojánayana.

**Chē Samarioca tšabe  
entšabiama cuento**

<sup>25</sup> Can̄ye judiēngbe ley abuatambayá  
yojontšé Jesúseftaca jóyebuambayama,  
y jisháchichiyamna mēntšá tbojantjá:  
—Buatēmbayá, índayá šojtsemna  
jamana chē n̄yetsca tescama yomna  
tšabe vida jtsebmoma ca?

<sup>26</sup> Y Jesús tbojanjuá: —¿Ntšamo  
leyiñe iuábemana? ¿Ndayá chiñe  
condbétaliaye ca?

<sup>27</sup> Chē ley abuatambayá tbojanjuá:  
—“Chē Utabná Bēngbe Bētsá  
cochtsebobonshana n̄yets ainánaca,  
n̄yets espíritoca, n̄yets añemoca y  
n̄yets juábnaca”; y “ndēmua entšánaca  
cochtsebobonshana, ntšamo cach aca  
cuenobobonshancá ca.”

<sup>28</sup> Chora Jesús tbojaniana: —Tšabá  
šconjojuá. Chca cochtsama y chē  
n̄yetsca tescama yomna tšabe vida  
cochántsebmoma ca.

<sup>29</sup> Pero chē ley abuatambayá tšabá  
jenoquédamna Jesúsbíoye tbojantjá:  
—Y índase chē ndēmua entšánaca  
yomna ca?

<sup>30</sup> As Jesús tbojanjuá: —Can̄ye,  
Jerusalenocana Jericó benache  
can̄ye entšá yojtsetsmá, y básefta  
salteadorēnga imojébēbocna. Lempe  
imojtsefca, chē entšayánaca;  
imojtsejantšetaye y chentšana  
imojtsatónēnga, y chē entšá batšá  
obaná imojéseboshjona. <sup>31</sup> Ndeolpe, chē  
benachējana can̄ye judiēngbe bachna  
yojtsachnējuana. Chē entšábíoye ibojin̄ye  
ora, n̄ye chabuacá yojtsechnēnguañe.  
<sup>32</sup> Cachcá, can̄ye Levita, chē can̄ye  
Bēngbe Bētsabe bēts yebnoca trabajayá  
chējana yojtsachnējuana; y chē  
entšábíoye ibojin̄ye orna, n̄ye chabuacá  
yojtsachnēnguañe.

<sup>33</sup> “Chorna, cach benachējana can̄ye  
samaritano ináboye. Chē entšábíoye

ibojinÿe orna, ibojóngmia. <sup>34</sup> Chábioye yojobeconá, aceitiye y vínoyeca ibojáshna, y lisianënguinië entšéjuaca ibojuantsacjuá. Chabe couayiñe ibojéftsenjayiye, canÿe yebnoye posada uyentšamianoye ibojuánatse, y chentše chábioye ibojéftsinÿena.

<sup>35</sup> Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nÿetsá, y chë posada ndufñbioye ibojesabuenaye, y mëntšá ibojuayana: ‘Quem boyabása cochtsinÿena, y nderado más crocénana muabiama chacojenábojafjonasna, mëjana chaitísachnëjuana ora, cbochjabáisabuenaye ca.’ <sup>36</sup> Y chcasna, ÷chë unganguentšana nda cmojtsinÿana chë entšabiama yojtsejuabnaye cha cachacá entšá inamnama ca?’

<sup>37</sup> Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojaniyana: —Asna, motsa y cachcá cochjama ca.

#### Jesús, María y Martbe yebnentše

<sup>38</sup> Chentšana, Jesús benachëjana yojtsaye y canÿe base pueblotëmoye tojéftsanamashëngo; y canÿe shembása Marta ca uabainá, chabe yebnentše tbojanofja. <sup>39</sup> Martna canÿe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; <sup>40</sup> y chëntscuana Marta ba soyënga yojtsama. Cha Jesúsbioye tojanobeconá y tbojaniyana: —Utabná, ÷tondayana cmontsentsamna, atšbe quenata nÿe canÿa chašonÿá lempe jamama ca? Mëyana chašauájabuache ca.

<sup>41</sup> Chora Jesús tbojanjuá: —Marta, Marta, bëtsca soyëngama contsenócochinÿena

y contsenomantšná; <sup>42</sup> pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

#### Ntšamo Bëngbe Bëtsáftaca cuanjencuénta (Mt 6.9-15; 7.7-11)

**11** <sup>1</sup> Canÿe, Jesús Bëngbe Bëtsáftaca ibojtsencuéntaye canÿe luarentše. Tojanpochocá orna, canÿa chabe uatsjendayëngentšá tbojaniyana: —Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjendayëngaftaca tojanmcá ca.

<sup>2</sup> Y Jesús tojanéyana: —Bëngbe Bëtsáftaca chašmojtsencuénta ora, šmochjayana:

Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

<sup>3</sup> Mënté šmiyatšatá, cada te šnetsëjaboto tandëse.

<sup>4</sup> Bacna soyënga fsënjama: šmotsaperdónaye; er bëngnaca nÿetscanga chë bëngbiana bacna soyënga amëngbioye fsëndbetsaperdónaye.

Bacna soyënga jamama šojocohëngo ora, šcochjujabuache chca ndenobuíyama.

<sup>5</sup> Jesús mëntšánaca tojanéyana: “Nderado aca acbe bacóbioye tséntseto ora tcojá y tcojauyana: ‘Bacó, Diosmanda unga tandëse šmotsemná, <sup>6</sup> er canÿe atšbe amigo yebnocha tonjášhjango y tondaye quetsátsbomna cha jonánjama ca.’ <sup>7</sup> Ndegombre, cha tsocana tmojojuá:

‘Ndoñe šmatébyabomana. Běšáša ya entsatámena y atše y atšbe básenga ya fsěntsocjá; ndoñe quetsátobena mora jotsbanana y chě tanděše jámnana ca.’<sup>8</sup> Ndegombre, chě bacó ndoñe tonjotsbaná chě tanděše jámnana, cháftaca šuenatsětsnámase, cha pronto jotsbanana chca uéběyabomana ndoñe tconjajbaná causa, y lempe ntšamo cmojtsajabotcá cha cmochanjoiye.<sup>9</sup> Chcasna, atše cbéyana: Šmochjotjañe y Běngbe Bětsá cmochanjátšataye; šmochjánguango y šmochanjínýena; šmochjachembo y cmochanjébětafjo.<sup>10</sup> Er ndánaca ndayá tojtsotjanañá, jóyěngacñana; y tojtsenguá cha, jónýenana; y nda tojtsechembuanábioye jebiatěfjuana ca.

<sup>11</sup> “¿Nda tšěngaftanguentsana nantsobena, taitá tojtsemněse, cachabe uaquiñábioye canýe mětšcuaye jatštayana, beona tbojtsotjanañe ora; <sup>12</sup> o canýe alacránashe joyiyana, shěmněb tbojtsotjanañe ora? <sup>13</sup> Y chca, tšěngaftanga, bacna soyěnga aměnga, tšěngaftangbe baseteměngbioye tšabe soyěnga jatšatayama šmojtsamaněse, imás chě celoca Taitá, chě Uámana Espíritu echanjátšataye, chca tojtsotjanañěngbioye ca!” —Jesús tojánayana.

**Fariseunga tmojánayana Jesús  
Satanásbentšana obenana  
tojanóyěngacñe ca**  
(Mt 12.22-30; Mc 3.20-27)

<sup>14</sup> Jesús canýe entsábentšana canýe bacna bayěja tbojtanábocna. Chě bayěja nděbíá chě entsábioye tbojánbema, y chábentšana tojésanbocna ora, chě nděbíá tojtanontšě oyeuambnayana. Y chě entsānga chama imojenjnaná; <sup>15</sup> pero báseftanga imojtsichamo: “Beelzebú, cach Satanás, chě bacna bayějěngbe

aměndayá, quem boyabásabioye obenana tbojatsětá chě bayějěnga chauatěbuacnama ca.”

<sup>16</sup> Y ínýenga, Jesús jisháchichiyamna tmojanimpadá canýe běts soye chaoma, jinýanýiyama cha celoca obenana inabomna o ndoñe. <sup>17</sup> Pero Jesús yojtsetátšěmbo ntšamo chěngbe juabna bětsemnana. As tojanéyana: “Canýe aměndayábentše entsānga tmojtsenojatá y tmojtsenáyase, cachěnga jtsenpochócana; y canýe yebnentše oyeněnga tmojtsenojatá y tmojtsenáyase, chě pamíllanga tšabá nýets tempo ndoñe quemochátsmēna. <sup>18</sup> Cachcá, Satanás tojtsenojatá y cachabe contra tojtsemněse, ¿ntšamo nantsobena chabe mándayana quem luarentše jěftsebmnnana? Chca séntsichamo, er tšěngaftanga šmongsichamo Beelzebube obenánaca chě bayějěnga stsatěbuacana ca; <sup>19</sup> pero chca ndegombre tojtsemněse, ¿ndábeyeca tšěngaftangbe usetoněnga obenana imojtsebmna chě bacna bayějěnga jtěbuacnama? Chíyecna, cachěnga montsinýinýná ntšamo ndegombre yomnana, y tšěngaftanga ndoñe ndegombre soye šmongsichámuama. <sup>20</sup> Y atšna, Běngbe Bětsabe obenánaca entsāngbentšana chě bayějěnga sěndětěbuacana; y chě soye entsinýinýná, Běngbe Bětsabe aměndayana tšěngaftangbioye tojśshjanguama.

<sup>21</sup> “Canýe corente añemo bomna entsá, bětscá ármangaca chabe yebna tojtsinýeněse, chě tsoca tomna soyěnga ndoñe ntjotšana. <sup>22</sup> Pero inýa chabiama más añemo bomná tojabo y tbojabetseyějnaná, chě cha yojanašbuaché armangá jtsabocana y chě tobomna sóynaca; y ntšamo chě inýa tojtsebošcá chě soyěngaca jamana.



<sup>23</sup>“Nda ndoñe átseftaca tontsemná, atšbe uayayá jtsemnana. Y nda átseftaca ndoñe tontsetrabája, chana atšbe contra jtsetrabájayana ca” —Jesús tojánayana.

**Ndayá inopása chë bacna  
entšángaftaca**  
(Mt 12.43-45)

<sup>24</sup>“Canÿe bacna bayëja canÿe entšábentšana tojësebcna ora, bojojo luarënguenache chë bayëja jtsanana, ndayentše jóchnama onguayinë. Ndoñe tonjínÿena ora, jenójuaboyana: ‘Atšbe oyenoye, chë ndayentšana sënjëftsebcnoye chanjeshëcona ca.’  
<sup>25</sup>Y choye tojtashjango ora, jinÿenana lempe tšabá cha jtesamashënguama, mo tsjajniñe y prontániñe cuaftsemncá.  
<sup>26</sup>Chora chë bayëja jana y inÿe canÿsëfta bayëjenga, chabiama más opëjenga jobiatšana, nyetscanga choye jamashjnama, chë boyabásabeñe joyénanama. Y chca, chë boyabása tempscama más bacna entšá jtoquédana, chora chë natsanama más bayëjenga abamna causa ca” —Jesús tojánayana.

**Chë ndegombre oyejuayana**

<sup>27</sup>Jesús chë soyënga yojtsichamëntscuana, entšanguentše canÿe shembása yojuayebuáchena: —iPuerte oyejuayá chë quem luaroye tcmojúshjango y tcmojëftseboché shembása ca!

<sup>28</sup>As Jesús tbojanianaya: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

**Chë bacna entšanga Jesús  
tmojanimpadá canÿe bëts soye  
chaoma, chabe obenana jinÿama**  
(Mt 12.38-42; Mc 8.12)

<sup>29</sup>Entšanga más imojtsójoye Jesús yojtsemnentše, y Jesús tojanontšë

jáuyanana: “Morsca entšanga puerte bacna entšanga; chënga montsotjanañe atše canÿe bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá. <sup>30</sup>Er chca, ntšamo Jonás Nínive puebloca entšanga canÿe bëts soye tojaninÿanÿé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entšángbioye, Bëngbe Bëtsabe amëndayana tojóshjanguama. <sup>31</sup>Bëngbe Bëtsá ntšamo morsca entšanga tmojanmama yochjayana te, chë Sur luaroca reiná echanjotsaye y morsca entšangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiama más uamaná endmëna.  
<sup>32</sup>Chë entšanga tšabá o ndoñe tšabá tmonjamama jayanama te, chë Nínive bëts puebloca entšángnaca mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojtsabuayiyenaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna ca” —Jesús tojánayana.

**Chë cuerpama uajuinÿanësha**  
(Mt 5.15; 6.22-23)

<sup>33</sup>“Ndocná canÿe uajuinÿanësha juajuinÿenana, canÿe iytémena luaroye juajájuama, ni canÿe cajonëshe tajsoye, sinó canÿe tsbanana luaroca juajájuama, chca, chë luaroye amashjuanëngbiama chaotsebínÿama.  
<sup>34</sup>Acbe bominÿe tšabá totsomñëse, acbe cuerpama mo canÿe

uajuinÿanëshacá jtsemnana; chíyeca aca jtsobenana, ntšamo tcojtsamcá chë bomínÿeca jtsonÿayana. Chë bominÿe ndoñe tšabá tontsemnësa, chë bominÿe tondaye ntsoebenana jamana, ntšamo tcojtsamcá chacobená jinÿyama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësa, lempe ntšamo chacojtsamcá ndoñe tšabá queochátsmëna. <sup>35</sup> Cuedado šmochtsebomna, tšëngaftangbe ainaniñe nÿe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana. <sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canÿe uajuinÿanëshá puerte tšabá tojtsebinÿnacá ca” —Jesús tojánayana.

**Jesús chë fariseungbiana y ley abuátambayëngbiana tojánayana, chënga ndoñe tšabá montsama ca**  
(Mt 23.1-36; Mc 12.38-40; Lc 20.45-47)

<sup>37</sup> Jesús chca jayanama tojanpochocá ora, chábioye canÿe fariseo tbojanofja chabe yebnoye jauasama. As Jesús tojánamashëngo y mesëshentše tojanótbema.

<sup>38</sup> Chë fariseo tojanëuatjaná, Jesús ntsacuentšabiaca jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábenga jtsatsmënama.

<sup>39</sup> Pero Bëngbe Utabná tbojaniana: “Tšëngaftanga fariseunga šmondmëna mo entšangcá ndëmuanÿenga chë tazëšënga y šcnenënga shjoicajana jtsóbojabiana, pero tsoyna nÿe

cachcá jonÿayana. Tšëngaftanga becá jtsamana entšangbiana mo tšabengcá jtsinÿnana; pero tšëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca. <sup>40</sup> ¡Juabna ndbomnënga! Tšëngaftanga ndoñe šmondëtatsëmbo, chë tšëngaftangbentsana entšanga ndayá jinÿyama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámama ndayá tšëngaftangbe ainanoye yomna soyënga, y chë entšangbe delante šmojama soyënga. <sup>41</sup> Tšëngaftanga cmontsamna, chë soyënguiñe ndayá ainaniñe yomnentšana ínÿengbioye jatsatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

<sup>42</sup> “iTša lastema tšëngaftangbiana fariseunga! Tšëngaftanga Bëngbe Bëtsabiama jtsequëcnayana chë jajañentša sananga bnëtsanentšana canÿe soye nÿetšá, y chë binche matatëmënguentšana menta, ruda y nÿetsca binche matatëmënguentšánënaca; pero nÿe batšá jtsamana chë nÿetscanga cachca derechënga chamotsebomnana y cha jtsebobonshánama. Quem soyënga cocayé cmontsamna jtsamana, chë inÿe tšabe soyënga ntjajbanacá ca.

<sup>43</sup> “iTša lastema tšëngaftangbiana fariseunga! Tšëngaftanga tša jtsebošana chë judiëngbe enefjuana yebnënguenache chë más uámama luarënga jtsebomnana, y benachiñe nÿa puerte respétoa entšanga chacmotsacheuanayama ca.

<sup>44</sup> “iTša lastema tšëngaftangbiana! Šmondmëna mo obanënga uatbontsaniñcá, ndoñe ntsinÿnana, y entšanga ntsetatšëmbcá chiñe jtsebotájayana. Chca šmondmëna, er

tšëngaftangbe ainana entsemna jútjena bacna juabnéngaca, pero entšangbiama ndoñe chca quešmátinÿna ca.”

<sup>45</sup> Jesús chca tojánayana ora, canÿe ley abuatambayá tbojanianaya: —Buatëmbayá, chca palabrenga contsoyebuambná ora, bëngbiámnaca ndoñe tšabá quecátichamo ca.

<sup>46</sup> Pero Jesús tojánayana: —iTša lastema tšëngaftangbiámnaca, chë ley abuátambayënga! Mo canÿe entšá, couáybioye canÿe uauta uasmanésha tbojuasmá, y chësha ndoñe yapa chaondëtsautama tondaye tontsamcá, tšëngaftanga entšangbioye jtsamëndayana bëtscá mandënga chamotsocumplínama, pero cach tšëngaftanga ni mo batšatémnaca jtsamana chë mandënga jtsocumplínama ca.

<sup>47</sup> “iTša lastema tšëngaftangbiama! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnana, chëngbe cuevëshënga jtsatspórmayëse; pero chë mo chëngcá, canÿe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye.

<sup>48</sup> Chca jtsamëse, tšëngaftanga šmontsinÿanÿná, ntsamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

<sup>49</sup> “Chíyeca, Bëngbe Bëtsá chabe bëts osertanánaca tojánayana: ‘Atšë chëngbioye chanjichamuá atšbe juabna oyebuambnayënga y atšbiama abuayinayënga, y báseftangbioye mochantsëbaye y ínÿengbioyna mochantsécamiye ca.’ <sup>50</sup> Y chca,

nÿets castigo morsca entšangbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana; <sup>51</sup> Abélbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentšë tmojanóba, altar y chë entšanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entšangbeñe nÿets castigo chaotsemnana ca.

<sup>52</sup> “iTša lastema tšëngaftangbiama, chë ley abuátambayënga! Tšëngaftanga jtsamana, Bëngbe Bëtsabe soyëngama jtsatatsëmbuama entšangbiama yapa totcá chaotsemnana. Cach tšëngaftanga ndoñe quešmátobena chë soyëngama tšabá jtsatatsëmbuana, y chama jtsatatsëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuátambayënga y fariseunga puerte tojánatëna, y cha chentšana yojtšaisebocana ora, tmojanontšë chábioye becá tjanayana, y imojtsama ba soyëngama chaóyebuambama, <sup>54</sup> chca, jisháchichiyama jtsebošëse, cachá ntsamo tojayana sóyeca chënga jtsebomnana ndáyeca chábioye mal jaquédana.

**Jesús, chë bacna entšanga  
ntsamo ndegombre tmojuabnacá  
ndinÿinÿnayëngbiama  
tojanabuatambá**

**12** <sup>1</sup> Chëntscuana, ba uaranga entšanga chentšë tmojanójóto; tša entšanga causa, nÿetscanga imojtsenatséntšenaye. Chora Jesús tojanontšë jóyebuambayama, y natsana

chabe uatsjéndayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsànga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsànga ntšamo ndoñe tšabá tontsemncá chamotsamama. <sup>2</sup>Er ndocna yoiyémena soye, ntjinÿcá queochaisoquéda; y chë ndótatšëmbo soye, ntšotatšëmbcá queochaisoquéda. <sup>3</sup>Chíyeca, chë mora nÿe tšëngaftangbiana šmojsichamo soyënga, chë entsàngbiana mo ibetiñcá cuaftsemna soyënga, entsànga chama botamana mochanjátatšëmbona. Y chë iytëcana šmojsichamo soyënga, nÿetsca entsángbioye mochántسابuayiyenaye, mo nda canÿe yebnentša tsbanánocana noticiënga tojtsayebuachcá ca” —cha tojanéyana.

**Nda ndegombre cuantsebiauatja**  
(Mt 10.26-31)

<sup>4</sup>“Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiana, pero chentšana más jamana ndoñe ntšobenana. <sup>5</sup>Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup>“¿Shachna jaja shloftšetëmënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana. <sup>7</sup>Y tšëngaftangbiana Bëngbe Bëtsá lempe

endétatšëmbo, y bueta stjënëjënga tšëngaftangbe bestšašifne yomnámna. As ndoñe matauatjëngana; tšëngaftanga ba jaja shloftšëngbiana corente más šmonduámna ca” —Jesús tojánayana.

**Ndabiana Jesucristo yochjayana**  
**chabe entsá yomna ca**  
(Mt 10.32-33; 12.32; 10.19-20)

<sup>8</sup>“Atše cbéyana, nda atšbe entsá yomna ca entsangbe delante tojayanabiana, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entsá chabia yomna ca; <sup>9</sup>pero nda entsangbe delante, atšbe entsá ndoñe yondmëna ca tojayanabiana, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entsá ndoñe yondmëna ca.

<sup>10</sup>“Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiana ndoñe tšabá tontsichamuábioye, pero chë Uámna Espíritbiana ndoñe tšabá tontsichamuábioyna ndoñe.

<sup>11</sup>“Tšëngaftanga chë judiëngbe enefjuana yebnëngoye, ntšamo entsànga bétsamama ichámëngbioye y mandadéngbioye chacmojunatse ora, ndoñe šmattsenócochinÿena ntšamo o ndáyeca šmochjenéuyanama, o ndayá šmochjayanama; <sup>12</sup>er chë Uámna Espiritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

**Entšabiana resjo yomna, nÿe**  
**yapa bomnana jesejuabayana**

<sup>13</sup>Chentšana, canÿa entsanguentšá Jesúsbioye tbojanianaya: —Buatëmbayá, atšbe catšata momandá

chë átsbiöye otocana soyënga  
chaſuatoyé ca.

<sup>14</sup> Y Jesús tbojaníyana: —Bacó, ¿nda  
atſe ſojábema tsëndatbe ujtatanáy ca?

<sup>15</sup> Y entſángbiöye tojanéyana:  
—Šmochjinýe y cuedado  
šmochtſebomna chë nýe yapa soyënga  
jtſebomnama boſama; er masque  
bëtsá soyënga chaſmotsóboñe, chca  
ndoñe queſmochátſtatſëmbo aíñe  
tſabe vida taiſmochjónýenama ca.

<sup>16</sup> Y chora mëntſá tojanacutá:  
“Inamna canýe bomna entſá, y  
chabe fshantsënguñe tſa jaja  
saná yojtſopodena. <sup>17</sup> Chë bomná  
chora mëntſá yojtſejuabnaye, ‘¿Y  
morna, ntſamo chjama? er ndoñe  
quetsátſbomna ndayentſe atſbe jaja  
saná jtsobocjayama ca.’ <sup>18</sup> Y mëntſá  
yojeniyana: ‘Chë grano uaquëcjnaye  
yebnënga chantsendbiam, y inýe  
más bëts yebnënga chanjëtſejebo,  
y chiñe nýetsca atſbe jaja saná  
chantsóbocjaye y nýetsca atſbe  
soyëngnaca. <sup>19</sup> Y chora atſe chjeniyana:  
Bacó, bëtsá soyënga contſebocjana,  
ba uatama cmochanjuáshjache. Morna,  
cochjóchna, cochjase, cochjatëmo,  
cochjóboyejuaye ca.’ <sup>20</sup> Pero Bëngbe  
Bëtsá chábiöye ibojauyana: ‘Obëjema,  
cach quem ibeta cochanjóbona; y asna,  
chë contſebocjana soye, ¿ndabiam  
yochtſemna ca?’ ”

<sup>21</sup> Y Jesús chora tojánayana: “Chca  
endbopáſa chë nýe chabiam bomnana  
tojtſejuabá y bëtsá Bëngbe Bëtsabe  
soyënga ndoñe tonjëtſſashjáftaca  
ca.”

**Bëngbe Bëtsá chabe básenga  
jtsanýenana  
(Mt 6.25-34)**

<sup>22</sup> Chentſana, Jesús chabe  
uatſjëndayënga tojanéyana:  
“Quem soye cbéyana: Ndoñe

šmattſenócochinýena ndayá  
šmochjase o šmochjofſiye vida  
jtſebomnama, ni ndaye entſayá  
šmochjuíchëtjuama cach ndoñe.

<sup>23</sup> Ndegombre, vida chë sanama más  
enduámama y cuerpo chë entſayama  
más. <sup>24</sup> Chë ftsenga shloftſënga  
šmochjanýe: tondaye ntjájena, ni  
jaja saná ntjátbanana, ni grano  
uaquëcjnaye yebnënga ntſebomnana;  
pero Bëngbe Bëtsá chënga saná  
jtsatſatnayana. iY tſëngaftanga chë  
ftsenga shloftſëngbiam puerte  
más šmonduámama! <sup>25</sup> Masque  
chca endmëna, masque canýa  
tſa tojesenócochinýena, ¿ntſamo  
nanjobenaye jamana, chë ntsachetſá  
vida yochtſebomnentsana canýe  
hora vida más jabotiyana? <sup>26</sup> Chcasna,  
nýe chë base soye jamama ndoñe  
šmontſobenëse, ¿ndayama chë inýe  
soyëngama šmochjatenócochinýena?

<sup>27</sup> “Šmochjuinýe chë lirio  
uantſëfjushangá jtsajuajnana:  
ndoñe ntſetrabájayana, ni  
ntſeshabiamnayana. Pero atſe  
cbéyana, ndegombre ni mo rey  
Salomón, nýetsca chabe bomnánaca,  
chë lirio uantſëfjushangacá nýetſá  
botamana quenjatspormana. <sup>28</sup> Bëngbe  
Bëtsá tſa botamana shácuana  
tojuama, y chë shácuana mënté  
jajoca jtsamnana y yëfsana iñoca.  
Cha chë shácuana chca tojamëse,  
ndegombre tſëngaftangiabiámnaca  
Bëngbe Bëtsá echanjama entſayá  
chaſmotsábomnama, ientſanga Bëngbe  
Bëtsábeñe nýe batſá oſbuáchiyënga!  
<sup>29</sup> Chíyeca, ndoñe šmattſenócochinýena  
ndayá jasama o jofſiyama onguayañe;  
<sup>30</sup> er chë soyëngama quem luarentſa  
entſanga mondbëtsenocochinýena,  
pero tſëngaftanga ndoñe.  
Tſëngaftangna canýe Taitá  
šmondbomna, y cha endétatſëmbo

ndayá cmëjabótama. <sup>31</sup> Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsëjaboto soyënga nÿe šmochanjóyëngacñe ca” —Jesús tojánayana.

### Chë celoca bomnana

(Mt 6.19-21)

<sup>32</sup> “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínÿnana chabe amëndayana tšëngaftanga jatšatayama. <sup>33</sup> Lempe ntšamo šmobomncá šmochtsatobuiye y chë ujabotëngbioye šmochtsatšataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; <sup>34</sup> er chë ndayentšë tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

### Bëngbe Utabná yochjésabama jtseprontánana

<sup>35</sup> “Mo chë oservénënga, chë entsáyá uichétjonënga y uajuinÿananéshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama. <sup>36</sup> Chca, tšëngaftanga šmochántsemna mo chë oservénënga, tšabe entsáyaca bopormánënga y uajuinÿananéshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservénënga jtëbiatëfjuama. <sup>37</sup> Puerte oyejuayënga

chë oservénënga, chë nduiño tojtashjango ora tmojtsefsnënga. Ndegombre cbéyana, chora chë mandayá sëndorëche echantásnaye, meséshentšë chë oservénënga echanjátbiama, y saná echanjuuatšiyë. <sup>38</sup> Puerte oyejuayënga chënga, chë tmojtsefsnënga cha tojtashjango ora, masque tséntseto ora o bínÿanoye. <sup>39</sup> Quem soye tšabá chacmësértá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. <sup>40</sup> Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

### Chë tšabe oservená y chë bacna oservená

(Mt 24.45-51)

<sup>41</sup> Pedro, Jesúsbioye tbojanianaya: —Utabná, ¿chë tconjayana cuento nÿe bëngbiama o nÿetscangbiama yochtsemna ca?

<sup>42</sup> Y Bëngbe Utabná tbojanjuá: —¿Nda yomna chë oservená, ntšamo chë nduiño tojtseboščá amá y nÿets juábnaca amá? Cha jtsemnana nda chë nduiño bochjéftsebošhona chë yebnentšënga chaotsanÿenama, y jasama tojtsemna ora chaújuatšëma. <sup>43</sup> Puerte oyejuayá chë oservená, chë nduiño tojtashjango ora, cha tbojínÿena jtsamëse ntšamo tbojtsemncá. <sup>44</sup> Ndegombre cbéyana, chë nduiño chábioye bochanjaimpáda nÿetsca chabe soyënga chabotsinÿëñama. <sup>45</sup> Pero chë oservená, chabe nduiño betscó ndoñe yochantabo ca tojtsejuabná, y tojontšë chë inÿe oservénënga, boyabásënga y shembásënga jtsajantšëtayana, becá

jtsesana, jofsiyana y jtsótmenana,  
<sup>46</sup>cha ndoñe tontsejuabná te y  
 tontsetátšëmbo ora, chabe nduiño  
 echántashjango y puerte jabuache  
 bochantsecastíga, y echanjama cha  
 jasúfriama chabotsemnana, mo chë  
 Bëngbe Bëtsábeñe ndoşbuáchiyënga  
 mochanjasufriacá.

<sup>47</sup>“Chë oservená, nda tojtsetátšëmbo  
 ndayá chë nduiño tojtseboşama,  
 pero ndoñe tontseprontana y  
 ndoñe tontsobedecena, cha ba  
 soye mochántsetjanja. <sup>48</sup>Y chë  
 oservená, ntsetatšëmbcá ntşámna  
 tjabuachjuanguá, y chë causa  
 chamotsetjanjama tbojtsemnëşna, chana  
 más batşá mochántsetjanja. Nda bëtscá  
 soyënga tmojatştábioye jauyanana,  
 bëtscá soyënga chaoma ca; y nda bëtş  
 trabajo tmojabonýëbioyna jauyanana,  
 más bëtş trabajo chaoma ca.”

**Jesusbe causa, entşángbeñe más  
 jtsentsjanayana**  
*(Mt 10.34-36)*

<sup>49</sup>“Atşe sënjabo quem luariñe  
 jabojuinýiyama, y itşa sëntseboşe  
 malaye ya ctsangbototjuana! <sup>50</sup>Atşe  
 şontsemna puerte jasúfriana, y ipuerte  
 ngménaca sëntsobátmana chca  
 chaotsemnana! <sup>51</sup>¿Tşëngaftanga  
 şmojtsejuabná atşe tijabo quem luarentşe  
 entşanga natjëmbana chamotsiyenama?  
 Ndegombre ndoñe chca queochátşmëna;  
 atşe sënjabo causa, entşanga más  
 mochántsetsjanaye. <sup>52</sup>Er mëntescana,  
 canýe yebnentşe, shachnënga ndoñe  
 quemochátenýeyunana, únganga  
 útatbe contra y útata úngangbe contra  
 mochántsemna. <sup>53</sup>Taitá uaquiñabe  
 contra echántsemna, y uaquiñá taitabe  
 contra; bebmá, bembëbe contra, y  
 bembe bebmabe contra; uambén mamá,  
 bebincuabe contra, y bebincuá uambén  
 mamabe contra ca” —cha tojánayana.

**Ndaye tempo yochtsemnana  
 ntşamo inétşotatşëmbo**  
*(Mt 16.1-4; Mc 8.11-13)*

<sup>54</sup>Mëntşánaca Jesús entşanga  
 tojanéyana: “Tşëngaftanga,  
 chë jantşetëshënga shinýe  
 uenatjëmbambanoicana tojóboचना  
 şmojinýe ora şmondbëtşichamo  
 ‘echanjuafé ca’, y ndegombre chca  
 jopásana. <sup>55</sup>Y tsmanoicana tojtsebínýia  
 orna, tşëngaftanga şmondbëtşichamo  
 ‘echanjojënyana ca’, y ndegombre  
 chca jopásana. <sup>56</sup>iBacna entşanga,  
 chë ntşamo ndegombre şmojuabnacá  
 ndinýinýayënga! Ntşamo quem  
 luarentşe yochtsemnana, ndayá celoca  
 şmojinýama tşa tşabá şmojtsetatşëmbëse,  
 ¿ndáyeca ndoñe şmontsobena  
 jtsetatşëmbuana ndaye bëtş soye quem  
 tempo Bëngbe Bëtsá cmojtşinýanýnama  
 ca?” —Jesús tojánayana.

**Chë uayayáftaca natjëmbana  
 jtenbemana**  
*(Mt 5.25-26)*

<sup>57</sup>“¿Ndáyeca cach tşëngaftanga  
 ndoñe şmondbáyana ndayá tşabá  
 bëtsemnana? <sup>58</sup>Nderado nda  
 tcmojtşedemandá y cabildoye jotsánama  
 cmojtsemna, cabá choye ndáşhjang  
 ora, betşco cháftaca cochtenoyántşia.  
 Chca ndóñese, chë demandayá  
 mandádbioye cmochanjúshjango, chë  
 mandadna josticiëngbe cucuatşinë  
 cmochanjáboshjona, y chënga cárceloye  
 cmochanjutame. <sup>59</sup>Ndegombre chbéyana,  
 chentşana ndoñe quecochtëtşbocna,  
 nýets ndebénana candesopagantscuana  
 ca” —Jesús tojánayana.

**Bëngbe Bëtşabe benache  
 jtishachana**

**13** <sup>1</sup>Cach ora, báseftanga tmojáná  
 Jesús jinýama, y tmojancuentá

ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

<sup>2</sup> Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inye boyabásengbiam chënga más bacna soye amënga imojamna causa ca? <sup>3</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. <sup>4</sup> O, ¿tšëngaftanga šmnétsejuabnaye, chë Jerusalenentša bnëtsana posufta entšanga tmojanóbanënga, chë Jerusalenoca binche uafjajónaye Siloé béconana tshanana jebna soye tojtsanáshajaye ora, chënga imojamna chë inyënga Jerusalenentšë oyenëngbiam más bacna soyënga amënga ca? <sup>5</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

### Chë ndëshajona higo betiyama cuento

<sup>6</sup> Jesús mëntšá tojanacuntá jabuátambama: “Canye entšá jajoca canye higo betiye inabomna, y yojá nderado nantseshájonama, pero tondaye yonjínýena. <sup>7</sup> Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantseshájonama, pero ndocna te tondaye chiyátinýena; chíyeca, motsetëtše. ¿Ndayama quem jajañe

yochjátsjena ca?’ <sup>8</sup> Pero chë jajañe inýená ibojauyana: ‘Bacó, inye uata cachcá monýá, fshantse chanjáboplojua y uanganëshe chanjabotboto.

<sup>9</sup> Nderado chca jamëse, nanjashájona; y ndóñesna, chora cocayé cuantsetëtše ca.’ ”

### Jesús canye ochnayté, canye tséštjona shembásabioye tbojanshná

<sup>10</sup> Canye, canye ochnayté Jesús yojontšë entšanga jabuátambana, chë judiëngbe enefjuana yebnentše, <sup>11</sup> y chentše yojtsemna canye shembása; cha ya bnëtsana posufta uata yojtsešoca. Canye bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana. <sup>12</sup> Jesús chábioye tbojáninýe ora, tbojanchembo y mëntšá tbojaniyana: “Batá, mora ya ndoñe šocá quecátsmëna ca.”

<sup>13</sup> Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontšë Bëngbe Bëtsábioye jëtschuayama. <sup>14</sup> Pero chë enefjuana yebnentšá mándayana tbojánetna, Jesús chë shembása ochnayté tbojanshnama, y entšanga tojanéyana: —Chnénguana te comna jatrabájama; chora šmochjabo jenóshnama; ochnaytесе ndoñe ca.

<sup>15</sup> Y Bëngbe Utabná tbojanjuá: —iBacna entšanga, ntšamo ndegombre šmojuabnacá ndinýinýnayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama bėjaye chaofšema? <sup>16</sup> Chcasna, quem shembása, canya Abrahábentšana entšá, y Satanasbe causa bnëtsana posufta uata šocá yojtsemna, ¿ndoñe tšabá yondmëna canye ochnayté chë bayëja jtsebojuánana ca?

<sup>17</sup> Jesús chca tojánayana ora, chabe uayayënga imojtsëuatja, y nyëtsca



entšanga imojtsóyejuaye Jesús tša bēts soyēnga yojtsamama.

**Chē mostaztiye jenayama cuento**

(Mt 13.31-32; Mc 4.30-32)

<sup>18</sup> Jesús mēntšánaca tojánayana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenana ca? <sup>19</sup> Endmēna mo canye mostaza jénaye, canye entšá jajañe tojajecá; chiyna jójuana y canye bēts betiye jóbemana; tša bētsashe jóbemana, chíyeca chē jaja shloftšēnga chē buacuashēnguiñe uajajonētemēngá jauábopormana ca.”

**Chē levadurama cuento**

(Mt 13.33)

<sup>20</sup> Mēntšánaca Jesús tojánayana: “¿Ndaye sóyeca chjobenaye Bēngbe Bētsabe amēndayama jábuayenama ca? <sup>21</sup> Endmēna mo levadurcá; canye shembása chana jenájuabana unga medida arninñañe, nyētsana chauabochama ca.”

**Chē base utēntšá bēšáša**

(Mt 7.13-14, 21-23)

<sup>22</sup> Jerusalenoye benache, Jesús entšanga yojtsabuátambaye bēts pueblēnguiñe y base pueblotēmēnguiñe. <sup>23</sup> Canya chábíoye tbojantjá: —Bēngbe Utabná, ¿nye bāseftanga imomna chē atsebácanēnga mochtseemnēnga ca?

Y Jesús tbojanjúa: <sup>24</sup> —Puerte šmochtsentšēna chē base utēntšá bēšášajana jamashjna; er ndegombre cbéyana, banga mochántseboše chējana jamashjna, pero ndoñe quemochatobenaye. <sup>25</sup> Chē yebnentša nduíño chaojotsbaná y chē bēšáša chaojtatámentšana, tšēngaftanga chē shjoca chašmojtseemnēnga,

šmochántsechēmbuana, mēntšá jtsichámēse: “Utabná, šmebētafjo ca.” Pero cha cmochanjáuyana, “Atše ndoñe quetsátstatšēmbo ndēmoquēnga tšēngaftanga šmomnana ca.”

<sup>26</sup> Chora tšēngaftanga šmochanjontšē ichámuana: “Acaftaca cánñiñe fsēnjase y fsēnjofšē, y aca bēngbe tsáshēnañe tconjabuatambá ca.” <sup>27</sup> Pero cha cmochanjójuaye: “Ya tcbonjáuyana, ndēmoquēnga šmomnana ndoñe tstatšēmbo ca. ¡Atšbentšana mojuánanga, bacna soyēnga amēnga ca!”

<sup>28</sup> “Chora chentše puerte šmochanjenóbošachna y tsetšanama juatsašēnga šmochantsenoftēšjojnaye, Abraham, Isaac, Jacob y nyētscanga Bēngbe Bētsabe juabna oyebuambnayēnga Bēngbe Bētsabe amēndayoca imojtseemnana chašmojinye ora, y tšēngaftanga chentšana cmochtēbuacanama. <sup>29</sup> Y shinje bocanoicana y uenatjēmbambanoicana, tsmanoicana y tsjuanoicana entšanga mochanjabo y juasama mochanjotbiana Bēngbe Bētsabe amēndayentše. <sup>30</sup> Y banga mora nduámanēnga imomnēnga, chora uámanēnga mochántsemna; y banga mora uámanēnga imomnēnga, chora nduámanēnga mochántsemna ca” —Jesús tojánayana.

**Jesús tbojanongmé Jerusalenentša entšangbiana**

(Mt 23.37-39)

<sup>31</sup> Jesús chē soyēnga tojanéyana ora, bāsefta fariseunga tmojánashjajna y tmojaniana: —Muentšana motsatoñe; Herodes entseboše aca jtsóbama ca.

<sup>32</sup> Y Jesús tojanéjua: —Motsajna y šmochjauyana chē corente studio bomná, mo tjañe mesetca: “Minje, mēnté y yēfse entšángbentšana bacna

bayëjenga sëndëtëbuacana y šoquënga sëndáshnaye, y baseftaytesna chanjapochóca ca.”<sup>33</sup> Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tšabá ntsemnana canya Bëngbe Bëtsabe juabna oyebuambnayá Jerusalenentša chábuane chaóbana ca.

<sup>34</sup>“iJerusalenentša entsanga, Jerusalenentša entsanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbiroye ndëtšbëngaca jtsatëchénganjana jtsëbáyama! iBueta soye atše sënjabošena tšëngaftanga átšbiroye júbuajama, mo canye tuamba chabe bolletotémënga juatëngmiáša tajsoye cuaftajayecá, pero tšëngaftanga ndoñe chešmátsbošena!<sup>35</sup> Y šmochjinÿe, mora atše cachcá cbochanjesëñyaye, y chca, atšna enánanga cbochanjésabashējuana, mo canye yebna cachcá tcojesonÿá y énañe tcojeseboshjoncá. Y ndegombre, tšëngaftanga morscana ndoñe más atše quešmochátinÿe; y atše šmochántinÿe, chë: ‘iCorente bendición bomná, Bëngbe Utabnabe obenánaca tojabá ca!’ chašmojttsichamo ora ca” —Jesús tojánayana.

**Jesús, canye uafshachanáca  
šocábioye tbojanshná**

**14** <sup>1</sup> Canye ochnayté, Jesús tojána jasama fariseungbe canye amëndayabe yebnoye; y chë fariseunga yejuana imojtserreparana, er ndayá Jesús nanjama. <sup>2</sup> Chéntšnaca, chabe delante yojtsemna canye entsá uafshachanáca šocá. <sup>3</sup> As Jesús chë ley abuátambayënga y fariseunga tojanatjá: “¿Quenlesenciana canye ochnayté canye šocá jáshnama o ndoñe ca?”

<sup>4</sup> Chëngna ndocá tmonjanjuá. As Jesús chë šocábioye tbojánishache, tbojanshná y tbojaniyana chaotsatoñe ca. <sup>5</sup> Y chë fariseunga tojanéyana: “¿Nda tšëngaftanguentsá, nderado chabe uaquiñá o uacná canye tboye tojtsótsatše, cachora ndoñe nanjá jetsejátsécama, masque ochnayté totsomñëse ca?”

<sup>6</sup> Y chëngna ndocá tmonjanobená cha jojuana.

**Chë casamentoye ofjanënga**

<sup>7</sup> Jesús tojáninÿe ntšamo chë ofjanënga quëfseroye imojtsachñëjuana jotbiamama; as mëntšá chënga tojanabuayená: <sup>8</sup> “Canye casamentama nda chacmojojfa ora, quëfseroca ndoñe catjót'bema, er nderado inÿe ofjaná acbiama más uamaná ústonoye nandaboye; <sup>9</sup> y nderado chë tsëndatbe ofjjaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. <sup>10</sup> Chamna, nda chacmojojfa ora, chafjoca cochjót'bema, chca, chë ofjjaná chaojabo ora chacmëyana: ‘Taita, quëfseroye motsëchnéngoñe ca’. Y chca, aca chë chentše tmojtsetbiámanëngbiama uamaná cochántsemna. <sup>11</sup> Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, añe bëtsá mochanjábema ca.”

<sup>12</sup> Y chë tbojanofja entsábioynaca Jesús mëntšá tbojaniyana: “Fiesta chacojama o sananga chacojtsebomna ora, ndoñe cattšëbuájajana acbe amiguënga, catšátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétojfa, y chca ya acbe uacanana soye cochántsebomna. <sup>13</sup> Chamna, canye fiesta chacojama

ora, cochjúbuaja ndbomnjémenga, jama ndobenenga, coshetenga y jtanenga, <sup>14</sup>y aca corente oyejuayá cochántsemna; er chënga ndoñe quemochatobenaye cachcá aca jtëtofjana, pero acna acbe uacanana soye cochántsebmna, chë Bëngbe Bëtsabe bominjine tsábenga imomnënga chamojtayena ora ca” —cha tbojaniana.

### Chë bëts sanama cuento

(Mt 22.1-10)

<sup>15</sup>Chca tojanuena ora, canya chë mesëshentše tbemaná tojánayana: —iPuerte oyejuayá echántsemna Bëngbe Bëtsabe amëndayoca juasama chaojtsemná ca!

<sup>16</sup>Chora Jesús tbojaniana: —Canye bacó canye bëts saná yojapróna y ba entsanga yojúbuaja. <sup>17</sup>Juasama ya yojobuache ora, canye oservená ibojichmua chë ofjanënga jáuyanama chamotsajna, ya lempe yojtseprontana ca. <sup>18</sup>Pero chorna nyetscanga imojontsé jtsoyátšëmbuana. Canya yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” <sup>19</sup>Inya yojayana: “Bnétsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.” <sup>20</sup>Y inya yojayana: “Cabá mora sentsobouamá, y chë causa, ndoñe quichatobenaye jama ca.” <sup>21</sup>Chora chë oservená yojesshécona y lempe chabe nduññbiye ibojauenaye. Chë nduiño tša ibojtsetna, y chë oservenábíoye ibojauyana: “Cam ora motsa tsashenangoye y benachëngoye, y moye cochjunatse ndbomnjémenga, jama ndobenenga, jtanenga y coshetenga ca.” <sup>22</sup>Chentsa bënëntscope, chë oservená chë nduññbiye

ibojauyana: “Bacó, ya sënjama ntšamo šconjamandacá, y cabá inyengbiama luare entsemna ca.” <sup>23</sup>As chë nduiño ibojauyana: “Motsa benachëngoye y betiyeteméngaca jetjaniñëngoye, y entsanga cochjautáriaye moye chamuábama, atšbe yebna chaojtjijama; <sup>24</sup>er ndegombre cbéyana, chë natsana sënjobuajënguentšá ndocná atšbe saná queochatsse ca.”

### Ntšamo yomna Cristbe ustona jtsemnana

(Mt 10.37-38)

<sup>25</sup>Mallajta entsanga Jesús imojtséstona; as cha tojanobuértana y tojanéyana: <sup>26</sup>“Nderado nda átšbiyoye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénanga tuababuánýeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntšobenana atšbe uatsjendayá jtsemnana. <sup>27</sup>Y nda, atšbiana ndoñe tontseprontana jasúfriama y cruciñe jobanámna, y nyetsca chabe quem luare soyënga ndoñe tonjësebošhona atšbe juastama, cha ndoñe ntšobenana atšbe uatsjendayá jtsemnana.

<sup>28</sup>“Nderado nda tsëngaftanguentšá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyetšá crocénana tayojtsebmna? <sup>29</sup>Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinýënga, muantsáfchaye y mentsá muantsichamo: <sup>30</sup>‘Quemëjema jajebuama tonjontsé, y japochócama ndoñe chenatobená ca.’

<sup>31</sup>“O ¿ndaye rey inye réyeyftaca jéntsajama tbojotocase, natsana ndoñe

nanjót bema jajuaboyama, nderado nanjobenaye bnétsana uaranga soldadéngaftaca chë ínÿabioye jayénjanana, chë inÿa uta bnétsana uaranga soldadéngaftaca tojtsabose? <sup>32</sup>Y ndónesna, chë inÿe rey cabá bënoca tojtsemna ora, básefta entshanga echanjichamuá, cha jauyanama más tsábá yomna ndoñe jatentsjanayana ca.

<sup>33</sup>“Chcasna, ndánaca tsëngaftanguentsá, lempe ntšamo tobomncá ndoñe cachcá tonjesonÿá, cha ndoñe ntsobenana atšbe uatsjendayá jtsemnama ca” —Jesús tojánayana.

#### Chë tamó fténana tojtsebocna ora

(Mt 5.13; Mc 9.50)

<sup>34</sup>“Tamó tsábe soye endmëna; pero chë tamó fténana tojtsóbemëse, tsëngaftanga ndoñe quešmátobena jamana tempcá sanana cachiñe chaotsatmënama, ni saná jatamuama. Chë ftëna tamó tondayama ntososervénana, cachcá, chë atšbe uatsjéndayënga jtsemnama tmojtsebošënga, pero lempe jéseboshjonama ndoñe tmtontseboše, cach ndoñe chama ntososervénana. <sup>35</sup>Chë ftëna tamó ndoñe ntososervénana ni fshantsama, ni uanguanëshama. Nÿe jtsëtšenana. Chë jouenama tmojtsobenënga, šmochjouena ca” —Jesús tojánayana.

#### Chë ótsëna oveshabiamia cuento

(Mt 18.10-14)

**15** <sup>1</sup>Nÿetsca chë Romocama impuesto entsángbioye atjanayënga y inÿe bacna soyënga amënga, Jesúsbioye imojánajna chabe palabra jouenama; <sup>2</sup>y chë fariseunga y ley abuátambayënga chama Jesusbiamia podesca imojtsoyebuambná, mëntsá: —Mua bacna soyënga amëngaftaca entsenuta y chëngaftaca entsesá ca.

<sup>3</sup>As Jesús mëntsá tojanacuntá, chënga jabuátambama: <sup>4</sup>—¿Nda tsëngaftanguentsá, canÿe patse oveshënga tojtsabamna, y canÿa tbojtsobuétšëse, chë inÿe esconëfta bnétsana y esconëfta oveshënga shëntsjañe ndoñe cachcá nanjesénÿaye, y nanjá chë otšëná jetsenguanguama candëtsónÿeñëntscuana?

<sup>5</sup>Y tbojtsinÿëna ora, oyejuayá chë oveshá jesotantšajúana; <sup>6</sup>y yebnoye tojtashjango orna, chabe amiguënga y juachañe oyenënga jáchembuana y mëntsá jáuyanana: “Atšeftaca móyejuanga, er chë sentsanobuetše oveshá sentsinÿëna ca.” <sup>7</sup>Atšë cbéyana, cachcá, celócnaca más oyejuayana jtsebínÿnana, canÿe bacna soyënga amá tsábe benache tojtishachabiamia, y ndoñe nÿa yapa, esconëfta bnétsana y esconëfta tsábe soyënga amëngbiamia, chë ndoñe yondujaboto bacna soyënga amana jtsajbanana ca.

#### Chë crocénana tojtsónÿëna shembásabiamia cuento

<sup>8</sup>“O mëntsá, ¿ndëmua shembása, bnétsana uámana crocénana tojtsebomna y cánÿana tojtsobuétšëse, chora ndoñe canÿe uajuinÿanëshana nanjuajuinÿená, y cuédádoca chë yebna nantsetsjajo y botamana chë crocénana nantsenguango candëtsónÿeñëntscuana? <sup>9</sup>Y tojtsinÿëna ora, chabe amiguënga y juachañe oyena shembásënga jáchembuana, y mëntsá jáuyanana: ‘Atšeftaca móyejuanga, er chë sentsanobuetše crocénana sentsinÿëna ca.’ <sup>10</sup>Atšë cbéyana, cachcá, chë Bëngbe Bëtsabe angelotëmëngbeñe oyejuayana jtsebínÿnana, nÿe canÿe bacna soyënga amá chë tsábe benache tojtishachabiamia ca” —Jesús tojánayana.

**Chë uaquiñá bacna benachiñe ayá**

<sup>11</sup> Jesús mēntśánaca tojanacuntá:

“Canye entśá uta uaquiñata yojánabamna; <sup>12</sup>y canye, chë ngomēnche uaquiñá chabe taitábíoye ibojauyana: ‘Taita, atśbe otocana soyēnga śmatatśetá ca.’ As chë befta lempe chë uta uaquiñata yojtējátaye.

<sup>13</sup>“Chentśana baseftaytesna, chë más bobontse uaquiñá lempe ntśamo ibojobuachcá yojtsatobuiye y chë crocénánaca bēn luaroye yojtsoñe, y choca, cha nŷe ntśamo ibojocochēngcá, mocá yojenobuiye, y chca, lempe yojtsepochóca. <sup>14</sup>Lempe crocénana yojtsoshañe orna, bēts shēntsana chë luarentśe yojóshjango, y chë causa cha ibojotóca shēntseca jtsejétanana.

<sup>15</sup>As, cha yojá trabajo jonguangoñama y yojínŷena chë luarentśa canye entśábentśe; chana, chabe jajoye ibojíchmua cotśēnga jtsanŷenama.

<sup>16</sup>Chë bobontsna yojtseboše chë cotśbe saná jtsesana, pero ndocná tondaye ibonjanájuatśnaye.

<sup>17</sup>“Cabana, botamana yojinŷe ntśamo yojtsepasacá, y mēntśá yojenójuaboye: ‘iBueta trabájayēnga atśbe taitabe yebnentśe bētscá saná mondētsóboñe, y atśbe muentśe shēntsama chanjóbona ca! <sup>18</sup>Chantá atśbe taitabe yebnoye y mēntśá cha chanjauyana: Taita, śmotseperdoná. Atśe tijama ndayá Bēngbe Bētsá ndoñe yondboścá, y ntśamo aca ndoñe condboścá. <sup>19</sup>Mora ya merecido taitatobuajoñe acbe uaquiñá jtsabáinama; nŷe canye acbe trabajayacá Diosmanda śmatofja ca.’

<sup>20</sup>Chca jēftsenójuaboyēse, yojontśé cachabe yebnoye jtana.

“Cabá bēnoca yojsemna orna, chabe taitá chábíoye ibojinŷe, y chabe uaquiñabiama ibojóngmia, y jajébenguama betsko yojá; ibojajebengo,

ibojtotsejcuá y tśa yojtsóyejuayayama chë uaquiñábíoye ibojtámocho.

<sup>21</sup>Chora chë uaquiñá ibojauyana: ‘Taita, śmotseperdoná. Atśe tijama ndayá Bēngbe Bētsá ndoñe yondboścá, y ntśamo aca ndoñe condboścá; mora ya merecido taitatobuajoñe acbe uaquiñá jtsabáinama ca.’ <sup>22</sup>Pero chë Taitana chabe oservēnga yojámēndaye: ‘Betsco chë más tśabe entśayá mauaca y matspormanga, montśabuechētjo y matsshecochētjo. <sup>23</sup>Mora chë más minŷica uacná śmochjuánatse y śmochjášbuua. iMochjase y mochjóboyejuaye ca! <sup>24</sup>Quem atśbe uaquiñá mo obanacá endánmēna y mora bēnga montsetátśēmo cha ainá yotsomñama. Quem atśbe uaquiñá mo otśenacá endánmēna y mora tmontsinŷena ca.’ Y chentśana imojontśé joboyejuayama.

<sup>25</sup>“Chë yebnoca fiesta yojtsemnēntscuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. <sup>26</sup>As chora cha canye oservenábíoye ibojachembo y mēntśá ibojatjaye: ‘¿Ndayá bēngbe yebnentśe yojtsopasana ca?’

<sup>27</sup>“As chë oservená ibojojúa: ‘Acbe uabentsá tontashjango y chama acbe taitá śonjutarié chë más minŷica uacná jáshbuama, cha tśabá tojtashjanguama ca.’ <sup>28</sup>Pero chë uabóchena catśatna corente ibojtsetna y ndoñe yontseboše tsoye jtamashēnguana. As cach befta yojábocna chë catśábtíoye jaimpádama chauatamashēnguama. <sup>29</sup>Chora cha chë taitábíoye ibojauyana: ‘Taita, aca condétatśēmo bueta uata cbetsajabuáchanama, nŷets tempo cbetseyeunanama, pero ndocna te ni mo canye chivotema cheścaisatśá atśbe amiguéngaftaca joboyejuayama.

<sup>30</sup>Y masna, acbe uauquiñá chë bacna vida bomna shembásengaftaca acbe crocénana pochocayá tojtashjango ora, chë más minyica uacná chabiamá tcojášhbua ca' —chë uauquiñá ibojauyana.

<sup>31</sup>“Chora chë befta ibojojuá: ‘Atšbe uauquiñá, aca sempre átseftaca condésemna y lempe ntšamo atše tsbomncá acbiámncá endmëna.

<sup>32</sup>Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinyëna ca.’”

**Chë nduiñbe ndoñe tšabe uajabuachanábiama cuento**

**16** <sup>1</sup>Jesús mëntšánaca chabe uatsjëndayënga tojanacuntá: “Inamna canyë bomna entšá, y cha ibnabomna canyë uajabuachaná chabe soyënga chaotsinyënama; y chë nduiño imojuenaye chë uajabuachaná chabe soyëngaca ndoñe tšabá yontsamama. <sup>2</sup>Asna, chë nduiño ibojachembo y mëntšá ibojauyana: ‘¿Ntšamo acbiama šmotsatsëtsnacá ndegombre yojtsemna ca? Mora cuenta šmatatšá ntšamo atšbe soyëngaca tcojamama, er morscana ya ndoñe atšbe soyënga inyëná quecochátsmëna ca.’ <sup>3</sup>Chë uajabuachaná yojontsé jenójuaboyana, y mëntšá yojeniyana: ‘¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sëntséuatja. <sup>4</sup>Ya sëntsetatšëmbo ndayá chjama, chca, atšbe trabajuentšana chašojtábocna ora, atše jtsabamnama ndëmuanyënga chëngbe yebnentšë chašmofjama ca.’

<sup>5</sup>“Chentšana, canyánya chë chabe nduiñbiyoye ndebëñënga yojáchembo.

Cányabiyoye ibojatjaye: ‘¿Ntsachetšá atšbe nduiño icondebena ca?’ <sup>6</sup>Y cha ibojojuá: ‘Canyë patse barrilëšangá aceitiye ca.’ As cha ibojauyana:

‘Muentše acbe recibécha entsamna; mora mótbema y inyácha nyë shachna bnëtsana barrilëšangama matapormá ca.’ <sup>7</sup>Chentšana inyabiyoye ibojatjaye:

‘Y acna, ¿Ntsachetšá icondebena ca?’ Y cha ibojojuá: ‘Canyë patse medida trigo ca.’ As cha ibojauyana: ‘Muentše acbe recibécha entsamna; chiñe nyë posufta bnëtsanama mábema ca.’

<sup>8</sup>Chentšana, chë nduiño tšabá yojayana chë ndoñe tšabá ama mayordombiama, cha stúdioca yojamama. Chë nyë quem luarama enójuabnaye entšanga, cachëngbe soyëngaca puerte studio bomnënga mondmëna; y chë entsangbe juabnënga binynayábënga ndoñe nya yapa ca.

<sup>9</sup>“Atše cbaruayená, quem luarentše, chë bacna soyënga amëngbe luarentša bomnánaca amiguënga šmochjábiamá, inyënga jtsëjabuáchanëse. Chca, chë bomnana tojtsopochocá ora chašmotsabamna ndëmuanyënga chë nyetsca tescama oyenoye chacmúbuajama ca.

<sup>10</sup>“Nda básefta soyënguiñe lempe tšabá tojama, bëtscá soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtscá soyënguiñnaca cach ndoñe tšabá queochatsma. <sup>11</sup>Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanyiye? <sup>12</sup>Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiama yomncá ca?

<sup>13</sup>“Ndocná ntsobenana uta mandayata jtsaservénana; er cánÿabioye bochantásaboyënja y chë ínÿabioyna bochantsebobonshana, o cánÿabiamna tšabá echántsetrabajaye, y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nye quem luarentša soyënga jtsebomnama tcojtsebošëse ca” —Jesús tojánayana.

<sup>14</sup>Chë fariseunga, becá crocénana jtsebomnama bošënga immamna, lempe chca chënga tmojanuena, y Jesúsbioye imojtsáboyejuana. <sup>15</sup>As Jesús tojanéyana: “Tšëngaftanga entšangbe delante mo tšábenga cuaftsemncá jtse nobiamnayana, pero Bëngbe Bëtsá endétatšëmbo ndayá tšëngaftangbe ainaniñe yomnama; er ndayá entšanga más tojtsebošcá, Bëngbe Bëtsá jtsáboyënjana ca.

**Moisesbe ley y Bëngbe  
Bëtsabe améndayana**

<sup>16</sup>“Moisesbe ley y chë Bëngbe Bëtsabe juabna oye buambnayënga tšëngaftanga cmonjanabuayiyiná, Juan chë Ubayana quem luaro ye tonjánabëntscuana. Cha tonjánabo orscana montsabuayiyiná chë tšabe noticiënga Bëngbe Bëtsabe améndayocama, y nyëtscanga tša montsebošë choye jamashënguama ca.

<sup>17</sup>“Más paselo endmëna, celoca y quem luare chaopochocá, y ndoñe chë ntšamo leyíñe iuayancá, chë ndayá jopásama yomnama, ni mo canÿe punto ndoñe chca chaondëtsemnama ca” —Jesús tojánayana.

**Ndayá Jesús tojanabuatambá chë  
bouamnënga tmojtseñëtšenama**  
(Mt 19.1-12; Mc 10.1-12)

<sup>18</sup>“Nda chabe shëmbioye cachcá tbojesonyá y ínÿaftaca tojtóbouamase,

cha chë natsana shëmbioye ínÿaftaca jtseíngñayana; y nda chë útšena shembásaftaca tojobouamá chana, canÿe uabuatmá jtsebomnana, y chca, chana canÿe bacna soye jtsamana ca” —Jesús tojánayana.

**Chë bomná y chë  
ndbomñëjema Lázaro**

<sup>19</sup>“Canÿe bomna entšá inamna; cha yojanamana uámana y botamana shbuenda uafjtsenga y lino entšayangá jtichëtjuana, y cada te bëts fiestënga yojánama. <sup>20</sup>Canÿe ndbomñëjëmna inamna, Lázaro ca uabainá, bacna nguayanánaca šocá; y cha yojanamana chë bomnabe bëšášëntše fshantsiñe jótbemana. <sup>21</sup>Quem ndbomñëjema yojtsebošë chë bomná yojtsesayentšana yojatquëcjana sanángaca jtoshachayana; y chë quešënga innabo ye chabe nguaye cuerpo jajá fjuama. <sup>22</sup>Canÿe te Lázaro yojtsóbana, y Bëngbe Bëtsabe angelënga Abrahámbioye cha imojtamba, chë nyëtscanga oyejuayënga mondmëna luaro ye. Chë bomnánaca yojóbana y imojúábtontsa.

<sup>23</sup>“Chë bomná infiernoca puerte ngmëniñe yojtsesufrina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna. <sup>24</sup>As chë bomná yoyuayebuáchena: ‘iTaita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem ññeshoca tša séntsesufrina ca.’ <sup>25</sup>Pero Abraham ibojauyana: ‘Uaquiñá, menojuabó, aca fshantsoca vida canjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache

ngménana contsebmna. <sup>26</sup>Y inye soye, canye bétš tдуаñe entsemna tšëngaftangbiocana méntsoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana béngbioye cach ndoñe ca.’

<sup>27</sup>“Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; <sup>28</sup>choca sëndábamna shachna catšátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngménënga luaroye jabama ca.’ <sup>29</sup>Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsanábema soyënga; ichëngbioye chamoyauná ca!’ <sup>30</sup>Chë bomná ibojajuá: ‘Ndoñe, Taita Abraham; nderado obanënguentshana canya chëngbioye tojase, aïne chë tšabe benache muantishache ca.’ <sup>31</sup>Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojancuentá.

**Resjo yomna, nderado bacna soyënga cuanjama**  
(Mt 18.6-7, 21-22; Mc 9.42)

**17** <sup>1</sup>Jesús chabe uatsjëndayënga tojanéyana: “Sempre echanjëftsemna juabnënga bacna soyënga jamama; pero, itša lastema chë entšabiana ndabe causa inyënga bacna soyënga tmojama! <sup>2</sup>Más tšabá chabiana nántsemna canye nantsnëbé chamotsetamošëntšbua y mar béjayoye chamotsashbuetše, y ndoñe chë canya

Bëngbe Bëtsabeñe ošbuachiyá bacna soye chaomama juanatsana. <sup>3</sup>Cuedado šmochtsebmna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. <sup>4</sup>Masque nye canye te, canyëšëfta soye ntšámnaca tcmojaborlá, y canyëšëfta soye ‘chca ndoñe más quechochatsbólra ca’ tcmojauyanëse, aca cmontsemna cha jtseperdónana ca” —Jesús tojánayana.

**Bëngbe Bëtsabeñe jtsošbuáchiyëse, corente obenana jtsebmnana**

<sup>5</sup>Chë uatsjëndayënga Bëngbe Utabnábioye tmojaníyana: —Ošbuáchiyana šmababuaté ca.

<sup>6</sup>Y chë Utabná tojanéjua: —Tšëngaftanga ošbuáchiyana, batšatema masque nye mo mostaza jenaycá šmojtsebmne, quem sicomoro betiyoye šmatjauyana: “quemuentšana mojashtse y mar béjayoca mojë ca”, y quem betiye chca nanjama ca.

**Chë oservená ndayá ibomna jamana**

<sup>7</sup>“Nderado canya tšëngaftanguentsá canye bochichnayá tbojtsebmna, cha jajocana tojtashjango jajañe arayocana o uacnënga anjënocana, čhábioye bochjauyana: ‘Matabo y mabose ca?’ <sup>8</sup>Ndoñe, chamna méntšá bochanjauyana: ‘Jetiñe juasama cochjuábua, y moprontá atše jasérviamá atše candëse y candofšentscuana; y chentšana aca cochjase y cochjofšíye ca.’ <sup>9</sup>Y chë bochichnayábioye ndoñe quebochtëtschuaye ndayá tbojuatariećá cha tojamama. <sup>10</sup>Tšëngaftángnaca cachacá, lempe ntšamo Bëngbe Bëtsá tcmojatariećá chašmojama ora, cmontsamna jayanana: ‘Nduámana oservenënga fsëndmëna; er nye ntšamo jamama šuamncá tifjama ca’ ” —Jesús tojánayana.



**Jesús, bnétsanënga bacna  
nguayanánaca šoquënga tojanashná**

<sup>11</sup> Jerusalenoye benache, Jesús tojánachnëngo Samaria y Galilea luarëjana. <sup>12</sup> Y canÿe pueblotëmoye tojánashjango ora, bnétsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, <sup>13</sup> y mëntšá imojtsáyebuache: —iJesús, Buatëmbayá, šmotsalastemá ca!

<sup>14</sup> Jesús chënga tojánanÿe ora, tojanéyana: —Jerusalenoca bachnángbioye motsajna, y chënga šmochjínÿanÿiye tšëngaftanga mora ndëšoquënga šmojtsemnama ca.

Y tojanopasá, chë bnétsanënga cabá imojétsayëntscuana, ya shnánënga imojtoquédaye. <sup>15</sup> Canÿa chënguentsá, shnaná yojtsemnama tojáninÿe ora, yojesshécona Bëngbe Bëtsábioye jabuache atschuanaye; <sup>16</sup> y Jesusbe delante yojoshëntsamentšÿiye, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entšá inamna.

<sup>17</sup> Chora Jesús tbojaniyana: —Bnétsanënga mondmëna chë shnánënga tmontoquedanga. ¿Ndayentše chë inÿe esconéftanga imojtsemna? <sup>18</sup> ¿Nÿe quem boyabása, inÿe luarocana ashjanganá, tojesshécona Bëngbe Bëtsá jëtschuayama? ¿Ndáyeca chë inÿyanga ndoñe ca?

<sup>19</sup> Y chë entšábioye tbojaniyana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatmëna ca.

**Ntšamo Bëngbe Bëtsabe  
amëndayana yochjóshjango**  
(Mt 24.23-28; 36-41)

<sup>20</sup> Canÿe, chë fariseunga Jesús tmojantjá, mocna ora chë Bëngbe Bëtsabe amëndayana

yochjanóshjanguama; y cha tojanéjua: “Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinÿana.

<sup>21</sup> Chora ndoñe quemochátichamo ‘Muentše entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

<sup>22</sup> Jesús chabe uatsjëndayënga tojanéyana: “Canÿe tempo echanjóshjango, y chora tšëngaftanga šmochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orca; pero chora ndoñe chca quechatóshjango. <sup>23</sup> Chora báseftanga mochántsicamo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto.

<sup>24</sup> Er chë tojatcuinÿe ora, ntšamo celoca catoica juachoica tojabuashinÿinÿenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. <sup>25</sup> Pero natsana cha bontsemna puerte jasúfriana, y morsca entšangbiana uabotená jtsemnana.

<sup>26</sup> “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. <sup>27</sup> Chë tempo, entšanga imnasaye, imnofšëšnaye, imnóbouamnaye; natjémbana imojtsiyeñe, y chca, natjémbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtsanapochocá.

<sup>28</sup> Cachcá ntšamo Lot yojaniyena ora tojanopasacá: entšanga imnasaye, imnofšëšnaye, imnóbouamnaye, imojtsena, sananga imnajena y imnajebuana; <sup>29</sup> pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana

íñeshe y azufre chauaftema, y chentša entsanga tojtsanapochocá. <sup>30</sup> Cachcá echántsemna chë Bëngbe Bëtsá Entšá tbojanbemá chaojtonýná ora.

<sup>31</sup> “Chë tena, nda cachabe yebnentša tsbanánoca chaojsemna, y chabe soyënga cach tsoca tojtsebojnëse, chocana ndoñe chaondétastjango chë soyënga jesabobocnama; y nda jajoca chaojsemna, yebnoye ndoñe chaondéta. <sup>32</sup> Menójuabonga ntšamo Lotbe shémaftaca tojanopasama. <sup>33</sup> Nda tojtsentsëna quem luarentše bëtscá jtsebojnema y atšbiama jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nyetsca tescama yomna tšabe vida echántsebojna.

<sup>34</sup> “Atše cbéyana, chë ibeta, chë Bëngbe Bëtsá Entšá tbojanbemá chaojtonýná ora, útata canýe jutsnéshañe bochántsemna; canýa mochanjesbetše y chë ínýana ndoñe. <sup>35</sup> Uta shembásata cánýiñe bochántsejanýcoye; canýa mochanjesbetše y chë ínýana ndoñe. <sup>36</sup> Uta boyabásata jajoca bochántsetrabajaye; canýa mochanjesbetše y chë ínýana ndoñe ca” —cha tojanéyana.

<sup>37</sup> Chora chë uatsjédayënga Jesús tmojantjá: —Utabná, ¿ndémoca chca yochjopása ca?

Y cha tojanjúá: —Chë obanabe cuerpo tojtsementše chë gallinacënga jojotana ca.

#### Chë viudá y chë mandadbiama cuento

**18** <sup>1</sup> Jesús mëntšá tojanacuntá, entsanga jabuátambama, Bëngbe Bëtsáftaca nyets tempo

jtseucéntayana yomnama, ainaniñe añemo jtsebojnema ndocna te ntjajbanacá. <sup>2</sup> Mëntšá tojánayana: “Canýe pueblentše canýe mandado inamna; chana ni Bëngbe Bëtsábioye ndoñe bonjánebiauatja, ni entsanga yonjánayaunana. <sup>3</sup> Chë pueblentše canýe viudánaca inamna; chana canýe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’ <sup>4</sup> Bayté chë mandado ndoñe yonjábosëna chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entsanga ndoñe quetsátayaunana, <sup>5</sup> pero quem viudá cada ora endabó causa, añe chanjóyeunaye, chabe uayayá chanjacastigá; ndóñesna cada te nandaboye y cabana ya šochanjanamëntša ca.’ ”

<sup>6</sup> Chentšana Bëngbe Utabná tojánayana: “Šmonjouena ntšamo chë ndoñe tšabá ama mandado yojayancá. <sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínýengbe causa montsesufrina y cada te Bëngbe Bëtsá mondbétseimpadana chaújabuachama. ¿Más chamuatobatmá ca yochjáuyana? <sup>8</sup> Atše cbéyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínýengbe causa mora šmojtsesufrinënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entsanga yochjánýena ca?” —Jesús tojánayana.

#### Chë fariseo y chë Romocama impuesto atjanayabiama cuento

<sup>9</sup> Báseftanga imojtsanjuabná chënga tšabe entsanga inmamna ca, pero

chë ínÿengbioye imojtsëbuayënja; chíyeca Jesús mèntšá tojanacuntá jabuátambama: <sup>10</sup>“Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entšángbioye impuesto atjanayá. <sup>11</sup>Chocna chë fariseo, tsanana Bëngbe Bëtsábioye mèntšá ibojtsecuéntaye: ‘Bëngbe Bëtsá, cbontsatschuaná atše chë ínÿengcá ndoñe quetsatsmënama: atbëbanënga, puerte bacna soye amënga y shémbioye ínÿaftaca ingñayënga; y ni quem Romocama impuesto atjanayacá ndoñe quetsatsmënama. <sup>12</sup>Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentšana, bnëtsanentšana canÿe soye acbiama sëndëquëcñá ca.’ <sup>13</sup>Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mèntšá yojtsichamo: ‘iAtšbe Bëtsá, šmotselastemá, atšajema bacna soye amá tsmëna causa ca!’ ”

<sup>14</sup>Chentšana Jesús tojánayana: “Atše cbéyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, añie bëtsá mochanjábema.”

**Jesús, basetémëngbiama Bëngbe Bëtsábioye tbojanimpadá**  
(Mt 19.13-15; Mc 10.13-16)

<sup>15</sup>Entšanga imojanamana Jesúsbioye basetémënga junatsana chauabájajuama, y Bëngbe Bëtsábioye chëngbiama chaboimpadama; pero chë uatsjëndayënga chca tmojáninÿe

ora, tmojanontšé chë basetémënga unachayënga jtsëcácanana.

<sup>16</sup>Pero Jesusna chë basetémënga tojánachembo, y mèntšá tojánayana: “Cachcá mónÿaye chë basetémënga átšbioye chamuabo, y ndoñe matéuyanana; er Bëngbe Bëtsabe amëndayana endmëna chë mo quem basetëmëngcá imomnëngbiama. <sup>17</sup>Ndegombre cbéyana, nda Bëngbe Bëtsabe soyënga ndoñe tonjóyëngacñe mo canÿe basetëmá jtsosbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

**Canÿe bomna entšá Jesúsbioye tojána**

(Mt 19.16-30; Mc 10.17-31)

<sup>18</sup>Canÿe mandayá Jesúsbioye tbojantjá: —Tšabe Buatëmbayá, ñdayá šojtsemna jamana chë nyetsca tescama yomna tšabe vida jtsebomnama ca?

<sup>19</sup>Y Jesús tbojanjuá: —¿Ndáyeca šcjayana “tšabia ca”? Tšabia nÿe canÿa endmëna: Bëngbe Bëtsá. <sup>20</sup>Aca condétatšëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, ndoñe catjuaboínÿena y acbe bëtsétsata ndoñe stëtšoye catjáquedaye ca.”

<sup>21</sup>Chora chë boyabása tbojanjuá: —Atše lempe chca básetema orscana sëndocumplina ca.

<sup>22</sup>Jesús chca tojanuena ora, tbojanayana: —Cabá canÿe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnëjëmënga cochtsatsataye; chca, celoca canÿe bëts bomnana cochántsebomna. Chentšana, cochjabo y šcochjuasto ca.

<sup>23</sup>Chë entšá chca tojanuena ora, puerte ngmënacá yojtsemna,

er cha corente bomná inamna.

<sup>24</sup> Chca ngmená tbojáninye ora, Jesús tojánayana: —iYapa totcá bomnëngbiama entsemna Bëngbe Bëtsabe amëndayoye jamashënguama!

<sup>25</sup> Ndegombre, más paselo endmëna canye camello chë coshufjentša atëfjnëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>26</sup> Chora, chë chca imojouenënga tmojánayana: —¿As nda yochjobenaye atsibocaná jtsemnana ca?

<sup>27</sup> Y Jesús tojanéjua: —Ndayá entšanga ndoñe mondobena jamana, Bëngbe Bëtsá añe endobena jamana ca.

<sup>28</sup> Chora Pedro, Jesúsbioye tbojanianyana: —Bëngbe Utabná, aca contsonjá, bënga lempe chë fsëndbomna soyënga fsënjëseboshjona, y ácaftaca fsëntsajna ca.

<sup>29</sup> Jesús chora tojanéyana: —Ndegombre chéyana, ndánaca Bëngbe Bëtsábioye jaserviama, chabe amëndayama jtsabuayinyayëse, cachcá tojëftseboshjona chabe yebna, shema, catsátanga, bëtsétsanga o básenga, <sup>30</sup> cha mora quem luarentsé chë soyëngama más echanjójëngacñe, y chë inye luarocna, chë nyetsca tescama yomna tšabe vida ca.

**Jesús cachiñe tojánayana cha jóbanama y jtayenama**  
(Mt 20.17-19; Mc 10.32-34)

<sup>31</sup> Jesús chabe bnëtsana uta uatsjëndayënga barie tojánachembo, y mëntšá tojanéyana: “Šmontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tbojanbemabiama tmojanabemcá; <sup>32</sup> er choca cha chë ndoñe judiëngbe

cucuatšinë mochanjáboshjona, y mochantšáboyejuana, mochanjójyenguango, mochántsebuashëtoto; <sup>33</sup> y chamojátjanjentšana, mochanjóba, pero unga tianoye cha echántayena ca.”

<sup>34</sup> Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojsétsëtsnacá, er chëngbiama yojamna josértama ndopodena soyënga.

**Jesús, Jericó puebloca canye jtanábioye tbojanshná**  
(Mt 20.29-34; Mc 10.46-52)

<sup>35</sup> Tojanopasá, Jesús Jericó puebloye yojtsebëconaye ora, canye jtaná benache juachañe inatbemana, lemošna otjanañe. <sup>36</sup> Entšanga chëjana imojsachnëjuanama tojanuena ora, yojanotícia ndayá yojsopasana ca, <sup>37</sup> y chë entšanga tmojanianyana, —Jesús Nazaretocá entsebeconá ca.

<sup>38</sup> As cha yojontsé uayebuáchana: —iJesús, Davídbentšana Entšá, šmotselastemá ca!

<sup>39</sup> Chë natsana imojtsajñënga chë jtaná imojtsácacana, iytëca chaóbemama; pero cha más yojsáyebuache: —iDavídbentšana Entšá, šmotselastemá ca!

<sup>40</sup> As Jesús tojantsá y tojanmandá cha chamobetsama. Cha ya bëcoñe yojtsemna ora, Jesús tbojantjá:

<sup>41</sup> —¿Ndayá cojtseboše atše acbiama chjamama ca?

Y chë jtaná tbojanjuá: —Atšbe Utabná, atše sëntseboše chašuatábíñyama ca.

<sup>42</sup> Chora Jesús tbojanianyana: —Matinýe, Bëngbe Bëtsábeñe betsošbuachéyeca shnaná contsatsmëna ca.

<sup>43</sup> Y cachora cha tšabá ibojtabinýna, y Jesúsbioye ibojtséstona, Bëngbe

Bëtsá atschuanaye. Y nÿetsca entšanga, chca tmojáninÿe ora, Bëngbe Bëtsá imojtsatschuanaye.

### Jesús y Zaqueo

**19** <sup>1</sup> Jesús Jericó pueblaca tojánashjango ora, chë pueblëjana cha yojtsachnëjuana. <sup>2-3</sup> Chora, canÿe bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinÿama. Pero ndoñe yontsobena jinÿama, bëtsca entšanga causa y cha becu inamna causa. <sup>4</sup> Chcasna, cha betesco natsanoye tojafsanótjajo y canÿe sicomoro betiyeshoye tojánashëngo, chca, Jesús chëjana tojtsachnëjuana ora, jinÿama jobenayama. <sup>5</sup> Jesús chë betiyeshoye tojánashjango ora, tsbanánoye tojanontjeshé y Zaquéobiye tbojáninÿe. As Jesús tbojanianya: “Betsco chocana matastjango, Zaqueo, er mënté chanjá acbe yebnoye jatema ca.”

<sup>6</sup> Chora Zaqueo betsco tojtanstjango y chentšana puerta oyejuayá Jesúsbiye tbojanofja. <sup>7</sup> Entšanga chca tmojáninÿe ora, tmojanontsé Jesusbe contra mëntšá ichámua: “Jesús tonjá canÿe bacna soyënga amabe yebnentše jatema ca.”

<sup>8</sup> Chora Zaqueo tojantsá, Bëngbe Utabná Jesús bentše, y mëntšá tbojanianya: —Mouena, atšbe Utabná, atšbe bomna soyënguentšana tséntsañe ndbomnëjmënga chanjátataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

<sup>9</sup> As Jesús tbojanianya: —Mënté, aca acbe bacna soyënguentšana atsbocaná contsemna, er Zaqueo, ácnaca Abrahábentšana entšá condmëna.

<sup>10</sup> Er chë Bëngbe Bëtsá Entšá tbojanbemá tojabo chë pochocánënga

jtsemnama imojtsajnënga jabétsanguama y jabátsebacama ca.

### Chë crocénana cuento

(Mt 25.14-30)

<sup>11</sup> Entšanga chë soyënga imojtsuenana, y Jesús inÿe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

<sup>12</sup> Jesús tojanéyana: “Canÿe luarentša uámana entšá inÿe bën luaroye yojá, cachabe luarentša rey chamobemama y chentšana cachábioye jtama. <sup>13</sup> Cabá nda ora, chabe bnétsana oservénënga yojáchembo y bëtsca crocénana cada cánÿabioye yojéftsayentšbuachiye, y mëntšá yojéftseyana: ‘Quem crocénana trato šmochjábema atše candëtabëntscuana ca.’ <sup>14</sup> Pero cachabe luarentša entšanga cha imojuáya, as chëngna básefta entšanga imojichamuá chë inÿe bën luaroca mëntšá chamuayanama: ‘bënga ndoñe queftsátsoše cha bëngbe rey chaotsemnama ca’.

<sup>15</sup> “Pero pronto chë luarentša rey cha imojábema. Y chë luaroye yojtá orna yojamánda chë crocénana yojéftsayentšbuáchenga chamobéconama, jtsetatšëmbuama ntsachetšá cada ona chë crocénana yojongánama. <sup>16</sup> Chë natsaná yojáshjango y yojayana: ‘Taita, acbe crocénana bnétsana soye más tonjoboté ca.’ <sup>17</sup> Y chë rey ibojojuá: ‘Tša tšabá, tšabe oservená. Aca quem base soyinë ntšamo tbojamandacá tšabá tcojámayeca, bnétsana pueblentša mandado chacotsemnama cbojayé ca.’ <sup>18</sup> Chentšana inÿa yojáshjango y yojayana: ‘Taita, acbe crocénana

shachna soye más tonjoboté ca.’<sup>19</sup> Y chë rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inya vojobeconá y mëntšá yojayana: ‘Taita, muentše acbe crocénana entsatsmëna; canye pañueléjuañe bonguana sëntsejajo. <sup>21</sup> Atše acbiama uatjana šonjuábuache, er aca canye tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’ <sup>22</sup> As chë rey ibojauyana: ‘Bacna oservená, cach ace palabréngaca chanjínyanýiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse, <sup>23</sup> ¿ndáyeca ndoñe tconjá chë crocénana bancoca jetsobuájuaama, y atše camoye matijtabo ora, mašctoyé chë crocénana y chë chentšana tojoboté crocénanënaca ca?’ <sup>24</sup> Y chë chentše imojtsemna entsanga yojáuyana: ‘Chë crocénana motseboca y chë bnétsana soye más tojobotébiyoe chana motsatsetá ca.’ <sup>25</sup> As chënga imojojá: ‘iPero cha ya bnétsana soye más entsebomna ca!’ <sup>26</sup> Y chë rey yojójua: ‘Atše cbéyana, nda tojtsebomnábiyoe, más mochanjátsetaye; pero nda tondaye tondbomnábiyoe, chë tojtsejuabná batsatema yobomna sóynaca mochántseboca ca. <sup>27</sup> Y chë atše uayayënga, chë chëngbe rey atše chaitsemnama ndoñe monjánbošëngna, moye mënatse y atšbe delante šmochtsëbaye ca.’ ” —cha chora yojayana.

**Jesús Jerusalenoye tojánashjango**  
(Mt 21.1-11; Mc 11.1-11; Jn 12.12-19)

<sup>28-29</sup> Chca tojéftsanayana chentšana, Jerusalenoye yojétsaye ora, Jesús

tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjëndayata tojanichamó, <sup>30</sup> mëntšá jáuyanëse: “Tsëndatbe natsana entsemna base pueblotëmoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Šochjuafjoná y šochjuánatse. <sup>31</sup> Y nderado nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’ ”

<sup>32</sup> Chë uatsjëndayata tbojána y lempe ntšamo Jesús tojanéyancá tbojáninýena. <sup>33</sup> Y chë burrotema imojtsajafjná orna, chë burrotema nduiñënga tmojanéyana: —¿Ndáyeca chë burrotema šojtsajafjná ca?

<sup>34</sup> Chora chata tbojánayana: —Bëngbe Utabná bontsajabótoyeca ca.

<sup>35</sup> Chentšana Jesúsbiyoe chë burrotema tmojanánatse, y chë burrotëmbëne chatbe entsáyá tbojanájatse, y chábeñe Jesús tmojanenjayé. <sup>36</sup> Y cha yojtsachñëjuana ora, entsanga chëngbe entsáyá benachëjana imojtsëtétsatsana.

<sup>37</sup> Olivos tjashe tšmanoye yojtsebeconá ora, chë bëtsca entsanga, Jesúsbeñe ošbuáchiyënga, tmojanontšë uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. <sup>38</sup> Chënga mëntšá imojtsichamo: “iCorente bendición bomná chaotsemna, chë Bëngbe Utabnabe obenánaca tojabo Rey ca! iCeloca tšabá entsemna! iBëngbe Bëtsá matschuanga ca!”

<sup>39</sup> Chë entsanguentše básefta fariseunga imojtsemnënga, Jesús tmojaníyana: —Buatëmbayá, acbe ústonënga mëcácana chca ndoñe chamondëtsáyebuachama ca.

<sup>40</sup> Pero Jesús mentsá tojanéjua:  
—Ndegombre cbéyana, mēnga iytēca  
tmojobiamēse, chē ndētšbēnga  
muanjuayebuáchena ca.

<sup>41</sup> Jesús Jerusalén béconana  
tojánashjango, y chē bēts pueblo  
tojáninye ora, chentša entšangbiana  
tojánenobošachna. <sup>42</sup> Y mentsá  
tojánayana: “iMalaye šmēntsetátšēmo,  
nye mo mēnténaca, ndaya yojtseita  
tšēngaftangbeñe lempe tšabá  
chaotsomñama! Pero mora chē  
soye tšēngaftangbe bominyama  
entsēitēmena. <sup>43</sup> Er Jerusalenoca  
bacna tenga echanjóshjango; chora  
uayayēnga chentša shēconánējana  
canye tapiēse mochantsepórma,  
mochantsejētja y nyetsca juachoicana  
mochanjontsé tšēngaftanga jtsatsejana,  
<sup>44</sup> y lempe mochantsepochóca. Muentša  
oyenēnga mochantsebaye, y ni mo  
canye ndētšbé inyebé juatsboca  
quemochaiseboshjona, chē Bēngbe  
Bētsá tšēngaftanga játsebacama tojabo  
ora, ndoñe chešmatoyeuná causa ca”  
—Jesús tojánayana.

**Jesús, Bēngbe Bētsabe  
bēts yebnentšana enēnga y  
obuámnayēnga tojtanébuacna**  
(Mt 21.12-17; Mc 11.15-19; Jn 2.13-22)

<sup>45</sup> Chentšana, Bēngbe Bētsabe bēts  
yebnoye Jesús tojánamashēngo y  
tojanontsé chē chentše imojtsenēnga  
chentšana jtēbuacnana, <sup>46</sup> y tojanéyana:  
“Bēngbe Bētsá chabe uabemana  
palabrēnguñe tojayana: ‘Atšbe  
bēts yebna echántsemna átšeftaca  
encuéntaye yebna ca’, pero  
tšēngaftangna, atšēbanēngbe oyeñe  
chē yebna šmojtsebema ca.”

<sup>47</sup> Y cada te, Bēngbe Bētsabe  
bēts yebnentše Jesús entšanga  
yojtsabuátambaye; y bachnangbe  
améndayēnga, ley abuátambayēnga

y chē pueblentša mandayēngnaca  
imojtsenguaye ntšamo jamēse cha  
jóbana. <sup>48</sup> Pero ndoñe tmonjáninylene  
ntšamo, er nyetsca entšanga  
corente imojtseyeunana ntšamo cha  
yojtsoyebuambnacá.

**Jesube obenana**  
(Mt 21.23-27; Mc 11.27-33)

**20** <sup>1</sup> Canye te, Bēngbe Bētsabe  
bēts yebnentše Jesús  
yojtsabuátambaye, y chē tšabe  
noticiēngama yojtsabuayiyná  
ora, tmojánashjajna bachnangbe  
améndayēnga, ley abuátambayēnga,  
judiēngbeñe bētsējemēngcá  
mandayēngaftaca cányiñe; <sup>2</sup> y Jesús  
tmojaninyana: —Šméyana; ¿ndaye  
deréchoca chē contsama soyēnga aca  
cojtsama ca? o ¿chca jtsamama nda  
obenana tcmēnjatšētá ca?

<sup>3</sup> Chora Jesús tojanéjua:  
—Atšnaca canye soye séntsebomna  
tšēngaftanga jatjayama.  
Šmochjojuanga. <sup>4</sup> ¿Nda Juan chē  
Ubayaná tbojanichmó entšanga  
jubáyama, Bēngbe Bētsá o entšanga  
ca?

<sup>5</sup> Chora chēnga tmojanontsé  
enatsētsnayana: “ ‘Bēngbe  
Bētsá ca’ chamojuuase, cha  
šochanjáuyana: ‘As ¿ndáyeca  
chábeñe ndoñe šmonjanošbuachē  
ca?’ ” <sup>6</sup> Y ndoñe quemuátobena  
jayanana ‘entšanga ca’; entšanga  
ndētšbēngaca buattsēbaye, er  
nyetscanga becá mondējuabná  
Juan ndegombre Bēngbe Bētsabe  
juabna oyebuambnayá yojamnama.”  
<sup>7</sup> Chcasna, chēnga tmojanjúa  
ndoñe monjántatšēmo nda Juan  
tbojanichmó entšanga jubáyama ca.

<sup>8</sup> Y Jesús tojanéyana: —Asna atše  
cach ndoñe quechochatéyana ndaye  
deréchoca chca stsama ca.

**Chë puerte bacna trabájayëngbiana  
cuento**

(Mt 21.33-44; Mc 12.1-11)

<sup>9</sup>Chentsana Jesús tojanontsé entšanga jáuyanana, y quem cuéntoca tojanabaatambá: “Canÿe entšá uvas betiyënga yojáje y chë fshantse inÿe trabájayënga yojúyentšame, y baytescama bën luaroye yojtsoñe. <sup>10</sup>Chë uvasëšangá juashacama tempo yojobuache orna, chë jajañe nduiño canÿe oservená ibojíchmua chë trabájayënga jáuyanama ntsachetšá cha ibojtsotocánama. Pero chëngna cha imojtsejantšetaye, y tondaye ntoyiyá imojtichmuá. <sup>11</sup>Chentsana inÿa ibojíchmua; pero chë trabájayënga cha imojtsejantšetaye, imojtsóyenguango, y tondaye ntoyiyá imojtichmuá. <sup>12</sup>Chë nduiño inÿa ibojatichmuá; pero chánaca chënga imojtsejantšetaye, imojtselšía, y chentsana imojtábocna.

<sup>13</sup>“Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmua; nderádose cha añe mochanjóyeunaye ca.’ <sup>14</sup>Pero chë trabájayënga, chë uaquiñá imojinÿe orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiana echanjoquéda ca.’ <sup>15</sup>Chcasna, chë uvas jajañentšana cha imojtsábocna y imojtsóba.”

Chora Jesús tojanatjá: —Y asna, çntšamo šmojtsejuabná, ndayá chë jajañe nduiño chë trabájayëngaftaca yochjama ca? <sup>16</sup>Cha co echanjá y chë trabájayënga echanjetsëbaye, y chë uvas betiyënga jajañe inÿe trabájayënga echanjárrendaye ca.

Chë entšanga chca tmojanuena ora, tmojánayana: —iBëngaftaca ndocna te chca chaondopasá ca!

<sup>17</sup>Pero Jesús tojanënyané y tojánayana: —As çndayama Bëngbe Bëtsabe uabemana palabrengüine uiayana?:

Chë yebna jebuanënga tmojtsanaboté ndëtšbé, mora chë más bëts uashacuanëšentše entsejájona ca.

<sup>18</sup>Ndánaca chë ndëtšbeñe chaojotsatšá, chëbé bochántsatcacaye; y chë ndëtšbé ndábeñnaca chaojótšatše, polvëshe bochántsebema ca —Jesús tojánayana.

<sup>19</sup>Chë bachnangbe amëndayënga y ley abuátambayënga tmojanenótatšëmbona Jesús chca tojanacuntá jinÿanyiyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entšangbiana imojtsauatja.

**Chë Romoca bëts mandadbiana  
impuesto jtsatsquécjnayama**

(Mt 22.15-22; Mc 12.13-17)

<sup>20</sup>Chentsana chënga báseftanga tmojanichamó, mo ndegombre tšabe entšanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. <sup>21</sup>As chënga tmojantjá: —Buatëmbayá, bënga fséntsetatšëmbo ntšamo aca cojtsoyebuambná y cojtsabaatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiana tondaye quenatámana nda más uamaná o nduamaná tomnana. Aca contsabaatambá ndegombre tšabe vida jtsebomnama, ntšamo Bëngbe Bëtsá yomandacá. <sup>22</sup>Chcasna, šméyana, çtšabá tayojtsemna bënga, César, chë Romoca bëts mandadbiana, impuesto jtsatsquécjnayana o ndoñe ca?

<sup>23</sup>Jesús yojtsetátšëmbo, ntšamo cha tojayaniñe jisháchichiyama chënga



imojtsebošama; as tojanéyana: <sup>24</sup>—Chë šmatsquëcjiná crocénana šminÿinÿenga ca; ðndabe jubíá chë crocénániñe yojtsemna, y ntšamo muentšë entsabemancá nda chca iuabaina ca?

Y chënga tmojanjuá: —Césarbe jubíá; cha chca enduabaina ca.

<sup>25</sup>Y Jesús tojanéyana: —César šmochtoyiye cha ibotocana soye; y Bëngbe Bëtsana cha ibotocana soye ca.

<sup>26</sup>Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanéjuama, ojnánánënga iytëca imojobiama.

#### **Obanënga jtayenama Jesús tmojantjá**

(Mt 22.23-33; Mc 12.18-27)

<sup>27</sup>Chentšana, báseftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Jesús mëntšá tmojantjá:

<sup>28</sup>—Buatëmbayá, Moisés bëngbe leyënguiñe tojëftsabemana, nderado canÿe boyá tojtsóbana y básenga ndoñe tonjëftsabashejuanësna, canmëna chë uabentsá chë shémaftaca jtobouamayana, chca, chë chabe uabochená obanabiama básenga jtsabamnama ca. <sup>29</sup>Chcase, canÿe bëngbentšë canÿsëfta catšátanga monjamna. Chë natsaná tonjanobouamá y tontsanóbana, básenga ntjëftsabashejuancá;

<sup>30</sup>chentšana chë inÿa chë shémaftaca tonjanobouamá, y cachcá tonjanopasá.

<sup>31</sup>Chë inÿe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inÿe uabentsëngnaca cháftaca tmonjanobouamá, pero nÿetscanga tmonjanóbana básenga ntjëftsabashejuancá. <sup>32</sup>Cabana, chë

shembásanaca tontsanóbana. <sup>33</sup>Y chcasna, chë obanënga chamojtayena ora, ðndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

<sup>34</sup>Chora Jesús tojanéjua: —Quem luarentšë boyabásenga y shembásenga mondbëtsobouamnaye; <sup>35</sup>pero chë echanjòshjango luaroye jama y obanënguentsana jtayenama mercedo jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, <sup>36</sup>ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsana mochtayëneyeca. <sup>37</sup>Y Moisésnaca, chë yojtsángbototjuana betiyetémama tojanábementšë, bënga šontsinÿanÿná chë obanënga imnátayenama; chentšë Bëngbe Bëtsá tojánayana cha yomna Abraham, Isaac y Jacobëbe Bëtsá ca. <sup>38</sup>Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>39</sup>Chora básefta ley abuátambayënga Jesús tmojanianya: —Buatëmbayá, tšabá tcjayana ca.

<sup>40</sup>Y ya ndoñe más montsenñémua inÿe soyëngama jatstjanayana.

#### **¿Cristo ndabe entsábentšana yomna?**

(Mt 22.41-46; Mc 12.35-37)

<sup>41</sup>Jesús tojanatjá: “¿Ndáyeca tsëngaftanga šmnëtsichamo chë Uámana Uabuayaná, chë Cristo, Rey

Davídbentsana iuabó ca? <sup>42</sup> Er cach David, chabe librésaña Salmos ca uabainésaña, tojánayana:

Bëngbe Bëtsá, atšbe Utabná  
Cristbioye tbojanayana:

‘Atšbe catšbioica mótbema,

<sup>43</sup> atšbe obenánaca, acbe uayayënga  
acbe cucuatšíne chamoquedama  
chjamëntscuana ca.’

<sup>44</sup> ¿Ntšámose, Cristo, Davídbentsana nántsemna, cach David ‘Utabná ca’ chábioye tbojtsabouátmëse ca?’ —cha tojanatjá.

**Jesús chë ley abuátambayëngbiama  
tojánayana chënga ndoñe tšabá  
montsama ca**

(Mt 23.1-36; Mc 12.38-40; Lc 11.37-54)

<sup>45</sup> Nyetsca entšanga imojtsuenana, y Jesús chabe uatsjëndayënga tojanéyana:

<sup>46</sup> “Cuedado šmochtsebomna, y ndoñe šmattsama chë ley abuátambayëngcá; chënga jtsogusetánana bënëna entšayangaca jtsajnana, y jtsebošana tsáshenañe entšanga becá respétoca chamotsacheuanayama. Chënga chë judiëngbe enefjuana yebñenguëne chë más uámana luarënguüñe jtsetbíamanana, y fiestënguüñe nÿa quëfseroca. <sup>47</sup> Pero chë viudángbioye chë tmobomna soyënga jtsabacayana; y entšangbe delante tšabá chacmotsënyama y chënga imojtsaíngñama ndoñe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá inÿengbiama más chënga echanjácastigaye ca” —Jesús tojánayana.

**Jesús yojtsënyaye chë crocénana  
quëcjnyënga**  
(Mc 12.41-44)

**21** <sup>1</sup> Bëngbe Bëtsabe bëts yebnentše, Jesús yojtsënyaye

chë bomnënga crocénana jtsequëcjnyayana chë crocénana quëcjnyëtëmiñe; <sup>2</sup> y canÿe viudá ndbomnjëmnaca tbojáninÿe, uta crocénana chëtëmiñe yojaftsesegóra. <sup>3</sup> Chora Jesús tojánayana: “Ndegombre cbéyana, quem viudá ndbomnjëma, Bëngbe Bëtsabiama nyetscangbiama más becá tonjëftsesegorá; <sup>4</sup> er nyetscanga tmonjëftsesegorá chë yojtsóyentšjamentšana, pero chana, masque tša ndbomnjëma, cha vida jtsebomnama lempe ntsachetšá yobomncá tonjëftsesegorá ca.”

**Jesús tojánayana Bëngbe  
Bëtsabe bëts yebna lempe  
mochjánpochocama**

(Mt 24.1-2; Mc 13.1-2)

<sup>5</sup> Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámana ndëtšbéngaca y chë entšanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana: <sup>6</sup> —Canÿe tempo echanjóshjango, y lempe ntšamo mora muentše šmontsonÿacá tondaye queochatoquéda, ni mo canÿe ndëtšbé inÿebé juatsboye. Lempe mochantsepochóca ca.

**Ntšamo yochtsemna quem luare  
jopochócoma te chaojtsobeco ora**  
(Mt 24.3-28; Mc 13.3-23)

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entšanga chamotsetatšëmbuama ca?

<sup>8</sup> Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo

chënga atše imomna ca. Mochántsichamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye. <sup>9</sup>Y tšëngaftanga, entšanga imojtsentsjanama y entšanga mandadëngbe contra imojtsemnama chašmojtſuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

<sup>10</sup>Y mëntšánaca Jesús tojanéyana: “Canÿe luarentša entšanga, inÿe luaroca entšangaftaca mochántsentsjanaye; y canÿe amëndayábentša entšanga, inÿe amëndayábioca entšangaftácnaca.

<sup>11</sup>Ba luarënguïñe jabuache echanjuangmémana, bëts shëntsana, y entšanga pochócaye šocanënga echanjóshjango; y celoca echántsemna puerta uabouana soyënga y bëts soyënga, entšanga jinÿanÿiyama quem luare ya yochtsopochócama.

<sup>12</sup>“Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántsama; bënga judiëngbe nefjuana yebnëngoye cmochanjunatse játsetšenama y cárceloynaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa.

<sup>13</sup>Chca šmochanjapása, ntšamo atšbiamá šmotatšëmbcá chënga chašméyanama. <sup>14</sup>Natsana ndoñe šmatjátšjuabnaye jenéuyanama ntšamo chora jóyebuambayana, <sup>15</sup>er atše chanjama puerta tšabá y osertánanaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmongsichamo ca, y

ndocá jojuama quemochatobenaye. <sup>16</sup>Pero uayayëngbe cucuatšinë cmochanjábashejuana cach tšëngaftangbe bëtsétsanga, catšátanga, pamíllanga y amiguënga; y tšëngaftanguentšana báseftanga cmochantsëbaye. <sup>17</sup>Y nÿetsca entšanga cmochantsëbuayënja, atšbe ústonënga bëtsemna causa. <sup>18</sup>Pero tšëngaftangbe bestšašentšana ni mo canÿe stjënëja quecmochátabajajo. <sup>19</sup>Tšëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tšabe vida šmochántsebmna ca.

<sup>20</sup>“Jerusalén nÿets shëconana soldadënga chašmojanÿe ora, šmochtsetátšëmbo Jerusalén jopochócama tojobuáchama.

<sup>21</sup>Chorna, chë Judeoca oyenënga batsjabengoye chamotsacheta; Jerusalemntšë chamojtsemnënga, chentšana chamuaisebocana; y chë jajenache chamojtsemnënga, Jerusalemoye ndoñe chamondésamashjna. <sup>22</sup>Er chora echántsemna chë entšangbe jabuache castigo; lempe ntšamo Bëngbe Bëtsabe uabemana palabrënguïñe endayancá chora echanjochnëngo.

<sup>23</sup>ITša lastema chë tempo shembásenga ngomámanëngbiama o ochóchaye básenga chamojtsabamnëngbiama! Er chora corente ngmënaná quem luarentšë echántsemna, y quem luarentša entšangbiama chë uabouana castigo. <sup>24</sup>Inÿenga espadéjaca mochanjóbana, y ínÿengbiyoye nÿetsca luarënguëjana utámenënga mochanjunatse; y chë ndoñe judiëngna, Jerusalemoca entšangbiyoye mochántsatsëjaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

**Bëngbe Bëtsá Entšá tbojanbemá  
quem luaroye echanjésabo**

(Mt 24.29-35, 42-44; Mc 13.24-37)

<sup>25</sup> Mëntsánaca Jesús tojánayana: “Chora bëts soyënga echantsinýna shinýiñe, juashconiñe y estrellënguñe; y quem luarentša entsanga tša mochántsausatja, ndayá jamama ntsetatsëmbcá, chë mar béjaye y olëshënga corente echantsefshauenana causa. <sup>26</sup> Entšanga echantsabuatëcja tša auatja causa y ndayá quem luariñe yochjopásama enócochinýena causa; er chë quem luarentša tsbanánoca espíritënga obenana bomnënga echanjángmëmana. <sup>27</sup> Y chora entsanga mochanjinýe, chë Bëngbe Bëtsá Entšá tbojanbemá jantsetëshiñe echántsaboye, puerte obenánaca y corente buashinýinýaniñe. <sup>28</sup> Chë soyënga jochnënguama chaojobjatšë ora, añemo šmochjentsetaye y bestšaše játsbanase šmochjarrepára, er chora echántsemna chë tšëngaftangbe atëbacayana ca” —Jesús tojánayana.

<sup>29</sup> Mëntsánaca Jesús tojanéyana jabuátambama: “Šmochjinýe canýe higo betiye o ndaye inýe betíynaca.

<sup>30</sup> Tojtsaisëjotsanama šmojinýe ora, jtsetatsëmbuana chë tšabe tempo ya yojtsaisobecuama. <sup>31</sup> Cachcá, chë soyënga yojtsëchnëjuanama chašmojinýe ora, šmochtsetátšëmbo chë Bëngbe Bëtsabe amëndayana ya yojtsobecuama.

<sup>32</sup> “Ndegombre cbéyana, lempe chca echanjochnëngo, morsca entsanga cabá ndóbana ora. <sup>33</sup> Celoca y quem luare echanjopochóca, pero atšbe palabra ndocna te queochaisopochóca.

<sup>34-35</sup> “Cuedado šmochtsebomna y ndoñe šmatjaleséncia tšëngaftangbe ainana bacna juabnëngaca chaotsemnama, jenomándama

ntsobencá mocá enobuena causa, tmoye causa y nýe quem luarentša soyëngama enócochinýena causa; y tšëngaftanga prontánënga šmochtsemna, nýe ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiama canýe uachmaniñe cuaftsemncá. Er nýetsca quem luarentša entsangbiama chca echántsemna. <sup>36</sup> Cuedado šmochtsebomna y yejuana šmochtsantješna; nýe ntseco órnaca Bëngbe Bëtsáftaca šmochtsencuëntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanéyana.

<sup>37</sup> Jesús, bnëté Bëngbe Bëtsabe bëts yebnentšë yojánabuatambaye, y ibetna, Olivos uabaina tjashoye yojánaye joquédama. <sup>38</sup> Y nýetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

**Entšanga tmojanjuabó ntšamo  
jamëse Jesúsbioye jishachama**

(Mt 26.1-5, 14-16; Mc 14.1-2, 10-11; Jn 11.45-53)

**22** <sup>1</sup> Ya yojetsobeco Bashco fiesta, chë levadúraca ndëpormana tandëše saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. <sup>2</sup> Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsangbiama imojtsauatja.

<sup>3</sup> Chora Satanás, Judas chë Iscariote ca uabobuatmabe ainaniñe bacna juabnënga tojanjájó. Chánaca yojamna chë bnëtsana uta uatsjendayënguentsá; <sup>4</sup> y tojána,

chê bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuëntama, ntšamo Jesús chëngbe cucuatšinë jayentšbáshejuanama. <sup>5</sup> As chënga imojóyejuaye, y Judas tmojanšbuachená crocénana chama jtatšetayana. <sup>6</sup> Y Júdasna aïne ca tojánayana; y cach orscana cha yojtseguaye ntšamo jamana y ndëmua ora Jesús chëngbioye jayentšbáshejuanama, ndocna entšanga ora.

**Jesús chabe uatsjëndayëngaftaca  
Bashco saná tojanse**

(Mt 26.17-29; Mc 14.12-25; Jn 13.21-30; 1Co 11.23-26)

<sup>7</sup> Chê Bashco fiesta ora tojanóshjango, chë levadúraca ndëpormana tandëše sayté; chë te yojamna, Bëngbe Bëtsá jëtschuayamna canye oveshá jóbana chora jasama. <sup>8</sup> As Jesús, Pedro y Juánbioye tojanéyana: —Motsata y saná šochjapróna Bashco fiestama bënga mochjasama ca.

<sup>9</sup> Chora chata tbojantjá: —¿Ndémoca cojtseboše chë saná fchjapróntama ca?

<sup>10</sup> Y Jesús tojanéjua:

—Jerusalenentše chašojámashëngo ora, canye bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonyaye ndëmuanýe yebnentše cha yochjámashënguama;

<sup>11</sup> y chentša nduiño šochjauyana:

“Chê Buatëmbayá šonjichamá aca jauyanama: ‘¿Ndayentše chë tsaïne yojtsemna, Bashco saná atše atšbe uatsjëndayëngaftaca jasama ca?’ ”

<sup>12</sup> As cha cmochanjínyanýiye canye bëts tsaïne, tsbanana pisoca; ya lempe echántseprontana, y chentše, Bashco fiestama saná šochjapróna ca.

<sup>13</sup> As chë útata tbojána, y tbojáninýena lempe ntšamo Jesús

tojanéyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjëndayëngaftaca, chë cachënga más chcoye chabe ichmónënga ca uabáinënga. <sup>15</sup> Chora Jesús tojanéyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. <sup>16</sup> Muentšana ndoñe más quemëntša saná quicháise, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre uayancá ca.”

<sup>17</sup> Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbéyana, <sup>18</sup> chë uvas betiyëntša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëše tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiamá. Ntšamo mora bënga montsamcá šmochtsama, atšbiamá jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëšëca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entšangaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiamá echanjuábuashana. <sup>21</sup> Pero chë uayayëngbe cucuatšinë šochjaboshjoná,

meséshentše átseftaca entsemna.  
 22 Ndegombre, chë Bëngbe Bëtsá Entsá tbojanbemáftaca echanjopása, ntšamo Bëngbe Bëtsá chabiamá tojanjuabocá. ¡Pero tša lastema chë bochjáboshjonabiama ca!” —Jesús tojánayana.

23 Chorna chë uatsjéndayënga tmojanontsé entjanayana, chënguentsá nda chë boshjuaná bétsemnana.

#### Nda chë más uamaná yomna

24 Chë uatsjéndayënga imojtsenatsëtsnaye chënguentsá nda chë más uamaná bétsemnana.  
 25 As Jesús tojanéyana: “Chë ndoñe judiëngbeñe, chë reyënga chëngbe entsángbiyoye nÿe ntšámnaca jtsaméndayana, y chentša améndayënga jtsamana, entsanga chëngbiyoye tsabe soye amënga ca chamotsëbobuátmama.

26 Pero tsëngaftangbeñe ndoñe chca chaondëtsemna; chamna, tsëngaftangbeñe chë más uamaná mo chë más basacá chaóbema, y chë mandayá mo chë oservenacá. 27 Er, çndase chë más uamaná yomna, chë meséshentše tojotbemá o chë uajuatšnayá? Ndegombre co chë meséshentše tojotbemá; pero atšna tsëngaftangbeñe séntsemna mo chë oservenacá.

28 “Atšbe padecéniñe tsëngaftanga sempre átseftaca šmondëtsemna.  
 29 Chíyeca, atšbe bariëna, canÿe améndayana cbochanjátšataye, ntšamo atšbe taitá canÿe améndayana šojatštacá; 30 chca, atšbe améndayoca meséshentše átseftaca šmochanjase y šmochanjofšiyey, y uamana tbemaniñe mo reyëngcá šmochanjotbiama, chë Israeloca bnëtsana uta pamíllanga entsángbiama chašmuayanama tsábá o ndoñe tsábá chënga tmonjamama ca” —Jesús tojánayana.

**Jesús tojánayana, chábioyey  
 ndoñe bonjanabuátma ca Pedro  
 yochjánayanama**  
 (Mt 26.31-35; Mc 14.27-31; Jn 13.36-38)

31 Jesús mëntšánaca tojánayana: —Simón, Simón; cochtsetátšëmbo, Satanás obenana tonjotjañe tsëngaftangftaca nÿe ntšámnaca jamama, mo chë trigo matënga tcojtsashatiyeynacá; 32 pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nÿets ošbuáchiyana átšbeñe chacojtsatsbomna ora, chë inÿe ošbuáchiyënga cochjújabuache átšbeñe sempre chamotsošbuáchema ca.

33 Chora Simón tbojanayana: —Bëngbe Utabná, atše séntseprontana ácaftaca cárceloye jámnaca y jobanámnaca ca.

34 Y Jesús tbojanayana: —Pedro, atše cbëyana, cam ibeta bínÿanoyey, ngallo cabá ndécanta ora, aca unga soye cochanjayana ndoñe šconduabuátma ca.

#### Chë más jabuache ora yojtsobeco

35 Chentšana Jesús tojanatjá: —¿Chë ni shecnájaca, ni crocenánaca, ni shecochëtjonésheca tcbonjanichamó ora, nderado ndayá tcmojanabuáshebena ca?

Y chënga tmojanjuá: —Tondaye ca.

36 Chora tojanéyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe çëfsaíya chaotsatábuiyey y canÿe espadëja chauatobuámiñe. 37 Er cbëyana, entseyta átseftaca chaopasá, ntšamo Bëngbe Bëtsabe uabemana

palabrënguine atšbiana iuayancá, mëntšá: “Y chábioye tmojáninÿe mo chë puerte bacna soye amënguentsá canÿa cuaftsemncá ca.” Y lempe ntšamo atšbiana iuabemancá, mora ya echanjochnëngo ca —Jesús tojanéyana.

<sup>38</sup> As chënga tmojanianyana: —Bëngbe Utabná, muentše uta espadéja entsemna ca.

Y japochócamna cha tojánayana: —Nÿe nÿetsá ponto ca.

**Getsemaní luarentše, Jesús Bëngbe Bëtsáftaca tbojanencuentá**  
(Mt 26.36-46; Mc 14.32-42)

<sup>39</sup> Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto. <sup>40</sup> Choca tmojánashajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

<sup>41</sup> Y chë uatsjëndayëngbentsana yojoluára, mo canÿe ndëtsbé jutšenéntscoca nÿetsá, y yoJoshëntsamentsiye Bëngbe Bëtsáftaca jencuéntama. <sup>42</sup> Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>43</sup> Chca orna celocana canÿe ángel tbojánëbëbocna, añemo chaotsebomnama juajabuáchama.

<sup>44</sup> Jesús tša ngmëniñe yojtsemna, y Bëngbe Bëtsáftaca más ibojtsencuéntaye. Y chabe bosese yojtsemna mo fshantsiñe buiñe cuaftsebuastëtjuancá.

<sup>45</sup> Bëngbe Bëtsáftaca jencuéntama tojanpochócá ora, tojtantsbaná y chabe uatsjëndayënga imojtsemnoye tojána; y chënga imnëtsomañe, tša ngmënacá imojtsemna causa. <sup>46</sup> Chora tojanéyana:

“¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

**Uayayënga Jesús tmojánishache**  
(Mt 26.47-56; Mc 14.43-50; Jn 18.2-11)

<sup>47</sup> Jesús cabá

yojtsóyebuambnantscuana, ba entšanga chentše tmojánashajna. Chë Judas ca uabainá, canÿa chë bnëtsana uta uatsjëndayënguentsá, chë entšangbe natsana yojsaye. Cha yojobeconá Jesús juamóchama; <sup>48</sup> pero Jesús tbojanianyana: “Judas, ¿canÿe juamochëse chë Bëngbe Bëtsá Entšá tbojanbemá uayayëngbe cucuatšinë cochjaboshjona ca?”

<sup>49</sup> Chë Jesúseftaca imojtsemnënga tmojáninÿe ntšamo chora yochjanopásama; as tmojanianyana: —Bëngbe Utabná, ¿espadéjaca fšcotsatsejaye ca?

<sup>50</sup> Y canÿa chënguentsá, chë bachnangbe más uámana amëndayabe bochichnayábioye catsbioica matscuasë tbojtsantëtše, y tbojtsanëštjango.

<sup>51</sup> Chora Jesús tojanéyana: —Cachcá monÿá; nÿe nÿetsá ponto ca.

Y chë bochichnayábioye chë matscuasë tbojánbojajo y tbojanshná.

<sup>52</sup> Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadéjangaca y ngarotbéngaca šmojabo atše jishachama, mo atše canÿe bacá uamana entšá cuaftsemncá ca? <sup>53</sup> Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmánanbojajo. Pero ora toçjobuache tšëngaftanga chca chašmomama,

y Satanás ntšamo yojtsebošcá  
tšëngaftangbeñe echantsemándaye ca”  
—Jesús tojanéyana.

**Pedro tojánayana Jesúsbioye ndoñe  
bonjanabuátma ca**

(Mt 26.57-58; 69-75; Mc 14.53-  
54, 66-72; Jn 18.12-18, 25-27)

<sup>54</sup>Chentšana Jesús tmojánishache,  
y chë bachnangbe más uámána  
amëndayabe yebnoye tmojanánatse.  
Y Pedro bënocana ibojtséstona.

<sup>55</sup>Choca, chashja tsëntsaca, canyë  
íñeshe tmojanangbotjó y entsanga  
chë shéconana imojtsetbiámána;  
y Pédrénaca chentše chéngaftaca  
yojót'bema. <sup>56</sup>Chora, canyë shembása  
chentša oservená, Pédrëbioye  
tbojáninýe chë íñe juachaca  
yojtsetbemana; tbojanonýinýe y  
tojánayana: —Muánaca cháftaca  
endánmëna ca.

<sup>57</sup>Pero Pedro ndoñe ca tojánayana,  
y chë shembásabioye mëntšá  
tbojaniyana: —Sobrená, atše cha  
ndoñe quetsatabuatma ca.

<sup>58</sup>Ndoñe yapa bën y inýa chábioye  
tbojátaninýe y tbojaniyana: —Acnaca  
chë uatsjendayënguentsá condmëna ca.

Pero Pedro tbojanjuá: —Bacó, atše  
ndoñe quetsátsmëna ca.

<sup>59</sup>Chentša benéntscosna, inýa más  
yojátayana: —Ndegombre, muánaca  
cháftaca enjánana; muánaca Galileocá  
entsemna ca.

<sup>60</sup>Y Pedro tojánayana: —Bacó,  
ndayama cojtsichámuama ndoñe  
quetsátstatšëmbo ca.

Cachora, y Pedro cabá  
yojtsóyebuambnantscuana, canyë  
ngallo yojacánta. <sup>61</sup>Chora Bëngbe  
Utabná yojbuértana y Pédrëbioye  
tbojanonýinýe; y Pedro chora  
yojenójuaboye ntšamo Bëngbe  
Utabná tbojaniyanama: “Cam ibeta

bínýanoye, ngallo cabá ndécánta ora,  
aca unga soye cochanjayana ndoñe  
šconduabuatma ca.” <sup>62</sup>As Pedro shjoye  
tojánbocna, y corente ngmënaca  
yojtsenóbošachna.

**Jesús imojtsáboyejuana**

(Mt 26.67-68; Mc 14.65)

<sup>63</sup>Chë Jesús imojtsebojanýa  
entsanga cha imojtsáboyejuana  
y imojtsejantšetaye; <sup>64</sup>y  
jtsabuchëntsacjuase, imojtsetjanaye:  
“iMomalisiá, nda tcmënjajantšetá  
ca!” <sup>65</sup>Y imojtsóyenguaye, nýe mocá  
soyënga jtsatsëtsnayëse.

**Jesús, chë judiëngbe uámána  
mándayëngbe delante**

(Mt 26.59-66; Mc 14.55-  
64; Jn 18.19-24)

<sup>66</sup>Tojanbinýna ora, chë  
bëtsëjemëngcá amëndayënga,  
bachnangbe amëndayënga y ley  
abuátambayënga tmojánenefjna, y  
chéngbioye Jesús tmojanánatse. Choca  
tmojantjá: <sup>67</sup>—Šméyana, ¿aca Bëngbe  
Bëtsabe Uámána Uabuayaná, chë  
Cristo comna ca?

Y Jesús tojanéjua: —Aíñe ca  
tbojáuyanëse, tšëngaftanga chama  
átšbeñe ndoñe quešmochatošbuáchiye.  
<sup>68</sup>Y nderado tbojátjtasna, tšëngaftanga  
ndoñe quešmochatojuá ca. <sup>69</sup>Pero  
cam orscana, chë Bëngbe Bëtsá  
Entsá tbojanbemá, chë Bëngbe Bëtsá  
nýets obenana bomnabe catšbioica  
echántatsatbemana ca.

<sup>70</sup>Chora nýetscanga tmojantjá: —¿As,  
aca chë Bëngbe Bëtsabe Uaquiñá  
comna ca?

Y Jesús tojanéjua: —Cach  
tšëngaftanga chca šmonsichamo; atše  
cha sëndmëna ca.

<sup>71</sup>As chora chënga tmojánayana:  
—¿Ndayama más entsanga



šochjátējaboto Jesusbe contra chamuayanama? Er cach bēnga chabe uayāšentsšana chca tmonjouena ca.

**Jesús, Pilatbe delante**  
(Mt 27.1-2, 11-14; Mc 15.1-5; Jn 18.28-38)

**23** <sup>1</sup>Nyetsca mándayēnga tmojëftsantsbaná, y Pilátbioye, chē Judeoca mandádbioye Jesús tmojanánatse. <sup>2</sup>Y chentše tmojanontšé cha mal jaquédana, mēntšá: —Bēnga fsējínjyēna mua entsabuatambá bacna soyēnga, quem luarentša entsangbe amēndayēngbioye ndětsayaunama. Cha entsichamo bēnga ndoñe šontsamna Césarbiama impuesto jtsatsquécjnyana ca; y entsichamo cha yomna chē Cristo, chē Bēngbe Bětsabe Uámána Uabuayaná, mo canye reycá ca.

<sup>3</sup>Chora Pilato Jesúsbioye mēntšá tbojantjá: —¿Aca chē judiēngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup>As Pilato, chē bachnangbe amēndayēnga y entsānga tojanéyana: —Atše ní mo canye soye chiyátinyēna, quem boyabása castiganá chaotsemnana jayanama ca.

<sup>5</sup>Pero chēnga más tmojanáyebuachena: —Nyets Israel luarējana entsabuatambá, Galilea entsangbe amēndayēngbe contra jtsemnana. Galilea luaroca chca tonjabojatšé y mora moca Judeócnaca cachcá entsama ca.

**Jesús Rey Heródesbe delante**

<sup>6</sup>As Pilato, Galilea luarama vojouena ora, tojanatjá Jesús Galileocá tajojamnama. <sup>7</sup>Y Jesús aíñe Galileoca yojamnama cha tojántatšēmbona ora, Rey Heródesbioye cha tbojanichmó.

Herodes inamna Galileoca mandado y chora Jerusalentšé cha yojtsemna. <sup>8</sup>Herodes Jesúsbioye tbojáninye ora, corente tojanoyejuá. Chana tempšana inaboše Jesús jinýama. Cha ba soyēnga Jesusbiama tojanuena, y yojtseboše jinýama Jesús jamana canye bēts soye, Bēngbe Bětsabe obenánaca. <sup>9</sup>Heródesna ba soyēnga tbojantjá, pero cha ndocá tbojanjuá. <sup>10</sup>Y chéntšnaca, chē bachnangbe amēndayēnga y judiēngbe ley abuatambayēnga imojtsemna, y Jesús corente mal imojtsequédaye.

<sup>11</sup>Chora, Herodes y chabe soldadēnga Jesúsbioye corente imojtsáboyēnja, y jtsaboyejuanamna, botamana entsāyangá tmojanichětjo, mo canye reycá; chentšana cachiñe Pilátbioye tmojesanichmó. <sup>12</sup>Cach te Herodes y Pilato tbojtananatsétsaye; tempna chata ibojenáyata.

**Jesusbiana chaóbana ca tmojánayana**

(Mt 27.15-26; Mc 15.6-15; Jn 18.39-19.16)

<sup>13</sup>Chentšana Pilato, chē bachnangbe amēndayēnga, chē pueblentša amēndayēnga y nyetsca entsānga tojánachembo, <sup>14</sup>y mēntšá tojanéyana: —Tšēngaftanga quem entšá átsbioye šmojuánatse, mo bacna soye entsāngbeñe abuatambayacá, mandadēnga ndětsayaunanama ca; tšēngaftangbe delante lempe sēnjatjá, tšēngaftanga ba soyēnga muabiana šmonjayana, pero atšna ni mo canye soye chiyátinyēna, quem boyabása castiganá jtsemnana ibojtsemna ca jayanama. <sup>15</sup>Herodes cach ndoñe, chíyeca cachiñe bēngbioye cha tbojesichmó. Quem boyabása ni mo canye ndoñe tonjobuachjanguá jóbanama chabotsemnana. <sup>16</sup>Chcasna,

jabuache chamotsecastigá y chentšana chanjétsboshjona ca —cha tojánayana.

<sup>17</sup>Yojamna canye utamená jétsboshjonana, ntšamo Bashco fiesta ora jamana imojanamancá.

<sup>18</sup>Pero chora entsanga cányiñe tmojanáyebuachena: —iJesús chaóbana! iBarrabás matsboshjona ca!

<sup>19</sup>Barrabás inautámena, mandadéngbioye ndétsayaunanama chë bëts pueblentše entsanga tojánenautanama y entsá óbanaye causa. <sup>20</sup>Pilato cachiñe tojánayana Jesúsbioye jétsboshjonama yojtsanboše ca; <sup>21</sup>pero entsangna más tmojtétanayebuachena:

—iMotsecrucificá! iMotsecrucificá ca!

<sup>22</sup>Pilato ya unga soyama tojtétanayana: —¿Ntšamo bacna soye mua tojobuachjanguá ca? Ni mo canye bacna soye chiyátinýena, mua jóbanama chabotsemnama. Chcasna, chanjacastigá y chora chanjétsboshjona ca.

<sup>23</sup>Pero chéngna más imojtsechembumbuana Jesús chamotsecrucificama. Cabana, chë bachnangbe améndyënga y chë entsangbe jabuache chembumbuanánaca, Pilato tmojanëyëñaná Jesús chamóbama. <sup>24</sup>As Pilato tojanmandá ntšamo chë entsanga imojtsotjanañcá chaotsemnama; <sup>25</sup>as chora Pilato, Barrabásbioye cachcá tbojtanboshjona, chë nda inautámena mandadéngbioye ndétsayaunanama entsángbioye tojánenautanama y entsá óbanaye causa. Y Jesusna entsangbe cucuatšine tbojánboshjona, ntšamo chënga tmojtsebošcá chamomama.

### Jesús tmojanrucificá

(Mt 27.32-44; Mc 15.21-32; Jn 19.17-27)

<sup>26</sup>As jacrucificama Jesús tmojanánatse. Chora jajocana

inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

<sup>27</sup>Y banga chë pueblentša entsanga imojtséstona; y chë shembásenga imojtséstonëngna imojtsayošachiye y ngménaca imojtsanioye, Jesús chca yojtsepásama. <sup>28</sup>As Jesús chéngbioye tojanobuértana y tojanéyana: “Jerusalenentša shembásenga, atšbiamá ndoñe matošachena; cach tséngaftangbiama y tséngaftangbe básengbiama šmochjenóbošachna. <sup>29</sup>Canye te echanjóshjango y chë te šmochántsicamo: ‘Tša tsábá chë shembásenga šešona ndbomnëngbiama, chë quem luaroye šešonga ndoñe tmonjëftséshejajnëngbiama, y chë šešonga ndoñe tmonjëftsabachengbiama ca.’ <sup>30</sup>Chora entsanga jetsóitanama mochántseboše y mochanjontšé ichámuana: ‘iTjashënga šmotsëtebuantsá y batsjabenga šmotsaitame ca!’ <sup>31</sup>Atše, chë ndocna bacna soye amá, chíyeca puerta obená, chca šmojaborlase, čntšamo mochjama chë ndegombre bacna soye améngaftaca, chíyeca ndobenënga? O mëntšá, čchë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanéyana.

<sup>32</sup>Jesúseftaca cruciñe jóbanama, útata bëts bacna soyënga ochjajnayátnaca imojtsënachaye. <sup>33</sup>Chë “Obanabe Bestšashe ca” uabaina luaroye tmojánashajna ora, Jesús tmojanrucificá y chë bëts bacna soyënga ochjajnayátnaca, canya chabe catšbioica y chë ínýana chabe uañicuayoica. <sup>34</sup>Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chê soldadënga Jesusbe entšayamna, tsbanánoye tmojanétsëna, chënga jtenájatayama. <sup>35</sup>Entšanga chentše imojtsemnënga chca imojtsonyaye, y chë pueblentša mandayëngnaca Jesús imojtsáboyejuana y mëntšá imojtsenatsëtsnaye: “Inyëngna añne tojëftsatsebacá; mora cachá chauntsbocá, cha ndegombre Cristo, chë Bëngbe Bëtsabe Uámana Uabuayaná tomñese ca.”

<sup>36</sup>Soldadëngnaca Jesús imojtsáboyejuana; tmojanobeconá y untja vínoye imojtsefšësnaye, <sup>37</sup>y mëntšá imojtsatsaye: “iChë judiëngbe Rey tcomnëna, cach aca mentsbocá ca!”

<sup>38</sup>Jesusbe bestšaše juatsboicna canyë uabemana soye tmojananjo; chiñe mëntšá yojtšanábemana: MUA CHË JUDIËNGBE REY ENDMËNA ca.

<sup>39</sup>Canyë bëts bacna soyënga ochjajnyá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnëna, mentsbocá y bëndátnaca šmatsebocá ca.

<sup>40</sup>Pero chë inyë bëts bacna soyënga ochjajnyana mëntšá tbojanácacana: —¿Ni mo Bëngbe Bëtsá ndoñe condërrespectana? Bëndátnaca bontsamna chacá jóbanama.

<sup>41</sup>Ndegombre bëndata muentše bontsemna bëts bacna soyënga ochjajnyaye causa, y chíyeca chca jasúfriama bontsamna. Pero quem boyabása ni mo canyë bacna soye ndoñe tonjobuachjanguá ca.

<sup>42</sup>Y chorna, quem bëts bacna soyënga ochjajnyá Jesúsbioye tbojanianyana: —Jesús, atšbiama cochtenójuaboye aca reycá jabomándama chacojtabo ora ca.

<sup>43</sup>Y Jesús tbojanjuá: —Ndegombre cbëyana, mënté

átšeftaca celoca, chë nyetscanga oyejuayënga mondbetsemnoca, aca cochantsatsmëna ca.

**Jesús tojanóbana**  
(Mt 27.45-56; Mc 15.33-41; Jn 19.28-30)

<sup>44</sup>Nyëtsto orscana las tresëntscoñe nyëts quem luare yojtseibétata.

<sup>45</sup>Y shinyë yojtsajbaná binynayana, y Bëngbe Bëtsabe bëts yebnentše yojujonýana entšëjua tsëntsaca yojtseñátataye. Chëjua bënëjua inauamna y chë tsatsëntsaca inaujonýana. <sup>46</sup>As Jesús tojanáyebuachena: “Taita, atšbe espíritu acbe cucuatšinë šcoboshjona ca.”

Y chca jayanama tojanpochocá ora, tojanóbana.

<sup>47</sup>Chë romano soldadëngbe amëndayá chca tojáninyë ora, Bëngbe Bëtsábioye tbojtanadorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

<sup>48</sup>Nyëtscaca entšanga chë soye jinýama tmojánabënga, chca tojanopasama tmojáninyë ora, tmojanontšë jtangana enocochjantšetaye, ngménama. <sup>49</sup>Pero Jesusbe nyëtscaca ubuátmënga y chë shembásenga Galileocana tmojanastëngna, chaboca tmojanoquedá chë soyënga onyayiñe.

**Jesús tmojanatbontsá**  
(Mt 27.57-61; Mc 15.42-47; Jn 19.38-42)

<sup>50</sup>Yojanmëna canyë boyabása, José ca uabainá, canyë Judeoca pueblócá, Arimatea ca uabaina; cha inamna canyá chë pueblentša uámana amëndayënguentšá y canyë tšabe entšá y nyëtscaca soyënguñe tšabá amá. <sup>51</sup>Chánaca yojanobátmana chë Bëngbe

Bëtsabe amëndayana chaóshjanguama, y tondaye tbonjanogustá ntšamo chë inye amëndayënga tmojanjuabó y Jesúseftaca tmojanmcá. <sup>52</sup> Cha Pilátbïoye tojána y Jesusbe cuerpo tbojanotjañe. <sup>53</sup> José chë cruzocana Jesusbe cuerpo tbojtanéstjango, canye lino entšëjuaca tbojanandmaná y canye cuevēshiñe, peñëshiñe pormániñe, tbojanjajó. Chentše cabá ndocná mondëjajo. <sup>54</sup> Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínýana.

<sup>55</sup> Chë shembásenga, Galileocana Jesús tmojantjëmbabanga, tmojána y chë cuevēshe tmojáninýe, y tmojanrrepará ntšamo Jesusbe cuerpo tmojanjajoma. <sup>56</sup> Yebnoye tmojtaná orna, tmojanprontá botamana uanguëtše béjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyinë yojanmandancá.

### Jesús tojtananayena

(Mt 28.1-10; Mc 16.1-8; Jn 20.1-10)

**24** <sup>1</sup> Y tmengo, chë inye semana bojatséntena, cabá cachëse, Jesús tmojanatbontsá cuevēshoye chë shembásenga tmojána, y tmojanamba chë tmojanprontá botamana uanguëtše soyënga. <sup>2</sup> Pero choye tmojánashajna orna, tmojáninýena chë cuevēshoye amashjuanentša ndëtšbé chentšana juanániñe, <sup>3</sup> y choye tmojánamashjna ora, Bëngbe Utabná Jesusbe cuerpo ndoñe tmonjáninýena. <sup>4</sup> Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinýinýana entšayá uichëtjonata chentše tbojabántsaye. <sup>5</sup> Y chë shembásenga tmojanëuatjanama y fshantsoye imojtsatsejbénama, chata

tbojanéyana: “¿Ndáyeca obanëngbentše chë vida totsobomñá šmojtsenguá ca? <sup>6</sup> Muentše cha ndocná quenátsmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: <sup>7</sup> ‘Chë Bëngbe Bëtsá Entšá tbojanbemá bontsemna bacna soye amëngbe cucuatšinë chamoboshjonama, chamocrucificama y unga tianoye cháuatayenama ca’ ” —chata tbojánayana.

<sup>8</sup> Chora chë shembásenga Jesusbe palabréngama imojtenójuaboye, <sup>9</sup> y chë cuevēshëntšana tmojtaná ora, chë tšabe noticiënga chë bnëtsana canye uatsjëndayënga y inye entšángbïoye tmojanacuntá. <sup>10</sup> Chë uatsjëndayëngbïoye chca cuentayëngna imojamna María Magdalena, Juana, y María, chë Santiagbe mamá, y chë inye shembásenga chëngaftaca imojamnënga. <sup>11</sup> Pero chë uatsjëndayëngna mëntšá chë shembásengbiama imojëtsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyinë ndoñe montsanošbuaché.

<sup>12</sup> Pero chentšana, Pedro tojëftsantsbaná y ochamanana chë Jesús tmojanjajó cuevēshoye tojána. Y choca yojtsemna ora, yojotsejbéna tsoye jontjesiyama, pero nýe ena entšëjuangá yojuinýe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

### Chë Emaús puebloye benachiñe

(Mc 16.12-13)

<sup>13</sup> Cach te, uta uatsjëndayata Emaús puebloye ibojtsaye. Emaús yojamna Jerusalenocana bnëtsana canye kilómetroca. <sup>14</sup> Chata ibojtsayencuéntaye lempe ntšamo tojanopasama.

<sup>15</sup> Y tojanopasá, ibojtsencuéntaye y ibojtsenatsétsnayéntsucua, cach Jesús tojanobeconá y chátaftaca cányiñe yojtsaye; <sup>16</sup> masque imojtsonyáye, ndoñe ibontsobena cha jótëmbana. <sup>17</sup> Jesús tojanéyana: —¿Ndayama benachiñe šuabanencuéntaye ca?

As chata ngménaca ibojtsaye, <sup>18</sup> y canya, Cleofás ca uabainá, tbojaniyana: —¿Nye aca cojtsemna, inye luarocana ashjangoná Jerusalenentše oyená, ndayá chentše quem dienga yopasánama ndétatsëmbuá ca?

<sup>19</sup> Chora cha tojanéyana: —¿Ndaye soyénga ca?

Y chata tbojaniyana: —Chë Jesús Nazaretocáftaca tonjopasá soyéngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nyetsca entšangbe delante. <sup>20</sup> Y ntšamo, chë bachnangbe amëndayénga y chentša mandadënga inyengbe cucuatšinë tmonjáboshjona, jóbanama ibojtsemna ca entšanga chamuayanama y chamocrucificama. <sup>21</sup> Bënga chabiamá fsëñjanobátmana, Césarbe cucuatšentsšana Israeloca entšangbe atsebacayá chaotsemnama; pero morna ya unga te entsemna chca tonjopasá.

<sup>22</sup> Y mora ndayá, básefta shembásenga bëngbe enutënga ójanana soyénga šonjáuyana. Chënga cabá cachëse chë Jesusbe cuerpo tmonjanjajó cuevēshoye tmonjá, <sup>23</sup> y chabe cuerpo ndoñe tmonjinyena; as chora chënga bëngbiyoye tmontabo y montsabíchamo angelënga tmojëftsanyë y chënga catmëñjayana cha ainá yojtsatsmëna ca. <sup>24</sup> Bëngbentsšana baseftángnaca chentšana chë cuevēshoye tmonjá, y tmojinyena ntšamo chë shembásenga tmonjayancá, pero Jesús ndoñe tmojëftsinyë ca —chata ibojtsichamo.

<sup>25</sup> As Jesús chata tojanéyana: —iTša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyéngama! <sup>26</sup> ¿Mo ndoñe yonjamna chë Uámána Uabuayaná chë soyénga chaosufrima, y chentšana nyetsca entšanga corente cha chamuatschuama ca?

<sup>27</sup> Chentšana Jesús tojanontšé chata jábuayenana, lempe ntšamo chabiamá yojanoyebuambnacá chë Bëngbe Bëtsabe uabemana palabrenguiñe; yojontšé Moisesbe librëšangañe y chë Bëngbe Bëtsabe juabna oyebuambnayëngbe librëšangáñnaca.

<sup>28</sup> Chë ibojétsaye puebloye imojtsebeconá ora, Jesús tojanma mo más chcoye cuaftsacá.

<sup>29</sup> Pero chatna tmojanatarié chentše chaotsoquedánama, mëntšá jauyanëse: —Bëndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe.

<sup>30</sup> Chentšana tojanopasá, juasama mesëshentše imojtsetbíamana ora, Jesús chë tandëse tojanca, Bëngbe Bëtsábioyey tbojtanchuá, chë tandëse tojanjatá, y chata tojanatšatá. <sup>31</sup> As, chora chë uatsjëndayata ibojobenyey Jesús jótëmbana; pero chana nye ndeolpe yojuenatjëmbe. <sup>32</sup> Chora chata ibojtsenatsétsnaye: “Chë benachiñe Bëngbe Bëtsabe uabemana palabrengama šondabuayinyá ora, ndegombre bëngbe ainaniñe más bontseboše cha más chašotsabuayinyama, ¿ndoñe chca ca?”

<sup>33</sup> As, cachora tbojëftsantsbanata y Jerusalenoyey tbojtanata; choca tmojáninyena chë bnëtsana canye uatsjëndayënga cányentšey imojtsemna y chëngbe enutëngnaca; <sup>34</sup> y mëntšá imojtsichamo: —iNdegombre Bëngbe Utabná tojtayena; Simónbiyoyey tbojëbébocna ca!

<sup>35</sup> As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëse tojanjatá ora.

**Jesús chabe uatsjédayënga tojánëbëbuacna**

(Mt 28.16-20; Mc 16.14-18; Jn 20.19-23)

<sup>36</sup> Chë uatsjédayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntšá tojanéyana: “Chë atšbe ainaniñe tšabe ebionana tšëngaftangaftaca chaotsemna ca.”

<sup>37</sup> Pero chënga tša auatjanánënga imojtsemna, y canye añemëse imojétsonyaye ca imojtsejuabnaye.

<sup>38</sup> Pero Jesús tojanéyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? <sup>39</sup> Atšbe cucuatšënga y atšbe shecuatšënga minyënga; šmobjajo y šmochanjinye. Cach atšbe séntsemna. Canye añemësna, ni mëntšena ni betašënga ntsebomnana; pero tšëngaftanga šmontsonyá, atšna aíne ca” —tojanéyana.

<sup>40</sup> Chca vojtsichámëse, chabe cucuatšënga y chabe shecuatšënga tojaninyanjé. <sup>41</sup> Y chënga cabá ndoñe montsanošbuaché, chca noticiama corente imojtsóyejuama y tša ojanánënga imojtsemna causa; as Jesús tojanatjá: “¿Muentse ndayá jasama quešmëbomna ca?”

<sup>42</sup> As canye tabena buana beonbiana tmojanoyé; <sup>43</sup> Jesús tojanocñe y chëngbentšë tojanse.

<sup>44</sup> Chentšana Jesús tojanéyana: “Quem palabrënga entsemna ntšamo cabá tšëngaftangaftaca sënjamna ora tcbonjanéyancá: Entsemna, lempe chaopasá ntšamo atšbiana iuabemancá,

Moisesbe leyënguñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

<sup>45</sup> Y chora chë uatsjédayënga, Jesúsbeyeca tmojanobená chë Bëngbe Bëtsabe uabemana palabrëngama josértana. <sup>46</sup> Chentšana Jesús tojanéyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca.

<sup>47</sup> Y morna atšbe uabaina jayanëse, átšbeñe betsošbuáchema, nyëts quem luarentšë šmochjónša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalemntšë chaoboajtšé.

<sup>48</sup> Tšëngaftanga atšbiana soyënga šmonjinýe y šmondétatšëmbo.

<sup>49</sup> Atšbe Taitabe šbuachenaná, tšëngaftangbiana chanjíchmuá. Pero morna camuentšë Jerusalemntšë moquedanga, Bëngbe Bëtsabe obenana chašmóyëngacñëntscuana ca” —cha tojanéyana.

**Jesús celoye tojtantsjuá**

(Mc 16.19-20)

<sup>50</sup> Chentšana, Jesús chabe uatsjédayënga ínjoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjédayënga tšabe bendicionënga chamóyëngacñama.

<sup>51</sup> Chca vojtsamëntscuana, cha chëngbentšana tojanoluaré y tojanontsé celoye játsjuana. <sup>52</sup> Chë uatsjédayëngna, Jesús tmojtanadorá chentšana, Jerusalemntšë oyejuayënga tmojtaná; <sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

# San Juan

**Cristo, chë Bëngbe Bëtsabe Uámana  
Oyebuambnayana ca Uabainá**

**1** <sup>1</sup> Quem luare ndobojátsa ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. <sup>2</sup> Ndegombre cha, chë tempscana Bëngbe Bëtsáftaca yojtsanmëna. <sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matëñjanma. <sup>4</sup> Cachábeñe nyets vida inamna, y quem vídaca tojánabo quem luarentša entsangbe juabnënga jabuábinÿnayama. <sup>5</sup> Cha tonjánabo moye, chë entsangbe juabnënga ndoñe binÿniñe yonjamnoye, chiñe jabobínÿnayama. Cha sempre chca yobínÿna, y Satanás chë entsangbe juabnënga ndoñe binÿniñe chaondétsemnama amá, ndoñe yondobena chë binÿnayabe obenana jtsejuánana.

<sup>6</sup> Inamna canÿe boyabása, Juan ca uabainá; y Bëngbe Bëtsá tbojanichmó, <sup>7</sup> binÿnayabiama chaóyebuambama; entsángbeñe binÿnayabiama cháuyanama, chca, ntšamo Juan chë binÿnayabiama tojayana soyéngaca, nyetscanga Jesúsbeñe chamotsošbuáchemá. <sup>8</sup> Juan ndoñe yonjamna chë binÿnayá. Cha

inamna canÿe ichmoná, chë nda binÿnayá yomnabiama entsángbeñe chauhábayanama. <sup>9</sup> Chë ndegombrá quem luaroye tonjánabo chë entsangbe juabnënga jabuábinÿnayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjánatšëmbo. <sup>11</sup> Cachabe luare entsángbioye tonjánabo, y entsanga ndoñe tmonjánbošena cha jofjana. <sup>12</sup> Nyetscanga, ndëmuanÿyenga cha tmojanébuaja y chábeñe tmojtsošbuáchenga, cha derecho tonjanatšatá jtsobenama Bëngbe Bëtsabe básenga ca jtsabáinama. <sup>13</sup> Quem ošbuáchiyëngna, chca jtsemnama ndoñe tmonjanobená entsangbe buiñentšana tmojanonÿnáyeca, o ndaye entsabe juabnentšana. Nÿe Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entšá tojanóbema, y quem luare béngaftaca yojéftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentšana tojanóyëngacñana. Cha corente jtsababuánÿeshanëse šojánanÿena y yojéftsiyena ntšamo ndegombre inamncá. <sup>15</sup> Juan

mëntśá chabiamá yojanáyebuache:  
 “Chabiamá sënjanoyebuambná, chë  
 ndabiamá chora atşe sënjánayana,  
 chë átşbentşana jabamana atşbiamá  
 más uamaná endmëna, er atşe cabá  
 ndonýna orna, cha ya yojtsemna ca.”

<sup>16</sup> Cha tşa tşabe ainana bómnyeca,  
 bënga nyetscanga mallajta tşabe  
 bendicionënga tmojóyëngacñe.

<sup>17</sup> Moisesbiajana tifjanóyëngacñe chë  
 Bëngbe Bëtsá tojanmandá soyënga.  
 Pero Jesucristbeyeca, Bëngbe Bëtsá  
 tşabe bendicionënga bëngbiamá tojama  
 y chë ndegombre soyënga bënga  
 tmojëftsashjache. <sup>18</sup> Ndocná, ndocna te  
 Bëngbe Bëtsábioye tbonjinýe. Chë nyë  
 canýe Uaquiñá ibobomná, cach Bëngbe  
 Bëtsá yomna; y cha, Bëngbe Bëtsá  
 chë Taitáftaca cánýiñe mo canýacá  
 yomna. Mua, chë Uaquiñá, bëngbiamá  
 tojama, Bëngbe Bëtsá juabuátmanama  
 chaotsopodënama.

**Juan chë Ubayaná Jesucristbiamá  
 tojanabuayená**

(Mt 3.11-12; Mc 1.7-8; Lc 3.15-17)

<sup>19</sup> Canýe te, Jerusalemoca  
 judiënga tmojanichamó bášefta  
 chëngbe bachnanga y levitënga,  
 chë Bëngbe Bëtsabe bëts yebnoca  
 trabájayënga, Juan yojtsemnoye, cha  
 nda bëtsemnama chamuatjayama.

<sup>20</sup> Chocna, Juan chëngbeñe ndegombre  
 tojanobuambá: —Atşe, chë Bëngbe  
 Bëtsabe Uámana Uabuayaná ndoñe  
 quetsátsmëna ca.

<sup>21</sup> As chora, cachiñe tmojantjá:  
 —As, ¿ndase cojtsemna? ¿Chë Bëngbe  
 Bëtsabe juabna oyebuambnayá Elías  
 ca?

Y Juan tojanéjua: —Atşe cha ndoñe  
 quetsátsmëna ca.

Chora chënga tmojantjá: —As,  
 ¿chë Bëngbe Bëtsabe juabna  
 jabóyebuambayama jabamá ca?

Y Juan tojanéjua: —Ndoñe ca.

<sup>22</sup> Chora chënga tmojanianana:  
 —Asna, ¿aca ndase cojtsemna?  
 Bënga şontsamna nda aca  
 cojtsemnama jtsetatşëmbuana, as chë  
 şonjadespachenga jacúntama. ¿Ndayá  
 cojtsobena cach acbiamá jayanama ca?

<sup>23</sup> Y Juan mëntśá tojanéjua: —Atşe  
 séntsemna chë ndabiamá Bëngbe  
 Bëtsabe juabna oyebuambnayá Isaías  
 mëntśá tojanábema: “Entşanga  
 ndoyenoca canýe abuayiynayá  
 echántsemna, y entşanga mëntśá  
 echántşabuayiynaye: Bëngbe Utabná  
 echanjabo ca. Mo nda canýe benache  
 tojtseprontacá, tşëngaftángnaca  
 cachcá, cha jabama tşabe juabnéngaca  
 şmochtseprontana ca.”

<sup>24</sup> Chorna, bášeftanga chë  
 fariseungbe ichmónënguentşana,  
<sup>25</sup> Juan tmojantjá: —Chë Bëngbe  
 Bëtsabe Uámana Uabuayaná, Cristo  
 ca uabainá, ndoñe tcontsemnëna, ni  
 Elías, ni chë Bëngbe Bëtsabe juabna  
 jabóyebuambayama jabamá ndóñesna,  
 ¿ndáyeca entşanga cojtsëbayana ca?

<sup>26</sup> Chora Juan tojanéjua: —Atşna,  
 bëjayeca entşanga sëndëubáyana. Pero  
 tşëngaftangbeñe canýa entsemna;  
 cha ndoñe queşmatábuatma; <sup>27</sup> y  
 cha atşbe ústonoye echanjášhango.  
 Atşe mercedo taitşatobuajoñe,  
 ni mo jotsejbiyama, chabe  
 shecohëtjonëshentşá corriëja  
 jajafjonama ca.

<sup>28</sup> Chca tojanopasá, canýe pueblo  
 Betania ca uabáinentşe, Jordán bëjaye  
 chenguana. Cach bëjayiñe, Juan  
 entşanga yojanébayana.

**Jesús chë Bëngbe Bëtsabe  
 Oveshatema ca uabainá**

<sup>29</sup> Yëfsana, Juan yojtsemnoye  
 Jesús yojtşebéconaye, y chë cháftaca  
 imojtsemna entşanga tojanéyana:



“Šmochjinÿe. Chè nda Bèngbe Bètsá tbojichmó y iytanana Oveshatemcá entsobiamná cha, entsashajuana ca. Cha jóbanëse, quem luarentša entsanga bacna soyëngama perdonánënga mochántsemna. <sup>30</sup> Atše chabiana cbonjutsëtsná, mëntsá sënjanayana ora: ‘Atšbe ústonoye canÿa echanjášhjangó. Cha atšbiana más uamaná endmëna, er atše cabá ndonÿna ora, cha ya yojtsemna ca.’ <sup>31</sup> Tempna, cach atše ndoñe quetsjátantatšëmbo nda cha bëtsemnana. Pero atšna ínÿenga béjayeca ubáyana sëndabó, íshamloca entsanga quem boyabása chamuábuatmanama ca” —Juan tojanéyana.

<sup>32</sup> Chentshana Juan mëntsánaca tojanobuambá: “Chabiana mëntsá bominÿe sënjanajó: chë Uámana Espíritu, mó canÿe palomatemcá, celocana tonjánastjango y quem boyabásabe juatsbuañe tonjanototoná. <sup>33</sup> Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntsá šonjaniyana: ‘Nda chacojinÿe, chë Uámana Espíritu jastjanguana y chabe juatsbuañe jototonana, chábeyeca atše chanjíchmua chë Uámana Espíritu entsangbe ainaniñe cháumashënguama ca.’ <sup>34</sup> Y morna, atše añe chca tijinÿe, y ndegombre tšëngaftanga cbéyana, cha chë Bèngbe Bètsabe Uaquiñá entsemna ca” —cha tojanéyana.

#### Chë Jesusbe natsana ústonënga

<sup>35</sup> Yëfsana, Juan chabe uatsjëndayënguentšana útataftaca cachoca yojtésemna. <sup>36</sup> Jesús jochsachnëjuanama, Juan tojáninÿe ora, tojanéyana: “Šochjinÿe. Mua entsemna nda Bèngbe Bètsá tbojichmó y iytanana Oveshatemcá entsobiamná cha ca.”

<sup>37</sup> Chora chë Juanbe uta uatsjëndayata, chca tbojanuena ora, Jesús tmojanasto. <sup>38</sup> Jesús tojesanontjeshë y tojánanÿe chata imojétsëstonama. As, tojanatjá: —¿Ndayá šojtsenguá ca?

Y chata tbojaniyana: —¿Rabí, ndayentše icoyena ca? (Rabí endayana “Buatëmbayá ca”.)

<sup>39</sup> Chora Jesús tojanéjua: —Mabo y šochjinÿe ca.

As chata tbojána y tbojáninÿe ndayentše cha yojaniyenana. Y chentšë cháftaca tojéftsanajetana, ya jetiñe mó las cuatro ora yojtsemna causa.

<sup>40</sup> Chë Jesusbiana oyebuambayana Juánbioye tbojanóyeunata y Jesús tbojanasto útatentshana cányana Andrés ca yojanabaina; cha yojamna Simón Pédrëbe catsata. <sup>41</sup> Andrés, cabá ndocna inÿe soye ndëma ora, tojána chabe catsata Simón janguanguama. Y tbojáninÿena ora, Simónbioye tbojaniyana: “Chë Bèngbe Bètsabe Uámana Uabuayaná, Cristo, fsënjinÿena ca.”

<sup>42</sup> Chentshana Andrés, Simónbioye tbojanánatse Jesús yojtsemnoye. Jesús, Simónbioye tojáninÿe ora, tbojaniyana: “Aca condmëna Simón, Jonasbe uaqiñá, pero Cefas ca cochantsabaina ca.” (Chcana endayana “Pedro o ndëtšbë ca”.)

#### Jesús, Felipe y Natanael tojánachembo chamuastama

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniyana: “Šmasto ca.”

<sup>44</sup> Chë boyabása Felipe, Betsaida pueblócá inamana. Andrés y Pédrëna cach pueblcata ibnamna.

<sup>45</sup> Chentshana Felipe tojána Natanael janguanguama; y tbojaniyana: —Chë

ndabiamá leyënga librëšsangañe  
Moisés tojanábema cha fsënjínýena ca.  
Cachabiamá, Bëngbe Bëtsabe juabna  
oyebuambnayéngnaca tmojanábema.  
Cha Jesús entsemna, Josebe uaquiñá,  
chë Nazaretocá ca.

<sup>46</sup>Chora Natanael tbojaniyana:  
—¿Ndaye tšabe soye Nazaretocana  
nanjopódia jóbocnama ca?

Y Felipe tbojanjuá: —Mabo y  
cochjinýe ca.

<sup>47</sup>Natanael yojtsebéconama, Jesús  
tbojáninýe ora tojánayana: —Moye  
canýe entšá entsabó; cha ndegombre  
endomerecena Israelbentšana entšá  
jtsemnama. Cha tšabe entšá endmëna;  
ndocnábioye quebnatsíngña ca.

<sup>48</sup>Chora Natanael Jesúsbioye  
tbojantjá: —¿Ntšamo atše šcuabuatma  
ca?

Y Jesús tbojanjuá: —Felipe cabá aca  
ndëchembo ora, atše tcbonjinýe, chë  
higo betiye tchetšoye condëtsomñe  
ora ca.

<sup>49</sup>As, Natanael tbojaniyana:  
—Buatëmbayá, iaca chë Bëngbe Bëtsabe  
Uaquiñá comna! ¡Aca, chë Israeloca  
entsángbe Rey ca!

<sup>50</sup>Chora Jesús tbojanjuá: —¿Aca  
átšbeñe cojtsošbuaché, nýe chë  
higo betiye tchetšoye tcbójinýe ca  
tcbójuayanama? Ndegombre, chë  
soyama más bëts soyënga cochanjinýe  
ca.

<sup>51</sup>Chentšana Jesús tojanéyana:  
—Ndegombre šcuayana: Tšëngaftanga  
šmochanjinýe celoca atëfjniñe, y  
Bëngbe Bëtsabe angelotëmënga  
jtsetsjuajnana y jtsastjauanana Bëngbe  
Bëtsá Entšá tbojanbemabe tatsëtsoca.

### Canýe casamento Galilea luaroca, Caná pueblentše

**2** <sup>1</sup>Chentšana unga tianoye, canýe  
casamento inamna, canýe

pueblentše Caná ca uabáinentše,  
Galileoca. Chë oboyejuayoca Jesusbe  
mamá yojtsemna. <sup>2</sup>Jesús y chabe  
uatsjëndayëngnaca chë casamentoca  
ófanënga imojtsemna. <sup>3</sup>Chë  
oboyejuayentše, vínoye yojtsopochóca  
y Jesusbe mamá tbojaniyana: —Ya  
tondaye vínoye quemátsbomna ca.

<sup>4</sup>As, Jesús tbojanjuá: —Mama,  
¿ndáyeca chca atše šcojtsatsá? Atšbe  
ora cabá ndoñe ntjoshjanguana ca.

<sup>5</sup>Chentšana, chabe mamá,  
chentša oservënënga tojanéyana:  
—Lempe šmochjama, ntšamo cha  
chacmojuayancá ca.

<sup>6</sup>Chocna, chnénguana ndëtšbé  
matbaja inamna. Chca matbajënguentša  
béjayeca, judiënga imojanamana  
jtsacuéntšabiana cabá ndëse ora, ntšamo  
tempo entsanga imojanamancá, Bëngbe  
Bëtsabe delante tšábënga jtsatsmënama.  
Cada matbajiñe, mo shachna o canýsëfta  
bnëtsanájuá béjaye yojanába.

<sup>7</sup>Chora Jesús chë oservënënga  
tojanamëndá: “Quem matbajënga  
béjayeca mobuajutetjé ca.” Y chënga,  
chora lempe tmojanbuajutetjé.

<sup>8</sup>Y Jesús tojanéyana: “Morna, báseye  
mobuatsjo y chë fiesta otocanábioye  
mabuyamba ca.” Y chënga chca  
tmojanma.

<sup>9</sup>Chora, chë fiesta otocaná, chë  
béjaye Jesús vínoye tojanbemiye  
tojanftantiá, ndémocana yojóbocnama  
ntsetatšëmbcá. Pero chë oservënëngna  
aíñe imojtsetatšëmbo ndémocana, er  
cachënga chë béjaye tmojanbuatsjo.  
As, chë fiesta otocanana, chë bobontse  
bouamnábioye tbojanchembo,  
<sup>10</sup>y tbojaniyana: “Nýetscanga  
monduamana natsana chë más uámana  
vínoye jushebëcana, y chë ófanënga  
becá tmojatëmo ora, chë más batšá  
uámaniye. Pero acna, chë más uámana  
vínoye morscama tcojtsabofjajó ca.”

<sup>11</sup> Ntšamo Jesús tojanmcá Caná pueblentše, Galileoca, yojamna chabe natsana bēts soye Bēngbe Bētsabe obenánaca. Y chca, chabe bēts obenana y uámanana cha tojaninjanýé; y as, chabe uatsjéndayēnga chábeñe imojtsošbuaché.

<sup>12</sup> Chca tojanopasá chentšana, Jesús canýe pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjéndayēnga cha tmojantjēmbambá, y choca baseftatescama tmojanoquedá.

**Jesús Bēngbe Bētsabe bēts  
yebnentsana bacna entsānga  
tojtanēbuacna**

*(Mt 21.12-13; Mc 11.15-18; Lc 19.45-46)*

<sup>13</sup> Ya canýe judiēngbe bēts fiesta, chē Bashco fiesta yojétsobeco, chē ntšamo Bēngbe Bētsá chēngbe bēts taitanga Egiptocana tojánatsebacama jtenójuaboyama. Chē fiestama Jesús Jerusalenoye tojána. <sup>14</sup> Jerusalenoca, Bēngbe Bētsabe bēts yebnentsē, Jesús tojánanyena uacnēnga, oveshēnga y paloma enēnga, y entsāngbioye crocénana atrócyēnga, chēngbe luarēnguenache imojtsetbiámana. <sup>15</sup> Jesús chca tojánanye ora, biajēnga tojanaca, tjanjanēja tojanobopormá, y Bēngbe Bētsabe bēts yebnentsana nyetscanga tojtanēbuacna, chēngbe oveshēnga y uacnēngaca. Chentšana Jesús, Bēngbe Bētsabe bēts yebnentsāma yojanoservena crocénana atrocyēngbe crocénana tojtsanējquēsheshe, y chē mesēshangá tojtsanenásatajchquēca. <sup>16</sup> Chē paloma enēngna Jesús tojánányana: —iQuem soyēnga lempe muentšana matábocana! iNdoñe matsbuamnana ni mátenana atšbe Bētsabe yebnentsē, mo cánýentše jiyama laurentše cuaftsemncá ca!

<sup>17</sup> Y as, chabe uatsjéndayēnga tmojanenojuabó ntšamo Bēngbe Bētsabe uabemana palabrénguñe iuayanama: “Bēngbe Bētsabe yebna jtseboguianama juabna, nyets átšbeñe entsemna ca.”

<sup>18</sup> Chora, judiēnga Jesús tmojantjá: —¿Ndaye bēts soye cochjama bēnga chašcuinjanýema, aca ndaye deréchoca bēngaftaca chca cojtsobenama ca?

<sup>19</sup> As Jesús tojanējua: —Quem Bēngbe Bētsabe yebna menásatajchca, y atše unga tese chtētsbaná ca.

<sup>20</sup> Chora chē judiēnga tmojaniana: —Canta bnētsana chnēnguana uatiñe, quem Bēngbe Bētsabe yebna tmojanjebo. ¿Y aca, nye unga tese lempe cochtētsjebo ca?

<sup>21</sup> Pero Bēngbe Bētsabe yebna, ndayama chora cha chca tojánayana, cachabe cuerpo yojtsemna, ndoñe chē jebna soye. <sup>22</sup> Chama, Jesús obanēnguentšana tojtanyena ora, chabe uatsjéndayēnga tmojanenojuabó ntšamo muentše cha tojánányana. Chca ora, Bēngbe Bētsabe uabemana palabrénguñe y Jesús chora tojánayana palabrénguñe más chēnga imojtsošbuaché.

**Jesús nyetsca entsāngbe  
juabna iuábuatma**

<sup>23</sup> Jesús Jerusalenoca chē Bashco fiestama yojtsemnentscuana, entsānga tmojáninýe Jesús jamana bēts soyēnga Bēngbe Bētsabe obenánaca. Chíyeca, ba entsānga chábeñe imojtsošbuaché. <sup>24</sup> Pero Jesús chēngbeñe ndoñe yontsošbuaché, cha nyetscanga yojanēbuatma causa. <sup>25</sup> Y Jesús ndoñe bonjanájaboto chē entsāngbe soyēngama chabotseuayiynama, er cachá entsāngbe ainaniñe nyetsca juabnēnga yojanábuatma.

### Jesús y Nicodemo

**3** <sup>1</sup>Inamna canye boyabása Nicodemo ca uabainá. Cha yojamna fariseunguentšá y judiëngbe canye amëndayá. <sup>2</sup>Chana ibeta Jesúsbiöye tojána y tbojaniana: —Buatëmbayá, bënga fsëntsetatšëmbo aca canye buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojaniana.

<sup>3</sup>Chora Jesús tbojanjá: —Ndegombre cbëyana, nda ndoñe cachiñe tontónýná, cha ndoñe quenátobena Bëngbe Bëtsabe amëndayana jinýama ca.

<sup>4</sup>Y Nicodemo tbojantjá: —¿Ntšamo, canye entšá ya bëtsá tojtsemna ora, nantsobena cachiñe jtónýnama ca? Ndegombre, cha ndoñe ntsoyobena cachabe mamabe cuerpiñe jtamashënguana cachiñe jtónýnama ca.

<sup>5</sup>Chora Jesús tbojanjá: —Ndegombre cbëyana, bëjayeca y chë Uámana Espíritbeyeca ntjonýnacá, ndocná quenátobena Bëngbe Bëtsabe amëndayoye jamashënguama. <sup>6</sup>Nda bëtsëtsabentsana tojonýná cha, quem luarentša entšangcá jtsemnana; pero chë Uámana Espíritbeyeca tojonýná chana, jtsemnana canýa chë Uámana Espíritu ainaniñe bomná. <sup>7</sup>Ndoñe matenjanana ntšamo tbonjauyanama: “Nýetscanga entsamna cachiñe jtónýnama”.

<sup>8</sup>Chë binýia ndëmuajana tojtseboše jtsemnana, chëjana jtsanana. Masque entšanga, chë binýiyama jtsuenanana, ndoñe ntsetatšëmbuana ndémocana yobama y ndémoye yojtsoma. Cachcá, tšëngaftanga ndoñe quešmátstatšëmbo

ntšamo entšanga chë Uámana Espíritbeyeca tmojtsónýnama; pero tšëngaftanga šmontsetatšëmbo añe chca yomnama ca —Jesús tbojaniana.

<sup>9</sup>Chora Nicodemo tbojantjá: —¿Ntšamo chca nántsemna ca?

<sup>10</sup>Y Jesús tbojanjá: —Aca, canye Israeloca abuatambayá, ¿chë soyëngama ndoñe condétatšëmbo ca? <sup>11</sup>Ndegombre cbëyana, bëngna chë fsttátšëmbo soyëngama fsëntsoyebuambná, y chë tifjinýe soyëngama ndegombre bëtsemnama fsëntsichamo. Pero tšëngaftangna, chë cbontsëtsësná soyënguñe ndoñe quešmatošbuaché. <sup>12</sup>Atše, quem luarentša soyëngama sënjoyebuambá y tšëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsësnase?

<sup>13</sup>“Ndocná, nýe cachábeyeca Bëngbe Bëtsábïoye tonjátsjua. Nýe chë celocana tojabá añe, chë Bëngbe Bëtsá Entšá tbojanbemá. <sup>14</sup>Y chcase, ntšamo Moisés entšanga ndoyenoca bronze mëtsçuaye tsbanánoca tbojananguësëtjácá, šoquënga tšabá chamotsatsmënama; cachcá entsemna, Bëngbe Bëtsá Entšá tbojanbemá entšanga chamuatsbanama; <sup>15</sup>chca, nýetscanga chábeñe tmojtsošbuáchenga, chë nýetsca tescama yomna tšabe vida chamotsebomnama ca” —Jesús Nicodémïoye tbojaniana.

### Ntsachetšá Bëngbe Bëtsá entšanga iuababuánýeshana

<sup>16</sup>Mëntšánaca Jesús tojánayana: —Bëngbe Bëtsá quem luare entšángbïoye tša yojánababuánýeshanayeca, chë nýe canýe Uaquñá ibobomná, bëngbïoye tbojichmó, nýetsca

chábeñe ošbuáchiyënga ndoñe chamondóbanama, y aífne chë nÿetsca tescama yomna tšabe vida chamotsebomnama. <sup>17</sup>Er Bëngbe Bëtsá chabe Uaquiñá quem luaroye ndoñe tbonjichmó quem luare entsangbiama jabáyanama ntšamo tmojamama castigánënga chaotsamnama ca, sinó, entsanga chábeyeca atsebácanënga chamotsemnama.

<sup>18</sup>“Nda Bëngbe Bëtsabe Uaquiñábeñe tojtsošbuáchebiama, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiama, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa. <sup>19</sup>Chca, chë ndoñe tmontsošbuáchengbiama cha ya tojayana, ntšamo tmojamama castigánënga chamotsemna ca; er chë entsangbe juabnënga binÿnayá quem luaroye tojabo, pero ba entsanga tmojábošena jtsomñana, chë entsangbiama bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama. <sup>20</sup>Chë bacna soyënga tojtsamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyëñjana, y chë binÿnayábioye ndoñe ntjabana. <sup>21</sup>Pero nda sempre tojtsiyena ntšamo ndegombre yomncá jtsamëse, chana aífne chë binÿnayábioye jabana, chë binÿnayá chabiana chabuinÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

**Juan chë Ubayaná cachiñe  
Jesucristbiama tojanabuayená**

<sup>22</sup>Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoquedá, entsanga ubáyana. <sup>23</sup>Cach tempo, Juanënaca entsanga yojanëbáyana Enonoca, Salim béconana, er choca bëtscá bėjaye inabinÿna. Ba entsanga choye imojtsaye, y Juan chënga yojanëbáyana. <sup>24</sup>Chca tojanopasá, chë Heródesbe soldadënga Juan cabá ndutame ora.

<sup>25</sup>Chë tempo, básefta Juanbe ústonënga tmojanontsé inÿe judíoftaca enatsëtsnayana ntšamo tempo judiënga chë jtsacuéntšabiama imojanámanama. <sup>26</sup>Chora, chënga Juánbioye tmojánabo y tmojaniyana: —Buatëmbayá, chë Jordán chenguánoica ácaftaca enjamná, ndabiama tša tšabá conjanoyebuambná, mora entsanga entsëbayana y nÿetscanga cha montséstona ca.

<sup>27</sup>As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatšetase. <sup>28</sup>Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiama entsanga jabábuayenama. <sup>29</sup>Chë tobiáše tojtsobouamá ora, chë bobontse chábioye jtsebomnana; y chabe amigna, chabiama jtsoátmanana y chë bobontse bouamnabe oyeuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyeuambnana sëntsuenana ora, átsnaca corente oyejuayá séntsemna.

<sup>30</sup> Cha bontsemna más uamaná jtsemnana, pero atšë šontsemna más nduamaná jtsemnana ca —Juan tojanéyana.

**Ntšamo yomna chë celocana tojabá**

<sup>31</sup> Mëntšánaca Juan tojánayana: “Chë tsbanánocana tojabá, nÿetsca entšangbiama más uamaná endmëna. Chë quem luare oyená quem luare entšangcá jtsemnana y quem luarentša soyëngama jtsóyebuambnayana, pero chë celocana tojabana, nÿetsca entšangbiama más uamaná endmëna. <sup>32</sup> Cachá ntšamo tojinÿe y tojouencá entsoyebuambná, pero chë entsichamo soyënguiñe ndocná quenatošbuaché. <sup>33</sup> Nda ntšamo cha tojtsóyebuambnañe tojtsošbuaché y chca tojtsama, jtsinÿanÿnayana Bëngbe Bëtsá ndegombre soyënga inetsichámuama. <sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábïoye tbojichmó chë Uámana Espiritu, nÿets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. <sup>35</sup> Chë Taitá Uaquiñábïoye bondbobonshana, y chë Uaquiñábïoye obenana tbojatšëta nÿetsca soyënguiñe jtsemándayama. <sup>36</sup> Nda chë Uaquiñábeñe tojtsošbuaché, chë nÿetsca tescama yomna tšabe vida echántsebmna; y nda chë Uaquiñábïoye ndoñe tbontsašbuaché, chana chë vida ndoñe queochátsbmna, y chë Bëngbe Bëtsabe uabouana castigo nÿetsca tescama chábeñe echántsemna ca” —cha tojánayana.

**Jesús y chë Samaria  
luaroca shembása**

**4** <sup>1</sup> Chë fariseunga tmojanuena Jesús, Juanbiama más

ústonënga yojtsabamnana, y más entšanga yojtsëbáyanama. <sup>2</sup> Pero ndegombre, cach Jesús ndocnábiyoe bonÿanábayana, sinó chabe uatsjëndayënga. <sup>3</sup> Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojéftsanbocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana. <sup>5</sup> Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaqiñá Josébiyoe tojéftsanlargá fshantse béconana. <sup>6</sup> Choca yojamna cánÿentšë atëfjóniñe, búyeshe jobuatsjuama, Jacobëbe atëfjóniñe ca uabáinoñe. Mo nÿetsto ora, chentšë Jesús yojtsemna, aniñe uamëntšnáyá, chë atëfjóniñe batsjaca yojótbema. <sup>7-8</sup> Chabe uatsjëndayëngna chë pueblöye tmojána saná jobuámiñama. Chora, canÿe shembása Samariocá, chë atëfjónoye tojánashjango, búyeshe jauafcama; as Jesús tbojanayana: —Búyeshtema šmabuatsëta ca.

<sup>9</sup> Y chë shembása tbojanjuá: —Aca canÿe judío condmëna y atšna canÿe samaritaná. ¿Ntšamo cojtsobena atšë búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús tbojanjuá: —Aca mo cojtsetátšëmbo nÿe ntšamo Bëngbe Bëtsá aca jatšëtayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšëtake ca.

<sup>11</sup> Y chë shembása tbojanayana: —Señor, tondaye quecátsbmna nÿe mo ndayecnaca búyeshe jabuatsjuama, y chë atëfjóniñe corente tboaca endmëna; y as, ¿ndayentsana

cochjobenaye bėjaye vida bomniye atše juabuatšetayama? <sup>12</sup> Bėngbe tempsca bėts taitá Jacob, quem atėfjóniñe bėngbiana tojėftsanboshjona. Cachá, chabe básenga y chabe bayėnga muentšana búyeshe tmojėftsanofśé; y łaca chabiana más bėtsá comna ca? —chė shembása yojsichamo.

<sup>13</sup> As Jesús tbojanjuá: —Njėtscanga chė quem búyeshentšana tmojofśenga, chėnga cachiñe echantėtėjuendaye.

<sup>14</sup> Pero chė chanjuabuátšetaye búyeshentšana tojofśé chana ndocna te cachiñe quebochėtajuendaye. Cha chanjuabuátšetaye búyeshna, chábeñe echántsemna mo cánjėntše bėjaytema obocaniñcá, chė njėtsca tescama yomna tšabe vida jtsebomnama ca —cha tbojaniana.

<sup>15</sup> Chora chė shembása tbojaniana: —Señor, chca búyeshe šmabuatšetá, as atše ndoñe cachiñe chašondetsajuendama, ni búyeshe juafcama moye jtsaboyama ndoñe chašondėtsemnama ca.

<sup>16</sup> As Jesús tbojaniana: —Motsa acbe boyá jachembuama y cochjėsabo ca.

<sup>17</sup> Chora chė shembása tbojanjuá: —Boyá ndoñe quetsátsbomna ca.

As Jesús tbojaniana: —Tšabá tcjayana boyá ndoñe condbomna ca. <sup>18</sup> Er, aca shachna boyanga conjánabamna, y chė mora contsebomnana, acbe boyá ndoñe quenátsmėna. Ntšamo tconjayancá ndegombre entsemna ca.

<sup>19</sup> Chė shembása chca tojanuena ora, Jesúsbiye tbojaniana: —Señor, mora atše séntsetatśembo, aca canya Bėngbe Bėtsabe juabna oyebuambnayá connama. <sup>20</sup> Bėngbe tempsca bėts taitanga quem tjoca Bėngbe Bėtsá monjánadorana; pero tšėngaftanga, judiėnga šmondbėtsichamo, bėnga

Bėngbe Bėtsá jadóramna, Jerusalenoca chė luare canmėna ca.

<sup>21</sup> Chora Jesús tbojanjuá: —Shembása, šmoyeuná; canjė tempo echanjóshjango y chora tšėngaftanga ndoñe quecmochátamna Bėngbe Bėtsá jadóramna, ni quem tjoye jabana, ni Jerusalenoye jana. <sup>22</sup> Tšėngaftanga samaritanėnga ndoñe quešmatábuatma nda šmetsadoránama; pero bėnga aĩne fsėnduábuatma, er chė atsebacayá judiėnguentšana endabó. <sup>23</sup> Pero ora entsoshjauana, ya chė tempo tocjobuache, ndaye ora chė Bėngbe Bėtsá chė Taitá ndegombre atschuanayėnga, chė Espíritbeyeca y ndegombre juabnėngaca chábioye mochántadorana. Er chė Taitá entseboše chė chábioye adórayėnga chca chamotsamama. <sup>24</sup> Bėngbe Bėtsá, Espiritu endmėna; y chė chábioye adórayėnga entsamna, chė Uámana Espiritbeyeca y ndegombre juabnėngaca cha jtsadoránana ca —Jesús tbojaniana.

<sup>25</sup> Chora chė shembása tbojaniana: —Atše sėndėtatśembo, canmėna chė Bėngbe Bėtsabe Uámana Uabuayaná, chė Cristo jabana ca; y cha chaojášhjango orna, cha njėtsca soyėngama cašochjabuayená ca.

<sup>26</sup> As Jesús tbojaniana: —Atše, chė ácaftaca entsoyebuambná cha, cha entsemna ca.

<sup>27</sup> Chėntscuana, Jesusbe uatsjėndayėnga tmojtanashjajna, y tmojtsanėuatjaná, Jesús canjė shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndayeca cháftaca cojtsoyebuambná ca?

<sup>28</sup> Chorna, chė shembása chabe uafcanėja tojėsanboshjona, y chė puebløye betscø tojtjaná. Chocna, entšanga tojanėyana: <sup>29</sup> “Mabėnga

canÿe boyabása jinÿama ca. Cha atše šonjauyana lempe ntšamo tijamcă. ĨChè boyabása, chè Cristo tanántsemna ca?” —cha yojtsichamo.

<sup>30</sup> As chè entsànga chè puebllocana tmojánbocana y Jesús yojtsemnoye tmojánashjajna.

<sup>31</sup> Chca yojtsopasánentscuana, chè uatsjéndayènga Jesúsbioye imojtseimpadana: —Buatèmbayá, batšatema mose ca.

<sup>32</sup> Pero cha tojanéyana: —Atše canÿe soye jasama séntsebomna. Tšèngaftanga chè soyama ndoñe quešmátstatšèmo ca.

<sup>33</sup> Chora chè uatsjéndayènga tmojanontšé entjanayana: —ĨNderado nda jasama chabiama tojiyèbo ca?

<sup>34</sup> Y Jesús tojanéyana: —Chè šonjichmó cha ntšamo yojtsebošcă jamana, y chabe trabajo japochócana, chè soyènga mo sanacá atšbiana entsemna. <sup>35</sup> Tšèngaftanga šmondbétsichamo: “Cabá canta ishinyè entsashbena jaja saná chaotsebínÿnama ca”; pero atše cbéyana: Minÿènga tša entsànga moye montsabèbana; chènga montsemna mo jajañe saná játbanama tojtseprontancá.

<sup>36</sup> Tšèngaftanga šmontsemna mo chè saná atbanayèngcă. Chèngna jajañe jtsetrabájayana, y chèngbe uacanánana jtsèsháchiñana. Cachcă, tšèngaftanga cmontsamna atšbiana entsànga júbuajana, chè nyetsca tescama yomna tšabe vida chamotsebomnama. Chè jaja saná átbanaye ora, jenènga y chè atbanayènga cánÿiñe oyejuayènga jtsemnana. Cachcă, chè entsànga átšbeñe chamojtsošbuaché ora, nyetscanga, chè atšbiana obuájajanènga y chè atšbiana trabájayèngnaca cánÿiñe oyejuayènga mochántsemna. <sup>37</sup> Quem entsàngbe ichámuana, canÿe ndegombre soye

endmèna: “Chè jená canÿa jtsemnana, y atbanayana inÿa ca.” <sup>38</sup> Atše tšèngaftanga cbonjichamó canÿe soye játbanama, y tšèngaftanga tondaye chešmatsma chca chaotsebínÿnama. Inÿenga chiñe bètscă tmonjëftsetrabája, y tšèngaftangna, chèngbe trabajènguentšana šmojolograñe ca —Jesús tojánayana.

<sup>39</sup> Bètscă entsànga, Samarioca pueblentšènga Jesúsbeñe imojtsanošbuaché, ntšamo chè shembása tojanéyanama. Chè shembása tojanéyana: “Lempe ntšamo atše tijamcă cha šonjauyana ca.” <sup>40</sup> As chè samaritanènga, Jesús yojtsementše tmojánashjajna ora, tmojanimpadá chéngaftaca chaotsoquedáñama. Y as Jesús, uta te chentše tbojëftsanjétana. <sup>41</sup> Y más entsànga, cach ntšamo Jesús yojtsanètsètsnacá tmonjanuena ora, chábeñe imojtsanošbuaché.

<sup>42</sup> Y chè shembása chè entsànga tmojanayana: “Mora cocayé fsèntsošbuaché, ndoñe nÿe ntšamo aca šcojáuyanama, sinó cach bènga chábioye oído fsènjabuajoyeca; y mora fsèntsetatšèmo ndegombre cha yojtsemna chè quem luare entsàngbiana Atsebacayá ca.”

**Jesús, canÿe mandado  
uajabuachanabe básabioye  
tbojanshná**

<sup>43</sup> Uta te chentšana, Jesús Samariocana tojáisanbocna y Galileoye tojataná. <sup>44</sup> Cach Jesús mèntšá tojánayana: “Canÿa Bèngbe Bètsabe juabna oyebuambnayá, cachabe luarentše oyenènga ndoñe bètsá ntjabemèngana ca.” <sup>45</sup> Galileoca oyenènga Jerusalenoye tmojána, y tmojáninÿe nyetsca bèts soyènga ntšamo Jesús Bashco fiesta ora choca



tojanmcá. Chíyeca, Jesús Galileoye tojtashjango ora, chënga tšabá tmojtanfja.

<sup>46</sup>Galileocna, Jesús cachiñe Caná puebloye tojésanashjango, chë béjayeca vínoye cha tojábementše. Choca yojtsemna canye mandadbe uajabuachaná, y chabe uaqiñana Capernaum puebloca šocá yojtšejajona.

<sup>47</sup>Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaqiñá chabuetseshnáñama, er ya jtsóbanama yojtsemna ca. <sup>48</sup>As Jesús tbojanianyana: —Tšëngaftanga, Bëngbe Bëtsabe obenana jinñanyiyama bëts soyënga atše jamama ndoñe šmonjinjyëse, átšbeñe ndocna te ntsošbuáchiyana ca.

<sup>49</sup>Chora, chë mandadbe uajabuachaná Jesúsbioye tbojanianyana: —Taita, betesco mabo, atšbe uaqiñá cabá ndóbana ora ca.

<sup>50</sup>As Jesús tbojanianyana: —Acbe yebnoye motsatá. Acbe uaqiñá ainá endëtšomñe ca.

Chë boyabásana tojanošbuaché ntšamo Jesús tbojanianyancá y tojtaná. <sup>51</sup>Cha yojtsataye orna, chabe oservënënga tmojánbocana jajébenguama y tmojanianyana: —Acbe uaqiñá tšabá entsatsmëna ca.

<sup>52</sup>As cha tojanatjá: —¿Ntseco orscana tbenjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup>Chora chë taitá tojanenojuabó, cachca ora Jesús tbojanianyana: “Acbe uaqiñá ainá endëtšomñe ca”. Y cha y nyëtsanga chabe yebnentše oyenënga Jesúsbeñe imojtsanošbuaché.

<sup>54</sup>Ntšamo Jesús chora, chë uajabuachanabe uaqiñabiamá

tojanmcá, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinñanyiyama, Galilea luaroca.

#### Jesús canye jama ndobenábioye tbojanshná

**5** <sup>1</sup>Baseftayté chentšana, chë judiënga canye oboyejuaye te imojtsebomna ora, Jesús Jerusalenoye tojána. <sup>2</sup>Choca, chë Oveshëngbe amashjuana ca uabáinentše yojamna canye binche uafjónnaye, entšangbe pormániñe. Chë béjajna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. <sup>3</sup>Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. <sup>4</sup>(Nderado nderado, Bëngbe Bëtsábioica canye ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) <sup>5</sup>Chë šoquënguiñe canye boyabása inamna, unga bnëtsana y posufta uatama jama ndobená. <sup>6</sup>Jesús chë jajonábioye tbojáninye ora y ba uatama chca yojamnama tojántatšëmbona ora, tbojantjá: —¿Quecojtseboše tšabá jtsatsmënama ca?

<sup>7</sup>Y chë šocá tbojanjuá: —Taita, ndocná quetsátsbomna nda chašujájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inñá atšbe natsana jtsamashënguana ca.

<sup>8</sup>Y Jesús tbojanianyana: —Matëtsbaná, acbe tjuashe mesocñe y matontšé jóyenana ca.

<sup>9</sup>Cach ora chë boyabása tšabá yojtsatsmëna, chabe tjuashe

tojésanocñe y tojanontsé jtsanana. Chca tojanopasá ora, chë ochnayté inamna.

<sup>10</sup> Chýyeca, chë tbojanshnábioye chë judiënga tmojanianyana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanéyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tmojauyaná ca?

<sup>13</sup> Pero chë shaná ndoñe yontsetátšëmbo nda tbojanshnama. Chocna bëtscá entsanga imojtsemna; chcasna, Jesús chëngbe tsëntsajana tojanenatjëmba.

<sup>14</sup> Chentšana, Jesús Bëngbe Bëtsabe bëts yebnentše chë boyabásabioye tbojáninýena y tbojanianyana: —Mouena; mora aca ya ndoñe šocá quecátmëna; bacna soyënga ndoñe cachiñe cattsama. Afñese, acbiama puerte mal echanjopása ca.

<sup>15</sup> Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. <sup>17</sup> Pero Jesús tojanéyana: “Atšbe Taitá nyëts tempo tšabe soyënga endbëtsama; cachcá, átšnaca tšabe soyënga séntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabiama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

#### **Bëngbe Bëtsabe Uaquiñabe obenana**

<sup>19</sup> Chentšana Jesús tojanéyana: “Ndegombre šcuayana: Bëngbe

Bëtsabe Uaquiñá, nyë cachabe cuenta tondaye quenátobena jamana. Cha jtsonýayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. <sup>20</sup> Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëts soyënga bochanjinýinýiye, chë soyëngama tšëngaftanga chašmenjanama. <sup>21</sup> Chë Taitá endama obanënga chámuatayenama y tšabe vida chamotsebmnama; cachcá, chë Uaquiñá entsama tšabe vida chamotsebmnama, ndëmuanýenga cha tojtseboščá. <sup>22</sup> Chë Taitá ndocnabiama jatichámuana tšabá o ndoñe tšabá yontsama ca. Chabe Uaquiñábioye nyëts obenana tbonjatšetá nyëtscangbiama jayanama tšabá o ndoñe tšabá tmontsamama. <sup>23</sup> Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyëtscanga mondbetsinýinýnáyca. Nda chë Uaquiñábioye ndoñe más uamaná tbtontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

<sup>24</sup> “Ndegombre šcuayana: Nda ntšamo atše séntsichamcá šojoyeuná, y chë muentše šonjichmó chábeñe tojtšošuaché, chë nyëtsca tescama yomna tšabe vida jtsebmnama. Chabiama chë Uaquiñá ndoñe queochátayana castiganá chaotsemna ca. Chca, Bëngbe Bëtsabiama cha ya ndoñe más mo obanacá queochátmëna, chábeñe ndošbuáchiye causa; y ya ndoñe nyëtsca tescama castiganá queochátmëna. Y afñe, chë nyëtsca tescama yomna tšabe vida echántsebmna.

<sup>25</sup>“Ndegombre šcuayana: Chë jobuáchama te ya tocbouache. Chë te, chë Bëngbe Bëtsabiana mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna.

<sup>26</sup>Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšeta entšanga vida chamotsebomnama jamama. <sup>27</sup>Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšeta nÿetscangbiana jayanama tšabá o ndoñe tšabá tmonsamama.

<sup>28</sup>Chama ndoñe matenjnanana. Er canÿe tempo echanjobuache, y chora chë Uaquiñá obanënga echantsachembuana; chënga mochanjouena y cach ora, chëngbe oyenocana mochanjésebocana.

<sup>29</sup>Tšabe soyënga tmojëftsemënga, obanënguentšana mochántayena, chë nÿetsca tescama yomna tšabe vida jtsebomnama. Pero bacna soyënga tmojëftsemënga obanënguentšana mochántayena nÿetsca tescama castigánënga jtsemnama ca” —Jesús tojanéyana.

**Jesús, ndegombre Bëngbe  
Bëtsabe ichmoná inamna**

<sup>30</sup>Mëntšánaca Jesús cachatbiana tojánayana: “Nÿe átšbeyeca tondaye quetsátobena jamama. Chë Taitá šontsemánda ntšamo nÿetscangbiana jayanama tšabá o ndoñe tšabá tmonsamama. Nÿe chca atše séntsobena chë soye jamama. Ndoñe quetsátsoše jamana nÿe ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chíyeca

atše nÿetscangbiana séntsicamo tšabá o ndoñe tšabá tmonsamama; y ntšamo nÿetscangbiana séntsicamcá, ndegombre endmëna.

<sup>31</sup>“Ntšamo cach atšbiana tijayanama, ndegombre entsemna ca stsicámëse, ntšamo stsicamcá, nÿetscangbiana tondaye ntšamanana. <sup>32</sup>Pero inÿa entsemna. Cha endétatšëmbo y entsichamo ntšamo ndegombre atšbiana yomncá; y séntsetatšëmbo ntšamo cha atšbiana yojtšichamcá, nÿetscangbiana añe yojtšamanama.

<sup>33</sup>Tšëngaftanga ínÿenga šmojanichamó atšbiana Juan jatjayama; y ntšamo cha tcmojuayancá ndegombre endmëna. <sup>34</sup>Masque chë soyënga cha tcmojáuyana, ndoñe quešnatájoboto ndocna entšá atšbiana chaotsichamo ‘cha añe chca endmëna ca’. Atše quem soyënga séntsicamo ndayá nÿe tšëngaftanga atsebácanënga chašmotsemnama. <sup>35</sup>Juan enjamna mo canÿe uajuinÿanésha tojtsajuinÿana y tojtsabuashinÿinÿancá. Tšëngaftanga chabe buashinÿinÿanana šmonjinÿe, y šmonjábosena rato cháftaca oyejuayënga jtsemnama. <sup>36</sup>Pero chë atše sënjama soyëngacna más entsinÿinÿena ntšamo atšbiana ndegombre yomncá, chë ntšamo Juan atšbiana tojánayanama. Ndayá atšbe Taitá šojabonyé jamama, ntšamo atše séntsamcá, entsinÿinÿná ndegombre chë Taitá šojichmoma. <sup>37</sup>Atšbe Taitá, chë šojichmó chánaca entsichamo ntšamo atšbiana ndegombre yomncá, masque ndocna te chabe oyeambuambnayana chešmatuena, ni ntšamo cha yomncá chešmátinÿe.

<sup>38</sup>Pero tšëngaftangbe ainanoye chabe palabra ndoñe tonjomashëngo, cha tbojichmóbeñe tšëngaftanga ndoñe quešmatošbuaché causa.

<sup>39</sup>Tšëngaftanga, Bëngbe Bëtsabe

palabra tša jtsatsjéndayana, er šmondobátmana, chca jtsamëse chë nyetsca tescama yomna tšabe vida jónyena. Y Bëngbe Bëtsabe uabemana palabrenguine atšbiana endayana ntšamo ndegombre yomncá; <sup>40</sup>pero masque chca, tšëngaftanga ndoñe quešmátsboše atše jtséstonana, y chca, tšabe vida jtsebomnama.

<sup>41</sup>“Atše ndoñe quetsátsboše entsanga yapa tšabá atšbiana chamotsichámuama. <sup>42</sup>Y inye soye, atše puerte cbondëbuatma, y sëndétatšëmbo tšëngaftanga Bëngbe Bëtsá ndoñe šmondobonshánama. <sup>43</sup>Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aïne šmatjofja. <sup>44</sup>Tšëngaftanga corente jésebošana, ínýenga tšëngaftangbiana tšabá chamotsichámuama, y ínýengbiana tšabá jtsichámuama; pero ndoñe ntsebošana chë nye canye Bëngbe Bëtsá tšëngaftangbiana cachcá chaotsichámuama. Chca šmojtsamëse, čntšamo šmochtsobena Bëngbe Bëtsábeñe jtsošbuáchiyana? <sup>45</sup>Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtšobátmanana atšebacánënga jtsemnama, chë ntšamo Moisesbe leyine endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. <sup>46</sup>Tšëngaftanga, chë Moisés tojéftsanabema soyiñe šmojtšošbuachese, átšbeñnaca šmattšošbuáchiye, er cha atšbiana tojanábema. <sup>47</sup>Pero chë tojanábema soyiñe tšëngaftanga ndoñe šmontšošbuachesa, čntšamo šmochjobenaye chë atše séntsichamo

soyënguine jtsošbuáchiyana ca?”  
—Jesús tojanéyana.

**Jesús shachna uaranga boyabásenga saná tojanacaredadó**

(Mt 14.13-21; Mc 6.30-44; Lc 9.10-17)

**6** <sup>1</sup>Chë soyënga tojanopasá chentšana, Jesús chabe uatsjéndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina. <sup>2</sup>Ba entsanga imojtséstona, er chënga tmojáninýe cha bëts soyënga jtsamana, šoquënga jtsashnayëse. <sup>3</sup>As Jesús tjoye tojántsjua, y choca chabe uatsjéndayëngaftaca tojanótbema. <sup>4</sup>Ya judiëngbe canye fiesta, chë Bashco fiesta, yojétsobeco.

<sup>5</sup>Jesús tojanótbema ora, tojanontješé y tojánanye ba entsanga chábioye imojetsebéconaye. As Felípbioye tbojaniyana: —čNdayentše saná cuanjabuámiye nyetsca quem entsanga chamosama ca?

<sup>6</sup>Jesús chca tbojaniyana, ana Felípbioye jinýama ntšamo cha tabuanjojuama; er cach Jesús tšabá inatátšëmbo ndayá jamama. <sup>7</sup>Y Felipe tbojanjúá: —Ni mo uta patse denario crocenánaca nanjopódia tandëse jabuámiyama, nyetsca entsanga nye mo batsatémnaca chamuétsesama ca.

<sup>8</sup>Chorna, Jesusbe canye uatsjendayá, Andrés ca uabainá, Simón Pédrëbe catšata, Jesúsbioye tbojaniyana:

<sup>9</sup>—Muentše entsemna canye básetema y cha shachna cebada tandëse y uta beónata entsebomna. Pero, čndayase nye nyetsatema chëfta entsangbiana ca?

<sup>10</sup>As Jesús tojánayana: —Entsanga méyana chamotbiana ca.

Becá shácuana chë luariñe inamna, y nyetsca entsanga chiñe tmojanoshéntsjatbiana. Chë

entsanguentše shachna uaranga boyabásenga imojtsemna. <sup>11</sup> Chora Jesús, chë tandëse chabe cucuatšinë tojanca, y Bëngbe Bëtsábioye chë tandëšama tbojtanchuá; y chabe uatsjédayënga tojanëjatá, y chë uatsjédayëngna nyetsca entsanga imojtsetbiámanënga tmojanatšatá. Cachcá Jesús chë beónaca tojanma, y ntšamo entsanga imoijanbošcá tmojanatšatá. <sup>12</sup> Nyetscanga tmojanse y tmojtanošachá ora, Jesús chabe uatsjédayënga tojanéyana: —Chë ojamnëtmënga šmochtsatbananga, tondaye nýe cachcá ntjéftsonýayama ca.

<sup>13</sup> As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarécua tmojanajutjé. <sup>14</sup> Chë entsanga quem bëts soye Jesús jamama tmojáninýe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entsanga chëngbe rey jabemama imojtsebošama. Chíyeca cach tjoye tojtsaisanoñe canýa jtsomñama.

**Jesús béjaye juatsbuacá yojsyaye**  
(Mt 14.22-27; Mc 6.45-52)

<sup>16</sup> Tojanibétata ora, Jesusbe uatsjédayënga chë uafjajónayoye tmojantšmá; <sup>17</sup> barquëshañe tmojtanošojayé, y tmojanontšé jenashbuachénguana, chca, Capernaumoca jenbocnama. Ya íbeta yojtsemna, y Jesús cabá ndoñe chëngbioye ntashjanguana. <sup>18</sup> Chca imojtsenashbuachnëjuana orna, chë béjajinë jabuache binýia tojanóshjango y bëts olëshënga chë barquëshoye yojsjójantšetaye. <sup>19</sup> Shachna o chnënguana kilómetro chënga tmojána

ora, tmojáninýe Jesús chëngbioye yojtsebëconaye, béjaye juatsbuacá yojsyaye. Chënga chca tmojáninýe ora tša tmojanocochauatjaná, <sup>20</sup> pero Jesús tojanéyana: “Atše sëndmëna; ndoñe matauatjëngana ca.”

<sup>21</sup> Chora chë uatsjédayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashhajna.

### **Entšanga Jesús tmojúanguango**

<sup>22</sup> Yëfsana, nyetsca entsanga, chë uafjajónaye chenguánoica tmojanoqueđanga tmojáninýe, chë inýe yëfsana chë nýe canýe barquëshá yojamnëšañe Jesusbe uatsjédayënga tmojtsanoñama, y Jesús chëngaftaca ndoñe tonjánama.

<sup>23</sup> Pero chëntscuana, Tiberias pueblentšana inýe barquëshangá tojanáshhajna canýe luarentše, chë Bëngbe Utabná Jesús chabe Taitábioye tbojtanchuá chentšana, entsanga saná tmojanse luare bëconana. <sup>24</sup> Asna, ni Jesús ni chabe uatsjédayënga chentše ndoñe montsemnama chë entsanga tmojáninýe ora, chë barquëshangañe tmojtanošojayé y Capernaumoye tmojána Jesús jetsenguanguama.

### **Jesús, chë nyetsca tescama yomna tšabe vida jtsebomnama tandëse**

<sup>25</sup> Chë uafjajónaye chenguánoye tmojánashhajna ora, Jesús tmojáninýena y mëntšá tmojantjá: —¿Buatëmbayá, ntseco ora muentše tcojášhango ca?

<sup>26</sup> Y Jesús tojanéyana: —Ndegombre cbéyana, tšëngaftanga ndoñe atše quešmatsnguá, chë bëts soyënga tijamama, sinó nýe chë jtšachayey nyetšá tandëse šmojasama. <sup>27</sup> Ndoñe matenángmenana chë nýe ndoñe

bën y jopochócana sanama;  
 chë ndmopochócaye saná, chë  
 nyetsca tescama yomna tšabe vida  
 jtsebomnama saná šmochjánguango.  
 Chë saná, Bëngbe Bëtsá Entšá  
 tbojanbemá cmochanjátšataye, er  
 Bëngbe Bëtsá chë Taitá tonjinýanýé,  
 tšabe soyéngaca, cha chábioye  
 tbojuábuayanama ca —tojanáyana.

<sup>28</sup> Chora chë entsanga tmojantjá:  
 —¿Ndayá fchjama ntšamo Bëngbe Bëtsá  
 yojtsebošcá chaotsemnama ca?

<sup>29</sup> Chca tmojantjá ora, Jesús  
 tojanéyana: —Chë Taitá entseboše  
 tšéngaftanga chabe ichmonábeñe  
 chašmotsošbuáchemaca.

<sup>30</sup> Chora chënga tmojaníyana:  
 —¿Ndaye tšabe soye cochjama acbe  
 obenana bënga jinýanýiyama ca?  
 Chë soye chaftsjinýése, ácebeñe  
 fchantsošbuáchiye. ¿Bëngbiana  
 taicochjama ca? <sup>31</sup> Bëngbe tempsca bëts  
 taitanga entsanga ndoyenoca maná  
 ca uabaina saná tmojanse. Bëngbe  
 Bëtsabe uabemana palabrenguñe  
 mëntšá endayana: “Cha celoca tandëše  
 tonjanatšatá chamosama ca” —chënga  
 tmojanáyana.

<sup>32</sup> Chora Jesús tojanéyana:  
 —Ndegombre cbéyana, Moisés chënga  
 ndoñe chë celoca tandëše tonjanatšatá;  
 Bëngbe Bëtsá Bëngbe Taitá chéngbioye  
 tojanatšatá chë maná ca uabaina  
 tandëše; y cha endmëna nda celocana  
 chë ndocna te ndmopochócaye  
 tandëše ndegombre cmondatsatná.

<sup>33</sup> Er Bëngbe Bëtsábiocana tandëše  
 entsemna chë celocana tojastjanguá; y  
 cha quem luare entsangbiana entsama  
 chë nyetsca tescama yomna tšabe  
 vida chamotsebomnama ca —cha  
 tojanéyana.

<sup>34</sup> Chora chënga tmojanimpadá:  
 —Taita, chë tandëše sempre  
 šcochtsatsatnaye ca.

<sup>35</sup> Y Jesús tojanéjua: —Atše  
 sëndmëna entsanga chë nyetsca  
 tescama yomna tšabe vida  
 jtsebomnama tandëše. Nda atše  
 chašojtséstona, sempre oyejuayá  
 echanjéftsemna y Bëngbe Bëtsabe  
 soyënga nyets tempo echanjesóbomñe,  
 mo nda nyets tempo saná totsobomñicá,  
 y ndocna te tbontsishëntsaná. <sup>36</sup> Pero  
 ntšamo ya tcbonjauyancá, tšéngaftanga  
 atše šmonjinýe y cabá ndoñe  
 átšbeñe quešmatošbuaché. <sup>37</sup> Nda  
 atšbe Taitá atšbiana tbojabocacá,  
 cha atše šochantséstona; y nda  
 átšbioye šojtséstona, átšbentsana  
 quichtëtábocna. <sup>38</sup> Er atšna celocana  
 sënjabo chë šojichmó cha ntšamo  
 yojtsebošcá jamama, y ndoñe nýe  
 ntšamo atše stsebošcá. <sup>39</sup> Y chë  
 šojichmó cha entseboše, ni mo  
 canya chë atšbiana tojabacacá  
 chentsana, atše chailesenciá  
 pochocaná chaotsemnama; y quem  
 luare jopochócama tena, nyetscanga  
 atšbiana tojábacacangbiana  
 chámuatayenama atše chaimama.  
<sup>40</sup> Er atšbe Taitá entseboše, nda chabe  
 Uaquiñábioye tbojinýe y chábeñe  
 tojtsošbuaché, chë nyetsca tescama  
 yomna tšabe vida chaotsebomna, y  
 quem luare jopochócama tena, cha  
 cháuatayenama atše chaimama ca  
 —Jesús tojanéyana.

<sup>41</sup> “Atše séntsemna chë celocana  
 tojóshjango tandëše ca” Jesús  
 tojanéyana causa, chë judiënga  
 tmojanontsé chabiana podesca  
 ichámuana. <sup>42</sup> Chënga mëntšá  
 imojtsichamo: —¿Mua ndoñe Jesús  
 yondmëna, chë Josebe uaquiñá? Chabe  
 bëtsétsata bënga tmotsábuatmñe.  
 ¿Ntšamo cha mora yochjátichamo  
 celocana tojástjango ca?

<sup>43</sup> As Jesús tojanéyana: —Atšbiana  
 ndoñe podesca matichámuana.

<sup>44</sup>Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchese; y atše chanjama cha cháuatayenama quem luare jopochócama te.

<sup>45</sup>Chë tempsquënga Bëngbe Bëtsabe juabna oyebuambnayënga mëntsá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinýe, cha atše šochanjuasto.

<sup>46</sup>“Ndocná atšbe Taitá tbonjinýe. Nýe chë Bëngbe Bëtsábíocana tojabá añe.

<sup>47</sup>Ndegombre šcuayana: Nda átšbeñe tojtsošbuaché, chë nyetsca tescama yomna tšabe vida echántsebomna.

<sup>48</sup>Atše sëndmëna entsanga chë nyetsca tescama yomna tšabe vida chamotsebomnama tandëše. <sup>49</sup>Masque tšëngaftangbe bëts taitanga, entsanga ndoyenoca chë maná ca uabaina saná tmojanse, pronto tmojanóbana.

<sup>50</sup>Pero atše sëntsoyebuambná ndayá chë celocana tojóshjango tandëšama. Nda chë tandëše tojase, ndoñe queochatóbana. <sup>51</sup>Atše sëntsemna entsanga chë nyetsca tescama yomna tšabe vida jtsebomnama tandëše, chë celocana tojóshjanguëše. Nda quem tandëše tojase, nyetsca tescama nýe ainá echanjesomñe. Chë chanjátataye tandëšna, cach atšbe cuerpo entsemna. Chca chanjama quem luare entsanga chë nyetsca tescama yomna tšabe vida chamotsebomnama ca” —Jesús tojánayana.

<sup>52</sup>Chora chë judiënga tmojanontsé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup>As Jesús tojanéyana: —Ndegombre šcuayana: Tšëngaftanga Bëngbe

Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna. <sup>54</sup>Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama. <sup>55</sup>Atšbe cuerpo ndegombre saná endmëna, y atšbe buiñe ndegombre ofšëšnayiye. <sup>56</sup>Nda atšbe cuerpo tojase y atšbe buiñe tojofšé, átšeftaca canýiñe mo canýacá echántsemna, y átšnacá cháftaca.

<sup>57</sup>Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana. <sup>58</sup>Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëše. Masque tšëngaftangbe bëts taitanga chë maná ca uabaina tandëše tmojanse, pronto tmojanóbana; pero quem tandëše ndoñe cachcá quenátsmëna. Nda quem tandëše tojase, nýe nyets tempo vida echanjesóbmñe ca —Jesús tojánayana.

<sup>59</sup>Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

#### Chë nyetsca tescama yomna tšabe vida jtsebomnana palabrenga

<sup>60</sup>Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup>Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca? <sup>62</sup>Y chcasna,

Bëngbe Bëtsá Entśá tbojanbemá, chë cha tempo inamna luaroye tojtëtsjuama šmojinjëse, çntśamo šmattsejuabnaye? <sup>63</sup> Bëngbe Bëtsabe Espiritu entsama entśanga chë tśabe vida chamotsebonnama. Chë cuerpo ndoñe uamana soye quenátsmëna; chë tcbonjúuyana soyënguine entsemna chë Uamana Espiritbe uajabuáchenana y chë tśabe vida. <sup>64</sup> Pero masque chca entsemna, tšëngaftangbentśana banga átśbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entśanga jábuayenama Jesús tojanbojatsé orscana, cha inatátšëmbo ndëmuanýenga chábeñe ndoñe mochanjanošbuáchiye, y nda chë uayayëngbe cucuatšinë yochjétsayentsbashejuanana. <sup>65</sup> Y Jesús yojtëtóntśa oyeuambnayana: —Chíyeca, atše tšëngaftanga tcbonjúuyana: “nda atše juastama ainaniñe chaotsebošama atšbe Taitá ndoñe tbonjúájabuache, cha ndoñe quešochatato ca”.

<sup>66</sup> Chë causa, chentśana, ba chabe ústonënga cachcá tmojesanonýá, y cháftaca ya ndoñe imontsajna. <sup>67</sup> Chora Jesús, chë bnétsana uta uatsjëndayënga tojanéyana: —¿Y tšëngaftángnaca, jtsoñama y atše jéseboshjonama šmojtseboše ca?

<sup>68</sup> Chora Simón Pedro tbojanjúá: —Bëngbe Utabná Jesús, ¿chcasna ndábioye fchjanga ca? Nye aca šcontsëtsëtsná chë nyetsca tescama yomna tśabe vida jtsebonnama palabrënga. <sup>69</sup> Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanéyana: —Atše tcbonjabacacá, chë bnétsana útata; pero canya tšëngaftanguentśana, mo Satanasbe canye trabajayacá entsemna ca.

<sup>71</sup> Judas Iscariote, chë Simonbe uaquiñabiama chca Jesús tojánayana. Er chana masque canya chabe bnétsana uta uatsjëndayënguentśa inamna, Jesús uayayëngbe cucuatšinë yochjátsayentsbashejuana.

### Jesusbe catsátanga chábeñe ndoñe montsanošbuaché

**7** <sup>1</sup> Chë soyënguentśana, Jesús Galilea luarëjana yojánana. Chë tempo, judiënga imojtsanjuabnaye ntśamo jamëse cha jóbama. Chíyeca, Jesús ndoñe yontseboše Judeoye jama. <sup>2</sup> Chora, judiëngbe canye bëts fiesta semana yojtsobeco. Quem fiestënguëntscuana, chë judiënga imojanamana tambënguine jtsiyenana. <sup>3</sup> As chora Jesusbe catsátanga tmojanayana: —Muentše ndoñe catjoquéda; Judeoye motsa, choca condbomna ústonënga, ntśamo consamcá chócñaca chaminýama. <sup>4</sup> Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca consamëсна, motsa y nyëtscangbe delante chca cochjama ca —chënga tmojanayana.

<sup>5</sup> Er ni mo cach Jesusbe catsátanga chábeñe ndoñe montsanošbuaché. Chíyeca chënga chca tmojanayana.

<sup>6</sup> Chora Jesús tojanéjua: —Atšbe ora cabá ndoñe quentóshjango, pero tšëngaftangbiama mocna órnaca tśabá endëtsomñe. <sup>7</sup> Chë nye quem luarama enójuabnaye entśanga ndoñe quemátobena tšëngaftanga jtsébuayënjana, pero átšbioyna aíñe, er atše puerte tśabá sentsinýanýná ntśamo chënga imojtsamcá ndoñe tśabá yontsemnama. <sup>8</sup> Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.



<sup>9</sup> Jesús chë soyënga tojanéyana y cach Galileoca tojtsanoquedañe.

### Chë tambënguine jtsiyenama fiesta

<sup>10</sup> Chabe catšátanga chë fiestoye tmojána chentšana, Jesúsna tojána, masque ndoñe entšángbeñe, sinó mo iytëcana cuenta. <sup>11</sup> Chë fiestocna, judiënga Jesús imojtsenguaye y imojtsichamo: —¿Ndayentšë chë boyabása yojtsemna ca?

<sup>12</sup> Entšángbeñe ba soyënga chabiama iytëcana imojtsichamo. Inyënga chabiama imojtsichamo: “Cha tšabia endmëna ca”; pero ínnyënga: “Cha entšanga entsaíngña ca”.

<sup>13</sup> Pero ndocná Jesusbiana beca añémoca yontsoyebuambná, chë judiëngbe amëndayëngbiana imojtsauatja causa.

<sup>14</sup> Chë fiesta semana tséntsane yojtsó ora, Jesús Bëngbe Bëtsabe bëts yebnentšë tojánamashëngo, y tojanontšë jabuátambana. <sup>15</sup> Chentšë chë judiënga, ntšamo Jesús tojanabuatambacá tmojanuena ora, ojnánänënga imojtsichamo: —Bëtscá ntjuatsjinýcá, ¿ntšamo nyetšá nantsetátšëmbo ca?

<sup>16</sup> As Jesús tojanéjua: —Atšbe buatëmbayana ndoñe nyë átšbentšana quenatóbocana, ndayá chë šonjichmó chábentšana. <sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábiocana yóbocanama o nyë átšbentšana.

<sup>18</sup> Nda nyë cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

<sup>19</sup> “Ndegombre, Moisés tšëngaftangbiana ley tojéftsanaboshjona. Pero masque chca, tšëngaftanguentšá ndocná quenátama ntšamo cha tojéftsanmandacá. Y ¿ndáyeca šmojtseboše atše jóbama ca?” —Jesús tojanatjá.

<sup>20</sup> Chora entšanga tmojanjúá: —iNdegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojanéyana: —Nyetsca tšëngaftanga ojnánänënga atše šmontsonýá, atše canyë ochnayté canyë entšá tijashnama. <sup>22</sup> Pero, Moisés tcmonjanamëndá bášetema base bobachtema chë más delicadentšë jatëtšana, chaotsinýnama (ndoñe nyë Moisésbeyeca chca, sinó Moisesbiana más tempsca bëts taitanga chca jamama imojanamánayeca); y tšëngaftanga canyë bášetema base bobachtema chë más delicadentšë jatëtšana, masque chë te canyë ochnayté totsomñëse. <sup>23</sup> Y mora, ntšamo Moisés tcmojéftsanamëndacá ndoñe cachcá ntjonýayama, canyë bášetema chca jatëtšana masque ochnayté; as, ¿ndáyeca atše šmojtsayaná, atše ochnayté canyë entšabe nyets cuerpo tijashnama? <sup>24</sup> Nyë batsá jinýëse, ínnyëngbiana ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bëtsemnama natsana lempe tšabá jshëtsetatšëmbëse, šmochjayana tšabá o ndoñe tšabá tmonjama ca —Jesús tojánayana.

### Jesús tojánayana ndémocana cha tojánabama

<sup>25</sup> Chora báseftanga Jerusalenoca oyenënga tmojanontšë ichámuana: —¿Mua ndoñe yontsemna chë jóbama montsenguá cha ca? <sup>26</sup> Masque ba

entsangbe delante entsoyebuambná,  
ndocná chábioye ndocá ntjauyanana.  
¿Nderado mo chë bëngbe amëndayënga  
imojtsejuabná cha chë Cristo, chë  
Uámana Uabuayaná yojtsemna ca?  
<sup>27</sup>Pero bënga mondétatšëmbo ndëmocá  
quem boyabása yomnana; y chë cuenta,  
chë Cristo chaojabo ora, ndocná  
queochátstatšëmbo ndëmocana cha  
yochjabama ca —chënga imojtsichamo.

<sup>28</sup>Chca tojanuena ora, Bëngbe  
Bëtsabe bëts yebnentše Jesús  
yojtsabuátambayëntscuana, cha  
jabuache tojánayana: —iTsëngaftanga  
šmojtsejuabná atše ndegombre  
šmabuatma, y ndëmocana tijabama  
šmojtsetátšëmbo ca! Pero nÿe atšbe  
cuenta, ndoñe chiyátabo, ndayá  
canÿa šojichmóyeca, nda ntšamo  
ndegombre yomncá nÿetsca soyëngama  
endbëtsoyebuambnaye; y tsëngaftanga  
cha ndoñe quešmatábuatma. <sup>29</sup>Atšna  
aíñe cha sënduábuatma, er atše  
chábentšana sënjabo y cha quem  
luaroye šojichmó ca —Jesús  
tojánayana.

<sup>30</sup>Jesús chca tojánayana ora,  
chënga tojánbošena cha jishachama,  
pero ndocná tbonjánishache, er  
cha chca japásama cabá ndoñe ora  
tonjanóshjango. <sup>31</sup>Banga chentše  
Jesúsbeñe imojtsanošbuaché  
y tmojánayana: “Chë Uámana  
Uabuayaná chaojabo ora, ¿quem  
boyabásabiamá más tšabe soyënga  
yochjama ca?”

#### Chë fariseunga tmojánbošena Jesús jishachama

<sup>32</sup>Chë fariseunga tmojántatšëmbona  
ntšamo entšanga Jesusbiamá iytëcana  
imojtsencuëntaye. As, chënga y  
chë bachnangbe amëndayënga  
tmojanichamó báseftanga Bëngbe  
Bëtsabe bëts yebnoxa josticiënga, Jesús

chamuishachama. <sup>33</sup>Chora Jesús  
tojánayana: “Muentšana nÿe baseftayté  
tsëngaftangaftaca chanjëftsemna;  
chentšana, chë šojichmó chábioye  
chanjëtpadésa. <sup>34</sup>Chora tsëngaftanga  
atše šmochántseguaye, pero  
ndoñe quešmochátinÿena; y  
ndayentše chántsemnoca ndoñe  
quešmochatobenaye jashjanguama ca.”

<sup>35</sup>Chora chë judiënga tmojanontšë  
entjanayana: “¿Ndëmoye quem  
boyabása yochjá, y bënga ndoñe  
mochanjobenaye jinÿenama ca?  
¿Inÿe fshantsëngoye, judiënga  
tmojuashanëngbioye yochjá, y choca  
chë ndoñe judiënga yochjabuatambá?  
<sup>36</sup>¿Ntšamo yojtsentšáyana cha  
šonjauyancá, chë ‘tsëngaftanga  
atše šmochántseguaye, pero  
ndoñe quešmochátinÿena; y  
ndayentše chántsemnoca ndoñe  
quešmochatobenaye jashjanguama ca?’”  
—chënga imojtsichamo.

#### Béjayënga vida bomniye

<sup>37</sup>Chë fiesta jopochócama te  
yojamna chë más uámana te. Chë  
te, Jesús entšángbentše tojantsá  
y jabuache tojánayana: “iNda  
tbojtsajuendá, átšbioye chauabo y  
chaofé! <sup>38</sup>Ntšamo Bëngbe Bëtsabe  
uabemana palabrënguiñe endayancá:  
‘Nda átšbeñe tojtsošbuaché, cha  
echántsemna mo ndabe ainantšana  
vida bomna béjayënga tojtsobocancá.’  
Chca echántsemna átšbeñe  
ošbuáchiyëngbiamá ca” —cha  
tojánayana.

<sup>39</sup>Chë sóyeca, Jesús yojtseboše  
jayanana, chábeñe ošbuáchiyënga chë  
Uámana Espiritu mochjanóyëngacñe  
ca; er chë Uámana Espiritu cabá  
ndoñe tonjánabo, Jesús corente  
bëtsá yojamnama cabá ndoñe  
tmonjaninÿinÿé causa.

**Nyetsca entsanga ndoñe cachcá  
Jesusbiana imontsejuabnaye**

<sup>40</sup> Chca tmojanuena ora, ínÿenga imojtsichamo: —Quem boyabása ndegombre chë Bëngbe Bëtsabe juabna oyeuambnayá entsemna, chë Cristbe natsana jabamá ca.

<sup>41</sup> Inÿenga imojtsichamo:

—Ndegombre cha chë Cristo, chë Uámana Uabuayaná entsemna ca.

Pero ínÿengna: —Ndoñe, er chë Cristo Galileocana ndoñe queochátabo.

<sup>42</sup> Ndegombre, Bëngbe Bëtsabe uabemana palabrënguiñe endayana, chë Cristna rey Davidbentsana entsá canmëna, y Belenocana caochjabo ca, cach pueblcana ndayentsá David inamna ca —chënga imojtsichamo.

<sup>43</sup> Y chca, ínÿengna Jesusbe pavor imojtsemna, y ínÿengna chabe contra.

<sup>44</sup> Inÿenga imojtseboše Jesús jishachama, pero ndocná tbonjánishache.

**Chë amëndayënga Jesúsbeñe  
ndoñe montsanošbuaché**

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashajna ora, tmojanatjá: —¿Ndáyeca ndoñe Jesús šmonjuánatse ca?

<sup>46</sup> Chora chë josticiënga tmojanéjua: —Ndocná quenatoyebuambná ntšamo chë boyabása tonjoyebuambacá ca.

<sup>47</sup> Chora chë fariseunga tmojanéyana: —¿Tšëngaftángnaca šmojalesenciá cha chacmaingñema ca? <sup>48</sup> ¿Nderado bëngbe amëndayënguentšá o bënga fariseunguentšá nÿe mo canÿa chábeñe tayojtsošbuaché? <sup>49</sup> Pero quem entsanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

<sup>50</sup> Chora Nicodemo, canÿa fariseunguentšá, chë Jesúsëftaca jencuéntama ibeta tojána cha, tojánayana: <sup>51</sup> —Ntšamo bëngbe leyiñe endayancá, bënga ndoñe quemuátobena jayanana canÿe entsá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

<sup>52</sup> Chora chënga Nicodemo tmojanjúa: —¿Acnaca chábeñe cojtsošbuaché y mo canÿe Galileoca entsacá cojtsejuabná ca? Bëngbe Bëtsabe uabemana palabrënguiñe cochjuatsjinÿe, y cochanjinÿe ni canÿa Bëngbe Bëtsabe juabna oyeuambnayá Galileocana yochjabo ca.

**Chë shema boyábioye  
ínÿaftaca ingñayá**

<sup>53</sup> Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatónënga.

**8** <sup>1</sup> Pero Jesusna canÿe tjoye, Olivos ca uabáinoye tojtsonoñe. <sup>2</sup> Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nyetsca entsanga tmojanobeconá jouenama, y Jesús tojanótbema y tojanontsé jabuátambama.

<sup>3</sup> Chorna, báseftanga ley abuátambayënga y fariseunga tmojtánashajna, y canÿe shembása tmojanëshjango. Chana tmojáninÿena chabe boyábioye ínÿaftaca ibnetsoíngñañentscuana; nyetscangbe tsëntsaca tmojanatsá, <sup>4</sup> y Jesús tmojaninÿana: —Buatëmbayá, quemuá fsënjinÿena chabe boyábioye ínÿaftaca bondëtsoíngñañentscuana.

<sup>5</sup> Leyiñe Moisés šonjanamëndá mëntšá uamana shembásengna ndëtšbëngaca jtsëbáyama. ¿Aca ntšamo catjayana ca?

<sup>6</sup> Jesús chca tmojaninÿana ana jisháchichiyama, chca chënga

jtseboamna ndáyeca chabe contra jayanana. Pero Jesús nye fshantsoye yojotsejbéna y yojóntša ntšabuáfjaca fshantsiñe juabemama. <sup>7</sup>Chënga nye imojtsetjanaye causa, Jesús tojantsbaná y tojanéyana: —Nda tsëngaftanguentšá tondaye bacna soyënga tondboiná, chaobojatšé ndëtšbeca jatëchënjama ca.

<sup>8</sup>Chentšana Jesús cachiñe fshantsoye yojtotsejbéna, y yojtëtóntša fshantsiñe jtëtabemama. <sup>9</sup>Chca tmojanuena ora, entsanga tmojanontšé canýanya chentšana jésebocanana; natsana chë más bëtsanánënga y chë inýengna ústonoye. Canýa Jesús tonjanoquedá y chë shembásanaca. <sup>10</sup>As, Jesús tojtantsá y tbojantjá: —¿Shembása, ndayentšé chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

<sup>11</sup>Ndoñe, Taita, ndocná ca —chë shembása tbojanjúá.

Chora Jesús tbojaniyana: —Atšé cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

**Jesús yomna quem luarentša entsangbe juabna binýnayá**

<sup>12</sup>Jesús cachiñe Bëngbe Bëtsabe bëts yebnentšé yojsabuátambaye, y entsanga mëntšá tojanéyana: —Atšé sëndbínýna quem luare entsangbe juabnënga. Nda atšé chašojtséstona, cha echantsiyena atšé chë binýnayáftaca; y ndoñe mo ibetiñcá queochátaye, y chca, tsabe vida echántseboamna ca.

<sup>13</sup>Chora chë fariseunga Jesús tmojaniyana: —Aca nye cach acbiama chca contsoyebuambná; chcana, chë ntšamo contsichamcá tondaye quenatámama ca.

<sup>14</sup>As chora Jesús tojanéjúa: —Ntšamo cach atšbiama sentsichamcá aíñe

entsámama, masque nye atšé stsichamo ntšamo atšbiama ndegombre yomncá. Er atšé sëndétatšëmbo ndémocana tijabo y ndémoye tstsá. Pero tsëngaftanga ndoñe chca quešmátstatšëmbo. <sup>15</sup>Tšëngaftanga šmondbëtsichamo inýengbiama tsabá o ndoñe tsabá tmontsamama, chca, nye ntšamo entsanga mondbetsejuabnaycá. Pero atšna ndocnabiama chca quetsátichamo. <sup>16</sup>Atšé ndoñe nye canýa quetsátsmëna inýabiama jayanama tsabá o ndoñe tsabá tontsamama; ndayá atšbe Taitá, chë šonjichmó cha, átšeftaca chca jayanana. Chýyeca, atšé inýabiama tsabá o ndoñe tsabá tonjama ca stsichamo ora, ntšamo stsichamcá ndegombre jtsemnana. <sup>17</sup>Tšëngaftangbe leyinë enduábemana, uta entsata ndayámnaca cachcá tbojayanëse, ntšamo chata tbojayanjá puerte jtsámanana ca. <sup>18</sup>Y morna, atšé sentsichamo chë ntšamo cach atšbiama ndegombre yomncá, y atšbe Taitá, chë šonjichmó chánaca entsichamo ntšamo atšbiama ndegombre yomncá ca —Jesús tojánayana.

<sup>19</sup>Chora chënga tmojantjá: —¿Ndayentšé acbe Taitá yojtsemna ca?

Y Jesús tojanéjúa: —Tšëngaftanga ndoñe quešmatábuatma ni atšé ni atšbe Taitá. Atšé šmojtsábuatmëсна, atšbe Taitánaca šmattsábuatma ca.

<sup>20</sup>Bëngbe Bëtsabe bëts yebnoca, chë crocénana jacjayama luarentšé yojsabuátambaye ora, Jesús chca tojánayana. Pero masque cha chentšé yojtsemna, ndocná tbonjánishache, er chca japásama cabá ndoñe ora tonjanóshjango.

**“Chë chanjá luaroye, tsëngaftanga ndoñe quešmatobena jama”**

<sup>21</sup>Chora Jesús yojtëtóntša oyebuambnayana: —Atšé chantá, y chora tsëngaftanga atšé šmochántseguaye. Masque chca,

šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmátobena jama ca —Jesús tojánayana.

<sup>22</sup> Chora chë judiënga tmojanontšë enatsëtsnayana: —¿Mo nderado yojtsejuabná jtšenóitanama, y chíyeca yojtsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanéyana:

—Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe. <sup>24</sup> Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnama ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatšë orscana chama tcbonjáuyana.

<sup>26</sup> Atše ba soyënga séntsebomna tšëngaftangbiama jayanama, tšëngaftangbe contra jayanama; pero chë šonjichmó cha nÿetsca soyëngama ndegombre endbëtsichamo, y atšna ntšamo chábensana tijouencá, cachcá quem luare oyenënga séntsëtsësná ca —cha tojanéyana.

<sup>27</sup> Pero chënga ndoñe tonjanësertá Jesús cachabe Taitabiama chca tojanéyanama. <sup>28</sup> As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bëtsemnama. Cachcá, tšëngaftanga šmochántsetatšëmbo, nÿe cach atšbe juábnaca atše

tondaye jamama sëndobenama. Nÿe ndayá atšbe Taitá šojabuätëmbacá atše sëndoyebuambná. <sup>29</sup> Y chë šonjichmó cha ndoñe nÿe canÿa quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtsemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

**Bëngbe Bëtsabe básenga  
y chë nÿe bacna soye  
jtsamama vida bomnënga**

<sup>31</sup> Chora Jesús, chë chábeñe imojtsošbuaché judiënga tojanéyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna. <sup>32</sup> Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

<sup>33</sup> Chora chënga tmojanjúá: —Bëngna Abrahábentšana entšanga fsëndmëna, y ndocná ndocna te chešnáisishëche nÿe chabiamá nÿets tempo jtsošervënama. As, čndáyeca šcojtsëtsësná bënga atsebácanënga fchtsemna ca?

<sup>34</sup> Chora Jesús tojanéyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana. <sup>35</sup> Canÿe ošervená ndoñe nÿets tempo chë pamillentsá ntjëftsemnana, ntšamo canÿe uaqiñá sempre chë pamillentsá jesomñancá. <sup>36</sup> Y chca, Bëngbe Bëtsabe Uaqiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. <sup>37</sup> Atše sëndëtatšëmbo tšëngaftangna Abrahábentšana entšanga

šmomnana; pero tšëngaftanga šmontseboše atše jóbama, ntšamo atše cbontsëtsësnacá ainaniñe jójëngacñama ndoñe quešmátsboše causa. <sup>38</sup> Ntšamo atšbe Taitábíoca tijinjá, cach soyëngama atše sëntsoyebuambná. Tšëngaftángnaca, cachcá ntšamo tšëngaftangbe taitábentšana šmojouencá šmontsama ca —tojanéyana.

<sup>39</sup> Chora chënga tmojanjúá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojëftsema y cachcá tšëngaftanga šmattsama.

<sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá. <sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaníyana: —Bënga nÿe enaquécana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

<sup>42</sup> Chora Jesús tojanéyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábíocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá šonjichmó. <sup>43</sup> ¿Ndáyeca tšëngaftanga ndoñe šmontsobena atšbe palabrenga josértana? Co, ntšamo cbontsëtsësnacá joyeunayama ndoñe quešmátsboše causa chca. <sup>44</sup> Tšëngaftangbe taitá Satanás endmëna. Tšëngaftangna

chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanásbe juabnoqa, ndocna tšabe soyënga ni ndegombre soyënga ntšebínÿnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábentšana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnana jtsichámuana. <sup>45</sup> Atšna sempre ntšamo ndegombre yomncá cbondutsëtsná; chíyeca, chë séntsichamo soyiñe tšëngaftanga ndoñe quešmatošbuaché. <sup>46</sup> ¿Nda tšëngaftanguentšá nanjobenaye jinÿanÿiyana atše ndaye bacna soye tijamama? Y atše, nÿe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché? <sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

#### **Cristo Abrahambiana más natsana ya yojtsemna**

<sup>48</sup> Chora chë judiënga tmojaníyana: —Ajá, bënga co ndegombre ftsichamo, aca nÿe samaritano y bacna bayëjbe juabna uambayá comna ca ftsichamo ora ca.

<sup>49</sup> Y Jesús tojanéjua: —Atše ni mo canÿe bayëjbe juabna quetsatambá. Ntšamo atše séntsamcá, endmëna jinÿanÿiyama atšbe Taitá Bëngbe Bëtsá uamaná yomnana; pero tšëngaftangna, atše chca tsmënama ndoñe quešmatinÿinÿná. <sup>50</sup> Atše

ndoñe quetsátsboše ínÿenga atše más uamaná chašmobemama. Pero inÿa endmëna; cha aíñe endboše atše bëtsá bëtsemnama chaminÿanÿema. Y chánaca endmëna chë ínÿengbiamama tšabá o ndoñe tšabá tmontsamama endbetsichamuá. <sup>51</sup> Ndegombre šcuayana, nda ntšamo atše sentsichamcá tojouena y chca tojama, ndocna te queochatóbana ca —Jesús tojánayana.

<sup>52</sup> Chora chë judiënga tmojanianya: —Mora cocayé fséntsetatšëmbo aca ndegombre bacna bayëjbe juabna uambayá comnana. Abraham tojanóbana, y cachcá, nÿetscanga Bëngbe Bëtsabe juabna oyebuambnayëgnaca. ¿Y mora aca cochjátichamo, “Nda ntšamo atše sentsichamcá tojouena y chca tojama, cha ndocna te queochatóbana ca”? <sup>53</sup> ¿O aca, bëngbe bëts taitá Abrahamiamama más bëtsá comna? Cha tojanóbana, y Bëngbe Bëtsabe juabna oyebuambnayëgnaca. ¿Ndase cojatsmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanéjua: —Atše nÿe cach atše más bëtsá stsenobiamnasna, chë soye tondaye nantsámama. Pero chë más bëtsá šojtsebiamná cha, atšbe Taitá endmëna, cach ndabiamama tšëngaftanga šmondbëtsichamo tšëngaftangbe Bëtsá canmëna ca. <sup>55</sup> Pero tšëngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsichámëse, átšnaca cach tšëngaftangcá canÿe bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbëtsama. <sup>56</sup> Tšëngaftangbe uámana bëts taitá Abraham, chë atše jabama te jinÿama yojtsejuabnaye ora,

puerte oyejuayá yojtsemna. Y pronto tojëftsaninÿe, y puerte tojanoyejuá ca —Jesús tojánayana.

<sup>57</sup> Chora chë judiënga tmojanianya: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsinÿe ca?

<sup>58</sup> Chora Jesús tojanéjua: —Ndegombre cbéyana, Abraham cabá ndoñe ainá quenjatsmëna ora, atše ya sënjëtsemna ca.

<sup>59</sup> Jesús chca tojanéjua ora, chënga ndëtsbenga tmojanájaca cha jtsatëchénganjama. Pero Jesusna oitanánana, Bëngbe Bëtsabe bëts yebnentsana tojésanbocna.

**Jesús tojanma, canÿe boyabása jtaná onÿnaná chabuabínÿnama**

**9** <sup>1</sup> Canÿe luarëjana yojtsachnëjuana ora, Jesús canÿe boyabásabioye tbojáninÿe. Chë boyabásana jtaná inónÿna. <sup>2</sup> Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónÿna? ¿Camuá bacna soyënga tojamama, o chabe bëtsëtsangbe bacna soyënga causa ca?

<sup>3</sup> Chora Jesús tojanéjua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entšanga jinÿanÿiyama ntšamo Bëngbe Bëtsá yobencá. <sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. <sup>5</sup> Quem luariñe chjëftsemnëntscuana, atše quem luare entšangbe juabnënga binÿnayá chanjëftsemna ca —tojanéyana.

<sup>6</sup> Chca tojánayanentsana, Jesús fshantsiñe tojanbuashëtjo, y chë yebuáyeca batsá ngüiiche

tojánbema, y chë jtaná chë ngüíchecha tbojanbuchanëtjo. <sup>7</sup>Chora chë jtaná tbojaniana: —Motsa y metsobúchjabebiyé, chë binche uafjajónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiyé, y yebnoye tojtaná ora, ya ibojsabinýna. <sup>8</sup>Chë juachañe oyenënga y chë jtaná tempo lemošna otjanañana tmojáninýënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

<sup>9</sup>Inýenga imojtsichamo: —Cha entsemna ca.

Y ínýengna: —Cha ndoñe quenátsmëna, pero chacá entsábona ca.

Y cach shnaná yojsichamo: —Atše cha sëndmëna ca.

<sup>10</sup>As chë entsànga tmojantjá: —¿Ntsámo chca mora cmojsabinýna ca?

<sup>11</sup>Y cha tojanéjua: —Chë boyabása, Jesús ca uabainá, ngüíche yebuáyeca tonjábema, šonjabuchanëtjo y šonjauyana: “Motsa y Siloé uafjajónayiñe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinýna ca.

<sup>12</sup>Chora chënga tmojantjá: —¿Ndayentše cha yojssemna ca?

Y chana: —Atše ndoñe quetsátstátšëmbo ca —tojanéjua.

### Chë jtana shnanábioye fariseunga imojtsetjanaye

<sup>13</sup>Chora chë entsànga, chë jtaná inamná fariseúngbioye tmojanánatse.

<sup>14</sup>Chë Jesús batsá yebuáyeca ngüíche tojánbema, y chë jtaná tojanma te, canýe ochnayté inamna. <sup>15</sup>As chë

fariseunga chë boyabása tmojantjá: —¿Ntsámoyeca mora cmojsabinýna ca?

Chora cha tojanéjua: —Cha ngüíche yebuáyeca tonjábema y šonjabuchanëtjo. Sënjetsobúchjabebiyé, y cachora šonjuabinýna ca.

<sup>16</sup>As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inýenga imojtsichamo: —Cha canýe bacna soyënga amá tojtsemnëse, ¿ntsámo nantsobena canýe bëts soye Bëngbe Bëtsabe obenánaca jamama ca?

Y chca, ínýenga Jesusbe pavor imojtsemna, y ínýengna chabe contra. <sup>17</sup>Chama chënga cachiñe chë jtaná inamná tmojtétantjá: —Er aca mora chacmotsabinýnama cha tojamëse, ¿chabiama ntsámo catjayana ca?

Chora cha tojanéjua: —Chana canýa Bëngbe Bëtsabe juabna oyebuambnayá entsemna ca.

<sup>18</sup>Pero chë judiënga ndoñe montsanošbuaché, cha chë jtaná inamnana y chora ibojsabinýnama. As chënga, ínýenga tmojanichamó chë boyabásabe bëtsétsata jobiatšama.

<sup>19</sup>Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaqiñá yomna ca? ¿Ndegombre tašojsichamo cha jtaná inonýnama? Chcase, ¿ntsámo mora cha ibojsabinýna ca?

<sup>20</sup>Chora chë bëtsétsata tmojanéjua: —Aíñe fsëndétatšëmbo cha bëndatbe uaqiñá endmënama y jtaná tonjanonýnama. <sup>21</sup>Pero ndoñe queftsátstátšëmbo ntsámoyeca mora chca ibojsabinýnama, ni bëndatbe uaqiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena



tšëngaftanga razón jatšatayama ca  
—chata tbojánayana.

<sup>22</sup>Tempo, chë judiënga  
imojenóyeunaye, chëngbe enefjuana  
yebnënguentšana jtëbuacanana  
chë Jesús ndegombre chë Uámana  
Uabuayaná, chë Cristo yojamna ca  
tmojayanënga. Chë bëtsëtsatna chama  
íbojtsauatja; <sup>23</sup>chíyeca tmojanéyana:  
“Cha ya bëtsá entsemna. Cachá  
motjanga ca”.

<sup>24</sup>As cachiñe chë judiënga chë jtaná  
inamná tmojanchembo y tmojanianya:  
—Bëngbe Bëtsabe delante cach  
acbiama ndegombre mobuambá. Bënga  
fsëndétatsëmbo chë boyabása canye  
bacna soyënga amá yomnama ca.

<sup>25</sup>Chora cha tojanéjua: —Cha  
canye bacna soyënga amá o  
ndoñe tondmënama, atše ndoñe  
quetsátstatsëmbo. Atše nye mëntšá  
sëntsetatsëmbo: Atše jtaná sënjanmëna,  
pero mora šontsabinýna ca.

<sup>26</sup>Chora chënga cachiñe tmojatantjá:  
—¿Ntšamo tcmënjama? ¿Ntšamo cha  
tënjama chacmotsabinýnama ca?

<sup>27</sup>Y cha tojanéjua: —Ya tcbonjáuyana  
y ndoñe chešmatoyeuná. ¿Ndáyeca  
cachiñe šmojtseboše jatuenama?  
¿Tšëngaftángnaca šmojtseboše chabe  
ústonënga jtsemnama ca?

<sup>28</sup>Chora chënga cha  
tmojtsanóyenguango y tmojanianya:  
—Acna canye chabe ustoná cojtsemna,  
pero bënga ndoñe; bëngna Moisesbe  
ústonënga fsëndmëna. <sup>29</sup>Bënga  
fsëndétatsëmbo, Bëngbe Bëtsá  
Moisésbioye tbojanatsëtsama,  
pero chë boyabásabiama ndoñe  
queftsátstatsëmbo ni mo ndémocana  
cha tojabama ca —chënga  
imojtsichamo.

<sup>30</sup>Chora chë boyabása tojanéjua:  
—¿Ntšamo chca nántsemna!  
Tšëngaftanga ndoñe šmontsetátšëmbo

ndémocana cha tojabama; pero  
chašubabinýnama cha tonjama.

<sup>31</sup>Bënga tšabá mondétatsëmbo, bacna  
soyënga amënga Bëngbe Bëtsá ndoñe  
queondbátayaunanama. Chana, nye  
chábioye adorayá y ntšamo cha  
tojtsebošcá amábioye joyeunayana.

<sup>32</sup>Quem luare jobojátšama orscana  
ndocna te quenaisótatsëmbo canye  
jtaná onýnanabiama ndánaca cha  
chabotsabinýnama tojéftsemama.

<sup>33</sup>Quem boyabása, Bëngbe Bëtsabe  
ichmoná chabe soyënga jamama ndoñe  
tontsemnëse, tondaye nantsobena  
jamama ca —chë entsá tojanayana.

<sup>34</sup>As chë fariseunga tmojanianya:  
—¿Ndayá! Aca tcojanonýná orscana,  
corente bacna soyënga amá  
tcomnëse, ¿ntšamo mora bënga  
šcochjátabuatambaye ca?

Y chora chë judiëngbe enefjuana  
yebnentsana cha tmojtanábocna.

#### **Chë Bëngbe Bëtsabe soyëngama mo jtanëngcá imomnënga**

<sup>35</sup>Chë jtaná tmojtanábocnama  
Jesús tojanuena ora, tojana cha  
janguanguama. Tbojaninýena  
ora tbojanianya: —¿Aca Bëngbe  
Bëtsá Entšá tbojanbemábeñe  
quecojtsosbuaché ca?

<sup>36</sup>Y cha tbojanjuá: —¿Taita, nda  
cha yojtsemna, as atše chábeñe  
jtsošbuáchiyama ca?

<sup>37</sup>As Jesús tbojanianya: —Aca  
ya tconjinýe; chë ácaftaca  
entsoyebuambná cha entsemna ca.

<sup>38</sup>Chora, chë boyabása Jesús bentšë  
tojanoshamentšë jëtschuayama y  
tbojanianya: —Atšbe Utabná, añe  
sëntsošbuaché ca.

<sup>39</sup>Chora Jesús chë entsanga  
tojanéyana: —Atše quem luaroye tijabo  
ndayá entsanga jinýanýiyama ntšamo  
cachënga Bëngbe Bëtsabe soyëngama

imojuabnama. Chê Bëngbe Bëtsabe soyëngama ndosertánënga, chë soyënga atšë chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínýanýiye, nýe batsá Bëngbe Bëtsabe soyëngama imotatšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

<sup>40</sup> Básefta fariseunga Jesúseftaca imojtsemnënga chca tmojanuena ora, cha tmojaniana: —Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanéjua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsésertana ca šmojobuabase, ndayá šmojtsamcá Bëngbe Bëtsá mo bacna soyënga cuenta ndoñe queochátónýaye. Pero tšëngaftanga corente Bëngbe Bëtsabe soyëngama cmojtsésertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanéyana.

**Chë oveshënga abujénýa  
y chabe oveshënga**

**10** <sup>1</sup>As Jesús tojanéyana: “Ndegombre šcuayana: Nda chë oveshëngbe luaroye bësháshajana ndoñe tonjámashëngo, pero aíñe inýajana tojtsamáshëngo, chana canýe atbëbaná y abacayá jtsemnana. <sup>2</sup>Pero chë bësháshajana tojamashënguana, chë oveshënga anýená jtsemnana. <sup>3</sup>Chë bëshásha ebtafjuaná, chë bëshásha jebëtafjuana, y chë oveshënga abujénýa ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe

abujénýa yojtsachembuanama; y chë luarentšana cha jubuacnana. <sup>4</sup>Nýetsca oveshënga tmojábcana ora, chë abujénýa chënga jtsebënatsanana, y chë oveshënga jtséstonana, er chabe oyebuambnayana chënga joyátëmbana.

<sup>5</sup>Pero chë tmonduabuatmábioyna chë oveshënga ndoñe ntjuastana; nýe chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojanayana.

<sup>6</sup>Jesús entšanga chca tonjanacuntá, pero chënga ndoñe ntjosértana ntšamo yojtsentšayancá.

**Jesús, chë oveshënga  
tšabe abujénýa**

<sup>7</sup>As Jesús cachiñe tojanéyana: “Ndegombre cbéyana: Atšë sëndmëna chë bëshásha oveshënga mondbétsamashjuanëjana.

<sup>8</sup>Nýetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. <sup>9</sup>Atšë chë bëshásha sëndmëna. Nda quem bësháshajana tojamashënguá, atsbocaná echántsemna. Canýe oveshá jamashënguana y jabocnana, y shácuaana jónýenana. Cachcá, chë quemëjana tojamashënguá, lempe echanjónýena.

<sup>10</sup>“Chë atbëbaná jabana nýe jatbëbama, jóbama y lempe jtsepochócama; pero atšna, entšanga vida chamotsebomnana y átšeftaca bëtscá tšabe vida chamotsebomnana tijabo.

<sup>11</sup>“Atšë sëndmëna chë oveshënga tšabe abujénýa. Chë oveshënga tšabe abujénýa sempre jtseprontánana chëngbiama jóbanama, chabe oveshënga ababuánýeshanayeca.

<sup>12</sup> Pero nda nÿe crocenánama totrabáya y chë oveshënga ndoñe chábenga tmontsemna, cha nderado tojinÿe canÿe tjañe queşe chë oveshëngbioye tojtobécocnana, cachora nÿe cachcá jesénÿayana y jtsachana. Chë tjañe queşe oveshënga jtsacamiyana, y chë oveshëngna nÿe cátoye jtsachetana. <sup>13</sup> Cha jtsemnana nÿe crocenánama trabajayá; chabiamana nÿe chë uacanánana más uámana soye jtsemnana, y chë oveshëngbiama tondayana ntsentšamnana; chíyeca cha jtsachana.

<sup>14</sup> “Atşe sëndmëna chë oveshënga tšabe abujénÿa. Atşe chënga sëndëubuatma, y chëngnaca atşe šmondüubuatma. <sup>15</sup> Cachcá, chë Taitá Bëngbe Bëtsá atşe šonduábuatma y atşe chábioye. Atşe sempre sëndétseprontana jóbana, atšbe oveshënga sëndababuanÿeshánayeca. <sup>16</sup> Atşe inÿe oveshënga sëndábamna, pero chënga ndoñe quem luariñe oveshënga quemátmëna. Atşe šontsemna chëngnaca moye junatsana. Chëngnaca atšbe oyebuambnayana mochanjouena, y muentsa oveshëngaftaca cánÿiñe mochántsemna, y atšna nÿetsca chë oveshëngbiama chë abujénÿa chántsemna.

<sup>17</sup> “Atşe sempre sëndétseprontana jóbana, chora jtayenama. Chíyeca chë Taitá šondbobonshana. <sup>18</sup> Ndocná atšbe vida quešochatsbojuána, pero chënga sëndababuanÿeshánayeca sempre sëndétseprontana jóbana, cach atşe chca sëndbošeyeca. Derecho sëndétsóbmñe chëngbiama jóbana, y chora jtayenama. Chca endmëna ntšamo atšbe Taitá šonjamandacá ca”  
—Jesús tojánayana.

<sup>19</sup> Chë soyënga chë judiënga tmojanuena ora, cachiñe banga

Jesube contra y ínÿengna Jesube pavor imojtsemna. <sup>20</sup> Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ñndáyeca cha mochjátsyeunana ca?

<sup>21</sup> Pero ínÿengna imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canÿe bayëja nantsobena jamama canÿe jtaná chabotsabinÿnana ca?

**Chë judiënga ndoñe  
imontsošbuáchiye Jesús Bëngbe  
Bëtsabe Uaquiñá bétsemnana**

<sup>22</sup> Canÿe uaftena tempo inamna, y Jerusalemntše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama. <sup>23</sup> Jesús Bëngbe Bëtsabe bëts yebnoca yojétsana, canÿe amashjuana otsbojebniñe, Salomonbe Amashjuana ca uabáinentše. <sup>24</sup> Chora, chë judiënga tmojanóbobuashcona, y tmojtanjá: —¿Buetaytentscuana bënga fchjëftsemna acbiama ndegombre soye ntsetatšëmbcá? Aca chë Cristo cojtsemnëse, chama lempe tšabá šmanÿanÿé ca.

<sup>25</sup> As Jesús tojanéjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atşe sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atşe bétsemnana.

<sup>26</sup> Pero tšëngaftanga átšbeñe ndoñe quešmatošbuaché, er tšëngaftanga atşe ndoñe quešmatéstoná, ntšamo chë oveshënga chë tšabe abujénÿa mondbetsëstoncá.

<sup>27</sup> Chë atşe šmondústonënga, atşe šmondbóyeunaye y šmondbëuasto. Atşe chënga sëndëubuatma.

<sup>28</sup> Atše chanjama, quem entsanga chë nyetsca tescama yomna tšabe vida chamotsebomnama; chënga ndocna te pochocánënga quemochátmëna, y ndocná quenátobena átšbentsana chënga jefcana. <sup>29</sup> Atšbe Taitá Bëngbe Bëtsá, chë entsanga atše chašmuastama tojamá, nyetscangbiana más bëtsá endmëna, chíyeca ndocná quenátobena chábensana chënga jefcana. <sup>30</sup> Chë Taitá y atše canya fsëndmëna ca —Jesús tojánayana.

<sup>31</sup> Chora, chë judiënga cachiñe ndëtšbënga tmojanájaca Jesús jtsatëchénganjama. <sup>32</sup> Pero Jesús tojanéyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchénganja ca?

<sup>33</sup> Chora chë judiënga tmojanjúa: —Ni canye quem bëts soyëngama bënga queftsátsboše aca jtsatëchénganjama. Aca Bëngbe Bëtsabiana ndoñe tšabá quecátichamo; mo chábioye cuafjoyenguangcá entsemna. Aca nye canye entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtšbéngaca aca jtsatëchénganjama ca —chënga tmojaniana.

<sup>34</sup> Chora Jesús tojanéyana: —Bëngbe Bëtsabe uabemana palabrénguiñe mëntšá endayana: “Atše sënjayana tšëngaftanga diosënga šmomna ca.” <sup>35</sup> Bëngbe Bëtsá chca tojánayana chë chabe palábraca y cha chamotseservénama tojánamandangiama; ndocná quenátobena jinyaníyana ni mo canye soye Bëngbe Bëtsabe uabemana palabrénguiñe, ndoñe ndegombre soye yomnama. <sup>36</sup> Y atšbiana, Bëngbe Bëtsabiacá uabuayaná y quem luare ichmoná, ¿ntšamo tšëngaftanga

šmojtsovena jayanama, “aca Bëngbe Bëtsabiana ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama?

<sup>37</sup> Ntšamo atšbe Taitá endamcá atše ndoñe séntsamëse, tšëngaftanga átšbeñe ndoñe šmattsošbuáchiye.

<sup>38</sup> Pero, ntšamo atšbe Taitá endamcá atše aíñe stsamëse, masque ndoñe átšbeñe šmontsošbuaché, nye chë Taitabe obenánaca soyënga tijamama šmochtsošbuáchiye. As, canye ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënama ca —Jesús tojanéyana.

<sup>39</sup> Chora chënga cachiñe tmojánbošëna Jesús jishachama, pero cha chëngbentsana tojanotsbocá.

<sup>40</sup> Chentšana, Jesús Jordán bëjaye chenguana tojesaná y choca tojtsanoquedañe. Chentše Juan tempo entsanga yojanëbáyana. <sup>41</sup> Ba entsanga tmojána Jesús jinýama, y mëntšá imojtsichamo: “Ndegombre, masque Juan ni mo canye bëts soye Bëngbe Bëtsabe obenánaca tonjëftsema, lempe ntšamo quem boyabásabiana tonjanoyebuambacá, ndegombre yojamna ca.” <sup>42</sup> Y chentše, ba entsanga Jesúsbeñe imojtsanošbuaché.

### Lázaro tojanóbana

**11** <sup>1</sup> Inamna canye boyabása šocá, Lázaro ca uabainá. Cha inoyena canye pueblo Betania ca uabáinentše, Marta y Maríaftaca, chabe uabénata. <sup>2</sup> Quem María inamna nda Bëngbe Utabná Jesusbe shecutášiñe botamana uanguëtšiye tbojanáshecbuešcja, y chabe stjënashaca tbojtanshecbójó cha. <sup>3</sup> Chë uta uabénatna ínýënga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe

quenátsmëna Lázaro chaóbanama. Pero aíñe entsemna Bëngbe Bëtsabe obenana entsànga jinÿañiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanÿeshana Marta, María y chatbe uaftše Lázaro.

<sup>6</sup> Masque chcasna, Lázaro šocá yojtsemna ca Jesús tmojaniana ora, cabá uta te más cha yojtsemna luarentše tojtsanoquedañe. <sup>7</sup> Chentšana, chabe uatsjëndayënga tojanéyana:

—Judeoye cachiñe cuajna ca.

<sup>8</sup> As chë uatsjëndayënga tmojaniana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanéyana: —Bnétsana uta hora bnëté endmëna. Nda bnëté tojtsana, ndoñe ntjojéstjiana, binÿniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero ibeta tojtsanëse, cha jtjojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atše jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentšana tojanéyana: —Bëngbe amigo Lázaro tojtsomaná, pero atše choye chanjá jetsefšenama ca.

<sup>12</sup> Chora chë uatsjëndayënga tmojanjuá: —Bëngbe Utabná, tojtsomanase yojtsayana chana tsábá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjëndayëngna imojtsejuabnaye Lázaro ndegombre yojtsomáñama.

<sup>14</sup> As Jesús tsábá tojanéyana: —Lázaro

tontsóbana. <sup>15</sup> Atše sëntsoyejuá choca atše ndoñe tsmënama, tsëngaftangbe tsábiamana chaotsemnama; chca, tsëngaftanga más átšbeñe chašmotsošbuáchema. Pero cuajna cha jinÿama ca.

<sup>16</sup> Chora Tomás, chë Gemelo ca uabobainá, chë inÿe uatsjëndayënga tojanéyana: “Bëngnaca cuajna, cháftaca mochjóbana ca.”

**Jesús iuama entsànga  
chámuatayenama y chë  
nÿetsca tescama yomna tsábe  
vida chamotsebomnama**

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. <sup>18</sup> Betania pueblo yojamna Jerusalén béconana, mo unga kilómetroca. <sup>19</sup> Ba judiënga tmojána Marta y María jautsëtsayama y jatjëmbambayama ndoñe tsá ngmënaca chabondëtsemnama, chatbe uaftše tojanóbana causa. <sup>20</sup> Jesús yojtsashjajuanama Marta tojántatšëmbona ora, tojánbocna cha jajëbenguama, pero María cach yebnntše tojanoqueda.

<sup>21</sup> Chora Marta Jesúsbiyoye tbojaniana: —Bëngbe Utabná, aca muentše macmënëse, atše uaftše ndoñe matënjóbana. <sup>22</sup> Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátšetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojaniana: —Aíñe, atše sëndétatšëmbo cha yochtayenama, pero quem luare jopochócama te, nÿetsca obanënga mochtayena ora ca.

<sup>25</sup> As Jesús tbojaniana: —Atše sëndmëna chë entsànga chámuatayenama y chë nÿetsca tescama yomna tsábe vida chamotsebomnama

endamá. Nda átsbeñe tojtsošbuaché, masque chaóbana, echántayena.

<sup>26</sup>Y nda cabá ainá totsomñe y átsbeñe tojtsošbuaché, ndocna te queochatóbana. ¿Ché cbontsatsá soyiñe quecojtsošbuaché ca? —Jesús tbojantjá.

<sup>27</sup>Chora Marta tbojaniyana: —Aíñe, Bèngbe Utabná, atše ácebeñe sèntsošbuaché, aca ché Cristo, ché Bèngbe Bètsabe Uaquiñá y ché quem luaroye jabamá comnama ca.

**Jesús, Lázaro vojtsátbontsana cuevëshentše yojenóbošachna**

<sup>28</sup>Chca tojánayanentšana, Marta tojtaná chabe quenata María jachembuama, y iytecana tbojaniyana: “Buatëmbayá tonjáhshango y entseboše aca jinýama ca.”

<sup>29</sup>María chca tojanuena y cachora tojéftsanbocna y tojána Jesús jinýama. <sup>30</sup>Jesús cabá ndoñe ché puebløye tonjánamashèngø; yojésemna Marta tbojanjébengo luarentše. <sup>31</sup>Ché yebnentše imojtsemna judiènga, María tša ngménaca ndoñe chaondétsemnama tjëmbambnayènga, tmojánbocna María juastama; er ché tojéftsantsbaná y tojéftsanbocna ora, ché judiènga imojtsejuabnaye, Lázaro vojtsátbontsana luaroye María vojtsaye, choca jošachnama ca.

<sup>32</sup>Jesús yojtsemnentše María tojánashjango ora, chábéntše tojanoshamentšé y tbojaniyana: —Bèngbe Utabná, aca muentše macmènese, atšbe uaftše ndoñe matënjóbana ca.

<sup>33</sup>María y cháftaca tmojánashjajna judiènga, nyètscanga imojtšenóbošachiye; y Jesús chca tojáninýe ora, corente tbojancochtsetšena y puerte ngménaca yojtsemna. <sup>34</sup>Chora Jesús tojanatjá: —¿Ndayentše cha šmojuatbontsá ca?

Y chènga tmojanjuá: —Bèngbe Utabná, mabo y cochjinýe ca.

<sup>35</sup>Chora Jesús tojánenobošachna.

<sup>36</sup>As ché judiènga tmojánayana: —iMinýènga, tša ibnabobonshana ca!

<sup>37</sup>Pero inýe judiènga imojtsichamo: —Ché jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

**Lázaro tojtanayena**

<sup>38</sup>Jesús, cachiñe puerte cochtsetšenaná, ché uatbontsánøye tojanobeconá. Ché luarna cuevèshe inamna, y amashjuanentše canýe bèts ndètšbeca vojtsatámena. <sup>39</sup>Chora Jesús tojanéyana: —Ché ndètšbé mojuánanga ca.

Chora Marta, ché obanabe uabena tbojaniyana: —Bèngbe Utabná, mora ya bacá vojtsonguètšé, er ya canta te entsemna cha tontsóbanana ca.

<sup>40</sup>Y Jesús tbojanjuá: —Ndegombre, ya tbonjauyana, aíñe átsbeñe tcojtsošbuáchese, cochjinýe Bèngbe Bètsá puerte obená y bètsá bétsemnama ca.

<sup>41</sup>Chora ché ndètšbé tmojanjuaná; Jesús celøye yojntješiyø y Bèngbe Bètsábioyø tbojaniyana: “Taita, cbatschuá atšbe opresido tcojouenama. <sup>42</sup>Atše sèndétatšëmbo aca sempre šcondbétseyeunanama; atše chca tbonjauyana, muentše montsemna entšangbe tšabiama, chca, aca atše šcojichmoma, chènga chamotsošbuáchema ca.”

<sup>43</sup>Chca tojánayanentšana, jabuache tojánayana: “iLázaro, chentsana matsbocna ca!”

<sup>44</sup>Y cachora ché obaná tojtanbocna, cucuatšènga y shecuatšènga entšéjuaca batsècná, y chabe jubíá base entšéjuaca uamochècjuaná. As Jesús tojanéyana: “Motsejafjoná y jama chaotsobena ca.”

**Chë judiëngbe amëndayënga  
tmojanenoyeuná Jesúsbiöye jóbama**  
(Mt 26.1-5; Mc 14.1-2; Lc 22.1-2)

<sup>45</sup> Chë soyëngama, banga chë judiënguentšana, María jatjëmbambayama tmojánanga, y ntšamo Jesús tojanmcá tmojáninyënga, Jesúsbeñe imojtsošbuaché. <sup>46</sup> Pero inye judiënga fariseúngbiöye tmojána, ntšamo Jesús tojanmama chënga jacúntama. <sup>47</sup> As, chë fariseunga y chë bachnangbe amëndayënga tmojánenefjna inye judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. <sup>48</sup> Nye cachcá chamojonýase, nyetsca entsanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoá, Bëngbe Bëtsabe bëts yebna y bëngbe luare Israel ca —chënga imojtsichamo.

<sup>49</sup> Pero canya chënguentšá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo. <sup>50</sup> Y ndoñe quešmatsjuabná, tšëngaftangbiana más tšabá yojtsemna nye canye boyabása Israeloca entsangbiana chaóbana, y ndoñe nyets bëngbe luare chamotsepochoá ca —cha tojanéyana.

<sup>51</sup> Pero Caifás chë soye nye cachabe juábnaca ndoñe chca tonjánayana. Cha, chë uata chë bachnangbe más uámana amëndayá inamnayeca, Bëngbe Bëtsabe Espiritbe obenánaca tojánayana Jesús ibojamna Israeloca entsangbiana jóbana ca. <sup>52</sup> Y ndoñe nye Israeloca entsangbiana, sinó chë inye luarënguñe Bëngbe Bëtsabe básenga tmojanáshanënga chamuatábama, as chca, nyetscanga

nye canye luarentša entsanga chamotsemnama. <sup>53</sup> Chcasna, cachtescana judiëngbe amëndayënga tmojanenoyeuná Jesús jóbama.

<sup>54</sup> Chíyeca Jesús entsángbeñe, Judea luariñe ya ndoñe yontšana. Chë luarentšana tojéftsanbocna y canye luaroye tojtsanoñe, entsanga ndoyeniñe béconana, canye pueblo Efraín ca uabáinoye. Y chentše chabe uatsjëndayëngaftaca tojtsanoquedañe.

<sup>55</sup> Judiëngbe Bashco fiestama batšá yojtsájamna, y ba entsanga pueblënguentšana Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominýama tšábenga jtsemnama, chë Bashco fiesta cabá ndobuache ora. <sup>56</sup> Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbësna, chaobuambá ca, as Jesús jishachama.

**María, botamana uanguëtšiyë  
Jesúsbeñe tbojanáshecbuešcja**  
(Mt 26.6-13; Mc 14.3-9)

**12** <sup>1</sup> Chnénguana te chë Bashco fiestama yojtsájamna ora, Jesús Betania pueblöye tojtaná. Lázaro, chë Jesús tbojtanayená cha, choca inoyena. <sup>2</sup> Chentšna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúseftaca juasama meséshañe imojtsetbiámanguentše. <sup>3</sup> As María canye jarrëtema tojanaca; chiñe yojanaftsuamna canye botamana uanguëtšiyë, bëtsca uámaniye, ena nárdoca pormániye. Chë uanguëtšiyë,

María, Jesusbe shecuatšenguiñe tbojanáshecbuešcja, y cachabe stjénashaca tbojtanshechojó. Chora, chë yebnentše ena nardiyana yojtsonguëtsiye.

<sup>4</sup> Chora, canya Jesusbe uatsjendayënguentsá, Judas Iscariote, chë Jesús uayayëngbe cucuatsiñe yochjanayentšbashejuaná, tojánayana: <sup>5</sup>—Quem botamana uanguëtsiye unga patse denario crocénana enduámana. ¿Ndáyeca ndoñe šmonjuiye y ndbomnjémënga chë crocénana mašméntsatsatá ca?

<sup>6</sup> Pero Judas chca tojánayana, chë ndbomnjémëngbeñe ntsejuabnacyá, sínó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnëšoye imojanatsuáma crocénantšana cha yojánatbëbana.

<sup>7</sup> As Jesús tbojanjuá: —Cachcá monyá. María méntscoñe chë botamana uanguëtsiye iuabofjájona, cha jobenayama átšbeñe jabuëšcjama, er ndoñe bën y atše šmochanjaitëme. <sup>8</sup> Chë ndbomnjémëngna tsëngaftangbeñe sempre mochanjesomñe, pero atše ndoñe ca —tojánayana.

#### Judiënga tmojanenoyeuná Lázaro jóbama

<sup>9</sup> Ba judiënga tmojántatšëmbona Jesús Betanioca yojtsemnama, y choye tmojána, ndoñe nye Jesús jinýama, sínó Lázarnaca, chë Jesús tbojtanayená cha.

<sup>10</sup> As chë bachnangbe amëndayënga tmojanenoyeuná Lázarnaca jóbama.

<sup>11</sup> Chabe causa, ba judiënga chëngbiyoye cachcá tmojesanénýa y Jesúsbeñe imojtsošbuaché.

**Jesús Jerusalenoye tojánashjango**  
(Mt 21.1-11; Mc 11.1-11; Lc 19.28-40)

<sup>12</sup> Chë yëfsana, mallajta entšanga, Jerusalenoca fiestama

tmojánashjajnënga, tmojántatšëmbona Jesús choye yochjánashjanguama.

<sup>13</sup> As chëngna palma betiye buacuafjënga tmojanatëtsetse, y Jesús jajëbenguama tmojánbocana, y méntšá imojtsáyebuache: “iBëngbe Bëtsá matschuanga! iCorente bendición bomná chë Bëngbe Utabnabe obenánaca tojabá! iCorente bendición bomná chë Israeloquëngbe Rey ca!”

<sup>14</sup> Jesús canye burrotema tbojáninýena y chábeñe tojanenoyé. Ntsamo Bëngbe Bëtsabe uabemana palabrénguiñe iuayancá, cachcá tojanopasá. Chiñe méntšá endayana Jerusalenoca entšangbiama:

<sup>15</sup> Sión bëts puebloca oyenënga, ndoñe matauatjëngana.

Minýënga, tsëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjendayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninýanyé ora, chë uatsjendayënga chama tmojanenoyuabó, lempe ntsamo Bëngbe Bëtsabe uabemana palabrénguiñe iuayancá y cachcá Jesúsëftaca tojanopasama.

<sup>17</sup> Chë Jesúsëftaca imojtsemna entšanga, Lázarbuiyoye uatbontsánoye tbojanchembo ora y chentšana tbojtanayená ora, ntsamo tmojáninýama chora imojtsecuëntaye.

<sup>18</sup> Chíyeca, ba entšanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca. <sup>19</sup> Pero chë fariseunga imojtsenatsëtsnaye: “Tsëngaftanga šmontsonyá bënga tondaye jamama quemuátobenama y más, inýetscanga cha montsëstona ca!”

**Básefta Grecia luaroca entšanga**  
**Jesús tmojáanguango**

<sup>20</sup> Bashco fiestama, chë Bëngbe Bëtsá jadórama Jerusalenoye tmojánangbeñe,



básefta griego entsáangnaca imojtsemna. <sup>21</sup> Chéngna, Felipe chë Galilea luarocá, chë Betsaida pueblócábioye, tmojanobeconá y tmojanimpadá: “Señor, bënga fséntseboše Jesús jinýama ca.”

<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jauenayama. <sup>23</sup> Jesús chata tojanéyana: “Chë Bëngbe Bëtsá Entsá tbojanbemá corente bëtsá yomnama jinýanýiyama te ya toçjbuache. <sup>24</sup> Ndegombre šcuayana: Canýe trigo jénaye ndoñe fshantsiñe tmonjuatbontsá y ndoñe tonjóbanëse, nýe cach canýe trigo jénaye jesomñana. Pero tmojuatbontsá y tojóbanase, bëtsá jashájonana. <sup>25</sup> Cachcá, nda nýe cachá tojtsenóbobonshana, cha chabe vida echanjëftsobuetše. Pero nda nýe cachá ndoñe tontsenóbobonshana y ntšamo atše stsemandacá, quem luariñe vida tojtsebonnëntscuana cha tojtsamëse, chë nyetsca tescama yomna tšabe vida echántsebomna. <sup>26</sup> Nda ntšamo stsemandacá jamama tojtseboše, atše chašotséstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiama, atšbe Taitá Bëngbe Bëtsá echanjínýanýiye bëtsá yomnama ca” —Jesús tojánayana.

#### Jesús tojánayana cha yochjanóbanama

<sup>27</sup> Y más Jesús tojánayana: “¡Mora tša cochtsetsenaná séntsemna! ¿Atše chjayana: “Taita, chë átšeftaca echanjopása soyënga šmotsebojuaná ca?” Ndoñe; er más chama atše quem luaroye tijabo. <sup>28</sup> Taita, šminýanýe aca puerte bëtsá y obená comnama ca.”

Y cachora, celocana canýe oyebuambnayana tojanóboconca mëntšá:

“Ya tcbonjinýanýe atše puerte bëtsá y obená tsmënama, y mora cachiñe cachcá chanjama ca.”

<sup>29</sup> Entsánga chca tmojanuena ora, ínýenga imojtsichamo nýe tojanjuésase ca; pero ínýengna imojtsichamo: —Canýe ángel chábioye tbonjuatsëtsá ca.

<sup>30</sup> Chora Jesús tojanéyana: —Ntšamo šmonjouencá, atšbiama ndoñe quenátsmëna, sinó tšëngaftangbiama. <sup>31</sup> Mora chë tempo entsemna, chë quem luare entsánga tmojëftsema bacna soyënga jinýanýiyama y chëngbe castiguama jayanama. Y mora, chë nyetsca bacna soyënga mandayá, quem luarentšana mochantábocna. <sup>32</sup> Pero atše fshantsocana atsbananá chaitsemna ora, nyetsca entsánga átšbioye chanjúbuaja ca —Jesús tojánayana.

<sup>33</sup> Chca cha yojsichamo, ana jinýanýiyama ntšamo jóbanama ibojamnama. <sup>34</sup> Chora chë entsánga tmojanjuá: —Bëngbe Bëtsabe uabemana palabrenguñe endayana, y chíyeca bënga fsëndétatšëmbo chë Cristo nyetsca tescama vida yochtsebomna ca. As, índáyeca cojtsichamo, Bëngbe Bëtsá Entsá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entsá tbojanbemá ca? —chënga imojtsichamo.

<sup>35</sup> Y Jesús tojanéyana: —Nýe baseftatescama chë entsángbe juabnënga binýnayá tšëngaftangbeñe entsemna. Chë binýnayá cabá tšëngaftangbeñe yojtsebnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binýniñe tojtsana, cha ndoñe ntsetatšëmbuana ndëmuajana yojtsana. <sup>36</sup> Chë binýnayá cabá tšëngaftangftaca endëtsebnëntscuana, chábeñe

šmochtsošbuáchiye; as, tšengaftangbe juabnënga binÿniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entsangbiana vojetsóitana.

**Ndáyeca chë judiënga Jesúsbeñe ndoñe montsanošbuaché**

<sup>37</sup>Masque Jesús, judiëngbe delante ba bëts soyënga Bëngbe Bëtsabe obenánaca tojéftsema, chënga ndoñe chábeñe ntsošbuáchiyana, <sup>38</sup>ntšamo Bëngbe Bëtsabe juabna oyeuambnayá Isaías tojanabemcá, cachcá chaotsemnama. Isaías mëntšá tojánayana:

Bëngbe Utabná, ¿nda  
bëngbe buayenana soyiñe  
yojtsosbuaché?

Y ¿nda tbojosertá, acbe obenana  
tcojinÿinÿé ora ca?

<sup>39</sup>Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojéftsanabema:

<sup>40</sup>Bëngbe Bëtsá tojama chënga chabe soyëngama ndoñe botamana chamondëtsejuabna y chabe soyënga ainaniñe ndoñe chamondóyëngacñama, as ndoñe chaondëtsësertánama ca. Y Bëngbe Bëtsá entsichamo: “Chca entsemna, chënga atšbe benache ndoñe chamondishachama, y atšbe ndoñe ntjátsebacama; y chca, chënga mochántsemna mo ndëshnana entsangcá ca.”

<sup>41</sup>Isaías chca tojánayana, er tojáninÿe Jesús puerte bëtsá y obená yojamnama, y chca chë uabemaniñe Jesusbiana yojanoyebuambná.

<sup>42</sup>Pero masque chca iuábemanëse, ba judiënga imojtsanošbuaché, y banga judiëngbe amëndayëngnaca Jesúsbeñe imojtsanošbuaché. Pero

chëngna, Jesúsbeñe imojtsosbuáchema entsángbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentsana ndoñe chamondëtëbuacnama. <sup>43</sup>Chëngbiana más yojanámana, entsanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

**Jesube palabrëngaca yochtsótatšëmbo entsanga tšabá o ndoñe tšabá tmonjamama**

<sup>44</sup>Chora Jesús mëntšá jabuache tojánayana: “Nda átšbeñe tojtsosbuaché, ndoñe nÿe átšbeñe ntsošbuáchiyana; chë nda šojichmó chábeñnaca cha jtsošbuáchiyana. <sup>45</sup>Cachca, nda atše šojtsonÿá, chë šojichmó chábioynaca cha jtsonÿayana. <sup>46</sup>Atše quem luaroye tijabo entsangbe juabnënga jacobínÿnama, chca, nda átšbeñe tojtsosbuaché, mo ibetiñcá ndoñe chaondëtsemnama. <sup>47</sup>Pero nda atšbe soyëngama tojouena, pero ntšamo sentsichamcá ndoñe tontsama, atše chabiana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. <sup>48</sup>Nda atše šojtsaboté y atšbe palabrëngama ndoñe šonjoyeuná, ya entsebomna nda chabiana yochjayana bëts castigo jtsebomnama ibojtsemna ca. Atše tijanoyebuambá palabrëngaca, quem luare jopochócama te chabiana chca echántsayana. <sup>49</sup>Er atše ndoñe nÿe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana. <sup>50</sup>Atše sëndétatšëmbo, atšbe Taitá tojamandá

orna, cha jamándana entsanga chë nyetsca tescama yomna tšabe vida chamotsebomnama. Chýyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

**Jesús chabe uatsjéndayënga tojanashecjabebé**

**13** <sup>1</sup>Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábenga yojanababuanýeshancá, chë quem luare imojamnënga, chórna yojtseboše chë bëts bonshánana puerte más jinýanýiyana.

<sup>2</sup>Pero Satanás, Júdasbe ainaniñe bacna juabnënga tojanjajó, uayayëngbe cucuatšinë Jesús jayentšbáshejuanama. Judas Iscariote, Simonbe uaquiná.

<sup>3</sup>Jesús yojtsetátšëmbo chabe Taitá Bëngbe Bëtsá nyets obenana tojánatšetama. Cachcá, Jesús yojtsetátšëmbo, Bëngbe Bëtsábiocana cha tojánabama y cachábioye jtama ibojtsemnama. <sup>4</sup>Chcasna, chë ibeta jasama tmojanpochocá ora, mesëshentšana tojantsbaná, chabe juatsboye uichëtjoníya tojanenátsejca y canýe tualléjua tojanenasná. <sup>5</sup>Chentšana, canýe bachešinë búyeshe tojanbuešjca y tojanontsé chabe uatsjéndayënga jushecjabebiyana y jtëshecbojuana cha yojtsasnana tualléjuaca.

<sup>6</sup>Pero, Simón Pedro tojanobuache ora, Jesúsbioye tojaniyana: —Atšbe Utabná, ¿aca šochjuashecjabí ca?

<sup>7</sup>Chora Jesús tojanjuá: —Atše sentsama soye mora ndoñe quemátšertana; pero más chcoye añe cmochanjoserá ca.

<sup>8</sup>As Pedro tojaniyana: —iNdocna te šcatjuashecjabí ca!

Pero Jesús tojaniyana: —Ndoñe chacbonjuáshecjabese, atšbia ndoñe quecochátsmëna ca.

<sup>9</sup>Y Simón Pedro tojaniyana: —iAtšbe Utabná, as nye atšbe shecuatšënga ndoñe, ndayá atšbe cucuatšënga y bestšášnaca ca!

<sup>10</sup>Pero Jesús tojanjuá: —Nda bebená tojtsemna, nye shecuatše jtsashecjabiamá jtsajabótana, ndoñe nyetšá cachiñe. Nda tojtsobebé, ndoñe tsengá ntsemnana. Cachcá, mo bebënënga cuenta tšëngaftanga šmontsemna; pero canýa muentše entsemna, y cha mo bebenacá ndoñe quenátsmëna.

<sup>11</sup>Jesús yojtsetátšëmbo nda chë uayayëngbe cucuatšinë boshjuaná yochtsanmënama, chýyeca tojánayana: “Tšëngaftanguentšá canýa entsemna, cha mo bebenacá ndoñe quenátsmëna ca”.

<sup>12</sup>Jushecjabebiyama tojanpochocá ora, chabe juatsboye uichëtjoníya tojtanjchëtjo, y mesëshentše tojtanoíbema. Chora tojanéyana: —¿Chë tcbonjábiamá soyama quecmojtsésertana ca?

<sup>13</sup>Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna.

<sup>14</sup>Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebiyana. <sup>15</sup>Ntšamo quem sóyeca tcbonjanýanýecá, tšëngaftanga cachcá šmochtsama. <sup>16</sup>Ndegombre šcuayana, chë oservená chabe nduñbiama ndoñe más uamaná ntsemnana. Cachcá, chë ichmoná chë tojichmobiamá ndoñe más uamaná quenátsmëna. <sup>17</sup>Quem soyënga chašmojuatsjinýe y chca chašmojamëse, tšëngaftanga puerte oyejuayënga vida šmochanjëftsebomna.

<sup>18</sup> “Atše sëndétatšëmbo chë tijábacacangiama, chíyeca atše nyetscangiama ndoñe chca quetsatoyebuambná. Y ntšamo Bëngbe Bëtsabe uabemana palabrenguiñe endayancá cachcá chaotsemnama, chë ‘canya átšeftaca tandëse tonjasá, atšbe contra echántsemna ca’, cachcá echanjopása. <sup>19</sup>Mora, cabá ndoñe chca tonjopasá ora, lempe chë soyënga séntichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná. <sup>20</sup>Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

**Jesús tojánayana uayayëngbe  
cucuatšinë Judas  
bochjáboshjona**

*(Mt 26.20-25; Mc 14.17-21; Lc 22.21-23)*

<sup>21</sup> Chë soyënga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canya tšëngaftanguentšá uayayëngbe cucuatšinë šochanjáboshjona ca.

<sup>22</sup> Chora, chabe uatsjëndayënga tmojanontšë enonjínayana, y ndoñe montsetátšëmbo ndabiama Jesús chca tojánayanama. <sup>23</sup> Canye uatsjëndayá, chë Jesús puerte ibnabobonshaná, Jesusbe juachaca inatbemana.

<sup>24</sup> As, Simón Pedro chábioye tbojánefjatšëmbo, ndabiama Jesús chca tojánayanama Jesúsbioye chabotjama.

<sup>25</sup> Chë puerte bonshana uatsjëndayá, Jesúsbioye batšatema más tojanosjoná y tbojantjá: —Bëngbe Utabná, čnda cha yojtsemna ca?

<sup>26</sup> Chora Jesús tbojanjuá: —Atše canye base tandëtema chanjafchécuacuaye y ndábioye chajoyé, cha entsemna ca.

As Jesús canye base tandëtema tojanfchecuacuá, y Judas, Simón Iscariotbe uaqiñábioye, tbojanoyé.

<sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojanayana: “Chë cochanjama soye, cam ora moma ca.”

<sup>28</sup> Pero ni canya chë jasama imojtsetbiamanënguentsá tbojanësertá, ndayama Júdasbioye chca tbojanayanama. <sup>29</sup> Judas inamna chëngbe crocénana shecnëšinë uambayá; chíyeca ínënga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjëmënga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentšana tojéftsanbocna. Chora ya ibeta yojtsemna.

**Chë tsëm mando**

<sup>31</sup> Judas tojéftsanbocnentšana, Jesús tojánayana: —Ora tocjobuache, Bëngbe Bëtsá Entšá tbojanbemá corente bëtsá y obená yomnama jinjánjyama; y mua echanjínjányiye Bëngbe Bëtsá corente bëtsá y obená yomnama.

<sup>32</sup> Cha echanjínjányiye Bëngbe Bëtsá chca yomnama, chíyeca Bëngbe Bëtsánaca echanjínjányiye corente bëtsá y obená yomnama, y mora entsemna chë ndaye ora Bëngbe Bëtsá chca chabiama yochjínjányiye. <sup>33</sup> Atšbe básënga, baseftatescama tšëngaftangaftaca séntsemna. Chora šmochántseguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca.

<sup>34</sup> Canye tsëm soye cbetsamëndá: Nyetscanga šmochtsenbobonshana. Ntšamo atše tšëngaftanga

cbondábabuanÿeshana, cachcá  
tšëngaftanga šmochtsebobsnana.  
<sup>35</sup> Tšëngaftanga šmojtsebobsnánëse,  
nÿetsca entsanga mochántsetatšëmbo,  
tšëngaftanga atšbe uatsjëndayënga  
šmomnana ca —Jesús tojanéyana.

**Jesús tojánayana, chábioye  
ndoñe bonjanabuátma ca Pedro  
yochjánayana**

(Mt 26.31-35; Mc 14.27-  
31; Lc 22.31-34)

<sup>36</sup> Chora Simón Pedro tbonjantjá:  
—Bëngbe Utabná, ñndémoye cochjá ca?

As Jesús tbojanjá: —Atše sentsá  
luaroye, mora aca ndoñe quecátobena  
atše juastana, pero más chcoye aífne  
šcochanjuasto ca.

<sup>37</sup> As Pedro tbojanayana: —Atšbe  
Utabná, ñndáyeca ndoñe séntsobena  
mora aca juastama? ¡Atše  
séntseprontana acbiana jóbanama ca!

<sup>38</sup> Chora Jesús tbojanayana:  
—Ñndegombre cojtseprontana atšbiana  
jóbanama? Ndegombre cbëyana, cabá  
ngallo ndécánta ora, aca unga soye  
atšbiana cochanjayana: “Cha ndoñe  
quetsatabuatma ca”.

**Jesús beyeca entsanga jobenayana  
Bëngbe Bëtsábioye jama**

**14** <sup>1</sup> Mëntsánaca Jesús tojánayana:  
—Ndoñe ainana tsetšanënga  
matmënana. Tšëngaftanga Bëngbe  
Bëtsábeñe šmondošbuaché; átšbeñnaca  
šmochtsošbuáchiye. <sup>2</sup> Atšbe Taitá  
Bëngbe Bëtsá endmënoca, ba  
luarënga joyénanama endmëna.  
Ndoñe chca tontsemnëse, atše  
chca matchënjáuyana. Morna,  
cha endmënoye atše chanjá  
tšëngaftangbiana canÿe luare  
joyénanama jabuáprontama. <sup>3</sup> Atše  
chajjá y chë luare chacbojabuaprontá  
ora, cachiñe moye chanjésabo,

tšëngaftanga átšeftaca junatsama. As,  
atše chaitsemnoye, tšëngaftangnaca  
chašmotsá joyénanama. <sup>4</sup> Atše chanjá  
choye ntšamo jama y jashjanguama  
ya šmontsetátšëmbo ca —Jesús  
tojánayana.

<sup>5</sup> Chora Tomás Jesúsbiöye  
tbojanayana: —Bëngbe Utabná,  
ndémoye cochjama ndoñe  
queftsátstatšëmbo. As, ñntšamo bënga  
fchtsetátšëmbo ntšamo choye jama ca?

<sup>6</sup> Chca tbojanayana ora, Jesús  
tbojanjá: —Atše sëndmëna benachcá;  
chëjana tcojtsase, pronto jashjanguana.  
Atše sëndmëna ntšamo ndegombre  
yomncá sempre oyebuambnayá, y  
entsanga chë nÿetsca tescama yomna  
tšabe vida chamotsebomnana endamá.  
Nÿe átšbeyeca endopodena ndayëjana  
jama, y atšbe Taitá Bëngbe Bëtsábioca  
jashjanguama. <sup>7</sup> Tšëngaftanga atše  
šmojtšábuatmëse, atšbe Taitánaca  
šmattsábuatma. Morscana ya cha  
šmontsábuatma y cha šmontsonÿá ca  
—tbojanayana.

<sup>8</sup> Pero Felipe tbojanayana: —Atšbe  
Utabná, nÿe chë Taitá šmanÿanÿé,  
ndayama más ca.

<sup>9</sup> Chora Jesús tbojanayana: —Chëfta  
te tšëngaftangaftaca séntsemna, y  
ñcabá ndoñe atše šcontsábuatma,  
Felipe? Nda atše šojinÿe, chë Taitá  
Bëngbe Bëtsábioynaca jinÿana.  
As, ñntšamo atše šcojtsatsá, chë  
Taitá šmanÿanÿé ca? <sup>10</sup> Ñndoñe  
condošbuaché, atšbe Taitá átšbeñe  
y átšnaca chábeñe nÿe canÿacá  
ftsmënana? Chë cbontsëtsëtsná  
soyënga, ndoñe nÿe atšbe juábnaca  
chca quetsatoyebuambná. Atšbe  
Taitá, chë átšbeñe vida endbomná  
jtsamana lempe ntšamo tsamcá.

<sup>11</sup> Muiñe šmochtsošbuáchiye: Atšbe  
Taitá átšbeñe endmëna, y átšnaca  
chábeñe mo nÿe canÿacá sëndmëna.

Chama ndoñe šmontsošbuachese, as nye chë tijama soyëngámnaca átšbeñe šmochtsošbuáchiye. <sup>12</sup> Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama. <sup>13</sup> Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínyaníyie chë Taitá corente bëtsá y obená yomnana. <sup>14</sup> Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

**Jesús tojanašebuachená chë  
Uámana Espíritu jíchmuama**

<sup>15</sup> Mëntsánaca Jesús tojánayana: “Tšëngaftanga atše šmojtsebbonshánëse, ntšamo cbontsamëndacá cachcá šmochanjama. <sup>16</sup> Chca chašmojamëse, atšbe Taitá Bëngbe Bëtsá tšëngaftangbíama chanjaimpáda, tšëngaftanga jabújabuachama y jabáñemuayama inya cha chabuichmoma, chë Uajabuachaná nyëtsca tescama tšëngaftangaftaca chauëtsemnana. <sup>17</sup> Cha, chë Uámana Espíritu endmëna chë nyëtsca soyënguiñe ntšamo ndegombre yomncá oyebuambnayá. Chë nye quem luarama enójuabnaye entšanga, chë átšbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

<sup>18</sup> “Atše ndoñe quechoháisabashejuana, mo uajchonga cuenta chašmotsemnana. Tšëngaftangbioye chanjésabo. <sup>19</sup> Muentšana baseftaytese, chë nye quem luarama enójuabnaye entšanga ndoñe más quešmochátönyaye; pero tšëngaftangna aíñe, atše cachiñe šmochántinye. Atše ainá chántsemna, chíyeca tšëngaftanga átšeftaca tšabe vida šmochántsebomna. <sup>20</sup> Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nye canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nye canýacá šmomnana y átšnaca tšëngaftangaftaca. <sup>21</sup> Nda totátšëmbo ntšamo atše tijamandacá y sempre chca tojtsama, cha ndegombre šojtsebbonshana. Nda átšbioye šojtsebbonshana, chábioye atšbe Taitánaca bochántsebbonshana. Atšnaca cha chántsebbonshana, y nda atše tsmënama cha chanjinýinýiye ca” —Jesús tojánayana.

<sup>22</sup> Chora, inye Judas, ndoñe Judas chë Iscariote, Jesúsbioye tbojaniyana: —Bëngbe Utabná, ñntšamo chca yojtsemna, nye bënga šcochjínyaníyie ntšamo cach aca comnana, y nyëtsca quem luarentšëngbioye ndoñe ca?

<sup>23</sup> Chora Jesús tbojanjuá: —Nda atše šojtsebbonshana, ntšamo atše sëntsoyebuambnacá echanjama. Atšbe Taitánaca chábioye bochántsebbonshana, y bëndata chábioye fchanjabo y chábeñe vida fchantsebomna. <sup>24</sup> Nda ndoñe šontsebbonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe

juábnaca quenátsmëna, sinó chë Taitá, chë šonjichmó chabe juábnaca.

<sup>25</sup>“Atše cabá tšëngaftangaftaca sëntsemnëntscuana, lempe quem soyëngama sëntsoyebuambná.

<sup>26</sup>Chë Uajabuachaná, chë Uámana Espíritu, atšbe impadanánaca atšbe Taitá bochanjíchmuá. Cha lempe cmochántsabuatambaye, y echanjama nýetsca chë tbonjúuyana soyëngama chašmuatenójuaboma.

<sup>27</sup>“Chë atšbe ainaniñe puerte tšabe ebionana tšëngaftangbiana šcuétseboshjona, cbetsatšatá. Chë nýe quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. <sup>28</sup>Ya šmonjouena ntšamo tbonjúuyancá:

‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiana más bëtsá endmëna. <sup>29</sup>Quem soyënga tbonjúuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

<sup>30</sup>“Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyebuambaye. Pero cha tondaye quenátobena atše jabórlana.

<sup>31</sup>Masque cha chca endmëna, chca entsemna, atše chë Taitábioye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca”  
—Jesús tojanéyana.

**Jesús yomna mo chë  
tšabe uvas betiyácá**

**15** <sup>1</sup>Mëntšánaca Jesús tojánayana: “Atše sëndmëna mo chë tšabe uvas betiyácá, y atšbe Taitá Bëngbe Bëtsá chë tšabe uvas betiye inýenacá. <sup>2</sup>Chë inýená, chë uvas betiyentša buacuafjënga ndëshajuanëfjënga jtsebuacuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtscá chaotseshajúanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. <sup>3</sup>Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. <sup>4</sup>Atšeftaca cánýiñe mo canýacá šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntsobenana nýe cachabe ponto jashájonana. Cachcá, tšëngaftanga átšeftaca ndoñe cánýiñe mo canýacá šmontsemnëse, ndoñe šmattsobena Bëngbe Bëtsabiana bëtscá soyënga jamama.

<sup>5</sup>“Atše chë tšabe uvas betiyácá sëndmëna y tšëngaftanga chë buacuafjëngcá. Nda átšeftaca cánýiñe mo canýacá tojtsemna y atše cháftacnaca, cha Bëngbe Bëtsabiana bëtscá soyënga echanjama, mo canýe buacuafja becá tojtsešhajuancá. Er, tšëngaftanga atšbe uajabuáchenana ndoñe šmontsebošnëse, átšeftaca cánýiñe mo canýacá ndoñe šmontsemna causa, tondaye šmattsobena jamama. <sup>6</sup>Canýa átšeftaca cánýiñe mo canýacá ndoñe

tontsemnëse, cha jtsemnana mo canÿe buacuetëtšena buacuafja, utšenëfja y buashánëfjá. Chca buacuafjënga, entsanga jtsatbanana, ñeshoye jtsëtšenana y chentše jtsejuinjÿiana. Cachcá, nda ndoñe átseftaca cánÿiñe mo canÿacá tontsemna, ndoservená jtsemnana y luaroca cha mochantsesegóra.

<sup>7</sup>“Tšëngaftanga átseftaca cánÿiñe mo canÿacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe.

<sup>8</sup>Chë shajuana buacuafjëngá tšëngaftanga chašmojtsemna ora, šmochanjínÿanÿiye atšbe Taitá corente bëtsá y obená yomnama. Y chca, tšëngaftanga atšbe ndegombre uatsjédayënga šmochántsemna. <sup>9</sup>Ntšamo chë Taitá šondbobonshancá, átšnaca cachcá tšëngaftanga cbondábabuanÿeshana. Chíyeca, šmochtsiyena atšbe bonshánama jtsejuabnayëse. <sup>10</sup>Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup>“Atše chca cbontsëtsëtsná, chë atše séntsebomna oyejuayana tšëngaftángnaca chašmotsebomnama, y tšëngaftanga puerte chašmotsóyejuama.

<sup>12</sup>Mëntšá cbetsamëndá: Ntšamo atše cbondababuanÿeshancá, cachcá šmochtsenbobonshana. <sup>13</sup>Chë chabe amiguëngbiamá tojóbanabiamá, ndocna quenátobena chabiamá más bonshánana jtsebomnana. <sup>14</sup>Ntšamo atše tijamandacá tšëngaftanga šmojtsamëse, atšbe amiguënga

šmochántsemna. <sup>15</sup>Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservénënga ca ndoñe quecbatëtšëtsná. Morscana mëntšá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinÿcá, tšëngaftanga tcbonjinÿanÿé. <sup>16</sup>Tšëngaftanga ndoñe atše chešmatábuayana, pero atše aíñe tšëngaftanga tcbonjabacacá y tcbonjubaúyana, Bëngbe Bëtsabe trabajo jamama; y chca, mo canÿe betiye sempre tojtseshajuana y chë shajuana ndocna te tontsopochocacá, tšëngaftanga chašmotsebnama. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>17</sup>Mëntšá atše cbetsamëndá: Šmochtsenbobonshana ca” —Jesús tojanéyana.

**Jesús y chabe entšanga, chë ñye quem luarama enójuabnayëngbiamá uaboyénjanënga**

<sup>18</sup>Mëntšánaca Jesús tojánayana: “Pero chë ñye quem luarama enójuabnaye entšanga tcmojtsëbuayënjëse, šmochjenójuaboje, natsana chënga atše šmonjanáboyënjama. <sup>19</sup>Tšëngaftanga, chë ñye quem luarama enójuabnaye entšanguentšana šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë ñye quem luarama enójuabnaye entšanguentšana quešmátsmëna, y atšna, chë quem luare oyenënguentšana tšëngaftanga tcbonjabacacá. Chíyeca chë ñye quem luarama enójuabnaye entšanga tšëngaftanga cmontsëbuayënja. <sup>20</sup>Šmochjenójuaboje ntšamo



tcbonjáuyanama: ‘Chê oservená chabe nduiñbiana ndoñe más uamaná quenátsmëna ca’. Chënga monjánama atše chaisufrima; tsëngaftángnaca chašmotsesufrínama mochántsama. Entšanga ntšamo atše tijayanentsana ntsachetšá tmojtsamcá, cachcá chënga mochántsama ntšamo tsëngaftanga chašmojtsëtsësná chentšana. <sup>21</sup> Chê chacmojtsëbuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

<sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmna. Pero mora, chëngbe bacna soyëngama chënga ndoñe quemátobena jayanana, ‘iChca fsënjama ntsetatsëmbcá ca!’

<sup>23</sup> Nda atše šojtsáboyënja, atšbe Taitábioynaca jtsáboyënjana. <sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmna. Pero mora, masque ntšamo sënjamcá tmonjinÿëse, chënga atše šmotsáboyënja y atšbe Taitábioynaca. <sup>25</sup> Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntšá endayana: ‘Nÿe tondayama chënga šmonjanáboyënja ca.’

<sup>26</sup> “Atše, atšbe Taitábentšana chë Uajabuachaná y añemuayá tsëngaftangbiöye chanjíchmuá. Cha chë Uámana Espíritu endmëna, chë nÿetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tsábe soyënga cmochantsëtsësnaye. <sup>27</sup> Chorscana, tsëngaftángnaca atšbiana entšanga šmochantsëtsësnaye, er tsëngaftanga átšeftaca šmondëtsemna, entšanga

jábuayenama atše sënjanbojatsé orscana ca” —Jesús tojánayana.

**16** <sup>1</sup> Mëntšánaca Jesús tojánayana: “Atše quem soyënga cbontsëtsësná, tsëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. <sup>2</sup> Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora, chë tsëngaftanga chacmojtsëbáyënga mëntšá mochántsejuabnaye: ‘Bënga tsábá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ <sup>3</sup> Chënga, chë Taitá Bëngbe Bëtsá ndoñe quematábuatma, y átšbiöye cach ndoñe. Chíyeca, chca cmochanjáborlaye. <sup>4</sup> Atše chca tsëngaftanga cbontsëtsësná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

#### Ndayá chë Uámana Espíritu inétsama

Mëntšánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbënjatanëtsësná, er atše tsëngaftangaftaca sënjëtsemna. <sup>5</sup> Pero morna, chë šojichmó cha yomnoye chantá; y tsëngaftanguentšá ndocná šochanjatjaye, ‘ñdémoye cojtsá ca?’ <sup>6</sup> Mora, tsëngaftangbe ainana ngmënacá entsemna, atše chca tcbonjáuyana causa. <sup>7</sup> Pero ndegombre šcuayana: Atše chanjá y chca tsëngaftangbe tsábiana echántsemna. Atše ndoñe quetsjase, chë Uajabuachaná y añemuayá ndoñe tsëngaftangbiöye queochátabo. Pero aíñe chanjá, y chora cha tsëngaftangbiöye chanjíchmuá. <sup>8</sup> Cha chaojáshjango ora, echanjama

quem luarentša entsanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominýiñe tšabia jtsemnana, y ndayá yomna chë Bëngbe Bëtsá entsangbiana jayanana tšabá o ndoñe tšabá tmonjamama. <sup>9</sup>Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. <sup>10</sup>Chë Taitábioye chanjá y atše ndoñe más quešmochátinýe. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominýiñe tšabia jtsemnana. <sup>11</sup>Quem luarentša bacna soyënga mándayabiana Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entsanga corente chamotsetátšëmbo, ndayá ndegombre yomna chë Bëngbe Bëtsá entsangbiana jayanana tšabá o ndoñe tšabá tmonjamama.

<sup>12</sup>“Atše cabá ba soyënga séntsebojna tšëngaftanga jáuyanama. Masque chcasna, mora tšëngaftanga ndoñe quešmátobena chë soyëngama josértana. <sup>13</sup>Pero chë Uámana Espíritu, chë nyetsca soyënguiñe ntšamo ndegombre yomncá oyeuambnayá, chaojáshjango ora, lempe ntšamo ndegombre yomncá cmochanjabuatambá. Cha ndoñe nýe cachabe juábnaca queochátoyebuambnaye. Ntšamo chë Taitá chábioye tbojauancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama. <sup>14</sup>Atšbe soyënguentšana cha echanjýëngacñe, y cach

soyëngama cmochanjabuatambá. Chcase cha cmochanjñyanýie atše bëtsá y obená bëtsemnama. <sup>15</sup>Lempe ntšamo chë Taitá endbomncá, atšbe soyëngnaca endmëna. Chíyeca atše tcbonjáuyana, chë Uámana Espíritu atšbe soyënguentšana yochjýëngacñe y cach soyëngama cmochjabuatambá ca.”

<sup>16</sup>“Baseftayté y atše ndoñe más quešmochátinýe. Inýe baseftayté y cachiñe šmochantétinýe ca” —Jesús tojanéyana.

**“Tšëngaftangbe ngménana, oyejuayana echanjóbema”**

<sup>17</sup>Chora Jesusbe básefta uatsjëndayënga imojtsentjanaye: —¿Ntšamo yojsentsáyanana, chë “baseftayté y atše ndoñe más quešmochátinýe, y inýe baseftayté y cachiñe atše šmochantétinýe, er atše chë Taitábioye chanjá ca”? <sup>18</sup>¿Ntšamo yojsentsáyanana, chë “baseftayté ca”? Ndoñe quemúatstatšëmbo ntšamo yojsentsáyanama ca —chënga imojtsichamo.

<sup>19</sup>Jesús yojssetátšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinýe, y inýe baseftayté y cachiñe atše šmochantétinýe ca.” ¿Chë soyëngama šmojsentjaná ntšamo stsentšáyanama?

<sup>20</sup>Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nýe quem luarama enójuabnaye entsanga corente oyejuayënga mochántsemna. Masque tša ngménënga šmochántsemna, chentšana tšëngaftangbe ngménana, oyejuayana echanjóbema. <sup>21</sup>Canýe shembása tbojontšabuache šešona

jónynama ora, tša ngménaca cha jésemnana, puerte tbojtsetsetše causa. Chë šešona ya tojonyná ora, cha ndoñe ntsenójuabnayana chë tša ibuántsetšama. Canye šešona quem luaroye cháúashjanguama chë shembása tojámayeca, chora cha tšabá y oyejuayá jtsemnana. <sup>22</sup>Ndegombre, tšëngaftángnaca cachcá, chora tša ngménaca šmochántsemna. Pero atše tšëngaftangbioye chajjésabo ora, atše šmochantétinye y corente oyejuayënga šmochántatsmëna. Y ndocná queochatobenaye chë oyejuayana jabuajuánana.

<sup>23</sup>“Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>24</sup>Méntsoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebmna ca” —Jesús tojanéyana.

**Jesucristo, quem luarentše mandayábioye yëñjanayá**

<sup>25</sup>Mëntšánaca Jesús tojánayana: “Chë soyëngama lempe cuentëngaca tšëngaftanga tbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiama cbochanjáuyana. <sup>26</sup>Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiama atšbe Taitá jatsimpadánana.

<sup>27</sup>Atše ndoñe quichatsimpadana, er cach Taitá tšëngaftanga cmondábabuanyëshana. Tšëngaftanga atše šmondobonshánama, y Bëngbe Bëtsábiocana atše tijabama šmojtsošbuáchema, chë Taitá cmondábabuanyëshana. <sup>28</sup>Atše chë Taitábiocana sënjabocna y quem luaroye sënjabo. Pero mora quem luare chanjéftsebohshjona atšbe Taitábioye jtama ca” —Jesús tojánayana.

<sup>29</sup>Chora chabe uatsjëndayënga tmojaniyana: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna. <sup>30</sup>Mora fsëntsetatšëmbo aca nyetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábiocana tcojabama ca —chënga tmojaniyana.

<sup>31</sup>As Jesús tojanéyana: —¿Mora chiñe šmojtsošbuaché ca? <sup>32</sup>Ya tempo tocjebuache y cam ora entsemna, tšëngaftanga nyetsquénache šmochanjuáshana y atše nye canya šmochanjésebohshjona. Pero atše ndoñe nye canya quichátsmëna, chë Taitá átšeftaca entsëmnyayeca. <sup>33</sup>Atše lempe quem soyënga cbontsëtsësná, tšëngaftangbe ainaniñe tšabe ebionana chašmotsebmna, átšeftaca cányiñe mo canyacá jtsemñese. Quem luarentše šmochanjasufrina; pero añemo šmochtsebmna, atše ya chë quem luarentša mandayá sënjayëñjaná ca —Jesús tojánayana.

**Jesús chabe uatsjëndayëngbiana Bëngbe Bëtsábioye tbojanimpadá**

**17** <sup>1</sup>Jesús chë soyënga tojánayanentšana, celoye

tojanontješé y Bèngbe Bètsábioye tbojanianyana: “Taita, atšbe te ya tocjobuache. Minÿanÿé, atše acbe Uaquiñá, corente bètsá y obená bétsemnama. As, atše acbe Uaquiñá, aca corente bètsá y obená comnama chainÿanÿema. <sup>2</sup>Mora aca nÿets obenana šconjatšeta nÿetsca entšángbeñe, nÿetscanga chë atšbiana tcojábacacanga chë nÿetsca tescama yomna tšabe vida chamotsebonnama atše chaimama. <sup>3</sup>Chë nÿetsca tescama yomna tšabe vida jtsebonnana endmëna aca, chë nÿe canÿe y ndegombre Bèngbe Bètsá jtsabuatmana, y atše Jesucristo, acbe ichmoná.

<sup>4</sup>“Lempe ntšamo šconjamandacá atše sënjapochocá, y chca quem luariñe sënjama aca corente bètsá y obená comnama jinÿanÿiyama. <sup>5</sup>Taita, quem luare cabá ndoñe quenjatsmëna ora, aca tconjaninÿanÿé atše corente bètsá y obená ácaftaca bétsemnama. Mora moma atše cachcá ácaftaca chaitsemnama.

<sup>6</sup>“Aca quem luarentša tñšanguentšana quem boyabásenga tconjabacacá y atšbiana šconjinÿinÿé. Atše chënga sënjanÿanÿé ntšamo ndegombre aca comnama. Chënga acbe entšanga mondmëna; y acna, chë atšbiana chënga šconjinÿinÿiyá. Chënga acbe palabra tmonjouena y tšabá tmonjoyeuná. <sup>7</sup>Chíyeca chënga mondéatšëmbo, lempe ntšamo atše tsbomncá ácbentšana tijóyëngacñama. <sup>8</sup>Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondéatšëmbo atše acbiocana tijabama, y montsošbuaché aca chë atše šcojichmó cha comnama.

<sup>9</sup>“Atše chëngbiana cbontseimpadana. Chë nÿe quem luarama enójuabnaye entšangbiana

ndoñe quecbátsimpadana, pero añe chë atšbiana šcojinÿinÿiyëngbiana, er chënga acbe entšanga mondmëna.

<sup>10</sup>Lempe ntšamo atše tsbomncá, acbiámncana endmëna; y cachcá, lempe ntšamo cobomncá, atšbiámncana endmëna. Acbengbe vidëngaca aca tcojinÿanÿé atše corente bètsá y obená bétsemnama.

<sup>11</sup>“Atše ndoñe quem luarentše quešocháisetotona, pero chënga añe cabá camuentše mochanjéftsemna. Atše chantá ácaftaca jtsatsmënama. Uámana Taitá, chë atšbiana šconjinÿinÿiyënga acbe obenánaca cochtsanÿena. Chca ntšamo bëndata mo canÿacá bondmëna, chëngnaca cachcá chamotsebonnama. <sup>12</sup>Atše chëngaftaca sëntsemnëntscuana, chënga sëntsanÿena, aca šconjatšeta obenánaca. Atše chënga sëndánÿena, y ni canÿa queochátsmëna infiernoca pochocaná, nÿe chë infiernoca pochocaná jtsemnama ibomná chana añe, ntšamo acbe uabemana palabrenguiñe endayancá, cachcá chaotsemnama.

<sup>13</sup>“Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebonna puerte bètsca oyejuayana chëngnaca chamotsebonnama.

<sup>14</sup>Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja. <sup>15</sup>Atše ndoñe quecbátsimpadana, chënga quem luarentšana chacúbuacanama; pero añe, nÿetsca bacna soyënguentšana chacuatsebacama. <sup>16</sup>Ntšamo

atše ndoñe quetsátsmëna chë nÿe quem luarama enójuabnaye entšanguentsá, cachcá, chënga cach ndoñe quemátsmëna.

<sup>17</sup>Cochjama chënga acbe entsanga chamuétsemnana, y chca, nÿe acbiama vida chamotsebonna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. <sup>18</sup>Ntšamo aca quem luaroye šconjanichmocá, cachcá átsnaca chënga séntsachamná, quem luare entsanga jábuayenama. <sup>19</sup>Chëngbiama atše cachíne mëntšá cbëyana: Atše nÿe acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entsanga chamotsemna, y chca, nÿe acbiama vida chamuétsebonna, ntšamo ndegombre yomncá chënga imoyenama.

<sup>20</sup>“Pero nÿe chëngbiama ndoñe quecbátsimpadana, sinó chë átsbeñe mochtsošbuáchiyëngbiamnaca, chë atšbiama šconjínÿinÿiyënga, chëngbioye atšbiama ínÿenga chamojtsabuayiná ora; <sup>21</sup>as chënga nÿetscanga cánÿíne mo canÿacá chamotsemnana. Ntšamo aca, Taita, átšeftaca cánÿíne mo canÿacá bondmëna y átsnaca ácaftaca, cachcá chëngnaca cánÿíne mo canÿacá bëndátaftaca chamotsemnana cbontseimpadana. Y chca, quem luarentša nÿetsca entsanga, atše šcojichmoma chamotsošbuáchemana. <sup>22</sup>Ntšamo chë obenana y uámanana šconjatšetacá, cachcá átsnaca chënga sënjatšatá. As, ntšamo bëndata cánÿíne mo canÿacá bondmëna, chëngnaca cachcá cánÿíne mo canÿacá chamotsemnana. <sup>23</sup>Atše chëngbe ainaniñe séntsemna, y aca átšeftaca cánÿíne mo canÿacá bondmëna;

as, chëngnaca nÿetsca soyënguiñe cánÿíne mo canÿacá chamotsemnana. Y chca, quem luarentša entsanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

<sup>24</sup>“Taita, atšbiama chënga šconjínÿinÿiye. Atše mëntšá séntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninÿanÿé atše corente bëtšá y obená bétsemnana. <sup>25</sup>Taita, nÿetsca soyënguiñe tšabá amá, masque chë nÿe quem luarama enójuabnaye entsanga ndoñe quecmatábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha. <sup>26</sup>Atše chënga sënjinÿanÿé ntšamo ndegombre aca comnana, y más chanjínÿanÿiye; chca, ntšamo šcondbobonshancá, chëngnaca cachcá chamotsemnobonshánana y atše chëngbe ainaniñe chaitsemnana ca” —Jesús tojánayana.

#### Uayayënga Jesús tmojánishache

(Mt 26.47-56; Mc 14.43-50; Lc 22.47-53)

**18** <sup>1</sup>Chë soyënga Jesús tojéftsanayanentšana, chabe uatsjéndayëngaftaca tojéftsanbocna, chë binche bëjaye Cedrón ca uabáiniye chenguana jama. Chentše inamna canÿe tjashetema; y Jesús chabe uatsjéndayëngaftaca choye tojánamengo. <sup>2</sup>Y Judas, chë Jesús uayayëngbe cucuatšíne boshjuaná, tšabá chë luare yojanábuatma, er Jesús y chabe uatsjéndayënga ba soye chentše imojánenefjuana.

<sup>3</sup>Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoça josticiënga; chënga imojamna chë bachnangbe amëndayënga y fariseungbe ichmónënga; nyetscanga uajuinÿanáshangaca, lamparëshangaca y espadëjangaca uajátënga.

<sup>4</sup>Jesúsna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entsànga tojanéyana: —¿Nda šmojtsenguá ca?

<sup>5</sup>Y chënga tmojanjuá: —Jesús, chë Nazaretocá fsëntsenguá ca.

As Jesús tojanéjua: —Atše cha sëndmëna ca.

Y Judas, chë boshjuaná, chánaca chë entsàngaftaca yojtsemna. <sup>6</sup>Jesús tojanéyana: “Atše cha sëndmëna ca”, y cachora chë entsànga tmojtjanostëtsánanga y fshantsoye tmojánshajaye.

<sup>7</sup>Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup>As Jesús tojanéyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsónëngama ca.

<sup>9</sup>Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínÿinÿiye entsanguentsana ni canÿa pochocaná queochátsmëna ca”.

<sup>10</sup>Simón Pedro canÿe espadëja inasëngbuájonÿana; asna, tojanenosëngbotëntsëna y chë bachnangbe más uámana amëndayabe canÿe oservenábioye catšbioica matscuáše tbojtsanëštjango. Chë oservená Malco ca inauabaina.

<sup>11</sup>As Jesús, Pédrëbioye tbojanianya: “Acbe espadëja matosëngbuajonÿá. Ntšamo atšbe Taitá Bëngbe Bëtsá

tojanmandacá, chë atše puerte ngmënana jtsebomnama, ¿ndoñe chca chaondëtsemna ca?”

**Jesús, Anasbe yebnoça**

(Mt 26.57-58; Mc 14.53-54; Lc 22.54)

<sup>12</sup>Chentsana chë soldadënga, chëngbe amëndayá y Bëngbe Bëtsabe bëts yebnoça josticiënga Jesús tmojánishache y tmojanëcuébatšëca. <sup>13</sup>Natsanëna, Anás, Caifasbe uambën taitábioye Jesús tmojanánatse. Caifás chë uata inamna chë bachnangbe más uámana amëndayá. <sup>14</sup>Caifás yojamna nda judiënga tojanéyana: “Tšëngaftangbiana más tšabá entsemna canÿe boyabása Israeloca entsàngbiana chaóbona ca.”

**Pedro tojánayana Jesúsbioye ndoñe bonjanabuátma ca**

(Mt 26.69-70; Mc 14.66-68; Lc 22.55-57)

<sup>15</sup>Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúsëftaca chabe chashjóntsoñe jashjanguana. <sup>16</sup>Pero Pédrëna nÿe shjoca, amashjuantëšë tojanoquedá. Chcasna, chë inÿe uatsjendayá tojánbocna y chë bëšáša ebtafjuana shembásaftaca tojanoyebuambá. Chora Pedro tbojanëmashëngo. <sup>17</sup>As chë shembása Pédrëbioye tbojanianya: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup>Tša yojtsesëšna causna, chë oservénënga y chë josticiënga shjoca tmojanniñe y chentšë imojtósboniye. Y Pédrënaca chëngaftaca yojtsešbonena.

**Ntšamo chë bachnangbe más  
uámana pasado amëndayá,  
Jesúsbioye tbojantjá**

(Mt 26.59-66; Mc 14.55-64; Lc 22.66-71)

<sup>19</sup>Chora, chë bachnangbe más uámana pasado amëndayá tojanontsé Jesús jatjayama chabe uatsjéndayëngbiana y ndayá cha entsanga yojánabuatambamnaca. <sup>20</sup>Y Jesús tbojanjuá: —Atše nÿetsca entsangbe delante sënjoyebuambá. Sempre chë entsangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nÿetsca judiënga mondbëtsenefjuantëse; y chca, iytëmencá tondaye chiyatoyebuambá. <sup>21</sup>¿Ndayeca chca šcojtsetjaná? Atše palabra tmojouenënga májtjaye, as chënga chacmëyana ntšamo atše tijáuyanama. Chënga mondéatšëmbo ntšamo atše tijayancá ca —Jesús tbojanjuá.

<sup>22</sup>Jesús chë soyënga tojánayana ora, canÿe josticio chentše yojtsemná, Jesúsbioye tbojanjuebjantšetá y tbojanayana: —¿Chca chë bachnangbe más uámana amëndayá cuanjojuá ca?

<sup>23</sup>Y Jesús tbojanjuá: —Ndoñe tšabá tijayanëсна, šmëyana ndayentšë chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup>Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

**Pedro cachiñe tojánayana  
Jesúsbioye ndoñe bonjanabuátma ca**  
(Mt 26.71-75; Mc 14.69-72; Lc 22.58-62)

<sup>25</sup>Chëntscuana, Pedro yojtsešbonena, tsanana chë ñe juachaca. Chora chë

entsanga tmojantjá: —¿Aca ndoñe chabe uatsjendayënguentšá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

<sup>26</sup>Chora, chë bachnangbe más uámana amëndayabe canÿe oservená Pédrëbioye tbojanayana: —¿Atše ndoñe cháftaca chë tjashetëmoca tcbonjinÿe ca?

Chë oservená inamna chë Pedro tbojtsanmatstëtšabe pamillo.

<sup>27</sup>Y Pédrëna cachiñe ndoñe ca tojánayana, y cachora canÿe ngallo yojacánta.

**Jesús Pilatbe delante**

(Mt 27.1-2, 11-14; Mc 15.1-5; Lc 23.1-5)

<sup>28</sup>Chentšana, Caifasbe yebnentsana Jesús tmojanánatse chë romano mandadbe yebnoye. Ya yojtsebínÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canÿe ndoñe judiëbe yebnoye nda tojámshënguse.

<sup>29</sup>Chíyeca Pilato tojánbocna y chënga tojanéyana: —¿Ndayá quem boyabásabe contra šmochjayana ca?

<sup>30</sup>Chora chë entsanga tmojanjuá: —Bacá uamaná ndoñe tontsemnëse, ndoñe matifjuánatse ca.

<sup>31</sup>As Pilato tojanéyana: —Tšëngaftanga matánatse, y ntšamo cach tšëngaftangbe leyíñe iuayancá muabiama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftšátsbomna ndocná jóbama ca.

<sup>32</sup>Chca tojanopasá, ana ntšamo Jesús cachá jóbanama tojanayancá cachá chaotsemnama. <sup>33</sup>As Pilato

cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntsamo šconjatjacá, cach aca chca cojtsejuabnáyeca chca yojtsemna o ínÿenga atšbiama tcmojacuentáyeca ca?

<sup>35</sup> Chora Pilato tbojaniyana: —¿Mo atše judío quetsmëna? Cach ácbioca entsãnga y chë bachnangbe amëndayënga muentše tcmonjúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Afñe tojtsemnësna, atšbe ústonënga muantsatsejaye atše chë judiëngbe cucuatsiñe ndoñe chašmondobshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojaniyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonýná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

<sup>38</sup> Chora Pilato tbojaniyana: —¿Y ndayase chë ndegombre soye yomna ca?

**Jesusbiana tmojánayana chaóbana  
ca**

(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanéyana: —Atše ni mo canÿe soye chiyátinÿena, quem boyabása castiganá chaotsemna ca jayanama. <sup>39</sup> Pero tšëngaftanga

šmondétatšëmbo, Bashco fiestama atše canÿe utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

<sup>40</sup> Chorna nÿetsca entsãnga cachiñe tmojanáyebuachena: —iNdoñe, cha ndoñe! iBarrabás matsboshjona ca! Barrabasna canÿe bacá uamana entsá inamna.

**19** <sup>1</sup> Chora Pilato, Jesús tbojanánatse y tojanmandá chamotsetjanjama. <sup>2</sup> Y canÿe coronësha uchmašëfjangaca chë soldadënga tmojanapormá y Jesús tmojanabestšajó; y canÿe shbuenda uafjatsenga entsáyá mo reycá tmojanichëtjo. <sup>3</sup> Chorna chënga imojtsóbobecocnaye y jtsafchayama imojtsatsëtsnaye: “iBayté judiëngbe Rey cochtsemna ca!” Y imojtsejuebantsetaye.

<sup>4</sup> Pilato cachiñe tojánbocna y entsãnga tojanéyana: —Šmochjouena; cha chanjuábocna, chë boyabása castiganá chaotsemna ca jayanama atše ni mo canÿe soye ndoñe sënjinÿenama chašmotsetatšëmbuama ca.

<sup>5</sup> As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entsáyá mo reycá uichëtjoná. Y Pilato tojanéyana: —iMuentše chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojáninÿe ora, tmojanontsé uayebuáchana: —iMotsecrucificá! iMotsecrucificá ca!

Chora Pilato tojanéyana: —Cach tšëngaftanga mánatse y šmochjacrucificá; atše ni mo canÿe soye chiyátinÿena quem boyabása castiganá chaotsemna ca jayanama ca.

<sup>7</sup> Chora chë judiënga tmojanjuá: —Bëngna canÿe ley fsëndbomna,



ntšamo chiñe endayancana, quem boyabása jóbana bontsemna, Bëngbe Bëtsabe Uaquiñá entsenobiamná causa ca.

<sup>8</sup> Pilato chca tojanuena ora, más yojtsauatja. <sup>9</sup> Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbonjanjuá.

<sup>10</sup> Chora Pilato tbojanियana: —¿Ndoñe šcochanjojuá ca? ¿Ndoñe condétatšëmbo, aca jacrucificama o jëtsboshjonama atše tsobenama ca?

<sup>11</sup> As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšíñe šonjaboshjoná, acbiana más bëts bacna soye tonjama ca.

<sup>12</sup> Cach orscana Pilato yojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —iChacojëtsboshjonësna, Césarbe amigo ndoñe condmëna! iNda rey tojtsenobiamná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puentšë tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtsbéngaca pormániñe ca”. <sup>14</sup> Bashco fiestama canyë te yojtsájamna, y mo nýetsto ora yojtsemna. Chora Pilato chë judiënga tojanéyana: —iMuentšë tšëngaftangbe rey entsemna ca!

<sup>15</sup> Pero chënga tmojanáyebuachena: —iChaóbana! iChaóbana! iMotsecrucificá ca!

As Pilato tojanatjá: —¿Tšëngaftangbe rey atše chjacrucificá ca?

Y chë bachnangbe amëndayënga tmojanjuá: —Bëngbe rey nýe César endmëna, ndocná más ca.

<sup>16</sup> Chentšana Pilato, chëngbe cucuatšíñe Jesús tbojánboshjona chamocrucificama y chë judiënga cha tmojanánatse.

### Jesús tmojanrucificá

(Mt 27.32-44; Mc 15.21-32; Lc 23.26-43)

<sup>17</sup> Jesús tojánbocna chabe cruz tantšajónana y tmojanánatse canyë luaroye, “Obanabe Bestšashe ca” uabáinoye (hebreo biyañe Gólgota ca inauabaina). <sup>18</sup> Chentše cha tmojanrucificá y inyë útatnaca cátaoica tmojanrucificá; Jesusna tsëntsaca. <sup>19</sup> Pilato tojanmandá canyë uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. <sup>20</sup> Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna. hebreo, latín y griego biyañe yojetsábemana. <sup>21</sup> Chca juabemama tojanmandáyeca, chë bachnangbe amëndayënga Pilato tmojanियana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup> Pero Pilato tojanéjua: —Ntšamo tijuábema cachcá chaotsábemana ca.

<sup>23</sup> Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, nýetsca canta soldadëngbiana. Chabe cmešëjua tmojanaca; chëjuana yojanamna nduajonanéjua, nýetsëjua uabianánëjua. <sup>24</sup> As chë soldadënga tmojaneniyana: “Ndoñe matjuátanëca; más tsabana tsbanánoye mochjútšëna, ndabiana yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrënguiñe

endayancá cachcá chaotsemnama, chë  
 “Atšbe entšayangá tmojatenájataye;  
 atšbe cmešéjuamna tsbanánoye  
 tmonjanétšena, ndabiama juaquédama  
 jtsotatsëmbuama ca.” Y lempe chca chë  
 soldadënga tmojanma.

<sup>25</sup> Jesusbe cruz juachaca imojtsemna  
 chabe mamá; chë mamabe quenata  
 María, Cleofasbe shema; y María  
 Magdalena. <sup>26</sup> Jesús chabe mamábioye  
 tbojáninÿe, y chabe juachacna  
 chë Jesusbe bonshana uatsjendayá  
 yojtsemna. Chora chabe mamá  
 tbojaniyana: “Mama, chentše acbe  
 uaqiñá entsemna ca.”

<sup>27</sup> Y chë bonshana uatsjendayá  
 tbojaniyana: “Chentše acbe mamá  
 entsemna ca.”

Cach orscana, chë uatsjendayá  
 chabe yebnentše Jesusbe mamábioye  
 tbojanofja.

#### Jesús tojanóbana

(Mt 27.45-56; Mc 15.33-41; Lc 23.44-49)

<sup>28</sup> Jesús yojtsetátšëmbo ya  
 lempe tojanchnënguama, chíyeca  
 chentšana y ntšamo Bëngbe Bëtsabe  
 uabemana palabrénguiñe endayancá  
 cachcá chaotsemnama, tojánayana:  
 “Šontsajuendá ca.”

<sup>29</sup> Chentše inamna canÿe matbaja  
 buajútjena untja vínoyeca. As, chë  
 soldadënga canÿe esponjëshe chë  
 vínoyeca tmojanfchecuacuá, canÿe  
 hisopo niñëfjiñe tmojananguësëtjo  
 y játsbanase, Jesusbe uayásoye  
 tmojanbeconá. <sup>30</sup> Chë untja vínoye  
 Jesús tojanofšé ora, tojánayana: “Ya  
 lempe tojochnëngo ca.”

Tojanotsejbé y tojanóbana.

#### Canÿe soldado chabe lanzéšaca costillaca Jesúsbioye tbojanashacuá

<sup>31</sup> Bashco fiestama canÿe te  
 yojtsájamna, y chë judiënga ndoñe

imontseboše chë crucificánënga  
 cachentše chë ochnayté  
 chamotsemnama, chë te puerte  
 uámana te bëtsemnayeca. As Pilato  
 tmojanimpadá chë crucificánënga  
 shecuatšënga jetsatcacayama y chë  
 cuerpënga chentšana jtsejuánama  
 chaomandama. <sup>32</sup> As chë soldadënga  
 tmojána y shecuatšënga imojtsatcacaye,  
 natsana canÿa y chentšana chë inÿa,  
 Jesúseftaca yojtsecrucificaná. <sup>33</sup> Pero  
 Jesúsbioye tmojanobeconá ora, ya  
 obaná tmojáninÿe; chíyeca chabe  
 shecuatšënga ndoñe tmonjanatcacá.  
<sup>34</sup> Masque chca, canÿe soldado  
 Jesúsbioye costillaca canÿe lanzéšaca  
 tbojanashacuá. Y cachora buiñe y  
 búyeshe chentšana tonjanóbocna.  
<sup>35</sup> Chë mëntšá cuentayá chentše  
 enjamna y tonjáninÿe, y ndegombre  
 entsichamo; cha endétatšëmbo  
 ndegombre yojtsichámuama,  
 chca, tšëngaftángnaca chiñe  
 chašmotsošbuáchema. <sup>36</sup> Chë soyënga  
 chca tojanopasá, ntšamo Bëngbe  
 Bëtsabe uabemana palabrénguiñe  
 endayancá cachcá chaotsemnama.  
 Chiñe endayana: “Ni mo canÿe  
 betaše cha quemochatsëntšátca  
 ca.” <sup>37</sup> Y ínÿoca, Bëngbe Bëtsabe  
 uabemana palabrénguiñe endayana:  
 “Chë tmojenachentšá bominÿe  
 mochanjabuájua ca.”

#### Jesús tmojanatbontsá

(Mt 27.57-61; Mc 15.42-  
 47; Lc 23.50-56)

<sup>38</sup> Chë soyënga tojanopasá  
 chentšana, José Arimateocá,  
 Pilátbioye tbojanimpadá Jesusbe  
 cuerpo jesocñama chabolesenciama.  
 José inamna Jesusbe canÿe  
 ustoná, masque nÿe iytëcana, chë  
 judiëngbiama auatja causa. Pilato  
 aíñe tbojanlesenciá; as José tojána

y Jesusbe cuerpo yojtśambañe. <sup>39</sup>Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnétsana kilo mirra y áloe enájuabnana. <sup>40</sup>As José y Nicodemo Jesusbe cuerpo tbojanca y tmojanandmaná chë botamana uangüetše soyéngaca unétjona entśéjuangaca. Judiënga chca imnauamana, obaná juatbontsama ora. <sup>41</sup>Jesús tmojanrucificá luarentše canÿe base jajañe inamna, y chiñe canÿe tsëm cuevëshe, entsangbe pormánëshe, obanëngbiana; chëshiñe cabá ndocna obaná mondëjajo. <sup>42</sup>Asna, ñÿe chentše Jesusbe cuerpo tmojansegorá, chë Bashco fiestama canÿe te yojtśajamna causa, y chë cuevëshe chë béconana inámnayeca.

#### Jesús tojtanayena

(Mt 28.1-10; Mc 16.1-8; Lc 24.1-12)

**20** <sup>1</sup>Chë inÿe semana bojatsënté, cabá cachëse, cabá ndëbinÿna ora, María Magdalena chë cuevëshoye tojána y tojáninÿe inÿoca yojtsemna chë cuevëshoye amashjuanentsa ndëtšbé. <sup>2</sup>Asna, tojëftsantójtajo y tojána chë Simón Pedro y chë inÿe uatsjendayá, ndábioye Jesús tša ibnabobonshana ibojtsemnoye. Chora tojanéyana: “Bëngbe Utabnabe cuerpo chë cuevëshentsana tmojtśambañe y ndayentše tmotsejájoma ndoñe queftsátstatšëmbo ca.”

<sup>3</sup>Chora Pedro y chë inÿe uatsjendayá chentšana tbojëftsanbocna y chë cuevëshoye tbojánata. <sup>4</sup>Nÿets útata ibojtsëchamana, pero chë inÿe uatsjendayá Pédrëbiana más betsko tojanótjajo y natsana chë cuevëshoye tojánashjango. <sup>5</sup>Tojanotsejbé y chë chentše tmojanacjá entśéjuangá tojáninÿe, pero choye ndoñe tonjánamashëngo. <sup>6</sup>Chentšana,

Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentše tmojanacjá entśéjuangá. <sup>7</sup>Y chë Jesús juabestšentsacjuama tojanaservé entśéjuana ndoñe chë inÿájuangaca yontsamna, sinó inÿoca botamana uandmanánëjua. <sup>8</sup>Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtanayenama yojtśanošbuaché. <sup>9</sup>Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrenguinië endayancá, chë Jesús obanënguentsana jtayenama ibojamnama. <sup>10</sup>Chentšana chë uatsjendayata chatbe oyenoye tbojtaná.

#### Jesús, María Magdalënbioye

##### tbojánebëbocna

(Mc 16.9-11)

<sup>11</sup>Pero María chentše tojanoquedá, chë cuevëshe juachaca šachénaca; yojtšošachentscuana tojanotsejbé cuevëshoye jarrepárama. <sup>12</sup>Y tojáninÿe uta angelotëmata uafjantsëjua uichëtjonata, Jesusbe cuerpo yojëftsejajonentše ibojtsetbemana. Canÿa tsëntšënëshoica y chë inÿana matsëscoica. <sup>13</sup>Chora chata tmojanianyana: —Shembása, ¿ndayama cošaché ca?

As cha tojanjuá: —Atšbe Utabná tmojtśambañe, y ndayentše tmojtsejájoma ndoñe quetsátstatšëmbo ca.

<sup>14</sup>Chca tojánayana ora, tojanostëtsantješé y tojáninÿe chentše Jesús yojtsemna, pero María ndoñe yontsetátšëmbo cha Jesús bëtsemnama. <sup>15</sup>Chora Jesús tbojanianyana: —Shembása ¿ndayama cošaché? ¿Nda congúá ca?

María yojtsejuabnaye chë boyabásana yojtsemna chentša base

jajañe uaishanýa ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

<sup>16</sup> As Jesús tbojaniyana: —iMaría ca!

Chora María chábioye tojanontješé y tbojaniyana: —iRabuni ca! (hebreo biyañe chca endayana “Buatëmbayá ca”).

<sup>17</sup> Chora Jesús tbojaniyana: —Ndoñe šcatábojajo, er atše cabá ndoñe atšbe Taitábioye quetstëtstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

<sup>18</sup> As María Magdalena tojána y Jesusbe uatsjëndayënga tojanéyana cha chë Utabnábioye tbojáninýe ca y cha chë palabrenga tojánayana ca.

**Jesús chabe uatsjëndayënga tojánëbëbuacna**

(Mt 28.16-20; Mc 16.14-18; Lc 24.36-49)

<sup>19</sup> Tojanibétata ora, cach semana bojatšenté, chë uatsjëndayënga tmojánenefjna canýe luarentše, pero lempe tmojtanatame, chë judiëngbiana auatja causa. Chora Jesús tojánamashëngo, chëngbe tsëntsaca tojantsá y mëntšá tojanacheuá: “Chë atšbe ainaniñe tšabe ebionana tšëngaftangaftaca chaotsema ca.”

<sup>20</sup> Y chca tojanéyana ora, chabe cucuatšënga y costillaca tojaninýañé. Chora chë uatsjëndayënga oyejuayënga imojtsemna, chëngbe Utabná tmojáninýama. <sup>21</sup> As Jesús cachiñe tojanéyana: “Chë atšbe ainaniñe tšabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá

šojichmocá, átšnaca cachcá tšëngaftanga cbontšachamná ca.”

<sup>22</sup> Chca tojánayana ora, chëngbioye tojangou y tojanéyana: “Chë Uámana Espiritu šmochjójyëngañe.

<sup>23</sup> Ndëmuanýenga chëngbe bacna soyëngama chašmojáperdonanga, perdonánënga mochántsatsemna; y ndoñe chašmonjáperdonasna, ndëperdonánënga mochántsemna ca.”

**Tomás, Bëngbe Utabnábioye ainá tbojáninýe**

<sup>24</sup> Pero Tomás, chë Gemelo ca uabobainá, canýa chë bnëtsana uta uatsjëndayënguentšá, chë uatsjëndayëngaftaca ndoñe yontsemna, Jesús tojánashjango ora.

<sup>25</sup> Chíyeca, “bënga chë Utabná fsënjinýe ca”, chë inýe uatsjëndayënga tmojaniyana ora, Tomás tojanéjua: “Atšbe chabe cucuatšinë chë uajabonjana uinýniñe ndoñe sënjinýe, y chiñe atšbe ntšabuafja ndoñe sënjajué y atšbe cucuatšë chabe costillaca ndoñe, ndoñe quichátošbuachiye ca.”

<sup>26</sup> Canýe semana tojanochnëngo ora, chë uatsjëndayënga cachiñe canýe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tšëngaftangaftaca chaotsemna ca.

<sup>27</sup> Chora Tomásbioye tbojaniyana: —Acbe ntšabuafja muentše mojué y atšbe cucuatšë minýe; acbe cucuatšë miyëbo y atšbe costillaca mojué. Y ndošbuachiyá ndoñe matmëmana, sinó atšbe tijtayenama cohtšošbuáchiye ca.

<sup>28</sup> As Tomás tbojaniyana: —iAtšbe Utabná y atšbe Bëtsá ca!

<sup>29</sup> Chora Jesús tbojaniyana: —Tomás, nýe šconjínýeyeca cojtšošbuaché.

iBëngbe Bëtsá chaoma puerte oyejuayënga chamotsemna chë nÿe ntjinÿcá tmojošbuachenga ca!

**Ndayama quem librëša tmojanábema**

<sup>30</sup> Jesús, chabe uatsjédayëngbe delante inÿe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana. <sup>31</sup> Y quem librëšañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chašmojtsošbuachese, chábeyeca chë nÿetsca tescama yomna tšabe vida chašmotsebomnama.

**Jesús, canÿsëfta chabe uatsjédayënga tojánébëbuacna**

**21** <sup>1</sup> Chca tojanopasá chentšana, Jesús inÿe soye chabe uatsjédayënga tojánébëbuacna, Tiberias mar béjaye tsachañe. Chora mëntšá tojanopasá: <sup>2</sup> Cánÿentšë imojëtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjédayata. <sup>3</sup> Simón Pedro chënga tojanéyana: —Sëntsá beonga jashebuáyama ca.

As chënga tmojanjuá: —Béngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena. <sup>4</sup> Ya yojtsebínÿana orna, Jesús chë tsachoca yojtsemna, pero chë uatsjédayënga ndoñe imontsetátšëmbo cha Jesús yojamnama. <sup>5</sup> Chora Jesús tojanatjá: —Básenga, çtondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanéyana: —Barquëshá catsbioica chë atarraiëshá métsëna y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetšá beonga tmojánishëche causa.

<sup>7</sup> As chë Jesusbe bonshana uatsjédayá, Pédrëbioye tbojaniana: “iBëngbe Utabná entsemna ca!”

Simón Pedro chca soye tojanuena y cachora entsáyá tojtánichëtjo, er nduichëtjoná yojtsemna, y chë béjayoye tojanoshbuëtšë. <sup>8</sup> Chë inÿe uatsjédayëngna chë barquëshañe tmojána, y chë atarraiëshá jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca. <sup>9</sup> Fshantsoye tmojánastjajna ora, chënga tmojáninÿena canÿe chebániñe pormániñe, y chentšna canÿe beona y tandësnaca yojtsesegorana. <sup>10</sup> Chora Jesús tojanéyana: “Chë šmonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarraiëshá jútjena bëts beóngaca, uasjójnana tsachóntscoñe tojanëyamba. Mo canÿe patse y shachna brëtsana y unga beóngaca; pero masque nÿetšá beonga, chë atarraiëshá ndoñe ntjuatanëcanana. <sup>12</sup> Chora Jesús tojanéyana: “Mabënga, šmochjase ca.”

Chë uatsjédayënguentšana ni canÿa yontsenñëmua cha jatjayama nda cha yojamnama, er nÿetscanga imojtsetátšëmbo cha chë Utabná bëtsemnama. <sup>13</sup> Chora Jesús tojanobeconá, chë tandëse tojanca y chënga tojanatšatá, y chë beónacnaca cachcá tojanma.

<sup>14</sup> Chóracna, Jesús ya unga soyama chabe uatsjédayënga yojtsanebëbuacana, obanënguentšana tojtananentšana.

**Jesús, Simón Pédroftaca tojanoyebuambá**

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón,

Juanbe uaquiná, ¿quemengbiana más quešcboonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshatemengcá imomnënga, cochtsanýena ca.

<sup>16</sup>Chora cachiñe tbojantjá: —Simón, Juanbe uaquiná, ¿quešcboonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshëngcá imomnënga, cochtsanýena ca.

<sup>17</sup>Y unga soyama tbojtëtantjá: —Simón, Juanbe uaquiná, ¿quešcboonshana ca?

Pedro puerte tbojanongmé, ya unga soyama “quešcboonshana ca” tbojantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshëngcá imomnënga, cochtsanýena. <sup>18</sup>Ndegombre cbëyana: Más bobontse conjamna ora, conjanamana cach aca jtichëtjuana y ndémoye jama cojtseboše choye jtsoñana; pero tanguá chacojtsemna orna, buacuatsënga cochanjatsbaná, y inýa cmochantichëtjo y ndémoye jama ndoñe chacontseboše choye cmochanjuánatse ca —Jesús tbojaniyana.

<sup>19</sup>Chca tojánayana, ana jtsoatšëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtšá y obená bëtsemnama Pedro

yochjáninýanýiyama. Y chca tojánayanentšana, Pédrëbioye tbojaniyana: —Šmasto ca.

#### Jesube bonshana uatsjendayá

<sup>20</sup>Pedro tojesanenostëtšantješë y tojáninýe, Jesube bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbojantjá: “Bëngbe Utabná, ¿nda chë boshjuaná yochtsemna ca?” <sup>21</sup>Pedro chábioye tojáninýe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

<sup>22</sup>Chora Jesús tbojanjuá: —Atšbe quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? Acna nýe šmasto ca.

<sup>23</sup>Chíyeca, chentšana, Jesucristbeñe ošbuáchiyëngbenache nýetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? ca”.

<sup>24</sup>Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondétatšëmbo cha ndegombre soye endóyebuambnama.

<sup>25</sup>Jesús inýe ba soyënga tonjëftsema; tša bëtscá soyënga endmëna, nderado lempe cada canýe soye tcojuábema y librëšangá tcojuapormá, atše sëntsejuabná, nýetsca chëšangá quem luarentše ndoñe nanjuába.

# Hechos

Jesús tojanašebuachená chë  
Uámana Espíritu jíchmuama

**1** <sup>1</sup>Teófilo, atšbe natsana  
libréšañe tcbonjuábobema  
lempe ntšamo Jesús tojanmama y  
tojánabuatambama, chca tojanbojatšé  
orscana, <sup>2</sup>y Bëngbe Bëtsá celoye  
tbojtanatsbanantscuana. Cabá celoye  
ndëta orna, chë chabe ichmonëngcá  
tojanabacacá boyabásengna Jesús  
tojéftsanamëndá, chë Uámana  
Espíritbiajana, ndayá jamama  
yojánamnama. <sup>3</sup>Jesús cruciñe  
tojanóbana y tojtanayenentsana,  
ba soye chë ichmónënga  
yojánëbëbuacana, chca, chënga  
jinñyanñiyama cha ndegombre  
tojtanayenama. Canta bnëtsana  
tentscuana cha yojánëbëbuacana y  
Bëngbe Bëtsabe amëndayama chënga  
yojanabuatambá.

<sup>4</sup>Canye, Jesús chabe  
ichmónëngaftaca yojétsemna  
ora, mëntšá tojanamëndá:  
—Jerusalenentsana ndoñe  
šmatjábocana. Camuentše  
šmochjobátma, ntšamo atšbe  
Taitá tcbonjanašebuachenacá  
chaóshjanguëntscuana, ndayama atše  
tcbonjúuyana. <sup>5</sup>Ndegombre, Juan  
entsanga béjayecca tonjanëbaye; pero  
ndoñe baytesna, Bëngbe Bëtsá chë  
Uámana Espíritu bochanjíchmuama,  
tšëngaftangbe ainaniñe

jtsemándayama cháumashënguama  
ca.

Jesús celoye tojtantsjuá

<sup>6</sup>Canye, chë ichmónënga  
Jesúseftaca cánñiñe imojtsemna  
ora, chënga tmojantjá: —¿César y  
chë Romoquëngbe amëndayentsana  
tašcochjatsebacá, y mora bënga,  
Israeloca entsanga, canye Rey  
quemochtsatsbomna ca?

<sup>7</sup>As Jesús tojanéyana:  
—Tšëngaftanga ndoñe quecmátamna  
chë soyëngama jtsetatšëmbuana.  
Nye atšbe Taitá aínë; y cha, chabe  
obenánaca echanjamánda mocna  
ora y ndayté chca chaopasama. <sup>8</sup>Chë  
Uámana Espíritu tšëngaftangbe  
ainaniñe jtsemándayama chaojabo  
ora, tšëngaftanga obenana  
šmochanjóyëngacñe. Chentsana,  
ntšamo atšbiana šmotatšëmbcá, chë  
tcbonjabuatambá soyënga, entsanga  
šmochjúuyana Jerusalenentsë, nyets  
Judea luariñe, Samarioca y quem  
luarentša nyets luarënguenáchnaca ca.

<sup>9</sup>Chë soyënga tojánayanentsana y  
chabe uatsjëndayënga imojtsonyaye  
ora, Bëngbe Bëtsá, Jesúsbioye  
tbojtanatsbaná y canye jantšeteshe  
chábioye ibojútsbotse y ndoñe más  
tmonjanobená cha jinñyama. <sup>10</sup>Jesús  
celoye yojtsetsjuama chënga bën  
imojtserreparánentscuana, nye  
ndeolpe, uta boyabásata uafjantse

entsayaca bopormánata chéngbe juachaca tbojabántsaye, <sup>11</sup> y chéngbioye tmojanéyana: “Galileoca entsánga, ¿ndáyeca celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjésabo ca.”

**Júdasbe cuenta Matías  
tmojanábuayana**

<sup>12</sup> Jesusbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscóina bécoñe inamna, ndayéntscoca canýe ochnayté jama yojanlesenciana nyetsá. <sup>13</sup> Jerusalenoye tmojtánashjajna orna, chë yebnentša tsbanánoca tsoye tmojtánásëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiná, Simón chë Celote ca uabobainá, y Judas, chë Santiagbe uaquiná. <sup>14</sup> Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catšátangaftaca.

<sup>15</sup> Chë tempo tmojánenefjna canýe patse y uta bnétsana Jesucristbeñe ošbuáchiyënga, y canýe, Pedro tojantsá y tojanéyana: <sup>16</sup> “Jesucristbeyeca atšbe catšátanga, endánëya ntšamo Bëngbe Bëtsabe uabemana palabrenguiñe iuabemancá chaohnënguama, y tempo, David chë Uámana Espíritbeyeca chiñe tojanábema ntšamo Júdaséftaca yochjanopásama; chcasna, Judas uayayënga tojanënatse Jesús chamuishachama. <sup>17</sup> Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuíñe jtsoservénama. <sup>18</sup> Tšëngaftanga šmondétatšëmbo, chë Judas bacna soye tojanmama

tmojtánabuená crocenánacna fshantse tmojánbuamema. Chentšana cha tojtsanótsatše y chabe bestšaše tséntsaca tbojtsanashtétšëna y chabe uafsbentšana nyetsca chabe chunchullëjuangá tojtsanáshana. <sup>19</sup> Jerusalenentše oyenënga chë soyama tmojántatšëmbona ora, chë fshantse chéngbe biyañe Acéldama ca tmojanabaye. Acéldama endayana ‘Buiñe Luare ca’. <sup>20</sup> Salmos librëšañe, Jesucristo uayayëngbe cucuatšinë boshjuanabiamá mëntšá enduábemana: Chabe yebna éñañe chaotsemna y ndocná chentše chaondësiyena ca.

Y mëntšánaca endayana:

Chabe cuenta inýa chabe trabajo chaoma ca.

<sup>21</sup> “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnéntscuana, <sup>22</sup> Juan Jesúsbiyoye tbonjanabaye orscana y Bëngbe Bëtsá Jesúsbiyoye bëngbentšana celoye tbontanatsbanantscuana. Y mora šontsamna canýa mënguentšá juabuáyanama, Jesús tojtánayenama entsángbiyoye bëngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojánabobuatma y ínýengna Justo ca; y chentšana Matías. <sup>24</sup> Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuatma; chcasna, šminýanyé nda quem útatentšana cochjuábuayanana, <sup>25</sup> canýe ichmonacá Júdasbe cuenta chaotrabajama. Judas ya ndoñe canýe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chénga tmojánayana.



<sup>26</sup>Y nda chë ichmoná yochtsemnama jtsotatsëmbuamna tshanányoye tmojanétsena y Matías tbojanobuache; as cach orscana, Jesucristbeñe ošbuáchiyënga chabiamá imojanjuabná mo canýe Jesusbe ustonacá, cachcá ntšamo chë bnétsana canýe uatsjéndayëngbiamá chënga imojanjuabnacá.

**Chë Uámana Espíritu  
ošbuachiyëngbeñe tojánamashëngo**

**2** <sup>1</sup>Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cánýiñe canýe luarentše imojtsemna. <sup>2</sup>Ndeolpe, celocana mo canýe jabuache binýiécá yojsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše. <sup>3</sup>Y chora bichtajënga mo iñeshcá yojónýna y canýánýabeñe yojóátaye. <sup>4</sup>Chca chë Uámana Espíritu tojánamashëngo chëngbe ainaniñe jtsemándayama; chora nyetscanga tmojanontsé inýetšá biyangana, chënga tempo ndmabiyañe, ntšamo chë Uámana Espíritu yojsamcá chënga inýetšá chamotsebiyama.

<sup>5</sup>Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama.

<sup>6</sup>Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojsopasánama, er chë inýe luarocana áshjajnënga imojtsuenana chë Jesucristbeñe ošbuáchiyënga inýetšá biyangana jtsóyebuambnayana, ntšamo cada ona chënga imojanbiyacá. <sup>7</sup>Chë soyëngama

entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondména. <sup>8</sup>Chcase, ñntšámoyeca bënga imojtsobena chënga joyaunayana cach bënga mondëbiyacá ca? <sup>9</sup>Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, <sup>10</sup>Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna; <sup>11</sup>chéngbeñe nderado judiënga camuentše onýnánënga, pero ínýengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inýengna Cretocana y Arabiocánënaca tmojabo. iY bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

<sup>12</sup>Chë causa nyetscanga imojtsenjnanaye y ntšamo jtsejuabnayama ntsetatšëmbcá imojtsemna y imojtsenjnanaye: “¿Ndayá chë soye yojsayana ca?”

<sup>13</sup>Pero ínýengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

**Ntšamo Pedro chora  
tojanoyebuambá**

<sup>14</sup>Chentšana, Pedro tojantsá chë inýe bnétsana canýe ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nyetscanga Jerusalemntše oyenënga, tšabá šmochjouena. Ntšamo tojopasama cbochanjábuaenaye, as chacmésertama. <sup>15</sup>Tšëngaftanga šmontsejuabná atše y atšbe enutënga

tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe.

<sup>16</sup> Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

<sup>17</sup> Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochñengo.

Atše chanjama, atšbe Espiritu nyëtschangbe ainaniñe cháuamashënguama.

Chentšana, tšëngaftangbe uaqiñënga y bemianga atšbe soyëngama entšanga mochantsëtsëtsnaye;

tšëngaftangbe bobontsëngna, atše chanjama soyënga mochantsonyaye mo otjenayoquécá;

y tšëngaftangbe bëtsëjëmëngna atšbe soyënga mochantsotjénaye.

<sup>18</sup> Chca ora, atše chanjama nyëtsca atšbe oservëñgbiama, boyabásenga y shembásenga, chëngbe ainaniñe atšbe Espiritu cháuamashënguama, as chënga atšbe soyëngama entšanga mochantsëtsëtsnaye.

<sup>19</sup> Atše chanjama bëts soyënga celoca; y quem luariñe echántsemna buiñe, ñeshe y ngona mo jantšetëshcá, atšbe obenana jinñanyiyama.

<sup>20</sup> Cabá chë puerte uámana te, chë Bëngbe Utabná bëts soyënga jamama ndobuache ora, shinÿe ndoñe queochátsbuashinÿinÿana y juashcona buánganëtema mo buiñcá echántsemna.

<sup>21</sup> Y as, ndánaca Bëngbe Utabná tbojtsotšëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

<sup>22</sup> Chora Pedro tojatanéyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tmonjaninÿanyé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tmonjaninÿanyé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinñanyiyama. Cach tšëngaftanga chë soyëngama šmondétatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca. <sup>23</sup> Ndegombre tšëngaftangbe cucuatšinë Jesús tmonjánboshjona, pero cabá ndébošhona ora, Bëngbe Bëtsá tojanjuabó ntšamo jopásana vojammama; y ntšamo tšëngaftanga cháftaca šmochjanmámna cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë. <sup>24</sup> Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

<sup>25</sup> Chora Pedro tojatanéyana: “Rey David tempo Jesusbiamna mëntšá tojéftsanabema, ntšamo cha Bëngbe Bëtsábioye tbojaniyanama:

Atšbe Utabná, aca sempre átšeftaca condbëtsemna, y sempre átšeftaca condboquedá atše juajabuáchama, chíyeca ndocná queochatobenaye atše jauátjanama.

<sup>26</sup> Chíyeca atše corente oyejuayá séntsemna, y atšbe uayášaca cbontsatschuaná. Atše masque chanjóbana, tšabá sëndétatšëmbo aca atšbe Bëtsá, atše chaitayenama cochjamama.

<sup>27</sup> Aca, Bëngbe Bëtsá, obanëngbe luarentše ndoñe quešcochátsboshjona, y ndoñe quecochatslesencia acbe uámana oservenabe cuerpo chaotsopochocama.

<sup>28</sup> Aca chë tšabe benache šconjaninÿinÿé, ntšamo tšabe vida jtsebomnama.

Aca átšeftaca condbëtsemnama, atše puerte oyejuayá šéntsemna ca —David tojéftsanabema ca.”

<sup>29</sup> Chentšana Pedro tojatanéyana:

“Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana.

<sup>30</sup> Cach David canÿe Bëngbe Bëtsabe juabna oyebuambnayá inamna. Cha tšabá inatátsëmbo Bëngbe Bëtsá bëtsá tbojanšbuáchenama, Davidbe entšanguentšana canÿa, Cristo, cach Davidcá rey jabemama. <sup>31</sup> David inatátsëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojéftsanabema, obanëngbe luarentše Cristo ndoñe ntjéftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca. <sup>32</sup> Bëngbe Bëtsá tojama Jesús cháuatayenama y bënga cha fsënjinÿe. Chíyeca bënga fséntsetatšëmbo chca ndegombre bëtsemnama. <sup>33</sup> Bëngbe Bëtsá, Jesús celoye tbotanatsbaná chabe catšbioica jtsatsmënama jtsemándayama, y Bëngbe Bëtsá chë Uámana Espíritu Jesúsbioye tbojanëntšabuaché ntšamo chë Taitá tbojanšbuáchenacá. Ntšamo tšëngaftanga šmontsonÿá y šmonsuenancá entsemna, Jesucrístoftaca chë Uámana Espíritu

bëngbe ainaniñe cháumashënguama Bëngbe Bëtsá tojámayeca. <sup>34</sup> David ndoñe Jesuscá celoye tonjána, pero mëntšá tojéftsanábema:

Bëngbe Bëtsá atšbe Utabná

Cristbioye tbonjaniana:

‘Atšbe catšbioica cochtsetbemana, <sup>35</sup> acbe uayayënga acbe cucuatšinë chamoquedama atšbe

obenánaca chjamëntscuana ca.’ ”

<sup>36</sup> Chora Pedro tojatanéyana:

“Tšëngaftanga nÿets Israeloquënga šmochtsetátšëmbo, atše ndegombre cach Jesusbiana sentsóyebauambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

<sup>37</sup> Chë soyënga tmojanuena ora, entšanga cochtsetšenanënga imojtsemna, y Pedro y chë inÿe ichmónëngbioye tmojanéyana: —Baconga, ¿ndayá mora jamama šojtsamna ca?

<sup>38</sup> As Pedro tojanéjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháumashënguama.

<sup>39</sup> Bëngbe Bëtsá chë soyënga tcmonjanašebuachená tšëngaftangbiana, tšëngaftangbe básengbiana y nÿets chë bën luarënguenache imomna entšangbiana, nÿetscanga chë Bëngbe Utabná Bëngbe Bëtsá chábioye jabama chaojubuáyanënga ca.

<sup>40</sup> Inÿe palabrëngnaca Pedro tojatanéyana y bëtsá tojanabuayaná

mëntšá: “iBëngbe Bëtsá chë Israeloca bacna entsanga echanjácastigaye. Chašmótsbocamna, chéngbentsana šmochtsojuánañe ca!”

<sup>41</sup> Ba entsanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entsanga nyëtšá tmojanoboté, Jesucristbeñe ošbuáchiyënga jtsemnama. <sup>42</sup> Chënga corente imojtseboše jtsamama chë Jesusbe ichmónënga imojtsabatambá soyënga. Tšabá yojsacochebiona nyëtscanga cánýiñe jtsemnama y imojanamana mo chë Jesucristbeñe ošbuáchiyëngcá cánýiñe jtsesayana y cánýiñe Bëngbe Bëtsáftaca jtsencuéntayana.

**Ntšamo chë natsana Crístbeñe ošbuáchiyënga vida imnabomna**

<sup>43</sup> Nyëtscanga imojtsenjnanaye, chë ichmónënga bëts soyënga y inýe soyënga chabe obenana jimýanýiyama chamomama Bëngbe Bëtsá tojánmayeca. <sup>44</sup> Nyëtscá chë Jesucristbeñe ošbuáchiyënga sempre cánýiñe mo canýacá imojtsemna y nyëtscá chëngbe bomna soyënga nyëtscangbiana yojtsemna. <sup>45</sup> Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë ínýenga tojtsëjbotcá. <sup>46</sup> Cada te imojanamana Bëngbe Bëtsabe bëts yebnentše jénefnana cha jëtschuyama, y yebnënguenache cánýiñe imojtsesaye oyejuayënga y ndoñe ojëndayënga. <sup>47</sup> Chënga imojanamana Bëngbe Bëtsá jtsatschuanayana, y nyëtscá entsanga imojtsejuabnaye chë Jesucristbeñe ošbuáchiyëngbiana tšabe entsanga imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanýënga cha yojtsatsebacayënga.

**Pedro canýe coshétbioye tbojanshná**

**3** <sup>1</sup> Canýe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsanga imojanamana Bëngbe Bëtsáftaca jtsencuéntayana. <sup>2</sup> Bëngbe Bëtsabe bëts yebnentše canýe cosheto yojtsemna; tojanonýná orscana chca šocá inamna. Entsanga imojanamana cada te cha juanatsana canýe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnějuanënga lemošna chaótejañama. <sup>3</sup> Pedro y Juan Bëngbe Bëtsabe bëts yebnoye jamashënguama chë cosheto tojánanyë ora, canýe lemošna chátbioye yojótejañe. <sup>4</sup> Chatna chë šocá imojtsonýaye, y Pedro tbojaniyana: “Šcochtsënýaye ca.”

<sup>5</sup> As cha yojtsënýaye y yojtsejuabnaye ndayá chjójyëngacñe ca. <sup>6</sup> Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiana jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catsbióicatše y tbojtanatsbaná, y cachora chë cosheto shecuatšiñe y shëmiabeñe añemo yojtsatsbomna. <sup>8</sup> As chë cosheto, canýe jontsënjëse tšabá tojtantsá y tojanontšë tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojtsayontsënjnaye y Bëngbe Bëtsá ibojtsatschuanaye, tbojanshnama. <sup>9</sup> Chë Bëngbe Bëtsabe bëts yebnentše imojëtsemnënga nyëtscanga cha tmojáninýe tšabá jtsanana y Bëngbe Bëtsá jtsatschuanayana. <sup>10</sup> Chënga

imnatátsëmbo cha chë cosheto  
yojamnama, chë nda yojanamana  
Bëngbe Bëtsabe bëts yebnoca, chë  
Botamana Amashjuanentse jótbemana,  
entsanga lemošna jotejañama. Cha  
tšabá yojsatsmënamna entsanga  
ojnanánënga imojtsemna.

**Ntšamo Pedro tojanoyebuambá  
Salomonbe Amashjuana  
ca uabáinentše**

<sup>11</sup>Chë cosheto ya shnaná ora, ndoñe  
yontseboše Juan y Pédrëbentšana  
joluárana. As, nyetsca entsanga  
ojnanánënga tmojanótjajo chë  
amashjuana otsbojebniñe, Salomonbe  
Amashjuana ca uabáinoye, chë  
Juan, Pedro y chë cosheto shnaná  
imojtsemnoye. <sup>12</sup>Pedro chë entsanga  
tojánanyë ora, tojanéyana: “Taitanga  
y mamanga, Israeloquënga, ñdayëca  
chë soyëngama ojanánënga  
šmojtsemna? ¿Ndáyëca nyë  
šcojtsëbuútja? ¿Šmojtsejuabná nyë  
bëndatbe obenánaca quem boyabása  
tifjashná ca? ¿O šmojtsejuabná  
quem boyabása tifjashná bëndata  
Bëngbe Bëtsá puerte tšabá  
ftsadoránayëca? <sup>13</sup>Bëngbe Bëtsá,  
ndábeñe Abraham, Isaac y Jacob  
imojanošbuaché y ndábeñe bëngbe  
bëts taitanga imojanošbuaché, cha  
tonjinýanyé chabe oservená Jesús  
chë más uamaná yomnama. Cha  
tšëngaftanga chë mándayëngbe  
cucuatšiiñe šmonjáboshjona  
chamóbama. Pilato enjëtseboše Jesús  
jëtšboshjonama, pero tšëngaftanga  
Pilatbe delante šmonjánayana chca  
ndoñe šmontsanboše ca, y chíyëca  
Pilato ndoñe tbonanboshjona.  
<sup>14</sup>Jesús uamaná y nyetsca  
soyënguñe tšabá amá enjamna, pero  
tšëngaftangna cha šmontsanaboté  
y Pilato šmonjanimpadá chabe

cuenta canye boyabása, entšá  
obanayá, chabuatsboshjonama. <sup>15</sup>Y  
chca, chë ndegombre tšabe vida  
chašmotsebošnana amábioye  
tšëngaftanga šmonjanóba. Pero Bëngbe  
Bëtsá tojanma cha cháuatayenama y  
bënga chë soye fsënjáninýe y chama  
fsëndétatšëmbo. <sup>16</sup>Jesús puerte obená  
endmëñayëca, quem cosheto añëmoca  
entsatsmëna. Ntšamo šmonjinýe  
y šmonjatatšëmboncá ndegombre  
tonjopasá Jesúsbeñe betsošbuáchema.  
Chë Jesúsbeñe jtsošbuáchiyana  
tonjama cha tšabá tšëngaftangbeñe  
chaotsatsmënama.

<sup>17</sup>“Taitanga y mamanga, atše  
sëndétatšëmbo tšëngaftangbe causa  
y tšëngaftangbe amëndayëngbe  
causa Jesús tojanóbanama. Pero  
tšëngaftanga chca šmojanma, ndayá  
šmojétsamama ntsetatšëmbcá.

<sup>18</sup>Tempo, Bëngbe Bëtsá chë chabe  
juabna oyebuambnayënga tojanamëndá  
entsanga jábuayenama, chë Bëngbe  
Bëtsabe Uámana Uabuayaná puerte  
ngmënana yochtsanbomnama.  
Morna, ntšamo Bëngbe Bëtsá  
tojanayancá ya tonjochnëngo.

<sup>19</sup>Chcasna, ngmënaca menójuabonga  
bacna soyënga šmojtsamama, chca  
amana šmochtsajbaná y Bëngbe  
Bëtsabe benache šmochtishache,  
chca, tšëngaftangbe bacna soyënga  
cha chacmabuajuánama. Chca  
chašmojamëse, Bëngbe Bëtsá  
echanjama tšëngaftangbe ainaniñe  
oyeuayana chašmotsóbošnana, <sup>20</sup>y  
tšëngaftangbioye bochanjíchmuá Jesús,  
chë tempo chabe Uámana Uabuayaná  
Bëngbe Bëtsá tbojanbemá. <sup>21</sup>Canye  
te echanjóshjango, Bëngbe Bëtsá  
lempe tsmëmacá jëtšbemama. Chë  
tentscuana Jesús bontsemna celoca  
joquédana. Chca echanjochnëngo  
ntšamo Bëngbe Bëtsá chabe juabna

oyebuambnayëngbiajana entsanga tojanabuayenacá. <sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtšëtsësnacá cha jtseyeunanana. <sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entsángbentšana luaroca jtsemnana y chamotsepochochocama ca’ —cha tojánayana.

<sup>24</sup> “Y nyetsca chë Bëngbe Bëtsabe juabna oyebuambnayéngnaca Samuel orscana, entsanga tmojanabuayená ndayá quem tempo yochjanchnënguama, ntšamo mora montsonyáca. <sup>25</sup> Chabe juabna oyebuambnayéngaftaca Bëngbe Bëtsá tojanašebuachená bëts soyënga tšëngaftangbiana, y tšëngaftangbe bëts taitángaftaca canye trato tojánbema; chë soyënga cabá tšëngaftangbiana entsemna. Bëngbe Bëtsá Abrahámioye mëntšá tbojanianyana: ‘Chë ácbentšana entsángbeyeca tšabe bendicionënga chanjama nyetsca quem luarentša entsangbiana ca.’ <sup>26</sup> Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnana ca” —Pedro tojánayana.

**Pedro y Juan Jerusalenentša mandadëngbe delante**

**4** <sup>1</sup> Pedro y Juan cabá entsanga imojtsëtsësnaye; chorna chë chata ibojtsemnoye tmojánashajjna

judiëngbe bachnanga, Bëngbe Bëtsabe bëts yebntšá soldadëngbe amëndayá y saduceo ca uabaina judiëngbe amëndayënga. <sup>2</sup> Chatna entsángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashajjna amëndayënga tojánétëna. <sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. <sup>4</sup> Masque chca, banga entsánguentšana, ntšamo Pedro y Juan tbojanayancá tmojanuenënga, añe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nye boyabásenga jacuéntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna. <sup>6</sup> Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nyetsca pamíllangnaca. <sup>7</sup> Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

<sup>8</sup> As Pedro, chë Uámana Espiritu chabe ainaniñe corente jtsemándayëse, mëntšá tojanéjua: —Israeloca mándayënga y bëtsëjemënga, <sup>9</sup> mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.

<sup>10</sup> Chcasna, ntšamo tojopasama cbochanjabuayená, chca, tšëngaftanga y nyetsca Israeloca entsanga chë

soyënga chašmotsetatsëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiana Bëngbe Bëtsá tojanma cháuatayenama.

<sup>11</sup> Jesusbiana Bëngbe Bëtsabe uabemana palabrënguine mëntšá endayana: “Chë yebna jebuanënga tmonsanaboté ndëtšbé, mora chë más bëts uashacuanëšentše entsejájona ca”. Tšëngaftanga šmondmëna mo chë yebna jebuanëngcá, er Jesúsbiye šmonsanaboté y mora cha chë más uamaná entsemna.

<sup>12</sup> Nye cha yobena tšëngaftanga játsebacama. Bëngbe Bëtsá ndocna inye entšábiye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nye Jesucristbe obenánaca aíne ca —Pedro tojánayana.

<sup>13</sup> Chënga imojenjaná Pedro y Juan tša añémoca ibojtsóyebuambnama tmojáninye ora, y chata tempo nduatsjínjenata y librëša nduabuatmata bëtsemnama tmojántatšëmbona ora. Chca chë mándayënga tmojántatšëmbona chata Jesúseftaca bayté ibojamnama.

<sup>14</sup> Y entšanga imojtsonyaye chë tmojanshná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámuaana. <sup>15</sup> As chora tmojanamëndá chentšana chábuaisebocnama y chentše tmojanouedangna chë soyama imojtsenatsësnaye. <sup>16</sup> Chënga imojtsentjanaye: “¿Ndayá chátaftaca mochjama ca? Jerusalemëntše oyenënga montsetátšëmbo chata chë bëts soye Bëngbe Bëtsabe

obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.

<sup>17</sup> Pero entšanga chama ndoñe más chamondëtsencuëntamna, chata mochjáuyana: ‘Ndoñe más entšángbeñe Jesús šmattsebáyana; y ndoñe chašmonjouenëse, jabuache castigo šochántsebomna ca.’ ”

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyanana, ni chabiana entšángbeñe jtsabuátambayana. <sup>19</sup> Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominiñe ndoñe tšabá quenátsmëna tšëngaftangbiye aíne joyaunayana y chábiye ndoñe.

<sup>20</sup> Er bënga queftsátobena jtsajbanana oyeuambnayana chë tifjinye y tifjouena soyëngama ca.”

<sup>21</sup> Chë mandayëngna chátbiye tojtsanautatjá, pero chentšana tmojtanabáshejuana. Nyetasca entšanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinjenana ntšamo chata jácastigama. <sup>22</sup> Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

**Jesucristbeñe ošbuáchiyënga  
Bëngbe Bëtsá tmojanimpadá  
más añemo chauatšatama**

<sup>23</sup> Pedro y Juan ya tmojtanabáshejuana ora, tbojánata chë inye ošbuáchiyëngaftaca jateninjenama y lempe ntšamo chë bachnangbe amëndayënga y bëtsëjemëngcá mándayënga chátbiye tmojanëyancá, chëngbiye tmojanacuntá. <sup>24</sup> Chënga

chca tmojanuენტšana, n̄yetscanga cányiñe tmojanontšé Běngbe Bětsáftaca mēntšá jencuéntama: “Běngbe Utabná, aca chē nda tojama celoca, fshantse, n̄yetsca bėjayēnga y lempe ntšamo chenache yomncá, <sup>25</sup> chē Uámana Espíritbiajana tcojánayana y acbe oservená David, ntšamo tcojanayancá tojanábema, mēntšá:

¿Ndáyeca entšanga yapa imojtsetšátjaye ca?

¿Ndáyeca imojtsejuabná n̄ye bonamentiama soyēnga jamana?

<sup>26</sup> Quem luarentša reyēnga y amēndayēnga imoprontánēnga, n̄yetscanga tmojenoyeuná Běngbe Bětsá y chabe Uámana Uabuayaná chē Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bēts pueblentše, ndoñe judiēngaftaca y israelitēngaftaca tmonjánenefjna, jenóyeunayama ntšamo jamana, Jesús chē acbe uámana oservená y chē Uámana Uabuayaná tcojabemábioye jóbama. <sup>28</sup> Tempo, Běngbe Bětsá, acbe obenánaca y ntšamo icnaboščá tcojanmandá ntšamo mora chaotsemnama, y chēnga chca Jesúseftaca tmonjama. <sup>29</sup> Morna Běngbe Bětsá, mouena ntšamo chēnga montsichamo, bēnga jasúfriama cašojsamna ca; chcasna, cochjama bēnga fchayobená Jesusbe tšabe noticiēnga bēts añémoca entšángbeñe jtsóyebuambnayama, <sup>30</sup> y cochjama acbe obenánaca šoquēnga tšabá chamotsatsmēnama y cochjama bēnga fchayobená bēts soyēnga jamama, Jesús chē uámana oservenabe obenánaca y cha jótšēmbonēse ca” —chēnga tmojánayana.

<sup>31</sup> Běngbe Bětsáftaca jencuéntama tmojanpochocá orna, chē

tmojánenefjntše tojanangmémama; y n̄yetscangbe ainaniñe chē Uámana Espiritu tojanontšé más jtsemándayana, y chēnga tmojanontšé más añémoca Běngbe Bětsabe soyēngama entšanga jábuayenama.

**N̄yetsca bomna soyēnga n̄yetscangbiama yojtsemna**

<sup>32</sup> Jesucrístbeñe ošbuáchiyēnga, n̄yetscanga can̄ye juabna imojtsebomna y ainaniñe cach can̄ye ebionana.

Ndocná ntjatichamuana chabe soyēnga n̄ye chabiama yojtsemna ca, pero añe imojtsichamo, “atše séndbomna soyēnga n̄yetscangbiama entsemna ca”.

<sup>33</sup> Chē Jesusbe ichmónēngna puerte obenánaca mēntšá imojtsichamo: “Fsēnjinye y fsēntsetatšēmbo Běngbe Utabná Jesús obanēnguentsana tojtayenama ca.” Y Běngbe Bětsá yojtsama chē ichmónēnga bētsá tšabe bendicionēnga chamotsebomnama.

<sup>34</sup> Jesucrístbeñe ošbuachiýēngbeñe ndocná yonjamna ndayánaca uajabotá, er n̄yetscanga fshantse o yebna bomnēnga imoanamana jtsatobuíyana, y chē crocénana <sup>35</sup> chē ichmónēngbioye jayentšbuáchiyana, ntšamo tojtsējabotcá n̄yetscanga jujátayama. <sup>36</sup> Chca tojanma can̄ya Běngbe Bětsabe bēts yebnoca trabajayá, José ca uabainá; cha chē ichmónēnga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. <sup>37</sup> Chana, fshantse yojtsatobuiye, y chē crocénana Jesusbe ichmónēngbioye yojáyentšbuachiye, chē uajabótēngbiama chaoservema.

**Ntšamo Ananías y Safíraftaca tojanopasá**

**5** <sup>1</sup> Inamna can̄ye bacó, Ananías ca uabainá, y chabe shemna, Safira



ca. Chatna canÿe fshantse tbojániye.  
<sup>2</sup> Ananías y Safirna tbojanenóyeunata; chcasna, batśá crocénana cachatbiamia tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nyets crocénana ntsachetśá chë fshantsama tbojanosháchiñe ca. <sup>3</sup> As Pedro tbojaniyana: “Ananías, ðndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocénánama jabuambayama ca? Acna chë fshantsama tcmojtabuená crocénántśana cach acbiamia batśá tcontábojama. <sup>4</sup> Cabá ntsatobuiye ora, chë fshantse ácbeshe endánmëna y tcojtsatobuíyentśana chë crocénana acbiana y chánaca condánobena ntśamo tcojtseboścá jamama. ðNdáyeca acbe ainaniñe tcojajuabó chë crocénánama chca jobostérama? Chca jamëse, ndoñe nyë entśángbioye quecatabuambná, sinó Bëngbe Bëtsánaca ca” —Pedro tbojaniyana.  
<sup>5</sup> Ananías chë palabrénga tojanuena ora, obaná tojánshajaye. Y nyetscanga chama tmojántatśëmbonënga corente imojtsauatja. <sup>6</sup> Chentśana, básefta bobontśënga tmojánashajana y Ananíasbe cuerpo entśëjuaca tmojanandmaná y jauábtontśama tmojanamba.  
<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetátśëmbo ntśamo chabe boyáftaca tojanopasama. <sup>8</sup> Chora Pedro tbojantjá: —Ndegombre śmëyana, ðchë śmonjayana nyetśnama chë fshantse śmojiye ca?  
 As chë shema tbojanjuá: —Añe, nyetśnama fsënjiye ca.  
<sup>9</sup> Pedro tbojaniyana: —ðNdáyeca tsëndata šojenoyeuná Bëngbe Utabnabe Espíritu jabuambayama, y

cabá castigo jtsebomnama ndoñe šontsobatmana ca? Acbe boyá jauábtontśama tmonjuambënga muentśe bëšoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatśentśe obaná tojánshajaye. Chë bobontśënga tmojtanamáshjna ora, obaná Safira tmojáninyëna; asna, chentśana tmojanamba y cachabe boyabe juachaca tmojanatbontśá. <sup>11</sup> Y nyetsca Jesucristbeñe ošbuáchiyënga chentśe imojtsemnënga y nyetscanga chë soye tmojántatśëmbonënga, corente imojtsauatja.

**Ba bëts soyënga chë ichmónënga  
tmojanma, Bëngbe Bëtsabe  
obenana jinÿanÿiyama**

<sup>12</sup> Chë Jesucristbe ichmónëngaftaca ba bëts soyënga entśángbeñe yojtsebinÿna Bëngbe Bëtsabe obenana jinÿanÿiyama; y nyetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebntśe. <sup>13</sup> Chë ínÿënga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entśangna chë ošbuáchiyëngbiamia tśabá imojtsencuëntaye. <sup>14</sup> Bëngbe Utabnábeñe ošbuáchiyënga más imojtsóbotena, bëtscá boyabásënga y shembásëngnaca. <sup>15</sup> Tśa bëts soyënga chë ichmónëngaftaca yojtsebinÿna; chíyëca entśanga imojanamana jutsnëshangañe y tjuashënguñe tsáshenoye šoquënga jubuacnana, chca, Pedro chëjana tojtsachnëjuana ora, nyë mo chabe sómbrenaca chëngbe cuerpëjana chaochnënguama, shnánënga jtsatsmënama. <sup>16</sup> Jerusalén chábuañe pueblënguëntśana ba entśanga imojanamana jabana, y

šoquënga y bacna bayëjbe juabna uambayënga imojtsëyabó; y nyetscanga shnánënga imojtsatsmëna.

**Bëngbe Bëtsá tojanma Pedro y chë inye ichmónënga cárcelocana natjëmbana chámuaisebocnama**

<sup>17</sup>Chë ichmónënga tša tsábá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. <sup>18</sup>As chë ichmónëngbiyoe tmojánishëche y chë bëts pueblentša cárceloye tojtsanëtame. <sup>19</sup>Pero ibetna, Bëngbe Utabná canyë ángel tbojanichmó y chë utámenentša bëšašangá cha tojánatëfjo, chënga tojtanëbuacna y mëntšá tojanéyana: <sup>20</sup>“Motsajna, Bëngbe Bëtsabe bëts yebnentše šmochjámashjna, y entsanga šmochjabuayená ntšamo cuanjama chë nyetsca tescama yomna tsabe vida jtsebomnama, Jesucristoftaca cányiñe mo canyáca jtsemnëse ca.” <sup>21</sup>Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontsé entsanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inye chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. <sup>22</sup>Pero chë soldadënga chë utámenoye tmojánashjajna ora, chënga chentše ndoñe tmonjánanyëna. Chcasna, chënga tmojtaná chë mándayënga chca jaúnayama. <sup>23</sup>Y tmojánayana: “Chë utámenoca fsënjinyëna lempe tsábá endëtsëtameñe y soldadëngna nyetsca bëšašangá monduabojanýanga; pero fsënjatëfjo y tsoye fsënjámashjna orna ndocná chibiátinyëna ca.”

<sup>24</sup>Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmnana y imojtsentjanaye ndayá chentšana yochjanopásama. <sup>25</sup>Chorna, chënga imojtsemnentše canyë boyabása tojánashjango y mëntšá tojanéyana: “Chë šmojutámiënga mora Bëngbe Bëtsabe bëts yebnoca montsemna, entsanga montsabuatambá ca.”

<sup>26</sup>Chë soldadëngbe amëndayá tojána soldadëngaca, chë Jesube ichmónënga junatsama; pero nye tsábá tmojanënatse, er chënga entsangbiama imojtsauatja, nderado cachëngbiyoe ndëtsbéngaca muantsëbaye.

<sup>27</sup>Chëngbioca tmojánëshejajna ora, mandayëngbiyoe tmojanënatse; chora chë bachnangbe más uámana amëndayá mëntšá tojanéyana:

<sup>28</sup>—Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tsëngaftanga nyetsca chë Jerusalemntša oyenënga chabe soyëngama šmojtsabuatambá y šmojtseboše, cha tojanóbanama castigo béngbeñe chaotsemnama ca.

<sup>29</sup>Chorna, Pedro y chë inye ichmónënga tmojánayana: —Bënga šontsamna natsana Bëngbe Bëtsá joyeunayana y chentšana entsángbiyoe.

<sup>30</sup>Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tsëngaftanga šmonjanóba canyë cruciñe juajabonjëse. <sup>31</sup>Bëngbe Bëtsá tbojatsbaná y chabe catšbioica tbojëtstbema, jtsamëndayama, y tbojábema entsangbe Unachayá y Atsebacayá, chca, Israeloca entsanga ngmëncana chamuenójuaboma

bacna soyënga imojtsamama y chca amana chamotsajbanama, y chëngbe bacna soyëngama perdonänënga chamotsemnana. <sup>32</sup>Bënga fséntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháumashëngo chë tmojtseyeunanëngbe ainaniñe jtsemándayama ca —chënga tmojánayana.

<sup>33</sup>Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsëbáyama. <sup>34</sup>Pero chë mándayënguentše yojtsemna canÿe fariseo, Gamaliel ca uabainá. Chana canÿe ley abuatambayá inamna y entšanga puerte imnarrespectana. As cha tojantsá y tojanmandá chë ichmónënga ratotema chentšana jubuacnama. <sup>35</sup>Chentšana chë inÿe mándayënga tojanëyana: “Israeloca taitanga, puerte cuedado šmochtsebomna ntšamo quem boyabëngaftaca šmochjamama.

<sup>36</sup>Quem soyama šmochjenójuaboÿe: Ndoñe bayté quenátsmëna, Teudas tonjánbocna y cha enjánichamo canÿe uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá. <sup>37</sup>Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nyetsca chabe ústonënga tmontsanáshana.

<sup>38</sup>Chíyeca atše cbëyana, quem boyabásenga matabáshejuana y

ndocá mataborlánana. Ntšamo chënga montsamancá, nÿe entšangbe juabna y nÿe chëngbe trabajo tojtsemnëse, betesco echanjopochóca. <sup>39</sup>Pero chca Bëngbe Bëtsabe soÿe tomnëse, tšëngaftanga ndoñe quešmochatobenaye jáÿenjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiama ca” —cha tojanëyana.

Y as chënga Gamaliel tmojanoyeuná. <sup>40</sup>Chcasna, chë ichmónëngbioÿe tmojánachembo, tmojtsanachebuánganja y tmojanëyana Jesusbe uabáinaca entšangbeñe ndoñe chamondëtsoyebuambná ca; y chentšana tmojtanabáshejuana.

<sup>41</sup>Chora chë ichmónënga chë amëndayëngbentsana puerte oÿejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiamá oservënënga bëtsemnayeca. <sup>42</sup>Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnana entšangbioÿe imojanabuayiyiná, Bëngbe Bëtsabe bëts yebnentše y yebnënguenáchnaca.

#### Chë ichmónëngbiamá ujabuáchanënga tmojanëbuáyana

**6** <sup>1</sup>Chë tempo, Jesucristbeñe ošbuáchiyënga betesco imojtsóbotena. Chora chë Jesucristbeñe ošbuáchiyëngbentše, chë judiënga griego biyanga batsá imojtsetšátjaye y chë judiënga hebreo biyangbiamá mëntšá tmojánayana: “Chë griego biyange viudángbioÿe ndoñe cachcá quemnatëjabuáchana ntšamo chë hebreo biyange viudángbioÿe cada te montsëjabuachancá ca.”

<sup>2</sup>Asna, chë bnëtsana uta ichmónënga nyetsca chë

Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjajoboto soyënguiñe. <sup>3</sup> Chcasna, baconga y batanga, tšëngaftanguentsana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. <sup>4</sup> Y bëngna šontsamna nÿets tempo Bëngbe Bëtsáftaca jtsencuéntayana y Bëngbe Bëtsabe palabra entšanga jtsabuayiyayana ca” —chënga tmojánayana.

<sup>5</sup> Nÿetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá). <sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšaëntšë jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalemëntšë más ošbuáchiyënga betscó imojtsóbotena. Y ba judiëngbe bachnángnaca tmojanontšë

Jesucristbeñe jtsošbuáchiyana, ntšamo chë ínÿenga imojtsanošbuachecá.

#### Esteban tmojánishache

<sup>8</sup> Esteban, Bëngbe Bëtsabe obenana y chábentsana tšabe bendicionënga yojtsebomnëse, entšángbeñe bëts soyënga yojtsama. <sup>9</sup> Báseftanga “Ya Cachcá Atabashejuana Oservënënga ca” uabainëngna tmojanontšë Estébanoftaca enatsëtsnayana. Chënga imojamna judiënga Cirenoquënga, Alejandriokuënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservënëngbe Yebna ca”. <sup>10</sup> Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. <sup>11</sup> As chënga báseftanga tmojanëbuénaye Estébanbe contra podesca soye chamuayanama, mëntšá: “Cha fsënjoyeuná Moisesbiana y Bëngbe Bëtsabiana ndoñe tšabá jtsóyebuambnayana, mo cuafjoyanguangcá ca.” <sup>12</sup> Chcasc chënga tmojanma entšanga, bëtsëjemëngcá mándayënga y ley abuátambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo. <sup>13</sup> Y tmojanënatse básefta entšanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. <sup>14</sup> Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochóca y caochjama bënga nÿe chabe mandëngaca

mandánēnga chamotsiyenama y ndoñe ntšamo Moisés bēngbe bēts taitanga tojēftsanabuatambacá ca.”

<sup>15</sup>Chē mándayēnga y nyetscanga chentše imojétsetbiamanēnga Esteban tmojanonjinyé ora, tmojáninye chabe jubíá yojtsebuashinjinyana mo canye ángelbe jubiacá.

#### Ntšamo Esteban tojanenēuyaná

**7** <sup>1</sup>Chora chē bachnangbe más uamana amēndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

<sup>2</sup>As Esteban tojanéjua: —Taitanga y baconga, mouenēnga. Bēngbe Bētsá, chē corente uamaná endmēná, Abrahámbioye tbojánébēbocna, cha Mesopotamioca yojaniyena ora; tbojánébēbocna, Harán bēts pueblocá joyénanama cabá nda ora, <sup>3</sup>y Bēngbe Bētsá tbojaniyana: “Metseboshjona acbe fshantse y acbe pamíllanga y cbochanjinjinye luaroye cochjá ca.” <sup>4</sup>As Abraham chabe luare Caldea tojēftsanboshjona y tojána Haránaoca joyénanama. Chabe taitá tojanóbanentšana, Bēngbe Bētsá Abrahámbioye chē luaroye tbojanánatse, chē mora tšēngaftanga šmontsiyenentše. <sup>5</sup>Pero quem luariñe ni mo base fshantse ndoñe tbonjēftsanatsetá, ni mo ndayentše jtsiyenama. Pero añe Abrahámbioye tbojanšbuachená chē fshantse jatšetayama, chabiana y chabe básengbiama, Abraham tojóbanentšana. Chca tbojanšbuachená ora, Abraham ni canye šešona bonjánbomna. <sup>6</sup>Y Bēngbe Bētsá mēntšá tbojaniyana: “Chē ácbentšana entšanga, inyēngbe luaroca áshjajnēnga mochántsemna, y choca oyenēnga chēngbe oservénēnga chēngbioye mochanjábiana

y canta patse uatēntscuana jabuache mochanjasufrina ca.” <sup>7</sup>Y mēntšánaca tbojaniyana: “Pero atše chanjácastigaye chca oservénēnga chacmojábiana luarentša entšanga; y as, chentšana chē ácbentšana entšanga mochanjésebocana y mora bontsemna luaroye mochanjésabo y muentše atše šmochántsadorana ca.” <sup>8</sup>Bēngbe Bētsá Abrahámbioye tbojanšbuachená nye cha y chabe básengbe Taitá cha jtsemnama y jamama tšabe bendicionēnga chēngbeñe chaotsemnama, y chama, chaotsinýnamna tbojanmandá chabe šešona, boyabásetema tojonýná ora, base bobachtema chē más delicadentše jatētsana. Chíyeca, chabe uaquiñá Isaac tojanonýná ora, posufta tianoye Abraham base bobachtema chē más delicadentše tbojantētše. Isaac cachcá tojanma chabe uaquiñá Jacóboftaca y Jacob cachcá tojanma chē chabe bnétsana uta uaquiñēngaftaca. Chēnga monjamna chē Israeloca bnétsana uta bēts pamíllangbe taitanga.

<sup>9</sup>“Quem uaquiñēnga bēngbe bēts taitanga monjamna. Chēngna, chēngbe uabentsá Josébioye envidia imnabomna y tmojtsatanobuiye, Egiptoye canye oservenacá chamotsánatseñama. Pero Bēngbe Bētsá Josébioye nyets tempo ibnauájabuachana, <sup>10</sup>chíyeca nyetsca chabe ngmenēnguentšana tbojanatsbocá y Bēngbe Bētsá tojanma cha chaotsetatšēmbuama tšabá jóyebuambayama chē Egiptoca réybentše, Faraón ca uabainá. Bēngbe Bētsá tojanma chē Faraón chaoyejuá ntšamo José yojamnama; chíyeca Faraón Josébioye tbojánbema Egiptoca mandado y chabe yeñnguentše oyenēngbiámna.

<sup>11</sup>“Chē tempo, Egiptó y Canaán luariñe bēts shēntsana tojanóshjango

y puerte ngménana yojtsemna y bēngbe bēts taitanga ndoñe imontsobena saná jónyēnama. <sup>12</sup> Pero Jacob tojántatšēmbona Egiptoca saná yojtsemnama; asna, chabe uaquiñēnga, chē bēngbe bēts taitanga choye tojanichamó. Chora yojamna chē natsanama chēnga Egiptoye jama. <sup>13</sup> Uta soyama chēnga tmojtesaná ora, José chabe catšátanga tojanéyana: ‘Atse José sēndmēna, tšēngaftangbe uabentsá ca.’ Chca chē Faraón Josebe pamíllangbiana tojántatšēmbona. <sup>14</sup> Chentšana, José tojanmandá chabe taitá Jacob y nyetsca pamíllanga Egiptoye chamotsama. Canyēsēfta bnētsana shachnēnga imojamna chē Egiptoye tmojánanga. <sup>15</sup> Chcasna, Jacob Egiptoye tojána choca joyénanama. Choca cha tojanóbana y chē inye bēngbe bēts taitángnaca. <sup>16</sup> Jacob y chabe básenga, ntšamo imojtsobancá, chēngbe cuerpo Siquem bēts puebløye imojtsatambaye y tmojanētebuantsá, Abraham tojēftsanbuamé cuevēshēnguiñe. Abraham canyē crocénánama Hamorbe uaquiñēngbiøye, chēshēnga yojtēyentšbuamiñe Siquem puebloca. <sup>17</sup> “Ntšamo Bēngbe Bētsá Abrahámbyøye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chēnga imojtsemna. <sup>18</sup> Cabana, Egiptoca inye rey tojanoyayé y cha Josébyøye ndoñe tbonjanabuátmana. <sup>19</sup> Chē reyna, bēngbe entšanga, chē bēngbe bēts taitángbyøye tojanaingñe y tojanma chēnga puerte chamosufrima; tojanamendá, chē tmojtsónyina šešonatēmēnga cachcá jtsēnyayana chamatóbanama. <sup>20</sup> Chē tempo canyē básetema tojanonýná y cha Moisés ca tmojanabaye. Bēngbe Bētsá Moisesbiana oyejuayá yojtsemna

y chabe bētsétsata cach yebnentše tmojanboché unga ishinýentscuana. <sup>21</sup> Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. <sup>22</sup> Chca, chē Egiptoquēnga imnatátšēmbø soyēnga Moisés tmojanbuatēmbá y canyē uámana entšá tojánbocna jóyebuambayama y ndayánaca jamama.

<sup>23</sup> “Canta bnētsana uata tojánashjache ora, tojanenojuabó jama jtsetatšēmbuama ntšamo chē Israeloquēnga, chabe entšanga imojtsemnama. <sup>24</sup> Canyē, Moisés tojáninýe canyē Egiptocá canyē Israelocábbyøye ibojtsejantšetaye ora; as Moisés tbojanoboguiyaná y chē Egiptocábbyøye tbojtsanóba. <sup>25</sup> Moisés yojtsanjuabnaye chē Israeloquēnga yojtsósertana, Bēngbe Bētsá yochjanma cach Moisesbe obenánaca chē Egiptoca mandentšana chēngbyøye játsebacama ca. Pero chē Israeloquēnga ndoñe yontsésertana. <sup>26</sup> Yēfsana, Moisés tojánanýena útata, cach Israelocata, ibojtsentsjanaye; chora cha betsco tojána jetséuyanama y tojanéyana: ‘Tsēndata catšata šondmēna, ¿ndáyeca šojtsentsjanata ca?’ <sup>27</sup> As, chē ínýabyøye ibojtsetsjanayá Moisésbyøye tbojtsanajuatsēntše y tbojanianyana: ‘¿Nda bēngbeñe tcmēnjajayé mandado y chē tšabá o ndoñe tšabá ftsamama chacuayanama ca?’ <sup>28</sup> ¿Cojtseboše átšnaca jóbama, ntšamo tonjopasá yēfse chē Egiptocábbyøye tconjobacá ca?’ <sup>29</sup> Moisés chca tojanuena ora, Madián luaroye tojtsanachá y choca yoyoyena inye luarocana ashjangonacá. Chentše uta uaquiñata yojēftsabamna. <sup>30</sup> “Chentšana canta bnētsana uatēse, entšanga ndoyena luariñe, Sinaí tjañe béconana, canyē ángel tbojánēbēbocna zarzēsha

yojtsángbototjuanentše. <sup>31</sup> Moisés yojenjaná ndayá yojtsonyama y tšabá jinŷama tojanobeconá ora, tojanuena Bëngbe Bëtsá mëntšá ibojtsatsëtsnaye: <sup>32</sup> ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebomna choye jontješiyama. <sup>33</sup> As Bëngbe Utabná tbojaniyana: ‘Motsenóshecbotsca, er aca contsemnentše nŷe atšbiana luare endmëna, er átšnaca chentše séntsemna. <sup>34</sup> Ndegombre sënjinŷe ntšamo atšbe entšanga Egiptoca montsesufrina y sënjouena chëngbe oyaboyuayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ —Bëngbe Bëtsá tbojaniyana.”

<sup>35</sup> Chentšana Esteban tojanéyana: “Quem Moisés entšanga tmojtsanaboté y tmojaniyana: ‘¿Nda béngbeñe tcmënjajayé mandado y chë tšabá o ndoñe tšabá ftsamama chacuyanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëštë tojanobinŷná ángeloftaca. <sup>36</sup> As Moisés, bëngbe bëts taitanga Egiptocana tojésanébuacna y bëts soyënga tojanma, y inŷe soyënga Bëngbe Bëtsabe obenana jinŷanŷiyama Egiptentše, chë Buángana ca uabaina mar béjayentše y entšanga ndoyena luarentše, canta bnëtsana uatëntscuana. <sup>37</sup> Cach Moisés Israeloca entšanga mëntšá tojanéyana: ‘Bëngbe Bëtsá tšëngaftanguentsana canŷa bochanjábema atšcá Bëngbe Bëtsabe juabna oyebuambnayá ca.’ <sup>38</sup> Moisés Israeloca entšangaftaca yojéftsemna chë entšanga ndoyena luaroca. Choca chë entšanga tmojánenefjna Sinaí tjañe béconana. Chentšna canŷe ángel

Moisésoftaca tojanoyebuambá, bëngbe bëts taitángbioye chë buayenana soye Moisés chaóyebuambama, chë entšanga tšabe vida jónŷenama palabrénga; y Moisés chca tojanma, béngnaca chë palabrénga jouenama jobenayama.

<sup>39</sup> “Pero bëngbe bëts taitanga ndoñe tmonjánbošena joyeunayama, masna nŷe tmojtsanaboté y Egiptoye jeshéconama imojtsaiseboše. <sup>40</sup> Moisés cabá chë tja tsjuanoca chë ángeloftaca yojtsemna ora, chëngbe bachnangbe más uamana amëndayá Aarónbioye mëntšá tmojaniyana: ‘Bëngbe Bëtsabe cuenta šmayentšpormá canŷe buashinŷinŷana soye jadórama, bënga chašúnatsama. Er bënga quemátstatšëmbo ndayá yojtsopasana Moisés, chë Egiptocana šonjéftsebuacnáftaca ca.’ <sup>41</sup> As tmojanma canŷe buashinŷinŷana soye mo canŷe uacnabecá y cha jadórama ba bayënga tmojanëbaye, y tmojanóboyejuanga cachënga chë soye tmojanpormáyeca. <sup>42</sup> Chë causa, Bëngbe Bëtsá chëngbentsana tojtsanojuánañe y cachcá tojesanëñyaye chëngbe bacna soyënga causa, estrellatëmënga chamotsadoránama. Chca jochnënguama, Bëngbe Bëtsabe juabna oyebuambayëngbe librëšañe mëntšá endayana, ntšamo Bëngbe Bëtsá tojanayancá:

Israeloca entšanga,  
¿Atše jëtschuayama bayënga  
chešmëñjanëbaye y chë soyënga  
chešmëñjanátšëmbona,  
chë canta bnëtsana uata entšanga  
ndoyena luarentše tšëngaftanga  
šmonjéftsemna ora?

<sup>43</sup> Atše jadóra cuentna, chë  
Molocbiana jebna soye  
šmonjanacutśá y cha  
šmonjánadorana,

y chë Refánbe estréllacnaca cachcá šmonjánama.  
 Chë soyënga mo Bëngbe Bëtsá cuenta šmonjánbomna y cach tšëngaftanga šmonjanobopormá jadórama.  
 Mora chë causa atše chanjama, Babilonientsana más chcoye tšëngaftanga chacmotsénatsama ca” —chiñe endayana.

<sup>44</sup> “Bëngbe tempsca bëts taitanga entsanga ndoyena luaroca, chë jatsjacama opodena yebna imnabomna; chë yebnentše Bëngbe Bëtsá chëngaftaca tojanoyebuambá. Inajebna ntšamo Bëngbe Bëtsá Moisésbioye tbojanmandacá, y cha tojanma ntšamo chaojebuama Bëngbe Bëtsá tbojaninjinjecá. <sup>45</sup> Bëngbe bëts taitangna chëngbe taitángbentsana chë jatsjacama opodena yebna chëngbiamá tmojanóyëngacñe, y chënga chë Canaán luaroye Josuéftaca, chë inye luaroquëngaftaca jéntsajama tmojána ora, chë jebna soye tmojanamba y chocna, Bëngbe Bëtsábeyeca chentša entsángbioye Israeloquëngbentsana tmojtanébuacna; y chë jebna soyna chë tmojanayënjána laurentše tojanoquedá, rey David vojéftsienëntscuana.

<sup>46</sup> David tšabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama. <sup>47</sup> Pero Salomón inamna nda chë Bëngbe Bëtsabe bëts yebna tojanjebuá. <sup>48</sup> Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

<sup>49</sup> ‘Celoca endmëna chë luare ndayentsana atše tsmánda,

y quem luare endmëna nye mo canye tšenëtemcá ndayentše atšbe shecuatšënga chjacajaye.  
 As, ¿ntšamo atšbiamá jebna yebna šmochjajebo ca?’ —chë Utabná jayanana—;  
 ‘o ¿ndaye yebnentše atše jóchnama chjobenaye,

<sup>50</sup> ndegombre cach atše nyetsca chë soyënga tijamëse ca?’ ”

<sup>51</sup> Esteban mëntsánaca tojanéyana: “Tšëngaftanga nyets tempo josértama ndebošënga šmondmëna; šmondbomna ainana mo chë Bëngbe Bëtsábeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espiritu joyeunayana. Ntšamo tšëngaftangbe bëts taitanga monjaninyencá, tšëngaftángnaca cachcá. <sup>52</sup> ¿Bëngbe Bëtsabe juabna oyebuambnayënguentšana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtsanébaye, y mëngna entsángbioye imojobabuayinná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšñe cha šmojoboshjona y šmojobá. <sup>53</sup> Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanéyana.

**Esteban ndëtsbéngaca tmojanóba**

<sup>54</sup> Chentša mándayënga chca tmojanuena ora, Estebanoftaca tmojanotjayaná y tmojanenaftëšbonzentsé, rábiaca imojtsemnama. <sup>55</sup> Pero chë Uámana Espiritu Estëbanbe ainaniñe corente yojtsemándaye. Celoye yojontješiye y Bëngbe Bëtsabe buashinjinyanana yojinje, y Jesús, Bëngbe Bëtsabe



catsbioica vojtsatsana. <sup>56</sup> As, Esteban tojánayana: “iMouenënga, sèntsonyá celoca entsatëfjna y Bëngbe Bëtsá Entšá tbojanbemá Bëngbe Bëtsabe catsbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja.

<sup>58</sup> Chentšana, chënga chë pueblentšana tmojtsanáocna y ndëtšbëngaca tmojtsanatëchënganja. Chë Estébanbioye mal tmojanquedangna entšayangá tmojtsanenátsejca y canyë bobontse, Saulo ca uabainá, tmojesanábonyiñe chaotsinjenama.

<sup>59</sup> Ndëtšbëngaca imojtsénanantscuana, Esteban Bëngbe Bëtsáftaca ibojtsencuéntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentšë y jabuache tojánayana: “iBëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

**8** <sup>1</sup> Saulo chentše vojtsemma y tšabá imojtsama ca vojtsjuabnaye, Esteban tmojanóbama.

#### **Saulo yojánama chë Crístbeñe ošbuáchiyënga chamotsesufrínama**

Cach te, ínÿenga tmojanontšë Jesucrístbeñe ošbuáchiyënga Jerusalenentše ucamenana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbe ichmónënga ndócnoye tmonjánacheta. <sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauábontsama y chabiamana puerte tmojánenobošachna. <sup>3</sup> Chëntscuana, Saulo vojtsentšëna

Jesucrístbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

#### **Felipe Samaria luaroca tšabe noticiëngama yojanabuayiyná**

<sup>4</sup> Y Jesucrístbeñe ošbuáchiyënga tmojanáshañëngna nÿetsquénache imojánabuayiyñaye Jesusbe tšabe noticiënga. <sup>5</sup> Chca, Felipe Samarioye tojána y tojanontšë chë Bëngbe Bëtsabe Uámana Uabuayaná, Cristbiamana, chentša entšanga jábuayenama. <sup>6</sup> Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe vojtsichamcá tšabá imojtseyunana. <sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna. <sup>8</sup> Chë soyama chë pueblentša oyenënga corente imojtsóyejuaye.

<sup>9</sup> Pero canyë pueblentše Samarioca inamna canyë boyabása, Simón ca uabainá; cha tempo inamna canyë bocjuaná y chë Samarioca entšanga chabe soyëngama imojánenÿanayana. Cha yojánichamo cha canyë uámana entšá canjamna ca. <sup>10</sup> Y chábioye corente imnayeunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿinayá ca.”

<sup>11</sup> Y ndegombre chënga corente imnayeunana, er cha chë bocjuanana soyëngaca bayté chë entšanga ingñëngna y ojnanánënga

yojtsabamna. <sup>12</sup> Pero chë luarentša entsangna, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. <sup>13</sup> Y cach Simónënaca Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

<sup>14</sup> Chë Jerusalenoca imojtsemna ichmónënga tmojántatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. <sup>15</sup> Pedro y Juan Samarioye tbojánashjango ora, chentše Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espiritu chëngbeñe cháumashënguama jtsemándayama. <sup>16</sup> Er cabá ni mo cánÿabeñe chë Uámana Espiritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóšeyeca. <sup>17</sup> As Pedro y Juan chëngbe bestšašinë cucuatšënga tbojancjá, y chca, chë Uámana Espiritu tojánamashëngo chëngbe ainaniñe jtsemándayama.

<sup>18</sup> Simón tojáninÿe, chë ichmónënga entsángbeñe cucuatšënga tmojancjá ora, chë Uámana Espiritu chëngbeñe jamashënguama. As chora Simón chë ichmónënga tojanéyana: —Quem crocénana mosháchiñe, <sup>19</sup> y átšnacá chë obenana šmatšetá, y ndábeñnaca cucuatšënga chajajajó ora, chábeñnaca chë Uámana Espiritu cháumashëngo ca.

<sup>20</sup> As Pedro tbojaniana: —iAcbe crocénana infiernoye chaotsá y áncaca, chë Bëngbe Bëtsabe tšetana soye crocénánaca jobuámiñama yopodena ca tcojajuabó causa! <sup>21</sup> Ndegombre, aca béngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa. <sup>22</sup> Ngmënaca cochjenójuaboje quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádoše cmatjaperdóna. <sup>23</sup> Atšë séntsetatšëmbo, acbe ainaniñe tša bacna juabnënga ínÿëngbiana yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojaniana.

<sup>24</sup> As chora Simón tojanéyana: —Bëngbe Utabná atšbiana šochjaimpáda, ntšamo šmonjauyancá ndoñe chandëpasama ca.

<sup>25</sup> Pedro y Juan, ntšamo Bëngbe Utabná Jesucristbiana tbojaninÿcá y ibnatatšëmbcá entsanga imojtsëtsësnaye. Chentšana, Jerusalenoye tbojésanata y tbojánachnënga ba Samarioca publënguëjana, tšabe noticiënga entsanga abuayinÿe.

#### **Felipe y chë Etiopía luaroca reinabe uajabuachaná**

<sup>26</sup> Chentšana, Bëngbe Utabnabe canÿe ángel Felípbioye tbojaniana: “Moprontá y tsmána luarëngoye motsa, Jerusalenentšana Gaza ca uabaina bëts puebloye benachëjana ca.” Chë benachna entsanga ndoyena luarëjana yojanachnëngona. <sup>27</sup> As Felipe yojëftsëtsbaná y tojána. Benachiñe tbojáneninÿena canÿa Etiopía luarocáftaca. Etiopía luaroca canÿe

reiná inamna y chë boyabásana chabe uajabuachaná y chabe cocrocénana bojanýá inamna. Chana Jerusalenoye tojánabo Bëngbe Bëtsá jadórana.

<sup>28</sup> Chora Etiopía luaroye yojsataye, chabe cochéshañe inayésenotbemañe, y chë Bëngbe Bëtsabe juabna oyebuambnayá Isafasbe uabemana librésha yojsaiualíaye.

<sup>29</sup> Chora chë Uámana Espíritu Felípbioye tbojaníyana: “Mobeconá y chë cochésha juachaca cochtsaye ca.”

<sup>30</sup> As Felipe betesco yojobeconá. Chora yojouena chë Etiopía luarocá, Isafasbe uabemana librésha yojsaiualíaye; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjuá: —¿Ntšamo šochjosérta, ndocná šonjabuayenase ca?

Y Felípbioye tbojaníyana: —Diosmanda, atšbe cochéshoye másëngo y atšbe juachaca mabótbema ca.

<sup>32</sup> Isafasbe uabemana libréshañe mëntšá yojsalíaye:

Cha tmojanánatse mo canýe oveshá jóbama cuafjuanatscá; y chë mo canýe oveshá tmojtsëtsbotjné ora, cha iytëca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerta chaosufrima, mo cha canýe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana, quem luarentša chabe vida tmontsanbojuaná causa ca.

<sup>34</sup> Chora chë Etiopía luaroca uajabuachaná Felípbioye tbojaníyana:

—Diosmanda, šmobuayená, ¿ndabiamna Bëngbe Bëtsabe juabna oyebuambnayá chca yojsichamo, cachabiamna o inýabiamna ca?

<sup>35</sup> As Felipe tojanontšé, chë Isafasbe libréshañe yojsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canýe béjaye obëjniñe juachañe ibojsachñëjuana. Chora chë uajabuachaná tojánayana: —Muentšë béjaye entsemna. ¿Ndayeca ndoñe nanjopódia atšë muentšë uabainá jtsemnana ca? Diosmanda, šmabayé ca.

<sup>37</sup> As Felipe tbojaníyana: —Jesucristbeñe nýets acbe ainánaca tcojtsošbuáchese, aíñe echanjopódia juabáyama ca.

Y chë boyabása tbojanjuá: —Aíñe, sëntsošbuaché Jesucristo Bëngbe Bëtsabe Uaquiñá yomnana ca.

<sup>38</sup> As chë Etiopiacá tojanmandá chë cochésha chauátotonama. Chentšana, nýets útata chë béjayoye tbojanashëbëbuástjango y Felipe, chë Etiopioca uajabuachanábioye tbojanabaye.

<sup>39</sup> Chë béjayentšana tbojtanbocna ora, chë Uámana Espíritu Felipe ibojsánatseñe y chë uajabuachaná ya ndoñe más Felípbioye ibontsonýaye, pero corente oyejuayá yojsatoñe. <sup>40</sup> Felipe tojántatšëmbona Azoto bëts puebloca yojtsemnana, y chentšana tojána nýetsca pueblënguenache chë tšabe noticiënga abuayíynaye, Cesarea puebloye jashjanguëntscuana.

### Ntšamo Saulo Crístbeñe ošbuachiyá tojanóbema

(Hechos 22.6-16; 26.12-18)

**9** <sup>1</sup> Saulo chëntscuana cabá Bëngbe Utabnábeñe ošbuachiyënga

yojanautatjná jtsëbáyama. Chama cha tojána chë bachnangbe más uámana amëndayábioye, <sup>2</sup> uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanyé Benache ustoniñe, boyabásenga o shembásenga tojánÿenëse, jótabayama y Jerusalenoye junatsama. Y chca jamama tojánbocna. <sup>3</sup> Pero ya Damasco béconana vojtsaye orna, ñye ndeolpe chabe juachañe celocana canÿe bëts tcuinÿe tojanbuashinÿinÿena. <sup>4</sup> Chora Saulo fshantsoye tojánshajaye y canÿe oyebuambnayana tojanuena, mëntsá: —Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama.

<sup>6</sup> Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

<sup>7</sup> Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er ñye chë oyebuambnayana tmojanuena, pero ndocná tmonjáninÿe. <sup>8</sup> As Saulo fshantsentšana tojtantsbaná y tojtanobuchatëfjona ora, tondaye yontsobena jinÿana. Chcasna, chë inÿenga tmojëftsanobuacuetëntsé y chca, Damascoye tmojanánatse. <sup>9</sup> Chentše yojëftsemna unga te, jinÿama ntšobencá, ni ntjascá y tondaye ntjofšiyá.

<sup>10</sup> Damascoca Jesucristbeñe canÿe ošbuachiyá inoyena, Ananías ca uabainá. Cha Bëngbe Utabnábioye mo

otjenayoquécá tbojáninÿe y Bëngbe Bëtsá tbojaniana: —Ananías ca.

As cha tbojanjuá: —Bëngbe Utabná, ¿ndayá chjama ca?

<sup>11</sup> Y Bëngbe Utabná tbojaniana: —Moprontá y motsa chë “Ndericho tsáshenañe ca” uabáinoye, y Júdasbe yebnentše cochjanotícia canÿe boyabásabiama, Saulo ca uabainábiamna, Tarso pueblócá; cha mora Bëngbe Bëtsáftaca bentsencuénta. <sup>12</sup> Saulo ya tonjinÿe mo otjenayoquécá, canÿe entšá Ananías ca uabainá entsamashjuana y chabe cucuatšënga chabe bestšašañe entsejájua, chca, cha chabuatabínÿnama ca.

<sup>13</sup> Ananías chca tojanuena ora, tojánayana: —Bëngbe Utabná, banga ba soyënga chabiamna šmonjaceutá; Jerusalenoca tša bacá acbe entšanga imomnënga tojáborye. <sup>14</sup> Y mora entsebmoma mando chë bachnangbe amëndayëngbentsána, muentše aca otšëmbuanënga jótabayama ca.

<sup>15</sup> As Bëngbe Utabná tbojaniana: —Motsa, er atše cha sënjuábuayana atšbiamna chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbiamna chamotatšëmbonama.

<sup>16</sup> Atše cha chanjinÿinÿiye ntsachetšá ibojtsemna átšbeyeca jasúfriama ca.

<sup>17</sup> As Ananías tojána Saulo vojtsanmëna yebnoye. Tojánamashëngo ora, Saulëbe bestšašañe chabe cucuatšënga tojanjájó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínÿnama y chë Uámana Espiritu acbe ainaniñe jtsemándayama cháumashënguama ca.”

<sup>18</sup> Cachora, Sáulëbe bominÿentšana mo beonbe bobachëshëngcá

tojanquécjana, y chca, ibojtsatabinýna; chora tojantsbaná y tojanenábaye.

<sup>19</sup>Chentsána, Saulo tojanse y añemora yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

#### **Damasco puebloca Saulo entšanga yojanabuayiná**

<sup>20</sup>Saulo cachorscana tojanontšë jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama.

<sup>21</sup>Chë imojtsuenanënga nýetscanga imojtsenjanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascocoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšinë jabáshejuanama.”

<sup>22</sup>Pero Saulo cada ora más añémoca yojtsóyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chýeca chë Damascoca judiënga ndoñe imontsobena ntšamo cha jojuana.

#### **Ntšamo Saulo judiëngbentšana tojtsanachá**

<sup>23</sup>Bayté tojanochnëngo ora, judiënga tmojanenoyeuná ntšamo jamëse Saulo jóbama, <sup>24</sup>pero Saulo chë soye tojántatšëmbona. Bnëtë y ibeta, chë bëtš pueblentša bëššanguenache chënga chabiana imojananyá, jtsóbama; <sup>25</sup>pero chë Jesucristbeñe ošbuáchiyënga, ibeta, cha canýe bëtš sbarëcuiñe tmojtsanatsuamá, y chë pueblentša shéconana tapišëjana tmojtsanëštjango. Chca cha tojanotsbocá.

#### **Saulo Jerusalenoca**

<sup>26</sup>Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nýetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. <sup>27</sup>Chcasna, Bernabé Sálulëbioye tbojéftsantbetšë y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninýama, ntšamo Bëngbe Utabná tbojanianama y ntšamo cha Damascoca tša añémoca Jesusbiana entšanga tojánabuayenama. <sup>28</sup>As Saulo Jerusalenentšë tojanototona y chë Jesucristbe ichmónëngaftaca yojánana. Bëngbe Utabnabiana bëtš añémoca entšanga yojanabuayiná y <sup>29</sup>yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama.

<sup>30</sup>Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentsána Tarso puebloye tmojanichmó.

<sup>31</sup>Y chca, Jesucristbeñe ošbuáchiyënga Judeoca, Galilea y Samaria luarentšë chora ya ndoñe más montsansufrina y natjëmbana imojtsemna, y nýetscanga más ošbuáchiyana imojtsebomna. Ntšamo Bëngbe Bëtšá yojanbošcá, imojtsaniyena cha jtsatschuanayëse; y chë Uámana Espiritbe uajabuáchenanaca, Jesucristbeñe ošbuáchiyënga más tmojanoboté.

#### **Pedro Enéasbioye tbojanshná**

<sup>32</sup>Pedro yojánabuache nýetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámna tojána.

<sup>33</sup>Lida pueblentšë canýa tbojáninýena,

Eneas ca uabainá. Cha jama ndobená inamna y posufta uata jutsnéshañe chca inajájona. <sup>34</sup>Pedro tbojanianyana: “Eneas, Jesucristo tcomnjashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

<sup>35</sup>Nyetscanga chë Lida pueblentse y Saronoca oyenënga chë entsá shnaná tmojáninye. Y as, chënga bacna soyënga amana tmojtsanajbaná y cach orscana tmojanontsé Bëngbe Utabnábeñe ošbuáchiyana.

#### Pedro tojanma Dorcas cháuatayenama

<sup>36</sup>Chë tempo, Jope pueblota yojaniyena canye shembása Jesucristbeñe ošbuachiyá, Tabita ca uabainá, o griego biyaña Dorcas ca. Cha nyets tempo tsabe soyënga yojánama y yojanamana chë tojtsëjabetënga jujabuáchana. <sup>37</sup>Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanaajó. <sup>38</sup>Jope inamna Lida béconana, y Lidentse Pedro yojtsemna; y chë Jope pueblentse Jesucristbeñe ošbuáchiyënga tmojántatsëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betso Jope pueblote mabo ca.”

<sup>39</sup>As Pedro tojëftsantsbaná y chë uta boyabásaftaca tojána. Choye tmojánashjajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinjinynaye chë Dorcas yojuajonaná entsayangá y cmešëjuangá, cabá chëngaftaca yojëftsemna ora.

<sup>40</sup>Pedro tojanmandá nyetscanga chentšana chamotsebocanama; chora Pedro yojoshëntsamentšiyë y Bëngbe Bëtsáftaca ibojencuentá. Chentšana, Pedro chë obanábioye tbojanonjinýë y tbojanianyana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninye ora, tojanótbema. <sup>41</sup>Chora Pedro tbojanábuacueshache y tbojtanatsbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë ínýënga, y Dorcas ainá tojtaniyanýë. <sup>42</sup>Chë soye nyets Jope pueblentse tojanótatsëmbona y banga Bëngbe Utabnábeñe imojtsošbuáchiye. <sup>43</sup>Y Pedro bayté Jope pueblentse tojanoquedá, Simón chë bobáchëshiñe trabajayabe yebnentse.

#### Pedro y Cornelio

**10** <sup>1</sup>Cesarea pueblentse inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá. <sup>2</sup>Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcnaye chë judiënga ndbomnjëmënga jujabuáchama y sempre Bëngbe Bëtsáftaca ibnëncuentaye.

<sup>3</sup>Canye te, mo bëts mošenana ora, cha botamana tojáninye mo otjenayoquécá, mëntšá: Bëngbe Bëtsabe canye ángel Cornelio yojtsemnoye yojtsamashjuana y tbojanianyana: —iCornelio ca!

<sup>4</sup>Cornelio chë ángelbioye ibojtsonýaye y auatjananá tbojanianyana: —Taita, ¿ndayá yojtsemna ca?

Y chë ángel tbojanianyana: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyëjuá y

lempe cmochanjóyeunaye. <sup>5</sup> Chcasna, mora básefta boyabásenga Jope bêts puebloye michamó y Simón, chë Pedro ca monduabobuatmá, moye chamuánatse. <sup>6</sup> Cha posada entsebomna inye Simónbentse, chë bobácheshiñe trabajayabe yebnentse. Chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentsana útata tojánachembo y canye soldádnaca, chabe uajabuachaná, Bëngbe Bëtsá adorayá; <sup>8</sup> lempe ntšamo yojopasacá chënga tojanacuntá y chentšana Jope puebloye tojanichamó.

<sup>9</sup> Yëfsana mo njetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánasëngo, Bëngbe Bëtsáftaca jencuéntama. <sup>10</sup> Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquécá mëntšá tojáninye: <sup>11</sup> Celoca yojtsatëfjna y mo canye bêts entsayëjuacá yojtsabá y njets canta sibientsana yojtsëjonyana. <sup>12</sup> Chë entsayëjuañe imojtsemna njetscna bayënga, ósjojnaye bayënga y njetscna shloftšëngnaca. <sup>13</sup> Y tojanuena canye oyebuambnayana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atšbe ndocna te chiyáisesse Moisesbe leyiñe ndoñe yondëlesenciana jasama bayënga y chë jasama ndoñe tsábá imomna bayënga ca.

<sup>15</sup> Y cachiñe tojtétanuena chë oyebuambnayana mëntšá: —Bëngbe Bëtsá tojalesenciá y canye bayá tsábá jasama yomna ca tojayanëse, aca

ndoñe matsjuabnana chë bayá jasama ndoñe tsábá yontsemna ca.

<sup>16</sup> Chë soye unga soyama chca tojanopasá chentšana, chë entsayëjua celoye tojtanátsjua. <sup>17</sup> Pero Pedro ndoñe yontsetátšëmbo ntšamo tojaninýca ndayá chabiama yojtsayanama. Chëntscuana, chë Cornéliëbe ichmónënga noticiánana Simónbe yebnocca tmojánashhajna y shjoca bëshoca imojtsobátmana. <sup>18</sup> Tmojanchembo ora, tmojanënoticiá Simón, chë Pedro ca uabobainá, chentse taibojatanama.

<sup>19</sup> Pedro, ndayá tojáninyama chabosertama yojtsenójuabnantscuana, chë Uámama Espiritu tbojaninyana: “Mouena, muentse mora unga boyabásenga cmontsenguá.

<sup>20</sup> Motsbaná, mocana matastjango y yapa ntjatenójuabnaycá chëngaftaca cochjá, er atše chënga sënjichamó ca”.

<sup>21</sup> As Pedro tojtananstjango y chë tmojánashhajñenga tojanéyana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjúá: —Cornelio šonjichamó. Cha endmëna chë soldadëngbe amëndayá, canye tsábá mándbomna entšá y Bëngbe Bëtsábioye adorayá, y njetasca judiënga chabiama tsábá mondbëtsoyebuambnaye. Bëngbe Bëtsabe canye ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

<sup>23</sup> As chënga tojanémashengo y posada tojanéyentsame. Yëfsana Pedro chë unga boyabásengaftaca tojána. Básefta Josucrístbeñe ošbuáchiyënga Jope pueblentsënga Pedro tmojantjëmbambá.

<sup>24</sup> Chë inye yëfsana Cesarea puebloye tmojánashhajna. Chentse Cornelio

Pédrêbîama vojtsobatmana, y Cornelio tojanébuaja pamíllanga y tsábe amiguégnaca chentšê imojtsemna.

<sup>25</sup> Pedro tojánashjango ora, Cornelio tojánbocna jajébenguama y chabe shecuatšentšê vojshéntsamentšiyê cha jadórama. <sup>26</sup> Pero Pédrêna tbojtánatsbaná y méntšá tbojaníyana: —Matétsbaná, atšê cach aquécá nÿe canÿe entšá sêndmêna ca.

<sup>27</sup> Pedro Cornélioftaca encuéntaye chê yebnentšê tojánamashêngo y ba entšanga tojánanÿena, chentšê tmojanótotênga. <sup>28</sup> Chora Pedro tojanéyana: —Cach tšêngaftanga šmondétatšêmbo chê judiêngbe leyênguiñe endayana ndoñe yondopodena canÿe judío ndoñe judío entšángaftaca jenútanama y ni mo chêngbe yebnênguenache jábuachama ca. Pero Bêngbe Bêtsá šonjinÿinÿé atšê ndocna te šondmêna ínÿabíama jatsjuabnayana cháftaca jenútanama ndoñe tsábá yondmêna ca. <sup>29</sup> Chíyeca, šmonjobetšê ora, ndocá ntjatichamcá nÿe sênjabo ca.

Chora tojanatjá: —¿Ndáyeca šmojobetšê ca?

<sup>30</sup> As Cornelio tojánayana: —Canta te entsemna, camêntša ora, muentšê sêndánmêna Bêngbe Bêtsáftaca encuéntaye y ndeolpe sênjinÿe atšbe delante canÿe boyabása uabuashinÿinÿana entšayaca bopormaná. <sup>31</sup> Cha šonjauyana: “Cornelio, Bêngbe Bêtsá condbétseimpadanama y chê ujabótênga condbétsêjabuachanama, Bêngbe Bêtsá ácaftaca entsoyejuá y lempe cmochanjóyeunaye ca. <sup>32</sup> Básefta boyabásenga Jope bêtš puebloje michamó y Simón chê Pedro ca monduabobuatmá moye chamuánatšê ca. Cha posada entsebomna inÿe Simónbentšê, chê bobáchêshiñe

trabajayabe yebnentšê, y chabe yebna mar bėjaye tsachañe endmêna. Cha cmochanjauyana ndayá jamama cmojtsemna ca.” <sup>33</sup> Chcasna, cachora sênjichamó aca jobetšama, y aslêpaye jabama tcojóyaunama. Y as morna, nÿetscanga Bêngbe Utabnabe delante fsêntseprontana jouenama lempe ntšamo Bêngbe Bêtsá tmojamandacá ca —cha tojánayana.

#### Ntšamo Pedro tojanoyebuambá Cornéliêbe yebnentšê

<sup>34</sup> Pedro chora tojanontšê méntšá jóyebuambayama: —Mora atšê šontsosertana, ndegombre Bêngbe Bêtsabíama nÿetscanga cachcá uámanênga imomnama. <sup>35</sup> Nÿets luarênguenache Bêngbe Bêtsá júbuajana cha tmojtsatschuaná y tsábe soyênga tmojtsamênga. <sup>36</sup> Tšêngaftanga šmondétatšêmbo, Bêngbe Bêtsá Israeloca entšanga tojánabuayenama, tsábe noticiênga jtsóyebuambnayêse, chênga nÿetscanga ainaniñe tsábe ebionana chamotsebomna, Jesucristbeyeca; y cha endmêna nÿetsca entšangbe Utabná. <sup>37</sup> Tšêngaftanga šmondétatšêmbo ntšamo nÿets Judeoca tonjanopasama. Chê soye Galilea luaroca tojanobojobatšê, Juan entšanga yojanabuayiná orscana, chênga bacna soyênga amana chamotsajbanama y chamuenábayama. <sup>38</sup> Šmondétatšêmbo ntšamo Bêngbe Bêtsá, Jesús Nazaretocábíoye tbojanábuayanama y tojanma chê Uámana Espíritu chabe ainaniñe cháumashênguama, y tojanma Jesús corente obená chaotsemnana; y šmondétatšêmbo ntšamo Jesús enjánana entšangbíama tsábe soyênga amiñe y nÿetscanga chê Satanás yojánama chamosufrimênga áshnaye, er Bêngbe Bêtsá cháftaca vojtssemna.



<sup>39</sup>“Bënga fsënjáninÿe y fsëndétatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canÿe cruciñe jacrucificase. <sup>40</sup>Pero Bëngbe Bëtsá tonjanma unga tianoye cha cháuatayenama y béngbeñe chaonÿnama. <sup>41</sup>Cha nÿetsca entšangbe delante ndoñe chenátanbocna, pero aíñe béngbeñe, chë tempo Bëngbe Bëtsá šojanëbuáyanënga, Jesús tojtananenama chamuinÿama. Y tojtananenentsana bënga cháftaca fsënjanse y fsënjanosé. <sup>42</sup>Cha šonjichamó ntšanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiama y ainëngbiama yochjayana tšabá o ndoñe tšabá tmonjamama. <sup>43</sup>Bëngbe Bëtsabe juabna oyebuambnayënga nÿetscanga cach Jesusbiama tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

**Ndoñe judiënga chë Uámana  
Espíritu tmojanóyëngacñe**

<sup>44</sup>Pedro chë palabrenga cabá yojtsoyebuambnantscuana, chë Uámana Espiritu tojánamashëngo nÿetsca chë imojtsuenanëngbe ainaniñe jtsemándayama. <sup>45</sup>Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espiritu ndoñe judiëngbeñnaca cháuamashënguama Bëngbe Bëtsá tojanmama. <sup>46</sup>Chënga imojtsuenana chënga inÿetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

<sup>47</sup>Chora Pedro tojánayana: “Pero mëngna chë Uámana Espiritu

tmonjóyëngacñe ntšamo bënga tmonjóyëngacñecá. Chcasna, ndocná queochatobenaye jamana chënga uabáinënga ndoñe chamondétsemnama ca.” <sup>48</sup>As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

**Ntšamo Pedro chë**

**Jerusalenoca imojánenefjuana  
ošbuachiyëngbioye tojanëyana**

**11** <sup>1</sup>Jesucristbe ichmónënga y chë Judeoca Jesucristbeñe ošbuáchiyënga tmojátatšëmbona, chë ndoñe judiëngnaca Bëngbe Bëtsabe palabriñe imojtsošbuáchemá. <sup>2</sup>Pero Pedro Jerusalenoye tojesaná ora, báseftanga chabiama ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tétšënénga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. <sup>3</sup>As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup>Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: <sup>5</sup>—Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninÿe celocana mo canÿe bëts entšëjuacá átšbioye enjétsabeconaye y nÿets canta sibiocana enjétsëjonÿana. <sup>6</sup>Y botamana sënjanrrepará ndayá chë tsoye bëtsemnama y sënjáninÿe choye monjëtsemna uamna y tjoca bayënga, ósojnyaye bayënga y nÿetscna shloftšëngnaca. <sup>7</sup>Y sënjanuena canÿe

oyebuambnayana mēntšá: “Motsbaná, Pedro; mobaye y quem bayēnga mose ca.”<sup>8</sup> Chora atše sēnjánayana:

“Bēngbe Utabná, ndoñe; atše ndocna te chiyáisece chē Moisesbe leyīne ndoñe yondēlesenciana jasama bayēnga y jasama ndoñe tšabá imomnēnga ca.”

<sup>9</sup>Chentšana cachiñe sēntētānuena chē celocana oyebuambnayana mēntšá: “Bēngbe Bētsá tojalesenciá y canye bayá tšabá jasama yomna ca tojayanēse, ndoñe matsjuabnana chē bayá jasama ndoñe tšabá yontsemna ca.”<sup>10</sup> Chē soye unga soyama chca tonjanopasá y chentšana chē entšējua celoye tontanátsjua.<sup>11</sup> Y cachora unga boyabásenga Cesarea pueblócana ichmónēnga, chē posada sēndbomnentše tmojanashjajna, atše janguanguama.

<sup>12</sup> Y chē Uámana Espíritu šonjanmandá atše yapa ntjatenojwabnycá chēngaftaca jama; y quem chnēnguana Jesucristbeñe ošbuachiyēngnaca átšeftaca tmojáná. Nyētscanga canye entšá Cornelio ca uabainabe yebnoye fsēnjánamashjna; <sup>13</sup> y chana bēnga šonjanacuntá ntšamo tojáninye, cachabe yebnentše canye ángel ibojtsebiatsana y mēntšá tbojaniyana: “Básefta boyabásenga Jope bēts pueblōye michamó y moye chamuánatse Simón, chē Pedro ca monduabobuatmá,<sup>14</sup> y cha cmochanjabuayená ntšamo aca y acbe yebnentša oyenēnga šmochjotsbocá ca.”<sup>15</sup> As, atše jóyebuambayama sēnjanbojatsé orna, chē Uámana Espíritu tonjánamashēngo chēngbe ainaniñe jtsemándayama, ntšamo bēngbeñe natsana tonjanamashēngcá.

<sup>16</sup> “Chora sēnjanenojuabó ntšamo Bēngbe Utabná tonjánayanama: ‘Ndegombre, Juan entšanga bėjayeca tonjanēbaye; pero Bēngbe Bētsá chē Uámana Espíritu bochanjíchmua, tšēngaftangbe ainaniñe

jtsemándayama cháumashēnguama ca.’<sup>17</sup> Chcasna, chēngnaca Bēngbe Bētsá chē Uámana Espíritu tonjatsatá, ntšamo bēnga, chē Utabná Jesucristbeñe ošbuachiyēnga, šonjanatsatacá. Y chca, atše ndoñe quetsátsmēna canye tša uamaná, Bēngbe Bētsá jauyanama ntšamo cha yobošcá ndoñe chaondētsemna ca.”

<sup>18</sup> Jerusalenoca Jesucristbeñe ošbuachiyēnga chē soyēnga tmojanuena ora, ndocá más tmojanantjá y Bēngbe Bētsá tmojtanchuá, mēntšá: —iAsna, Bēngbe Bētsá chē ndoñe judiēngnaca tojalesenciá chēngbe bacna soyēngama ngmēnaca chamuatenójuaboma y chca amana chamotsajbanama, chē nyētsca tescama yomna tšabe vida chamotsebomnama ca!

**Ntšamo Antioquía pueblōca  
tojanobojatsé, entšanga  
Jesucristbeñe ošbuachiyana**

<sup>19</sup> Esteban tmojanóba chentšana, tmojanontsé chē Jesucristbeñe inye ošbuachiyēngnaca jatēcamiyama. As chentšana báseftanga yojtsamna bēn luarēngoye jtsachetēngana Fenicioye, Chipre y Antioquía luarēngoye, y chenache chēnga Jesucristbe soyēngama imojanoyebuambná, pero nye judiēngbiama.<sup>20</sup> Pero báseftanga imojamna Chipre y Cirene luaroquēnga, y chēnga Antioquía bēts pueblōye tmojánashjajna orna, chē ndoñe judiēngbeñnaca tmojanoyebuambá, Jesús, chē Utabnabe soyēngama jabuayenase.<sup>21</sup> Bēngbe Utabnabe obenana chēngaftaca yojtsemna, y chca, ba entšanga tmojanajbaná bacna soyēnga amana y tmojanontsé Bēngbe Utabnábeñe jtsošbuachiyana.

<sup>22</sup> Jerusalenoca Jesucristbeñe ošbuachiyēnga chē soye

tmojántatšëmbona ora, Antioquía luaroye Bernabé tmojanichmó.

<sup>23</sup> Bernabé choye tojánashjango orna, tojáninýe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nýetscanga tojanabuayená chamotsiyena nýets ainánaca Bëngbe Utabnábeñe jtsošbuáchiyëse. <sup>24</sup> Bernabé inamna canýe entšá tšabe soyënga amá, chë Uámana Espíritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso puebloye tojána Saulo janguanguama, <sup>26</sup> y tbojáninýena ora, Antioquía luaroye tbojéftsanbetše. Antioquía luarentšna canýe uata nýetsá Jesucristbeñe ošbuáchiyëngaftaca cánýiñe ibojéftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tmojána. <sup>28</sup> Chënguentšana canýa Agabo ca uabainá tojantsá y chë Uámana Espíritbeyeca tojánayana, mëntšá: “Nýets luariñe entšanga oyeñiñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. <sup>29</sup> Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocénanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. <sup>30</sup> Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbiyoe.

**Santiago tmojanóba;  
Pedro tmojanëtame**

**12** <sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámiamia y játsetšenama. <sup>2</sup> Tojanmandá espadéjaca chamóbama Santiago, Juanbe catšata; <sup>3</sup> y Herodes tojántatšëmbona judiënga chë soye tojanogúsetama; as, cha tojanmandá Pédrënaca chamutámiamia. Chca tojanopasá chë levadúraca ndëpormana tandëše sayté, Bashco fiesta ora. <sup>4</sup> Pedro tmojánishache orna, Herodes tojanmandá chamutámiamia, y chë cárceloca soldadënga cantátanga tmojanenajatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. <sup>5</sup> Chcasna, Pedro yojtsëtámema y chë soldadënga corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiamia.

**Bëngbe Bëtsá tojanma Pedro  
natjëmbana cárcelocana  
cháuissebocnama**

<sup>6</sup> Canýe te yojtsájamna Herodes entšangbe delante Pedro juabocnama. Chë te ibetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bëšócana chë utámëniñe imojtsebojanýá. <sup>7</sup> Ndeolpe, Bëngbe Utabnabe canýe ángel tojánbocna, y lempe chë utámëniñe yojtsebuashinýinýana. Chora chë ángel tëchañe Pédrëbiyoe tbojánbojajo, tbojanfšená y tbojanianyana: “Betsco motsbaná ca.” Y

cachora chë cadenëjuangá Pédrëbe buacuatsënguentshana tojanatquécjana, <sup>8</sup>y chë ángel tbojaniana: “Matichëtjo y matóshecohëtjo ca.” Pedro tojanma ntšamo chë ángel tbojanianácá, y chora chë ángel tbojátaniyana: “Mataquëfsayé y šmasto ca.”

<sup>9</sup>Pedro utámenocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canýe otjénayoca cuaftsemncá ca. <sup>10</sup>Y útentše chë soldadënga imojtsebojanýajana chata tbojánachnëngo y yeréša bëshásoye tbojánashjango, chë ndayéša yojanamna tsáshenoye jabocnama; y chë bëshásana nýe cachabe ponto yojotëfjo. Chentshana tbojéftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentshana yojtsojuánañe.

<sup>11</sup>Nýa chora Pedro tbojanosertá y tojánayana: “Mora tsábá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšëntšana y lempe ntšamo judiënga átšeftaca jamama imojuabnámnaca ca.”

<sup>12</sup>Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánýiñe imojtsemna, Bëngbe Bëtsáftaca encuéntaye. <sup>13</sup>Pedro chë tsashenoica bëshásoca tojanchembo ora, canýe oservená, Rode ca uabainá, tojánbocna jarrepárama. <sup>14</sup>Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tsábe noticia jaúnayama, Pedro bëshoca yojtsemna ca. <sup>15</sup>Chë tsoca imojtsemnëngna chora tmojaniana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojaniana: “¡Chabe ángel ctsemna ca!”

<sup>16</sup>Chëntscuana Pedro cabá yojtsechembuana; tmojánëbiatëfjo y tmojáninýe ora, chënga puerte imojenjaná. <sup>17</sup>Pero Pedro tojánëfjatsëmbo iytéca chamobiamama y tojanacuntá ntšamo Bëngbe Utabná utámenocana tbojánatsbocama. Chentshana tojanéyana: “Ntšamo tonjopasama Santiago y chë Jesucristbeñe inýe ošbuáchiyënga šmochjaúnaye ca.”

Chora Pedro chë yebnentšana tojtáisebocna y ínýoye yojáta.

<sup>18</sup>Tojanbinýna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa.

<sup>19</sup>As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentshana tojanmandá chë cha imojanbojanýa soldadënga jtsëbáyama. Chë soyënga tojanochnëngo chentshana, Herodes Judea luarentšana tojéftsanbocna y Cesarea luaroye tojtsanoñe, y choca tojtsanoquedañe.

### Herodes tojanóbana

<sup>20</sup>Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida innabomna Heródesbe luaroca sanángaca. <sup>21</sup>Chcasna, rey Herodes inýe tescama tojánachembo. Chë tena,

jóyebuambayama Herodes uámana entšayaca vojtopórma y vojótbema chabe mándaye tbemanentše; chentsana tojanonguamé. <sup>22</sup> Chora entšanga tmojanontsé mēntšá uayebuáchana: “iChě entsoyebuambná cha entšá ndoñe quenátmēna! iChana canýe dios entsemna ca!” <sup>23</sup> Cachora, Běngbe Bětsabe canýe ángel tojanma Herodes šocana chaboshachama, chabe cuenta Běngbe Bětsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chě tempo más bětsá entšanga Běngbe Bětsabe palabra imojtsuenana y Jesucrístbeñe imojtsošbuáchiye.

<sup>25</sup> Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chě Marcos ca uabobuatmá, chátaftaca tmojéftsanbetše.

#### Bernabé y Saulo tbojanbojatsé Běngbe Bětsabe trabajo jamama

**13** <sup>1</sup> Antioquía luaroca Jesucrístbeñe ošbuáchiyěnguentše imojtsemna Běngbe Bětsabe juabna oyebuambnayěnga y ošbuachiyěngbioye abuátambayěnga. Chěnga imojanabaina Bernabé, Simón (chě Šibetá ca uabobuatmá), Lucio Cirenocá, Manaén (nda tojanoboché cánýiñe Herodes, chě Galileoca réyefata) y Saulo. <sup>2</sup> Canýe te, Běngbe Utabná imojtsatschuanaye y chama tondaye ntjascá imojtsemna ora, chě Uámana Espírítu tojánayana: “Mora šmochjaleséncia Bernabé y Saulo tšěngaftangbentsana chabuétsebocnama; chatna canýe trabajuama sěnjabacacá ca.”

<sup>3</sup> Běngbe Bětsá jětschuayama tondaye ntjascá imojtsemněntscuana

y cháftaca imojtsencuěntantscuana, chěngbe cucuatšěnga chatbe bestšaše juatsboica tmojancjá, chatbe trabajuíñe chaujúabuachama Běngbe Bětsá jtseimpadánese. Y chentsana chátbioye tmojtanadiošoftá.

#### Bernabé y Saulo Chipre luaroca

<sup>4</sup> As Bernabé y Saulo, chě Uámana Espírítbeyeca ichmónata, Seleucia ca uabáinoye tbojánata y chentsana bejaycá, Chipre luaroye. <sup>5</sup> Salamina běts puebløye tbojánashjango ora, tbojanontsé Běngbe Bětsabe palabrama entšanga jábuayenama, chentša judiěngbe enefjuana yebněnguenache. Juan Marcos mo chatbe uajabuachanacá ibojtsebomna.

<sup>6</sup> Nýets chě luarějana tmojánachněngo orna, Pafos puebløye tmojánashjajna; y chentše tmojáninýena canýe judío tatšěmbuá, Barjesús ca uabainá. Cha yojánichamo cha canjamna canýe Běngbe Bětsabe juabna oyebuambnayá ca, pero ndoñe chca yonjamna. <sup>7</sup> Chě tatšěmbuá inatrabájaye chě Chipre luaroca mandadbiama, Sergio Paulo ca uabainá; y chě mandadna corente osertaná inamna. Cha yojtseboše Běngbe Bětsabe palabra jouenama; as tojanmandá Bernabé y Saulo jobiatšana. <sup>8</sup> Pero chě tatšěmbuá, grieguíñe Elimas ca uabainá, Saulo y Bernabebe contra yojtsemna y yojtsama chě mandado ndoñe chaondětsošbuáchemá, ntšamo chě Jesucrístbeñe ošbuáchiyěnga imojanošbuachecá. <sup>9</sup> Chora, Saulo chě Pablo ca imojanábobuatmabe ainaniñe chě Uámana Espírítu corente yojtsemándaye; as chě tatšěmbuábioye yejuana ibojonýinýiye, <sup>10</sup> y tbojanianya: “iAbuambnayá, puerte bacna entšá, Satanasbe uaqiñá y tšabe soyěnga ndoñe chaondětsebínýnama

trabajayá! Bèngbe Utabnabe nÿetsca ndegombre soyèngama aca contsichamo uayátsenaye soyènga yojtsemna ca. <sup>11</sup> Mora, Bèngbe Bètsá cmochanjacastíga, jtaná cochanjoquéda y baseftayté jinÿama quecochatobenaye ca.”

Cachora Elimas mo ibetiñcá yojoquéda y ibojtsonguaye canÿa buacuetèntšnana chabuánatsama, jtaná yojtsemna causa. <sup>12</sup> Chè mandado chca tojáninÿe ora, Jesucrístbeñe yojtsošbuaché y yojenjaná Bèngbe Utabnabe soyènga tojanatsjínÿama.

**Pablo y Bernabé Antioquía pueblentse, Pisidia luaroca**

<sup>13</sup> Pablo y chabe enutènga, Páfosocana, bejaycá Perge puebloye tmojátananga, Panfilia luaroca. Pero Juan tojésanashejuana y Jerusalenoye tojésanshècona.

<sup>14</sup> Pergentšana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judièngbe enefjuana yebnoye tbojánamashèngo y tbojanótbema.

<sup>15</sup> Moisesbe leyiné y Bèngbe Bètsabe juabna oyebuambnayèngbe uabemana librèšangañe tmojanalía orna, chë enefjuana yebnentša mándayènga canÿa tmojanichmó chènga jáuyanama: —Israeloquènga, bènga fsèntseboše entšanga chašmabuayená, nderado ndayá jayanama šmojtsebo mnèse, muentša entšanga añemo chamotsebo mnama ca.

<sup>16</sup> As Pablo tojantsá y entšángbioye cucuatèca tojánefjatsèmba iytèca chamobiamama, y tojánayana: —Šmochjouena Israeloquènga y ndoñe judiènga Bèngbe Bètsá adórayènga. <sup>17</sup> Israeloca entšanga mondadorana Bètsá, Bèngbe Bètsá, bèngbe bèts taitanga tojanèbuáyana,

y tojanma chènga corente bètscanga chamotsemnama, chènga Egiptoaca inÿe luarocana ashhajnéngcá imojoyena ora. Y chentšana, cachabe obenánaca chë luarocana chènga tojésanébuacana. <sup>18</sup> Canta bnètsana uata nÿetsá, Bèngbe Bètsá entšanga ndoyena luaroca chènga yojanéuantana, <sup>19</sup> y cha tojanma chë Canaán luaroca canÿsèftentša entšanga chamopochocama y bèngbe bèts taitanga chèngbe fshantsènga nduiñènga tojánabiama. <sup>20</sup> Chë tempo, chë Bèngbe Bètsá Abrahámbyoye quem fshantse jatšetayama tbojanšbuachená orscana, y chë tempo, chë bèngbe bèts taitanga chë fshantse tmojanóyèngacñèntscuana, canta patse y shachna bnètsana uata tojanochnéngo.

“Chentšana, Bèngbe Bètsá chèngbiama mandadènga tojánabiama, Bèngbe Bètsabe juabna oyebuambnayá Samuel chèngbe mandayá yojéftsemna tempèntscuana. <sup>21</sup> Chentšana, Israeloquènga Samuel tmojanimpadá canÿe rey chaboyayé chaotsamèndama; as Bèngbe Bètsá Saúlbyoye chèngbe rey tbojánbema, canta bnètsana uatèscama. Saúl inamna Cisbe uaquiñá y Benjaminbe bèts pamillanguentsá.

<sup>22</sup> Más chcoyna, Bèngbe Bètsá Saúlbyoye chë mándayentšana tbojtsanjuaná, y chentšana Davídbioye mo chèngbe reycá tbojánbema. Chabiamama Bèngbe Bètsá tojánayana: ‘Atše sèndétatsèmba, David, Isaíbe uaquiñá, canÿe tšabe entšá yomnama y chama atše sèndoyejuá, y cha sempre endèprontana ntšamo atše stsebošcá jtsamama ca.’ <sup>23</sup> Davídbentsana canÿe entšá Jesús enjamna, nda Bèngbe Bètsá tbojanichmó Israeloca entšanga jabátsebacama, ntšamo cach Bèngbe Bètsá chèngbe bèts

taitunga tojanašebuachenacá. <sup>24</sup> Cabá Jesús ndébozna ora, Juan nyetsca Israeloquenga tojanabuayená bacna soyenga amana chamotsajbanama y chamuenabayama. <sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmēnama tšēngaftanga šmojuabná ca? Chē tšēngaftanga šmontsejuabná atše tsmēna ca cha, atše ndoñe quetsátsmēna. Pero átšbentšana echanjabo canya, y atše merecido taitatobuajoñe ni mo jotsejbiyama chabe shecohētjonēshentša corriēja jajafjonama ca.’

<sup>26</sup> “Chcase morna, Abrahám bentšana entšanga y ndoñe judiēnga Bēngbe Bētsá adórayēnga; bēngbiana entsemna quem buayenana soye, chē Bēngbe Bētsá entšanga játsebacana. <sup>27</sup> Masque cada ochnayté, Bēngbe Bētsabe juabna oyebuambnayēngbe uabemana palabra monjanalía chēngbe enefjuana yebnentše, Jerusalenentša oyenēnga y chentša mándayēnga ndoñe quenjátanēsertana nda Jesús bētsemnama, y chē tmojtsalía soyēngama cach ndoñe. Y chca, chēnga Jesús chamóbama tmojánboshjona ora, chē chca amēnga tmojanma ntšamo Bēngbe Bētsabe juabna oyebuambnayēngbe librésangañe iuabemancá. <sup>28</sup> Y masque ndocna bacna soye tmonjáninýena Jesús jóbanama chabotsemnama, Pilato tmojanimpadá chaomandá chábioye jóbama.

<sup>29</sup> Chentšana, lempe ntšamo Bēngbe Bētsabe uabemana palabrenguñe iuayancá Jesúseftaca tojanochñengo ora, chabe ústonēnga chē cruzocana tmojtánštjango y tmojanatbontsá.

<sup>30</sup> Pero Bēngbe Bētsá tojanma Jesús cháuatayenama. <sup>31</sup> Chē Galileocana Jerusalenoye cháftaca tmojánanga, baytentscuana Jesús yojánebuacana;

y morna, lempe ntšamo Jesusbiana tmojaninýca, chēnga entšangbeñe montsoyebuambná.

<sup>32</sup> “Y chca, mora bēnga chē tšabe noticiēnga cbontsētšētná. Ntšamo Bēngbe Bētsá bēngbe bēts taitanga tojanašebuachenacá, <sup>33</sup> cha tonjama, bēnga chē chēngbe entšanguentšēngbiana, chca chaotsemnama. Y Bēngbe Bētsá chca tojama, Jesús cháuatayenama cha jamēse. Rey David, Bēngbe Bētsabe uabemana palabrenguñe, segundo salmentše mēntšá tojanábema, ntšamo Bēngbe Bētsá Jesúsbioye tbojaniyanama:

Aca atšbe uaquiná condmēna.

Mēnté entšanga sēnjinyanyé aca atšbe Uaquiná comnama ca.

<sup>34</sup> Y tempo Bēngbe Bētsá chabe uabemana palabrenguñe tojaninýanyé cachá jamama Jesús cháuatayenama y ndoñe cachiñe chaondóbanama, mēntšá tojánayana ora:

Chē ndegombre soyēnga y chē tšabe bendicionēnga ntšamo

David sēnjanšbuachenacá,

tšēngaftanga cbochanjátataye ca.

<sup>35</sup> Inyoca Bēngbe Bētsabe uabemana palabrenguñe, Salmos librēsa uabiamnayá, mēntšá tojanábema ntšamo Jesús Bēngbe Bētsábioye tbojaniyanama:

Aca ndoñe quecochatslesencia

atšbe cuerpo,

chē acbe Uámana oservenabe

cuerpo chaotsopochocama ca.

<sup>36</sup> David, chabe tempo imojyenēngbiana tojanma, ndayá cha chaomama Bēngbe Bētsá tojanjubocá. Cha tojanóbana y tmojanatbontsá chē chabe bēts taitángbioye tmojanētabuantsá luarentše, y chabe cuerpo tojanopochocá.

<sup>37</sup> Pero chē Bēngbe Bētsá tojanma

chautayenamabe cuerpna, ndoñe tonjanopochocá.

<sup>38-39</sup>“Asna, baconga y batanga, atše séntseboše tšéngaftanga quem soye chašmotsetátšēmo: Ndayá Jesús tojanmama, entšanga chéngbe bacna soyéngama perdonánēnga montsemna. Jesúsbe yeca, nyetsca chábeñe tmojtsošbuáchēnga, bacna soyéngama perdonánēnga mochántsemna. Ntšamo Moisesbe leyíñe iuayancá tmojanmama, chēnga ndoñe tmonjanobená chca perdonánēnga jtsemnana; nye Jesúsbeñe jtsošbuáchiyēse chēnga perdonánēnga jtsemnana. <sup>40</sup>Cuedado šmochtsebomna, ntšamo Bēngbe Bētsabe juabna oyebuambnayēnga tmojanayancá, tšéngaftangftaca ndoñe chaondochñēnguama. <sup>41</sup>Bēngbe Bētsá mēntšá tojánayana:

Šmochjouena. Tšéngaftanga chē ntšamo atše tijayancá šmojtšábotēnga, onanánēnga šmochántsemna y šmochanjóbana. Tšéngaftanga cabá vida šmobomñēntscuana, atše bēts soyēnga chanjéftsema, y masque ndánaca chē soyéngama chacmojtšacúnta, tšéngaftanga chiñe ndoñe quešmochatošbuáchiye ca”  
—Pablo tojanoyebuambá.

<sup>42</sup>Pablo y chabe enutēnga chē judiēngbe enefjuana yebnēntšana tmojtšansbocna ora, chē ndoñe judiēnga chéngbiyē tmojanaimpadá, chē inye ochnaytescama chē soyéngama más jábuayenama.

<sup>43</sup>Chentše chē te jénéfjnama tempo tojanopochocá ora, ba judiēnga y ndoñe judiēnga, chē Bēngbe Bētsábíoye imojánadorana mo chē judiēngcá, Pablo y Bernabé tmojanéseto. Y chatna chēnga tmojanabuayená nyets tempo

chamotsejuabnama, Bēngbe Bētsá chéngbiama tšabe soyēnga yojtšamama.

<sup>44</sup>Chē inye semana, chē ochnaytena, nya mo nyetsca chē pueblēntše oyēngē tmojanobeconá Bēngbe Bētsabe palabra jouenama. <sup>45</sup>Pero ba entšanga choye jouenama tmojánama chē judiēnga tmojáninye ora, tmojanotjayaná, ba entšanga Pablo imojtseyeunanama; as chēnga tmojanontsé mocá ichámuana ndayá cha yojtšoyebuambnama, y chábíoye oyenguayana. <sup>46</sup>As Pablo y Bernabé más añemoca mēntšá tbojánayana: “Endánēyta, natsana tšéngaftanga, chē judiēnga šmognēnga, Bēngbe Bētsabe palabra jshabuayenana. Pero tšéngaftangna chē palabra šmontsaboté, y šmontsejuabná tšéngaftangbiama ndoñe tšabá yontsemna chē nyetsca tescama yomna tšabe vida jtsebomnana ca; chē causa, bēnga fchantsoñe chē ndoñe judiēngbeñe Bēngbe Bētsabe palabra jóyebuambayama. <sup>47</sup>Er Bēngbe Bētsá chama šjanichamó, mēntšá jauyanēse: Aca tchonjuábuayana chē ndoñe judiēngbiyē tšabe noticiēnga jábuayenama, chaósertama. Y chca, aca chéngbiama cochántsemna mo canye binynayacá. Chca, ácbeyeca nyets luarēnguenache entšanga atše chanjatsebacá ca.”

<sup>48</sup>Chē ndoñe judiēnga chca tmojanuena ora, puerte imojtšoyējuaye y tmojanontsé mēntšá ichámuana: “Bēngbe Utabnabe palabra tšabá bēngbiama entsemna ca.” Y chora, chē nyetsca tescama yomna tšabe vida jtsebomnana Bēngbe Bētsá tempo tojánabacacanga, tmojanontsé Jesúsbeñe jtsošbuáchiyana. <sup>49</sup>Y chca, nyets chē luariñe más entšanga Bēngbe



Bétsabe palabra imojtsuenana. <sup>50</sup> Pero chë judiënga tmojanoyebuambá, shembásengaftaca Bëngbe Bétsá adórayënga y uámanënga, y chë pueblentsá uámana taitángaftaca, jamama Pablo y Bernabé chabosufrioma y chë luarentšana jtëbuacnama. <sup>51</sup> As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio puebloye tbojtsanoñe. <sup>52</sup> Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemándaye.

#### Pablo y Bernabé Iconio puebloca

**14** <sup>1</sup> Iconioca, Pablo y Bernabé cánÿiñe tbojánamashëngo chë judiëngbe enefjuana yebnentše y corente obenánaca Bëngbe Bétsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. <sup>2</sup> Pero chë judiënga Jesucristbeñe ndošbuáchiyënga, chë ndoñe judiëngbiyoe tmojanayëñjana, Pablo y Bernabebiamo podesca chamotsejuabnama. <sup>3</sup> Chíyeca, Pablo y Bernabé bayté chentše tbojanototoná y ndauatjca Bëngbe Utabná Jesucristbiamo tbojanoyebuambá. Bëngbe Utabná obenana chata tojanatšatá béts soyënga jtsamama, y chë soyëngaca Bëngbe Utabná entšanga tojaninÿanjé, ndayá chë ichmónata ibojtsoyebuambnacá ndegombre bëtsemnama, chë Bëngbe Bétsá nÿetscanga iuababuánÿeshanana. <sup>4</sup> Pero nÿetsca chë pueblentsá entšanga ndoñe cachá imontsejuabnaye; inÿyënga chë judiëngaftaca imojtsemna, y inÿyënga chë Jesucristbe ichmonátaftaca. <sup>5</sup> As, chë judiënga y ndoñe judiënga chentša

mandayëngaftaca tmojanenoyeuná chata jtsatsetšenama y ndëtsbéngaca jtsëbáyama. <sup>6</sup> Pero Pablo y Bernabé chama tbojántatšëmbona orna, tbojtsanëchañe Lистра y Derbe puebloye, Licaonia luaroca, y choca chábuañe luarëngoye; <sup>7</sup> y chë luarënguenáchnaca, chata Jesucristbe tšabe noticiënga entšanga tmojanabuayená.

#### Lистра puebloca, ndëtsbéngaca Pablo tmojtsanatëchénganja jtsóbama

<sup>8</sup> Lистра puebloca inamna canÿe boyabása jama ndobéná. Ndocna te yondobena jana, chca cosheto inónÿna causa. Chë boyabásana yojtsetbemana <sup>9</sup> ouenana ntšamo Pablo yojtsichamcá. Y Pablo chábioyoe tbojanonÿinÿé ora, tojántatšëmbona chë šocá tša yojtsošbuáchemá, shnaná jtsatsmënama; <sup>10</sup> as Pablo, juayebuáchenëse tbojaniyana: “iMotsbaná y acbe shecuatšëngaca tšabá motsa ca!”

Chora chë boyabása, canÿe jontsënjëse tojantsá y yojóntša anana.

<sup>11</sup> As chë entšanga, ndayá Pablo tojanmcá tmojáninÿé ora, tmojanontšé uayebuáchna chë Licaonia luarentšana biyañe, mëntšá: “iBëngbe diosënga béngbiyoe tbojátma mo entšatcá ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inÿe diosëngbiama oyebuambnayacá. Páblëbiyoe chca imojtsábobuatma, er cha más yotsoyebuambná. <sup>13</sup> Zeusbiamo chentša bachna inabomna canÿe yebna chë pueblo chaboca, chábioyoe jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebntšá amashjuanoye; y cha y chë entšanga imojtseboše chë uacnënga jashebuáyana y jajuinÿiyana, chca, chë ichmonátbiyoe jadórama.

<sup>14</sup> Bernabé y Pablo chama tbojántatšëmbona ora, entšayá tbojtsanenántšajatanëca, entšanga jinŷanŷiyama, ntšamo chënga imojtsamcá chata tondaye yonjógusetama, y tbojéftsannotjajo entšangbe tsëntsajana y mëntšá ibojtsaychembumbuana: <sup>15</sup> “Baconga y batanga, čndáyeca chca šmojtsama ca? Bëndata cach tsëngaftangcá entšata fsëndmëna. Muentše bëndata fsëntsemna nŷe jábuayenama Bëngbe Utabná Jesucristbe tšabe noticiënga, tsëngaftanga chë quem ndoservena soyënga, vida ndbomma soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nŷetsca béjayënga y lempe ntšamo chenache yobinŷncá. <sup>16</sup> Masque tempo, Bëngbe Bëtsá entšanga tojanalesenciá cada ona chaoma ntšamo tojtsejuabnacá, tšabá cachëngbiana yojtsémnayeca, <sup>17</sup> Bëngbe Bëtsá ndocna te ntjájbanana tsëngaftanga jtsinŷanŷnayana, cachá tojama tšabe soyëngaca, mocna Bëtsá cha yomnana. Cha endama tsëngaftangbiana chauaftema y chë matënga botamana chaoshájonama, y becá saná cmondatšatná; y cha endama tsëngaftangbe ainaniñe corente oyejuayana chašmotsebomma ca” —chata tbojánayana.

<sup>18</sup> Masque chë soyënga tbojánayana, nŷe batšatema más bën y ya ndoñe matbëñjanobenata chë entšanga jtsëuyanana uacnënga jashebuáyama, chca, chátbioye jadórama.

<sup>19</sup> Chca ora, básipta judiënga tmojánashjajna Pisidioca, Antioquiocana y Iconiocana, y chentšä entšángbioye tmojanayëñjaná, Jesucristbe ichmonatbe contra chamotsemnana. Chcasna, Pablo

ndëtšbéngaca imojtsénanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. <sup>20</sup> Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebløye tojtesaná; y chë yëfsana, Bernabéftaca Derbe puebløye tojánä.

<sup>21</sup> Derbe puebløca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiøye. <sup>22</sup> Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchema. Y entšángbioye tmojanéyana: “Bëngbe Bëtsabe amëndayoye jamashënguanma, bënga šontsamna quem luarentše bëtscá jëftsepadecénana ca.” <sup>23</sup> Nŷetsca ošbuachiyëngcá enefjuanenache, bëtsejemëngcá mándayënga tmojanabacacá, chentšä Jesucristbeñe ošbuáchiyëñtšana, cachënga chentšä ošbuachiyëngbioye jtsamëndayama. Bëngbe Bëtsá jëtšchuayama tondaye ntjascá imojtsemna y cháftaca imojtsencuënta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnana, ndábeñe chënga imojtsošbuaché.

**Pablo y Bernabé, Sirioca  
Antioquía puebløye tbojtanata**

<sup>24</sup> Pisidia luarëjana tbojánachnëngo ora, Panfilia luaroye tbojánashjango. <sup>25</sup> Perge pueblëntše Jesucristbe tšabe noticiënga entšángbioye tmojanabuayená, y chentšana Atalia puebløye tbojánata. <sup>26</sup> Chentšana,

Bernabé y Pablo, bejaycá tbojtanata Sirooca Antioquía puebloye. Chentša entsānga Bēngbe Bētsá tmojanimpadá chata chabe cucuatšīñe chabotsemnama, chē trabajuīñe chaotsanñenama; y chorna, chē trabajo ya tbojanpochocá. <sup>27</sup> Choye tbojtanashjango ora, nyetsca Jesucristbeñe ošbuachiyēngbioye tmojánachembo, y tmojanacuntá ntšamo Bēngbe Bētsá tšabe soyēnga chátaftaca tojanmama, y ntšamo Bēngbe Bētsá tojaninñanýé, chē ndoñe judiēngnaca chamotsobenama Jesucristbeñe jtsošbuachiyama. <sup>28</sup> Y Pablo y Bernabé bayté chentše tbojanototoná Jesucristbeñe ošbuachiyēngtaftaca.

**Ichmónēnga y bētsējemēngcá  
māndayēnga Jerusalenoca  
tmojánenefjna jencuéntama**

**15** <sup>1</sup> Chē tempo, bāseftanga Judeocana áshjajnēnga tmojanontsé, Antioquía pueblentše, chentša Jesucristbeñe ošbuachiyēnga mēntšá jabuátambana: “Base bobachtema chē más delicadentše ndoñe šmonjenotētšēse, ntšamo Moisesbe leyīñe endayancá, ndoñe quenátopodena tšēngtaftanga atsebácanēnga jtsemnnama ca.” <sup>2</sup> Chíyeca, Pablo y Bernabé jabuachana chca buatēmbayēngtaftaca imojánenatsētsnaye. Cabana, tmojanēbuáyana Pablo, Bernabé y ínñenga Jerusalenoye chamotsama, choca chē Jesucristbe ichmónēngtaftaca y chē chentše Jesucristbeñe ošbuachiyēngbeñe bētsējemēngcá mandayēngtaftaca chama chamencuentama.

<sup>3</sup> Chcasna, chē Antioquioca imojánenefjuana Jesucristbeñe ošbuachiyēnga Jerusalenoye chēnga

tmojanichamó. Fenicia y Samaria luarējana imojtsachñējuana ora, chēnga tmojanacuntá ntšamo chē ndoñe judiēnga chēngbe tempsca soyēnguiñe ošbuáchiyana tmojtšanajbanama y chora Bēngbe Bētsábeñe imojtsošbuáchema. Jesucristbeñe chentša ošbuáchiyēnga chca tmojanuena ora, puerte oyejuayēnga imojtsemna.

<sup>4</sup> Pablo y chē ínñenga Jerusalenoye tmojánashhajna ora, chentša Jesucristbeñe ošbuáchiyēnga, Jesucristbe ichmónēnga y bētsējemēngcá māndayēnga chēngbioye tmojanēbuaja. Chentšana, Pablo y Bernabé tbojanacuntá lempe ntšamo Bēngbe Bētsá chátaftaca yojamcá. <sup>5</sup> Pero bāsefta fariseunga, chora ya Jesucristbeñe ošbuáchiyēnga, tmojantsá y mēntšá tmojánayana: “Chē ndoñe judiēnga entsamna chē más delicadentše base bobachtema tētšenēnga jtsemnana, bēnga judiēngcá; y tšēngtaftanga cmontsamna chēnga jáuyanana, ntšamo Moisesbe leyēnguiñe iuayancá chamotsamama ca.”

<sup>6</sup> As, chē Jesucristbe ichmónēnga y bētsējemēngcá māndayēnga tmojánenefjna jencuéntama, chē ndoñe judiēnga aīñe o ndoñe yonjánamnama chē más delicadentše base bobachtema tētšenēnga jtsemnana, ntšamo chē judiēnga imojanamancá. <sup>7</sup> Bēn y bētscá chēnga tmojanencuentá chentšana, Pedro tojantsbaná y mēntšá tojanéyana: “Jesucristbeyeca catsátanga, tšēngtaftanga šmondétatšēmbó, ya bayté entsemna Bēngbe Bētsá tšēngtaftangbentsana atše šonjanábuayana, Jesucristbe tšabe noticiēnga chē ndoñe judiēnga jábuayenama, chca, chēnga Bēngbe Utabnábeñe chamotsošbuáchema.

<sup>8</sup> Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninýanyé, chë ndoñe judiëngnaca imnobena chabe entšanga jtsemnana, chábeñe tmojtsošbuáchese, chë Uámana Espíritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmcá. <sup>9</sup> Y chca, Bëngbe Bëtsabiana nyetscanga cachcá monduámama, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotsebomnana, Bëngbe Bëtsabe palabriñe jtsošbuáchiyëse. <sup>10</sup> Y mora, índáyeca tsëngaftanga ndoñe šmontseboše ntšamo Bëngbe Bëtsá tojamcá? Pero tsëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínýabioye uauta uasmanésha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. <sup>11</sup> Y chca ndoñe chaondëtsemna. Bënga mondošbuaché bënga atsebácanënga imomnana Bëngbe Utabná Jesús chabe tšabe juabna šojaninýanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanéyana.

<sup>12</sup> Chorna, chentše imojtsemna entšanga nyetscanga iytëca tmojanobiana, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinýanyiyama, y inýe soyëngama chabe obenánaca, ntšamo chë ndoñe judiëngbeñe Bëngbe Bëtsá cháaftaca tojanmcá.

<sup>13</sup> Chë útata jóyebuambayama tbojanpochocá ora, Santiago mëntšá

tojanayana: “Jesucristbeyeca catšátanga, šmochjouena: <sup>14</sup> Simón šonjabuayená ntšamo Bëngbe Bëtsá natsana tojaninýanyé, chë ndoñe judiëngnaca cha iuanýenama, y chíyeca cha chënguentsana banga tojubuáyana chabe entšanga chamotsemnana.

<sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrënguñe endayancá, mëntšá:

<sup>16</sup> Chentsana atše chanjésabo y chë Rey Davidbe pamíllanga cachiñe uámanënga chantabiana; mo nda canýe uáshajayena yebna tojëtšjebcá, atše, Davidbe pamíllanga cachiñe uámanënga chantabiana;

<sup>17</sup> chca, chë inýe entšanga chamonguango ndayá jamana atše, tsëngaftangbe Utabná, más chašmotsábuatmama, nyetsca ndoñe judiënga, chë atšbe entšanga chamotsemnana atše tijábacacanga.

<sup>18</sup> Chca atše, tsëngaftangbe Utabná séntšichamo, nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

<sup>19</sup> Chentsana Santiago mëntšá tojanéyana: “Chíyeca atše séntsejuabná, bënga ndoñe šontsamna chë ndoñe judiëngbiana jamana más totcá chaotsemnana Jesucristo jtséstonama. <sup>20</sup> Chamna, šontsamna chënga juabuábiamana y jáuyanana ndoñe chamondëtšesá, sananga chë ndaye soyënga entšanga tmojuabná diosënga yomna ca jadórama tmojuiyëbana; bacna soyënga

shembásenga o boyabásengaftaca ndoñe chamondétsama y ndoñe chamondétsesá tsešana bayëngbe mëntšena, y buiñe cach ndoñe ca.

<sup>21</sup> Er chë natsana tempënga orscana, nyetsca pueblënguenache mondmëna chë Moisés tojëftsananayana soyënga entsángbioye abuayinyayënga; y chabe leyënga, nyetsca ochnayté mondbetsaliaye chë bënga judiëngbe enefjuana yebnënguenache ca” —cha tojanéyana

**Chë Jerusalenoca ichmónënga  
y bëtsëjemëngcá mándayënga  
canýe tsbuanácha tmojanichmó  
chë ndoñe judiëngbiana**

<sup>22</sup> Chentsšana, chë Jesucristbe ichmónënga y bëtsëjemëngcá mándayënga, nyetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. <sup>23</sup> Y chëngaftaca canýe tsbuanácha tmojanichmó, y chiñe mëntšá yojëtsayana:

Bënga chë Jesucristbe ichmónënga y chë bëtsëjemëngcá mándayënga, cach tsëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tsëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

<sup>24</sup> Bënga fsëntsetatšëmbo bëngbentsšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tsëngaftanga

ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canýe ndegombre ustóná jtsemnana.

<sup>25</sup> Chcasna, bënga fsënjenoyeuná y šonjúnynana tsábá yojtsemna báseftanga bënguentšana jabacacayana tsëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. <sup>26</sup> Chë útatna ba soye tbojotsbocá vida jáshbiana, Bëngbe Utabná Jesucristbiana oservëniñe. <sup>27</sup> Chátaftaca Judas y Silas fsënjichamó; y chatna cach tsëngaftangaftaca bochanjóyebuambaye ntšamo quem tsbuanáchañe yojtšábemanama.

<sup>28</sup> Chë Uámana Espíritu y bënga cachcá fsëntsejuabná, bënga ndoñe šontsamna tsëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nýe quem uámana soyënga chiñe aíñe cmontsamna jtsobedecëmana: <sup>29</sup> Ndoñe šmattsesaye mëntšena, chë ndaye soyënga entsãnga tmojuabná diosënga yomna ca jadórama tmojóba bayëngbiana; ndoñe šmatjofsiye buiñe, ni šmatjase tsešana bayëngbe mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tsábá šmochanjama.

Bëngbe Bëtsá salúdoca chacmotsábouamna ca —chiñe yojëtsayana.

<sup>30</sup> Chcasna, chë quem Jerusalenocana ichmónënga tmojësanodiošoftanentsšana, Antioquía puebloye tmojána; y chocna, nyetsca chë Jesucristbeñe ošbuachiyëngbioye tmojanëbuaja y

chê tsbuanácha tmojanayentšbuaché  
<sup>31</sup>Chê Antioquía pueblentša  
 Jesucristbeñe ošbuáchiyënga ntšamo  
 chê tsbuanáchañe yojtsabemancá  
 tmojanalía ora, bëts añemo tmojtanca  
 y corente imojtsóyejuaye. <sup>32</sup>Judas  
 y Silas Bëngbe Bëtsabe juabna  
 oyebuambnayata ibnamna; as,  
 chátnaca chê chentša Jesucristbeñe  
 ošbuachiyëngbiye ba soyënga  
 tmojanéyana, chënga añemo  
 chamotsatsbomnama y Jesucristbeñe  
 corente chamotsošbuáchema.  
<sup>33</sup>Chentšana baseftaytese, chentša  
 Jesucristbeñe ošbuáchiyënga  
 chëngbiye tmojtandiošoftá, chê  
 ndëmuanyënga tmojanichamóngbiye  
 jtama. <sup>34</sup>Pero Sílasna tšabá  
 ibojtsinýana cachentše más  
 jëftsajétanama. <sup>35</sup>Pablo y Bernabé  
 baseftayshinýe Antioquía pueblentše  
 tbojanotoná y ba inýengaftaca  
 Bëngbe Utabná Jesucristbe tšabe  
 noticiënga entšanga tmojanabuatambá  
 y tmojanabuayená.

**Pablo cachiñe inýe  
 luarëngoye tojána, Bëngbe  
 Bëtsabe trabajo jamama**

<sup>36</sup>Chentšana baseftaytese, Pablo  
 Bernabébiye tbojaniyana: “Bëngbe  
 Utabnabe palabra tbonjanabuayená  
 luarëngoye bochjésa, choca  
 Jesucristbeñe ošbuáchiyënga  
 jábuachama y jányama ntšamo  
 imojtsemnama ca.”

<sup>37</sup>Bernabé yojtseboše, Juan chê  
 Marcos ca uabobuatmábibiye chátaftaca  
 jëftsbetšama. <sup>38</sup>Pero Páblëna ndoñe  
 tšabá ibontsinýana cha jëftsbetšana,  
 er Juan chátbentšana tojtšanojuánañe  
 Panfilia luarocana, y ndoñe  
 tonjanatjëmbambá, Bëngbe Bëtsabe  
 trabajo japochócantscuana. <sup>39</sup>Y chê  
 palabrama tondaye tbonjanenóyeunata

causna, Pablo y Bernabé cachcá  
 tbojesanenonýaye. Y chca, Bernabé,  
 Marcos tbojéftsanbetše, y bejaycá  
 Chipre luaroye tbojánata; <sup>40</sup>y Páblëna,  
 Silas tbojanábuayana jëftsbetšama. Chê  
 Antioquía pueblentša Jesucristbeñe  
 ošbuáchiyënga Bëngbe Bëtsá  
 tmojanimpadá Pablo y Silas Bëngbe  
 Utabnabe cucuatšinë chabotsemnama,  
 chatbe trabajuñe chaotsanýenama.  
 Chentšana, Pablo Sílasestaca  
 tbojánbocna y <sup>41</sup>Siria, Cilicia  
 luarënguëjana tojánachnëngo entšanga  
 añemo atšatnaye, chê luarenache  
 enefjuana ošbuáchiyënga Jesucristbeñe  
 más chamotsošbuáchema.

**Pablo Timotéobiye tbojáninýena**

**16** <sup>1</sup>Chentšana Pablo  
 tojánashjango Derbe y Listra  
 luaroye, y chentše tbojáninýena canýe  
 Jesucristbeñe ošbuachiyá, Timoteo  
 ca uabainá; cha inamna canýe judiá  
 Jesucristbeñe ošbuachiyabe uaquiñá  
 y chabe taitana griego entšá inamna.  
<sup>2</sup>Chê Listra y Iconioca Jesucristbeñe  
 ošbuáchiyënga Timoteobiana  
 tšabá imojanoyebuambná. <sup>3</sup>Pablo  
 tojánbošena Timoteo jëftsbetšama;  
 pero cabá ndetsbetše orna, Pablo  
 base bobachtema chê más  
 delicadentše tbojantëtše, ntšamo  
 judiënga imojanamancá. Cha  
 chca tojanma, jobenayama chê  
 judiënga imojoyena luarëngoye  
 cháftaca jama, er nyetsca judiënga  
 imnatátšëmbo Timoteobe taitá griego  
 inamnama. <sup>4</sup>Chê ibojtsachnëjuana  
 pueblënguenache chata ibojtsana  
 Jesucristbeñe ošbuachiyëngbiye  
 abuayinaye, ntšamo Jerusalenoca  
 Jesusbe ichmónënga y bëtsëjemëngcá  
 mándayënga tmojanamëndacá, ndayá  
 chê Jesucristbeñe ošbuáchiyënga ndoñe  
 judiënga jamama yojtšamncá. <sup>5</sup>Nýets

luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

**Pablo mo otjenayoquécá canye  
Macedonioca entšábioye tbojáninýe**

<sup>6</sup>Chë Uámana Espíritu, Pablo y Sílasbioye tojaninýanýé, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana. <sup>7</sup>Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondétsama. <sup>8</sup>Misia luarëjana tmojánachnëngo ora, Troas luaroye chënga tmojána. <sup>9</sup>Chë te ibeta, Pablo mo otjenayoquécá tojáninýe canye Macedonioca boyabása ibojtsebiatsana y mëntšá ibojtseimpadana: “Diosmanda Macedoniocoye mabo y šmabëjabuache ca.” <sup>10</sup>Pablo chca tojáninýe y cachora lempe tmonjanprontá Macedoniocoye jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

**Pablo y Silas Filipos puebloca**

<sup>11</sup>As, Troasentsana bejaycá fsënjána Samotracia luaroye, y yëfsana Neápolis puebloye, <sup>12</sup>y chentsana Filíposoye. Filipos enjamna canye uámana bëts pueblo Macedonioca y bëtsca romanënga oyeniñe. Chë luarentše baseftayté fsënjanoquedanga. <sup>13</sup>Canye ochnaytena, chë pueblentsana fsënjéftsanbocna y chë fshájaye tsachoye fsënjána. Fsënjanuena chentše canjamna canye luare Bëngbe Bëtsáftaca jencuéntama ca, y fsënjána

janguanguama. Fsënjáninýena ora, chentše fsënjantobiama y Bëngbe Bëtsabe palabra fsënjanoyebuambá chentše tmojanójoto shembásengbiama.

<sup>14</sup>Enjamna canye shembása, Lidia ca uabainá, Tiatira puebloca, y cha enjamna uámana uabuángana uafjatsenga entšayá uená. Cha inamna Bëngbe Bëtsábioye adoryá y chentše Páblëbioye ibotseyunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchemá.

<sup>15</sup>Cha y chabe yebntšë oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átsbentšë chašmoquedama ca.”

Y šonjanëtarié bënga chentše joquédama.

<sup>16</sup>Canye te, chë Bëngbe Bëtsáftaca encuëntaye luaroye fsënjétsajna orna, šonjanëbiatše canye tobiaše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiaše yojanmalísiaye soyëngama.

<sup>17</sup>Chë tobiaše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservënënga y tšëngaftanga cmontsabuayiná ntšamo Bëngbe Bëtsá yobena tšëngaftanga játsëbacama ca!”

<sup>18</sup>Y bayté chca enjanchembumbuana; chë causa, Pablo bonjëtsetana y cabana, tonjanobúertana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentsána tojésanbocna.

<sup>19</sup>Pero, chë bayëjbe juabna chábentsána tojésanbocnama y chëngbiama más crocénana jabemama chora chë tobiáše ndoñe yontsobenama, chë tobiáše nduiñenga tmojáninÿe ora, Pablo y Sílasbiøye tmojánishëche y tmojtsanasjojøye plazøye, mandayéngbiøye.

<sup>20</sup>Chë mandayéngbiøye tmojanénatse ora, chënga mëntšá imojtsichamo: “Quem boyabásata judío entsata bondmëna, y muatbe causa bëngbe pueblentšá entsanga montsenbouenana, <sup>21</sup>y bontsabatambá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátlesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

<sup>22</sup>Chora chë entsanga tmojanontsé uayebuáchana; as, chë mándayënga tmojanamëndá chata entsáyá jtsëtsejquécana y niñëfjéngaca jtsachebuánganjana. <sup>23</sup>Jabuache tmojanachebuánganjentsána, cárceløye tmojanautame y chë utámenënga shanÿá tmojanmandá yejuana chaotsabuajéñÿama. <sup>24</sup>Chca tmojanmandá ora, chë utamianá chata tojanénatse chë más tsoye utámenøye y shecuatšëntšana tsuanëšifñe tojanatsebuá.

<sup>25</sup>Pero tséntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnétsuentaye; y chë inÿe utámenënga chca imojtsuenana.

<sup>26</sup>Ndeolpe, corente jabuache yojtsëbánjua y chë utámena yebna fshantsocana yojtsábonjnaye. Cachora, nÿetsca chë utámenentša bëšašangá

tojantëfjo y nÿetsca utámenënga chë cadenëjuangá yojtsayentšjafjona.

<sup>27</sup>Pero chë utámenënga shanÿá tojanofšená y chë utámenentša bëšašangá yojtsatëfjnama tojáninÿe ora, cha tojanjuabó nÿetsca utámenënga tmojtsanacheta ca; chë çausa, chabe espadëja yojenosëngbotëntšena jtsenóitanama. <sup>28</sup>Pero Pablo tbojánbochembo: —iAcbe cuerpo ndocá matenábomana; nÿetscanga camuentše fsëndëtsomñe ca!

<sup>29</sup>Asna, chë utámenentša shanÿá canÿe uajuinÿanésha tojanëyá y chë utámenøye ochamanana tojánamashëngo y auatja causa ngmëmnyáy Pablo y Sílasbe shecuatšëntše yojoshëntsamentšiyè. <sup>30</sup>Chentsána tojtanëbuacna y tojanéyana: —Señórata, ¿ndayá šojtsemna jamama atše atsocaná jtsemnama ca?

<sup>31</sup>Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnacá ca.

<sup>32</sup>Y cha y nÿetscanga chë yebnentše imojtsemnënga, Bëngbe Utabnabe palabra tmojanabuayená. <sup>33</sup>Cach ora chë ibeta, chë utamianá chata tojanénatse chë lisianënguiñe jetsajabiama. Chentsána, cha y chabe pamíllanga tmojánenabayè. <sup>34</sup>Chentsána, chë utamianá chata tojanénatse chabe yebnoye y saná tojanacaredadó. Cha y nÿetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchema.

<sup>35</sup>Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. <sup>36</sup>Chë utamianá Páblëbiøye tbojaniyana: —Chë mándayënga šmonjamandá tsëndata



jtabáshejuanama. Chcasna, šontsobena natjémbana jtsatoñana ca.

<sup>37</sup>Pero Pablo chë soldadënga tojanéyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinýanyiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup>Chentsana, chë soldadënga chë mandayëngbeñe tmojanobuambá ntšamo Pablo y Silas tbojanayancá; chca chënga tmojánatatsëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. <sup>39</sup>Chcasna, cach mándayënga tmojána chata perdón jatétejañama; chentsana tmojtanëbuacna y tmojanéyana: “Diosmanda, muentšana inýe luaroye motsónata ca.” <sup>40</sup>As chata chë utámenentsana tbojéftsanbocna y Lídiëbe yebnoye tbojéftsanata. Chentsna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentsana, chata ínýoye tbojtsanoñe.

**Tesalónica puebloca, Pablo  
y Silasbioye ndoñe tšabá  
tmonjanëbuaja**

**17** <sup>1</sup>Pablo y Silas inýe luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna imnabomna chënga jénefnama. <sup>2</sup>Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë

judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrenguinië iuayana soyëngaca, <sup>3</sup>chënga yojanabuayiyiná y ndegombre yojaninýanýná, Bëngbe Bëtsabe Uámana Uabuayaná jóbanama y chentsana jtayenama ibojamnama. Y mëntsá yojanëtsëtsná: “Chë Cristo, Jesús endmëna, ndabiama atše cbontsabuayiyiná ca.”

<sup>4</sup>Judiënguentsana báseftanga chiñe imojtsošbuáchiye y Pablo y Silas tmojanéseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca. <sup>5</sup>Pero chë judiënga ndošbuáchiyënga chca tmojáninýe ora, puerte envidia imojtsebomna. Asna, chënga tmojánachembo banga, tondaye amënga y bacna entsanga, y chënga tmojanenutaná jamama nyetsca chë pueblentsá entsanga chamotsenbouénanama; y canýe entsá, Jasón ca uabainabe yebna chënga tmojtsanabuache, Pablo y Silas jtsanguanguama, chentsana jesëbuacnama y entsangbe cucuatšinië jabáshejuanama. <sup>6</sup>Pero chentše ndocná tmonjáninýena; as chë entsanga Jasón imojtsesjojoye y chentša mándayënga imojëtsemnoye tmojanánatse y Jesucristbeñe inýe ošbuachiyëngnaca choye tmojanënatse, y mëntsá imojtsáyebuache: “iChë boyabásata, chë ndëmuanýata ibojtsama nyetsca luarentša entsanga chamuenbouénanama, quem luaróynaca tbojabo, <sup>7</sup>y Jasón chabe yebnentše chata tojúbuaja ca! iChënga montsana ntšamo chë Romoca bëts mandadbe mandënguinië ndoñe quenatslesenciancá, er chënga montsichamo inýe rey canmëna, Jesús ca, y cha, César chë Romoca mandadbe

cuenta nyetscángbeñe yojtsemánda ca!”  
—chënga imojtsáyebuache.

<sup>8</sup>Chë entšanga y chë pueblentsä mándayënga chca tmojanuena ora, corente imojenbouénana. <sup>9</sup>Pero Jasón y chë ínÿenga, cháftaca imojtsemnënga, crocénana tmojtanjájó, y as tmojtanabáshejuana.

#### Pablo y Silas Berea Puebloa

<sup>10</sup>Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebløye chabuétsebocnama. Y chata chøye tbojánashjango ora, chë judiëngbe enefjuana luarøye tbojánata. <sup>11</sup>Chentšä judiënga imojamna más tšabe ainana bomnënga chë Tesalonicoca judiëngbiamä; chcasna, øyejuayënga chë buayenana soye Jesucristbiamä tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsësnacá aífne o ndoñe ndegombre yojtsemnana. <sup>12</sup>Y chca, ba chentšä judiënga chatbe palábraca Jesucristbeñe imojtsošbuáchiye, y Grecia luarøca ba uámana shembásenga y boyabásengnaca. <sup>13</sup>Pero, Pablo Bereoca chë Bëngbe Bëtsabe buayenana soyama entšanga yojtsabuayiyinama chë Tesalonicoca judiënga tmojántatšëmbona ora, chënga chøye tmojána y tmojanma chentšä entšanga chamuenbouénanama. <sup>14</sup>Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y bëjaye tsachøye chaotsoñama; chëntscuana, Silas y Timoteo Bereoca tbojanoquedá. <sup>15</sup>Pablo tmojantjëmbambá entšangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená

chamuaišshëconama Silas y Timoteo jaúnayama betscø jtsayana, Pábloftaca jateninÿenama.

#### Pablo Atenas puebloa

<sup>16</sup>Pablo Atenas bëts puebloa Silas y Timoteo yojtsëbatmanëntscuana, puerte tbojanongmé, er cha tojáninÿe chentšä entšanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca. <sup>17</sup>Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentšä plazoca chë ndëmuanÿenga chentšë imojanashjajuanëngaftácnaca. <sup>18</sup>Y báseftanga, ntšamo jtsejuabnayama entšanga abuátambayënga, epicureunga y estoiqüënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entšangbe diosëngbiamä muentšë entsabøyebuambnaye ca.”

Chënga chca imojtsichamo, er Páblëna Jesusbiamä y chë obanënga jtayenama yojanøyebuambná. <sup>19</sup>Asna, chentšä entšanga cha tmojanánatse canÿe luarøye, entšanga jénefjnama y øyebuambnayënga joyaunayama luare, Areópago ca uabáinoye. Chentšë imojanamana uámanënga jénefjnana, nderado ndabiamä jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bëtsayanana bënga quefstsobena jtsetatšëmbuama ca? <sup>20</sup>Aca tsëm soyënga šcontsëtsësná y bënga fsëntseboše jtsetatšëmbuana ndayá chë soyënga bëtsayanana.

<sup>21</sup>Er nyetscanga Atenasentšä øyenënga y inÿe luarëngocana

áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuéntayana.

<sup>22</sup> As Pablo tojantsá chëngbe tsëntsaca chë Areópago ca uabáinentse y tojánayana: —Atenasentša entsanga: ntšamo bominye sënjjajacá, atše séntsetatšëmbo tsëngaftanga ba diosënga puerte šmayaunana y šmadoránama. <sup>23</sup> Atše sëndánrreparana tsëngaftangbe diosënga šmétsadorana luarënguenache y sënjinýena canýe altar y chentše mëntšá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuayinyá.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentse y celoca Utabná, y cha ndoñe quenatiyena cha jadórama entsangbe jebna yebnënguine, <sup>25</sup> ni quebnatájaboto ndocná chabiamatondaye chaondétsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nyetsca soyënga šnetsatšatnaye.

<sup>26</sup> “Cha nyë canýe boyabásabentsana nyëts luarënguentša entsanga tojánabiama, nyëts quem luarentse chamotsiyenama; y cha quem soyënga cabá ndëma ora, tojanjuabó mocna ora y ndayentše entsanga chamuetsiyenama; <sup>27</sup> chca, Bëngbe Bëtsá chamonguanguama, masque chabiamatndoñe corentetmontsetátšëmbo, y chamuinýena y chábeñe chamotsošbuáchema; pero ndegombre, Bëngbe Bëtsá béngbentse cada cánýabentsana ndoñe bënoca quenátsmëna. <sup>28</sup> Ntšamo canýa tojanayancá: ‘Bënga Bëngbe Bëtsáftaca cánýiñe mo canýacá

mondmëna; chábeyeca bënga vida mondbomna, jobónjuama mondobena y ainënga mondmeña ca’. Ntšamo tsëngaftanguentša báseftanga bëts soyëngama uabiamnayëngnaca tmojanayancá: ‘Bënga nyëtscanga Bëngbe Bëtsabe básenga mondmeña ca’. <sup>29</sup> Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entsangbe castellano, midio o chë ndëtšbeca pormana soyëngcá ca, er chë soyëngna nyë ntšamo entsanga tmojajuabocá y tmojtsobencá japórmana. <sup>30</sup> Pero Bëngbe Bëtsá tojanjuabó ndoñe ntjatonyayana chë entsangbe tempsca ndosertánana, y morna, nyetsca luarënguentša entsanga entsaménda, ndaye bacna soyënga tmojtsamama ngmëncaca chamuenojuabó, chca amama chamotsajbaná y Bëngbe Bëtsabe benache chamuatishache ca. <sup>31</sup> Bëngbe Bëtsá canýe te tojuinýananá, y chë tena, ndocnábioye inýabiama más tsábá ntjatonyaycá, cha echanjayana entsanga tsábá o ndoñe tsábá tmonjamama; lempe chca cha echanjama canýa cachá tbojabocacá entsáftaca, Jesús; y chca yochtsemnamna, Bëngbe Bëtsá entsanga tojinýanyé, chë bocacaná Jesús cháuatayenama cachá tojánmayeca ca” —Pablo tojánayana.

<sup>32</sup> Chë obanënga mochtayenama ichámuana chë entsanga tmojanuena ora, báseftanga Pablo imojtsáboyejuana, y inýengna mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

<sup>33</sup> As Pablo chëngbentšana tojésanbocna. <sup>34</sup> Pero báseftanga añe Jesucristbeñe imojtsošbuáchiye y Pablo tmojanasto más jatuenama;

chënguentšë imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

### Pablo Corinto puebloca

**18** <sup>1</sup>Chë soyënga tojanochnëngüentšana, Pablo Aténasentšana Corinto bëts pueblöye tojána. <sup>2</sup>Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, <sup>3</sup>y ntšamo chata jamama Páblë'naca jamama inatátšëmboyecna, chátaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entšëjuaca japórmana. <sup>4</sup>Y nÿetsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentšena judiënga y ndoñe judiënga chamotsošbuáchemama, ntšamo cha yojtsanëtsëtsnacá ndegombre bëtsemnama.

<sup>5</sup>Silas y Timoteo Macedonocana choye tbojánashjango ora, Pablo nÿets tempo Bëngbe Bëtsabe soyëngama entšanga yojtsabuayinyaye y puerte tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnama. <sup>6</sup>Pero chë judiënga Páblëbe contra imojtsemna y tmojanontšë podesca chabiamma ichámuana. Asna, Pablo chabe uchëtjoniyangá yojtsenántšasajjaye, chënga jinÿanÿiyama chënga ndoñe tšabá tmonjánchjanguama, y tojanéyana:

“Tšëngaftanga ndatsebácanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup>Chorna, chë judiëngbe enefjuana yebnentšana tojéftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentšá juachaca inoyena. <sup>8</sup>Y Crispo, canÿe chë enefjuana yebnentšá mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. <sup>9</sup>Canÿe ibeta, Bëngbe Bëtsá Páblëbioye mo canÿe otjenayoquécá tbojanianyana: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana. <sup>10</sup>Er atšë ácaftaca séntsemna y ndocná quecmochátsbojajo ntšámnaca jáborlama; atšë bëtscá entšanga quem pueblentšë sëndábamna ca.” <sup>11</sup>Chcasna, Pablo Corintentsë canÿe uata y chnénguana shinÿe tojanototoná, Bëngbe Bëtsabe palabra entšanga abuátambaye.

<sup>12</sup>Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunalöye tmojanánatse. <sup>13</sup>Chocna, chë mandado tmojanianyana: —Mua entšanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguñe endayancá ca.

<sup>14</sup>Pablo jóyebuambayama uatajanóntša orna, Galión chë judiënga tojanéyana: —Quem entšá nderado

ínÿabioye matbënjóba o ndayánaca  
 chca matënjobuachjanguá, as cocayé  
 atše matijótbema tsëngaftanga  
 judiënga yejuana joyaunayama;  
<sup>15</sup> pero ntšamo šmotsichamcá  
 entsemna nÿe buatëmbana soyëngama,  
 nÿe tsëngaftanga šmëbuatma  
 entšangbiama y cach tsëngaftangbe  
 leyëngama; chcasna, cach tsëngaftanga  
 cmontsamna jenóyeunayana y  
 jamana ntšamo chašmojenoyeunacá.  
 Atše quem base soyëngama ndoñe  
 quetsátsboše ngoberna jtsemnana ca.

<sup>16</sup> As Galión tojanamëndá chë  
 tribunal luarentšana chë judiënga  
 jtëbuacnama. <sup>17</sup> Chorna, chë entšanga  
 tmojánishache chë judiëngbe enefjuana  
 yebnentša mandayá, Sóstenes  
 ca uabainá, y Galionbe delante  
 imojtsejantšetaye. Pero Galión chë soye  
 tondayana ibontsentšamna.

**Pablo Antioquiye tojtaná  
 y chentšana cachiñe inÿe  
 luarëngoye tojána, Bëngbe  
 Bëtsabe trabajo jamama**

<sup>18</sup> Pablo cabá bayté Corintëntse  
 tbojántotona. Chentšana, Jesucristbeñe  
 ošbuachiyëngbentšana tojesanodiošoftá  
 y bejaycá Siria luaroye tojána,  
 Priscila y Aquílaftaca. Cabá Sirioye  
 nda ora, Cencrea puebloca nÿets  
 stjénashe yojtsenátsbotje, Bëngbe  
 Bëtsábioye jinÿinÿiyama canÿe soye  
 tbojanšbuáchenama. <sup>19</sup> Efeso puebloye  
 tmojánashjajna ora, Páblëna Priscila y  
 Aquila tojésanabashejuana. Chentšana,  
 cha tojána chë chentša judiëngbe  
 enefjuana yebnoye y chentše chë  
 judiëngaftaca yojanoyebuambná y  
 imojánenatsëtsnaye. <sup>20</sup> Báseftanga  
 Pablo tmojanimpadá inÿe baseftayté  
 chentše chausomñama, pero chana  
 ndoñe tonjanoyauná; <sup>21</sup> chentšana,  
 chëngbentšana tojesanodiošoftá,

mëntšá jëftséyanëse: “Nderádose  
 cachiñe chantésabo tsëngaftanga  
 jabábuachama, Bëngbe Bëtsá  
 šojalesenciase ca.”

Chora, Pablo bejaycá Efesocana  
 tojéftsanbocna. <sup>22</sup> Cesarea  
 puebloye tojánashjango ora, tojána  
 jacheuayama Jesucristbeñe  
 ošbuáchiyënga Jerusalemoca; y  
 chentšana Antioquiye tojána.  
<sup>23</sup> Chentše baseftayté yojéftsemna; y  
 chentšana, Pablo tojesaná Galacia y  
 Frigia luarënguenache, Jesucristbeñe  
 ošbuáchiyënga añemo atšatnaye.

**Apolos, Efeso puebloca Bëngbe  
 Bëtsabe soyëngama yojanabuayiyá**

<sup>24</sup> Cach tempo, Efesoye tojánashjango  
 canÿe judío, Apolos ca uabainá,  
 Alejandría bëts pueblócá; cha puerte  
 obená inamna jonguamiyama y  
 corente inatátšëmbo Bëngbe Bëtsabe  
 uabemana palabréngama. <sup>25</sup> Bëtscá  
 tojánatsjinÿe chë Bëngbe Utabná  
 tojaninÿanjé benachama; añémoca  
 yojanoyebuambná y Jesusbe  
 soyëngama botamana yojanabuambá,  
 masque cha nÿe ntšamo Juan entšanga  
 tojánabuambama y tojanëbáyama  
 inatátšëmbo. <sup>26</sup> Ndauatjcá Apolos  
 tojanontsé jóyebuambayama chë  
 judiëngbe enefjuana yebnentše. Pero  
 Priscila y Aquila cha imojóyeunaye  
 ora, barie tmojanchembo y más  
 botamana tmojanbuayená, ntšamo  
 Bëngbe Bëtsabe inÿinÿena benache  
 bëtsemnama. <sup>27</sup> Apolos Acaya  
 luaroye jama yojtseboše orna,  
 Jesucristbeñe ošbuáchiyënga bëtscá  
 tmojanañémó y choca Jesucristbeñe  
 ošbuáchiyëngbiama canÿe tsbanácha  
 tmojanichmó, chca, Apolos choca  
 tsábá chamofjama. Acaya luaroye  
 tojánashjango ora, Jesucristbeñe  
 ošbuáchiyënga bëtscá tojanëjabuache.

Bëngbe Bëtsá chëngbe tšabiamá  
yojanjuabnáyeca, chënga Jesucristbeñe  
corente imojtsošbuáchiye. <sup>28</sup>Entšangbe  
delante chë judiëngaftaca  
jabuachana imojánenatsëtsnaye y  
nyëtscanga tojaninÿanÿé, ntšamo  
ndoñe tšabá inamncá chë judiënga  
imnatatšëmbuama; y Bëngbe Bëtsabe  
uabemana palabréngaca chënga  
tojaninÿanÿé, Jesús Bëngbe Bëtsabe  
Uámana Uabuayaná bëtsemnama.

**Pablo Efeso puebloca**

**19** <sup>1</sup>Apolos Corintoca  
yojtsemnëtscuana, Páblëna  
chë tjañe luarënguëjana tojánachnëngo  
y Efesoye tojánashjango; chentšë  
básefta ošbuáchiyënga tojánanÿena,  
pero chëngna nyë ntšamo Juan  
chë Ubayaná tojanabuatambacá  
imnatatšëmbo. <sup>2</sup>Pablo chënga  
tojanatjá: —¿Uámana Espíritu  
chenjánabo tšëngaftangbe ainaniñe  
jtsemándayama, Jesucristbeñe  
ošbuáchiyënga šmojanóbiamá ora ca?

Chora chënga tmojanjuá: —Ni  
mo queftsátstatšëmbo chë Uámana  
Espíritu yomnama ca.

<sup>3</sup>Y Pablo tojanéyana: —As, ¿ntšamo  
šmojánenabaye ca?

Y chënga tmojanjuá:  
—Fsënjánenabaye ntšamo Juan  
entšanga yojanëbayancá ca.

<sup>4</sup>As Pablo tojanéyana: —Juan  
tojanëbaye chë bacna soyënga amama  
ngmënaca tmojanenojuabó, chca  
amana tmojanajbaná y chë Bëngbe  
Bëtsabe benache tmojánishachënga,  
y entšanga yojanëtsëtsná chë  
chábentšana yochjanashjanguábeñe  
chamotsošbuaché ca; y cha Jesús  
endmëna ca —Pablo tojánayana.

<sup>5</sup>Chca tmojanuena ora, chënga  
tmojánenabaye Bëngbe Utabná  
Jesús jótšëmbonëse, chábeñe

imojtsošbuáchemá. <sup>6</sup>Pablo chëngbe  
bestšašinë chabe cucuatšënga  
tojanajó ora, Uámana Espíritu  
chëngbe ainaniñe tojánamashëngo  
jtsemándayama; tmojanontšë  
inÿetšá biyangana, chënga tempo  
ndmabiyañe, y Bëngbe Bëtsabe  
juabna imojtsoyebuambná. <sup>7</sup>Chentšë  
imojtsemna bnëtsana uta entšanga.

<sup>8</sup>Unga shinÿëntscuana Pablo  
yojánaye chë judiëngbe enefjuana  
yebnoye y ndauatjá Jesucristbe  
soyëngama yojanoyebuambná;  
entšángaftaca imojánenatsëtsnaye  
y entšanga yojanëtsëtsná Bëngbe  
Bëtsabe amëndayama, chënga chábeñe  
chamotsošbuáchemá. <sup>9</sup>Pero ba  
nduauenanënga ndoñe imontsošbuaché  
y Bëngbe Utabná tojaninÿanÿé  
Benachama entšángbeñe bacna  
soyënga imojtsichamo. Chcasna, Pablo  
chëngbentšana tojtšanojuánañe y  
nyë chë Jesucristbeñe ošbuáchiyënga  
tojanébuaja canÿe scueloye, canÿe  
entšá Tirano ca uabainabe yebnoye.  
Chentšë cada te chë ouenanëngaftaca  
yojanoyebuambná, <sup>10</sup>y chca yojánama  
uta uatëntscuana; y chca, nyëtscanga  
Asia luaroca oyenënga Bëngbe  
Utabnabe palabra tmojanuena,  
judiënga y ndoñe judiëngnaca. <sup>11</sup>Y  
Bëngbe Bëtsá puerte bëts soyënga  
Pábloftaca yojtšama. <sup>12</sup>Tša bëts  
soyënga tojanma; chíyeca, nyëtsca  
chë Pablo tojuabojajo entšayá y  
pañuelëjuangá, entšanga imojanamana  
šoquëngbioye juyambana, y chca  
tmojama orna, chë šocanënga  
juenatjëmbana y chë bacna bayëjënga  
entšángbentšana jésebocanana.

<sup>13</sup>Pero básefta judiënga tsáshenañe  
bacna bayëjënga entšángbentšana  
imojtanëbuacana. Chë judiënga  
imojtseboše chë bayëjënga jtëbuacnana,  
Bëngbe Utabná Jesús jótšëmbonëse.

As, chë bacna bayëjéngbioye mëntśá imojtsétsnaye: “Bëngbe Utabná Jesús, Pablo bondbetsëbayaná jótšëmbonëse y chabe obenánaca cbontsaménda muabentsána chašmuaisebocnama ca.”

<sup>14</sup> Chca imojánama chë judío Esceva ca uabainabe canýsëfta uaquiñënga. Esceva inamna bachnangbe amëndayá.

<sup>15</sup> Pero canýe, Escévëbe uaquiñënga chca tmojánayana orna, chë bacna bayëja mëntśá tojanéjua: “Atše Jesús sënduábuatma y sëndétatšëmbo nda Pablo yomnana; pero tsëngaftanga, čndëmuanyënga šmonna ca?”

<sup>16</sup> As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñaná, jabuache jtsajantšëtaýëse; chë causa, chënga chë yebnentsána tmojtsanacheta enašënga y lisiánënga.

<sup>17</sup> Nýetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entsànga más imojtsatschuanaye.

<sup>18</sup> Jesucristbeñe imojtsošbuachiyënguentšana, banga imojánashajuana y entsangbe delante imojtsecompšaye, tempo bacna soyënga tmojanmama; <sup>19</sup> banga, chë bocjuanana soyënga jamama imojanëntšénënga, chëngbe bocjuanana librëšangá tmojaniyëbo y entsànga imojtsantješna ora, chëšangá imojtsajuinýiye.

Tmojanjuabó ntsachetśá chë librëšangá bëtšamanama y tojanóbocna shachna bnëtšana uaranga crocénana nýetśá.

<sup>20</sup> Y chca, Bëngbe Utabnabe palabra más ba entsànga imojtsuenana y čiñe imojtsošbuáchiye y Bëngbe Bëtśá chabe obenana entsángbeñe yojtsinýinýnaye.

<sup>21</sup> Chca tojanochnëngüentšana, Pablo tojanjuabó Macedonia y

Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentsána Romoye jama ca. <sup>22</sup> Asna, chabe uajabuachanënguentšana útata, Timoteo y Erasto, Macedonoye cha tojanichamó. Chëntscuana Pablo baseftayté más Asia luarentšë tbojanjëtana.

### Efesoca entsànga tmojánenbouenana

<sup>23</sup> Chë tempo, Efesoca entsànga corente tmojánenbouenana, chë Bëngbe Utabná yojtsinýanýná Benache imojtsisháchichanëngbe causa. <sup>24</sup> Chë entsànga chca tmojanma, er canýe entśá mídioca soyënga pormayá, Demetrio ca uabainá, chënga tojanayëñaná chca jamama. Cha yojanamana binche soyetëmënga japórmana y chëtëmënga yojáninýna mo chë Efeso puebloquëngbe diosá Artemisa jadórama bëtš yebncá. Demétrioftaca imojantrabájangna bëtscá crocénana imojanójacañe chë soyetëmënga eniñe. <sup>25</sup> Demetrio tojanébuaja cháftaca imojantrabájanga y ínýenga cach mídioca soyënga pórmayënga, y mëntśá tojanéyana: “Baconga, tsëngaftanga šmondétatšëmbo, bënga bëtscá crocénana jtsebomnamna quem trabajuentšana chca jopódiana. <sup>26</sup> Pero tsëngaftanga šmontsonýá y šmontsuenana ntšamo chë Pablo ca uabainá yojtsichamecá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsànga tojabuayená y chënga aíñe montseyuana. Chë soyna ndoñe nýe muentšë Efesentšë chca quenátopasana; nýets Asia luaríñnaca chca entsopasana. <sup>27</sup> Resjo entsemna; chca causa, entsànga

bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántichamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabatma, nda Asientše y nÿets luaríinaca mondadorana ca.”

<sup>28</sup> Chca tmojanuena ora, chca pórmayënga puerte tojánëtëna y tmojanáyebuachena: “iEfesoquëngbe Artemisa corente bëtsá endmëna ca!”

<sup>29</sup> Y chca, nÿetsca chë pueblentša entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojóana tmojanënatse chëngbe enefjuana yebnóntscoñe. <sup>30</sup> Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. <sup>31</sup> Chë Asioca mándayëngbentše básiëftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

<sup>32</sup> Chëntscuana, entsanga imojtsejotonocna, ínÿënga imojtsechembumbuana canÿe soye y ínÿëngna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. <sup>33</sup> Pero básiëfta judiënga, canÿe entsá, Alejandro ca uabainá, chë entsangbe natsanoye tmojanajuatsëntše, y básiëftanga cha tmojanbuayená ntšamo yojtsopasánama. Asna, Alejandro tojánëfjatsšëmbo cucuátšëca iytëca chamobiamama, er cha yojtseboše entsangbe delante chë judiënga

jobuauyanama. <sup>34</sup> Pero, Alejandro judío bemnama chë entsanga tmojánatšëmbona ora, nÿetscanga tmojanáyebuachena uta horëntscuana, mëntšá: “iEfesoquëngbe Artemisa corente bëtsá endmëna ca!”

<sup>35</sup> Chë pueblentša mándayëngbe uajabuachaná, entsanga iytëca jábiamama tojanobená ora, tojanéyana: “Efesoquënga, nÿets luariñe endótatšëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana otsatšëna ndëtšbé. <sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuabocá. <sup>37</sup> Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiama ndoñe podësca tmonjoyebuambá. <sup>38</sup> Demetrio y cháftaca šmotrabájanga, nderado ndabiama ndaye demanda šmojtsebomnësna, cabildoca endatëfjna y chentše mándayënga montsemna chë demandënga joudenama, y chëngbentše cada ona šmojhjëftsendemánda. <sup>39</sup> Y tšëngaftanga inÿe soye šmojtseguasna, cmontsamna ntšamo bëngbe leyënguñe yomandancá, nÿetsca quem pueblentše oyenëngaftaca jenóyeunayana. <sup>40</sup> Ndayá mënté tojopasá causa, resjo entsemna bëngbiama chamuayana, ntšamo leyënguñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanéyana. <sup>41</sup> Y chca jayanëse, chë entsanga tojtjanichamó.

**Pablo, Macedonia y Grecia  
luaroye tojána**

**20** <sup>1</sup> Chë enbouenanana tojanochnëngo ora, Pablo chë Jesucristbeñe ošbuachiyëngbioye



tojanébuaja jábuayenama, añemo chamotsatsbomnana; tojesanodiošoftá y Macedonioye tojéftsanbocna. <sup>2</sup> Chê luarënguëjana cha tojánachnëngo Jesucristbeñe ošbuáchiyënga beca añemo atatšatnaye, ba chabe palabrëngaca; chentšana, Grecia luaroye tojánashjango, <sup>3</sup> y chentše unga ishinÿe tojanoquedá. Barquëshañe Sirioye játama Pablo yojtseprontana orna, tojántatsëmbona chë judiënga cha jtsóbama tmojanenóyeunama. Asna, tojanenojuabó jesshéconama, cach Macedonia luarëjana jésachnënguse. <sup>4</sup> Pablo quem boyabásenga tmojantjëmbambá: Sópater, chë Bereocá, Pirrbe uaqiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófimnaca, Asia luarocata. <sup>5</sup> Chënga tmonjanonatsé y šonjanëbatma Troasoca. <sup>6</sup> Chë levadúraca ndëpormana tandëse saye fiestentšana, Filíposentšana barquëshañe fsënjéftsanbocna y shachna tianoye, Troasoca chë tmonjanonatsenga fsëntanishëche, y chentše canÿe semana fsënjanoquedanga.

#### **Ntšamo tojanopasá Troas puebloca**

<sup>7</sup> Chë inÿe semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cánÿiñe jasama; y Pablo entšanga enjétsëtsësnaye. Cha bonjamna yëfsana chentšana jéftsebocnana; chë causa, más bën chëngaftaca tonjanoyebuambá, tsëntsetëtscuana. <sup>8</sup> Fsënjamna canÿe tsoye tsbanana tsañoca y chentše ba uajuinÿanëshangá enjanamna; <sup>9</sup> y canÿe bobontse, Eutico ca uabainá, ventanentse enjántbemana. Pablo bën enjanoyebuambná causa, chë bobontse ocayana tbojanábuache. Cabana, corente tojtsanomaná ora,

chë unga tsañocana tontsanótsatše y obaná chora tmontanatsbaná. <sup>10</sup> As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entšanga tonjanéyana: “Ndoñe nÿetšá matauatjëngana; ainá cha entsatsmëna ca.”

<sup>11</sup> Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbañese tojanmama. Chora Pablo chë entšangaftaca tonjanse y tontëtanontsé oyeuambnayana, jabinÿnëntscuana. Chora Pablo chentšana tontsanoñe. <sup>12</sup> Y chë otsatšëna bobontsana ainá imojtsatánatseñe, y chama chë entšanga corente oyejuayënga imojtsemna.

#### **Pablo Troasentšana Mileto pueblöye tojána**

<sup>13</sup> Bëngna fsënjanonatsé y barquëshañe fsënjána Aso pueblóntscoñe, chentšana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana. <sup>14</sup> Asoca Pábloftaca fsëntaneninÿena ora, bëngaftaca barquëshañe cha tonjána Mitilene pueblöye. <sup>15</sup> Chentšana fsënjéftsanbocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentšana fsënjána y yëfsana Mileto pueblöye fsënjánashjajna. <sup>16</sup> Chca tonjanochnëngo er Pablo ndoñe chenátanbošena Efesoye jama, Asia luarinë ndoñe yapa ndëtsemnama. Chca tojánbošena er cha enjétebošë betsco Jerusalemoca jtsatsmënana, tojopodesna chë judiëngbe fiesta, Pentecostés ca uabaina fiestama.

#### **Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana**

<sup>17</sup> Miletocana Pablo tonjanmandá chë Efesoca ošbuachiyëngbeñe

bëtsëjemëngcá mándayënga jobiatšana. <sup>18</sup> Chënga tmonjánashajna ora, Pablo tonjanéyana: “Tšëngaftanga šmondétatšëmbo ntšamo atše quem Asia luaroye sënjabánashjango orscana tšëngaftangbeñe snetsamana. <sup>19</sup> Njÿets tempo Bëngbe Utabná sëndëservena y cach atše uamaná ndoñe quetsatenobiamná. Corente shëchbuiye tijÿtsoperdé y ba soyënguiñe tijasufrí, chë judiënga atše jóbama mondboše causa. <sup>20</sup> Y lempe ntšamo tšëngaftangbe tšabiamana yomncá tconjabuayená; tondaye ntjatsbuetamencá. Njÿetscangbe delante sënjabuatambá y tšëngaftangbe yebnënguenáchnaca. <sup>21</sup> Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngménaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchemana. <sup>22</sup> Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatšëmbo. <sup>23</sup> Njÿe mëntšá aññe sëndétatšëmbo: Njÿetsca bëts publënguenache ndayëjana atše chandbëtsana, Uámana Espíritu šondbëtsebuayiyñaye entšanga cašmochjutame y puerte chaisufrima camochjama ca. <sup>24</sup> Atšbe vida cach atšbiamana ndoñe yapa quenatámana, chaitsaina o chayóbana. Pero atšbiamana iuámanana endmëna ndayá atše jobenayana atšbe trabajo jÿtsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšangaftaca tšabiana yomnana jábuayenama. <sup>25</sup> “Y mora atše ndegombre séntsetatšëmbo, tšëngaftangbentšana, chë ndëmuanjÿengbentše Bëngbe Bëtsabe amëndayama sënjabuayená,

ndocná atše más quešmochátinÿe. <sup>26</sup> Chíyeca, atše ndegombre mënté cbetséyana: Atše tondaye quetsátstatšëmbo nderado nda ndatsbocaná chaojóbanabiamana, <sup>27</sup> er atše ntšamo Bëngbe Bëtsá jamama yojuabnacá lempe tconjabuayená, tondaye ntsebuetamencá. <sup>28</sup> Chcasna, cach tšëngaftangbiamana šmochtsantješna y njÿetscanga muentše Jesucristbeñe ošbuachiyëngbiámñaca. Chëngbeñe mo chëngbe abujÿënyangcá Uámana Espíritu tmonjajayé, Bëngbe Bëtsabe entšanga chašmotsanÿenama, chënga Bëngbe Bëtsá chábinga tojábiamana, chabe Uaquiñabe buiñe juabuáshanëse y jóbanešese, mo bëtscá cuafjopagacá. <sup>29</sup> Atše séntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama. <sup>30</sup> Y tšëngaftangbentšánëñaca báseftanga mochanjábocana y entšangbiöyey uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínÿengbentšana chamotsoluarema y njÿe chë abuatambayëngbiöyey chamotsésetonama. <sup>31</sup> Chcasna, sempre šmochtsantješna; ndoñe chacmondëbnëtjomba, atše unga uatëntscuana, bnëté y ibeta, tšëngaftanga cada ona cbondétsabuayiyñama y chama atše puerte tijasufrí. <sup>32</sup> “Y morna, Jesucristbeyeca catsátanga, Bëngbe Bëtsabe cucuatšñe cbëtsabashejuana y ntšamo tšëngaftangbiamana chabe tšabe juabna yomnana palabrëngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchemana, y

endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndëmuanÿenga cha tojáchembo chabe entšanga chamotsemnama. <sup>33</sup> Atše ndocnabe crocénana, o castellano o entšayá atšbiana quetsatántšaboše; <sup>34</sup> más inÿetšá, y tšëngaftanga lempe šmondétatšëmbo, atše cach atšbe cucuátšeca tijéftsetrabajama, atšbiana y átšeftaca imojamnëngbiana opresido enjamna soyënga janguanguama. <sup>35</sup> Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnaye: ‘Canÿe entšá más oyejuayá jtsemnana ndayánaca inÿabioye tbojtsatšetná ora, y inÿabioye tbojtseyëngacá ora ndoñe nÿa nÿetšá ca’ —Pablo tonjanoyebuambá.

<sup>36</sup> Pablo chë soyënga tonjánayanentšana, tonjanoshamentšé y nÿetscanga chentše monjésemnëngaftaca Bëngbe Bëtsá tmonjanótšëmbona. <sup>37</sup> Nÿetscanga tmonjánenobošachna y Pablo tmontanotsejcuá y tmontanámochó. <sup>38</sup> Y entšanga corente ngménaca monjésemna, chënga ndocna te más cha mochántinÿe ca Pablo tojanéyana causa. Chentšana, chënga chë barquëshha enjetsamnëntscoñe cha tmonjantjëmbambá.

#### Pablo Jerusalenoye tojána

**21** <sup>1</sup> Chë Jesucristbeñe ošbuáchiyënga fsënjéftsanabashejuana ora, barquëshhañe fsënjanojayé y ndericho Cos luaroye fsënjána; chë yëfsana Rodasoye y chentšana

Pátara pueblöye. <sup>2</sup> Pátara pueblentše canÿe barquëshha fsënjáninÿena, Fenicioye enjétsaye; asna, chëshhañe fsënjanojayé y chentšana fsënjéftsanbocna. <sup>3</sup> Fsëntsana chëñjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentše chë barquëshentša uasmanëshangá jéftsáboshjonama yojámnayeca, chë pueblöye bënga fsënjéftsanamashjna. <sup>4</sup> Chentšana, Jesucristbeñe ošbuáchiyënga fsënjánanÿena y canÿséfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámána Espíritu tojanabuayená ndayá choca cháftaca jopásama. <sup>5</sup> Chë canÿséfta te tonjanochnëngo ora, chentšana fsënjéftsanbocna y nÿetscanga parejo chëngbe shëmangaftaca y básangaftaca šonjanatjëmbambá chë pueblo chabóntscoñe; y chentše, chë chëñyañe fsënjanošamentšé y Bëngbe Bëtsá fsënjanimpadá. <sup>6</sup> Chentšana, fsëñjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

<sup>7</sup> Tirentšana fsënjéftsanbocna y Tolemaida pueblöye fsënjánashajna; y chentše tonjanopochocá bëngbiana bejaycá chë te ayana. Tolemaidentše Jesucristbeñe ošbuáchiyënga fsënjanocheuá y chëngaftaca canÿe te fsënjanoquedanga. <sup>8</sup> Yëfsana, bënga chentšana fsënjéftsanbocna y Cesarea luaroye fsënjánashajna. Chocna, bënga fsënjána Felipe chë Jesucristbiana tšabe noticiënga abuayinayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye

ujabuachanënguentšá, Jerusalenoca ubuáyanënga. <sup>9</sup>Felipe enjánabamna canta ndëbouamna bemianga y chënga monjamna Bëngbe Bëtsabe juabna oyebuambnayënga. <sup>10</sup>Ya bayté chentše fsënjëtsemna orna, Judeocana tonjánashjango canya Bëngbe Bëtsabe juabna oyebuambnayá, Agabo ca uabainá. <sup>11</sup>Agabo béngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduínbioye chë judiënga mëntšá camochjama y ndoñe judiëngbe cucuatšinë camochjáboshjona ca.”

<sup>12</sup>Chca fsënjajuena ora, bënga y chentša entsanga Pablo fsënjanimpadá Jerusalenoye ndoñe chaondëtsama. <sup>13</sup>Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngmënana chaotsemnama ca? Atše séntseprontana y ndoñe nye chašmobatsëcama; Jerusalenoca jobanámna séntseprontana, Bëngbe Utabná Jesusbiana ca —cha tonjánayana.

<sup>14</sup>Jáyënjana ndoñe chibiatanobená ora, ndoñe más chibiatanimpadá; nye mëntšá fsënjaniyana: —Ntšamo Bëngbe Utabná yojtsebošcá chaotsemna ca.

<sup>15</sup>Chë soyënga tonjanochnëngüentšana, fsënjano prontá y Jerusalenoye fsënjána. <sup>16</sup>Cesareoca, báfesfta Jesucristbeñe ošbuáchiyënga choye šonjanatjëmbambá y chocna, chënga šonjanënatse canye Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

### Pablo tojána Santiago jauatsëtsayama

<sup>17</sup>Jerusalenoye fsënjánashjajna orna, chentša Jesucristbeñe ošbuáchiyënga oyejuayënga šonjanëbuaja. <sup>18</sup>Yëfsana, Pablo béngaftaca tonjána Santiago jábuachama, y chentše, nyetsca chë ošbuachiyëngbeñe bëtsëjemëngcá mandayëngnaca monjëtsemna.

<sup>19</sup>Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbe tojanmama.

<sup>20</sup>Chca tmonjanuena ora, Bëngbe Bëtsá tmontanchuá y Pablo mëntšá tmonjaniyana: “Morna, Jesucristbeyeca bëngbe catšata, contsonyá ntšamo ba uaranga judiënga Jesucristbeñe imojtsošbuáchema, y chënga nyetscanga montsantješna nyetsca Jesucristbeñe ošbuáchiyënga chë Moisesbe leyentša nyetsca mandënga chamotsocumplínama. <sup>21</sup>Y entsanga chëngbioye noticia tmojatšatá, aca chë inye luarënguenache imoyena judiënga cojtsabatambá, Moisés tojanmandá soyënga ndoñe ntseyeunana y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. <sup>22</sup>Y morna, ¿ntšamo chë soyëngama cochtsemna? Ndegombre, chënga mochanjätatšëmbona aca moye tcojabama. <sup>23</sup>Chcasna, ntšamo cbochanjabuayenacá cochjama: Bëngbentše canta boyabásenga montsemna y chënga entsamna Bëngbe Bëtsabiana canye šbuachenana soye jamama. <sup>24</sup>Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábenga jtsatsmënana ntšamo

chamojtsama ora, y ntsachetšá jětsjájuaa chaojtsamncá, aca cochjětsjájua, as chěnga chamobená n̄yets stjēnashe jtsenátsbotjijama, jin̄yan̄iyama, ntšamo Běngbe Bětsábioye tmojašbuachenacá ya tmojamama. Y chca, n̄yetsca judiēnga mochanjin̄ye ndoñe ndegombre yontsemna chě ntšamo chěngbioye acbiamá tmojacuntacá; masna, chěnga mochanjátatšēmbona aca ndegombre ntšamo Moisesbe leyīñe yomandancá icuamama. <sup>25</sup>Y chě ndoñe judiēnga Jesucrístbeñe imojtsošbuachengbiamna, bēnga ya fsēnjubuaábiamá y fsēnjáuyana ndayá jtsocumplínama chěnga yojtsamnama, mēntšá: ‘Ndoñe chamondětsesá mēntšena, chě entšanga tmojtsejuabná diosēnga imomna soyēnga jadórana tmojijēbana; ni buiñe, ni tsešana bayēngbe mēntšena; y ndoñe chamondětsama bacna soyēnga shembásēnga y boyabásēngaftaca’ ” —chěnga tmojánayana.

**Běngbe Bětsabe bēts yebnentšē  
judiēnga Pablo tmojánishache**

<sup>26</sup>As Pablo, yěfsana chě cántanga tonjanēnatse y chěngaftaca tonjanma soyēnga Běngbe Bětsabe delante tšábēnga jtsatsmēnama. Chentšana, Pablo Běngbe Bětsabe bēts yebnoye tonjánamashēngo chě bachnanga júnayama, ndayténtsoñe yojamna chě cantangbiamá soyēnga jtsamama, Běngbe Bětsabe delante tšábēnga jtsatsmēnama, y jayanama ndayté chěngbiamá yojtsemna ndaye ora cada ona ibojtsemna ndayánaca Běngbe Bětsabe bēts yebnoye juambana, Běngbe Bětsabiamá juatšēmbonama.

<sup>27</sup>Chěnga tmojanenoyeuná y tmojánayana can̄yěfta tentscuana chca jamana ca. Chě can̄yěfta te ya jochnēnguama yojtsemna

orna, básefta judiēnga Asioquēnga Pablo tmojánin̄ye Běngbe Bětsabe bēts yebnoca y tmojanma entšanga chamuenbouēnanama. Y cha tmojánishache, <sup>28</sup>mēntšá jtsayebuáchēse: “Israeloca entšanga, šmabětsējabuache ca! Quem boyabása entsemna chě n̄yets luarēnguenache iuana abuátambaye soyēnga bēngbe entšangbe contra, y ntšamo bēngbe leyēnguiñe endayanama contra, y quem Běngbe Bětsabe bēts yebnama ndoñe tšabá yontsoyebuambná. Y cabana quem Běngbe Bětsabe bēts yebnoye grieguēnga tojúmashēngo, y chca cha tonjama chě Běngbe Bětsabe bēts yebna Běngbe Bětsabe bomin̄yiñe ndoñe tšabá chaondětsemnama ca” —chěnga imojtsichamo.

<sup>29</sup>Chca imojtsichamo, er entšanga Pablo tmojánin̄ye chě bēts pueblentšē Tróximo Efesocáftaca; y imojtsejuabnaye chábioye Běngbe Bětsabe bēts yebnoye Pablo tbojanánatse ca.

<sup>30</sup>N̄yetsca chě pueblentša entšanga tmojánēnbouenana, y ochamanana chě Pablo yojtsemnoye tmojánashajjna. Pablo tmojánishache y Běngbe Bětsabe bēts yebnentšana shjoye tmojtsansjojó, y cachora chentša bēšašangá tmojtanatame. <sup>31</sup>Jtsóbama ya imojtsebuachéta ora, chě Romoca soldadēngbe mandayá tojántatšēmbona n̄yetsca chě bēts pueblentša entšanga imojtsenbouenanama. <sup>32</sup>Asna, chě mandayá chabe soldadēnga y in̄ye chentša amēndayēnga tojánachembo y cán̄yiñe chě entšanga imojtsemnoye tmojětsanótjajo. Entšanga, chě mandayá y chě soldadēngbioye tmojánayē ora, tmojtsanajbaná Pablo jantšetayana.

<sup>33</sup>Chorna, chě soldadēngbe amēndayá tojanobeconá, Páblēbioye

tbojánishache y tojanmandá uta cadenéjuaca cha chamotsebátsécama y tojanatjá: “¿Nda mua yomna y ndayá tojama ca?” <sup>34</sup> Pero chë entsángbeñe, ínÿenga canÿe soye imojtsáyebuache y ínÿengna inÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. <sup>35</sup> Chë soldadëngbe oyenoca grádasbengoye tmojánashajjna ora, chë soldadënga tojanotocá Pablo cutsnana juambama, chë entsánga tša rábiaca imojtsemna causa, <sup>36</sup> er chënga ústonoye imojétsaye y “¡Chaóvana ca!” imojtsaiuáyebuache.

**Ntšamo Pablo entsángbe  
delante tojanenëuyaná**

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tšačatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! <sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsánga yojanëtsëtsná chë mándayëngbe contra chamotsemnana y chë canta uaranga podesca uamana entsánga puñálaca uajatëngaftaca, entsánga ndoyena luaroye tojanbochná ca?

<sup>39</sup> Chora Pablo tbojanjuá: —Atše judío sëndmëna, Tarso puebloca onÿnaná, canÿe uámana pueblentše Cilicia luaroca; Diosmanda šmolesenciá entsánga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatše tojanatsbaná entsánga iytëca chamobiamama. Nÿetscanga iytëca

imojtsemna orna, Pablo hebreo biyañe mëntšá entsánga tojanéyana:

**22** <sup>1</sup> “Baconga y taitanga, mora šmochjouena atše jenéuyanama ntšamo chÿayancá ca.”

<sup>2</sup> Pablo cachëngbe biyañe, hebreo biyañe yojtsóyebuambnana entsánga tmojanuena ora, más iytëca tmojanobiana. As Pablo tojanéyana: <sup>3</sup> “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalemntše sënjanoboché y sëndétatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá. <sup>4</sup> Atše sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. <sup>5</sup> Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sëntsichamcá ndegombre yomnana. Chënga uabemana tsbuanachangá šmonjaninÿé, bëngbe catšátanga judiënga chamotsetatšëmbuama atše mando stsanbomnana, Jesucristbeñe ošbuáchiyënga jótabayama; y Damascoye sënjánana choca Jesucristbeñe ošbuáchiyënga jótabayama, moye Jerusalemoye junatsama jacastígayama.”

**Pablo tojanacuntá ntšamo  
Jesucristbeñe ošbuachiyá  
tojanóbema**

(Hechos 9.1-19; 26.12-18)

<sup>6</sup> “Pero canÿe te benachiñe Damasco béconana sënjétsaye orna, mo nÿetsto ora, nÿe ndeolpe

atšbe juachañe canye bëts tcuinÿe celocana tonjanbuashinÿínÿena. 7 Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ 8 Atšbe sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atšbe sëndmëna Jesús Nazaretocá, y aca condama atšbe entšanga chamotsesufrínama ca.’ 9 Chë átšeftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena. 10 Chora atšbe sënjantjá: ‘¿Bëngbe Utabná, ndáyá jamama šojtsemna ca?’ Y cha šonjaniyana: ‘Matëtsbaná y mëtëtontšë Damascoye jama. Chentšë canÿa cmochanjabuayená ndáyá jamama cmojtsemnama ca.’ 11 Chë tcuinÿe yapa tonjanbuashinÿínÿena causa, atšbe jtaná sënjanouedá. Chcasna, chë ínÿenga šmontanobuacuetëntšë y chca, Damascoye sënjánashjango.

12 “Chentšë enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguine iuayancá, y nÿetsca chentšá judiënga monjanamana chabiamá tšabá jtsóyebuambnayana. 13 Cha tonjánabo atšbe jinÿama y tonjánashjango ora, šonjaniyana: ‘Jesucristbeyeca atšbe catšata, Saulo, chacotsatabinÿna ca.’ Cachora y cha sënjáninÿe.

14 “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamá yobošcá chacotsetatšëmbuama, chë nÿetsca soyënguine Tšabá Amá chacuinÿama y cachabe uayášentšana chacóyeunama. 15 Bëngbe Bëtsá chca tojama, aca chë chabe buayenana soyëngama entšángbeñe

chacóyebuambama, y chamna nÿets luarentšá entšángbeñe cochjacuénta, ntšamo tcojinÿe y tcojouencá. 16 Y mora, indoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjaniyana.

**Pablo tojanacuntá ntšamo chë ndoñe judiëngbiøye tmojánichmoma**

17 “Jerusalenoye sëntaná ora, Bëngbe Bëtsabe bëts yebnoye sënjáná cháftaca jencuéntama, y ndeolpe atšbe mo otjenayoquécá sënjanouedá. 18 Chca orna, Bëngbe Utabná sënjáninÿe y cha mëntšá šonjaniyana: ‘Betsco motsa y cam ora Jerusalenentšana métsebozna; quemuentšá entšanga ndoñe quecmochatóyeunaye ntšamo atšbiamá condétatšëmbo y contšëtsëtsnacá ca.’ 19 Atšbe sënjanjuá: ‘Bëngbe Utabná, chënga mondétatšëmbo atšbe sënjánana nÿetsca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetšenaye; 20 y acbiamá ndegombre oyebuambnayá Esteban tmonjanóba ora, átšnaca chentšë sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atšbe chora sënjanabojanÿá ca’ —atšbe sënjanjuá. 21 Pero chca sënjánayana ora, Bëngbe Utabná šonjaniyana: ‘Motsa; atšbe bën luarëngoye, ndoñe judiëngbiøye cbochanjíchmuá ca.’ ”

**Pablo y chë soldadëngbe amëndayá**

22 Chë entšanga chëntscoñe tmojanuena; pero chë ndoñe judiëngbiamá tojanoyebuambá orna, chënga tmojanontšë uayebuáchana: “iNdoñe tšabá quenátšmëna cha vídaca chaotsemnama! iMotsóba ca!” 23 Y

chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtšana; <sup>24</sup> chë causa, chë mandayá tojánayana chë soldadëngbe oyenoye Pablo chamotsémashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache. <sup>25</sup> Pero jtssetjanjama ya tmojanbatsëca orna, chentšë imojtsemna soldadëngbe amëndayábioye Pablo tbojantjá: —¿Tšëngaftanga šmobena canýe entšá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

<sup>26</sup> Chë básefta soldadëngbe mandayá chë soye tojanuena ora, tojána y nyetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entšá derecho bomna mo canýa Romoca onýnanacá canmëna ca.

<sup>27</sup> As chë amëndayá tojána Pablo yojtsemnoye y tbojanianaya: —Šmëyana, ¿aca derecho bomná mo canýa Romoca onýnanacá comna ca?

Y cha tbojanjuá: —Arseñor ca.

<sup>28</sup> Chora chë amëndayá tojánayana: —Atšë becá crocénana sënjëtšajájó mo canýa Romoca onýnanacá derecho jtsebomnama ca.

As Pablo tbojanjuá: —Y atšna derecho bomná mo canýa Romoca onýnanacá sëndmëna atšë tijanonýná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbentšana tmojanjuaná; y chë mandayánaca tojanojuaná y yojtsauatja, Pablo derecho bomná mo canýa Romoca onýnanacá yojamnama

tojántatšëmbona ora, er cha tojanmandá Pablo chamotsebátsëcama.

**Pablo, Jerusalemntša uamana  
mandayëngbe delante**

<sup>30</sup> Chë soldadëngbe amëndayá yojtseboše ndegombre jtssetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

**23** <sup>1</sup> Chora Pablo, nyetsca chë mandayëngbioye tojanënyanyë y tojanéyana: —Taitanga, atšë mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uamana amëndayá, tojanmandá Páblëbe béconana imojtsemnënga cha chamotsáyejantšetama.

<sup>3</sup> Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtšjantšetá, bacna entšá, ntšamo ndegombre tcojuabnacá ndinýinýnayá! Aca chentšë contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátšlesenciana ca.

<sup>4</sup> As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uamana amëndayábioye cochjójyenguango ca?

<sup>5</sup> Chora Pablo tojánayana: —Taitanga, atšë ndoñe quetsátstatšëmbo cha chë bachnangbe más uamana amëndayá yomnama. Er Bëngbe Bëtsabe



uabemana palabrënguine mëntšá endayana: “Entšangbe mandayabe contra ndoñe catjayana ca.”

<sup>6</sup>Pablo tojáninÿe chë mándayënguentše báseftanga saduceunga y ínÿengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsétsanga fariseunga mondmëna. Atše, jtsošbuáchiÿese chë obanënga mochtayenama tsobatmana causa, atše ndoñe tšabá séntsama ca tšëngaftanga šmochjayana ca.

<sup>7</sup>Pablo chca tojánayana ora, chë fariseunga y saduceunga tmojanontšë enatsëtsnayana, y chë causa nÿetsca entšanga ndoñe cachcá imontsejuabnaye. <sup>8</sup>Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguine jtsošbuáchiyana. <sup>9</sup>Y nÿetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canÿe ángel o espíritu muábioye ndegombre tbojayana ca.”

<sup>10</sup>Entšanga más imojtsáyebuache y chë soldadëngbe amëndayá yojtšauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentšana jaisábocnama y chë soldadëngbe oyenoye cachiñe jesánatsama.

<sup>11</sup>Yëfsana ibeta, Bëngbe Utabná Páblëbioye tbojánëbëbocna y tbojaniyana: “Pablo, ainaniñe añemo cochtsebmna. Ntšamo aca atšbiana condétatšëmbo y muentšë

Jerusalenentše condoyebuambnacá, cachcá cmontsemna Romoca jamama ca.”

#### Judiënga tmojanenoyeuná Pablo jtsóbama

<sup>12</sup>Chë inÿe yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofšiyana, cha jóbantscuana. <sup>13</sup>Chca jamama tmojanjuabó entšanga imojamna canta brëtsanëngama más. <sup>14</sup>Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga béngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana. <sup>15</sup>Morna, tšëngaftanga y chë inÿe muentšá mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjayana chca yojtsemna ana chë ndayá yojtšopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup>Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. <sup>17</sup>Chorna, Pablo canÿe básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nÿetsca soldadëngbe amëndayábioye; canÿe soye entsebmna chábioye juenayama ca.”

<sup>18</sup>As, cha chë bobontse tbojëftsantbetše, chë nÿetsca soldadëngbe amëndayábioye tbojanánatse y tbojaniyana: “Chë

utamená Pablo šonjachembo y šonjaimpadá quem bobontse ácbioye juanatsana; mua caojtsebomna canÿe soye aca jauyanama ca.”

<sup>19</sup> Chë soldadëngbe amëndayá chë bobóntsbiöye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebomna atše jauyanama ca?

<sup>20</sup> As chë bobontse tbojanianana: —Judiënga tmojenoyeuná taitá jaimpádama, yëfse chëngbe amëndayëngbiöye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. <sup>21</sup> Pero ndoñe catjóyaunaye; chënguentshana canta bnëtsanëngama más entsanga iytëmenënga Pablëbiana montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojanianana.

<sup>22</sup> Chentšana, chë soldadëngbe amëndayá chë bobóntsbiöye tbojanmandá, ndayá ibojuenayama ndocnábeñe ntsecuëntayana, y chentšana tbojtanichmó.

**Pablo tmojanánatse Félix, chë Cesareoca mandádbioye**

<sup>23</sup> Chentšana, chë soldadëngbe amëndayá tojánachembo útata chë inÿe soldadëngbiöye mándayënguentshana, y tojanamëndá chamoprontama uta patse soldadënga, inÿe canÿsëfta bnëtsanënga couayënguine y inÿe uta patse lanzëšangaca, Cesarea puebloye ibeta, las nueve ora jabocanama; <sup>24</sup> y tojanamëndá couayënga chamoprontá

Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. <sup>25</sup> Y canÿe tsbuanácha chëngaftaca tojanichmó y chëchañe mëntšá yojtsábemana:

<sup>26</sup> Claudio Lisias, chë bëts uámana mandado Felixbiana: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama sënjáatšëmbona ora, atšbe soldadëngaftaca sënjá y chëngbe cucuatšentshana cha sënjatsbocá.

<sup>28</sup> Atše sëntseboše jtsetatšëmbuana ndaye soyama chënga chabe contra imojtsichámuama; as, cha sënjuánatse nÿetsca chë judiëngbe amëndayënga montsemnoye; <sup>29</sup> y chentšana, atše sënjáatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámia. <sup>30</sup> Pero atše sënjáatšëmbona chë judiënga tmojenoyeuná cha jtsóbama; chíyeca, cam ora cha ácbioye sëntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse.

<sup>32</sup> Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayëñe enjaquenënga Pábloftaca tmojána.

<sup>33</sup> Cesareoye chënga tmojánashjajna ora, chë tsbuanácha chë mandádbioye tmojanantšabuaché, y Pablënaca

chabe cucuatšiñe tmojánboshjona.

<sup>34</sup> As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnana, y Cilicia luarocá cha inamnana cha tojántatsëmbona ora, <sup>35</sup> tbojanianyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

**Ntšamo Pablo chë mandado  
Félixbe delante tojanenëuyaná**

**24** <sup>1</sup> Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentsana y canýa entsanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontšë chabe contra jayanama y Félixbioye tbojanianyana: “Aslëpaye, taita mandado, ácbeyeca bënga natjëmbana fsëndoyena y aca puerte obiaishjáchá cómnayeca ba tšabe soyënga quem luarentša entsangbiana yojtsebinýna.

<sup>3</sup> Nýets tempo y nýetsquénache chë soyënga fsëndoyëngacañe, bëts uámana mandado, y bënga chama corente cbondetsechuaná. <sup>4</sup> Pero ndoñe yapa bën jatenbiamnyamna, Diosmanda ratotema šmotsoyauná.

<sup>5</sup> Bënga fsëntsetatšëmbo quem boyabása entsanguentše entsemna mo bacna shacuancá, nýets luarënguenache yojtsana y yojtsama chë judiënga nýetscanga cachca soye ndoñe chamondëtsejuabnana, y cha yojtsemna chë Nazaretocabe ustonëngbe uanatsaná. <sup>6</sup> Y tonjábošena jamama Bëngbe Bëtsabe bëts

yebna, Bëngbe Bëtsabe bominyiñe ndoñe tšabá chaondëtsemnana; chíyeca bënga cha fsënjotbá. Bënga fsënjábošena chabiana jayanana tšabá o ndoñe tšabá tonjamama, ntšamo bëngbe leyënguiñe endayancá; <sup>7</sup> pero chë soldadëngbe amëndayá Lisias tonjontremetë y jabuachana bëngbe cucuatšëntšana tbojtsánatseñe, <sup>8</sup> y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

<sup>9</sup> Y chë judiënga chentše imojëtsemnënga imojtsanichamo aññe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánëfjatsëmbo chaóyebuambama; as Pablo tojánayana: “Atše sëndétatšëmbo aca ba uatama comna muentša entsangbiana tšabá o ndoñe tšabá tmonjamama ichamuá; chcasna, tondayama ntsuatjácá y puerte oyejuayá acbe delante šcuenëuyaná.

<sup>11</sup> Ntšamo cach aca jtsëtatšëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama. <sup>12</sup> Y quemënga ndoñe chešmátinýena nderado ndáftaca jabuachana enatsëtsnayıñe, ni entsanga chamuenbouéñanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentše. <sup>13</sup> Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. <sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse

ntšamo Bëngbe Bëtsá šonjaninÿanyé benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nÿetsca chë Moisesbe leyinë y Bëngbe Bëtsabe juabna oyebuambnayëngbe uabemana librëšanguentša soyënguinë sëndošbuaché; <sup>15</sup> y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nÿetsca entsanga, lempe tšabá amënga y chë ndoñe tšabá améngnaca. <sup>16</sup> Chíyeca, atše nÿets tempo puerte tšabá sëndama, tondayama ntjatenócochinÿenama y atšbe ainana natjémbana chaotsomñama, Bëngbe Bëtsabe delante y entsangbe delántnaca.

<sup>17</sup> “Básefta uatama inÿe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjémënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. <sup>18</sup> Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínÿena, pero ndoñe chešmátinÿena ni ba entsángaftaca, ni enbouenaniñe. <sup>19</sup> Chë šmonjinÿenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse. <sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijbuáchjanguama chešmënjínÿena, atše castiganá jtsemnama šojtsemna ca chënga chamuayanama; <sup>21</sup> o

nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

<sup>22</sup> Félix bëtscá inatátšëmbo Bëngbe Utabná tojaninÿinÿé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanéyana: “Chë soldadëngbe amëndayá Lisias chaojáshjango ora, chanjayana ntšamo quem tšëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošca cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtanashjango, chabe shema Druslaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canÿa nanjobenaye Jesucristbeñe ošbuachiyá jtsemnama. <sup>25</sup> Pero, nÿetsca soyënguinë tšabá jtsamama, cachá jenomándama jtsobenama y ntšamo tmojamama nÿetsca entsangbiana Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianana: “Mora, mata; luare quëtstsebomna ora, cbochjachembo ca.”

<sup>26</sup> Jëtsboshjonama Pablo crocénana chabuatabuenámncaca Félix inobátmana; y chca, ba soye ibojanófjajana cháftaca jencuéntama.

<sup>27</sup>Y chca uta uata tojanochñengo; chentšana, Félix ya ndoñe más chë mandado yontsemna y chabe cuenta Porcio Festo mandadca tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

#### Pablo Festbe delante

**25** <sup>1</sup>Festo chë luaroye tojánashjango y unga tianoye, Cesarea pueblentšana Jerusalenoye cha tojána. <sup>2</sup>Chocna, chë bachnangbe amëndayënga y chë más uamana judiënga Féstbioye tmojána Páblëbe contra jayanama. <sup>3</sup>Y tmojanimpadá, mo chëngbiam canyë bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. <sup>4</sup>Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. <sup>5</sup>Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup>Festo Jerusalenentše posufta o bnétsana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. <sup>7</sup>Pablo choye tojánashjango ora, Jerusalenocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canyë chë soyëngama tmonjanobená jinyanýiyana chca ndegombre bétsemnama.

<sup>8</sup>Y Pablo, cachá jenéuyanama mëntšá yojtsichamo: —Atše tondaye

chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup>Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

<sup>10</sup>As Pablo tojánayana: —Atše séntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre condsetatsëmbcá, judiëngbe contra atše ndocna bacna soye chiyatsma. <sup>11</sup>Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Diosmandá chë Romoca bëts mandado cháuyana tšabá o ndoñe tšabá sënjama ca —Pablo tojánayana.

<sup>12</sup>As Festo, chë soyama chabe buayinyayënga tojanantjá y chentšana tojánayana: —Chë Romoca bëts mandado quem soyama cháuyanama tcojábosenëсна, chábioye cochjá ca.

#### Festo, Rey Agrípaftaca tbojanencuentá ntšamo Pábloftaca jamama

<sup>13</sup>Chentšana baseftayté tojanochñengo ora, Rey Agrípa y Berenice Cesareoye tojána, Festo jauatsétsayama. <sup>14</sup>Bayté chata chentše tojanajétana; y chca, Festo chë réybioye tbojanencuentá Páblëbe soyama. Cha mëntšá tbojanayana: —Muentše endmëna canyë entšá, Pablo ca uabainá;

Félix utamená tbonjëftseboşhona, atşe mandadcá sënjontsé ora. <sup>15</sup>Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y şmonjaimpadá cha jóbanama ibojtsemna ca atşe jayanama. <sup>16</sup>Y atşe sënjáuyana: “Chë romanënga ndoñe quematamana ndocnabiamna jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenéuyanama cha chaobenama ca.” <sup>17</sup>Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atşbe puestentşe tribunaloca sëntótbema y sënjamandá chë boyabása jobetşana. <sup>18</sup>Pero chabe contra ichámënga, ntşamo atşe sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama tonjóyentşbuache ora. <sup>19</sup>Chënga chabe contra montsichamo, nÿe cachëngbe Dios ntşamo jadórama yomnana y canya Jesús ca uabainábiamna; cha tojanóbana, pero Pablo entsichamo cha ainá yotsomñe ca. <sup>20</sup>“Chora atşe ndoñe quetstétsetatşëmbo ntşamo chë soyiñe jamana; asna, Pablo sënjantjá Jerusalenoye jama tayojetseboşe ca, choca atşe jayanama tşabá o ndoñe tşabá cha tonjanmama. <sup>21</sup>Pero cha şonjaimpadá camuentşe jaboshjonana, cach Romoca bëts uámana mandado chë soyama tojayanëntscuana ca. Chcasna, atşe sënjamandá cha chamotsebojanýama, chë mandádbioye jíchmuama atşe jobenayëntscuana ca” —Festo tbojanuentá.

<sup>22</sup>Chca tbojanuentá ora, Agripa Féstbioye tbojaniana: —Atşnaca sëntseboşe chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

<sup>23</sup>Chë yëfsana, Agripa y Berenice corente uachuanentşe chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentşa uámana taitanga. Chentşana Festo tojanmandá Pablo jobetşana; <sup>24</sup>y chora cha tojánayana: “Rey Agripa y nÿetsca taitanga bëngaftaca şmojtsemnënga: Chentşe entsemna chë boyabása. Nÿetsca judiënga chabe contra átşbentşe montsabíchamo, Jerusalenoca y quem Cesarea pueblëntşnaca, y nÿa jtsayebuáchëse tşa şmontseimpadana cha chaóbanama; <sup>25</sup>pero atşe sëntsejuabná quem boyabása tondaye tonjama, jóbanama chabotsemnama ca. Y más, cachá şonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. <sup>26</sup>Pero atşe, atşbe bëts uámana mandádbioye quem boyabásabiamna juábobemama ndocna serto soye quetsátsbomna causa, tşëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentşana, ndayá juabemama atşe chaitseboznama. <sup>27</sup>Er atşe sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtşichámuama ndoñe lempe ntjuabemana ca” —cha tojánayana.

**Pablo tojanontsé rey Agripbe  
delante jóyebuambayama**

**26** <sup>1</sup>Chentşana, Agripa Páblëbioye tbojaniana: —Jóyebuambayama conselesenciana, cach aca chacuenéuyanama ca.

As Pablo, chë réybioye jachuayama cucuatşe tojanatsbaná y jenéuyanama

tojanontsé mentsá jayanama:  
 2—Atše ndegombre sentsoyeuá  
 mora chjobenaye acbe delante  
 jóyebuambayama, uamana rey Agripa,  
 chca, atše jenéuyanama nyetsca  
 soyengama ntšamo judienga atšbe  
 contra montsichámuama; 3 y más  
 sentsoyeuá, taitá conduábuatmama  
 lempe ntšamo judienga monduamancá  
 y condétatšëmbo chë judienga  
 ndayama imuenoboyebuambnana.  
 Chcasna, Diosmanda uantádoca  
 šmotsoyeuná.

**Pablo tojanacuntá ntšamo  
 cha tempo inamnana**

4 “Nyetsca judienga mondétatšëmbo  
 ntšamo atše tempscana chéngbeñe  
 tsiyenama, bobontse sënjamna  
 orscana, atše sënjanonýna luarentše  
 y Jerusalenentše. 5 Chéngnaca  
 mondétatšëmbo y montsobena  
 jayanana, chénga tmojtsebošese, chca  
 ndegombre yomnana; atše nyets  
 tempo fariseucá vida sëndbomna, y chë  
 fariseunga mondoyena más soyenga  
 jtsamése chë judiengbe leyéngaca chë  
 inýe judiengbiana. 6 Y mora, ntšamo  
 Bëngbe Bëtsá bëngbe bëts taitanga  
 tojanašebuachenacá, chë obanënga  
 jtayanama cha yochjamama puerte  
 jtsošbuáchiyëse atše obatmana causa,  
 šmojuánatse atšbe contra jayanama.  
 7 Bëngbe bnétsana uta Israeloca  
 bëts pamíllanga mondobátmana  
 chë šbuachenana soye chéngbiana  
 chaóshjanguama y chíyeca, cada te  
 bnëté y ibeta chénga Bëngbe Bëtsá  
 mondadorana y mondëservena. Y  
 atše cach soyama obatmana causa,  
 bëts rey Agripa, judienga mora atšbe  
 contra montsabíchamo. 8 ¿Ndáyeca  
 tšëngaftanga judienga šmojtsichamo,  
 chë obanënga chámuatayenama  
 Bëngbe Bëtsá yochjamama

jtsošbuáchiyama ndoñe šmontsobena  
 ca?

**Pablo tojanacuntá, ntšamo  
 tempo cha Jesucristbeñe  
 ošbuáchiyënga yojanaborlánama**

9 “Y cach átšnaca sënjanjuabná atše  
 šojamna lempe ntšamo stjobenacá  
 jamana, Jesús chë Nazaretocábeñe  
 ošbuáchiyënga corente chamosufrima,  
 10 y chca Jerusalenentše atše sënjanma.  
 Chë bachnangbe améndayënga  
 mando šmonjanatšetá, y chca,  
 banga Jesucristbeñe ošbuáchiyënga  
 cárceloye sënjanëtame; y jtsébáyama  
 ca chéngbiana montsanichamo  
 ora, átšnaca aíñe chca chamoma  
 ca sënjánichamo. 11 Y ba soye, chë  
 judiengbe enefjuana yebnënguenache  
 jabuache chénga sënjanatsetšená,  
 chénga Jesucristo ústonana  
 chamotsajbanama, y chéngaftaca tša  
 etonaná sënjëtsemna causa, chë inýe  
 luarëngoca bëts pueblënguenáchnaca  
 chénga sënjanécamena.”

**Pablo tojanacuntá ntšamo  
 cha Jesucristbeñe ošbuachiyá  
 tojanóbema**

(Hechos 9.1-19; 22.6-16)

12 “Y cachcá jamama canýe te  
 Damascoye sënjétsaye; chë bachnangbe  
 améndayënga uabemanëchangá  
 šmonjanëntšabuaché chca jamama  
 y, cachënga choye šmonjanichmó.  
 13 Pero, uamana rey, chë benachëjana  
 mo nyetsto ora, sënjáninýe canýe bëts  
 tcuinýe celocana, shinýama corente  
 más enjëtsebinýnaye, y atše y chë  
 átšeftaca ajnëngbe shéconana corente  
 enjëtsebuashinýinýana. 14 Nyetscanga  
 fsënjánshajaye y atše sënjanuena canýe  
 oyeubuambayana, hebreo biyañe,  
 mentsá šonjétsatsaye: ‘Saulo, Saulo,  
 ¿ndáyeca chca šcojtsacmena ca? Cach

aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsosacunjá orcá, cachá jenótsetšenana ca.’<sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca.’<sup>16</sup> Pero matëtsbaná y matëtsá. Atše cbonjëbëbocna jinÿinÿiyama aca tcojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinÿe soyama y más hcoye atšbiam a cbochanjinÿinÿiye soyëngámna.<sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná,<sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebomna, mo ibetiñe cuaftsemnëngcá, sinó mo binÿiniñcá chamotsemna átšëftaca, atše chë entšangbe juabnënga binÿinayá. Satanasbe cucuatšiniñe ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebomnama canÿe luare entšángaftaca, chë ndëmuanÿengbioye Bëngbe Bëtsá tšabe entšanga y chabe entšanga tojábiam, chënga átšbeñe betsošbuáchiyama ca’ ” —cha šonjaniyana.

**Pablo tojanma ntšamo chë mo otjenayoquëcá tojaninÿcá**

<sup>19</sup>“Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo šonjaniyancá; <sup>20</sup>y natsana, Damascoca

entšanga chë tšabe noticiëngama sënjanabuayená; chentšana, Jerusalenoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngmënaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama.<sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana.<sup>22</sup> Pero Bëngbe Bëtsá sempre šonduájabuachana, y chca, cada te méntscoñama, nÿetscanga Bëngbe Bëtsabiam sëndabuayiná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe.<sup>23</sup> Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

**Pablo tojanma rey Agrípbioye jáyëñjanama, Jesucristbeñe ošbuachiyá chaóbemama**

<sup>24</sup>Pablo, cachá jenëuyanama chë soyënga tojánayana ora, Festo mëntšá tojánáyebuchena: —iPablo, opá cojtsóbema! Yapa ualíaye causa, opá tcojtsóbema ca.

<sup>25</sup>Pero Pablo tbojanjuá: —Opá ndoñe quetsátsmëna, bëts uámana



Festo; inÿetsá entsemna; atše sêntsoyebuambná nÿets juábna, y ndegombre soyënga. <sup>26</sup>Chentše rey Agripa entsuenana, y cha puerte tsábá chë soyëngama endétatšëmbo, chíyeca, tondayama ntjatauatjca, atše chabe delante sêntsoyebuambná; atše corente sêndétatšëmbo chánaca chë soyëngama yotatšëmbuama, er ndayá Jesús tojanmcá, ndoñe tonjopasá ndaye iytémëna chaboye. <sup>27</sup>Bëts rey Agripa, ¿Bëngbe Bëtsabe juabna oyeambuambnayënga tmojánayana soyënguinë aca quecošbuaché? Atše sêntsetatšëmbo aïne chiñe cošbuáchema ca —Pablo tbojanianyana.

<sup>28</sup>Chora Agripa tbojanjuá:  
—Batšatema más y mašcjayënjana  
Jesucristbe ustoná atše jóbemama ca.

<sup>29</sup>As Pablo tojánayana: —Nÿe batšatema más o bëts cama más, atše Bëngbe Bëtsá sêntseimpadana, ndoñe nÿe bëndatbe barie, sinó nÿetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondétsemna, ntšamo mora atše sêntsemná ca.

<sup>30</sup>Chorna, chë rey, chë mandado, Berenice y chë chëngaftaca imojantbiámanënga tmojantsbaná, <sup>31</sup>y luaroye tmojána chë soyama jencuéntama. Mëntsá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

<sup>32</sup>Y Agripa Féstbioye tbojanianyana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

**Roma bëts puebloye  
Pablo tmojanichmó**

**27** <sup>1</sup>Italia ca uabaina  
luaroye Pablo jíchmuama

tmojanenoyeuná ora, atše, quem librëša uabiamayá, cháftaca sënjána. Chora Pablo y chë inÿe utámenënga Julio ca uabainabe cucuatšinë tmonjánabashejuana. Julio enjamna canÿa chë Romoca bëts mandadbe soldadënguentša mandayá. <sup>2</sup>Asna, fsënjánasëngo canÿe Adramitio puebloca barcuinë; ya chë Asioca bëts pueblëngoye juama enjëtsamna. Cesarea pueblentšana fsënjánabocna y Aristárcnaca bëngaftaca enjëtsemna; cha enjamna Tesalónica bëts pueblócá, Macedonia luaroca.

<sup>3</sup>Chë inÿe yëfsana, Sidón puebloye fsënjánashjajna. Chentše Julio, tsábá mandbomná Pábloftaca enjëtsemna; tbojanlesenciá chabe amiguëngbioye chauabuáchama, chënga chamofjama y chamóbocuedama. <sup>4</sup>Sidonocana fsënjëftsanbocnentsana, bëngbe contra corente enjëtsebinÿiaye. Chíyeca, Chipre fshantsënga catšbioicajana, ndoñe yapa quentëtsebinÿiayëjana bënga fsënjána. <sup>5</sup>Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup>Chë soldadëngbe amëndayá, canÿe Alejandría puebloca barco chentše tonjáninÿëna, Italia luaroye yojétsaye; asna, šonjanamëndá chë barcuinë jenójayiyana. <sup>7</sup>Baseftaytentscuana uenana fsënjánana y pordonto fsënjanobená Gnido pueblentša ndirichiñe jashjanguana. Cabá bëngbe contra enjëtsebinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana. <sup>8</sup>Y chca, pordonto bejaycá fsënjánana, fshantsënga béconana; chentšana, canÿe pueblo, Tsabe Puertënga ca uabáinentše fsënjánashjajna, Lasea ca uabaina pueblo béconana.

<sup>9</sup>Chca, bayté tonjanochnëngo y chora chë bejaycá jama puerte resjo enjésemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjétsobeco.

<sup>10</sup>Chíyeca Pablo chë entsãnga mëntšá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiamá cach ndoñe, mo nderado muanjanóbana ca.”

<sup>11</sup>Pero chë soldadëngbe amëndayá Páblëbioye ndoñe ntjoyeunayana; más, chë barcuentsã mandayá y chë barco nduíñbioye aïne. <sup>12</sup>Ndoñe tšabá yonjamna, chë barco chora enjésemnentšë chë uaftena tempëntscuana jëftsemnana; chë causa, nýa mo nýetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentšë jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashëngumna enjamna shinýe endbetsenatjëmbambana juachoica tsjuanoicajana y tsmanoicajana.

### Mar béjayiñe puerte uaftena y binýia tojanóshjango

<sup>13</sup>Chentšana tonjanontšë tsmanoicana batšá binýiayana, chíyeca chë entsãnga tmonjanjuabó ya yojtsanopodena jtëtóntšana jama ca. As, chentšana fsënjëftsanbocna y bejaycá fsënjána, Creta fshantsënga beconanëjána. <sup>14</sup>Pero baseftayté chentšana, chë fshantsëngocana tonjanontšë corente jabuache

binýiayana y chë barquëshoye enjétsoshjajuana. Chë binýia yojanabaina Nordeste binýia ca.

<sup>15</sup>Chë barcna nýe chë bínýiëbe ponto tonjanontšë uayana; chë binýia enjétsobayëjana jama ndoñe quentétsopodena causa, šonjanotocá nýe ntšamo tojtsebinýiacá chašúyambama. <sup>16</sup>Chentšana fsënjánachnëjna Cauda ca uabaina stëtšoiçajana, base fshantsënga mar béjayoca; chiñe ya ndoñe tša jabuache quentétsëbinýiaye y pordonto fsënjanošená buyeshoicana jtabocnana chë barco enjanasjá canouše, ndoñe chaondëtsóndbemama. <sup>17</sup>Ya chë barquëshoye fsëntanëšëngo orna, chë entsãnga lazëjãngaca chë barquëshã tmontsanabatsécaca, más uamorochëshã chaotsamnama. Pero chënga monjétsauatja nderado chë barco chë Sirte ca uabaina cascajuntšë nanjetsánjua; asna, chë barcuentsã ancla tmonjanashëbëútsëna, chë barco ndoñe betesco chaondëtsábonjnama, y ntšamo enjetsanbinýiaycá fsënjána.

<sup>18</sup>Chë inýe yëfsana y chë binýiayana cabá jabuache enjésemna causa, chënga tmonjanontšë chë barcuentsã uasmanëshangá jtsëshbuëtsetšana; <sup>19</sup>y unga tianoye bëngnaca šonjanotocá, cach bëngbe cucuátšëca, chë barcuentsã soyënga buyeshoye jtsëtsánana. <sup>20</sup>Baytentscuana bënga ndoñe chibiatanobená jinýana ni shinýe, ni estrellatëmënga, tša tonjétsëibetata causa; y tša jabuache enjétsëbinýiaye causa, bënga ya ndoñe quefstëtsanobatmana chentšana jótsbocana.

<sup>21</sup>Ya bayté enjésemna y chëntscuana tondaye saná ntjascá fsënjésemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše

mašmēnjanojeuná y Creta luarocana ndoñe matmēnjéftsanbocna; chca mora ndoñe mal mamojtsepasá y ndoñe n̄ya n̄yetsá matmēnjobuetše.

<sup>22</sup> Pero mora ngménaca ndoñe matmēnēngana; masque chē barco echantsenatjēmba, tšēngaftanguentsá ndocná queochatóbana. <sup>23</sup> Ibeta can̄ye ángel šonjébēbocna; Bēngbe Bētsá, ndabia atše sēndmēna y nda sēndēservena, cha tbojichmó; <sup>24</sup> y chē ángel mēntšá šonjauyana: ‘Pablo, ndoñe matauatjana; entseyta aca chē Romoca bēts mandádbioye chacotsama, y aca Bēngbe Bētsábia cómnayeca, n̄yetsca quem barcuīne ajnēnga jobanámētšana cha echanjatsebacá ca.’ <sup>25</sup> Chcasna, baconga, ndoñe matauatjēngana, er atše Bēngbe Bētsábeñe corente sēntsošbuaché y lempe ntšamo chē ángel šonjauyancá echanjóbocna. <sup>26</sup> Pero mora entseyta can̄ye fshantse mar bējaiñe chašúshejanguama ca” —cha tonjanéyana.

<sup>27</sup> Can̄ye ibeta, uta semana fsēnjánana chentšana chē Adriático ca uabaina mar bējaiñe fsēnjētsemna, y n̄ye ín̄yoye y ín̄yoye chē bin̄yia šonjétsēyambaye. Y mo tsēntseto yojētsemna orna, chē barcuentsá trabájayēnga tmojanjuabó ya fshantse béconana imojētsemna ca. <sup>28</sup> As chēnga tmonjanmedidá ntsachetšá chē búyeshe buatjoye inamnama y tonjanóbocna unga bnétsana y chnénguana metro; más chcoye cachiñe tmonjanmedidá y uta bnétsana can̄yēsēfta metro tonjanóbocna.

<sup>29</sup> Chēnga monjétsauatja nderado bēts ndētsbēngaca nanjētsántšētjiama; asna, chē barco stētšoiacijana canta ancla buyeshoye tmonjanashēbēútsēna, chē barco ndoñe más chaondētsábonjnama, y tša monjētseboše betscó

chaobín̄ynama. <sup>30</sup> Chēntscuana, chē barcuentsá trabájayēnga tmojánbošēna chentšana jtsachetana; chamna, chēnga tmojanontšé chē canouše buyeshoye justjanguana, pero chca imojétsama, mo chē anlēnga chē barco natsanoica cuaftsēstjajuancá.

<sup>31</sup> Pero Pablo chē soye tojánin̄ye, y chē soldadēngbe amēndayábioye y chē soldadēngbioye tonjanēná y mēntšá tonjanéyana: “Chē barcuentsá trabájayēnga cach quem barcuentsē ndoñe chamonjoquedase, tšēngaftanga ndoñe quešmochatobenaye muentšana jótsbocama ca.”

<sup>32</sup> As, chē soldadēnga tmonjána y chē canoušēntša lazējēnga tmontsantētsetše y buyeshoye chēše tmontsantsatše.

<sup>33</sup> Enjētsēbin̄yana ora, Pablo n̄yetscanga tonjanaimpadá ndayánaca chamosēngama, mēntšá jáuyanēse: “Ya uta semana entsemna y tšēngaftanga ni mo batšatema chešmatamaná, y tondaye chešmatsbmuananga.

<sup>34</sup> Diosmanda, masque n̄ye mo batšatēmnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, can̄ye tandēše tonjanca y n̄yetscangbe delante Bēngbe Bētsábioye tbontanchuá. Chorna, tonjanjatá y tonjanontšé jasama. <sup>36</sup> Chentšana n̄yetscanga tmonjanenñemó y chēngnaca tmonjanse. <sup>37</sup> (Chē barcuentsē n̄yetscanga fsēnjamna uta patse y can̄yēsēfta bnétsana y chnénguanēnga.) <sup>38</sup> Ntšamo imnabošcá tmonjansentšana, buyeshoye trigo tmontsanashaná, chca, chē barco ndoñe yapa chaondētsautama.

#### Chē barco tojtsanenatjēmba

<sup>39</sup> Ya tonjanbin̄yana ora, chē barcuentsá trabájayēnga ndoñe

quemëntétsetatšëmbo ndaye fshantse chentše bétsemnama, pero tmonjáninÿe chë fshantsentše canÿe luare jachañe, chë béjaye chë luaroye omashjuanentše, y chiñe canÿe chënÿañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. <sup>40</sup>Asna, chë anclentša lazëjenga tmonsantëtsetše y chë anclënga buyeshoye tmonsanboshjuana, y chë timón, chë barco juyambama oservena soyentša uabatsëcnëjëngnaca tmonsanjañoná. Chorna, chë barcuentša natsanoica niñëšiñe entšëjua tsbanánoye tmontanéšëngo, y chë binÿia tonjanma chë barco chaontsé chë chënÿoye juabéconama. <sup>41</sup>Pero chë barco canÿe luaroye tonjánashjango, y chentše chë béjaye catatoicajana enjetsobuá y chë barco cánÿentše, bëtscá cascajo buyeshiñe binÿnentše tontsananjó. Chë barcuentša natsanoica lado chë cascajuíñe entsanajuena, ndócnoye juabónjuama ntsopodencá, y chë stëtšoica lado puerte entsanashatiyinyá y lempe entsanandbiamná, yapa binÿia causa y búyeshë chentše enjëtsojantšëtaye causa.

<sup>42</sup>Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. <sup>43</sup>Pero chë soldadëngbe amëndayá inaboše Pablo jatsbocama, y chíyeca chë soldadëngbiyoye ndoñe chenatanalesenciá chca jamana; y tojanmandá nÿetscanga chë jachbabama obenëngna natsana chë buyeshoye joshbuetšana tsachoye chamuashjanguama, <sup>44</sup>y chë ínÿengna tablëshënguine o chë barcuentša pedazënguine chamoshbuetšama. Y chca, nÿetscanga fsëñjanobená

tšabá y ndocá ntjapasacá fshantsoye jashjanguama.

### Pablo Malta luaroca

**28** <sup>1</sup>Ya nÿetscanga fshantsoca tšabá fsëñjëtsemna ora; fsëñjántatšëmbona chë luare Malta ca yojanabaina. <sup>2</sup>Chë luarentša entšanga béngaftaca corente tšabá mándbomnënga monjëtsemna; canÿe íñeshe tmonjanangbotjó y šonjanëbuaja choca bënga jatóšboniyama, er tša enjëtsoftena y yapa enjëtseesëna. <sup>3</sup>Pablo tojanatbaná básefta buashana chamesëfjënga y chë íñeshoye enjëtsešhacñaye ora, canÿe mëtšcuaye tojánbocna y enjëtsechaye, chentše yapa obonÿaye causa, y Páblëbe cucuatšiñe tontsanonjyá. <sup>4</sup>Chë luarentša entšanga, chë mëtšcuaye Páblëbe cucuatšiñe yojtsajonÿanama tmonjáninÿe ora, monjëtseñatsëtšnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatslësencia cha vida chaotsebomnama ca.”

<sup>5</sup>Pero Pablo tontsanenacuestëtoná y íñeshoye chë mëtšcuaye tbontsantsatše y Pablo ndocá chenatanpasá.

<sup>6</sup>Chë entšanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntëtšanjuabnaye y tmonjanontsé ichámuana Pablo canÿe dios inamna ca.

<sup>7</sup>Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina. <sup>8</sup>Chë tempo, Públëbe taitá šocá jutsnéshañe inajájona, calentóraca y buíñeca

buamachnëjuanánaca. Pablo tonjána cha jinýama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjétsatmëna. <sup>9</sup> Chca tonjanopasá chentšana, chë luarentša inýe šoquënga Páblëbioye monjánajna y cha enjánashnaye. <sup>10</sup> Bëtsáca tšabe soyënga chentše bëngbiana tmonjanma, y cachiñe játama ya chë barcuñe fsëntanenojayenga orna, lempe ntšamo bejaycá jama šonjanëjbotcá chënga šonjanatšatá.

### Pablo Romoye tojánashjango

<sup>11</sup> Chë fshantsentše mar béjayoca unga ishinýe fsënjéftsemna, y chentšana canýe Alejandriocana yojanabá barcuñe fsënjanenoyayé; chë barco nyets uaftena tempo chë luarentše yojéftsamna y enjanabaina Cástor y Pólux ca, mo chë romanëngbe uta diosata catšatcá. <sup>12</sup> Chentšana, Siracusa bëts puebloye fsënjánashjajna y chentše unga te fsënjéftsemna; <sup>13</sup> y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjétsëbinýiaye, y chca, chë inýe yëfsana Puteoli puebloye fsënjánashjajna. <sup>14</sup> Chentše básefta Jesucristbeñe ošbuáchiyënga fsënjánanyëna, y šonjanëbuaja chëngaftaca canýe semana chentše jéftšajétanama; y chentšana Romoye fsënjéftsanbocna. <sup>15</sup> Romoca Jesucristbeñe ošbuáchiyënga ya imojétsetatšëmbo bënga choye fchjanashjajnama; chcasna, chënga tmonjánbocna bënga jajëbenguama canýe luare Foro del Apio y Unga Tabernënga ca uabainóntsoñe. Pablo chënga tonjánanyë ora, Bëngbe Bëtsá tfontanchuá y puerte añémoca enjétssemna. <sup>16</sup> Romoye fsënjánashjajna

ora, soldadëngbe amëndayá Páblëbioye tbonjalesenciá canýabe yebnentše chaotsiyenama, y tonjanmandá canýe soldado chabotsebojanýama.

### Ndayá Pablo Romoca tojanma

<sup>17</sup> Choye fsënjánashjajnentšana unga tianoye, Pablo tonjanmandá chentše inmoyena judiënga más uámanënga chamobéconama; y nyetscanga ya tmojánenefjna ora, cha tojanéyana: —Catšátanga judiënga, masque atše tondaye chiyatsma bënga judiënga mondbëtsama soyëngama contra, ni bëngbe bëts taitanga imojanamana soyëngama contra, judiënga Jerusalemoca šmonjanishache y romanëngbe cucuatšinë šmonjánboshjona. <sup>18</sup> Chë romanënga lempe šmonjantjá chentšana, monjétsëboše atše jëtsboshjonana, er ndocna bacna soye chemátaninyëna atše jóbanama chašotsemnama. <sup>19</sup> Pero chë judiënga ndoñe quemtétseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuayana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama. <sup>20</sup> Chíyeca, atše tcbonjúbuaja jányama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená séntsemna ca —tojanéyana.

<sup>21</sup> Chora chënga tmojananyana: —Bënga ni mo canýe tsbuanácha Judeocana fchiyatáyëngaca acbiana noticiëngaca, y ni canýe catšata judío, chocana moye ashjajnénguentšá, ndocna bacna soye acbiana chešnatacuntá. <sup>22</sup> Bënga fséntseboše jouenana ntšamo aca cojuabnama, er ntšamo Jesucristbe ustonëngbiana

fstsëtatšëmbcá, entsemna ana nÿets luarenache chëngbe contra entsãnga imojtsichamo ca.

<sup>23</sup> Asna, canÿe tescama Pablo tmojaniyana chca chaotsemnama; y chë tena, ba entsãnga chë Pablo posada inabomnoye tmojanobeconá. Y cachëscana tojanjéτανέντscuana, Pablo entsãnga yojanëtsëtsná Bëngbe Bëtsabe amëndayama, ndayama cha ininÿe y inatátšëmbo; y yojtsentšëna chënga jáyëñjanama Jesúsbeñe chamotsošbuáchema, Moisesbe leyënguentsã soyëngaca y Bëngbe Bëtsabe juabna oyebuambnayëngbe uabemana librëšãngañe soyëngaca.

<sup>24</sup> Báseftanga añe imojtsošbuáchiye ntšamo Pablo yojtsanëtsëtsnacá ndegombre bëtsemnama, pero ínÿengna ndoñe. <sup>25</sup> Nÿetscanga ndoñe cachcá montsanjuabnaye causa, tmojanontšë chentšana jésebocanana. As Pablo tojanéyana: “Nÿets razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntšá:

<sup>26</sup> Motsa chë entsãnga jauyanama: ‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinÿe.

<sup>27</sup> Muentšã entsãnga ainánaca josértama ndoñe quemátsboše causa,

chënga nduauenanënga montsemna y nduabinÿnéngnaca; chënga bomínÿëca ndoñe chamondobená jinÿama, ni chëngbe matscuašëca jouenama, ni chëngbe ainánaca josértama ndoñe chamondobená, chca, atšbe benache ndoñe chamondishachama, atšë ndoñe ntjátsebacama ca.’ ”

<sup>28</sup> Pablo chora mëntšá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entsãnga bacna soyënguentsãna játsebacama, chë ndoñe judiëngbiøye mochanjábuayenaye, y ndegombre chënga cocayé añe mochanjóyeunaye ca.” <sup>29</sup> (Pablo chca tojánayana ora, chë judiënga chentšana imojésebocana y tša imojtsenatsëtsnaye.)

<sup>30</sup> Pablo uta uata chentšë tonjanoquedá canÿe uántšamena yebnentšë; y nÿetscanga cha jauatsëtsayama monjánajnënga cha enjanëbuájajana. <sup>31</sup> Nÿetscangbe delante puerte añémoca entsãnga enjanabuayiyná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiama, y ndocna Romoca mandayá quebëñjatanauyá chca jtsamama.

# Romanos

**Pablo Romoca ošbuáchiyënga  
jacheuayama**

**1** <sup>1</sup> Atše Pablo, Jesucristbe oservená, quem tsbuanácha sèntsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëfťsanábema Bëngbe Bëtsabe uabemana palabrënguiñe. <sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiama jtsóyeuambnayana. Entšá quetsomñecana, tojanonýná canye rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanýé Jesucristo chabe Uaquiñá bétsemnama. Cha chca tojaninýanýé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canye bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama.

<sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýenga Bëngbe Bëtsá tcmojáchembo Jesucristbenga chašmotsemnama. Atše tšëngaftangiama sèntsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sèntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

**Pablo tša inaboše Roma  
bëts puebloye jama**

<sup>8</sup> Jabojátšamna, Bëngbe Bëtsá, Jesucristbijana šcuatschuá, cada ona tšëngaftanguentšabiama, er nyets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema. <sup>9</sup> Bëngbe Bëtsá, nda nyets ainánaca sëndëservena, tšabe noticiënga chabe Uaquiñabiama abuyiynayiñe, endëtatšëmbo atše nyets tempo Bëngbe Bëtsáftaca stsencuënta ora, tšëngaftangiama sëndëtseimpadanama; <sup>10</sup> y mora Bëngbe Bëtsá sëntseimpadana, nya mora y cha tojtsebošëse, chašolesencia jama tšëngaftanga jautsëtsayama. <sup>11</sup> Er atše tša sënjëseboše tšëngaftanga

jányama, chca, atše chayobená jamama chë Uámana Espíritbentsana yóbocana tšabe soyënga tšëngaftanga chašmotsebomnama; y chca, tšëngaftanga ainaniñe bëts añemo chašmotsebomnama, y Jesucristbeñe corente chašmotsošbuáchema; <sup>12</sup> o más tšabá jayanamna, tšëngaftanga y átšeftaca mochjenájabuache ainaniñe bëts añemo jtsebomnama, tšëngaftanga y átšnaca Jesucristbeñe tša imošbuachéyeca.

<sup>13</sup> Y morna, Jesucristbeyeca catšátanga, séntseboše tšëngaftanga chašmotsetátšëmbo atše ba soye jama tijájuboma, tšëngaftanga jautsëtsayama, pero méntsoñama ndoñe tsjobenaye. Atše séntseboše ndayá chayobená jamana ínÿenga tšëngaftangbioca Jesucristbeñe chamotsošbuáchema, ntšamo ínÿengbeñe ndoñe judiëngbeñe tonjopasacá. <sup>14</sup> Atše Jesucristbiama canÿe oservená sëndmëna, y chíyeca nÿetscángaftaca obligacónaca séntsemna, chë pueblënguiñe oÿenëngaftaca y bën tjoye oÿenëngaftaca, chë uatsjinÿenëngaftaca y ndoñe chcangaftácnaca. <sup>15</sup> Chíyeca atše tša séntseboše tšëngaftanga chë Romoca šmoyenëgnaca chë tšabe noticiënga jábuayenama.

**Chë tšabe noticiënga Bëngbe Bëtsabe obenana jtsinÿanÿnayana**

<sup>16</sup> Atše ndoñe quetsátëuatja chë tšabe noticiënga jtsabuayinayama, er chë noticiënga jtsinÿanÿnayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsebenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëgnaca. <sup>17</sup> Er chë tšabe

noticiënga jtsinÿanÿnayana ntšamo Bëngbe Bëtsá inétsama entšanga chabe bominiñe tšábenga chamotsemnama. Y entšanga chabe bominiñe tšábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrenguiñe endayanca: “Nÿe ndabiama Bëngbe Bëtsá tojama chabe bominiñe tšabia chaotsemnama, cha Bëngbe Bëtsabeñe betsošbuáchema, cha ndegombre chë nÿetsca tescama yomna tšabe vida echántsebomna ca.”

**Bëngbe Bëtsabe delante nÿetscanga culpa bomnënga mondmëna**

<sup>18</sup> Bëngbe Bëtsá celocana tojinÿanÿé, chë uabouana castigo, tša tbojetnama entšangbiama chaotsemnama, ainaniñe bacna juabnënga bomnëngbiama y chë bacna soyënga amëngbiama y ndëmuanyëngbiama, masque Bëngbe Bëtsabe ndegombre soyënga jtsoatšëmbñana, tša bacna soyënga tmojtsama causa, ndoñe ntjaleséciana cachënga jtsiyenama ntšamo ndegombre yomncá.

<sup>19</sup> Bëngbe Bëtsá echanjócastigaye, er ntšamo entšanga imobencá Bëngbe Bëtsabiama jtsetatšëmbuama soye, chëngaftaca sempre endëtsemna. Y chca endmëna, Bëngbe Bëtsá chë soye tojinÿanÿéyeca. <sup>20</sup> Bëngbe Bëtsá quem luare tojanma orscana, entšanga mondetobena botamana josértana, Bëngbe Bëtsabe obenana ndocna te yochjëftsohochócama y cha ndegombre Bëngbe Bëtsá yomnama. Chë soyënga Bëngbe Bëtsabiama entšanga quemúatobena jinÿana; nÿe jtsetatšëmbuamna añe. Entšanga mondobena chë soyënga Bëngbe Bëtsabiama jtsetatšëmbuana, cachá tojanma soyëngaca. Chcasna, chënga ndoñe quemátobena



jayanana bacna soye tmojama, cha nduabuatma causa ca. <sup>21</sup> Chënga Bëngbe Bëtsabiama mondétatšëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnéngaca y bacna juabnéngaca montsiyena, y chca, chënga montsiyena, jtsamëse ntšamo cachëngbe juabnénga yomncá, mo ibetiñe cuaftsajncá. <sup>22</sup> Chënga jtsichámuana corente osertánënga imomna ca, pero ndegombrna juabna ndbomnénga mondmëna. <sup>23</sup> Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entsángcá, y chëngna aíñe jóbánana; o soyënga shloftšéngcá o bayéngcá, o osjojnayéngcá, y chënga díosënga imomna ca jtsejuabnayëse jtsadoránana.

<sup>24</sup> Chíyeca, Bëngbe Bëtsá cachcá tojónÿa, cachëngbe ainaniñe puerte bacna juabnéngaca mandánënga chamotsiyenama, y chca, bacna soyéngnaca ínÿengaftaca imojtsama; chë soyëngamna jtsëuatjana chënga entsamna. <sup>25</sup> Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

<sup>26</sup> Entšanga chca ndoñe tšabá tmonjámayeca, Bëngbe Bëtsá cachcá tojónÿa, chënga ínÿengaftaca bacna

soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama. <sup>27</sup> Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama vojtsëmerencá.

<sup>28</sup> Chënga ndoñe tmonjábošena jtsiyenana jtsejuabnayëse, ntšamo entsanga Bëngbe Bëtsabiama imotatsšëmbcá ndegombre bëtsemnama. Chíyeca Bëngbe Bëtsá cachcá tojónÿa, cachëngbe ndbémama juábna chamotsiyenama; y chca, chënga ba soyënga jtsamana, jamama ndoñe yontsamncá. <sup>29</sup> Chënga nÿetscna bacna soye jtsamana: ainaniñe nÿetscna bacna juabna jtsebomnana, nÿe cachëngbiama bëtscá soyënga jtsebomnama tša jésebošana, y ínÿengbioye ntšámnaca jáborlama jtsebošana; chënga nÿe játsbošana inÿa tojtsebomna soyënga jtsebomnama, ínÿenga jtsëbánayana. Mondmëna penzentserënga, ínÿenga áingñayënga, puerte bacna soyënga ínÿengbiama bošënga, y uayátsenayënga.

<sup>30</sup> Chënga ínÿengbiama podësca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámana ca jésejuabnayana, tša jtsenábotamnayana, jésejuabnayana

ntšamo muanjobenaye más bacna soyënga jamana; chëngbe bëtsëtsangbioye ndoñe ntsayaunanana. <sup>31</sup>Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiama ntjóngmiana. <sup>32</sup>Y chënga corente mondétatšëmbo chca soyënga amëngbiama, Bëngbe Bëtsá chabe leyinë tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsënyayana ínÿenga cachcá tmojtsama ora.

**Bëngbe Bëtsá echanjama chë ndoñe tšabe soye amënga bëts castigo chamotsebomnama**

**2** <sup>1</sup>Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiama šmojtsichamo ora, jtsinÿanÿnayana cach tšëngaftángnaca ndoñe tšabá šmonjamama, y castigánënga jtsemnama cmontsamna, er tšëngaftanga cachëngcá šmojtsiyena. <sup>2</sup>Bënga mondétatšëmbo, Bëngbe Bëtsá ntšamo ndegombre yomncá inétsamama, chë chca amëngbiama ndoñe tšabá tmonjama ca y castigánënga jtsemnama yojtsamna ca cha tojayana ora. <sup>3</sup>Y tšëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojtsjuabná Bëngbe Bëtsabe castigüentsana šmochjotsbocá ca? <sup>4</sup>Bëngbe Bëtsá tšëngaftangbiama corente tšabe juabna endbomna; mora ndoñe quecmátacastigaye, y tšëngaftangaftacna puerte uantado nyë chca endétsemna. ¿Chama

tšëngaftanga cha šmojtsábotena? ¿Ndoñe šmondétatšëmbo Bëngbe Bëtsá chca corente jtsababuánÿeshanëse cmojtsénÿa, tšëngaftanga juabna chašmotrocama y chabe benache chašmuishachama cha yobóseyeca? <sup>5</sup>Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëts castigo chašmotsebomnama, chë ndayté Bëngbe Bëtsá ntšamo entšanga tmojamcá tšabá o ndoñe tšabá bëtsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebomnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanÿiye cha tša tbojetna, entšanga ndoñe tšabá tmonjamama. <sup>6</sup>Chca, chë te, ntšamo cada ona tojéftsemama, Bëngbe Bëtsábentšana echanjóyëngacñe. <sup>7</sup>Ndëmuanyënga nyets tempo tšabá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiama tšabá chaotsoyebuambná y tšabe vida jtsebomnama chaoma; chë te chëngbiama Bëngbe Bëtsá echanjama, chë nyetsca tescama yomna tšabe vida chamotsebomnama. <sup>8</sup>Inÿenga imoyena, nyë cachëngbe juabnéngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjéftsobuachjanguamna puerte etonaná echanjayana nyetsca tescama castigánënga jtsemnana chënga yojtsamna ca. <sup>9</sup>Bëngbe Bëtsá echanjama, chca amëngna puerte chamosufrima y lastemcá chëngbiama chaotsemnana, er yapa tsetšénana

chëngbiamá echanjéftsemna; chca echántsemna chë chcángbeñe judiënga imomnëngbiamá natsana, y ndoñe judiëngbiámna. <sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnama, chëngbiamá corente tšabá echanjóyebuambaye, y echanjama chënga cháftaca tšabá tempcá chamotsatmënama; y chca echántsemna chë chcángbeñe judiënga imomnëngbiamá natsana, pero ndoñe judiëngbiámna.

<sup>11</sup> Er Bëngbe Bëtsabiamá nyetscanga cachcá monduámna. <sup>12</sup> Chë Moisesbe ley ndoñe monduábomnënga, bacna soye tmojamamna castigo mochántsebmna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebmna ca, chë leyënguiñe iuayana soyëngaca. <sup>13</sup> Chca endmëna, er Bëngbe Bëtsá ndoñe queonýbatsma entšanga chabe bominiñe tšábenga chamotsemnama, nye ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojtsamncá tmojtsamëse. <sup>14</sup> Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsësná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinýanýnaya tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama. <sup>15</sup> Ntšamo tmojtsiyencá chënga

jtsinýanýnaya, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinýanýnaya chënga ntšamo chë leyiñe yomandánama cachcá imojuabnama. Inye ora, chëngbe juabnënga echantsëtsësnaye aíñe o ndoñe tšabá tmonjama ca; y ndayté, Bëngbe Bëtsá nyetscangbiamá ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínýanýye ndayá tšabá o ndoñe tšabá tmonjamama. <sup>16</sup> Chë te, Bëngbe Bëtsá nyetscangbiamá echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninýama; cha chca echanjama Jesucrístoftaca; y chë atše sëndabuayinýa tšabe noticiënga entsichamo ndegombre chca yochtsemnama.

#### Judiënga y Moisesbe ley

<sup>17</sup> Y mora tšëngaftangbiamá, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebmnama, y jtsenábotamnayana Bëngbe Bëtsabe ubuáyana entšanga šmomna ca; <sup>18</sup> tšëngaftanga chë ntšamo Bëngbe Bëtsá yobošcá tšëngaftanga chašmotsamama tatšëmbënga, y chë leyentšana šmojuatsjinýe jobocacayana ndayá más tšabá jamama tojtsemncá. <sup>19</sup> Tšëngaftanga tša jésejuabnaya, šmobena ínýenga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binýniñcá oyenëngbe juabnënga binýnayëngcá; <sup>20</sup> tšëngaftanga jtsejuabnaya chë ntšamo tšabá yomncá

ndosertánëngbiana abuayiyayënga  
 šmorna ca, y mo chë basengcá  
 tondaye nduatsjínëngbiana  
 abuátambayënga ca. Tšëngaftanga tša  
 jésejuabnyana chë ley šmorbomna,  
 lempe šmotátšëmbo ca y ntšamo  
 šmojtsichamcá ndegombre yojtsemna  
 ca. <sup>21</sup> Y chcasna, tšëngaftanga  
 chë ínÿënga abuátambayënga,  
 ñndáyëca ndoñe cach tšëngaftanga  
 šmondëtsánatsana? Tšëngaftanga  
 ínÿëngbioye jtsabuayiyayana ndoñe  
 chamondëtsatbëbanama; as, ñndáyëca  
 cach tšëngaftanga šmnëtsatbëbana?  
<sup>22</sup> Tšëngaftanga jtsichámuana, acbe  
 shema o boyábioye ndoñe ínÿaftaca  
 cattseíngñaye ca; as, ñndáyëca  
 tšëngaftanga cachcá šmnëtsama?  
 Tšëngaftanga jtsáboyënjana soyënga  
 chë ndayama ínÿënga tmojtsichamo  
 diosënga yomna ca y jtsadórayana;  
 as, ñndáyëca chë soyënga chënga  
 jadórana yebnënguentšana  
 uámana soyënga šmnëtsatbëbana?  
<sup>23</sup> Tšëngaftanga tša jtsenábotamnyana  
 chë ley šmorbomna; as,  
 ñndáyëca šmonÿbëtsama ínÿënga  
 Bëngbe Bëtsabiana podësca  
 chamotsóyebuambnana, tšëngaftanga  
 chë leyentša mandënga jobedësama  
 ndocna te ntsebošana causa?  
<sup>24</sup> Chama, Bëngbe Bëtsabe uabemana  
 palabrenguiñe mëntšá endayana:  
 “Tšëngaftanga judiëngbe causa, ndoñe  
 judiëngbeñe Bëngbe Bëtsabiana ndoñe  
 tšabá quematoyebuambná ca.”  
<sup>25</sup> Tšëngaftanga ntšamo leyíñe  
 yomandancá šmojtsamëse, Bëngbe  
 Bëtsábënga šmornama jinÿanÿiyama,  
 chë más delicadentše base  
 bobachtëma tëtšëñënga jtsemnana  
 tšabá nántsemna; pero ntšamo chiñe  
 tomandancá ndoñe šmontsamëse, chca  
 tëtšëñënga jtsemnana, tondayama  
 ntososervënana, y chca, tšëngaftanga

jtsemnana mo chë más delicadentše  
 base bobachtëma ndëtëtšëñëngcá.  
<sup>26</sup> Y chë ndoñe judiënga chë más  
 delicadentše base bobachtëma  
 tëtšëñënga, judiëngcá ndoñe  
 quemátsmëna; pero chënga ntšamo  
 leyíñe yomandancá tmojtsamëse,  
 ndegombre Bëngbe Bëtsá chënga  
 echanjúbuaja mo cachabe entsangcá.  
<sup>27</sup> Y chca, tšëngaftanga judiëngbiana  
 Bëngbe Bëtsá echanjayana ndoñe  
 tšabá šmonjama ca, ntšamo leyíñe  
 yomandancá ndoñe šmontsama causa.  
 Cha chca echanjama, er bëtscá ndoñe  
 judiënga mondmëna y chënga ntšamo  
 leyíñe yomandancá mondocumplina,  
 pero chënga ndoñe quemátsmëna  
 tšëngaftangcá tëtšëñënga, jtsinÿama  
 Bëngbe Bëtsábënga šmornama.  
 Tšëngaftanga, masque Bëngbe Bëtsabe  
 uabemana ley šmonduábomna y chë  
 más delicadentše base bobachtëma  
 tëtšëñënga šmondmëna, cabá ndoñe  
 šmontsama ntšamo leyíñe iuayancá,  
 ndayá jamama cmojtsamnama.  
<sup>28</sup> Chcasna, nda chë más delicadentše  
 base bobachtëma tmojatëtše ora,  
 chábioye chë soye ndoñe ntjábemana  
 canÿe ndegombre judío. Y canÿe entšá  
 ndoñe Bëngbe Bëtsábia ntsemnana nÿe  
 ínÿënga chë más delicadentše base  
 bobachtëma tmojatëtšama. <sup>29</sup> Y canÿe  
 entšá ndegombre judío jtsemnana,  
 ntšamo chabe ainaniñe tomncá, cha  
 Bëngbe Bëtsabe entšá yomnama  
 tojtsinÿanÿnase. Y chca, canÿe  
 ndegombre judío, Bëngbe Bëtsabe entšá  
 yomnama chaotsinÿnamna ndoñe  
 quenátsmëna chë más delicadentše  
 base bobachtëma jtsetëtšëñëna, sinó  
 ntšamo Bëngbe Bëtsá tojamcá chabe  
 ainaniñe chaotsebíñyama. Bëngbe  
 Bëtsabe Espíritu jamana entšá chca  
 ainana chaotsebobomna, ndayá  
 inétsinÿanÿnaye cha canÿe ndegombre

judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiama ichamuá; entšanga ndoñe.

**3** <sup>1</sup> Chcase, ndánaca šuatjatjaye, as ¿Bëngbe Bëtsabe entšá jtsemnama jëftsashjáchama, más tšabá yojtsemna canÿe judío jtsemnana ca? ¿Base bobachtema chë más delicadentše tëtšená jtsemnana becá yojsámama ca? <sup>2</sup> Aíñe, chca jtsemnana corente enduámama y nÿetsca soyënguine; natsana chjayana, Bëngbe Bëtsá, judiënga chabe palabra tojanabanÿé, nÿetscangbiamama chamotsinÿemama. <sup>3</sup> Y morna, ¿ndayá yochjopása nderado judiënguentše báseftanga ya ndoñe chca tmontsentšénese? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? <sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatšëmbo Bëngbe Bëtsá sempre endbëtsama ndayá jamama tojašebuachenacá, masque nÿetsca entšanga bosterënga chamotsomñe. Er Bëngbe Bëtsabe uabemana palabrenguine Bëngbe Bëtsabiama mëntšá endayana:

Aca ntšamo chacojayana ora, nÿetscanga mochanjinÿe aca ntšamo ndegombre yomncá cnétsamama; y chacojtsenëuyaná ora, sempre cochanjínÿanÿiye acbe contra tmojtsoyebuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entšanga más tšabá jinÿama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá

ndoñe tšabá tonjama ca, bëngbiamama castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama monduamancá.) <sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nÿets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nÿetsca quem luarentša entšangbiamama, ntšamo tmojamcá tšabá o ndoñe tšabá bëtsemnama.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnama jinÿanÿiyama, y Bëngbe Bëtsá sempre ntšamo ndegombre yomncá tojtsamama jinÿama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canÿe bacna soye amá stsemna ca?” <sup>8</sup> Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entšanga chámuinÿe Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuatambayënga echanjácastigaye, ntšamo castigánënga jtsemnama imomerecencá.

**Ntšamo entšá tojtsamama,  
Bëngbe Bëtsabe bominÿiñe  
ndocná tšabia ntsemnana**

<sup>9</sup> Y asna, ¿Bëngbe Bëtsá bënga judiënga inÿengbiamama más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe judiëngnaca, chë bacna soyënga jamama juabnéngaca mandánënga imomnama.

<sup>10</sup> Er Bëngbe Bëtsabe uabemana palabrënguïñe mëntšá endayana:  
 Ntšamo entšá tojtsamama, ndocná Bëngbe Bëtsabe bominÿiñe tšabia quenátsmëna.  
 iNdoñe, ndegombre ndoñe, ni mo canÿa chca quenátsmëna!

<sup>11</sup> Ndocná quenátsmëna ntšamo ndegombre yomncá chabotsosertánama;  
 iNdocná quenátsmëna nda chaotseboše Bëngbe Bëtsáftaca jtsemnama!

<sup>12</sup> Nÿetscanga ndoñe tšabe benache tmojishache y chiñe montsajna.  
 Chënga nÿetscanga Bëngbe Bëtsabe bominÿiñe tondayama quemátoserverna.  
 Ndocná quenátsmëna ntšamo tšabá yomncá chaotsamama, ini canÿa ndoñe!

<sup>13</sup> Ntšamo tmojtsichamcá puerte bëts bacna soye jtsemnana, mo canÿe obanabe cuevëshe atëfjnëshe puerte bacá tojtsonguëtšecá.  
 Chënga tmojtsoyebuambná soyéngaca ínÿengbioye jtšaiñgñayana.  
 Chë tmojtsichamo soyéngaca puerte bacna soye ínÿengbiama jtsamana, mo canÿe mëtsçuaye tbojtseftëtëshe orcá, chë veneno canÿe entšábioye jóbana.

<sup>14</sup> Chënga, nÿets tempo ínÿengbiama podesca jtsichámuana, y sempre jtsóyebuambnayana chë ínÿenga ntšámnaca jáborlama.

<sup>15</sup> Sempre jtseprontánana ínÿengbioye ntšámnaca jáborlama y jobáyama.

<sup>16</sup> Chënga sempre jtsiyenana ínÿenga chamotsesufrínama jtsamëse, y nÿe ntšámnaca jtsaborlánana.

<sup>17</sup> Chënga ndocna te tondaye ntjamana nÿetscanga natjémbana chamotsiyenama;

<sup>18</sup> Chënga ndoñe ntsiyenana Bëngbe Bëtsabiama jtsejuabnayëse, cha chë más bëtsá nÿetscangbiama yomnama ca —chiñe endayana.

<sup>19</sup> Er bënga mondétatšëmbo, lempe ntšamo leyiñe iuabemancá, chë leyéngaca mandánënga imoyenëngbiama yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcá tšabá o ndoñe tšabá bëtsemnama Bëngbe Bëtsá nÿetscangbiama yochjayana ora, nÿetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca. <sup>20</sup> Er, Bëngbe Bëtsá ndoñe queochatsma ndocná chabe bominÿiñe tšabia chaotsemna, ntšamo leyiñe yomandancá cha tojamama; chë ley bëngbiama jamana, nÿe bënga bacna soye tmojamama chamotsetatšëmbuama.

**Ntšamo Bëngbe Bëtsá inama entšanga chabe bominÿiñe tšábënga chamotsemnama**

<sup>21</sup> Pero mora, Bëngbe Bëtsá tonjinÿanÿé ntšamo cha inama entšanga tšábënga chabe bominÿiñe chamotsemnama; y Bëngbe Bëtsá ndoñe ntjamana canÿa chabe bominÿiñe tšabia chaotsemnama, ntšamo ibomncá cha tojtsamama, ntšamo chë leyënguïñe y mandënguïñe yomncá. Pero masque mora chca, Bëngbe Bëtsá tonjinÿanÿé, Moisesbe leyiñe y Bëngbe Bëtsabe juabna oyebuambnayëngbe librëšangañe yopodena jinÿenana chca yochtsemnama. <sup>22</sup> Bëngbe Bëtsá jamana entšanga chabe bominÿiñe tšábënga chamotsemnama, chënga

Jesucristbeñe tmojtsošbuáchema. Bëngbe Bëtsá nyetscanga Crístbeñe ošbuáchiyëngbiama chca jamana, y chabiama nyetscanga cachcá monduámana; <sup>23</sup>er nyetscanga bacna soye tmojama, y chë causa, ndocna entsá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntšamo Bëngbe Bëtsá tojanjuabocá entsánga chamotsemnama. <sup>24</sup>Pero Bëngbe Bëtsá chëngbiama corente tšabe juabna bómnyeca, mo ndayá cuafjatsatacá, cha jamana chënga chabe bominyiñe tšábenga chamotsemnama. Bëngbe Bëtsá chca tojanma, Cristo Jesúsbeyeca, entsánga atsebácanënga chamotsemnama y ya ndoñe más bacna soyënga jamama juabnéngaca mandánënga chamondétsemnama cha tojanma ora. <sup>25</sup>Bëngbe Bëtsá cha tbojanábuayana, chabe buiñe juabuáshanëse y jóbanëse, cha chaotsemna ndábeyeca Bëngbe Bëtsá entsánga bacna soyëngama jáperdonama; Jesucristbeñe jtsóšbuáchiyëse entsánga jobenayana perdonánënga jtsemnama. Bëngbe Bëtsá chca tojanma, jinýanýiyama cha inétsama entsánga tšábenga chabe bominyiñe chamotsemnama, chë entsánga bacna soyënga tmojanmama chë tempo ntjatonýaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. <sup>26</sup>Cha lempe chca tojanma, jinýanýiyama cha sempre ntšamo ndegombre yomncá inétsamama, y nyetscanga Jesucristbeñe ošbuáchiyënga chabe bominyiñe tšábenga chamotsemnama inétsamama.

<sup>27</sup>Chcáyeca, entsá ndoñe ntsobenana tondayama ntsenábotamnayana. Chca endmëna, er Bëngbe Bëtsá tšabia

chabe bominyiñe jabemana, ndoñe ntšamo leyiñe tomandancá cha tojtsamama, sinó nyë Jesucristbeñe tojtsošbuáchema. <sup>28</sup>Y chca jayanëse, mora bënga tšabá montsetátšëmbo, Bëngbe Bëtsá inétsama canyë entsá tšabia chabe bominyiñe chaotsemnama, nyë Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

<sup>29</sup>¿O Bëngbe Bëtsá nyë judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; <sup>30</sup>er nyë canyë Bëtsá nyetscangbiama endmëna, y cha echanjama chë más delicadentse base bobachtema tétšenënga imomnëngbiama y ndoñe chcangbiámnaca, chabe bominyiñe tšábenga chamotsemnama, Jesucristbeñe tmojtsošbuáchema.

<sup>31</sup>Chcasna, Bëngbe Bëtsá jamana entsánga chabe bominyiñe tšábenga chamotsemnama, Jesucristbeñe tmojtsošbuáchema; ¿chca yojtsayana chë ley nyë tondayama yondoservena ca? ¡Ndoñe, ndegombre ndoñe! Inyëtsá, chca jamana chë ley más chaotsámanama.

#### Ntšamo Abrahánoftaca tojanopasá

**4** <sup>1</sup>Morna Abrahambiamama mochjóyebuambaye, bëngbe tempsca bëts taitá, y mochjinýe ndayá tojánatsjinýe Bëngbe Bëtsábeñe ošbuáchiyana bomnentsana.

<sup>2</sup>Abraham chabe bominyiñe tšabia chaotsemnama, ndayá cha tojanmama Bëngbe Bëtsá maténjanmëse, cha maténjanobená entsánga beñe ndayama jtsenábotamnayana, pero Bëngbe Bëtsabe delante ndoñe; <sup>3</sup>er Bëngbe Bëtsabe uabemana palabrënguñe mëntšá endayana: “Abraham, Bëngbe Bëtsábeñe yojtsošbuáchiye, y chíyeca

Bëngbe Bëtsá tonjánayana cha chabe bominyiñe tšabia yojamna ca.”

<sup>4</sup> Canye entšá trabajayá, crocénana josháchiñana ndayá tojamama, pero chë crocénana ndoñe nye tšetánana ntsemnana, sinó chana jtsemnana ntšamo cha tojsomerecencá. <sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominyiñe tšabia yomna ca, pero aña tojtošoŋbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiamá Bëngbe Bëtsá echanjama chabe bominyiñe tšabia chaotsemnana, chabe ošbuáchiyama. <sup>6</sup> Rey David cachcá chabe librëšañe tojánayana, chë ndabiamá Bëngbe Bëtsá jayanana chabe bominyiñe tšabia chaotsemna ca, masque chabiamá chca cháuyanama tondaye tonjamëse. David chca entšabiamá tojánayana, cha puerte echantsoyejuaye ca. <sup>7</sup> Chabe librëšañe mëntšá tojanábema:

iTša oyejuayënga jtsemnana chë  
Bëngbe Bëtsá chëngbe bacna  
soyënga tojáperdonanga,  
chë Bëngbe Bëtsá chëngbe bacna  
soyënga tojabuajuánanga!

<sup>8</sup> ¡Puerte oyejuayá jtsemnana chë  
Bëngbe Bëtsá mo ndoñe bacna  
soye cuafjama cuenta tbojtsonyá  
cha ca!

<sup>9</sup> ¿David tojánayana nye chë más delicadentše base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmënëngbiámna. Y muentše tmonjayana, Abraham Bëngbe Bëtsábeñe yojtošoŋbuachéyeca, Bëngbe Bëtsá tojánayana cha chabe bominyiñe tšabia yojamna ca. <sup>10</sup> Y ¿ntseco chca tojanopasá? ¿Abraham ya chë más delicadentše base bobachtema tëtšená

yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora. <sup>11</sup> Y cabá chentšana, Abraham base bobachtema chë más delicadentše tëtšená yojtsemna; y chca yojamna jinyanýiyama, Bëngbe Bëtsá tempo ya chabiamá tojánayana cha chabe bominyiñe tšabia yojamna ca, cha Bëngbe Bëtsábeñe yojtšoŋbuáchema. Lempe chca tojanopasá, jinyanýiyama Abraham mo taitacá yomnama Bëngbe Bëtsábeñe imoŋbuachëngbiama, masque ndoñe base bobachtema chë más delicadentše tëtšenënga mondmëna. Y cachcá Bëngbe Bëtsá chë ošbuáchiyëngbiama tojánayana, chënga chabe bominyiñe tšábënga imomna ca. <sup>12</sup> Y Abrahámna endmëna mo chë taitacá, chë más delicadentše base bobachtema tëtšenënga imomnëngbiama, pero aña Bëngbe Bëtsábeñe corente jtošoŋbuáchiyëse imoyenëngbiama, cachcá ntšamo bëngbe bëts taitá Abraham Bëngbe Bëtsábeñe yojtšoŋbuachecá. Y cha cabá chë más delicadentše base bobachtema ntsetëtšëna ora, ya chca yojtšoŋbuáchiye.

**Jtošoŋbuáchiyëse, ntšamo  
Bëngbe Bëtsá tojašëbuachenacá  
jóshjanguana**

<sup>13</sup> Bëngbe Bëtsá tojanašëbuachená Abrahambiamá y chábéntšana entšangbiama, quem luare chëngbiama yochjéftsemna ca. Y chca tojanašëbuachená, ndoñe Abraham ntšamo leyinó yomandancá betsobedecënama, sinó cha Bëngbe Bëtsábeñe yojtšoŋbuáchema, y chíyeca Bëngbe Bëtsá tojánayana cha chabe bominyiñe tšabia yojamna ca. <sup>14</sup> Pero, ntšamo Bëngbe Bëtsá



tojanašebuachenacá, bēnga ntšamo chē leyiñe yomandancá tmojtsamēngbiana yojtsemna ca tmojayanēse, Bēngbe Bētsábeñe jtsošbuáchiyana tondayama nantsošservena, y ntšamo Bēngbe Bētsá tojanašebuachenacá tondaye ntsámanana. <sup>15</sup> Chē ley juabocnana, Bēngbe Bētsá puerte etonaná entšanga cháuacastigama, chēnga ntšamo chiñe iuayancá ndoñe tmontsamama; pero ndocna mandēnga tontsemñese, ndocná ntsobenana chē ndoñe tontsayancá ndoñe ntjamana.

<sup>16</sup> Y chca, Bēngbe Bētsá Abrahámbyoye tbojanšbuachená, cha yojtsanošbuachéyeca, ntšamo Bēngbe Bētsá tojanašebuachenacá, ndegombre chaotsemnama chē Bēngbe Bētsábeñe imošbuáchema mo Abrahámbentšana entšangcá imomnēngbiana; y Bēngbe Bētsá chca tojanašebuachená, cha chēngbe tšabiana iuantjéšnaye. Chē mo Abrahámbentšana entšangcá imomnēngbeñe, ndoñe quemnatsmēna nye chē ntšamo ley yomandacá imnētsamēnga, sinó nyetscanga chē ntšamo Abraham tojanošbuachecá Bēngbe Bētsábeñe imošbuachēngnaca. Y Abraham nyetscanga bēngbiana, Bēngbe Bētsábeñe ošbuáchiyēnga, mo taitacá endmēna. <sup>17</sup> Ntšamo Bēngbe Bētsabe uabemana palabrēnguñe endayancá, Bēngbe Bētsá Abrahámbyoye ibojtsatsētsnaye ora: “Atše sēnjama aca ba luariñe entšangbiana atšbe bominyiñe taitá chacotsemnama ca.” Chē ntšamo tojanašebuachenacá ndegombre tšabe soye endmēna, er Bēngbe Bētsá chca Abrahambiana yojanjuabná, y Bēngbe Bētsá endmēna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinjyama ndayá ndocna te tmonjaninycá.

<sup>18</sup> Abraham Bēngbe Bētsábeñe yojtsanošbuáchiye y yojtsobatmana ntšamo tbojanšbuachenacá chaotsemnama, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bēngbe Bētsá tbojanianycá: “Acbentšana entšanga tša mallajta mochántsemna, ndocná queochatobenaye jacúntana ca”.

<sup>19</sup> Abraham yojanobatmanēntscuana, cha puerte chábeñe yojtsanošbuaché, ntšamo tbojanšbuachenacá jóyēngacñama, masque Abraham yojtsonyaye ya bētsanánějema yojtsemnana, er ya mo patse uata yojtsebomna, y chabe shema, Sara, ndoñe yonjobena šesonga jtsabamnama. <sup>20</sup> Abraham ndocna te tonjanajbaná Bēngbe Bētsábeñe ošbuáchiyana, y ni mo canye ndoñe yonjanjuaboye chē ntšamo Bēngbe Bētsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Bēngbe Bētsábyoye ibojtsatschuanaye, <sup>21</sup> er cha tšabá inatátšēmba, ntšamo tbojanšbuachenacá jamama, ndegombre Bēngbe Bētsá obená inamnama. <sup>22</sup> Chíyeca, Bēngbe Bētsá tojánayana cha chabe bominyiñe tšabia yojamna ca.

<sup>23</sup> Pero, chabe bominyiñe tšabia yojamna ca Bēngbe Bētsá tojánayana ora, ndoñe nye Abrahambiana chca ntsóyebuambnayana; <sup>24</sup> ndayá bēngbiámnaca, ndēmuanjēngbiana Bēngbe Bētsá yochjayana chabe bominyiñe tšábenga imomna ca, bēnga Bēngbe Bētsábeñe imošbuachéyeca; Bēngbe Bētsá, nda tojanma Bēngbe Utabná Jesús chámuatayenama. <sup>25</sup> Bēngbe Bētsá tojanalesenciá entšanga Jesús chamóbama, bēnga

bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominyiñe tsábenga jábiamama.

**Mora bënga Bëngbe Bëtsabe bominyiñe tsábenga montsemna**

**5** <sup>1</sup>Er Bëngbe Bëtsá tojama bënga chabe bominyiñe tsábenga chamotsemnana, bënga chábeñe imoşbuachéyeca; mora tempcá tsábá Bëngbe Bëtsáftaca bënga montsatsmäna, Bëngbe Utabná Jesucrístbeyeca. <sup>2</sup>Bënga Crístbeñe mondoşbuáchema, cha tojama bënga chamotsetatşëmbuama Bëngbe Bëtsá tşa tsábia yomnama, y Bëngbe Bëtsábiocana tsabe soyënga jtsebomnëse mora chamotsiyenama. Bënga tşa oyejuayënga jésemnana, er Bëngbe Bëtsábeñe jtsoşbuáchiyëse mondobátmana cha puerte uámanënga y bëtsétsanga şochjábiamama, batşá ntşamo cachá yomncá. <sup>3</sup>Y ndoñe nÿe chama bënga oyejuayënga jésemnana, ndayá bënga tmojtsesufrina y padecena soyënguiñe tmojtsajna órnaca. Chca mondbama, er bënga mondétatşëmbo bënga tmojtsesufrina orna, bënga juatsjínÿana ntşamo uantadënga jtsemnana padecena soyënguiñe tmojtsemna ora, Bëngbe Bëtsábeñe jtsoşbuáchiyëse. <sup>4</sup>Bënga padecena soyënguiñe tmojtsemna ora, más tsábá uantadënga jtsemnana mondobéñayeca, Bëngbe Bëtsá oyejuayá bëngaftaca jtsemnana, padecena soyënguentsana ndegombre tsábá tmojachnënga ora. Bëngbe Bëtsá oyejuayá bëngaftaca chaotsemnana bënga tmojana ora, bënga jtsobenana más jtsobátmanana, ntşamo şojaşebuachenacá cha yochjamama. <sup>5</sup>Bënga chca tmojtsobátmanëse,

ndocna te nÿe bonamente quemochatobátmana, er Bëngbe Bëtsá şojinÿanyé tşa bëtscá cha şuababuánÿeshanama. Bëngbe Bëtsá chca tojama chë Uámána Espíritbeyeca, y cha endmäna nda Bëngbe Bëtsá tbojanichmó bëngbe ainaniñe chaotsemnana jtsemándayama.

<sup>6</sup>Tempo bënga tondaye chemuatanobená jamana Bëngbe Bëtsabe bominyiñe tsábenga jtsemnana, y chora Cristo tojanóbana bënga chë bacna soyënga tmojamëngbe tsábiamama, nÿa chama tempo yojamna ora. <sup>7</sup>Ndoñe paselo quenátsmëna jajuaboyana, ndáyeca canÿa nantseprontana jóbanama canÿa ntşamo chë leyiñe yomandancá jamama tojtsamanabiama; pero, canÿa bëtscá jtsababuánÿeshanëse tsabe soyënga ínÿengbiama tojtsamabiama, nderádose chabiama jóbanama cuantseprontana. <sup>8</sup>Pero Bëngbe Bëtsá bënga şojanÿanyé tşa şuababuánÿeshanama, er bënga cabá bacna soyënga ntsamcá imojoyena ora, Cristo bëngbiama tojanóbana.

<sup>9</sup>Cristo, chabe buiñe juabuáshanëse bëngbiama tojanóbanayeca, Bëngbe Bëtsá tojanma bënga chabe bominyiñe tsábenga jtsemnana. Y chca endménayeca, ndegombre Cristo şochanjátsebacaye, entsanga ndoñe tsábá tmonjama ca y castigo chëngbiama chaotsemna ca Bëngbe Bëtsá chaojayana ora. <sup>10</sup>Bënga tempo Bëngbe Bëtsá imojanáya; pero cha tojanma bënga cháftaca tempcá tsábá chamotsatsmënama, chabe Uaquiñá tojanóbanayeca. Y mora, bënga natjëmbana cháftaca chamotsemnana ya tojama ora, ndegombre atsebácanënga mochántsemna, chabe Uaquiñá ainá yómnayeca. <sup>11</sup>Y ndoñe nÿe chca, ndayá bënga cháftaca puerte

oyejuayënga chamotseamnăna  
Bëngbe Bëtsá jamana, ndayá Bëngbe  
Utabná Jesucristo bëngbiana  
tojánmayeca. Y mora, chábeyeca  
Bëngbe Bëtsá tojama bënga cháftaca  
tempcá tsábá chamotsatsemnana.

### Adán y Cristo

<sup>12</sup> Canye entśá bacna soye tojanma  
causa, nyetsca entśanga bacna  
soyënga amënga tmojábcana; y  
cha tojanóbana, bacna soyënga  
tojanma causa. Y chca, nyetsca  
entśanga entsamna jóbanama, er  
nyetscanga bacna soyënga tmojama.  
<sup>13</sup> Bëngbe Bëtsá Moisésbioye chë  
leyënga cabá nduántšabshjona  
ora, entśanga quem luarentše bacna  
soyënga tmojanma. Pero ndocna ley  
tontsemna ora, Bëngbe Bëtsá ndoñe  
ntjatonýayana entśanga bacna soyënga  
tmojamama. <sup>14</sup> Nyetsca entśanga,  
Adánbentšana Moisésbentscoñe,  
nyetscanga yojánamna jóbanama,  
ntšamo cach Adán tojanmcá ndoñe  
tmonjanméngnaca, ntšamo cha  
ndoñe chaondëmana Bëngbe Bëtsá  
tbojanmandacá cha tojanma ora.  
Y Adánbeñe entśanga mondobena  
jinýama, ntšamo chë jabama ibojamná  
canye soyënguñe yochtsanmëna.

<sup>15</sup> Pero ntšamo chë útata tbojanmcá  
ndoñe cachca soye quenátsmëna; er  
Bëngbe Bëtsá entśangbe tsabiama  
jtsejuabnyëse tsábe soyënga  
chëngbiana tojanma ora, ndoñe  
yonjamna mo ntšamo Bëngbe Bëtsá  
tbojanmandacá ndoñe chaondëmana  
Adán tojanma orcá. Tšëngaftanga  
šmondétatšëmbo, nye canye entśá  
canye bacna soye tojanma causa, cha  
tojanma nyetsca entśanga jóbanama  
chaotsamnana, pero Bëngbe Bëtsá  
entśangbe tsabiama yojuabnýeca,  
más bëts soyënga jamana, chë Adanbe

bacna soye entśangbiana bacna  
soyënga tojanmama. Chca, Bëngbe  
Bëtsá tojanma ba entśanga bëtscá  
tsábe soyënga chamotseamnăna;  
y chca tojama, nye canye entśá,  
Jesucristo, tsábe soyënga tojánmayeca.  
<sup>16</sup> Chë ba entśanga bëtscá tsábe  
soyënga chamotseamnăna Bëngbe  
Bëtsá tojamentšana endóbocana soye,  
puerte inyetsá comna, chë entśá Adán,  
canye bacna soye tojanmentšana  
tojanóbocna soyama. Adán bacna  
soye tojanmentšana, Bëngbe Bëtsá  
tojánayana chana bacna soye tojanma  
y castigo jtseamnăna ibojsemna  
ca, y nyetsca entśangnaca chë  
causa; pero masque nyetscanga  
bacna soyënga tmojama, Bëngbe  
Bëtsá entśangbe tsabiama ndoñe  
bëndëtsebnatjëmbayeyeca, tojanma  
entśanga chabe bominyiñe tsábenga  
chamotseamnăna y chë bacna  
soyëngama castigánënga ndoñe  
chamondëtseamnăna. <sup>17</sup> Ndegombre  
endmëna, canye entśá bacna soye  
tojanma causa, nyetsca entśanga  
jóbanama yojtsamna. Pero puerte  
más, canye entśá Jesucristo  
tojanma. Ndëmuanýëngbiana  
Bëngbe Bëtsá tojama bëtscá tsábe  
soyënga chamotseamnăna,  
ndëmuanýëngbiana Bëngbe Bëtsá  
tojama chabe bominyiñe tsábenga  
chamotseamnăna, y Bëngbe  
Bëtsábocana chca tmojóyëngacñënga,  
chënga nyetscanga mochantsiyena  
bacna soyënga jtseyñjanayëse y  
nyetsca tescama mo bëtsëtsangcá;  
y chca echántsemna ndayá Cristo  
tojánmayeca.

<sup>18</sup> Y chca, ntšamo canye entśá,  
Adán, canye bacna soye tojanmama,  
Bëngbe Bëtsá tojánayana nyetscanga  
bacna soye tmojanma y castigánënga  
chamotseamnăna ca; cachcá ntšamo

canÿe entšá, Cristo, puerte tšabe soye tojánmayeca, Bèngbe Bètsá jayanana nÿetscanga imojtsobena chabe bominiÿiñe tšábenga jtsemnana y chë nÿetsca tescama yomna tšabe vida jtsebomnana ca. <sup>19</sup>Y ntšamo Bèngbe Bètsá tbojanmandacá ndoñe chaondëmama canÿe entšá tojanma causa, nÿetsca entšanga bacna soye amènga tmojanobiana; cachcá, ntšamo Bèngbe Bètsá tbojanmandacá canÿe entšá, Jesucristo, tojánmayeca, Bèngbe Bètsá tojanma bètsá entšanga chabe bominiÿiñe tšábenga chamotsemnana.

<sup>20</sup>Chë ley entšangbe cucuatšìne tmojanáboshjona, jinÿanÿiyama ntšamo ndegombre yomna bacna soyènga jtsamana; pero entšanga más bacna soyènga imojtsama ora, Bèngbe Bètsá cabá más chèngbe tšabiama yojtsanjuabnaye y más tšabe soyènga chèngbiama yojtsama. <sup>21</sup>Chcasna, mora mochjayana, entšanga bacna soyèngaca puerte mandánènga imojamna, y chca, nÿetscanga jóbanama yojamna ca. Pero mora, ya ndoñe chca quenátsmèna, er Bèngbe Bètsá tojama entšanga chabe bominiÿiñe tšábenga chamotsemnana, Bèngbe Utabná Jesucristbeyeca chë nÿetsca tescama yomna tšabe vida chamotsebomnana; chíyeca mora bènga montsobena jtsiyenama, Bèngbe Bètsá šojatšatá tšabe soyènga lempe bèngaftaca jtsemnèse.

**Cristbeyeca bènga tšabe  
vida jtsebomnana**

**6** <sup>1</sup>Y asna, òntšamo mochjayana? òšojtsamna jtsiyenana sempre bacna soyènga jtsamèse, chca, Bèngbe Bètsá šuababuánÿeshanama más chašotsinÿanÿinama, cha más bacna soyènga bènga jtsaperdónayèse? <sup>2</sup>iNdoñe, ndegombre ndoñe!

bènga monjaniiyena bacna soyènga jamama juabnèngaca mandánènga, pero mora bènga montsobena jtsiyenana chë juabnènga tondaye bèngbioye ntsamcá, y chca, bènga montsobena mo obanèngcá chë soyèngama jtsemnana; y as, òndáyeca bènga muatjásjuabnaye ntšamo ndoñe tšabá tontsemncá jatiyenana? <sup>3</sup>Er ndegombre tšèngaftanga šmondétatšèmo, bènga uabáinènga tmojanoquedá ora, tmonjaninÿanÿé bènga Cristo Jesúseftaca cánÿiñe mo canÿacá bètsemnana; y bènga uabáinènga tmonjanoquedá ora, enjamna mo bènga cuafjobancá, ntšamo Cristo tojanobancá. <sup>4</sup>Bènga uabáinènga tmonjanoquedá ora, enjamna mo bèngnaca cháftaca cuafjobancá, y cháftaca uatabuantsanèngcá. Chca yojamna, bènga chamotsobenama mo tsèm entšangcá jtsiyenama, ntšamo Crístoftaca tojanopasacá, cha cháuatayenama Bèngbe Bètsá tojanma ora, chabe puerte bèts obenánaca.

<sup>5</sup>Bènga Crístoftaca cánÿiñe mo canÿacá jtsemnèse, cha tojanóbana ora mo bèngnaca cháftaca cuafjobancá enjámnayeca, ndegombre bènga cánÿiñe mo canÿacá cháftaca mochántsemna, bènga cachiñe vida nÿetsca tescama chamotsatsbomnana Bèngbe Bètsá jtsamèse, ntšamo Cristo cháuatayenama cha tojanmcá. <sup>6</sup>Y bènga mondétatšèmo, chë ntšamo bèngbe vida enjamncá, bacna juabnèngaca mandánènga, Jesucristbeñe cabá ntsošbuáchiye ora, mora ya ndoñe chca yontsemnana; y chca entsemna mo chë tempca vida chaóbanama cuafjamcá, Cristo tmojanrucificá ora. Chca yojamna, Bèngbe Bètsá jobenayama chë bacna soyènga jamama bèngbe juabnènga

jtsepochoćama; y chca, ya ndoñe más chë bacna soyéngaca mandánënga chamondétsemnana, mo nyets tempo nye ínÿabiama oservenëngcá. <sup>7</sup>Er canÿe entšá tojóbana ora, chë bacna soyënga chábioye ya ndoñe más ntsemándayana. <sup>8</sup>Er Cristo tojanóbana ora, mo béngnaca cháftaca cuafjobancá endménayeca, cháftaca jtsiyenámna bënga montsošbuaché. <sup>9</sup>Bënga mondétatšëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chautóbanama. <sup>10</sup>Cha tojanóbana, y chë bacna soye jamama juabnënga ndocna te ntjobenayana chábioye jamándana, y ínÿenga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtseservénama yomna. <sup>11</sup>Cachcá, tšëngaftanga cmontsamna jtsejuabnayana, chë ya ndoñe más bacna soyéngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cánÿiñe mo canÿacá jtsemnëse.

<sup>12</sup>Tšëngaftanga cmontsamna, chë bacna soyënga jamama ainanentšë šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondétsamama juabnëngaca nye cach tšëngaftanga, tšëngaftangbe cuerpiñe tšabá jtsomñama. <sup>13</sup>Tšëngaftanga ndoñe quecmátamna jaleséciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jasérviam

chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiamá, y tojanma tšabe vida chašmotsebomnana; y jauyanana nyetsca tšëngaftangbe cuerpentša soyëngna Bëngbe Bëtsá jasérviamá yojtsemna ca. <sup>14</sup>Ndoñe quecmátamna bacna soyéngaca mandánënga jtsemnana, er tšëngaftanga ndoñe quešmátiyena leyiñe iuayana soyéngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

**Ošbuachiyá obligaciönaca  
jtsemnana ntšamo tšabá  
yomncá jamama**

<sup>15</sup>Y asna, ÷bënga imojtsobena bacna soyënga jamana, chë leyiñe iuayana soyéngaca ndëmandánënga imomnana, y Bëngbe Bëtsá bëngbiama tšabá jtsejuabnayëse bënga imoyenama? iNdoñe, ndegombre ndoñe! <sup>16</sup>Tšëngaftanga tšabá šmondétatšëmbo, ínÿabe cucuatiñe mo nyets tempo nye ínÿabiama oservenëngcá šmojoquedá ora, cha jtsobedecénama, ndegombre tšëngaftanga chë nduiñbiamá nyets tempo oservénënga jtsemnana. Chcasna, cachcá jtsemnana, chë tšëngaftanga šmojabocacá bacna soyéngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nyetsca tescama obanënga cuaftsemncá, o Bëngbe Bëtsá jtsobedecénama, y chca, chabe bominiñe tšábënga jabocanana. <sup>17</sup>Pero šontsamna Bëngbe Bëtsá jtsatschuanayana, er tempo tšëngaftanga mo nye ínÿabiama oservenëngcá šmojamna, bacna soyënga jamama juabnëngaca mandánënga; pero mora nyets ainánaca šmojoyeuná, ntšamo chë tcmojanabuatambá soyënguñe

šmojoyëngacñécá. <sup>18</sup> Bëngbe Bëtsá tšëngaftanga cmojatsebácá, bacna soyëngaca ndëmandánënga chašmotsemnana, y morna mo Bëngbe Bëtsabiana oservenëngcá šmojáocna, ntšamo tšabá yomncá jtamama. <sup>19</sup> Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jaleséciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnéngaca, y nÿe ndaye bacna soyënga jamama juabnéngaca. Cachcá, mora tšëngaftanga cmontsamna jaleséciana tšëngaftanga chašmotsemnana juabnéngaca mandánënga tšabe soyënga jtamama, chca, ndegombre Bëngbe Bëtsabe entšanga chašmotsemnana.

<sup>20</sup> Tšëngaftanga, cabá bacna soyënga jamama juabnéngaca mandánënga šmonjamna ora, tšëngaftanga ndoñe obligacónaca quešmënjatsmëna ntšamo Bëngbe Bëtsabiana tšabá yomncá játamama. <sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtšëuatja. Chca soyënga tcojamentšana jóbocnana, entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá. <sup>22</sup> Pero mora, ndoñe quešmátsmëna bacna soyënga jamama juabnéngaca mandánënga, y mora bëtscá šmojtsentšana Bëngbe Bëtsá jtseyeunanana y jtseeservëna. Chca jtamama, tšëngaftangbiana puerte tšabá entsemna, er chca, Bëngbe Bëtsabe entšanga šmochántsemna,

y cabana, chë nÿetsca tescama yomna tšabe vida šmochántsebomna. <sup>23</sup> Bacna soyënga tcojtsamentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero, Bëngbe Bëtsá šojtsatšatná soyënguentsana, jóbocnana chë nÿetsca tescama yomna tšabe vida jtsebomnana, Cristo Jesús Bëngbe Utabnáftaca cánÿiñe mo canÿacá jtsemnëse.

**Chë bouamnábentšana ndayá  
bëngbiana mochjuatsjinÿe**

**7** <sup>1</sup> Jesucristbeyeca catšátanga, tšëngaftanga šmotátšëmbo ntšamo chë leyënga entšangbiana inétsemnana; tšëngaftanga šmotátšëmbo, ntšamo chë leyiñe tojtsayancá canÿe entšá chaotsamamna, nÿe chë entšá tojtsainëntscuana chábioye jtsemándayana. <sup>2</sup> Chcasna, canÿe bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyiñe endayana, chë shemna canÿa jtoquédana, chë boyabiana ndëmandaná ca. <sup>3</sup> Y chca, chë shema inÿe boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtšabáinana chabe boyábioye ínÿaftaca ingñayá ca. Pero chabe boyá tojtsóbanëse, chë leyiñe endayana chë shemna canÿa jtoquédana, chë boyabiana ndëmandaná ca, y cha jtsoberenana ínÿaftaca jtobouamayana; y chca tojama ora, boyábioye ínÿaftaca ingñayana ndoñe ntsemnana.

<sup>4</sup> Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er

Cristo tojanóbana ora šmojánbocna, mo chë soyëngama obanënga cuafjoquedangcá, ínÿabe entšanga jtsemnama, Crístbenga, ndabiama Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jasérviama. <sup>5</sup>Bënga chë nÿe ntšamo cabënga imnabošcá monjaniyena ora, chë ley enjanoservena bëngbe ainaniñe chamotsebomnama bacna soyënga jamama puerte bëts juabnënga, nÿe bënga tšabá jtsomñama. Ba bacna soyënga tmonjanma, y chë causa bënga šonjánamna nÿetsca tescama castigánënga jtsemnama, mo Bëngbe Bëtsabe bominiñe nÿetsca tescama obanënga cuaftsemncá. <sup>6</sup>Pero mora Bëngbe Bëtsá šojatsebacá chë léyeca ndëmandánënga chamotsemnama; chë ley tempo enjamna bëngbiama mo canÿe amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y añe tsmécá chamotsiyenama, ntšamo chë Uámana Espíritu iuamcá bënga vida chamotsebomnama.

**Bacna soye jamama juabna  
tcojtsebomnëse, chë ley jamana  
entšá bacna soye chaomama**

<sup>7</sup>Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínÿabioye jtsántšabošana”, “ínÿabioye ndoñe cattsantsáboše ca” chë leyinë ndoñe matmëñjanábemëse. <sup>8</sup>Pero bacna soyënga jamama

juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguiñe ndayá iuayanama jtsejuabnayëse. Er ndocna ley tondmëna ora, entšá ndoñe ntsetatšëmbuana ndayá yomna bacna soye jtsemama. <sup>9</sup>Canÿe tempo enjamna, chora atše sënjaniyena leyëngama ntsetatšëmbcá, pero ntšamo leyinë iuayancá sënjanabuátmana ora, ndayá jamama ndoñe yonjamnama, atše sënjanontšé chë bacna soyënga jamama juabnëngaca mandaná jtsemnama; <sup>10</sup>y chora atše sënjántatšëmbona, chë causa šojtsanmëna nÿetsca tescama castiganá jtsemnama, mo Bëngbe Bëtsabe bominiñe nÿetsca tescama obaná cuaftsemncá. Bëngbe Bëtsá chë mando tojanma, atše chë nÿetsca tescama yomna tšabe vida jtseboznama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chaotsemna nÿetsca tescama castiganá jtsemnama. <sup>11</sup>Chë leyentša mandinë inÿe soyënga ndoñe šonjëtssemna jamama ca vojtsayánayeca, chë bacna soyënga jamama juabnënga átsbeñe, šmonjaningñé bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chaotsemna nÿetsca tescama castiganá jtsemnama, mo Bëngbe Bëtsabe bominiñe nÿetsca tescama obaná cuaftsemncá. <sup>12</sup>Pero bënga mëntsá mochjayana: chë ley na tšabe soye endmëna, er Bëngbe Bëtsábiocana tojanóbocna, y chë mandëngnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana. <sup>13</sup>Y asna, ¿quem

tšabe soye tojanma atše chašotsemna nÿetsca tescama castiganá jtsemnama, mo Bëngbe Bëtsabe bominiñe nÿetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nÿetsca entšanga mondobena jinÿana canÿe bacna soye, mo canÿe puerte bëts bacna soycá.

<sup>14</sup> Bënga mondétatšëmbo chë ley Bëngbe Bëtsabe ley yomnama, pero atšna nÿe canÿe entšá sëndmëna, canÿa nÿets tempo nÿe bacna soyënga jamama juabnëngaca mandaná.

<sup>15</sup> Ndegombre ndoñe quešnátësertana ntšamo séntsamcá, er ndoñe ntsamana ndayá jamama stsebošcá, pero añe jtsamana ndayá jamama ndoñe šontsogustancá. <sup>16</sup> Pero chë atšbe ainaniñe stsejuabná ndoñe tšabá tontsemna soye stsamëse, ndayama leyiñe iuayana ndoñe candmëna ntsamana ca, chca atše jtsinÿanÿnayana chë ley ndegombre tšabe soye yomnama. <sup>17</sup> Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama. <sup>18</sup> Atše sëndétatšëmbo, atšbe ainaniñe tondaye yontsemna ntšamo tšabá yomncá atše jamama. Masque séntseboše ntšamo tšabá yomncá jamama, ndoñe quetsátobena chca jamama. <sup>19</sup> Atše ndoñe quetsátama chë tšabe soye

ndayá jamama sëndbošcá, pero añe séntsama chë bacna soye ndayá jamama ndoñe sëndbošcá. <sup>20</sup> Chë ndayá ndoñe jamama séntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

<sup>21</sup> Chca, atše tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama. <sup>22</sup> Atšbe ainanoca puerte séntsoyejuá, Bëngbe Bëtsábocana yóbocana mandëngama. <sup>23</sup> Pero atše sënjinÿena inÿe soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca yomna mo ndegombre soycá, mo chë bacna soyëngaca mandaná cuaftsemncá.

<sup>24</sup> ¡Tša lastema atšbiama! Chë bacna soye jamama juabnënga átšbeñe entsemánda, y entsama atše chašotsemna nÿetsca tescama castiganá jtsemnama, mo Bëngbe Bëtsabe bominiñe nÿetsca tescama obaná cuaftsemncá. ¿Nda nanjobenaye chentšana atše jatsbocama? <sup>25</sup> Nÿe Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atše añe séntsejuabná chë ley puerte tšabe soye yomna ca, y jobedésama séntseboše; pero chë bacna soye jamama átšbeñe yomna juabnëngaca, atše bacna soyënga séntsama, ntšamo chë juabnënga šontsemandacá.

**Ntšamo Bëngbe Bëtsabe Espiritu yomandacá jtsiyenana**

**8** <sup>1</sup> Y chca, Bëngbe Bëtsá ndoñe ntjayanana, Cristo Jesúséftaca



cányiñe mo canyáca imomnënga, chëngbe bacna soyëngama nyetsca tescama castigánënga jtsemnana yojtsamna ca. <sup>2</sup> Er, chë Uámana Espíritoftaca mandánënga mondménayeca, Bëngbe Bëtsá šojatsebacá, bënga chë bacna soye jamama juabnéngaca mandánënga ndétsemnana, y nyetsca tescama castigánënga ndétsemnana, mo Bëngbe Bëtsabe bominyiñe nyetsca tescama obanënga cuaftsemncá. Chë Uámana Espiritu jamana bënga ndegombre tšabe vida chamotsebonnama, cányiñe mo canyáca Cristo Jesúseftaca jtsemnëse. <sup>3</sup> Bëngbe Bëtsá tojanma ndayá Moisesbe ley ndoñe tonjanobenacá, er entšanga mondoyena nye ntšamo cachënga imobošcá, y nye cányënga ndoñe ntšobanana jamana ntšamo tojtsamncá. Bëngbe Bëtsá tojánayana entšángbeñe bacna juabnéngbe mando jtsepochócama ca, y chama chabe Uaquiñá tbojanichmó. Cha quem luaroye mo canyë entšacá tojánabo, canyë ainánaca, mo chë entšanga bacna soye amëngbe ainancá, pero ndocna te ni mo canyë bacna soye ndoñe tonjëftsema; y tojánabo, chábeyeca entšanga bacna soyëngama perdonánënga chamotsemnana. <sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espiritu ainaniñe yomandacá y ndoñe nye ntšamo bënga entšanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá. <sup>5</sup> Chë nye cachënga tšabá jtsomñama cachëngbe juabnéngaca imoyenënga, nye sempre jésejuabnayana bacna soyënga jtsamama, chca bacna juabnéngaca mandánënga; pero ntšamo chë Uámana Espiritu ainaniñe

iuamëndacá oyenëngna, sempre jésejuabnayana tšabe soyënga jamama, ntšamo chë Uámana Espiritu yobošcá. <sup>6</sup> Ntšamo chë nye cachá tšabá jtsomñama juabnéngaca mandaná oyenentsana jóbocnana entšá nyetsca tescama castiganá chaotsemnana, mo Bëngbe Bëtsabe bominyiñe nyetsca tescama obaná cuaftsemncá; y ntšamo chë Uámana Espiritu tojtsemandacá oyenentsana jóbocnana chë nyetsca tescama yomna tšabe vida jtsebonnama y ainaniñe tšabe ebionana. <sup>7</sup> Chë nyets tempo oyenënga nye ntšamo tmojtsebošcá nye cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsamëndacá, y chca jamama ndoñe ntšobanana; <sup>8</sup> y chca, chë nye chca bacna juabnéngaca oyenënga, ndoñe ntšobanana jamana ntšamo Bëngbe Bëtsá tšabá tbojtsinyancá.

<sup>9</sup> Pero tšëngaftanga ndoñe quešmátiyena nye cach tšëngaftanga tšabá jtsomñama cach tšëngaftangbe juabnéngaca, sinó šmojtsiyena ntšamo chë Uámana Espiritu tšëngaftangbe ainaniñe cmamëndacá, er chë Uámana Espiritu sempre tšëngaftangbe ainaniñe iuëtsemna. Nda ndoñe quem Cristbe Espiritu tondbomná, ndoñe Cristbia ntsemnana. <sup>10</sup> Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entšanga bacna soyënga jtsamana causa, tšëngaftangbe espíritu nyets tempo vida echanjesóbomñe, er Bëngbe Bëtsá tojama tšëngaftanga chabe bominyiñe tšábënga chašmotsemnana. <sup>11</sup> Y Bëngbe Bëtsabe Espiritu, Jesús cháuatayenama tojamabe Espiritu, sempre tšëngaftangbe ainaniñe

tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnama. Cha chca echanjama chabe Espíritoftaca, y mua sempre tšëngaftangbe ainaniñe iuëtsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espiritu ainaniñe šuamëndacá; ndoñe quešnátamna jtsiyenana nýe bënga tšabá jtsomñama cabëngbe bacna juabnéngaca; <sup>13</sup> er nýe bënga tšabá jtsomñama cabëngbe bacna juabnéngaca šmojsiyenëse, castigánënga šmochántsemna, mo Bëngbe Bëtsabe bominýiñe obanënga cuaftsemncá; pero Uámana Espiritbeyeca, chca juabnéngaca nýetsca bacna soyënga jtsamana jtsajbanama šmojobenase, chë nýetsca tescama yomna tšabe vida šmochántsebomna.

<sup>14</sup> Ntšamo chë Uámana Espiritu yomandacá tmojtsamëngna, Bëngbe Bëtsabe básënga jtsemnana. <sup>15</sup> Er Bëngbe Bëtsá ndoñe tonjama bënga ainaniñe canýe espíritu chamotsebomnama, mo nýe ínýabíama nýets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnama Espiritu jamana bënga Bëngbe Bëtsabe básënga chamotsemnama, y chë Espiritu endama “Atšbe Taitá ca” bënga Bëngbe Bëtsá chamotsechembuanama. <sup>16</sup> Y chë Uámana Espiritu y bëngbe espíritu canýe ora jayanana bënga Bëngbe Bëtsabe básënga imomna ca. <sup>17</sup> Y Bëngbe Bëtsabe básënga mondménayeca, béngnaca mochanjójyëngacñe ndayá cha chabe básënga jatšatayama tojašebuachenacá;

bënga y Cristo cánýiñe chë soyënga mochanjójyëngacñe, er bënga inýe soyënguñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsétsanga chášuabíamama, ntšamo cach Cristo yomncá.

**Bëngbe Bëtsá bëtsétsanga y uámanënga šochjábíama**

<sup>18</sup> Atšë ndegombre sëndétatšëmbo, ntšamo quem tempo bënga imosufrincá, puerte batšatema yomna chë bëngbe tšabíama uámanana y buashinýinýanana Bëngbe Bëtsá šochjínýanýiyama. <sup>19</sup> Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básënga imomnama jinýanýiyama ora. <sup>20</sup> Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnama cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnana tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canýe te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátšama ora chama cha yojanjuabnacá; <sup>21</sup> Bëngbe Bëtsá canýe te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básënga chamotsemnama, lempe ntšamo cha yojanjuabnacá, chabe uámanana y buashinýinýanana jtsebomnama, cachcá yochjama lempe chë cha tojanma soyëngaca.

<sup>22</sup> Er bēnga mondéatatsēmbo lempe ntšamo Bēngbe Bētsá tojanmcá méntscōñama yomna mo canye shembása šešona jtsebmnama ora tbojtsetsetsama tojtsobēsncá; er lempe ntšamo cha tojanmcá entsemna mo tša cuaftsebošcá Bēngbe Bētsá chaomama, chē soyēnga chaoservema ndayama cha tempo tojanjuabocá.

<sup>23</sup> Pero ndoñe nye chē lempe ntšamo Bēngbe Bētsá tojanmcá yojtsemna mo chē shembasacá, sinó bēngnaca; y bēnga ainaniñe mondbomna chē Uámama Espírítu, y chē soye endmēna ndayá natsana bēnga tmojanóyēngacñe, chē Bēngbe Bētsá bētscá soyēnga šochjátatayentšana; bēnga bēngbe ainanoca tša jesobēsnyana, bēnga chabe básenga chamotsemnama Bēngbe Bētsá chaomama mondobátmanēntscuana, y chca, Bēngbe Bētsá chaoma bēnga ndocna te ndopochócama cuerpēnga chamotsebmnama. <sup>24</sup> Bēnga, Bēngbe Bētsábeñe jtsosbuáchiyēse monjobátmana ntšamo cha tojanayancá chaomama, y chíyeca cha bēnga šojatsebacá; pero ndayama tmobatmancá, ya tojtsēchnējuanama bēnga tmojtsonyase, chora chama ya ndoñe ntjátobatmanēngana. Er ndocná jatobátmanana chē ndayá jinýama ya tojobenacá. <sup>25</sup> Pero ndayama bēnga tmobatmancá, cabá ndoñe jinýama tmontsobena soye tojtsemnēse, bēnga jtsamnana Bēngbe Bētsábeñe jtsobátmanana, uantadēnga jtsemnēse, ntšamo tojayancá Bēngbe Bētsá chaomēntscuana.

<sup>26</sup> Uámama Espírítu bēnga šochandbētsējabuachana, er bēnga ainaniñe ndoñe corente ntsošbuáchiyana. Bēnga ndoñe quemuátstatšēmbo Bēngbe Bētsáftaca jencuéntana ntšamo ndegombre tšabá

yomncá; pero cach Espírítu Bēngbe Bētsábioye bēngbiamá jtsotjanañana, mo chca ora chabe ainanoca tša cuaftsobēsncá; y ndayá chca ora tbojtsojtjanañamna, bēnga ndoñe ntjobenayana bēngbe palábraca chama jóyebuambayama. <sup>27</sup> Y Bēngbe Bētsana, ntšamo entšanga ainanoca tmojtsebošcá yonýá, y ntšamo chē Espírítu jayanama tojtsebošcá yotátšēmbo, er chē Espírítu chabe entšangbiamá ibotjanañe, ntšamo Bēngbe Bētsá yobošcá.

#### **Bēnga ayénjanayēngama más tmojábocana**

<sup>28</sup> Y bēnga mondéatatsēmbo, Bēngbe Bētsá nyetsca soyēnguñe inétsama cha imobobonshánēngbe tšabiamá, ndēmuanýenga cha tojáchembo chabe entšanga chamotsemnama, ntšamo cha jamama yojanjuabncá. <sup>29</sup> Jesucristbeñe imošbuachēngbiamna, Bēngbe Bētsá quem luare tojanma orscana yojanjuabná y chēnga tojanabacacá chca chamotsemnama, y chē tempscana tojaninýnaná chēnga chabe Uaquiñacá chamotsemnama; chca, chabe Uaquiñá chē bētscá catšátangbeñe chē natsaná chaotsemnama. <sup>30</sup> Y chē Bēngbe Bētsá chca tojánabacacangnaca, tojánachembo chabe entšanga chamotsemnama; chēngbiamá tojanma chabe bominyñe tšábēnga chamotsemnama, y chēngbiámnaca yochjama chabe uámanana y obenanentšana chamotsebmnama.

<sup>31</sup> Y asna, ¿chē soyēngama ntšamo mochjayana? Co Bēngbe Bētsá bēngaftaca tojtsemnēse, bēnga jáyēnganama ndocná queochatobenaye ca. <sup>32</sup> Cha tondaye tonjanma chabe Uaquiñá jasúfriama ndoñe chabondētsemnama, sinó

tojanalesenciá entsanga chamóba, nyetsca bəngbe tšabíama. Bəngbe Bětsá chabe Uaquíńaftaca chca tojanmese, ndegombre Bəngbe Bětsá lempe šochanjátšataye. <sup>33</sup> ¿Nda nanjobenaye jayanama chě Bəngbe Bětsá tojábacacanga bacna soyənga tmojama y castigánənga chamotsemna ca? Ndocná; er cach Bəngbe Bětsá endmēna nda tojayana bənga chabe bominýiñe tšábənga imomna ca. <sup>34</sup> Y asna, ¿nda nanjobenaye jayanama bənga castigánənga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bəngbiama tojanóbana, pero cabá más, ndabíama Bəngbe Bětsá tojanma cháuatayenama, y mora Bəngbe Bětsabe catšbioica yojtsetbemana, jamándama y puerte bětsá chentše jtsemnana; y choca, chánaca bəngbiama Bəngbe Bětsábioye ibotjanañe. <sup>35</sup> ¿Ndayá nanjobenaye Crístbentšana, chě tša šondababuanýeshanábentšana bənga jtsajuánayana? ¿Padecena soyənguñe jtsemnana, tša jtsetsetšana, bənga chamosufrima ínýenga tmojtsama ora, tondaye saná shěntsana ora, tondaye entsáyá tmonsábomna ora, o resjo bəngbiama tojtsemna ora, o bənga jtsébáyama ínýenga tmojtseboše ora? <sup>36</sup> Ntšamo Bəngbe Bětsabe uabemana palabrənguñe endayancá, canýe entsá Bəngbe Bětsábioye ibojauyana ora:

Acbe causa entsanga cada te šontsětsětsná bənga jtsébáyama ca;  
entsanga bəngbioye nýe ntšámnaca jtsaborlánana;  
bəngaftaca jamana mo chě jobáyama oveshəngaftaca mondbetsamcá ca.

<sup>37</sup> Pero ndoñe; nyetsca chě soyənguentsana bəngna

ayénjanayəngama más tmonjábocana, cha bənga šuababuánýeshanayeca.

<sup>38</sup> Er atše tšabá sěndétatšēmbotondaye yondobena, bənga Bəngbe Bětsábentšana, chě tša šondababuanýeshanábentšana jtsajuánayana: masque ainənga o obanənga tmojtsemna; ni angelənga, ni améndayənga chca jamama quemátobena; ni chě mora yojtsěchnəjuana soyənga, ni chě más chcoye yochjopása soyənga; ni ndocna obenana cach ndoñe; <sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inýe soye ntšamo Bəngbe Bětsá tojamcá, quenátobena chca bənga jtsajuánayama. iNdocna soye quenátobena bənga Bəngbe Bětsábentšana, chě bənga šondababuanýeshanábentšana jtsajuánayana, chě Cristo Jesús Bəngbe Utabnáftaca Bəngbe Bětsá šojanýanýe bonshánentšana!

**Bəngbe Bětsá Israeloca entsanga tojabacacá, uámanənga chamotsemnana.**

**9** <sup>1</sup> Atše, Crísoftaca cánýiñe mo canýacá quetsomñecana, ntšamo sěntsichamcá ndegombre endmēna; atše ndoñe quetsátsbostero. Atšbe ainanoca juabnənga, Uámana Espíritbeyeca jtsemándanese, chě šmonybėuyana tšabá o ndoñe tšabá tijamama, šmontsatsětsná atše ndoñe stsebosterama. <sup>2</sup> Ndegombre, atše puerte ngménaca atšbe entsangbiama, chě Israeloquəngbiama sěntsemna y atšbe ainana tša šontsetsetše, chənga Jesucrístbeñe jtsošbuáchiyama ndoñe quemátsboše causa. <sup>3</sup> Tšabá tojtsemnese, atše stjobenaye jtsebošana cach atše Bəngbe Bětsábeyeca nyetsca tescama castiganá y Crístbentšana

luaroca jtsemnama, atšbe entsanga, chë cach atšcá buiñe bomna entsanga jujabuáchama. <sup>4</sup> Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiama y chë tša bëtsá y uamaná cha yomnama chënga tojaninñanyé. Bëngbe Bëtsá ba soye chënga tojanabuayená ndayá cha chëngbiama yojánboşe y ndayá chëngbiama jamama, y chë ley chëngbe cucuatšiñe tojanáboshjona. Chënga monjántatsëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. <sup>5</sup> Chënga mondmëna chë bëngbe tempsca uámana bëts taitangbentsánënga, y Crístnaca mo canye entsacá, mo canye Israeloca entsangbentsacá tojánabo; y cha endmëna Bëngbe Bëtsá, nyetsca soyënguñe mandayá. Nyetsca entsanga nyets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nyetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. <sup>7</sup> Ni nyetsca Abrahámbentsana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojanियana: “Chë ácbentsana entsanga nyë Isaácbentsana mochanjabo ca.” <sup>8</sup> Chca entsayana, bëngna ndoñe šontsamna jtsejuabnayana Abrahámbentsana nyetsca entsangbiama mo Bëngbe Bëtsabe basengcá; inyëtšá, nyë chë Bëngbe Bëtsá tbojanšbuachenáyeca Abraham yojánabamna básengbiama cocayé entsemna jtsejuabnayana,

Abrahámbentsana ndegombre entsanga bëtsemnama. <sup>9</sup> Er mëntšá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canye šešona bochántsebomna ca.”

<sup>10</sup> Pero nyë nyëtšá ndoñe quenátsmëna. Chë Rebecbe uta básatna canye taitá ibnabomna, bëngbe tempsca bëts taitá Isaac. <sup>11-12</sup> Bëngbe Bëtsá, Rebécbioye tbojanियana: “Acbe mayor uaquiniá, acbe ngomënche uaquiniábioye bochanjasérvia ca.” Cha chca tojánayana jinñinñiyama chë básatbentsana canya cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojanियana chë básata cabá ndonñna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chë básatbentsana canya y ndoñe chë inya chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. <sup>13</sup> Ntšamo Bëngbe Bëtsá chabe uabemana palabrënguñe tojanayancá: “Jacob sënjanbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nyëtscángaftaca endëtsemna ca? ¡Ndoñe, ndegombre ndoñe! <sup>15</sup> Er Bëngbe Bëtsá Moisésbioye tbojanियana:

Atše šochanjóngmia nda chaitsebošabiama, y nda chaitsebošá chanjalastéma ca.

<sup>16</sup> Y chca, Bëngbe Bëtsá canye entšá jabocacayana, ndoñe ndayá chë entšá tojtsebošama o tojamama, ndayá Bëngbe Bëtsá tbojalastemama. <sup>17</sup> Er Bëngbe Bëtsabe uabemana palabrënguñe, Faraón chë Egiptoca

réybioye cha tbojaniana: “Atše rey tcbonjábema, tša bëtscá atšbe obenana yomnama nÿetscanga ácbeñe chayinÿanÿema, y nÿets luarentša entšanga atšbiana chamotatsšëbonama ca.”<sup>18</sup> Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiana nduauenaná chaotsomñama.

<sup>19</sup> Pero ndánaca tšëngaftanguentšá šuatjatjaye: “Bëngbe Bëtsá chca tojtsamëse, ðntšamo cha nantsobena jayanana canÿe entšá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?”<sup>20</sup> Pero, nÿe entšá quecotsemñecá, ðntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canÿe soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”<sup>21</sup> Chë fshantse soyënga pormayá jtsoobenana canÿe fshantsentšana jamana, canÿe matbaja uámana tescama, y inÿajna cada te chaotsoservénama. Cachcá, Bëngbe Bëtsá jtsoobenana jamana ntšamo cha tojtsebošcá, ndayá cha tojama sóyeca.

<sup>22</sup> Bëngbe Bëtsá yojáboše jinÿanÿiyama entšángaftaca tbojánetnama, chëngbe bacna soyëngama; y yojáboše cha puerte obená yomnama jinÿanÿiyama. Chíyeca, chënga tša yojanëuantana, chënga chë ndëmuanÿengbiana Bëngbe Bëtsá yochjánayana chëngbe bacna soyëngama castigánënga jtsemnana yojánamca, chë ndëmuanÿenga jtsapochócama Bëngbe Bëtsá yojsanprontana.<sup>23</sup> Y chánaca yojáboše jinÿanÿiyama cha puerte uamaná y bëtscá yomnama. Cha

tojama, bënga chë ndëmuanÿenga cha šojanalastemá, chabe obenanentšana y uámananentšana chamotsebomnama; y cha tempo chca tojanjuabó bënga uámanënga y bëtscésanga jábiamama.<sup>24</sup> Bënga mondmëna chë ndëmuanÿenga Bëngbe Bëtsá chama šojánachembo, inÿengna judío entšanguentšana, y inÿengna ndoñe judiëngbentšana.<sup>25</sup> Ntšamo chabe uabemana palabrenguiñe, Oséasbe librësañe Bëngbe Bëtsá tojanayancá:

Entšanga ndoñe átšbenga mondmënënga, chënga “atšbe entšanga ca” chantsëbobuatma; y canÿe luarentša entšanga ndoñe sënjánababuanÿeshanënga, chëngna “atšbe bonshánënga ca” chantsëbobuatma.

<sup>26</sup> Y cach luare ndayentšë Bëngbe Bëtsá tojánayana: “Tšëngaftanga atšbe entšanga ndoñe quešmátsmëna ca”, cachentšë Bëngbe Bëtsá ainá chënga echanjáuyana “atšbe básenga ca”.

<sup>27</sup> Israeloca entšangbiana, Isaías jabuachana tojánayana:

Masque Israeloca entšanga puertebanga chamotsemna, nÿa mo chë mar béjayoca chënÿañe cascajácá, Bëngbe Bëtsá nÿe báseftanga chentšana echanjätsebacaye;

<sup>28</sup> er, ndoñe bën y Bëngbe Utabná canÿe y nÿetsca tescama echanjayana, nÿets quem luarentša entšangbiana ndayá chënga tmojamama tšabá o ndoñe tšabá bëtsemnana, y chëngaftaca echanjama ntšamo chaojayancá ca —cha tojánayana.

<sup>29</sup> Ntšamo Isaías tojanayancá, Bëngbe Bëtsá Israeloca entšángaftaca ntšamo jamama tojanoyebuambá ora:

Bëngbe Utabná, nÿets obenana  
 bomná,  
 ínÿenga bënga jtsapochócama cha  
 tojanalesenciá ora,  
 báseftanga bëngbe  
 entšanguentšënga ainënga  
 chamotsomñama ndoñe  
 matënjanmëse,  
 bënga mora pochocánënga  
 mamojtsemna, mo chë Sodoma  
 y Gomorra pueblëngoca  
 entšangcá ca,  
 cha nÿetscanga y nÿetsca tescama  
 tojtsanapochócaye ca.

**Israeloca entšanga y chë  
 tšabe noticiënga**

<sup>30</sup> Chcasna, mora mëntšá  
 mochjayana: ndoñe judiënga tondaye  
 monjánama Bëngbe Bëtsabe bominyiñe  
 tšábenga jtsemnama, pero cha tojanma  
 chënga chabe bominyiñe tšábenga  
 chamotsemnama, chënga chábeñe  
 imojtsošbuáchiyama. <sup>31</sup> Pero, Israeloca  
 entšanga imojánboše Bëngbe Bëtsabe  
 bominyiñe tšábenga jtsemnama,  
 ntšamo chë leyiñe iuayancá jtsamëse;  
 pero ndoñe chca tmonjanobená. <sup>32</sup> ¿Y  
 ndáyeca chca? Co chë Bëngbe Bëtsabe  
 bominyiñe tšábenga jtsemnama,  
 chábeñe jtsošbuáchiyëse, chënga  
 tondaye monjánama causa chca,  
 sinó chca jtsemnama imojánboše  
 nÿe ntšamo leyiñe iuayancá  
 jtsamëse. Y chca, chëngna Jesús  
 tmojtsanaboté, ntšamo chë Bëngbe  
 Bëtsabe uabemana palabrenguiñe chë  
 tmojtsanábotengbiama endayancá,  
 chëngbiama cha yomna mo chë  
 ndëtsbé ndayiñe chënga jtsojestjiamcá  
 ca. <sup>33</sup> Bëngbe Bëtsabe uabemana  
 palabrenguiñe cha chca tojánayana:  
 Šmochjinÿe, atše sënjama  
 Jerusalenentše canÿa  
 chaotsemna, y cha endmëna

mo ndëtsbecá ndayentše chënga  
 mochjojestje,  
 y canÿe peñëscá ndayëše yochjama  
 chënga chamotsótsatšama;  
 pero nda chábeñe tojtsošbuaché,  
 ndocna te nÿe bonamente  
 queochátobatmana ca.

**10** <sup>1</sup> Jesucristbeyeca catšátanga,  
 atše nÿets ainánaca séntseboše  
 y Bëngbe Bëtsá séntseimpadana, cha  
 Israeloca entšanga cháuatsebacama.  
<sup>2</sup> Atše sëndétatšëmbo y séntsobena  
 chëngbiama jayanama, chënga puerte  
 mondboše Bëngbe Bëtsá jaserviama,  
 pero ntšamo chënga vojtsësertancá,  
 ntšamo Bëngbe Bëtsá jaserviama  
 vojtsamnamna, ndoñe quenátsmëna  
 ntšamo ndegombre yomncá. <sup>3</sup> Chënga  
 ndoñe tonjanësertá ntšamo Bëngbe  
 Bëtsá inétsama entšanga chabe  
 bominyiñe tšábenga chamotsemnama,  
 y cachënga tmojánguango ntšamo  
 jamëse jobenayama Bëngbe Bëtsabe  
 bominyiñe tšábenga jtsemnama;  
 pero ndoñe chca tmonjanobená, chë  
 entšanga chabe bominyiñe tšábenga  
 chamotsemnama ntšamo Bëngbe Bëtsá  
 inetsamcá ainánaca ntjoyëngacñëcá.  
<sup>4</sup> Er Cristo tojama entšanga ndoñe  
 chamondëtsama ntšamo leyiñe  
 iuayancá, Bëngbe Bëtsabe bominyiñe  
 tšábenga jtsemnama, chca, chënga  
 chamobenama chabe bominyiñe  
 tšábenga jtsemnama, Crístbeñe  
 jtsošbuáchiyëse.

<sup>5</sup> Chë Bëngbe Bëtsabe bominyiñe  
 tšábenga jtsemnama bošëngbiama,  
 ntšamo leyiñe iuayancá jtsamëse,  
 Moisés mëntšá tojánayana, chëngbiama  
 tojanábema ora: “Nda tojtsama  
 nÿetsca mandënga ntšamo leyënguiñe  
 endayancá, tšabe vida ehántsebomna,  
 nÿets tempo chë leyëngaca mandaná  
 ca.” <sup>6</sup> Mëntšá endmëna ntšamo Bëngbe  
 Bëtsabe uabemana palabrenguiñe

iuayana, entsanga chabe bominyiñe tšábenga chamotsemnama ntšamo cha inétsamama, Jesucristbeñe jtsošbuáchiyese: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama); 7o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).” 8 Ntšamo Bëngbe Bëtsabe uabemana palabrënguñe iuayancá mëntšá endmëna:

“Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca. 9 Chë buayenana soyënguñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyëts ainánaca tcojtsosbuáchese, Bëngbe Bëtsá cmochjatsbocá ca. 10 Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominyiñe tšábenga chamotsemnama; palabrëngaca bënga jinÿanyiyana ndegombre Jesucristbeñe imojtsosbuáchema, y Bëngbe Bëtsá bënga játsebacana.

11 Er Bëngbe Bëtsabe uabemana palabrënguñe mëntšá endayana: “Nda Bëngbe Bëtsábeñe tojtsosbuaché, ndocna te nyë bonamente queochátobatmana ca.” 12 Judiënga y ndoñe judiënga atsebácanënga mondmëna cach sóyeca, er canÿe Utabná nyëtscangbe Utabná endmëna, y cha tmojtsotšëmbuanëngbiama,

cha bëtscá jtsamana. 13 Er Bëngbe Bëtsabe uabemana palabrënguñe mëntšá endayana: “Ndanaca Bëngbe Utabná tbojtsotšëmbuanábioye, cha bochanjatsbocá ca.” 14 Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiamá jóyebuambayama ndoñe tmonjouenëse? ¿Y ntšamo chabiamá mochjouena, chabe buayenana soyënga chënga jáuyanama ndocná tontsemnëse? 15 ¿Y ntšamo chabe buayenánana mochtسابuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguñe endayancá: “iTša tšabá chë buayenánana abuátambayënga tmojášhjajna ora ca!”

16 Pero nyëtscanga chë tšabe noticiënga ndoñe ntjoyeunayana. Cach Isaías mëntšá tojánayana: “Utabná, ¿nda chë mondabuayiyná soyënguñe yojtsosbuaché ca?” 17 Chcasna, chë tšabe noticiënga jouenëse, entsanga jobenayana Jesucristbeñe jtsošbuáchiyana; y nda Cristbiamá tojtsabuayiynase, entsanga chabe buayenánana jouenana.

18 Pero atšë šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyëts quem luariñe tojóshjango, y chëngbe palabrënga nyëts luarënguëntša entsangbenache tojuáshana ca.

19 Pero cachiñe šcotjá: ¿Israeloca entsanga chë buayenánana ndoñe tonjanësertá ca? Natsana, Moisés



mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsiyentšbuašama, chënga chë ndoñe monjamna mo tšëngaftangcá atšbe entšanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

<sup>20</sup> Isaiásnaca, Bëngbe Bëtsabiana tojanoyebuambá ora, puerte añémoca tojánayana:

Chë atše ndoñe šmondënguanga, šmonjínýena; y chë atšbiana ndoñe mondënoticiangbioye sënjenonýinýé ca.

<sup>21</sup> Pero Israeloca entšangbiana mëntšá tojánayana:

Nýets tempo atše tša sënjánama, chënga átšeftaca tšabá tempcá chamotsatsmënama, pero chënga ndoñe chemátanbošena jouenama, y atšbe contra monjëtsemna ca.

**Bëngbe Bëtsá, Israeloca entšangbiana tšabe juabna yobomnama tojinýanýé**

**11** <sup>1</sup> Y as mora šcotjá: ¿Bëngbe Bëtsá chabe entšanga tojtšanëbaté? ¡Ndoñe, ndegombre ndoñe! Cach atše canýe Israelocá sëndmëna, Abrahámbentsána entšá y Benjaminbe bëtš pamillentsána entšá. <sup>2</sup> Bëngbe Bëtsá chabe entšanga ndoñe tonjubaté, chë tempscana tojánabacacanga. Tšëngaftanga

šmondëtatšëmbo ntšamo Bëngbe Bëtsabe uabemana palabrënguñe endayancá, Bëngbe Bëtsabe juabna oyebuambnayá Elías, Israeloca entšangbe contra Bëngbe Bëtsábioye cha ibojanatsëtsná ora: <sup>3</sup> “Bëngbe Utabná, acbe juabna oyebuambnayënga tmojtšëbaye y acbiana pormana altarënga tmojtšepochocá; nýe atše vídaca tijoquedá, y chënga montseboše átšnaca jóbama ca.” <sup>4</sup> Y mëntšá Bëngbe Bëtsá tbojanjuá: “Atše canýsëfta uaranga boyabásenga atšbiana sënjacuedá, Baal ndoñe tmonjadoranga, ndayá entšanga tmojobopormá y imojtsejuabná canýe dios yomna ca.” <sup>5</sup> Mórncaca cachcá entsemna, judiënguentše báseftanga monduájamna Jesucristbeñe ošbuáchiyënga, ndëmuanyënga Bëngbe Bëtsá tojabacacá, cha chëngbiana tšabe juabna bómnyeca. <sup>6</sup> Bëngbe Bëtsá entšanga jabacacayana chëngbiana tšabe juabna bómnyeca; y ndoñe chca ntjamana ndayá entšanga tmojamama. Er ndayá tmojamama Bëngbe Bëtsá entšanga tojabacacase, cha nanjínýanýiye cha chca inétsama, ndoñe nýe chëngbiana tšabe juabna bómnyeca.

<sup>7</sup> ¿Y asna? Israeloca entšanga ndoñe chemátaninýena ntšamo Bëngbe Bëtsabe bominýiñe tšábenga jtsemnana, pero chënguentšënga básefta bocacánëngna añíe tmojanobená. Bëngbe Bëtsá tojanalesenciá chë ínýenga Israeloquënguentšana chabe buayenana soyënga ainaniñe ndoñe chamondóyëngacñama; <sup>8</sup> ntšamo Bëngbe Bëtsabe uabemana palabrënguñe endayancá: “Bëngbe Bëtsá tojama chënga chabe soyëngama jósertama ndoñe chamondëtšobenama, y méntšcoñama chënga ndoñe quemátobena chabe

soyëngama ni jinýana ni josértana, mo nduabínýnënga o nduauenanënga cuaftsemnëngcá ca.”<sup>9</sup> Davidínaca chëngbiana méntšá tojánayana:

Mo chë entsanga canýe fiestentšë oboyejuayënga, chëngbe uayayëngbeyeca nyë ndeolpe ishëchenëngcá,

y mo chë bayëngbiana uachmaniñe ishëchenëngcá, chënga mal chamopasama chaomama Bëngbe Bëtsá séntseimpadana, mo nda ndëtsbeñe cuaftsojestjá.

Chca Bëngbe Bëtsá chaoma, chëngbe bacna soyëngama; y cha cháuyana chënga puerte castigánënga jtsemnana yojtsamna ca, bacna soyënga tmojama causa;

<sup>10</sup> Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana, y chaoma puerte chamosufrima, nyëts tempo padecena soyënguñe jtsiyenëse ca —cha tojánayana.

**Bëngbe Bëtsá ndoñe judiënga tojatsebacá**

<sup>11</sup> As mora šcotjá: ¿Israeloca entsanga Bëngbe Bëtsá ndoñe tmonjanoyeuná ora, cha tojánayana chënga nyëtsca tescama castigánënga jtsemnana yojtsamna ca, ndocna inýe soye chëngbiana ntsemncá? ¿Chëngbiana yojamna mo chë ndëtsbeñe jojéstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbocaná jtsemnana; y chë causa,

mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsíyentšbuaše.

<sup>12</sup> Judiënga bacna soyënga tmojanma causa, inýe entsanga quem luarentšë tmojobená ba tšabe soyënga jtsebmoma. Chë judiënga tmonjanorrebajá causa, chë ndoñe judiënga ba tšabe bendicionënga Bëngbe Bëtsábentšana tmojosháchiñe. Y chca, chë bëtscá judiënga Bëngbe Bëtsá játsebacama, chënga atsebacánënga chamojtsemna ora, más bëtscá tšabe bendicionënga Bëngbe Bëtsábentšana nyëtsca entsangbiana echántsemna.

<sup>13</sup> Ntšamo mora chanjayancá, tšëngaftanga ndoñe judiëngbiana entsemna. Bëngbe Bëtsá šojichmó chabe soyëngama chë ndoñe judiënga jábuayenama; atšë séntsejuabná puerte uámana trabajo stsebmoma ca. <sup>14</sup> Atšë séntsobátmana, quem trabájoca atšë jobenayana jamama chë cach atšcá buñe bomna entsanguentšënga, ndayá chë ndoñe judiënga Bëngbe Bëtsábentšana tmojoshachiñcá chamotsíyentšbuaše, y chca, ndayá tijamama, Bëngbe Bëtsá chënguentšana báseftanga cháuatsebacama.

<sup>15</sup> Er chë judiënga Bëngbe Bëtsá tojtsanébaté ora, cha tojanma inýe entsanga quem luarentšë cháftaca tempcá tšabá chamotsatsmënama; y chënga cha chamojoyeuná ora, corente tšabá echántsemna, nya chënga mo obanënga cuabmëncá y cuafsatayanëngcá. <sup>16</sup> Nda canýe arninýentšana chë natsana tandëse Bëngbe Bëtsabiama joserviama yojtsemna ca tojayanëse, jtsemnana mo nyëtsana chabiama cuaftsemncá. Canýe betiyentša tbëtëjënga Bëngbe Bëtsabiama yojtsemna ca canýa tojayanëse, nyëtsca chë betiyentša

buacuafjéngnaca Bèngbe Bètsabiana jtsemnana.

<sup>17</sup>Chè judiènguentşe báseftanga Jesucristbeñe ndoñe montsanoşbuaché ora, tşèngaftanga chë ndoñe judiènga şmonjanobená chábeñe jtsoşbuáchiyana. Y chca, judiènga monjamna mo canye jena olivo betiyentşana entşanga tmojatëtşe buacuafjéngcá, y tşèngaftangna mo tjoca olivo betiyentşa buacuafjénga, chë jena olivo betiyeshiñe jenëfjéngcá. Mora tşèngaftanga Bèngbe Bètsábentşana cachca tşabe soyènga chë judièngaftaca şmontsebmna, mo chë jena buacuafjénga y cachentşa buacuafjénga cach tbëtëjëntşana lempe cuaftsoyèngacañcá. <sup>18</sup>Ndoñe şmattsenábotamnaye, tşèngaftanga Bèngbe Bètsabe tşabe soyènga şmojtsebmnama, chë Jesucristbeñe ndoñe montsanoşbuaché judièngbiana yojamna soyènga. Şmochtsejuabnaye, buacuafjéngna chë tbëtëjéngayeca vida jtsebmnama, y ndoñe tbëtëjénga chë buacuafjéngayeca; cachcá, tşèngaftanga nye Bèngbe Bètsábeyeca chë tşabe soyènga şmojtsebmna.

<sup>19</sup>Pero tşèngaftanga şmuatjayana: “Aíñe, pero Bèngbe Bètsá básefta judiènga tojanëbaté, Jesucristbeñe ndoñe montsanoşbuaché causa; chíyeca bènga fsenjanobená mo buacuafjénga betiyiñe jenëfjéngcá chca tşabe bendicionènga Bèngbe Bètsábentşana jóyèngacñana ca.” <sup>20</sup>Ndegombre, chènga Jesucristbeñe ndoñe montsanoşbuaché causa, mo buacuetëtşenëfjéngcá tmonjanoqedá, pero Jesucristbeñe şmojtsoşbuáchema, tşèngaftanga şmojoqedá Bèngbe Bètsábentşana tşabe bendicionènga jtsoyèngacañcá. Chcasna, chama ndoñe şmattsenábotamnaye; más tşabana cuedado jtsebmnama. <sup>21</sup>Er

Bèngbe Bètsá, chë Jesucristbeñe ndoñe montsanoşbuaché judiènga, ndoñe tonjanaperdoná, y chènga chabe entşanga bétsemnamna, monjamna mo cach betiyentşa buacuafjéngcá; tşèngaftanga, chë mo betiyiñe jena buacuafjéngcá şmognènga, cha cach ndoñe quecmochátaperdonaye, chábeñe oşbuáchiyana şmojtşajbanase.

<sup>22</sup>Bètscá şmochtsejuabnaye Bèngbe Bètsá puerte tşabia yomnama, pero cha tşatjayá yomnámna şmochtsejuabnaye; tşatjayá endmèna chë bacna soyènga tmojtşamèngaftaca, pero tşèngaftangaftacna puerte tşabia. Cha tşèngaftangaftaca chca echántsemna, tşèngaftanga chca chaşmojtşomerecèñentscuana; pero ndóñesna, Bèngbe Bètsá echanjama tşèngaftángnaca mo buacuetëtşenëfjéngcá chaşmoquedama, chë tşabe bendicionènga Bèngbe Bètsábentşana ntsoyèngacañcá. <sup>23</sup>Y ntşamo mora imojtsejuabnacá chë judiènga tmojatrocá y tmojontşe Jesucristbeñe jtsoşbuáchiyana, chéngnaca cachiñe chë tşabe bendicionènga Bèngbe Bètsábentşana mochánjóyèngacñe, y mochántsemna mo betiyiñe jena buacuafjéngcá, er Bèngbe Bètsá becá obenana endbmna jamama ntşamo chë judiènga tempo imojanbmncá cachiñe chamotsatsbmnama. <sup>24</sup>Chcasna, más paselo jtsemnana canye jena olivo betiyentşa buacuatëtşenëfja cach betiyiñe jétsjena, y ndoñe, chë tjoca olivos betiyentşa buacuafja canye jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsanoşbuaché judièngbiana, jóntşana jtsoşbuáchiyana y tşabe bendicionènga Bèngbe Bètsábentşana jóyèngacñana, tşèngaftanga ndoñe judiènga

chë tempo Bëngbe Bëtsá ndoñe  
šmonjanábuatmëngbiana.

**Bëngbe Bëtsá nyëtscángaftaca  
puerte tsábia endmëna**

<sup>25</sup> Jesucristbeyeca catšátanga,  
atše séntseboše tsëngaftanga  
chašmotsetátšëmbo chë tempo  
Bëngbe Bëtsá entšanga ndoñe  
tonjaninÿanyé soyëngama. Atše  
séntseboše tsëngaftanga quem  
soyëngama chašmotsetátšëmbo, chca,  
tsëngaftanga ndoñe judiënga chë  
judiëngbiana más uámanënga šmomna  
ca ndoñe chašmondétsejuabnama.  
Ndayá Bëngbe Bëtsá tempo entšanga  
ndoñe tonjaninÿanyecá, quem  
soye endmëna: Bëngbe Bëtsá  
tojalesenciá, nÿe baseftatescama  
banga Israeloquënga Bëngbe  
Bëtsabe soyënga ainaniñe ndoñe  
chamondóyëngacñama; pero chca  
echántsemna, chë ndoñe judiënguentše  
atsebácanënga jtsamnama imomnënga,  
atsebácanënga chamojtsemnëntscuana.  
<sup>26</sup> Chca chaojopasá ora, nyëtscá  
Israelentša entšanga atsebácanënga  
mochántsemna; ntšamo Bëngbe  
Bëtsabe uabemana palabrenguiñe  
endayancá:

Entšangbe atsebacyá Israelocana  
echanjabo,  
y echanjama nyëtscá  
Jacóbëbentšana entšanga ndoñe  
más vida chamondétsebomna,  
bacna soyënga jtsamëse ca.

<sup>27</sup> Y mëntšá endmëna ntšamo  
chëngbiana chjašebuachená:  
chënga játsebacana, chëngbe  
bacna soyëngama  
chajjaperdónaye ora ca —chiñe  
endayana.

<sup>28</sup> Chë tsábe noticiënga  
tmojtsanaboté causa, judiënga Bëngbe  
Bëtsabe uayayënga mondmëna,

chca, tsëngaftangbe tsábiana  
chaotsemnama. Pero Bëngbe Bëtsá  
tojánabacacayeca, chëngnaca  
Bëngbe Bëtsabe bonshánënga  
mondmëna, er Bëngbe Bëtsá chëngbe  
tempca uámana bëtš taitanga  
chca tojanašebuachená. <sup>29</sup> Chca  
endmëna, er Bëngbe Bëtsá ndocna  
te juabna ntjatrócana; nyëtscanga  
chabe entšanga chamotsemnama  
tojáchembënga, nyëtš tempo cha  
echántsababuanÿeshana, y echanjama  
chëngbeñe tsábe bendicionënga  
chaotsemnama. <sup>30</sup> Tsëngaftanga ndoñe  
judiënga tempo ndoñe šmonjánama  
ntšamo Bëngbe Bëtsá inabošcá; y  
mora, Bëngbe Bëtsá tcmojalastemá,  
judiënga Bëngbe Bëtsá ndoñe  
tmonjoyeuná causa. <sup>31</sup> Cachcá, Bëngbe  
Bëtsá tsëngaftanga tcmojalastemama,  
judiënga montsemna chë Bëngbe  
Bëtsá ndoñe montsobedecënënga,  
chca, Bëngbe Bëtsá chëngnaca  
cháualastemama. <sup>32</sup> Er Bëngbe Bëtsá  
tojinÿanyé, cha ndoñe ntjoyeunayama  
juabnéngaca nyëtscanga mandánënga  
imomnama, chca, nyëtscanga  
jálastemama cha jobenayama.

<sup>33</sup> iNdegombre, Bëngbe Bëtsá  
nyëtscangbiana puerte tsábia  
endmëna, puerte osertaná y puerte  
obiashjachá! Ndocná quenátobena  
ínÿenga jábuayenama ndayá Bëngbe  
Bëtsá jamama inetsejuabnycá, y  
ndocná quenátobena corente  
josértana ntšamo cha inetsamcá.

<sup>34</sup> Ntšamo Bëngbe Bëtsabe uabemana  
palabrenguiñe endayancá:  
Ndocná quenátstatšëmbo ntšamo  
Bëngbe Bëtsá inetsejuabnycá;  
ndocná quenátobena cha  
jábuayenama ndayá jamana  
ibomnama.

<sup>35</sup> Ndocná quenátobena ndayánaca  
cha natsana jshatšetayana, chë

tbojatšetabiamá ndebená cha  
jatsmënama,  
y chë ndebénama ndayánaca  
jtoyiyama chabotsemnana ca.  
<sup>36</sup>Er lempe cha tojama, lempe cha  
iútabna, y lempe chabiamá yomna.  
iNÿetscanga nÿetsca tescama cha  
chamotsatschuaná! Chca chaotsemna.

**Ntšamo jtsiyenëse Bëngbe  
Bëtsá jtseservénama**

**12** <sup>1</sup>Chcasna, Jesucristbeyeca  
catsátanga, Bëngbe Bëtsá  
bënga ba soye šojalastemáyeca, puerte  
cbontsaimpadana, tšëngaftanga  
Bëngbe Bëtsá chašmëyana tša  
šmojtseboše lempe jamana chábioye  
jadórama ca, Bëngbe Bëtsá  
jadórama mo ndayá cuafjobacá  
y cuafjuatšëmboncá, mo cabá  
ainá cuafsomñcá. Šmochjauyana  
tšëngaftanga sempre šmochtsentsëna  
cha servénana y jtsamëse cha  
tšabá bëngaftaca chaotsemnana.  
As, chca chašmojtsama ora,  
ndegombre oyejuayá Bëngbe Bëtsá  
šmochántsebiamnaye. <sup>2</sup>Ndoñe  
šmattsiyena jtsamëse chë nÿe  
quem luarama enójuabnaye entšanga  
monduamancá, y šmochjaleséncia  
Bëngbe Bëtsá mo tsëm entšangcá  
chácmbiamama, tšëngaftangbe  
ainana y juabna mo tsëmcá chaomëse.  
Chca, tšëngaftanga šmochanjobenaye  
jtsejuabnayana y šmochántsetatšëmbo  
ntšamo Bëngbe Bëtsá yobošcá:  
ndayá tšabá yomna, chë ndayá cha  
oyejuayá ibnabema, y ndayá ya ndoñe  
yondopodena más tšabá jtsemnana.  
<sup>3</sup>Ndayá Bëngbe Bëtsá atšbiamá tšabá  
jtsejuabnayëse šojatšetama, nÿetsca  
tšëngaftanga cbochjáuayana, ndocná  
cachabiamá chaondëtsjuabná más  
uamaná yomna ca, nÿe ntsachetšá  
jtšenójuabnayana ibomna nÿetšá.

Más tšabá, cada ona cachabiamá  
tšabá chaotsenojuabná, y chca  
chaotsenojuabná ntšamo chabe  
ošbuáchiyana yomncá, chca, chë  
Bëngbe Bëtsá tbojatšetá ošbuáchiyana  
chabiamá chaotsetrabájama. <sup>4</sup>Er,  
ntšamo bënga cada ona mondbomna  
canÿe cuerpo y chë cuerpiñe ba  
soyënga jtsebomnana, y nÿetsca  
soyënga ndoñe cach soyama cuerpiñe  
ntososervénana, <sup>5</sup>cachcá bënga  
ošbuáchiyënga, masque bëtscanga  
imomna, Crístoftaca cánÿiñe mo  
canÿacá mondménayeca, bënga  
mondmëna mo chabe cuerpo  
cuafsemncá, y cada ona cánÿiñe mo  
canÿacá nÿetscángaftaca.

<sup>6</sup>Bëngbe Bëtsá tojama bënga cada  
ona chamotsebomnana ndoñe cachca  
chabe tšetana obenana, ntšamo  
Bëngbe Bëtsá cada ona bëngbe  
tšabiamá inajuabnycá. Y chabe  
juábna bënga jtsóyebuambnayama  
jtsobenama Bëngbe Bëtsá tojamëse,  
chca mochtsama ntsachetšá chábeñe  
bëngbe ošbuáchiyana yomncá.  
<sup>7</sup>Ošbuáchiyënga bëtscá jasérviamá  
bënga chamotsobenama Bëngbe  
Bëtsá tojamëse, chca mochtsama.  
Tšabá jtsabuátambayama bënga  
chamotsobenama Bëngbe Bëtsá  
tojamëse, chca mochtsama. <sup>8</sup>Inÿenga  
jañémuama bënga chamotsobenama  
Bëngbe Bëtsá tojamëse, chca šontsamna.  
Lempe ntšamo bënga tmobomncá  
inÿengbiámna chaotsemnana bënga  
jamama chamotsobenama Bëngbe  
Bëtsá tojamëse, nÿets ainánaca chca  
šontsamna. Amëndayënga jtsemnana  
bënga chamotsobenama Bëngbe  
Bëtsá tojamëse, šontsamna bëtscá  
jamana tšabá jtsamëndayama. Inÿenga  
jálastemama bënga chamotsobenama  
Bëngbe Bëtsá tojamëse, šontsamna  
oyejuayënga chca jamana.

**Ntšamo bēnga Jesucristbeñe  
ošbuáchiyēnga jtsamana šojtsamna**

<sup>9</sup>Inya chašmojtsebobonshana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama.

<sup>10</sup>Cmontsamna nyetscanga puerte jtsenbobonshánana, Jesucristbeyeca catšátanga quetsomñecá, chē ínýenga bēngbiana más uámanēnga imomna ca jtsejuabnayēse.

<sup>11</sup>Ndoñe oyēnjayēnga šmattsemna, ndayá bētská Bēngbe Utabnabiana šmochtsetrabájaye; ainaniñe corente añemo jtsebomñese, Bēngbe Utabná sempre šmochtseservena.

<sup>12</sup>Tšēngaftanga Bēngbe Bētsábeñe jtsošbuáchiyēse, chábeñe šmobatmánayeca, puerte oyejuayēnga šmochtsemna; padecena soyēnguiñe chašmojtsachñējuana ora, puerte uantadēnga šmochtsemna, y sempre Bēngbe Bētsáftaca šmochtsencuéntaye.

<sup>13</sup>Bēngbe Bētsabe entšanga opresido bomñēnga šmochjújabuache, y šmochtseprontana tšēngaftangbe yebnentše posada ínýenga júyentšamiama.

<sup>14</sup>Bēngbe Bētsá šmochtseimpadana, chē tšēngaftanga chašmosufrima amēngbiana tšabe bendicionēnga cha chaotsamama; aññe, cha šmochjaimpáda tšabe bendicionēnga chēngbiana chaotsamama, bacna soyēnga ndoñe.

<sup>15</sup>Oyejuayēnga ínýengaftaca šmochtsemna, chēnga oyejuayēnga chamojtsemna ora; ngmēnaca šmochtsemna, ínýenga ngmēniñe chamojtsemna ora.

<sup>16</sup>Šmochtsiyena nyetscanga jtsenēyeunanēse. Nye cach

tšēngaftanga uámanēnga ndoñe šmattsenobiamnaye, sinó chē nduámanēnga imomñēngaftaca tšabá mándbomñēnga šmochtsemna. Ndoñe šmattsejuabnaye yapa osertánēnga šmomna ca.

<sup>17</sup>Inýenga bacá chacmojtsaborlana ora, ndoñe šmattsatēchēnanguaye; corente šmochtsentšena ntšamo nyetsca entšangbiana tšabá yomncá jtsamama. <sup>18</sup>Ntsachetšá šmjobenacá, lempe šmochtsama natjēmbana nyetsca entšāngaftaca jtsiyenama. <sup>19</sup>Atšbe bonshánēnga, ínýenga bacá chacmojtsaborlana ora, ndoñe šmatjama chēnga chē causa chamotsesufrínama, ndayá Bēngbe Bētsá šmochjaleséncia chēnga cháucastigama; er Bēngbe Bētsabe uabemana palabrenguiñe cha tojánayana: “Atše chanjama chēnga chamosufrima, ínýenga chamosufrima tmojama causa; y chēnga chanjácastigaye, ínýengbioye bacá tmojaborlá causa ca.” <sup>20</sup>Chca játamamna, mēntšá šmochjama, ntšamo cachánaca tojanayancá:

Acbe uayayá tbojtseshēntsanēse,  
saná cochjacaredáda,  
y tbojtsajuendase, cochjuáfšiye.  
Chca chacojamēse, cochanjama  
cha puerte chaotsēuatja ntšamo  
tcmojaborlama,  
y ainana corente chabotsetšena,  
mo chebana iñbēnga chabe  
bestšasiñe cuafjacjáca ca.

<sup>21</sup>Ndoñe šmatjaleséncia, ntšamo ndoñe tšabá tontsemncá tšēngaftanga chacmayēñanama. Chamna, ntšamo tšabá yomncá jtsamēse, chē ndoñe tšabe soye šmochjayēñaná.

**13** <sup>1</sup>Nyetsca entšanga entsamna jtsamana ntšamo chē améndayēnga tmojtsamēndacá, er ndocná obenana ntsebomnana,

Bëngbe Bëtsá ndoñe chca tbonjalesenciase, y nÿe Bëngbe Bëtsá tojama améndayënga obenana chamotsebomnama. <sup>2</sup> Chca, chë améndayëngbe contra tmojtsemnëngna, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna; <sup>3</sup> er ntšamo tšabá yomncá amënga, ndoñe quenátamna ndayama chë améndayënga jatebéuatjana, nÿe chë bacna soye amëngna aíñe. Tšëngaftanga šmojtseboše jtšiyenama chë améndayëngbioye ntjatebéuatjácá; chcasna, ntšamo tšabá yomncá šmochtsama, y chë améndayëngna tšabe bomínÿeca mochantsonÿaye ntšamo chašmojtsamcá; <sup>4</sup> er chë améndayëngna Bëngbe Bëtsabe trabajo amënga mondmëna, tšëngaftangbe tšabiama. Pero bacna soyënga šmojtsamëсна, cmontsamna jtšiyenana chë améndayënga jtsebëuatjëse, er chënga jacastígama obenana mondbomna, y chca mondbétsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. <sup>5</sup> Chÿyeca, jtseytana ntšamo chë améndayënga tmojtsichamcá jtsamana, pero ndoñe nÿe chë castigo ndoñe chašmondétsebomnama, ndoñe chca šmontsama causa, sinó chë ainanentša tšabe juabnënga ntšamo tbojtsëtsësnacá joyeunayama yómnayeca. <sup>6</sup> Cachca soyëngama, améndayëngbiana impuesto tšëngaftanga jtšatsquécjnyana; er chë améndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšëna ora.

<sup>7</sup> Chcasna, tšëngaftanga šmochjáyentšbuachiye ntšamo chënga jtsebomnama tojtsamncá.

Chë crocénana entšanga ayëngacayëngbioye, ndaye impuéstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

<sup>8</sup> Crocénana inÿa jëtsëntšabuáchiyama chacmojtsamnëse, nÿe ntoyiyá ndoñe šmatjoquéda, nÿets tempo ndebëngna; nÿe quem soye sempre šmochtsama: nÿetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyíñe yomandancá.

<sup>9</sup> Quem mandënga, “acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, inÿa tojtsebomna soye ndoñe nÿe acbiama cattseboše”, y chë inÿe mandënga leyíñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”.

<sup>10</sup> Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyíñe yomandancá.

<sup>11</sup> Chë soyënga cmontsamna jtsamana, er bënga mondéatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jasérviana jtsentšëñëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontšë ora enjamnama. <sup>12</sup> Mora bënga mondoyena canÿe luarentšë bëtscá bacna soyëngaca y ngmenánaca, y chca jtsemnana mo bënga nÿets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama

y binÿniñe ya jontšamcá. Chýyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyënjanama bënga jtseprontánëse, mo canÿe soldado jenéúyanama y inÿa jáyënjanama ba soyënga tojenocjacá. <sup>13</sup>Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínÿengbiana lempe chaotsinÿnëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsobencá chca soyënga ndoñe ntsamana, nÿetscanga ndoñe cachcá ntsejuabnayama ndoñe ntsamana y ndoñe ínÿenga yapa ntsiyentšbuašana. <sup>14</sup>Chca játamamna, šmochtsiyena jtsamëse ntšamo Bëngbe Utabná Jesucristo endbetsamcá, y ndoñe nÿe šmatjésejuabnaye jtsamana nÿe cach tšëngaftanga tšabá jtsomñama juabnéngaca, ndayá tšëngaftanga chašmotsamama chë juabnénguiñe tojtsemncá.

**Ndoñe šmattsóyebuambnaye  
inÿe ošbuáchiyëngbe contra**

**14** <sup>1</sup>Chë Jesucristbeñe nÿe batšatema ošbuáchiyënga tšabá šmochjúbuaja, y chëngaftaca ndoñe šmattsenatsësnaye ndayá aínë o ndoñe jamana yontsamnama. <sup>2</sup>Er básefta ošbuáchiyënga corente imotátšëmbo chënga nÿe ndayánaca jasama imobenama, pero chë Jesucristbeñe nÿe batšatema ošbuáchiyëngna, ndocna mëntšena ntesayana, er chënga jtsejuabnayana aínë jasana canÿe bacna soye nántsemna ca. <sup>3</sup>Chë nÿetsca saná sayënga ndoñe chamondëtsejuabná chë inÿe soyënga

ndoñe mondëtseyëngbiana, chë causa chënga más batšá uámanënga imomna ca; y chë ndaye soyënga ndoñe mondëtseyëngna, chë nÿetsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá. <sup>4</sup>Tšëngaftanga ndoñe quecmátamna chë ínÿabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup>Báseftanga mondmëna, chënga jtsejuabnayana canÿe te inÿe tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yujuabnacá ndáyeca chca ca. <sup>6</sup>Nda tojtsejuabná canÿe te inÿe tescama más uámana te yomna ca, chca jamana Bëngbe Utabnábiama jtenójuaboyama. Y nda nÿetsca saná tojtsesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnábiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup>Bënga ošbuáchiyënguentšana ndocná ainá ntsemnana nÿe cachabiana, ni jóbanana nÿe cachabiana. <sup>8</sup>Bënga tmojtсийenëse, Bëngbe Utabnábiama jtsiyenana; y tmojóbanëсна, Bëngbe Utabnábiama jóbanana. Chca, masque ainënga o obanënga, bënga Bëngbe Utabnábënga



jtsemnana. <sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainéngbeñe y chë ya tmojóbanéngbeñe chaotsemándama.

<sup>10</sup> As, ¿ndáyeca tséngaftanguentse báseftanga, catsátangbe contra jtsóyebuambnayana, ndayá chénga tmojtsamama? ¿Y ndáyeca ínýenga tséngaftanguentse jtsichámuana, catsátanga ndoñe uámanénga montsemna ca, ndayá chénga tmojtsamama? Er nyetscanga šontsamna Bëngbe Bëtsabe delante jashjanguana, ntšamo cada ona tojéftsemcá tsábá o ndoñe tsábá bétsemnana cha cháuyanama.

<sup>11</sup> Er Bëngbe Bëtsabe uabemana palabrénguine Bëngbe Utabná méntšá tojánayana:

Ndegombre atše ainá sëndétsomñe,  
y chíyeca atše šcojurá,  
nyetscanga atšbe delante  
mochanjshéntsaméntša atše  
jadórama,  
y nyetscanga šmochanjauyana,  
“ndegombre aca Bëngbe Bëtsá  
condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

**Ndoñe šmatjama inýe  
ošbuáchiyënga bacna  
benachiñe chamótsatšama**

<sup>13</sup> Chíyeca, ya ndoñe quešnátamna ínýengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catsáta, chaojuabó y bacna soyënga chaoma. <sup>14</sup> Atše sëndétatšëmbo, mo canýa Bëngbe Utabnáftaca cánýiñe mo canýacá quetsomñecá, ndocna

soye yondmëna, nýe cachabe ponto chaotsemna ndoñe tsábe soye. Pero canýe entšá tojtsejuabná ndayánaca ndoñe tsábe soye yondmëna ca, ni jasama, ni jabojuama, chabiama cocayé chë soye nyets tempo jéftsemnana ndoñe tsábe soye. <sup>15</sup> Tséngaftanga inýa becá šmojtsatsëtsná, inýe soyënga tsábá endmëna jasama ca, y cha tojtsejuabná, chca soyënga jasama ndoñe tsábá yondmëna ca, pero tséngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tséngaftanga jtsinýanýnayana ndoñe šmondoyena jtsamëse chë ínýenga jtsababuánýeshanëse. Nýe tséngaftanga inýe soyënga šmétsesayama ndoñe šmatjaleséncia chë soye chaoma inýa, ndabiama Cristo tojanóbana, chë ndoñe ndegombre benachiñe chaoquedama. <sup>16</sup> Ndoñe šmatjaleséncia ndayá tséngaftanga tsábá šmétsamama, ínýenga ndoñe tsábá tséngaftangbiama chamotsóyebuambnama. Chca šmochanjobenaye, ntšamo šmojtsamcá jtsajbanase, ínýenga ndoñe tsábá tmontsoyebuambná ora. <sup>17</sup> Bëngbe Bëtsabe améndayana bëngbeñe ndoñe quenátsmëna inýe soyënga añe jasana o inýe soyënga ndoñe, canýe soye añe jofsiyana o inýe soye ndoñe. Pero chabe améndayana bëngbeñe añe endmëna jtsamana soyënga ndayama Bëngbe Bëtsá tojayana añe tsábá jamama yomna ca, cháftaca tempcá tsábá jtsatsmënana y ainaniñe oyejuayana jtsebomnana; y Uámana Espíritbeyeca bënga jobenayana chca jamana. <sup>18</sup> Y nda Crístbïoye chca tbojtseserverna, jamana Bëngbe Bëtsá cháftaca oyejuayá chaotsemnana, y entšangbe bominýiñe tsábía jtsemnana.

<sup>19</sup> Sempre šontsamna tšabe soyënga jtsamana y chë soyëngaca chaopodé jamana nyëtscanga natjëmbana chamotsiyenama, y ndaye sóynaca šmochtsama, ndayá ínyënga chaújabuache Jesucristbeñe corente jtsošbuáchiyama y ainaniñe bëtsá añemo jtsebmnama. <sup>20</sup> Tšëngaftanga ndaye sanánaca jasama šmobéyeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nyëtsca sananga tšabá jasama endmëna; pero ndayá tšëngaftanga šmojasama, inya bacna benachiñe chaótsatšama šmojamëse, chë soye cocayé ndoñe tšabá ntsemnana.

<sup>21</sup> Tšabá endmëna mëntšena ndoñe ntjasana, vínoye ndoñe ntjofsiyana o ndayánaca ndoñe ntjamana, pero chë soye añe ttojama ora, Jesucristbeyeca canye catšata chaojuaboma y bacna soye chaomama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nyë Bëngbe Bëtsá y tšëngaftangaftaca chaotsemna. Canye entšá ndegombre oyejuayá jtsemnana, canye soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebmñese. <sup>23</sup> Pero canye entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye añe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

**Ntšamo ínyëngbiama tšabá tojtsemncá mochtsama, ndoñe nyë bëngbiama**

**15** <sup>1</sup> Bënga, chë Jesucristbeñe corente ošbuáchiyënga,

šontsamna chë nyë batšatema ošbuáchiyënga jujabuáchana, chënga bacna soyënga tmojtšama ora, nyë batšá ošbuáchiyana bomna causa; y ndoñe nyë jatsënguayana nyë ndaye soyëngaca yopodena bënga tšabá jtsemnana. <sup>2</sup> Cada ona bënga šontsamna jamana ntšamo cach bëngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtscá Jesucristbeñe chaotsošbuáchema, y ainaniñe más añemo chaotsebmnama. <sup>3</sup> Er Cristo, ntšamo tojanmcá cach ndoñe tonjanma nyë cha oyejuayá jtsemnana. Inyëtšá, cháftaca tojanopasá ntšamo Bëngbe Bëtsabe uabemana palabrénguñie endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.” <sup>4</sup> Er lempe ntšamo tempo Bëngbe Bëtsabe uabemana palabrénguñie tmojanabemcá, bënga jabaúatambama endmëna. Ndayá bënga chiñe tmojuatsjínýama, bënga jtsoebenana padecena soyënguñie tmojtsachñëjuana ora uantadënga jtsemnana, y ainaniñe más añemo jtsebmnama; y chíyeca bënga montsobena, chábeñe jobátmana, ntšamo tojanayancá chaomama. <sup>5</sup> Atše, Bëngbe Bëtsá séntseimpadana, nda inétsama bënga padecena soyënguñie uantadënga chamotsemnana, y nda inétsama bënga ainaniñe más añemo chamotsebmnama, cha chaoma nyëtscanga canye juabna chašmotsebmnama, ntšamo Cristo Jesús yojanjuabnacá tšëngaftanga jtsejuabnayëse; <sup>6</sup> cha chca chaoma, nyëtsca tšëngaftanga mo cányñie cuaftsemncá, y mo nyëtscanga canye

ora cuafjayancá, Bèngbe Bètsá, Bèngbe Utabná Jesucristbe Taitá, puerte bètsá y uamaná yomnama chašmuinñanyema.

**Chè ndoñe judièngbiámnaca chë tšabe noticiènga jtsemnana**

<sup>7</sup>Njètscanga oyejuayènga šmochjenofja, ntšamo Crístnaca tšèngaftanga tmojanèbuajcá, chca, entšanga chamuinñanyé Bèngbe Bètsá puerte bètsá y obená yomnama. <sup>8</sup>Atše séntseboše ndayá jayanana, Cristo tojánabo judiènga jabáserviama ca, chca, jinñanyiyama Bèngbe Bètsá sempre inétsamama ntšamo tojašebuachenacá; tojánabo ntšamo Bèngbe Bètsá bèngbe tempsca uámana bèts taitanga tojanašebuachenacá chaocumplima; <sup>9</sup>y Bèngbe Bètsá puerte bètsá yomna ca chë ndoñe judièngnaca chamuayanámnaca, cha chènga inétsalastemanama, ntšamo Bèngbe Bètsabe uabemana palabrènguiñe endayancá, y chca tojanocumplí:

Chíyeca, atše chë ndoñe judièngbeñe chaitsemna ora, aca cbochantsatschuanaye, Bèngbe Bètsá;  
y jacántase chanjayana aca puerte bètsá y uamaná comna ca.

<sup>10</sup>Inyoca mèntšá endayana:

Puerte oyejuayènga chë ndoñe judiènga šmochtsemna, Bèngbe Bètsabe bocacana entšàngaftaca cánñiñe ca.

<sup>11</sup>Y inyoca mèntšá endayana:

Bèngbe Utabná šmochtsatschuanaye tšèngaftanga ndoñe judiènga, y cha šmochtsatschuanaye njètscaca tšèngaftanga njètš luarènguenache entšanga ca.

<sup>12</sup>Y Isaiásnaca Bèngbe Bètsabe uabemana palabrènguiñe mèntšá tojanábema:

Canya Isaíbe entsanguentšana echanjabo,  
y Bèngbe Bètsá chábioye uamaná bochanjábema, njètš luarènguenache entšanga chaotsaméndama,  
y chènga chábeñe jtsošbuáchiyèse, chábeñe mochantsobátmana tšabe soyènga chèngbiama chaotsamama ca.

<sup>13</sup>Atše, Bèngbe Bètsá séntseimpadana, nda inétsama bènga chábeñe chamotsobátmanama tšabe soyènga bèngbiama chaomama, cha chaoma tšèngaftanga ainaniñe puerte oyejuayènga chašmotsemnana y ainaniñe tšabe ebionana chašmotsebmomna, chábeñe jtsošbuáchiyèse; y Bèngbe Bètsá chca tšèngaftangbiama chaoma, tšèngaftanga cada te más chábeñe chašmotsobátmanama, chë Uámana Espíritbe obenánaca.

<sup>14</sup>Jesucristbeyeca atšbe catsátanga, atše corente sèndétatšëmbo tšèngaftanga puerte tšábenga šmomnana, ndayá cmamnana corente šmotatšëmbuga, y jtsebuayiyayama šmobenámnaca.

<sup>15-16</sup>Quem tsbuanáchañe básefta soyèngama sènjuábema, ntšamo šmatjátsjuabnayama atše ntjatauatjca; chca sènjama, básefta soyèngama chašmuatenójuaboma; y chca séntsobena juabemana, er Bèngbe Bètsá tojama atše chaitsebmomna chë uámana trabajo, Cristo jtseeservénana, chë ndoñe judiènga jtsejabuáchanèse. Atše bachnécá séntsoserverna, Cristo stseserverna ora, entšanga tšabe noticièngama jtsebuayiyayèse; atše chca sèndama chë ndoñe judiènga Jesucristbeñe chamotsobuáchemo, y ndayánaca chamotsamama Bèngbe Bètsá oyejuayá chéngaftaca

chaotsemnama, mo chabiama canÿe uatšëmbonacá. Chcánaca atše sëndama, ndoñe judiënga ndegombre Bëngbe Bëtsábenga chamotsemnama, chë Uámana Espíritbeyeca.

<sup>17</sup>Chca, atše Cristo Jesúseftaca cánÿiñe mo canÿacá quetsomñecá, ndegombre sëntsobena jtsejuabnayana ntšamo Cristo jasérviamo atše sëndamcá, puerte uámana soye yomnama. <sup>18</sup>Atše añemo sëntsebmoma nÿe chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, <sup>19</sup>chë Bëngbe Bëtsabe obenana jinÿanÿiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabojátšase, nÿetsca luarënguëjana Iliria luaróntsoñe, Cristbe tšabe noticiëngama nÿets luarënguenache entsanga tijabuayená. <sup>20</sup>Atše sempre canÿe soye inÿe soyëngama más sënjánboše, y enjamna chë tšabe noticiëngama jábuayenana, entsanga ndocna te Cristbiamama oyebuambnayana tmonjanuena luarënguenache; y chca sënjanma, atše ndoñe játamama inÿa tojanbojátšé trabajo, mo ínÿabe bojátšena yebnentše jajebuama cuafjatontšecá. <sup>21</sup>Ntšamo Bëngbe Bëtsabe uabemana palabrenguñe endayancá, chë tempo Cristbiamama ndoñe tmonjanuenëngbiamama:

Chë ndëmanÿenga tempo ndocná chabiama tonjanabuayená, chënga tšabá mochanjinÿe ntšamo cha yomnana; y chë ndocna te chabiama tmonjouenënga, chabe soyëngama echanjósertaye ca.

**Pablo yojanjuabná Roma  
bëts puebløye jama.**

<sup>22</sup>Y nÿa chë causa, atše ndoñe chiyjobená tšëngaftangbioye jama tšëngaftanga jányama, masque ba soye tsjenøjuabná chøye jama. <sup>23</sup>Pero mora atšbe trabajo quem luarënguñe sënjapochocá y tempscana tšëngaftanga jányama tša sëndánbošeyeca, <sup>24</sup>sëntsejuabná mora añe chjobenaye chøye jama, tšëngaftanga jautsëtsayama, chëjana chaijahnëngo ora, España luarøye chaitšá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmama šmochjuájabuache, y lempe ntšamo chašøtsajabotcá šmochjátšetaye jobenayama Españoløye ayana jtëtóntšama. <sup>25</sup>Morna Jerusalenøye chanjá, choca entsanga Bëngbe Bëtsábenga imomnënga jaujabuáchama; <sup>26</sup>er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yøjtsemna crocénana jájuabana chë Jerusalenoca entsanga, Bëngbe Bëtsábenga imomnënga y ndbomnejëmënga imomnënga jujabuáchama; y oyejuayënga chca tmonjama. <sup>27</sup>Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábiocana tmojanóyëngacñe soyënga ndoñe judiëngnaca chamotsebmomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatšatayëse, chënga vida jtsebmomnama chamotsobenama. <sup>28</sup>Y chca, quem trabajo chaijapochocá ora, y chë ndoñe judiënga ošbuáchiyënga lempe

tmojátbanana chajjáftsayentšbuachiye ora, chanjontsé España y jama, y tšəngaftangbiajana chanjachnəngə tšəngaftanga jáftsanyama, tšəngaftangaftaca baseftaytə jəftsemnama. <sup>29</sup> Atšə corente séntsetatšəmo tšəngaftangbiəye chajjá ora, chjášhango y chjama tšəngaftanga bətsćá tšabe bendicionənga Crístbentšana chamotsebomnama, tondaye chacondətsabuáshebenəntscuana.

<sup>30</sup> Jesucrístbeyeca catšátanga, Bəngbe Utabná Jesucrístbeñe ošbuáchiyənga quetsomñecá, y bənga bonshánana chamotsebomnama chə Uámana Espírítu inétsamayeca, tšəngaftanga cbontsaímpadana, bətsćá chašmotsentšana Bəngbe Bətsá nyets ainánaca jtseímpadánama, ntšamo atšə səndbetseímpadancá, cha atšə chašotsinyenama. <sup>31</sup> Cha šmochtseímpadana chə Judea luaroca ndošbuáchiyənga ndocá chašmondəborlama, y chə Jerusalenoquənga Bəngbe Bətsábənga, tšabá chamóyəngacňama ndayá chənga jujabuáchama chajjáftsayentšbuachiye ora. <sup>32</sup> Y chentšana, y Bəngbe Bətsá chca chaojábəšenəse, atšə chayobená bətsćá oyejuayá tšəngaftangbioca jashjanguana tšəngaftanga jányama, y tšəngaftangaftaca chaitsemna ora, batšá jóchnama chayobená. <sup>33</sup> Atšə, Bəngbe Bətsá séntseímpadana, nda inétsama bənga ainaniñe tšabe ebionana chamotsebomnama, nyetsca tšəngaftangaftaca chaotsemnama. Chca chaotsemna.

#### Ubuátmənga jacheuayama

**16** <sup>1</sup> Atšə séntsebošə tšəngaftanga jáuyanana Febe, Jesucrístbeyeca bəngbe uabena, canyə tšabe entšá endmənama; cha

chə Cencrea puebloca enefjuana ošbuáchiyənga endújabuachana. <sup>2</sup> Tšabá cha šmochjofja, mo canyá Bəngbe Utabnábia quetsomñecá, ntšamo Bəngbe Bətsabe entsanga entsamncá ínəngaftaca jenofjana. Šmochjuájabuache ntšamo tbojtsajabotćá, er cha banga tonjújabuache; átšbioynaca.

<sup>3</sup> Atšbe cuenta Prisca y Aquila šmochjácheuaye, chə átšeftaca tbonjatrabajata, Cristo Jesusbiama oservéniñe. <sup>4</sup> Jobanámna bonjanprontana, atšə jatsbocama, ndoñe chašmondóbama. Atšə chama chata séntsatacheuaná; y ndoñe nyə atšə, sinó nyets luarenache enefjuana ndoñe judiənga ošbuachiyəngnaca chca. <sup>5</sup> Chə ošbuáchiyənga, chə Bəngbe Bətsá jətschuayama chatbe yebnentšə jénefnama imuamanəngnaca, šmochjácheuaye. Atšbe bonshana Epeneto šmochjachuaye; cha endməna chə natsaná Asia luaroca Jesucrístbeñe jtsošbuáchiyama. <sup>6</sup> María šmochjachuaye; cha tšəngaftangbeñe bətsćá tojatrabajá. <sup>7</sup> Chə cach atšćá judeocata Andrónico y Junias šmochjácheuaye. Chata canyə ora átšeftaca cárceloye bonjanətáməna, y Jesucristbe ichmónəngbiama chata puerta uámanata bonjamna, y atšbiamá más natsana tbojanontšə Jesucrístbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšćá cha Bəngbe Utabnáftaca cányiñe mo canyáca bondməna. <sup>9</sup> Urbano šmochjachuaye, chə béngaftaca Crístbiamá oservéniñe trabajayá; y atšbe bonshana Estáquisnaca šmochjachuaye. <sup>10</sup> Apeles šmochjachuaye; cha ba soye tonjinyanýé Jesucrístbeñe puerta yošbuáchema; y Aristóbulbe yebnentšəngnaca šmochjácheuaye.

<sup>11</sup> Chê cach atscá judeocá Herodión šmochjachuaye, y chë Narcisbe pamillentsana Bëngbe Utabnábeñe ošbuachiyëgnaca. <sup>12</sup> Trifena y Trifosa šmochjácheuaye; chata Bëngbe Utabnabiana puerte bondëtrabája; y bëngbe bonshaná Pérsidnaca šmochjachuaye; cha bëtscá endëtrabája, Bëngbe Utabnabiana oservéniñe.

<sup>13</sup> Rufo, chë Bëngbe Utabnabiana uámana trabajayá, šmochjachuaye, y chabe mamánaca; cha mo atšbe mamacá endmëna. <sup>14</sup> Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucrístebeñe ošbuáchiyënga chëngaftaca inmënutanangnaca.

<sup>15</sup> Filólogo y Julia, Nereo y chabe uabena, Olimpas y ñÿetsca Bëngbe Bëtsabe entšanga chëngaftaca inmënutanangnaca šmochjácheuaye.

<sup>16</sup> Ñÿetscanga mo Jesucrístbeyeca catšátanga, jtenámochëse, ntšamo cach tšëngaftangbe pamíllanga puerte bonshánánaca šmondetsacheuanaycá. Ñÿets luarenache enefjuana Crístbeñe ošbuáchiyënga cmontsacheuaná.

<sup>17</sup> Jesucrístbeyeca catšátanga, atšë cbontsaimpadana tšabá šmochjuáfšna y cuedado šmochtsebmna chë cánÿenga ínÿengaftaca contra chamotsemnana y ínÿenga Jesucrístebeñe ošbuáchiyana chamotsajbanama inmëtsamëngbiana; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana.

<sup>18</sup> Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá chähënga tmotsebošcá, ñÿe chähëngbe cuerpama tšabá tojtsemncá; y tšabe y botamana palabrëngaca chë paselo jáingñana yomna entšanga

jáingñana, chëngbe ainaniñe chëngcá chamotsejuabnana. <sup>19</sup> Ñÿetsca entšanga tmojouena, chë Bëngbe Bëtsabe soyëngama ntšamo ínÿenga tmojabuatambacá, tšëngaftanga corente šmnëtsayaunanama, y chíyeca atšë puerte oyejuayá tšëngaftangaftaca séntsemna. Atšë séntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá. <sup>20</sup> Y Bëngbe Bëtsá, nda inëtsama bënga ainaniñe tšabe ebionana chamotsebmna, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšinë cuafjaboshjoncá. Atšë séntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnana.

<sup>21</sup> Timoteo, chë átšëftaca trabajayá, tšëngaftanga cmontsacheuaná; y Lucio, Jasón y Sosípater, cach atscá Judeoquënga, chëngnaca tšëngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñecá.

<sup>23</sup> Gayo cmontsacheuaná; atšë Pablo chabe yebnentšë posada séntsebmna, y cha enduamana ñÿetsca chë muentšä ošbuáchiyënga tšabá júbuajana. Erasto, chë quem pueblentšä crocénana bojanýá, tšëngaftanga cmontsacheuaná, y Jesucrístbeyeca bëngbe catšata Cuártënaca.

<sup>24</sup> Atšë, Bëngbe Utabná Jesucristo séntseimpadana, cha chaoma tšëngaftangbeñe tšabe bendicionënga chaotsemnana. Chca chaotsemna.

**Quem tsbuanácha  
juapochócama, Pablo Bëngbe  
Bëtsábioye tbojtanchúá**

<sup>25</sup>Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchema; y chca, cha echanjama ntšamo chë bënga fsëndabuayiná tšabe noticiënguñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Nÿets tempo méntscoñama, Bëngbe Bëtsá chë soyënga entšanga ndoñe tonjinÿanÿé, y chë causa chënga chë

soye ndoñe ntsetatšëmbuana. <sup>26</sup>Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entšanga chë ndegombre soyëngama chamotsetatšëmbuama; Bëngbe Bëtsá, chë nÿets tempo vida bomná, tojanmandá entšanga nÿets luarënguenache chë ndegombre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

<sup>27</sup>Nÿe canÿe Bëngbe Bëtsá endmëna, y cha nÿets osertánana endbomna. iNÿetscanga chamotsinÿanÿná cha puerte bëtsá y uamaná yomnama, ndayá Jesucristo tojanmama! Chca chaotsemna.

# 1 Corintios

**Pablo chënga jacheuayama**

**1** <sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánÿiñe chë Jesucristbeyeca catšata Sósteneseftaca, <sup>2</sup> quem tsbuanácha séntsabiamná tšëngaftanga chë Corinto bëts puebloca Jesucristbeñe ošbuáchiyëngbiana; ndëmuanyënga Cristo Jesúseftaca Bëngbe Bëtsá tojábiana chabe entšanga ñye chábioye oservënënga, ndëmuanyënga Bëngbe Bëtsá tojáchembo chabe entšanga chašmotsemnama, chë ñye quem luarama enójuabnaye entšanguentsana luarënënga, Bëngbe Utabná Jesucristbioye tmojtšëmbonëngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše séntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebonnama.

**Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebonnama.**

<sup>4</sup> Bëngbe Bëtsá tšëngaftangbiana sempre sëndbëtsatschuanaye, er tšëngaftanga cánÿiñe mo canÿacá Cristo Jesúseftaca šmómnyeyeca,

Bëngbe Bëtsá tšëngaftangbeñe tojajuabó, tšëngaftangbe tšabiana. <sup>5</sup> Chca Crístoftaca šmómnyeyeca, Bëngbe Bëtsá tojama tšëngaftanga chašmotsebonnama chábensana ñyetsca tšabe soyënga, tšëngaftanga obenana chašmotsebonnama cha jamëse, Bëngbe Bëtsabe soyëngama jóyebuambayama y chë soyëngama chacmésertama. <sup>6</sup> Chca, ntšamo cbonjanabuayinacá mo Jesucristbe ndegombre soyëngcá, tšëngaftangnaca ínÿyëngbioye tšabá šmojinÿanyë ndegombre soyënga bëtsemnama, chë ntšamo jtsiyenama. <sup>7</sup> Y chca, Bëngbe Bëtsá chabe entšanga inétsatsatnaye tšabe soyënguentšana tondaye quecmochatabuáshebena, Bëngbe Utabná Jesucristo quem luarentše yochtonÿna tescama Bëngbe Bëtsábeñe jtsošbuáchiyëse chašmojtšobátmanëntscuana. <sup>8</sup> Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebonnama, ndayá tšëngaftangaftaca jamama cha yujuabnacá chaojapochocantscuana; chca, chë Bëngbe Utabná Jesucristo ñyetsca entšangbiana tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. <sup>9</sup> Bëngbe Bëtsá ñyets tempo jtsamana ntšamo tojašebuachenacá, y



cha endmëna nda tcmojánachembo canýiñe mo canýacá chašmotsemnama chabe Uaquíñá Jesucristoftaca, Bëngbe Utabná.

**Choca ošbuachiyëngbeñe  
nyetscanga ndoñe cachcá  
montsanjuabná**

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiana yomnama, tšëngaftanga nyetscanga cachcá chašmotsejuabnama, y tšëngaftangbeñe ndoñe más báseftanga canýe soye y ínýenga inýe soye chamuatsjuabná. Y aíñe šmochtsiyena mo canýacá, nyetscanga cachcá jtsejuabnayëse y cachcá jamama jtsebošëse. <sup>11</sup> Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtsepenzenterama. <sup>12</sup> Ntšamo sëntsichamcá entsemna ndayá tšëngaftangbentšë báseftanga šmojtsichamo: “Atšë Páblëbe ustoná sëndmëna ca”; ínýengna imojtsichamo: “Atšna Apólosbe ustoná sëndmëna ca”; ínýengna: “Atšna Pédrëbe ustoná sëndmëna ca”, y ínýengna: “Atšna Cristbe ustoná sëndmëna ca” imojtsichamo. <sup>13</sup> Chca šmojtsamama, jtsóbocanana mo cada básefta ošbuáchiyënga canýe Cristo tmojtsebomncá. ¿Pablo yojamna nda tmojanrucificá tšëngaftangbe tšabiana? ¿O tšëngaftanga uabáinënga šmomna, atšë jótšëmbonëse, tšëngaftanga atšbe ústonënga bëtsemnama? <sup>14</sup> ¡Bëngbe Bëtsá sëndbëtsatschuanaye atšë ndocná tšëngaftanguentšá tijanábayama; nýe Crispo y Gáybioye aíñe! <sup>15</sup> Chca, ndocná quenátobena jayanana, atšë jótšëmbonëse uabainá cha tojanoquedá

ca, mo átšbeñe ošbuáchiyënga cuaftsemncá. <sup>16</sup> Estéfanasbe pamillentségnaca sënjanëbaye, pero ndoñe quetsatabouínýna inýa tijanábayama. <sup>17</sup> Er Cristo ndoñe chešnatanichmó ínýenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchemo, ndoñe chë atšbe osertánanentšana palabréngama, sinó nýe chë buayenánama, Cristo cruzoca bëngbiana tojanóbanama.

**Crístbeñe yomna Bëngbe Bëtsabe  
obenana y osertánana**

<sup>18</sup> Quem buayenánana, Cristo entšangbiana cruzoca tojanóbanama, chë pochocánënga jtsemnama tmojtsajnëngbioye jtsinýanana mo ndoñe corente juabna bomnëngbe soycá; pero bëngbiana, chë Bëngbe Bëtsá nyetsca tescama šochjátsebacangbiamna, quem buayenánana jtsinýanýnayana Bëngbe Bëtsabe obenana. <sup>19</sup> Ntšamo Bëngbe Bëtsá chabe uabemana palabrénguñe tojanayancá:

Atšë chanjama chë  
tša osertánëngbe  
osertánana tondayama  
chaondëtsošservénama;  
y chanjama chë ba soyëngama  
osertánëngbe osertánana  
tondayama chaondëtsámanama.

<sup>20</sup> ¿Ntsachetšá yojtsámama chë tša osertaná y chë puerte uatsjinýená tbojayana soyënga? ¿Ntsachetšá yojtsámama chë tša tšabá chë soyëngama juabnayá, morscá, y ínýengaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinýanýe,

chë quem luarentša bëts osertánanaca tmojayana soyënga tondaye yonduámanama. <sup>21</sup> Bëngbe Bëtsá, nÿets osertánana bomná quetsomñecá y puerte tsábá jtsejuabnayëse, ndoñe tonjanalesenciá quem luarentša entsãnga cha chamotsábuatmama, chë quem luarentsënga tša osertánënga tmojánayana soyëngama. Chamna, cha tsábá tbojanínÿnana chábeñe ošbuáchiyënga játsebacana chë bënga fsëndabuayiná soyëngama, masque ínÿengbioyna mo ndoñe corente juabna bomnabe soycá jtsinÿanana.

<sup>22</sup> Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama. <sup>23</sup> Pero bëngna Cristbiana entsãnga fsëndabuayiná, chë ínÿënga tmojanrucificabiana. Quem buayenánana chë judiënga ndoñe tsábá ntjéuénanana. Y ndoñe judiënga mondbëtsejuabnaye chca yomna mo canÿe ndoñe corente juabna bomnabe soycá ca; <sup>24</sup> pero bëngbiana, nÿetscanga Bëngbe Bëtsá chabe entsãnga chamotsemnana šojáchembëngbiamna, masque judiënga o ndoñe judiënga, Cristbeñe endmëna nÿets Bëngbe Bëtsabe obenana y osertánana; <sup>25</sup> er ndayá Bëngbe Bëtsá tojanmca, Cristo cruzoca chaóbanama jalesénciase, banga jtsinÿanana mo canÿe ndoñe corente juabna bomnabe soycá, pero ndegombre endmëna canÿe puerte más osertaná tojama soye, lempe ntšamo entsãnga imotatšëmbuama. Y ndayá cha tojamcá masque bångbioye jtsinÿanana mo canÿe tondaye obenabe soycá, ndegombre chë soye jtsinÿanÿnayana Bëngbe Bëtsá puerte más obenana

yobomnana, nÿets obenana ntšamo entsãnga imobomnana.

<sup>26</sup> Jesucristbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entsãnga chašmotsemnana tcmojánachembo ora. Tsëngaftangbentše nÿe báseftanga tša osertánënga šmojamna, ntšamo chë osertánana bomnënga imomnama entsãnga mondbetsejuabnaycá; y báseftanga šmojamna becá mando atšetanënga o uámana pamillentsënga.

<sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama. <sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá ínÿënga imuabotencá; tojanbocacá ndayá tondaye yonduamancá, chca, ndayá quem luarentše tša uamancá tondaye chaondëtsámanama. <sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca. <sup>30</sup> Bëngbe Bëtsá tojama bënga Crísoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tsábënga chabe bominÿiñe chamotsemnana, chabe entsãnga jtsemnana chamobenama, puerte tsábënga cach Bëngbe Bëtsacá, y atsebacánënga chamotsemnana. <sup>31</sup> Y chca, ntšamo Bëngbe Bëtsabe uabemana palabrënguinië endayancá: “Nda tojtseboše jayanama cha canÿe uamaná yomna ca, chamna más tsábá cha bontsemna jayanama Bëngbe Utabná puerte uamaná yomna ca.”

**Ntšamo Pablo Cristo  
crucificanábiamu chënga  
tojanabuayená**

**2** <sup>1</sup>Pero, Jesucristbeyeca atšbe catšátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabréngaca, ni chë tša osertánëngbe palabréngaca. <sup>2</sup>Y tšëngaftangaftaca sënjamna ora, ndoñe quetstétseboše nye ndayínnaca jatsjuabnayana, ndayá nye Jesucristbeñe, nda bëngbe tšabiamu tmojanrucificá. <sup>3</sup>Atše tšëngaftangbeñe sënjamna, mo canya ba soyënga jamama ndobenacá, y mo canya puerte auatjacá y tbojtsengmëmñacá, chabe trabajo jamama ndoñe jobenayama juabnaye causa. <sup>4</sup>Ntšamo cbonjanëtsëtná y cbonjanabuayinacá atše sënjanoyebuambá ndoñe chë tša osertánëngbe palabréngaca, tšëngaftanga jáyënjanama chiñe chašmotsošbuáchema; pero añe tbonjanayënjaná, Bëngbe Bëtsabe Espíritu y chabe obenana tšëngaftanga jinyanýiyëse, <sup>5</sup>chca, tšëngaftanga Bëngbe Bëtsabeñe chašmotsošbuáchema, ndoñe nye entsangbe osertánanaca, sinó Bëngbe Bëtsabe obenanama.

**Uámana Espíritbeyeca, Bëngbe  
Bëtsá jamana entsanga cha  
chamotsábuatmama**

<sup>6</sup>Pero, chë ya tmojashjáchënga Bëngbe Bëtsabeñe puerte jtsošbuáchiyama y chabe soyëngama corente jtsosertánama, chëngbeñe bënga fchandóyeububaye becá osertánana bomna soyënga. Pero ndoñe quenátsmëna quem luarentša entsanga quem tempo

mondbëtsichamo soyënga, ni mora quem luarentše amëndayëngbe soyënga, ndëmuanýënga ndoñe bën y ndocna obenana bomnënga mochanjëftsoquëda. <sup>7</sup>Y añe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbioye baytentscuana ndoñe tonjaninýanyé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nyetsca tescama yomna tšabe vida jtsebmomna. <sup>8</sup>Quem Bëngbe Bëtsabe puerte osertánana bomna soyënga endmëna canye soye ndayá quem luarentša amëndayënga ndoñe ntsësertánana, er chënga añe matënjanësértase, Bëngbe Utabnábioye chënga ndoñe matmënjancrucificá, Bëngbe Utabná nda puerte bëtsá y uamaná yomna. <sup>9</sup>Bëngbe Bëtsabe uabemana palabrénguine quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama  
Bëngbe Bëtsá tojaprontá  
soyënga,

ndocná tonjinýe, ni tonjouena y ni  
mo tonjajuabó ca.

<sup>10</sup>Pero Bëngbe Bëtsá quem soyënga chabe Espíritoftaca bënga šojanýanyé, er chë Espíritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámñaca.

<sup>11</sup>Entšángbeñe ndocná quenátobena jtsetatšëmbuana ndayá entsabe ainaniñe tomnana, sinó nye chë entsabe espíritu, chë chábeñe yomná. Cachcá, nye Bëngbe Bëtsabe Espíritu

jtsetatšëmbuana ndayá Bëngbe Bëtsá tojuabnacá. <sup>12</sup> Y bëngna, Bëngbe Bëtsábíocana Espíritu tmojóyëngacñe, ndoñe canye quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tšabiama cha jtsejuabnayëse. <sup>13</sup> Bënga chë soyëngama fsëndoyebuambná, ndoñe chë quem luarentša entsãngbentšana tifjuatsjinye osertánana bomna palabrëngaca, sinó chë Bëngbe Bëtsabe Espíritu šojabuatambá palabrëngaca. Chca, Bëngbe Bëtsábíocana soyëngama bënga fsëndabuayiyiná, Bëngbe Bëtsabe Espíritbentšana yóbocana palabrëngaca, chë Uámana Espíritu ainaniñe imobomnéngbioye.

<sup>14</sup> Bëngbe Bëtsabe Espíritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbiocana yóbocana soyënga, er chë entsábíama chë soyënga jtsemnana mo canye ndoñe corente juabna bomnabe soyëngcá, y chabosertama cach ndoñe ntsoberenana. Chca endmëna, er entsá jobenayana quem soyëngama jtsetatšëmbuama y josértama, nýe chabe ainaniñe chë Uámana Espíritu tbojtsájabuachanëse. <sup>15</sup> Pero nda aíñe chë Espíritu tbojtsebomna jtsobenana nýetsca soyënga tšabá jinýama chabosertama, y ndocná chë Espíritu ndoñe tbondbomná ntsoberenana josértana ntšamo chë Espíritu bomná yomnama. <sup>16</sup> Er Bëngbe Bëtsabe uabemana palabrënguiñe mëntšá endayana: “Ndocná quenátabatma Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

**Jatrabájama enutanánënga  
Bëngbe Bëtsá jaserviama**

**3** <sup>1</sup> Pero, Jesucristbeyeca atšbe catsátanga, atše ndoñe

chiyatanobená jóyebuambayama, mo tšëngaftanga chë Uámana Espiritoftaca mandánënga šmojatsmëncá, sinó nýe cachënga tšabá jtsomñama juabnënga bomna entsãngbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canye bebmacá, chabe basetémbioye nýe létšiyë jafšiyana y paselo jabmuánama sananga, chë básetema chcana jasama cabá ndoñe ntsoberenana causa, cachcá, atše cbonjanabuatambá Bëngbe Bëtsabiama nýe chë más paselo josértama soyëngama, y ndoñe inye soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tšëngaftanga cabá šmojtsama, nýe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínýëngaftaca cabá yapa šmojtsenántšaboše y nýe ínýëngbioye jayénjanama soyënga šmojtsamëntscuana, tšëngaftanga šmojtsama nýe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nýe quem luarama enójuabnaye entsãngcá. <sup>4</sup> Er canya: “Atše Páblëbe ustoná sëndmëna ca”, y ínýana: “Atše Apólosbe ustoná sëndmëna ca” tojayana ora, chca jtsamana mo chë nýe quem luarama enójuabnaye entsãngcá.

<sup>5</sup> Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nýe Bëngbe Bëtsábíoye oservénata bondmëna, ndátbeyeca tšëngaftanga Jesucristbeñe

šmojtsošbuaché, y bëndata cada ona fsënjama chë Bëngbe Bëtsá šojanÿanyé trabajo. <sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguñe bėjaye cuaftebuešcñacá, enjantrabája cach atše sënjanbojatsé chiñe; pero Bëngbe Bëtsá, ntšamo matatémënga chauájuaama endbetsamcá, tojama banga tšëngaftanguentše Jesucristbeñe chamotsošbuáchema. <sup>7</sup> Ntšamo, chë jená y chë matënguñe bėjaye buešcñayá ndoñe yapa ntšamanana chiñe shajuanënga chaóboconama, nÿe Bëngbe Bëtsá aiñe, cachcá, nda Bëngbe Bëtsabiama entšanga jábuayenama trabajo tojajobjatsé y nda chentšana tojášhango cach trabajuiñe jóntšama, ndoñe ntjamana entšanga Jesucristbeñe chamotsošbuáchema; nÿe Bëngbe Bëtsá chca jamana. <sup>8</sup> Chë jená y chë matiñe bėjaye buešcñayá cach trabajuiñe jtsentšénana, y chatna mo trabajayatcá jtsámanana; y cada ona juácana ntsamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiama oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboconama, y šmondmëna mo chë cha yojtsejebuana bëts yebncá. <sup>10</sup> Er Bëngbe Bëtsá atšbe tšabiama jtsejuabnayëse, chë trabajo šojabonÿé, y atše mo canÿe puerte tšabe jebuanacá, canÿe yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama tšëngaftangbeñe jábuayenama. Chentšana inÿa, mo chë inÿe yebna jebuaná tojajobjatsé jajebuama chiñe más jatsjebuama nda

tojatontšecá, cach atše sënjanbojatsé trabajuiñe tojanontšé. Pero cada ona botamana chaotsantješna ntšamo chë trabajo yojtsamama. <sup>11</sup> Mo chë cánÿabentšana inÿe trabajayacá, ndoñe ntsobenana chë yebna jajebuama tojanbojatsé cha chë yebna chaotsécuatjonama tojanpormañe inÿe soye cachcá chaoservema jatspórmana, cachcá, ndocná chaondëtsabatambá inÿe soyënga, nÿe ntšamo Jesucristbe soyënga yomncá aiñe, chë ntšamo atše natsana sënjanabuatambacá. <sup>12</sup> Chë Jesucristbiama más uamana soyënga buatëmbayá jtsemnana mo chë castellano, midio y inÿe uamana soyëngaca yebna jebuanacá; y chë Jesucristbiama nÿe nduámana soyënga buatëmbayana mo chë niñëbenga, butsjajësha y tëshenjñesheca yebna jebuanacá. <sup>13</sup> Y Cristo chaojésabo te, Bëngbe Bëtsá echanjínÿanÿiye ntšamo cada cánÿabe trabajo yomnana. Cha chë te ññesheca chca echanjínÿanÿiye, y chë ññesheca, Bëngbe Bëtsá echanjinÿe y echanjínÿanÿiye ndaye trabajo cada ona tojamama. <sup>14</sup> Ntšamo cada cánÿabe trabajo yojtsámanama jtsetatšëmbuama Bëngbe Bëtsá chaojinÿe ora, cha chabe trabajo aiñe yojtsámana ca queojayanëse, chë tšabe trabajayá Bëngbe Bëtsábiocana canÿe uacanana soye echanjóyëngacñe, er cha jtsemnana mo canÿe entšacá, nda canÿe yebna tojtsejebuana jtsejuinÿyama ndoñe paselo tondmëna soyëngaca. <sup>15</sup> Pero chë te cánÿabe trabajo nÿe batšá yojtsámanama Bëngbe Bëtsá ññesheca chaojinÿanÿeyese, chora chabe trabajo echántsemna mo chë jtsejuinÿyama paselo tomna soyëngaca jebuanabe soyëngcá, chentšana nÿets yebna jtsejuinÿana. Chë jebuaná jtsachana, pero chabe trabajo lempe jobuétšana. Cachcá, chë

Bëngbe Bëtsabiana trabajo tojtsamá, nÿe batśá oservena trabajo, cha echanjobenaye atsobaná jtsemnana, masque lempe ntśamo tojamcă tondaye queochaisoquéda.

<sup>16</sup> ¿O tşëngaftanga ndoñe şmondétatşëmbo nÿetscanga cânÿiñe Jesucristbeñe oşbuachiyëngcă, mo chë Bëngbe Bëtsabe bëts yebncá şmomnana, y tşëngaftanguentşe Bëngbe Bëtsabe Espiritu yomnana? <sup>17</sup>Nderado nda tojama, tşëngaftanga nÿetscanga cânÿiñe Jesucristbeñe oşbuachiyëngcă jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe oşbuachiyëngcă cânÿiñe imomnënga, jtsemnana mo chë Bëngbe Bëtsabe bëts yebncá, chabe entşanga nÿe chábioye jaserviama; y tşëngaftanga chca şmondmëna.

<sup>18</sup>Ndocná cachá chaondëtsenoíngña. Nderado nda tşëngaftanguentśá tojtsejuabná cha tśa osertaná yomna ca, ntśamo quem luarentśa entşanga mondbëtsejuabnaye ntśamo canÿe puerte osertaná inëtsemnana, cha bontsemna jóbemama mo canÿe ndabiana quem luarentśa entşanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. <sup>19</sup>Er chë quem luarentśa entşanga tśa osertánënga imotátşëmbo soyënga, Bëngbe Bëtsabe bominiñe yomna mo chë corente juabna ndbomnabe soycá. Bëngbe Bëtsabe uabemana palabrenguiñe mëntśá endayana: “Bëngbe Bëtsá chë tśa osertánënga jáyëñanana, ndayá cachënga inÿenga jáingñama tśa osertánánaca tmojtsama soyëngaca ca.” <sup>20</sup>Y mëntśánaca endayana: “Bëngbe Utabná endétatşëmbo chë tśa osertánëngbe juabnënga tondayama

yondoservënama ca.” <sup>21</sup>Chíyeca, ndocná chaondëtsichamo corente uamaná yomna ca, ndaye entşabe ustoná tomnana, er lempe ntśamo şmobomncá, Crístbeñe oşbuáchiyënga bëtsemnana, tşëngaftangbe tşabiana endmëna, y nÿetscanga chë tcmojujabuachëngnaca cachcă.

<sup>22</sup>Lempe tşëngaftangbe soye endëtsumñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentşe yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. <sup>23</sup>Y tşëngaftanga Crístbenga şmondmëna, y Cristna Bëngbe Bëtsábia.

#### Jesucristbe ichmónëngbe trabajo

**4** <sup>1</sup>Entşanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entşángbioye ndoñe tonjaninÿanyë, pero mora aíñe tojinÿanyë soyënga jtsabuátambayama trabajo bomnënga. <sup>2</sup>Chca, nda canÿe trabajo tojtsebojanÿabiamna, chabe mandayá jtsobátmanana cha aíñe tşabe palabra bomná chaotsemnana. <sup>3</sup>Atşbe bariëna, tondaye quenátamana, ntśamo tijamcă şmojinÿe y ndoñe tşabá tijama ca şmojayanëse, o inÿe entşanga cachcă tmojayanëse mo canÿe tribunaliñcă. Ni cach atşe ndoñe chca quetsátama, jtsetatşëmbuana ntśamo atşbe trabajuama tijayancá ndegombre tayojtsemnana. <sup>4</sup>Atşbe ainaniñe ndocna juabna quetsátsbomna atşe chaşuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atşe stsemna

ca. Er Bëngbe Utabná endmëna nda atšbe trabajo yonýa y nda ndegombre yobena jayanama atše tšabá o ndoñe tšabá tijamama. <sup>5</sup> Chífyeca, tšëngaftanga ndoñe quecmátamna jinýana y jayanana ínýenga ndoñe tšabá tmonjama ca, chë nýa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínýañyiye chë iytëmencá yomna soyëngama, mo ibetiñe cuaftsemncá, y botamana echanjínýañyiye, mo binýniñcá, ndayá jamama nýe chëngbe ainanoca entšanga tmojajuabocá. Y chora Bëngbe Bëtsá cada entšabiama echanjayana tšabe soyënga, ntšamo tbojtsomerecencá.

<sup>6</sup> Jesucrístbeyeca atšbe catsátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminýama, y chca sënjama tšëngaftangbe tšabiama, ntšamo bëndata tifjamentšana chašmuatsjínýama jtsiyenana nýe ntšamo Bëngbe Bëtsabe uabemana palabrenguiñe iuayancá, y ndocná tšëngaftanguentšá canýe entšabiama chaotsenábotamnaye, y ínýabiama ndoñe tšabá chauátoyebuambnama. <sup>7</sup> Er, ¿nda chë ínýengbiama más uámanënga tšëngaftanga cmojtsabiamná? ¿Y ndayá šmobomna, Bëngbe Bëtsá ndoñe tcmontjatsatá soye? Y tšëngaftanga chca chašmotsebobmnama cha tojanmëse, ¿ndáyeca šmojtssenabotamná mo Bëngbe Bëtsabe tšetana soyënga ndoñe tontsemncá, y nýe cach tšëngaftangbeyeca šmojonýencá?

<sup>8</sup> Tšëngaftanga šmojtsejuabná ya lempe ntšamo cmëjabotcá Bëngbe Bëtsábíocana šmojtsebobmna ca, y lempe ntšamo jtsebošama šmojtsebobcánaca ca. Mo reyënga

cuaftsemnëngcá cmojtsabiona, bëngbentšana tondaye ntsëjbotocá. Malaye tšëngaftanga mo reyëngcá šmojtsemna, Crístoftaca cánýiñe jtsemándayëse; chca, bëngnaca tšëngaftangaftaca jtsemnama, cánýiñe jtsemándayëse. <sup>9</sup> Atše šontsinýana, bënga chë Cristbe ichmónënga Bëngbe Bëtsá šojábíama mo chë nýetscangbiama más nduamanëngcá, mo chë jóbanama yojtsamna entšangcá. Nýetscanga chë Bëngbe Bëtsá tojábíamënga bëngbioye jtsënyáyana mo ndoñe cachca entšanga fstmncá; angelënga y entšángnaca cachcá bëngaftaca montsama. <sup>10</sup> Bënga, Cristbiama oservena causa, quem luarentša entšangbiama fsëntsinýna mo corente juabna ndbomnëngcá; chë cuenta, tšëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominiñe ndocna obenana ndbomnënga; y tšëngaftangna šmojtsejuabná puerte obenana bomnënga šmomna ca. Tšëngaftangbioye ínýenga puerte uámanënga y bëtsétsanga jtsabíamnayana, pero chënga bëngbioye jtsébuayënjana. <sup>11</sup> Y méntscoñama, bënga šontsabuashebebiana saná, ndayá jofšiyama y entsáyá. Entšanga bëngbioye bacá jtsaborlánana, y tondaye yebna queftsátobomna. <sup>12</sup> Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tšabe bendicionënga chamotsebobmnama. Bënga chamosufrima ínýenga tmojtsama ora, bënga chë soye fchandbëtsoyoyaye. <sup>13</sup> Inýenga bëngbiama bacá tmojtsoyebuambná

ora, jtsababuányeshanése fsënduamana jtējuana. Quem luarentša entsangbe bominyiñe bēnga jtsemnana chē puerte nduámanēnga, mo chē quem luarentša basurēshēngcá, chē quem luarentša entsanga tondayama ndoservēnēnga, mo chē quem luarentša tsengacá; y chca endmēna méntscōñama.

<sup>14</sup> Quem soyēnga ndoñe quecbatēbuabiamná tsēngaftanga chašmotsēuatjama, sinó ndayá jábuayenama mo cach atšbe basengbioycá, atšbe bonshánēnga. <sup>15</sup> Er masque tsēngaftanga mallajta abuátambayēnga chašmotsóboñe, jacúntama ntjobenaycá, Cristbiam chacmotsabuátambama, ndoñe banga quešmátabamna tsēngaftangbiam mo taitangcá, Cristo Jesúsbeñe jtsošbuáchiyama tcmojanéjabuachama. Nye atše sēndmēna mo taitacá tsēngaftangbiam, mo ošbuachiyēngcá, er atše natsana tcbonjanabuayená chē tšabe noticiēnga Jesucristbiam, y tsēngaftanga chiñe šmotsanošbuaché. <sup>16</sup> Chíyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tsēngaftangbioye séntschamná, atšbe bonshaná, canye añe tšabe palabra bomná; Bēngbe Utabnábeñe tojanošbuachéyeca, atše Cristbiam sēnjanbuayiyá ora, mo atšbe uaqiñacánaca cha endmēna, ntšamo chabe ošbuáchiyana yomnama. Cha echanjama tsēngaftanga chašmuatenójuaboma ntšamo atše tsēngaftangbeñe tsjoyenama, Crístbeñe ošbuachiyacá, ndayama atše nyets tempo ošbuáchiyēnga sēndbetsabuatabaycá nyets luare ošbuáchiyēnga enefjuanache. <sup>18</sup> Tsēngaftanguentše báseftanga ya šmojatsjuabná puerte uámanēnga šmojtsemna ca, er šmojtsejuabná atše stsautja tsēngaftangbioye jama

jányama ca. <sup>19</sup> Pero Bēngbe Bētsá chašojalesenciase, séntsobátmána betesco tsēngaftangbioye jama jányama. As chjinye ntsache obenana imobomna chē Bēngbe Bētsabe entsangcá jtsiyenama tša uámanēnga imomna ca juabnayēnga, y ndoñe nye ntšamo jayanama imobencá. <sup>20</sup> Er Bēngbe Bētsá canye ošbuachiyabe ainaniñe tojtsemánda ora, chca jtsinýnana ndoñe nye ntšamo tojtsichámuama, ndayá Bēngbe Bētsabe obenana chábeñe tojtsemnama. <sup>21</sup> ¿Tsēngaftanga ndayá más šmattseboše: atše chayá tsēngaftangbioye jauacánama, o chayá tsēngaftangbioye jányama puerte bonshanánaca y ntsetsatjaycá tsēngaftanga jauyanama?

**Ndayá cuanjama canye boyabása shembásaftaca bacna soye amáftaca**

**5** <sup>1</sup> Ndegombre nyets luariñe entsótatšēmo tsēngaftanguentše yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chē Bēngbe Bētsábioye nduabuátmēnga chca ntsamana: canye entšá cachabe mamamnáftaca bacna soye yojtsama. <sup>2</sup> Y tsēngaftanga cabá šmojatsjuabná corente tšábēnga šmomna ca, masque chca tsēngaftangbeñe yojtsopasánese. Tsēngaftanga cmontsamna puerte ngménaca jtsemnana, tša uabouana soye cha yojtsama causa. Canye entšá chca tojamáftaca, tsēngaftanga cmontsamna jamana cha ndoñe más tsēngaftangaftaca chaondenútanama mo ošbuachiyacá. <sup>3</sup> Y atšna, masque tsēngaftangaftaca choca ndoñe quetsátsmēna, atšbe juabna choca tsēngaftangaftaca entsemna; y chca atšbe espíritoca séntsemnayeca, Bēngbe Utabná šojéftsanatšetá mándoca, sēnjajuabó y



séntsetatsëmbo ntšamo tšëngaftanga cmojtsamnama, chë entšá chca tojamáftaca. <sup>4</sup>Tšëngaftanga chašmojënefjna ora, chentše atšbe espíritoca tšëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca. <sup>5</sup>Y chora tšëngaftanga cmontsamna jamándana chë entšá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatsiñe cha cuafjaboshjoncá, chca, chë quem entšá nye cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbočaná chaotsemnama.

<sup>6</sup>Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canya tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondétatsëmbo, ntšamo chë nye batšá levadura endbama, nyets arninýá chauábochema; cachcá, tšëngaftanguentše canya tša bacna soye chca tojama ora, nyetscangbiama ndoñe tšabe soyënga jóbocnana. <sup>7</sup>Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninýacá, ndocna levadúraca, chë bacna juabnëngaca ya ndëmandánënga šmojtsemnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebmoma. Bashco fiesta ora, oveshá tmojanóba, Israeloca entšanga perdonánënga chamotsemnama. Cachcá Cristo, mo chë oveshacá, tojanóbana bacna

soyënguentšana bënga játsebacama. <sup>8</sup>Ntšamo chë judiënga chë fiesta ora mondbamcá, nyets levadura ojamnana cachcá jonýayana, cachcá, bënga šontsamna jtsajbanana oyenana bacna soyënga ínëngbiama jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nye levadúraca ndëpormana tandëse mondbetsesaycá, cachcá, bënga šontsamna jtsiyenana nyetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnyëse y jtsamëse.

<sup>9</sup>Chë inye atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca. <sup>10</sup>Y chca ndoñe quetstétseboše jáuyanana nya tondayama chašmondëtsoyëbuambná nyetsca chë quem luarentšënga boyabása o shembásaftaca bacna soye amëngaftaca, chë nye cachëngbiama bëtscá soyënga jtsebmomna tša bošëngaftaca y atbëbanëngaftaca, y chë cachëngbe pormana soyënga diosënga yomnma jtsejuabnyëse adorayëngaftaca ca; er nya chca jamamna, tšëngaftanga cmattsamna quem luarentšana jéftsebočanana. <sup>11</sup>Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nye cachabiama bëtscá soyënga jtsebmomna tša tojtseboše, o chë cachabe pormana soyënga diosënga yomnma jtsejuabnyëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entšángaftacna, ni mo šmuatjótbema chëngaftaca cánýiñe jasama. <sup>12-13</sup>Atšë

ndoñe quešnátsmëna jayanana chë ndoşbuáchiyënga, chë béngaftaca ndoñe mondbénutananga, aíñe o ndoñe tşabá tmonjamama. Bëngbe Bëtsá echántsemna nda chëngbiama yochjayana ntşamo tmojamcá tşabá o ndoñe tşabá bétsemnama, tşëngaftanga ndoñe. Ndegombre nÿe chë oşbuáchiyënga tşëngaftangaftaca inménutanangbiama cmontsamna chca jayanana. Chcasna, şmochjama ntşamo Bëngbe Bëtsabe uabemana palabrënguñe endayancá: “Tşëngaftanga cmontsamna, chca bacna soye amá tşëngaftangbentşana jtabocnana ca.”

**Oşbuáchiyënga jendemándama tojtsemna ora**

**6** <sup>1</sup> Canÿe tşëngaftanguentşá oşbuachiyá inÿe oşbuachiyabiama canÿe demanda tojtsebmna ora, ¿cha nanjá chë ndoşbuáchiyënga mandadéngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entşángbioye nanjá chabe demanda chamouenama? <sup>2</sup> Tşëngaftanga ndegombre şmondétatşëmbo, Bëngbe Bëtsabe entşanga mochjayanama quem luarentşa entşangbiama tşabá o ndoñe tşabá tmonjamama. Y chënga quem luarentşa entşangbiama chca jayanama tmojtsobenëse, ¿ndoñe montsobena más base soyëngama chca jayanama? <sup>3</sup> Tşëngaftanga ndegombre şmondétatşëmbo chë angelëngbiámnaca tşabá o ndoñe tşabá tmonjamama bënga mochjayanama. Chcasna, bënga más jtsobenana chë quem luarentşe jëftsiyenama soyëngama chca játayanana. <sup>4</sup> Y chcase, tşëngaftangbeñe chca demandënga chë quem luarentşe jëftsiyenama soyëngama tojtsemna

ora, ¿ndáyeca şmatjátëbuayana chë oşbuáchiyëngbiama tondaye tmontşamana entşanga, chë soyënga chamojandmanama? <sup>5</sup> Chca sënjayana tşëngaftanga chaşmotsëuatjama: ¿O tşëngaftanguentşe ni mo canÿa yondmëna corente osertaná, oşbuachiyëngbeñe demandënga chaojandmanama? <sup>6</sup> Pero ndoñe chca: oşbuachiyëngbeñe demandënga tojtsemna ora, mandadéngbioye jana chë soyënga chamojandmanama. Y chca jamana ndoşbuáchiyënga mandadëngaftaca.

<sup>7</sup> Y tşëngaftangbeñe nÿe demandënga jájandmanama tojtsemna ora, tşëngaftangbiama ya canÿe puerte bacna soye jtsemnana. ¿Ndáyeca ndoñe şmattsóboyaye ínÿenga bacá cmojtsaborlana ora? ¿Ndáyeca ndoñe cachcá şmatjonÿaye ínÿenga cmojtsabiatbëbana ora? <sup>8</sup> Pero cach tşëngaftangaftacna inÿetşá copasana, ínÿengbioye bacá jtsaborlánana y jtsabiatbëbanana, y tşëngaftangcá Crístbeñe oşbuachiyëngbioynaca.

<sup>9</sup> ¿Tşëngaftanga ndoñe şmondétatşëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínÿaftaca íngñayënga, ni chë boyabásenga mo shembasengcá jtsinÿnama boşënga, ni chë boyabásenga inÿe boyabásengaftaca bacna soye amënga, <sup>10</sup> ni chë atbëbanënga, ni chë nÿe cachëngbiama bëtscá soyënga jtsebmna tşa boşënga, ni chë tşa tmoyënga, ni chë uayátseñayënga, ni chë ínÿengbiama bacna soye jtsamëse inmëtsatbëbanënga, chënga

nÿetscanga ndoñe quemochatobenaye Bëngbe Bëtsabe amëndayoye jamashjnama. <sup>11</sup> Y tempo báseftanga tšëngaftanguentsënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebénënga cuaftsemncá; cha tojama tšëngaftanga chabe entšanga chašmotsemnana, nÿe cha chašmotseservénama, y tojama tšëngaftanga mo tšabengcá chabe bominjÿiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espiritu tojamama.

**Bëngbe cuerpo chaotsemna  
Bëngbe Utabná jtseservénama**

<sup>12</sup> Mondbëtsichamo: “Atšbiana entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiana ntsemnana. “Atšbiana entselesenciana ndayánaca jamama ca”, pero ndoñe quichatsleséncia ndaye sóyecnana nÿets tempo mandaná jatsmënana.

<sup>13</sup> Mëntšánaca mondëtsichamo: “Saná uafsbiana y uafsbíá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiana cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiana tšabe bendicionënga chaotsamama.

<sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondétatšëmbo, Crístoftaca

cánÿiñe mo canÿacá šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endménayeca, tšëngaftangbe cuerpo jtsemnana mo Crístbe cuerpentša soycá. ¿Ntšamo atše chjátobena atšbe cuérpoca, chë ndayá yomna mo Crístbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! <sup>16</sup> ¿O tšëngaftanga ndoñe šmondétatšëmbo, canÿe entšá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabrenguiñe boyabása y shembása tbojéninÿenama mëntšá endayana: “Chë útata mo canÿacá bochántsema ca.” <sup>17</sup> Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebomncá.

<sup>18</sup> Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga jtsamana. <sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canÿe yebncá Uámana Espiritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna,

sinó Bèngbe Bètsabe soye. <sup>20</sup> Chca endmèna, er Cristo bènga játsebacama tojanóbana ora, yojamna mo cha bètsá cuafjopagacá tsèngaftanga Bèngbe Bètsábenga chašmotsemnana. Chíyeca, chë tsèngaftangbe cuerpéngaca chašmojtsama soyéngaca šmochtsinÿanÿnaye Bèngbe Bètsá puerte uamaná y bètsá bétsemnana.

#### Jobouamayama jábuayenama

**7** <sup>1</sup> Mora chanjóyebuambaye ndayá tsèngaftanga átšbioye šmojuábobemama. Ndegombre, canÿe šoyabásabiana más tsábá endmèna ndoñe chaondobouamá. <sup>2</sup> Pero choca banga boyabása o shembásaftaca bacna soye amènga imojtsemna causa, tsábá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiana lempe ntšamo jamama ibomncá, boyá bétsemnana; y chabe shémnaca cachcá chabe boyabiana chaoma. <sup>4</sup> Chë shembe cuerpo ndoñe ñye cha cánÿabiana ntsemnana, sinó chabe boyabiámncaca. Cachcá, chë boyabe cuerpo ndoñe ñye cha cánÿabiana ntsemnana, sinó chabe shembíamncaca. <sup>5</sup> Ni boyá, ni shema ndoñe chabondètsejuabná jtsenbiátšbuana. Añe chca copodena, pero ñye chë útata chca básefta tescama tbojenóyeunase, Bèngbe Bètsáftaca jencuéntama jtsentšénama. Pero chentšana chë útata entsamna cachíne cánÿíne jtètsmènanana, chca, Satanás ndoñe chaondobená jamama bacna soye chaócohènguama, cachènga jenomándama ndoñe tmontsobena causa.

<sup>6</sup> Atše chca séntsichamo, tsèngaftanga jábuayenama, ndayá jamama šmojtselesenciana, y chca

ndoñe chašmondétsamama jaméndama. <sup>7</sup> Y atšbe barièna, atšbe juabna entsemna malaye ñyetscanga chë soyènguiñe mo atšcá šmattsemna. Pero Bèngbe Bètsá cada ona obenana tbojatsétá tsabe soyènga jamama, Crístbeñe ošbuáchiyènga jujabuáchama, ínÿenga canÿe soyama, ínÿengna inÿe soyama.

<sup>8</sup> Chë cabá ndbouamnènga y viudanga séntsétsétsná, chèngbiana tsábá yojtsemna ntjobouamaycá joquédana, atšcá. <sup>9</sup> Pero chca jtsemnana cachènga jenomándama ndoñe tmontsobenèse, chènga entsamna jtsóbouamayana, er más tsábá endmèna jtsóbouamayana, y ndoñe ñye boyabásabiana o shembásabiana tša ñyets tempo jésejuabnayana.

<sup>10</sup> Pero chë bouamnènga séntsaménda shema chabe boyábioye ndoñe cachcá chabondetsonÿá. Chca ndoñe ñye atše quetsataménda, ndayá cach Bèngbe Utabná. <sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachíne jtenútanana. Y cachcá, chë boyá ndoñe quebnátsmèna chabe shema cachcá jesonÿayana.

<sup>12</sup> Chë ínÿenga chjáuyana, atšbe juabncá y ndoñe Bèngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá. <sup>13</sup> Nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondètsejuabná cha cachcá jesonÿayana. <sup>14</sup> Er Bèngbe Bètsá

tojama, canÿe shembása ošbuachiyá chabe entšá chaotsemnama, ñe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiama oservena entšacá, cha chéngbeñe mo canÿe pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiama mo chabiama oservena entšacá, cha chéngbeñe mo canÿe pamillécá jatrabájama tojtseboše ora. Er chca ndoñe tontsemñese, chë básenga muántsemna ndošbuachiyatbe básenga, Bëngbe Bëtsáftaca tondaye ndbomñenga. Ndoñe chca yondménayeca, canÿa o ñyets uta bëtsétsatbe ošbuáchiyama, Bëngbe Bëtsá jtsejuabnayana chë básengbiama mo chabe entšangcá.

<sup>15</sup> Pero chë boyá o shema Crístbeñe ndošbuachiyá cachcá jtseónÿayama tša tojtsebošese, chca chaboma. Chora, chë ošbuachiyá ndoñe ntsotocánana chë ññaftaca cachiñe jtëtenútanama, er Bëngbe Bëtsá tcmojáchembo natjémbana chašmotsiyenama. <sup>16</sup> Chca šmochjama, er aca shema ñntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchema, y chca, ats bocaná chaotsemnama? o aca boyá ñntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchema, y chca, ats bocaná chaotsemnama?

<sup>17</sup> Masque ntšámñaca, cada ona chaotsiyena jtsamëse ntšamo chë Bëngbe Utabná tbojatšeta obenana yomncá, cada ona ndayá jamama Bëngbe Bëtsá tbojachembcá. Chca atše ñyets luare ošbuáchiyënga nefjuanenache sëndbëtsamëndaye.

<sup>18</sup> Nderado Bëngbe Bëtsá cánÿabioye tbojachembo, y cha ñnyëngbeyeca chë más delicadentše base bobachtema tëtšená tojtsemna, ntšamo chë judiënga monduamancá, cha ndoñe chaondëtse nobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemñese, cha ndoñe chaondëtsejuabná tëtšená jatsmënana, ntšamo chë judiënga monduamancá.

<sup>19</sup> Er ndayá iuámama, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamama. <sup>20</sup> Cada ona bontsemna jtseyëñana, ntšamo vojoyencá, chabe entšá chaotsemnama Bëngbe Bëtsá tbojanchembo ora.

<sup>21</sup> Bëngbe Bëtsá tcmojanchembo ora, ñyets tempo ñnyabiama oservená cojamñese, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnama, cach acbiama jatrabájama, as chca cochjama.

<sup>22</sup> Er chë ñe ñnyabiama ñyets tempo oservená yojamná, Bëngbe Bëtsá chabe entšá chaotsemnama tbojanchembo ora, cha mora ošbuachiyacá, jtsemnana canÿa ya ndoñe más bacna soyënga jamama juabnéngaca mandaná, sinó Bëngbe Utabnabiama oservená. Cachcá, chë ñe cachabiama trabajayá yojamná, Bëngbe Bëtsá tbojanchembo ora, mora cha ñyets tempo Crístbe oservená jtsemnana. <sup>23</sup> Cristo bëngbiama tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnama. Ndoñe šmatjaleséncia ñe entšangbe juabnéngaca ñyets tempo mandánënga chašmotsemnama, y Bëngbe Bëtsabiama chacmotsebnëtjomba.

<sup>24</sup> Chcasna, Jesucrístbeyeca atšbe catšátanga, cada ona bontsemna

Bëngbe Bëtsáftaca jtsiyenana, ntšamo vojoyencá Bëngbe Bëtsá tbojanchembo ora.

<sup>25</sup> Y chë ndébouamna shembásengbiama, chënga aíñe o ndoñe yontsamna jobouamayamna, atše chama ndoñe Bëngbe Utabnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiama tojanjuabóyeca, entsanga montsobena jtsejuabnayana aíñe tšabe palabra bomná chiñe atše tsmënama. <sup>26</sup> Atše šontsinñana, entsá ibojtsemna jtsomñana nye ntšamo mora yotsomñácá, er bënga mora montsiyena puerte padecena soyënguiñe. <sup>27</sup> Shema tcbomnëse, ndoñe cachcá catjëftsonyaye; y ndoñe tcondbomnësna, ndoñe catjátsënguaye. <sup>28</sup> Tcojobouamase, bacna soye ndoñe quecátama; y nderado canye tobiáše tojobouamase, cach bacna soye ndoñe quenátama. Pero chë tmojt sobouamangna padecena soyënguiñe mochanjoyena quem luarentše chamojéftsemnëntsucana, y atše séntseboše chënga jujabuáchama chca jatiyenama ndoñe chaondétsamnama.

<sup>29</sup> Jesucristbeyeca atšbe catšátanga, ntšamo séntseboše jayanamna mëntšá entsemna: Cristo quem luaroye yochjésabo orscama ya nye batšá entsájamna. Chíyeca, morscana y nyets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentsénana Bëngbe Bëtsabe soyënguiñe, y ndoñe nye chë boumná bëtsemnama tbojtsemna soyënguiñe. <sup>30</sup> Cachcá, chë puerte ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë

puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. <sup>31</sup> Chë quem luarentša soyëngaca jtsiyenama imojtsentsénënga entsamna jtsiyenana mo ndoñe chca tmontsamcá, er quem luare ntšamo bënga mora monduabuatumcá, pronto echanjochnëgo.

<sup>32</sup> Atše séntseboše tšëngaftanga ndoñe chašmondétsenocochinjenama. Canye entsá ndoñe boumná tontsemna ora, jtsobenana jtsentsénana Bëngbe Utabnabe soyëngama jtsejuabnayama, y ntšamo oyejuayá cha jabemama; <sup>33</sup> pero chë boumná nyets tempo jtsenócochinjenana quem luarentša soyëngama, jtsiyenama, y ntšamo chabe shema oyejuayá jtsebomnama; <sup>34</sup> y chca, cha uta soyiñe canye ora jtsentsénana. Chë ndébouamna shembása y chë tobiáše bontsobena jtsentsénana Bëngbe Utabnabe soyënguiñe sempre jtsejuabnayama. Chënga mondobena jtsentsénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inyetsá, chë bouamna shembásana, nyets tempo jesenócochinjenana quem luarentše vida jtsebomnama soyëngama, y ntšamo chabe boyá oyejuayá jtsebomnama.

<sup>35</sup> Atše chca cbontsëtsësná tšëngaftangbe tšabiama, y ndoñe jamëndama ba soyënga jamama ndoñe chašmondétsobenama, ndayá ntšamo tšabá yomncá chašmotsiyenama, y nye Bëngbe Utabná jtseservénama chašmotsentsénama.

<sup>36</sup> Nderado nda tojtsejuabná chabe uatsësnaye tobiášeftaca jtsobouamayama ibojtsemna ca,

chca jamama chë tobiáše ya bëtšá tojtsemnayeca, y chca jamama tšá tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. <sup>37</sup>Pero nderado inÿa, tondaye obligaciönaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe ntsobouamayana tšabá yomna ca, cha tšabá chca jtsamana. <sup>38</sup>Chcasna, chë tobiášeftaca tojtsobouamá chana, canÿe tšabe soye jamana; pero chë ndoñe cháftaca tonjobouamá chana, canÿe más tšabe soye jamana.

<sup>39</sup>Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebomñentscuana; pero chë boyá tojóbanese, cha jtsobenana cachiñe jtobouamayana, nda cha tojtsebošáftaca, pero chca chaoma mo canÿa Bëngbe Utabnáftaca cánÿiñe mo canÿacá quetsomñecá. <sup>40</sup>Pero atše jayanamna, cha más oyejuayá nántsemna ndoñe tontóbuomase; y séntsejuabná, átsnaca tsbomna chë Bëngbe Bëtsabe Espiritu chašotsebuayiynama.

#### Uátšëmbona saná entšangbe pormana soyëngama

**8** <sup>1</sup>Mora chanjóyebuambaye ndayá tšëngaftanga atše šmojatjama, ndayá jtsesayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondétatšëmbo bënga nyëtscanga osertánënga imomnama. Canÿa tbojtsosertana ora, cha nderado nanjájuaboje, chca bëtsemnama puerte uamaná cha yojtsemna ca, pero canÿa,

ínÿenga tojtsababuánÿeshana ora, cha jtsobenana chënga becá jujabuáchana.

<sup>2</sup>Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. <sup>3</sup>Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

<sup>4</sup>Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngamna, atše šcuayana: bënga corente mondétatšëmbo chë chënga imnëtsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. <sup>5</sup>Pero masque celoca y quem luarentše chamomna entšangbiama “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entšangbiama diosënga ca ubuátmënga, y banga bëtš mándoca entšangbiama “utabnënga ca” uabáinënga), <sup>6</sup>bënga chë ošbuáchiyëngbiama nÿe canÿa Bëngbe Bëtsá endmëna, Bëngbe Taitá, ndábentšana nyëtsca soyënga yóbocana, y nÿe nda jtseservënama bënga imoyena. Y nÿe canÿe Utabnánaca endmëna, Jesucristo, ndábeyeca nyëtsca soyënga yomna, y cach bëngnaca imomna.

<sup>7</sup>Pero nyëtsca ošbuáchiyënga ndoñe chca quemátstatšëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojtsesá ora, jtsejuabnayana chca uatšëmbonana bëtsemnama, y ainaniñe juabnënga

jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. <sup>8</sup> Ndegombre, ndayá bënga tmojtsesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aíñe tmojtsesama; ni ndoñe chcanga, ndoñe tmontsesá causa.

<sup>9</sup> Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batsá ošbuáchiyënga y osertánënga, ntšamo tšëngaftanga šmojtsamcá chamuatasmama, y chentšana, chëngbe ainaniñe juabnënga chamotsebomna y chëngbioye chaotsëtsësná ndoñe tšabá tmonjama ca. <sup>10</sup> Er, aca chë soyëngama tatšëmbuá, nderado tcojót'bema jasama canÿe luarentše, canÿe soye ndayama entšanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondétatšëmbo causa, y cha nderado chentše cojtsesama tcmojinÿëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná. <sup>11</sup> Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catsáta, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaotsemnana, er chabe ainanentše

echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama. <sup>12</sup> Jesucristbeyeca acbe catsatbiama chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsëtsná ndoñe chca chaondétsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catsatbiama, ndayá cach Crístbiámnaca. <sup>13</sup> Chíyeca, nderado ndayá atše stsesama, atše tsjama Jesucristbeyeca atšbe catsáta chaoma canÿe soye y chca jamama chabiama canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatšama.

#### Jesucristbe ichmónëngbe derecho

**9** <sup>1</sup> Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnana. Cach ndegombre endmëna, atše canÿe Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóbocna Bëngbe Utabnabiama atšbe trabajuentšana. <sup>2</sup> Masque ínÿenga atšbiama ndoñe quematsjuabná atše canÿe Jesucristbe ichmoná tsmëna ca, tšëngaftangiamna aíñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canÿe ichmoná tsmënama. <sup>3</sup> Mëntšá chanjayana chë atše ndoñe tšabá tijama ca imojtsichámëngbiama:



<sup>4</sup> Ndegombre bënga nyets derecho fsëndëtsóbmñe jtsobátmanama tsëngaftangbentšana, chë tbojujabuáchëngbentšana, bëngbe trabajuama saná o ndayá jofsiyama chašcuacaredadama. <sup>5</sup> Y bëngnaca derecho fsëndëtsóbmñe canye shema ošbuachiyá jtsebmnama y bëngaftaca cha jëftsbtésama inye luaroye fstsajna ora, ntšamo chë Jesucristbe inye ichmónënga, Bëngbe Utabnabe catsátanga y Pédrënaca mondbetsamcá. <sup>6</sup> ¿O nye Bernabé y atše šojtsëtocana cabëndatbe cucuátšëca jatrabájana vida jtsebmnama, y ndoñe derecho fsëntsebmoma ošbuáchiyënga chašotsacuédanama, Bëngbe Bëtsabiana trabájayama? <sup>7</sup> ¿Ndëmua mo canye soldadca tojtsoservená, ndayá tbojtsájabotama cachá nantsatopagana, vida jtsebmnama? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létšiyentšana ndoñe ntjofsiyama. <sup>8</sup> Ntšamo atše muentše sentsichamcá ndoñe nye entsangbe juabna quenátsmëna; y Moisesbe leyíñnaca cachcá endayana, <sup>9</sup> er chabe leyíñe mëntšá endayana: “Aca canye toróftaca shajuana tmojtsatbaná luariñe chacojstetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nye toronga inétsanÿena ca, <sup>10</sup> sinó inye más bëts soye; chca endayana ndayá ndegombre bënga, chë Bëngbe Bëtsabiana soyëngama abuayiynayiñe trabájayënga cha šnetsanÿena ca. Chca tmojanábema bëngbiana, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuantšana batsá

jóyëngacñama. <sup>11</sup> Y chca, bënga chë tsabe noticiëngama tbojábuaenyase, y chca, Bëngbe Bëtsábicocana tsabe bendicionënga chašmotsebmnama bënga tifjama, ndoñe yapa tanandátsmëna tsëngaftanga jótjañana, chë šmobomna soyënguentsana bënga jëftsiyenama chašcuatšatama. <sup>12</sup> Inyënga derecho tmojtsebmoma tsëngaftanga jótjañana chë šmobomnentšana chašmuacaredadama, tsëngaftangbeñe chëngbe trabajuama, as bënga más derecho fstsebmoma chca jamama.

Pero bënga tondaye checbatamëndá, bënga chë derecho bëtsebmomnayece. Chca játamamna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondétsayaunana, bënga chë tsabe noticiënga fstsabuayiyná ora. <sup>13</sup> Tsëngaftanga šmondétatšëmbo, Bëngbe Bëtsabe bëts yebnoca trabájayënga Bëngbe Bëtsabiana oservéniñe, mondbóyëngacñe chënga jasama, ndayá entsanga Bëngbe Bëtsá jadórama chabe bëts yebnoye tmojiyëbo sananguentsana. Y chë Bëngbe Bëtsá jadórama soyënga amënga, altaroca, chë juatšëmbonama luarentše, chënga jasana ndayá chentše tmojuatšëmbona soyënguentsana. <sup>14</sup> Cachcá, Bëngbe Bëtsá tojamandá, chë tsabe noticiënga abuayiynayëngna, vida jtsebmnamna lempe ntšamo tojtsëjbotcá chamóyëngacñe ca, chë tsabe noticiënga abuayiynayama. <sup>15</sup> Pero atše ndocna te chiyaisemandá inyënga chca chašmotsecuedánama, atše chë tsabe noticiënga abuayiynayá bëtsemnama chca derecho tsbómnyace, y cach ndoñe mora quem soye quecbatëbuabiamná, tsëngaftanga ndayánaca atše chašmuatšetama. Atšbiana más tsabá nántsemna

jóbanana, y ndoñe ntjalesénciana inya chaoma atše cach atšbiama oyejuayá ndoñe ntjátsmënana, ínÿengbentsana soyënga stjýëngacñe causa.

<sup>16</sup> Atše ndoñe quetsatsjuabná atše canÿe bëts soye stsama ca, chë tšabe noticiënga stsabuayinana, er atše obligacónaca séntsemna chca jtsamama, Bëngbe Bëtsá chama šojanchémboyeca. iTša lastemcá atšbiama nántsemna, chë tšabe noticiënga ndoñe séntsabuayinase!  
<sup>17</sup> Chíyeca, atše chë tšabe noticiënga stsabuayiná nÿe atše chca jamama stsebóšeyeca, atšbe uacanana soye ya stsebmna; pero atše chca stjama, y ndoñe tontsemna nÿe atše chca jamama stsebóšeyeca, masque chca, atše stsama, ndayá jtsamama Bëngbe Bëtsá šojanbonÿecá. <sup>18</sup> Y chca, atšbe uacanana soye endmëna atše oyejuayá jtsemnana chë tšabe noticiënga abuayinayama, ošbuachiyéngbentsana atše vida jtsebmnama tondaye ntjatoyëngacñecá; chca, atše tondaye quetsátama chë tšabe noticiënga abuayinayama tsbmna deréchoca, chë atšbe trabajuentšana vida jtsebmnama.

<sup>19</sup> Atše, masque ndocna entšábeyeca nÿets tempo mandaná quetsátsmëna, puerte nduamaná sënjobema, mo canÿa nÿets tempo ínÿabeyeca mandanacá, nÿetscanga jasérviama, chca, atše chca jtsamëse, jobenayama becá entšanga, ntšamo tojopodecá, jayénjanama Crístbeñe chamotsošbuáchema.  
<sup>20</sup> Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjana Crístbeñe chamotsošbuáchema. Y chë Moisesbe léyeca mandánënga imoyëngbiamna, atše chëngcá sënjobema, masque

ndegombre chë Moisesbe léyeca mandaná ndoñe quetsátiyena; chca sëndbama chënga jáyënjana Crístbeñe chamotsošbuáchema. <sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjana Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nÿe batsatema ošbuáchiyëngbiamna y Bëngbe Bëtsabe soyëngama nÿe batsatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnana, endmëna atše jobenayama báseftanga jáyënjana Crístbeñe chamotsošbuáchema.

<sup>23</sup> Atše lempe chca sëndama, bëtscá entšanga chë tšabe noticiënguñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

<sup>24</sup> Tšëngaftanga šmondétatšëmbo, canÿe luaroye jashjanguama entšanga tmojótjajo orna, banga jotjajuana, pero nÿe canÿa chë uacanana soye jýëngacñana. Chcasna, mo chë uacanana soye jýëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábíocana uacanana soye josháchiñama. <sup>25</sup> Nÿetscanga chë tmojótjajënga ínÿenga jáyënjana, chënga jopróntana nÿetsca soyënguñe jtse nomándayëse, chca, canÿe uacanana soye, tsuanachéngaca

uapormana coronésha juayéngacñama; y chésha betesco jtsanctana. Pero bēnga ndoñe; bēnga mondoyena Cristbiana soyēnga jtsamēse, Bēngbe Bētsábicana ba tšabe soyēnga mo uacanancá jóyēngacñama, y chē soyēnga nyetsca tescama bēnga mochanjéftse bomna. <sup>26</sup>Y atšna, atšbe bariēna sēndētšena Bēngbe Bētsá jtseservénama, ndoñe mo canya ínnyēngbioye jáyēnjanama tojtjajuacá, chē ndémoye jashjanguama yomnama ntsetatšēmbcá; y cach ndoñe mo nda tojtse peliá orcá, chora, cha nye ínnyoye chabe buacuatšēnga tojtsētšana y chē ínnyabe cuerpo ye ndoñe. <sup>27</sup>Mo canye tšabe peliayacá, chabe cuerpo játsēsēnana y chca chē cuerpo corente jtsemándayana, atše ndoñe quetsatsleséncia chē atše tšabá jtsomñama atšbe ainanentša juabnēnga chašotsemándama; y chca, Crístbioye jtseservénēse chamotsiyenama ínnyēngbioye stjabuayená chentšana, Bēngbe Bētsá chašotsaboté chabe uacanana soye josháchiñama, cha ndoñe tšabá tijaservé causa.

**Cach entšangbe pormana soyēnga  
ndoñe chamondētsadoránama  
jábuayenama**

**10** <sup>1</sup>Jesucristbeyeca atšbe catsátanga, atše séntseboše tšēngaftanga chašmotsetátšēmo bēngbe tempca bēts taitanga judiēnga, chēnga nyetscanga Bēngbe Bētsá canye jantšētēsheca benache yojaninñanñá, y chēnga nyetscanga, chē Buángana ca uabaina mar bejayējana tmojanachnējna, chiñe mo bojojuiñe cuaftsomñá. <sup>2</sup>Chē jantšētēsheca Moisés imojanéstonama, y chē mar bejayējana tmojánama, chēnga tmojanóbema Moisesbe ústonēnga. <sup>3</sup>Chēnga nyetscanga

tmojanse cachca saná, chē Bēngbe Bētsá celocana tojanichmó saná; <sup>4</sup>y nyetscanga tmojanofšé chē Bēngbe Bētsá tojanma chē peñēsētšana chaóbozna bējaye. Cristo chēngaftaca yojtsemna jtsanñenama chēnga imojtsajnēntscuana, y ntšamo chē peñēsētšē chēngaftaca tojanopasacá, yojaninñanñá Cristo chēnga yojtsanñenama. <sup>5</sup>Masque chca, banga chēnguentšēnga ntšamo tmojanmama Bēngbe Bētsá ndoñe yontsoyejuaye; y chē causa, Bēngbe Bētsá tojanma chēnga chamóbanama chē entšanga ndoyentšē.

<sup>6</sup>Lempe chca tojanopasá bēnga jinñanñiyama y jábuayenama ntšamo inopása entšanga bacna soyēnga jamama tmojtseboše ora, bēnga chca jamama ndoñe chamondētsebošama. <sup>7</sup>Chíyeca, tšēngaftanga ndoñe šmattsadorana entšangbe pormana soyēnga, ndayama ínnyēnga jtsejuabnayana diosēnga yomna ca, ntšamo báseftanga israeloquēnga tmojanmcá. Ntšamo Bēngbe Bētsabe uabemana palabrenguñe chēngbiana endayancá, chēnga canye tenerá castellánoca tmojanpormá ora, mo dios cuaftsemncá jadórana: “Entšanga tmojanotbiama jasama y jatmuama, y chentšana tmojantsbaná joboyeuama ca”. <sup>8</sup>Boyabása o shembásaftaca bacna soyēnga ndoñe šmattsama, ntšamo báseftanga chēnguentšēnga tmojanmcá, y chē causa, nye canye te, uta bnētsana y unga uaranga entšanga tmojanóbana <sup>9</sup>Bacna soyēnga ndoñe šmattsama, jinñyama buetatescama Bēngbe Utabná uantado yochjéftsemnana y ndoñe šochanjacastigayama. Báseftanga chēnguentšēnga chca tmojanma, y chē causa tmojanóbana mētscuayéngaca ftētšēnēnga. <sup>10</sup>Bēngbe Bētsabe contra ndoñe šmattsóye buambnaye, ntšamo

báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëts taitángaftaca tojanopasá, bënga jinýanýiyama ntšamo jtsiyenana šojtsamnama, y Moisés, Bëngbe Bëtsabe uabemana palabrënguiñe chca tojéftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiama. <sup>12</sup> Chcasna, nda tojtsejuabná Bëngbe Utabnabiama tšabá yojsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama. <sup>13</sup> Ndocna entsá jatócochënguana bacna soyënga jamama, ntšamo tempo ínýenga ndoñe tonjanocohëngcá cachca bacna soyëngama, pero tšëngaftanga corente šmondétatsëmbo Bëngbe Bëtsá sempre cmochtséjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínýanyiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

<sup>14</sup> Chýyeca, atšbe bonshánënga, ndocna te šmattsadorana cach entšangbe pormana soyënga, ndayama ínýenga jtsejuabnayana diosënga yomna ca. <sup>15</sup> Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboye y šmochjayana, ntšamo chojtsëtsëtsnacá aíñe o ndoñe tšabá bëtsemnana. <sup>16</sup> Ntšamo Jesús chë coptema vinoyama

Bëngbe Bëtsábioye tbojtanchuacá, béngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinýanýayana bënga Crístoftaca cánýiñe mo canýacá imomnama, chabe buiñe juabuáshanëse bëngbiama tojanóbanayeca. Y chë mondbajataye tandëše tmojase ora, jtsinýanýayana bënga Crístoftaca cánýiñe mo canýacá imomnama, cha bëngbiama tojanóbanayeca. <sup>17</sup> Bënga ošbuáchiyënga masque banga mondmëna, chca orna nýetscanga cach tandëšëntšana bënga jasaná, y chíyeca bënga jtsemnana mo canýacá, mo Cristbe cuerpcá.

<sup>18</sup> Tšëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsana jasaná, y chca chënga chora jtsinýanýayana chënga cánýiñe mo canýacá imojtsemnama Bëngbe Bëtsáftaca, chë chca tmojtsadoranáftaca. <sup>19</sup> Y chca, atše ndoñe quetsátsboše jayanama chë entšangbe pormana soyënga mo diosënga cuaftsemncá, uamana soyënga yomna ca. Ni chë cach entšangbe pormana soyënga diosënga yomna ca jtsejuabnayëse jadórama uátšëmbona saná ínýe sanama más iuámana ca. <sup>20</sup> Pero aíñe, entsanga cach entšangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbiolye jtsadoránana, y ndoñe Bëngbe Bëtsábioye. Y atše ndoñe quetsátsboše, tšëngaftanga chca uatšëmbonana šmojasama, cánýiñe mo canýacá chë bayejëngaftaca chašmotsemnama. <sup>21</sup> Tšëngaftanga ndoñe quešmátobena chë vínoye

coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptementésánëna. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëše jasana, ntšamo ošbuáchiyënga bétsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná béngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiama más obenana bomnënga imomna ca?

**Lempe šmochjama Bëngbe  
Bëtsá puerte bëtsá y uamaná  
yomnama jinÿanÿiyama**

<sup>23</sup> Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyetscangbe tšabiama ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnana.

<sup>24</sup> Ndocná chaondétsama lempe ntšamo tojobenacá nÿe cachabe tšabiama, ndayá más chaotsama chë ínÿengbe tšabiama.

<sup>25</sup> Lempe mercadoca tmojtsena soyënguentšana šmochjase, ntjatstjanaycá chë mëntšena aínë o ndoñe tmonjuátšëmbona chë cach

entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnana; <sup>26</sup> er ntšamo Bëngbe Bëtsabe uabemana palabrënguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canÿe ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentsana chë saná tojóboचना ndocá ntjatstjanaycá, ntšamo tšëngaftangbe ainaniñe juabnënga šmojtsebomnana. <sup>28</sup> Pero nderado nda tcmojáuyana: “Quem mëntšena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canÿa chca tcmojáuyana, y ainanentše šmojtsebomna juabnënga, chë chca jamama ndoñe tšabá bétsemnana. <sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnana, ntšamo chë ínÿabe ainaniñe juabna yobomnana ca? <sup>30</sup> Y atše chë ndayá stsesama Bëngbe Bëtsá tijëtschuase, ¿ndáyeca inÿa šochjayana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámnaca, cachcá, chašmojtsesá, o chašmojtsofšëšná, o ndaye inÿe soye chašmojtsama, ndayama Bëngbe Bëtsá ndocá

tonjayana, lempe šmochtsama Bëngbe Bëtsá puerte bëtsá y uamaná yomnama jtsinÿanÿayama. <sup>32</sup> Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiana, ni ndoñe judiëngbiana, ni chë Bëngbe Bëtsábeñe ošbuachiyëngcá enefjuanëngbiana. <sup>33</sup> Šmochtsama ntšamo atše sëndëntšencá, nÿetscanga nÿetsca soyënguñe oyejuayënga jtsabamnama, lempe ntšamo stjobenacá jtsamëse, ndoñe nÿe atšbe tšabiana, ndayá masna chë ínÿengbe tšabiana, chënga chamotsobenama chëngbe bacna soyënguentšana atsebácanënga jtsemnama.

**11** <sup>1</sup> Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

**Ntšamo yomna shembásenga tšabá jtsemnama, ošbuachiyëngcá tmojënefjna ora**

<sup>2</sup> Atše sëntseboše tšëngaftanga jáuyanana tšabá šmojana ca, tšëngaftanga nÿetsca soyënguñe atšbiana šmnétsenojuabnama, y tšëngaftanga šmojtsabuátambama y šmojtsamama ntšamo tcbonjanabuatambacá, cachcá ntšamo atše sënjëfisanboshjoncá.

<sup>3</sup> Pero atše sëntseboše tšëngaftanga chacmësertá: nda nÿetsca entšanga iuaménda cha, Cristo endmëna; y nda shëmbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. <sup>4</sup> Nderado canÿe boyabása chabe bestšaše tojtsenátšbotse, inÿe ošbuachiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotséuatjama,

chabe bestšásëca chca tojama causa. <sup>5</sup> Pero nderado canÿe shembása chabe bestšaše ndoñe tontsenátšbotse, inÿe ošbuachiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotséuatjama; jtséuatjana mo cha lempe jshetëtšëná cuaftsemncá.

<sup>6</sup> Er, nderado canÿe shembása ndocna te tontseboše chabe bestšaše jtsenátšbotsana, chabiana más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšëná jtsemnama cha yochtséuatja ca, as chabe bestšaše chaotsenátšbotse. <sup>7</sup> Boyabása ndoñe quebnátšmëna chabe bestšaše jtsenátšbotsana, er Bëngbe Bëtsá tojanma ntšamo cachá yomncá cha chaotsemnama, y chë boyabása chca jtsemnëse, jtsinÿanÿayana Bëngbe Bëtsá chabe mandayá yomnama. Pero ntšamo chë shembása yomncá, jtsinÿanÿayana chë boyabása chabe mandayá yomnama; <sup>8</sup> er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. <sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. <sup>10</sup> Chíyeca, y chca jamama angelënga tšabá jtsinÿanáneyeca, shembása jtsemnana chabe bestšaše chaotsenátšbotsama, chca, chaotsinÿayana inÿa chábeñe yomándama. <sup>11</sup> Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseiytëtanana. <sup>12</sup> Er masque Bëngbe Bëtsá, shembása boyabásabentšana tojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

<sup>13</sup> Cach tsëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiama Bëngbe Bëtsáftaca jencuéntana, bestšaše ntsenatsbotsá. <sup>14</sup> Ntšamo entsanga sempre mondbetsejuabnacyá, ndayá tšabá bétsemnama, bëngbioye jtsabuátambayana, boyabása bën stjënéscha chabuájua tojalesenciase, cha jamana cachá chama chaotséuatjama. <sup>15</sup> Pero shembásabiamna, chë bën stjënéscha jtsinýanýnayana chabe botamanana y uámanana, er Bëngbe Bëtsá tojanma shembása bën stjënéscha chaotsábomnama, chca, cha chaotsebomna ndáyeca chabe bestšaše jtsenátsbotsama. <sup>16</sup> Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondétsemnama.

**Bëngbe Utabnabiama  
jtenójuaboyama jasama ora,  
chënga ndoñe tšabá imonjánama**

<sup>17</sup> Mora cbochanjaménda soyënguñe atše ndoñe quetsátobena tsëngaftanga jáuyanana tšabá šmojama ca, er tsëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinýana chë soye yojtsoservena tsëngaftanga más bacá chašmotsemnama, y ndoñe tsëngaftangbe tšabiama. <sup>18</sup> Natsana cbochjáuyana, atše sënjouena tsëngaftanga ošbuachiyëngcá šmojénefjna ora, báseftanga canye soye innétsëjuabnaye y inýengna inýetsá ca, y atše sëntsejuabná batšana ndegombre chca yojtsemna ca. <sup>19</sup> Ndegombre jtseytana tsëngaftangbeñe

chamotsemna báseftanga canye soye juabnayënga y inýengna inýetsá, chca, nýetscanga chamotsetatšëmbuama ndëmuanyënga imojtsemna chë Bëngbe Bëtsá tojayana chënga tšabá tmojama ca. <sup>20</sup> Tsëngaftanga tandëse jasama y vínoye jofšiyama šmojénefjna ora, ntšamo bënga fsënduamancá, Bëngbe Utabná bëngbiam tojanóbanama jtenójuaboyama, ndayá chora tsëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiama jtenójuaboyama jasama ora; <sup>21</sup> er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nýetscanga ndayánaca jasama chamotsebomnëntscuana; báseftanga shéntseca joquédana, y inýengna tša jëftsésana y jofšiyana jëftsótmenantscuana. <sup>22</sup> ¿Tsëngaftanga ndoñe yebna šmondobomna ndayentšë jasama y jofšiyama? ¿Ndáyeca tsëngaftanga šmojtsejuabná chë innénefjna ošbuachiyënga nduámanënga imomna ca, y šmojama chë chentšë tmojtsemnënga, tondaye ndbomnënga, chamotséuatjama? ¿Tsëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

**Bëngbe Utabnabiama  
jtenójuaboyama saná  
(Mt 26.26-29; Mc 14.22-  
25; Lc 22.14-20)**

<sup>23</sup> Er atše cach Bëngbe Utabnábentsana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšinë tmojánboshjona ibeta, tandëse tojanca, <sup>24</sup> Bëngbe Bëtsábioye tbojtanchuá chentšana, tojanjatá y

tojánayana: “Quem tandëse atšbe cuerpo entsemna; tšëngaftangbe tšabiana chanjóbana. Ntšamo mora montsamcá šmochtsama, atšbiana jtenójuaboyama ca.”<sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiana jtenójuaboyama ca.”<sup>26</sup> Er tšëngaftanga cada quemëntša tandëse chašmojttesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinñanýnaye cha entšangbiana tojanóbanama.

**Ntšamo yomna jamana,  
Bëngbe Utabnabiana  
jtenójuaboyama jasama ora**

<sup>27</sup> Chcasna, Bëngbe Utabnabiana jtenójuaboyama jasama ora, ndánaca tandëšentsšana tojase y coptémentšana tojofšë, ndoñe chë ntšamo chaotsemnama Bëngbe Utabná yojanjuabnacá, chabiana Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinñanýnayana, Bëngbe Utabnabe cuerpo y buiñe chabiana tondaye yonduámanama.<sup>28</sup> Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšë ora.<sup>29</sup> Er nderado nda tojase y tojofšë, chë Bëngbe Utabnabiana jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá

chabotsecastigama.<sup>30</sup> Chíyeca, banga tšëngaftanguentsënga šoquënga šmojtsemna, ínñenga añemo ndbomnënga, y ínñengna ndoñe nñe báseftanga tmojóbana.<sup>31</sup> Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játacastigana, ntšamo tšabá yomncá ndoñe tmonjase causa.<sup>32</sup> Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínýama, y chca, bayté chentsšana, Bëngbe Bëtsá ndoñe chabondétsemna játanayana bënga šojtsamna nýetsca tescama castigánënga jtsemnana ca, cánýiñe chë nñe quem luarama enójuabnaye entšangaftaca.

<sup>33</sup> Chca, Jesucristbeyeca atšbe catsátanga, tšëngaftanga chë Bëngbe Utabnabiana saná jasama chašmojénefjna ora, cánýiñe nýetscanga šmochjabojátša.<sup>34</sup> Y nderado nda tbojtseshentsšana, cachabe yebnoca chauétsese, chca, Bëngbe Bëtsá ndoñe chabondétsemna tšëngaftanga jácastigana chora ndoñe tšabá šmonjama causa. Chë inñe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

**Bëngbe Bëtsabe tšetana obenana,  
tšabe soyënga jamama**

**12** <sup>1</sup> Jesucristbeyeca atšbe catsátanga, atše séntseboše tšëngaftanga chašmotsetatšëmbo Bëngbe Bëtsabe tšetana obenana tšabe soyënga jamama, Crístbeñe ošbuáchiyënga jujabuáchama.<sup>2</sup> Tšëngaftanga šmondétatšëmbo, tšëngaftanga Crístbeñe



ndoşbuáchiyënga şmonjamna ora, ínÿenga cmonjanabuatambá soyënga, y chora tşëngaftanga şmonjamna ínÿabeyeca uasjanëngcá, cach entşangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntşobenana. <sup>3</sup> Chíyeca, atşe mora sëntseboşe tşëngaftanga chaşmotsetátşëmbo, ndocná ntşobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntşobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espiritu jamana bënga ndoñe chamondëtsebomnana cachca tşetana obenana tşabe soyënga jamama, pero lempe jobayana cach canÿe Espiritbeyeca. <sup>5</sup> Bënga, Bëngbe Bëtsá mondëserveda, nÿetsca soyënguinë jtsetrabájayëse, pero cach Utabná nÿets chë trabajënga şojabanÿe.

<sup>6</sup> Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnana. <sup>7</sup> Bëngbe Bëtsá inétsama cada oşbuachiyá chaotsebomnana canÿe tşetana obenana tşabe soyënga jamama, y chë soye jtsinÿanÿnayana Bëngbe Bëtsabe Espiritu chabe ainaniñe yomnana; y chë tşetana obenana jtsemnana nÿetscangbe tşabiama.

<sup>8</sup> Bëngbe Bëtsá, Espiritbeyeca, canÿa obenana jatştayana puerte oşertanánaca chaóyebuambama, y ínÿana obenana cach Espiritbeyeca ndayámna corente jtsetatşëmbëse chaóyebuambama; <sup>9</sup> ínÿana cach Espiritbeyeca, obenana Crístbeñe

puerte chaotşoşbuáchemá, y ínÿabiamna, cach nÿe canÿe Espiritbeyeca, obenana jatştayana şoquënga jáshnama; <sup>10</sup> ínÿana, obenana tşabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatşëmbuama ntşamo tmojayancá Bëngbe Bëtsabe Espiritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntşamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama. <sup>11</sup> Pero cach Espiritu, chë nÿe canÿe Espiritu lempe chca jamana, ntşamo tşabá bëtsemnana cha tojtsejuabnacá cada entşábioye jatştayëse.

**Nÿetsca oşbuáchiyënga cánÿiñe,  
mo Crístbe cuerpcá jtsemnana**

<sup>12</sup> Cuerpo nÿe canÿe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñe oşbuáchiyënga, pero Crístbeyeca, bënga cánÿiñe mo canÿacá jtsemnana. <sup>13</sup> Er bënga nÿetscanga, judiënga o ndoñe judiënga, nÿe ínÿabiamá nÿets tempo oşervënënga o cachëngbiamá trabájayënga şojanëbaye, Crístoftaca cánÿiñe mo canÿacá, jtsemnana mo chabe cuerpcá, y chca yomna cach Espiritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

<sup>14</sup> Cachcá, canÿe cuerpo ndoñe nÿe canÿe soye ntsebomnana,

ndayá ba soyënga. <sup>15</sup>Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. <sup>16</sup>Nderado matscuaše tojayana: “Bominÿe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. <sup>17</sup>Nÿets cuerpo bominÿe tojtsemnëse, bënga ndoñe muantsobena jouenama. Y nÿets cuerpo matscuaše tojtsemnëse, bënga ndoñe muanjobenaye jonguétsetsiyana. <sup>18</sup>Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše. <sup>19</sup>Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna. <sup>20</sup>Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

<sup>21</sup>Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”. <sup>22</sup>Inÿetšá, chë cuerpentša soyënga, chë tojtsinÿana mo obenana ndbomna y nduámama soyëngcá, jtsemnana chë cuerpama más iyta soyënga. <sup>23</sup>Chë cuerpentša soyëngama, ndayama bënga tmojtsejuabná más nduámama soyënga yomna ca, bënga jamana más chaotsámanama, chiñe entsáyaca jtichëtjése. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entsáyaca jtichëtjése. <sup>24</sup>Pero chë cuerpentša soyëngaca, chë

nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámama soyënga, más chaotsámanama, ntšamo chë soyënga bënga tmojtsinÿenama. <sup>25</sup>Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tsabiama. <sup>26</sup>Nderado canÿe cuerpentša soyama bacna soye tojopasá, chora nÿetsca chë cuerpentša soyëngámna chca ndoñe tsabe soye jtsebínÿana; pero canÿe cuerpentša soyama tcojama más uámama soye chaotsemnana o ndaye tsabe soye tojopasase, chora nÿetsca chë cuerpentša soyëngámna chca tsabe soye jtsebínÿana.

<sup>27</sup>Cachcá, tsëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpca jtsemnana, y cada ona tsëngaftanguentšá mo chë cuerpentša soyëngcá, jtsemnana mo chabe cuerpentša soyëngcá. <sup>28</sup>Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínÿëngbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana

bomnënga, tempo ndmabiyañe.

<sup>29</sup> Ndegombre, ošbuachiyëngcá enefjuanëngbeñe nyetscanga ndoñe Jesucristbe ichmónënga ntsemnana, nyetscanga ndoñe Bëngbe Bëtsabe juabna oyebuambnayënga, nyetscanga ndoñe abuátambayënga, nyetscanga ndoñe Bëngbe Bëtsabe obenana bomnënga, bëts soyënga jamama.

<sup>30</sup> Nyetscanga ndoñe šoquënga jáshnama obenana bomnënga; nyetscanga ndoñe nyetsca biyañe jtsóyebuambnayama obenana bomnënga, tempo ndmabiyañe; ni nyetscanga ndoñe obenana bomnënga quemátsmëna, chë tempo ndmabiyañe nyetsca biyañe jtsóyebuambnayama obenana bomnënga ntšamo tmojttsichamcá josértama y ínÿengbioye chama jtsabuayiynayama.

<sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftšashjáchama.

#### Bonshánana jtsebmomnana

Y inÿe soye más, atše bochanjínÿanÿiye ntšamo šmojtsovena cabá más tšabá jtsiyenana, Bëngbe Bëtsá jtseeservëñe.

**13** <sup>1</sup> Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtšenancá, o mo nÿe canÿe platillëshcá ndoñe tšabá tontsenanëshe. <sup>2</sup> Y atše obenana jtsebmomna Bëngbe Bëtsabe juabna jóyebuambayama y nyetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nyetsca soyëngama stsetátšëmbo, y

Cristbeñe puerte stjesošbuáchiye, chca betsošbuáchemana nÿa mo chë tjashënga chamobonjoma jamama, pero ínÿenga ndoñe sentsababuánÿeshanëna, atše tondaye séntsemna. <sup>3</sup> Y atše lempe ntšamo jtsebmomncá ndbomnëjëmënga stséjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebmomnana. Inÿenga ababuanÿeshaná ndoñe ntšántšabošana ntšamo inÿa tojatsbomncá, ni ntšenábotamnayana, ni cachá chë ínÿengbiama más uamaná ntjätenobiamnayana; <sup>5</sup> ndoñe bacá mandbomná ínÿengaftaca ntsemnana, ni nyets tempo ntsebošana y lempe jtsamana nÿe chabiamana tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana.

<sup>6</sup> Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe. <sup>7</sup> Inÿenga ababuanÿeshaná, ainaniñe añemo jtsebmomnana nyetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nyetsca más tšabá yomna soyëngama jtsobátmanana, y jtsóboyayana nyetsca toto soyënga.

<sup>8</sup> Bonshánana nyetsca tescama jëftsemnana. Canÿe te echántsemna, chora chë Uámana Espiritu ndoñe más queochátama entšanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte

jtsetatšëmbëse jóyebuambayama obenama chamotsebomnama; <sup>9</sup>er ntšamo mora bënga imotatšëmbcá y Bëngbe Bëtsabe juábnaca jóyebuambayëse tmojayana soyënga, nÿe batšatema bëngbioye jtsinÿanÿnayana Bëngbe Bëtsabe soyëngama, ndoñe lempe; <sup>10</sup>pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiana yojanjuabnacá, quem soyënga, chë nÿe batšatema bëngbioye jtsinÿanÿnayana Bëngbe Bëtsabe soyëngama, ya ndoñe más queochátsbinÿna.

<sup>11</sup>Atše bášetema ora, sënjanoyebuambná, sënjanjuabná, y soyëngama tsábá jtsetatšëmbuamna sënjanjuabná mo canÿe basetemcá; pero bëtsá sënjanóbema orna, sentsanajbaná lempe amana mo canÿe basetemcá.

<sup>12</sup>Cachcá, mora bënga quem luarentšë nÿe batšatema Bëngbe Bëtsabe soyëngama jtsetatšëmbuana, mo canÿe espejuñe tmojtsonÿacá, pero ndoñe nÿa corente tsábá. Pero canÿe te bënga mochántsetatšëmbo lempe nyetsca soyëngama, bënga Bëngbe Bëtsabe delante chamojtsemna ora. Mora atše séntsetatšëmbo nÿe batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente šuabuاتمcá.

<sup>13</sup>Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nyetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

#### Ndmabiyañe obenana Bëngbe Bëtsabe tšetánana

**14** <sup>1</sup>Bëtscá šmochtsama nyetscanga jtsababuánÿeshanëse

chašmotsiyenama, y puerte šmochtseboše jtsebomnama chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyebuambayama obenana. <sup>2</sup>Er chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entšángbioye, er ndegombre entšanguentšë ntšamo cha tojtsoyebuambnacá ndocná ntjosértana; chana chabe espírituftaca jtsóyebuambnayana y ndoñe nÿe chabe juábnaca, chë tempo Bëngbe Bëtsá ndocna entšábioye tbonjaninÿinÿé soyëngama. <sup>3</sup>Pero chë Bëngbe Bëtsabe juabna oyebuambnayana entšanga jtsëtsëtsnayana, chënga más chamotsošbuáchema y ainaniñe añemo chamotsebomnama, Bëngbe Bëtsabe soyëngama jábuayenama, y jamama padecena soyënguñe tmojtsemna órnaca añemo chamotsebomnama. <sup>4</sup>Chë tempo ndmabiyañe mora jóyebuambayama obenana bomná, jtsamana nÿe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyebuambnayana jtsamana chë ošbuachiyëncá enefjuanënga chca soyënga chamotsebomnama.

<sup>5</sup>Atše séntseboše nyetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más séntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyebuambnayá más uamaná jtsemnana chë inÿe biyañe oyebuambnayabiama; chca ndoñe nántsemna, ntšamo canÿe biyañe

tojayancá chë biyañe oyebuambnayá tbojtsësertánese y chë ošbuachiyëngcá enefjuanënga tojábuaenase, y chca, chë soyënga tmojouenama, chënga chamotsobena más jtsošbuáchiyama y añemo jtsebmomnama. <sup>6</sup>Y mora, Jesucristbeyeca atšbe catsátanga, atše nderado tcojábuaache y nÿe inÿe biyañe tcojábuaenese, ¿chca ntšamo chatjújabuache? Atše jtsobenana jujabuáchana, nÿe ntšamo chë biyañe tijayancá átšnaca šojtsësertánese, y ndayá Bëngbe Bëtsá šojinÿinÿecá entšanga jábuaenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

<sup>7</sup>Entšanga monduamana ndayánaca juénanana, mo flautëfja o arpa, vida ndbomna soyënga; cada sóyeca inÿetšá juénanama ndoñe tontsopodénese, ndocná nantsobena jtsetatšëmbuama ndayá canÿa chë soyëngaca yojtšenanama. <sup>8</sup>Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inÿetšá, nÿa chama ndoñe tonjuájatëtëse, ndocná buanjoserá y jempéliama ndoñe nanjopróna. <sup>9</sup>Tšëngaftangaftácnaca cachcá jtsopasánana. Inÿenga paselo josértama jobenaycnana tšëngaftanga ndoñe šmonjóyeuambase, ndocná queochátstatšëmbo ntšamo šmojtšichamcá. Nántsemna mo nÿe cánÿenga cuaftsoyeuambnacá. <sup>10</sup>Atše sëntsejuabná, ndegombre quem luarentše ba inÿe biyañe entšanga imnëtsoyeuambnayana, y ndaye biyáñnaca tmojoyebuambá ora, sempre jtsemnana ínÿenga ntšamo chënga tmojtšichamcá osertánënga. <sup>11</sup>Pero ntšamo inÿa chabe biyañe šojauyancá

atše ndoñe šontsësertánese, atše stsemna canÿe chabiama ndosertana biyañe oyebuambnayá, y chánaca cachcá atšbiamá. <sup>12</sup>Chcasna, chë Uámána Espiritu šondinÿanÿná obenana jtsebmomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebmomnama inétsama obenana.

<sup>13</sup>Chíyeca, chë tempo ndmabiyañe mora jóyeuambayama obenana tojtsebmomná, Bëngbe Bëtsá chabotseimpadana, cha chaoma ntšamo chë inÿe biyañe tojayancá chabosertama y ošbuáchiyënga jábuaenama obenana chaotsebmomnama. <sup>14</sup>Pero atše Bëngbe Bëtsáftaca stjencuénta, chë ndmabiyañe jóyeuambayama cha obenana šojanatšetacá jtsóyeuambnayëse, atšbe espiritu cháftaca nantsóyeuambnaye, pero atšbe juabna ndoñe ntsetatšëmbuana ntšamo chë espiritu tojtsoyeuambnacá. <sup>15</sup>Y asna, ¿ntšamo atše chtsemána? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtšchuayama chanjavérsia atšbe espíritoca, pero chca chanjama chíñnaca jtsejuabnayëse. <sup>16</sup>Nderado aca Bëngbe Bëtsá cojtsatschuaná nÿe espíritoca, y canÿa quem Bëngbe Bëtsabe tšetana obenanama ndosertaná tcmojóyeunase, cha ndoñe ntsobenana jayanana “chca chaotsemna ca”, cach aquécá cha yojtsejuabnama jinÿinÿiyama, er ntšamo cojtsichamcá cha ndoñe ntsësertánana. <sup>17</sup>Aca jtsobenana chca puerte tšabá Bëngbe Bëtsá jëtšchuayana, pero ntšamo tcojtsamcá

ndoñe ntjamana inya ndaye tšabe soye chaotsebomnama. <sup>18</sup> Atše, Bëngbe Bëtsá sentsatschuaná inye biyañe jóyebuambayama tšëngaftangbiama más tsobenama; <sup>19</sup> pero Crístbeñe ošbuachiyëngcá tmojënefjna ora, atše más sëndbétseboše nye mo shachna palabratémnaca jóyebuambayana, chënga añe catafjosertacá, chca, ínÿenga jabuátambama, y ndoñe bnëtsana uaranga palabrenga jatóyebuambayana inye biyañe, chënga chaósertama ndoñe tontspodénese.

<sup>20</sup> Jesucristbeyeca atše catsátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatsëmbcá; pero mo bëtsëtsangcá tšabá šmochtsejuabnaye. <sup>21</sup> Bëngbe Bëtsabe uabemana palabrenguiñe, Bëngbe Utabná mëntsá tojánayana:

Atše quem entsángbiyoye  
chanjáuyana,  
ínÿenga inye luarëngocana  
ashjajnëngaftaca, chëngbiama  
canÿe ndosertana biyañe  
oyebuambnayënga;  
y chanjáuyana ndayá chëngbe  
biyañe chamojtsichamo  
soyëngaca;  
pero ni chca, chënga ndoñe  
quešmochatóyeunaye ca.

<sup>22</sup> Chcasna, inye biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbiyoye jinÿanÿiyama, y chábeñe ošbuachiyëngbiyoye ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbiyoye jinÿanÿiyama, y chábeñe ndošbuachiyëngbiyoye

ndoñe. <sup>23</sup> Er tšëngaftanga nÿetscanga ošbuachiyëngcá šmojënefjna ora, nÿetscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboye tšëngaftanga opënga šmojtsóbema ca. <sup>24</sup> Pero nÿetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canya Bëngbe Bëtsabeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosërta; y chë soye cha bochanjayëñjaná cha bacna soyënga tojamama, y ndayá cha tojamiñe corente echántsejuabnaye, ntšamo nÿetscanga tmojtsichámuama.

<sup>25</sup> Y Bëngbe Bëtsá chábiyoye bochanjinÿinÿiye ntšamo cha ainaniñe tojajuabó y tojabošencá, ndayá ndocnábiyoye tbonjinÿinÿecá, y cha echanjoshëntsamentšiyoye Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

**Ošbuachiyëngcá šmojënefjna  
ora, ntšamo tšabá yomncá  
lempe šmochtsama**

<sup>26</sup> Chcasna, Jesucristbeyeca atše catsátanga, šmojënefjna ora, cada ona ndayánaca jtsebomnana nÿetscangbiama: ínÿengna jtsobenana javërsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entsanga jábuayenana ntšamo inya inye biyañe tojayancá. Pero lempe šmochjama, ošbuachiyënga más chamotsošbuáchema y

más añemo chamotsebomnama Cristo jaserviama. <sup>27</sup>Nderado inÿe biyañe jóyebuambayama tojtsemnëse, útata o nÿa másese únganga chca chamoyebuambá, y canÿánÿa; y jtseytana ndánaca ntšamo tmojtsichamcá chabosertá y nÿetscanga chama chauabuayená. <sup>28</sup>Y chca chabosertama y nÿetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojénefjna ora chë chca oyeubuambnayá bontsemna ndoñe chca biyañe ntsóyebuambnayana, sinó nÿe canÿa tojtsemna ora cha jtsobenana chca Bëngbe Bëtsáftaca jencuéntana. <sup>29</sup>Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábíocana tayojsóboacanama. <sup>30</sup>Pero canÿa Bëngbe Bëtsabe juabna tojtsóyebuambnantscuana, inÿa chentše ouenana tbemanábíoye Bëngbe Bëtsá tbojinÿinÿé ndayánaca yojtsebomna jayanama, as chë natsana oyeubuambnayá iytëca chaóbema, y chabolesenciá chë inÿa chaóyebuambama. <sup>31</sup>Chca, nÿetscanga, canÿánÿa jtsobenana jayanana soyënga, Bëngbe Bëtsabe juábnaca jtsóyebuambnayëse, nÿetscanga chamuatsjínÿama y nÿetscanga añemo jatšatayama. <sup>32</sup>Chë Bëngbe Bëtsabe juabna oyeubuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; <sup>33</sup>er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nÿetscanga cachcá ndoñe chamondëtsejuabnama, y nÿe ntšamo cada ona tojtsebošcá chaotsamama.

Ntšamo nÿets luarënguenache, chë ošbuáchiyënga, chë Bëngbe Bëtsabe entsanga mondbénéfjna luarënguenache endbetsemncá, <sup>34</sup>tšëngaftangbéntsnaca, shembásenga entsamna iytëca jobiamëngana, ošbuachiyëngcá šmojénefjna ora, er ndoñe quenátslesenciana chënga chora chamuátoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyíñe endayancá. <sup>35</sup>Chënga ndayánaca jtsetatšëmbuama tmojtsebošëse, cachëngbe boyángbíoye yebnoca chamotjanga; er ndoñe corente tšabá ntsemnana canÿe shembása jtsóyebuambnayana tšëngaftanga ošbuachiyëngcá šmojénefjna ora.

<sup>36</sup>¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nÿe tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nÿe cánÿenga ndoñe ntsoebenana jayanama ndayá jamama cmojtsamnama. <sup>37</sup>Nda tojtsejuabná cha Bëngbe Bëtsabe juabna oyeubuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama. <sup>38</sup>Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjóyëngacñe.

<sup>39</sup>Chcasna, Jesucristbeyeca atšbe catsátanga, puerte šmochtsebošë Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínÿenga ndoñe chamondëtsóyebuambnama; <sup>40</sup>pero lempe šmochjama ntšamo jamama yomncá, y ndoñe nÿe ntšamo cada ona tojatsjuabnacá.

**Cristo tojtanayenama**

**15** <sup>1</sup>Morna, Jesucristbeyeca atšbe catšátanga, atše séntseboše tšëngaftanga chašmuatenójuaboma atše tcbonjanabuayená tšabe noticiënguine, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtseservënëse šmojtseyena. <sup>2</sup>Chca šmobómnyeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiyinacá; chca ndóñesna, nýe ndoñe corente tšabá ntjajuaboycá chë buayenana soyënguine šmojtsošbuaché.

<sup>3</sup>Er atše tšëngaftangbeñe sënjëftsanboshjona, Bëngbe Bëtsábiocana atše tijanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguine chabe juabna oyebuambnayënga chama tmojanayancá; <sup>4</sup>chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguine chabe juabna oyebuambnayënga chama tmojanayancá; <sup>5</sup>chë Pédrëbioye tbojánebëbocnama, y chentšana chë bnëtsana útata ca uabobáinëngbioynaca. <sup>6</sup>Chentšana mo shachna patsama más chábeñe ošbuáchiyënga tojánebëbuacna, chënga cánýentše imojtsemna ora; chënguentšanga banga cabá vida imotsóbmñe, masque báseftanga ya tmojóbana. <sup>7</sup>Chentšana Santiágbioye tbojánebëbocna, y chentšana nýetsca chabe ichmónëngbioye.

<sup>8</sup>Y chentšana átsnaca šonjánebëbocna. Mo canýe šešona cabá shbená tojonýnacá, Cristo chabe ichmoná šonjábema, chë tempo chama jopróntama ntsebmncá, ndayëntscuana ínýenga cha tojanabuatambá. <sup>9</sup>Er atše sëndmëna chë más batšá uamaná Jesucristbe ichmónëngbeñe; y ni mercedo taitsatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama. <sup>10</sup>Pero Bëngbe Bëtsá atšbe tšabiama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiana jtsamana, ndoñe nýe bonamente quenátsmëna. Er atše más sënjatrabajá, chë inýe Jesucristbe ichmónëngbiama; pero ndegombre atše ndoñe nýe canýa chca chiyatsma, sinó masna Bëngbe Bëtsá chë trabajo tojama, tšabe juabna atšbiana jtsebmñese. <sup>11</sup>Ndayá más yojtsámama ndoñe quenátsmëna, atše o chënga, Jesucristbe soyëngama abuayiyinayine más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

**Chë obanënga cachiñe vida mochtsatsbomnama**

<sup>12</sup>Pero bëngbe buayenana soye endmëna, Bëngbe Bëtsá tojanma Cristo cháuatayenama; as čndáyeca básefta tšëngaftanga šmnëtsichamo Bëngbe Bëtsá ndoñe yochanjama chë mora obanënga chámuatayenama ca? <sup>13</sup>Pero chca tojtsemna, chë obanënga ndoñe mochántayenasna, Cristo cach ndoñe tontanayena; <sup>14</sup>y Cristo ndoñe matenjésayenëse, bënga nýe bonamente chabiama fstsabuayiyiná, y tšëngaftanga nýe



bonamente chábeñe šmojtsošbuaché.  
<sup>15</sup> Y canye más bêts soye: chca tojtsemñesna, bēnga muanjábozna mo chē Bēngbe Bětsabiana soyēnga tmojinjē ca ichamēngcá, pero ndoñe ndegombre chca tontsemna; er bēnga fsēndbėtsichamo, Cristo cháuatayenama Bēngbe Bětsá tojanma ca. Pero chē obanēnga ndoñe mochántayenasna, Bēngbe Bětsá ndoñe tonjanma Cristo cháuatayenama. <sup>16</sup> Pero chē obanēnga ndoñe mochántayenasna, Cristo cach ndoñe tontanayena. <sup>17</sup> Y Cristo cháuatayenama Bēngbe Bětsá ndoñe matēnjanmēse, tšēngaftanga nje tondayama chábeñe šmojtsošbuaché; tšēngaftanga chē bacna soyēngama cabá ndoñe perdonánēnga šmontsemna. <sup>18</sup> Y chca, chē tmojanóbanēnga, Crístbeñe ošbuáchiyēnga, chēnga cach ndoñe chēngbe bacna soyēnguentšana atsebácanēnga quemochátsmēna, sinó njetzca tescama castigánēnga. <sup>19</sup> Bēnga tmojtsobátmana Cristo bēngbiana tšabe soyēnga chaotsamama, pero chca nje quem luarentše bēnga vida tmojtsebomñentscuana, as bēnga njetscangbiana más muantsomerecena, njetscanga bēngbiana chaotsangménama. <sup>20</sup> Pero chca ndoñe ndegombre quenátsmēna, er ndegombre Bēngbe Bětsá tojanma Cristo cháuatayenama. Mo chē uanatsena shajuancá, jtsinjanjāyayana más shajuanēnga chentšana yochjóbocnama, cachcá, Cristo tojtāyayana ora, cha tojaninjanjē Bēngbe Bětsá yochjanma ínēnga chábeñe ošbuáchiyēnga chámuatayenama vida chamotsatsbomnama. <sup>21</sup> Chca, ndayá canye entšá, Adán, tojanmama, njetscanga jóbānama yojtāmna, cachcá, ntšamo inje entšá, Cristo, tojanmama,

Bēngbe Bětsá yochjama entšanga chámuatayenama. <sup>22</sup> Er ntšamo, Adánbentšana entšanga bėtsemnayeca jóbānama jtsāmna, cachcá, Crístbeñe ošbuáchiyēnga bėtsemnayeca, Bēngbe Bětsá jamana chē njetzca tescama yomna tšabe vida chēnga chamotsebomnama. <sup>23</sup> Pero Bēngbe Bětsá jamana cada ona cháuatayenama nja chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, njetscanga chē Crístbe entšanga imomñēnga. <sup>24</sup> Y chentšana, Bēngbe Bětsá chē Taitábioye, Cristo chabe améndayana chabojantšabuaché ora, njetzca mandadēnga, mando y obenana bomñēnga corente jtsayēnjanayēse. <sup>25</sup> Er Cristo bontsemna ínēnga mo reycá jtsaméndayana, chabe uayayēnga chabe cucuatšiñe chamoquedama Bēngbe Bětsá tojamēntscuana. <sup>26</sup> Canye uayayá inétsama entšanga jóbānama; pero Cristo último echanjama chabe obenana pronto chaotsopochocama. <sup>27</sup> Er ntšamo Bēngbe Bětsabe uabemana palabrenguiñe endayancá: “Bēngbe Bětsá tojama Cristo njetzca soyēnguiñe chaotsemándama ca.” Pero “tojama Cristo njetzca soyēnguiñe chaotsemándama ca” tojayana ora, jtsopodénana puerta tšabá jinjāma, chca ndoñe yontsayana, Bēngbe Bětsá Crístbeyeca mandaná yojtsemna ca; Bēngbe Bětsá nda tojanma Cristo njetzca soyēnguiñe chaotsemándama. <sup>28</sup> Y Cristo njetzca soyēnguiñe chaojtsemándama ora, cach Cristo, chē Uaquiñá, echántsemna Bēngbe Bětsábeyeca mandaná, Bēngbe Bětsá chē Cristo njetzca soyēnguiñe chaotsemándama tojanmá. Y chca, Bēngbe Bětsá lempe echántsemna, lempe ntšamo quem luarentše yobínjñiñe.

<sup>29</sup>Inyetsánaca, báseftanga cachiñe uabáinenga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ñndáyeca entšanga chëngbe cuenta muantenábye?

<sup>30</sup>Obanënga chámuatayenama Bëngbe Bëtsá ndoñe tonjamëse, ñndáyeca bënga muántseprontana nyets tempo resjuiñe jtsajnama, Cristbiamá oservená causa? <sup>31</sup>Atšbiamá cada te resjo endmëna jóbanama. Jesucristbeyeca atšbe catšátanga, atše séntichamo, chca ndegombre yómnyeyeca, atše oyejuayá stsemnaca, mo Cristo Jesús Bëngbe Utabnabe canye oservenacá, tšëngaftanga chábeñe šmojtsošbuáchema. <sup>32</sup>Mo canya tšátjaye bayëngaca tojtsentsjaná orcá, atšbiamá puerte resjo enjamna jóbanama, Efeso pueblaca; pero nyë chë entšanga mondbëtsejuabnaye jëftsashjáchama soyënga jtsebošëse chca matsjamñëse, ñndaye tšabe soye matëñjanóbocna, chca atšbiamá resjo jóbanama enjamna ora? Obanënga ndoñe mochántayenëсна, mochtsama ntšamo entšanga jayanana monduamancá: “iMochjase y mochjofšiyë, nderado yëfse muatjóbanaca!”

<sup>33</sup>Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse vojoyena.” <sup>34</sup>Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayenaca juabnaye causa, er báseftanga tšëngaftanguentšë Bëngbe Bëtsabe

soyënga ndoñe quešmatábuatma. Atše chca séntichamo tšëngaftanga chašmotsëuatjama.

**Ntšamo chë obanënga mochtayena**

<sup>35</sup>Pero nderado nda nanjatjaye: “ñNtšamo chë obanënga mochtayenaca? ñMocna cuerpo mochtsebmocna ca?” <sup>36</sup>iJuabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebmocnana. <sup>37</sup>Ndayá tcojajecá ndoñe ntsemnana chë juábocnana matatema, ndayá nyë chë meshe, trigo meshe o ndaye mata méshnaca jtsemnana. <sup>38</sup>Pero Bëngbe Bëtsá jamana chë jénayentshana mata chauábocnana, ntšamo jamama cha tojajuabocá; y cha jamana cada jénayentshana canye mata chauábocnana, ntšamo chë jénayentshana chauábocnana tojtsemncá. <sup>39</sup>Nyetsca cuerpënga ndoñe cachcá ntsemnana. Entšanga canye cuerpo mondbomna, bayënga inyë cuerpo, shloftšënga inyë cuerpo, y beongna inyë cuerpo. <sup>40</sup>Chë celoca vida bomnënga inyëtsá jtsinñana, y chë quem luarentšë vida bomnënga inyëtsá. Pero chë buashinñinñana y botamanana ntšamo celoca vida bomnënga jtsinñancá, ndoñe cachcá ntsemnana chë quem luarentšë vida bomnëngbe botamanancá. <sup>41</sup>Cachcá, shinñe ndoñe quenátšbomna cachca buashinñinñana juashconcá, ni estrellëngcá; y estrellënguëntšë cach ndoñe cachcá ntsebuashinñinñana. <sup>42</sup>Cachcá, chë obanënga chámuatayenama Bëngbe Bëtsá chaojama ora chamojtsebmocna cuerpo, ndoñe queochátšmëna cachcá ntšamo quem luarentšë imojaniyena ora imojëftsebmocna cuerpcá. Ntšamo chë jénaye tcojuatbontsá ora chiye

jóbanana, cachcá, quem luarentse bēnga mondbomna cuerpo jóbanana, ínŷenga juatbontsana y jtsoepochócana; pero bēnga chámuatayenama Bēngbe Bētsá chaojama ora, bēnga tsēm cuerpo mochántatsbomna y ndocna te queochatopochóca. <sup>43</sup> Chē óbana cuerpo tmojuatbontsá ora, chē cuerpo tondaye ntsámanana; pero chē obanēnga chámuatayenama Bēngbe Bētsá chaojama ora, chē tsēm cuerpo puerte echántsebuashinŷinŷana y echantsámana. Bēnga quem luarentse imoyenēntscuana imobomna cuerpo, nŷe batšá obenana jtsebmomna; pero chē Bēngbe Bētsá šochjatšataye tsēm cuerpo, puerte obenana bomna cuerpo echántsemna. <sup>44</sup> Quem luarentse imobomna cuerpo endmēna cam luarentse vida chaotsebmomna; pero bēnga chámuatayenama chaojama ora, chē bēnga mochtsebmomna tsēm cuerpo, puerte chē Espíritbeyeca echántsemandana. Canŷe cuerpo quem luarentse vida chaotsebmomna yómnayeca, canŷe cuerpēnaca, jtsemnana celoca vida chaotsebmomna.

<sup>45</sup> Chca Bēngbe Bētsabe uabemana palabrenguiñe endayana: “Bēngbe Bētsá, chē natsana entšá tbojanma chaotsainama ca.” Adánbentšana nŷetsca entšanga jabocanana, pero Crístbeyeca, Bēngbe Bētsá tojama banga mo tsmēma entšangcá chamotsemnana; chca, Cristo jtsemnana mo chē ústonoye Adancá; pero Cristna canŷe espíritu endmēna, y chē espíritu jamana entšanga chē nŷetsca tescama yomna tšabe vida chamotsebmomna. <sup>46</sup> Pero chē celoca nŷetsca tescama vida jtsebmomna cuerpna ndoñe natsana ntjóbcnana, ndayá chē quem luarentse vida jtsebmomna cuerpo; chentšana chē

celoca vida jtsebmomna cuerpo. <sup>47</sup> Bēngbe Bētsá, chē natsana entšá tbojanma fshántseca, y chca, cha fshantsentšana tojánbocna; Cristna, mo entšangbentšana chē natsaná tsmacá bemanacá, celocana tojánbocna. <sup>48</sup> Adánbentšana, chē natsana entšá, chē fshántseca tmojanmábentšana tmojábcanēnga, ntšamo cha yojamncá jtsemnana. Cachcá, chē mo tsmēmangcá tojábiámēngna, Cristcá jtsemnana; Cristo nda celocana tojánabo.

<sup>49</sup> Ntšamo bēnga jtsinŷnana chē Bēngbe Bētsá fshántseca tbojánbema entšacá, cachcá bēngnaca mochtšinŷna ntšamo chē celocá yomnacá.

<sup>50</sup> Jesucrístbeyeca atšbe catšátanga, atše cbochjáuyana, nŷe quem luarentse vida jtsebmomna cuerpēngaca, bēnga ndoñe ntsoobenana Bēngbe Bētsabe amēndayoye jamashēnguana; ni ndayá yochjopochóca soye, ntsoobenana ndayá ndoñe yochanjopochóca soye jtsebmomna. <sup>51</sup> Šmochjouena, atše canŷe soye cbochanjáuyana, y chē soye Bēngbe Bētsá entšanga tempo ndoñe tonjaninŷanŷé: Bēnga ošbuáchiyēnga nŷetscanga ndoñe quemochatóbana, pero Bēngbe Bētsá šochanjátrocaye mo tsmēmangcá. <sup>52</sup> Nŷe betesco, mo tcojofshetá y cachora tcojtafšnacá, quem luare ya jopochócama ora, canŷe ángel trompetéfjua chaojuájatēta ora, er chora trompetéfjua echanjuénana, Bēngbe Bētsá echanjama obanēnga chámuatayenama, nŷetsca tescama vida jtsebmomna; y bēnga, chē ainēnga mochtsebmōngna, cha šochanjátrocaye mo tsmēmangcá jtsemnana; <sup>53</sup> er jtseytana Bēngbe Bētsá chaotrocá chē bēngbeñe jopochócama yomna soye, ndocna te yochanjopochóca soyiñe; y ndayá bēngbeñe yochjóbana soye, ndocna

te yochanjóbana soyiñe. <sup>54</sup> Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochñengo ntšamo Bëngbe Bëtsabe uabemana palabrënguñe chama endayancá:

Bëngbe Bëtsá tojayënjaná chë entšanga chamóbanama endbëtsama obenana; entšanga ndoñe más quemochatóbana ca.

<sup>55</sup> ¡Mora entšanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojayënjaná ca!

<sup>56</sup> Entšanga bacna soyënga tmojama causa, obenana endmëna entšanga jóbanama chaotsamnama. Ndayá leyíñe iuayanama, entšá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabñëngaca mandaná jtsemnana, y cabana, jóbanama jtsemnana. <sup>57</sup> ¡Pero Bëngbe Bëtsá mochtsatschuanaye, bënga mo ayënjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiamama tojanma sóyeca!

<sup>58</sup> Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšëna bëtscá jtsamana Bëngbe Utabnabiamama trabájayíñe, er tšëngaftanga šmondétatšëmbo, Bëngbe Utabnabiamama trabájayíñe ndayá

šmojamcá, ndocna te nyë bonamente ntsemnana.

#### Jerusalenoca ošbuáchiyëngbiamama crocenánama

**16** <sup>1</sup> Mora chanjóyebuambaye chë Jerusalenoca Bëngbe Bëtsabe entšanga ndbomñëjmëngbiamama tšëngaftanga šmochjuíchmua crocenánama. Atšë sëntsebošë tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atšë sënjanabuayenacá. <sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonýencá, y šmochtsejuabayë; chca atšë choye chajjá ora, ndoñe chacmondétsamna quem uajabótama chora crocénana játatbanayana. <sup>3</sup> Y atšë choye chajjáshjango ora, Jerusalenoye chjichamuá chë tšëngaftanga mo tšabengcá šmojubuáyana entšanga, chë Jerusalenoca ošbuachiyëngbiyoye tšëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama. <sup>4</sup> Y nderado, átšnaca chëngaftaca jama tšabá tojtsemnëse, chënga átšëftaca chamua.

#### Ntšamo Pablo yojanjuabná chë luarëngoye jama

<sup>5</sup> Atšë sëntsejuabná tšëngaftangbiyoye jama jautšëtsayama, Macedonia luarëjana chajjachñëngüentšana, chentšä ošbuáchiyënga jaftsanyëse, er atšë sëntsejuabná natsana Macedonia luaroye jéftšana. <sup>6</sup> Nderado baseftayté tšëngaftangbeñe chašúetsetjana, o nderádose nyëts uaftena tempo; as tšëngaftanga inyë luaroye játama chašmuájabuachama, ndémoye jama chašojtsemnoye. <sup>7</sup> Atšë ndoñe

quetsátsboše nÿe betscó tšéngaftanga jáftsanÿana, er atše sentsobátmána más bayté tšéngaftangbeñe jajtsemnana, Bèngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojobuáchèntscuana. <sup>9</sup> Er Bèngbe Bètsá tojama atše jobenayama muentše chë tšabe noticièngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tšéngaftangbiöye chaojase, yejuana šmochtsantješna cha tondayama chaondétsauatjama, tšéngaftangbeñe tojtsemnéntscuana, er cha Bèngbe Utabnabíama endëtrabája, ntšamo atše sèndamcá. <sup>11</sup> Chcasna, ndocná chábíöye chabondétsáboyènja. Bètsá šmochjama cha natjémbana átšbíöye chautábama, er atše cha sentsobátmána, chë ínÿenga muentše Crístbeñe ošbuáchiyèngaftaca.

<sup>12</sup> Y Jesucrístbeyeca bèngbe catsáta Apólosna, atše bètscá cha sènjaimpadá, chë Jesucrístbeyeca catsátanga tšéngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

#### **Pablo chénga jtadiósoftanama**

<sup>13</sup> Sempre šmochtsenocuedana chë Bèngbe Utabná ndoñe chašmondétseservenama tojtsama soyèngama. Nÿets tempo, Crístbeñe y chabe soyènguñínaca šmochtsošbuáchiye. Ainaniñe puerte añemo šmochtsebomna, y bètscá šmochtsama Bèngbe Bètsabe obenáca. <sup>14</sup> Y nÿetsca soyènga ntšamo chašmojtsamcá, bonshanánaca šmochtsama.

<sup>15</sup> Jesucrístbeyeca atšbe catsátanga, tšéngaftanga šmondétatšëmbo,

Estéfanás y chabe pamíllanga chë natsanènga monjamnama Jesucrístbeñe jtsošbuáchiyama, Acaya luaroca, y bètscá imojtsentšena Bèngbe Utabnabíama jtsetrabájayana, chabe entšanga jtsèjabuáchanèse. <sup>16</sup> Atše cbaimpadá, tšéngaftanga lempe šmochtsama ntšamo cmojtsamèndacá, chca entšanga mo tšéngaftangbe uanatsanèngcá, y ntšamo nÿetsca chë ínÿenga mo bèngcá quemuiñe uajabuáchanèse trabájayènga cmojtsamèndacá.

<sup>17</sup> Atše tša oyejuayá sèntsemna tšéngaftangbe pueblèššana Estéfanás, Fortunato y Acaico moye tmojášhjajnama, er atše sentsobena oyejuayá chéngaftaca jtsemnana, tšéngaftangaftaca choca jtsemnana cabá ndoñe sèntsobenèntscuana. <sup>18</sup> Er chénga átšbíöye tmonjabo y tšéngaftangbíama šmonjauyana, y chca chénga tmonjama, atše y tšéngaftanga natjémbana ainánaca chamotsomñama. Chénga šmochtsétabna mo puerte uámána entšangcá.

<sup>19</sup> Asia luaroca ošbuachiyèngcá enefjuanènga cmontsachewaná. Aquila y Prisca y chatbe yebntšè mondbétsenefjuana ošbuachiyènga cmontsachewaná, Bèngbe Utabnábeñe ošbuachiyèngcá, tšéngaftangcá bétsemnayeca. <sup>20</sup> Muentša ošbuachiyènga nÿetscanga cmontsachewaná. Nÿetscanga šmochjenchuaye mo Jesucrístbeyeca catsátangcá, jtenámochèse, ntšamo cach tšéngaftangbe pamíllanga puerte bonshanánaca šmondetsachewanaycá.

<sup>21</sup> Quem palabrénga tšéngaftanga jacheuyama cach atšbe cucuátšeca sèntsabíamná.

<sup>22</sup> Nderado nda Bèngbe Utabnábiöye ndoñe tbontsebobonshana, Bèngbe Bètsá nÿetsca tescama chabocastigá. ¡Bèngbe Utabná cachiñe cochjésabo!

<sup>23</sup> Atše, Bëngbe Bëtsá  
séntseimpadana, Bëngbe Utabná  
Jesús chaoma tšëngaftangbeñe  
tšabe bendicionënga chaotsemnama.

<sup>24</sup> Atše, nÿetsca tšëngaftanga  
cbondábabuanÿeshana, canÿa mo  
tšëngaftangcá, Cristo Jesúseftaca  
cányiñe mo canÿacá jtsemnëse.

## 2 Corintios

### Jacheuayama

**1** <sup>1</sup>Atše Pablo, Jesucristbe canÿe ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catšata Timotéoftaca quem tsbuanácha sèntsabiamná, Corinto puebloca Bëngbe Bëtsábeñe ošbuachiyëngcá enefjuanëngbiamá, y nÿets Acaya luarentše Bëngbe Bëtsabe nÿetsca entšangbiámna. <sup>2</sup>Atše sèntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangeñe tšabe bendicionënga chaotsemnama y ainaniñe tšabe ebionana chašmotsebomnama.

### Ntšamo Pablo tojansufrí

<sup>3</sup>Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiamá lastemado yomná, y ndaye padecena soyënguiñe tmojtsemna ora, bënga šondbetsañemuayá. <sup>4</sup>Cha bënga jtsañëmuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañëmuayama, ntšamo Bëngbe Bëtsá šojujabuachcá chënga jujabuachëse. <sup>5</sup>Er ntšamo Cristo tojansufricá, bënga tša fsëndësufrina chabiamá oservéniñe; cachcá, Cristbeyécna Bëngbe

Bëtsá jamana bënga puerte añemo ainaniñe fchaitsebomnama. <sup>6</sup>Er bënga tmojtseufrinëse, jtsemnana bënga jobenayama tšëngaftanga jañëmuayama chë šmojtseufrina ora, y atsebácanënga chašmotsemnama, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañëmose, jtsemnana bënga fchayobenama tšëngaftanga jañëmuayama, padecena soyënguiñe šmojtsemna ora. Chca, bënga jobenayana tšëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtseufrina ora. <sup>7</sup>Bënga sempre fsëndobátmana y tšabá fsëndétatšëmbo chë padecena soyënguentšana tšabá šmochjábocanama, er bënga fsëndétatšëmbo, chë ntšamo bënga fsënjasufricá tšëngaftanga šmojasufrima; y cachcá, Bëngbe Bëtsá yochjama tšëngaftanga ainaniñe puerte añemo chašmotsebomnama, ntšamo bënga fchaitsebomnama cha tojamcá.

<sup>8</sup>Jesucristbeyeca atšbe catšátanga, bënga fséntseboše tšëngaftanga chašmotsetátšëmbo ntšamo bënga Asia luaroca tša fsënjasufrinama. Bënga puerte padecena soyënguiñe fsënjanियena, nÿa ndoñe más jauantacá, chentšana vídaca

jabocanama ntjatobatmancá.

<sup>9</sup> Bënga šontsanénana mo jóbana  
cuafsamncá. Pero chë soye  
tonjanoservé, bënga jtsošbuáchiyama  
Bëngbe Bëtsábeñe, nda inétsama  
obanënga chámuatayenama, y ndoñe  
cabéngbeñe ntsošbuáchiyana. <sup>10</sup> Cha  
šojatsebacá bënga jóbana puerte  
resjo enjamntšana, y cachcá  
šochjátsebacaye bëngbiama cachiñe  
cachcá tša resjuíñe chamojtsemna  
ora. Bënga puerte chábeñe  
fsëndobátmana, puerte padecena  
soyënguñe bënga chamojtsemna  
ora, cha cachiñe šochjátsebacama.

<sup>11</sup> Tšëngaftángnaca cmontsama bënga  
jujabuáchana, bëngbiama Bëngbe  
Bëtsá jaimpádase; chca, ba entšanga  
Bëngbe Bëtsá mochanjétschuaye, er  
cha tojama bënga chábéntšana tšabe  
bendicionënga fchayóyëngacñama,  
cha jamëse ntšamo chënga bëngbiama  
tmojanimpadacá.

**Ndáyeca Pablo Corinto  
puebloye ndoñe tonjána**

<sup>12</sup> Canye soye endmëna ndayá  
oyejuayënga šojtsabiamná: bënga  
bëngbe ainantša juabnéngaca  
jtsetatšëmbuana puerte tšabá jtsamëse  
fstsiyena ca, ntšamo chë Bëngbe  
Bëtsabe entšanga endbetsamncá,  
nyëtsca quem luarentša entšángbeñe,  
y más tšëngaftangbeñe, y bënga  
jtsetatšëmbuana ntšamo tšabá tifjamcá  
nyëts ainánaca tifjamama. Bënga  
tondaye chibiatsma quem luarentša  
entšangbe osertanánaca, ndayá  
Bëngbe Bëtsá tša tšabia béngaftaca  
bétsemnayeca, šojjúabuache  
chca chamotsiyenama. <sup>13</sup> Er  
ntšamo fsëntsabiamnamna ndoñe  
queftsátsboše, ntšamo tšëngaftanga  
šmojtsalía y cmojtsësertánentšana  
inýetsá játayanana, y sentsóbátmana

puerte tšabá lempe chacmósertama.

<sup>14</sup> Mora ndayá atše stsamama ndoñe  
lempe quecmátësertana. Pero atše  
séntseboše tšëngaftanga chama  
corente chacmósertama; chca, Bëngbe  
Utabná quem luaroye chaojésabo ora,  
tšëngaftanga bëngbiama oyejuayënga  
chašmotsemnama, ntšamo bëngnaca  
tšëngaftangbiama oyejuayënga  
fchantsemncá.

<sup>15</sup> Chca ndegombre yomnama atše  
sëndétatšëmboyeca, atše sënjanjuabná  
tšëngaftangbioye jshétsana jányama, y  
chca, chë tšabe soye tšëngaftangbiama  
uta soye jamana, tšëngaftangbioye  
uta soye jányëse. <sup>16</sup> Atše sënjanjuabná  
tšëngaftanga jshaftsanyana,  
Macedonioye ayiñe chëjana  
matijánachnëngo ora; y chentšana, ya  
camoye ataboye ora, tšëngaftanga  
cachiñe jáftsanyana. Chca,  
tšëngaftanga mašmëñjanobená atše  
juajabuáchana Judea luaroye játama.

<sup>17</sup> Atše chca jamama tsjanjuabná  
ora, ¿chca tijanma ndoñe corente  
tšabá ntjenojuaboycá? ¿Tšëngaftanga  
šmatjájuaboye, ntšamo nyë quem  
luarama enójuabnaye entšanga  
monduamancá, cachora canye soyama  
“aíñe” y “ndoñe ca” jayanëse, atše  
ndayánaca jamama snétsejuabnaye ca?

<sup>18</sup> Canye soye ndegombre endmëna:  
Bëngbe Bëtsá sempre endbama  
ntšamo tojayancá, y chca puerte  
ndegombre endmënyeca, atše  
ndayánaca chjama ca stjayana ora,  
chca ndoñe questsbatayana chentšana  
atšbe juabna jatstrócama, mo canya  
cachora canye soyama “aíñe” y “ndoñe  
ca” cuafjatichamcá. <sup>19</sup> Er Cristo  
Jesús, Bëngbe Bëtsabe Uaquíñá,  
ndabiana Silvano, Timoteo y atše  
tšëngaftangbeñe fsënjanabuayiná,  
ndoñe ntsejuabnayana canye soye  
jamama y chentšana jatsjuabnayana



inÿetšá jatsmama, mo canÿe entšá cachora canÿe soyama “aíñe” y “ndoñe ca” cuafjatichamcá, ndayá chana nÿets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocyacá. <sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “aíñe ca” cuafstichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. <sup>21</sup> Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchemama, cháftaca cánÿiñe mo canÿyacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnama. <sup>22</sup> Cha tojama chë Uámana Espíritu bëngbe ainaniñe cháuamashënguama jtsemándayama, y chë soye jtsinÿanÿanayana bënga Bëngbe Bëtsabe entšanga imomnana. Y bëngbe ainaniñe chë Espíritu imobómnyeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatšatayama šojašebuachenacá.

<sup>23</sup> Bëngbe Bëtsá entsonÿá atšë ndegombre stsihámuaama. Atšë Corinto puebløye cabá ndoñe chiyjá, er atšë ndoñe quetsátsošë tšëngaftanga jašëchnana, chë bacna soyënga šmojamama, tcbøjauacănëse.

<sup>24</sup> Bënga ndoñe queftsátsošë tšëngaftanga jaméndana ndayiñe cmojtsamna jtsošbuáchiyana; er tša šmojtssošbuachëyeca, ndoñe quešmochatajbaná Crístbeñe jtsošbuáchiyana. Bëngbe fséntsebošë ndayá tšëngaftanga jujabuáchana, corente oyejuayënga chašmotsemnama.

**2** <sup>1</sup> Chíyeca atšë ndoñe chiyjá jautšëtsayama, er atšë sënjanjubó y sënjanëniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanÿe sënjamcá. <sup>2</sup> Tšëngaftanga ngménaca chašmotsemnama atšë stjãmëse, ñnda yochjama atšë oyejuayá chaitsemnama, sinó nÿe tšëngaftanga, chë atšë ngménënga tijábiamënga?

<sup>3</sup> Chíyeca tcbonjanëbuábiamama chë ntšamo šmojualiácá, chca, atšë choye stjáshjango ora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiamama más tšabá endmëna oyejuayá atšë chašmobemama. Atšë tšabá sënjántatšëmbo ndayá átšbioye oyejuayá šojabemcá, tšëngaftangnaca chca mašmëñánbošëna y oyejuayënga chë soye matcmëñánabiamama. Chíyeca atšë ndoñe chiyataná, nÿetscanga oyejuayënga jtsemnama ndoñe quenjatopodena ora. <sup>4</sup> Pero chë tsbuanácha tcbonjanëbuábiamama ora, atšë corente šonjanongmé y ainana šonjántsetšëna chca jabuache soyënga tšëngaftanga jubuábiamama, y chca jamama shëchbuíynaca sënjanoperdé. Pero atšë ndoñe checbátanëbuabiamama atšë jatsmama tšëngaftanga puerte ngménaca chašmotsemnama, ndayá chašmotsetatšëmbuama atšë tša cbababuánÿeshanama.

#### Perdón chë bacna soye amabiamama

<sup>5</sup> Y mora, chë tšëngaftangbeñe puerte ngménana chaotsemnama tojama boyabásabiamama, cha átšbioye ndoñe ngmená chešnátsošë, ntsachetšá tšëngaftanga tcmojabiamcá, ínÿengbioye ínÿengbiamama más. Chca séntsihamo, er atšë ndoñe quetsátsošë jayanama ntsachetšá

tojamama cha más bacna soye tojama ca. <sup>6</sup> Banga tsëngaftanguentsënga ntšamo šmojamcá, chë entšabiamama ya bëts castigo entsemna. Nÿe nÿetšá ponto. <sup>7</sup> Chamna, ndayá mora cmojtsamna jamamna entsemna, cha jtseperdonana y jañëmuana, chca, ndocna tsábe soye jamama ndobená ndoñe chaondëtsemnama, chë castiguama puerte ngménaca bëtsemna causa. <sup>8</sup> Chíyeca, tsëngaftanga cbaimpadá cachiñe tsábá chašminÿinÿé chábioye corente šmobobonshánama. <sup>9</sup> Tempo ya chama tcbonjanëbuábiamama, atše jinÿyama tsëngaftanga añe o ndoñe šmontsanprontánama, lempe ntšamo tcbonjanamëndacá jamama. <sup>10</sup> Chcasna, ndánaca ndayánaca tsëngaftanga chašmojaperdoná ora, átšnaca cha chantseperdoná. Y atše cha chantseperdoná, ndayá japerdonama ndegombre tojtsemnëse. Y chca chanjama tsëngaftangbe tsábiamama y Cristbe delante. <sup>11</sup> Atše tsëngaftangcá, quem entšábioye šcoperdoná chë bëngbiamama tojama bacna soye; chca, Satanás ndoñe chaondobenama bënga jáingñama, er bënga mondétatsëmbo cha inéteboše ndaye bacna soye entšá chaotsamama.

**Ndáyeca Pablo ndoñe natjëmbana  
Troas puebloma tontsanoquedañe**

<sup>12</sup> Atše Troas puebloma sënjanashjango ora, Cristbe tsábe noticiënga jábuayenama, atše sënjaninÿe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama. <sup>13</sup> Masque chca enjamna, atše ndoñe quetstësobena natjëmbana ainana jtsebomnana, er atše sënjanjuabná Jesucristbeyeca bëngbe catšata Tito chentše jinÿenana, pero ndoñe chca.

Chíyeca, Troas pueblentša entšanga sëntanadiošoftaná, y Macedonia luaroye sënjanama.

**Cristoftaca cánÿiñe mo  
canÿacá jtsemnëse, bënga mo  
ayënjanayëngcá jtsemnana**

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëÿënjanama, tempo šojanaménda juabnënga; y chë mora bënga Cristoftaca cánÿiñe mo canÿacá jtsemnëse, nÿets tempo cha šnetsénachayama, mo canÿe ayënjanayacá, y chë nÿets luarenache entšanga Cristbiamama soyënga chamotsábuatmama bëngaftaca cha yojtsamama, mo nda canÿe botamama uanguëtše soye nÿets luarënguenache chauáshanama cuaftsamcá. <sup>15</sup> Er chë inciense tojtsejuinÿinÿana ora, entšábioye tsábá juanguëtšënanama; cachcá Cristbe tsábe noticiënga fstsabuayiná ora, Bëngbe Bëtsabiamama bënga jtsemnana chë ndëmuanÿenga tmojtsama cha oyejuayá chaotsemnana. Inciense tcojtsejuinÿiná ora, nÿetscángbioye juanguëtšënanama. Cachcá, Bëngbe Bëtsabe palabra fstsoyebuambná ora nÿetscanga jouenana, Cristo yojtsatsebacanga y chë pochocánënga jtsemnana imojtsajñëngnana. <sup>16</sup> Chë pochocánënga jtsemnana imojtsajñëngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiamama chë tsábe noticiënga jtsemnana mo canÿe obanabe uanguëtšancá. Pero chë Cristo yochjátsebacangna, tsábe noticiënga tmojóyëngacñeyeca, mochanjobenaye tsábe vida nÿets tempo jtsebomnana; y chca, chëngbiamama chë tsábe noticiënga

jtsemnana mo canÿe puerte botamana uanguëtšancá. Y asna, čnda obenana yojtsebomna chë tšabe noticiënga jábuayenama trabajo jtsemama?

<sup>17</sup>Bënga chë tšabe noticiënga ndoñe queftatabuayiyná, ntšamo ba entšanga imojtsamcá, mo nÿe batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsemncá. Banga chca mondama; bënga ndoñe. Bënga, Cristoftaca cánÿiñe mo canÿacá jtsemnëse, fsëndabuayiyná mo Bëngbe Bëtsabe delante cuaftsemnëngcá, ndegombre nÿe ntšamo tšabá yomncá nÿets ainánaca jtsebošëse, y mo Bëngbe Bëtsabe ichmonëngcá.

**Chë Bëngbe Bëtsabe tsëm tratama buayenana soye**

**3** <sup>1</sup>Chca bëngbiama fstsjanya ora, tšëngaftanga cmojtsinÿana čbënga cachiñe tiftëtontšé cabënga bëtsétsanga enobiamnayana? ¿O bënga šojtsamna, mo inÿengcá, tšëngaftanga juyentšbuáchiyana o juátjañana tsbuanachangá, bënga tšabá fstsamama chéchangaca jinÿanÿiyama? <sup>2</sup>Bënga bëngbe ainaniñe puerte tšabá fsëndétatšëmbo, nÿetsca entšanga, ntšamo tšëngaftanga jtsemëse šmoyencá tmojinÿe ora, tšëngaftanga jtsinÿanÿnayana bënga ndegombre ntšamo tšabá yomncá fstsamama. Chca, tšëngaftanga jtsemnana mo canÿe tsbuanachacá, nÿetscanga jtsabuatmana y jtsobenana jualfana, bënga tšabá fstsamama. <sup>3</sup>Nÿetscanga tšabá mondétatšëmbo Cristo tojanma tšëngaftanga chábeñe chašmotsošbuáchemá, y bëngaftaca cha chca tojanmámnaca. Chca, tšëngaftanga šmondmëna mo Cristbe canÿe tsbuanachacá, ndayécha quem luarentša entšángbioye

tojuyentšbuaché bëngaftaca. Tšëngaftanga ndoñe chešmatanobená Crístbeñe ošbuáchiyënga jtsemnana entšangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tšëngaftanga šmondmëna mo canÿe tsbuanácha cháftaca uabemanëchacá, y ndoñe mo entšángbeyeca uabemana tsbuanachacá. Bëngbe Bëtsá chë mandënga ndëtšbé tablëbenguñe tojanábema, entšanga chamotsobedecënama, pero tšëngaftanga Cristbe buayenana soye tšëngaftangbe ainaniñe šmójyëngacñe.

<sup>4</sup>Crístbeyeca Bëngbe Bëtsábeñe jtsošbuáchiyëse, bënga corente fsëndétatšëmbo chca ndegombre bëtsemnana. <sup>5</sup>Ndoñe quenátsmëna, nÿe bënga cánÿënga quem trabajo jamama fstsobena y játayanana bëngbe soye chë trabajo yojtsemna ca, er bënga jtsobenana chca jamama, nÿe Bëngbe Bëtsabe ujabuáchenanaca; <sup>6</sup>er cha tojama bënga fchayobenama quem trabajo jamama, chë entšanga jábuayenana Bëngbe Bëtsá chabe entšángbioye tojanašebuachená soyëngama, ndayá Cristo tojanma sóyeca, mo canÿe tsëm tratcá, Bëngbe Bëtsá y chabe entšángaftaca. Quem soye ndoñe quenátsmëna mo chë Bëngbe Bëtsá tempo Israeloca entšángbioye léyeca tojanašebuachená soyëngcá. Inÿetšá; entšanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entšá jóbana jtemnana; pero Cristbe tšabe noticiënga, chë tsëm trato, entšanga ainaniñe tmojýëngacñe ora, chë Uámana Espiritu jamana, chë nÿetsca tescama yomna tšabe vida chënga chamotsebomnana.

<sup>7</sup>Quem Moisesbe ley, chë ndoñe tmonjodecema entsanga jóbanama jtsamnana, ndëtšbé tablëbenguinë letréngaca tmojanábema, y Bëngbe Bëtsá Moisésbioye tbojanantšabuaché ora, cha tša buashinÿinÿaniñe tojánabo. Chë causa entsanga ndoñe imontsobena ni mo jinÿana Moisesbe jubiá, er tša ibojtsanjuebëbuashinÿinÿana, Bëngbe Bëtsáftaca tbojánencuententšana tojtanabo ora. Pero betscó tojanéjbana chë jubiá chca buashinÿinÿanana. Chë ley, chë natsana trato, Bëngbe Bëtsá tojanayentšbuaché ora, tša buashinÿinÿanánaca cha tojanmëse; <sup>8</sup>ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espíritu bëngbe ainaniñe cháumashënguama Bëngbe Bëtsá tojama ora. <sup>9</sup>Bëngbe Bëtsá chë ley tojanayentšbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë mocna ora Bëngbe Bëtsá yojtsama entsanga chabe bominiñe tsábenga chamotsemnama. <sup>10</sup>Er chë Bëngbe Bëtsá ley tojanayentšbuaché ora tojaninÿanÿé buashinÿinÿanana, mora jtsinÿnana mo ya tondaye cuabndëtsemncá, chë Bëngbe Bëtsá entsangbiama tsëm soyënga tojtsamama tcojtsönjá ora, chë tša buashinÿinÿanana yojtsemna ora. <sup>11</sup>Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entsangbiama jamama ora, chë ndocna te yochanjochnëngo tempo ora, Bëngbe

Bëtsá más chabe buashinÿinÿanana y uámanana echántsinÿanÿnaye.

<sup>12</sup>Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nÿetsca soyëngama jayanëse, tondayama ntjatauatjácá. <sup>13</sup>Y chca, bënga ndoñe Moisescá queftsátama, chë chabe jubiá chaobuashinÿinÿenama Bëngbe Bëtsá tojanma ora, canÿe entšëjuaca yojtsenamochécjua; cha chca tojanma, chë Israeloca entsanga ndoñe chamondobená jinÿama chë jubiá buashinÿinÿanana ya yojtsëchnëjuana ora. <sup>14</sup>Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbioye tbojanšbuachenacá chëngbiama jamama, Israeloca entsanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiama iytëmena soyënga cuaftsemncá, mo chë Moisés yojtsenamochécjua entšëjuacá. Y chca endmëna, er nÿe Crístoftaca cánÿiñe mo canÿacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana. <sup>15</sup>Y méntscóñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. <sup>16</sup>Pero canÿe entšá chë Bëngbe Utabnabe benache tojishache ora, cha jtsobenana chë soyëngama josértana. <sup>17</sup>Y Bëngbe Utabná y Espíritu canÿa bondmëna, y Bëngbe Bëtsabe Espíritu tojtsennentšë, chë bacna soyënga jamama juabnënga, ni chë ley ndoñe ntsemándayana. <sup>18</sup>Moisés chabe jubiañe Bëngbe Bëtsabe buashinÿinÿanana y

uámanana tojaninýanýé, y chíyeca, canýe entšéjuaca yojtse namochécjua, chca, chénga ndoñe chamondinýama. Pero bēnga ošbuáchiyēnga nýetscanga jtsinýanýnaya Bēngbe Utabnabe buashinýinýanana y uámanana, mo canýe espejo canýe soye tojtsinýanýnacá, y ndoñe queftsátsboše ntšámna jamése chē soye jatsēytamianana. Cha bēngaftaca yojt sama cada te más chē ntšamo cha yomncá bēnga chamotsemnana, cada te más bētsétsanga chē ntšamo cha yomncá jtsemnēse. Chca endmēna ntšamo Bēngbe Utabná yojt sama; y Bēngbe Utabná y Espírítu canýa bondmēna.

**4** <sup>1</sup> Y chca, Bēngbe Bētsá bēngbiana lastemado yómnyeca, quem trabajo šojabanýé, jtsabuayinayama chē Crístoftaca tojašebuachená soyēnga; y chíyeca bēnga ndocna te ntjájbanana ainaniñe añemo bomnana. <sup>2</sup> Bēnga fsēntsaboté chē ínýenga iytēmencá imnétsama soyēnga, chē ínýenga tmojinýe ora chama jtséuatjana, y chē ínýenga entšanga jáingñama imnétsama soyēngnaca, y Bēngbe Bētsabe buayenana soye ndoñe queftsatstróca ndoñe ndegombre soyēngaca. Chamna, bēnga sempre nýe chē ntšamo ndegombre yomncá fsēndbétsoyebuambnaye, mo Bēngbe Bētsabe delante cuaftsemnēngcá jtsamése; y chca, bēnga fsēndbētsama cada entšabe ainanentša juabnēnga chamuayanama, bēnga ndegombre soyēnga fstsoyebuambná ca. <sup>3</sup> Y nderado bēnga chē tšabe noticiēnga fstsabuayiná ora, báseftanga chē soyēnga chaósertama ndoñe tontsopodēnēse, nýe chē pochocánēnga jtsemnana tmojtsajnēngbiana chca jtsemnana. <sup>4</sup> Chēngbiana, chē Crístbeñe ndošbuáchiyēngbiana,

chē quem luarentše mora mandayá, Satanás, tojama chē buayenana soye ndoñe chaondētsēsertánama; chca, chēnga ndoñe chamondinýama chē tšabe noticiēnguentšana puerte bēts y tšabe soyēnga, chē Crísto puerte bētsá y obená yomnana ínyanýnaye soyēnga, nda nýetsca soyēnguiñe Bēngbe Bētsacá yomna. <sup>5</sup> Bēnga ndoñe nýe cabēngbe soyama queftsatabuayiná, ndayá Jesucristbiana mo Bēngbe Utabnacá. Bēnga bēngbiana fsēndbáyana mo oservenēngcá fstsmēna ca, tšēngaftanga jujabuáchama; y chca fsēndbētsama Jesús jaserviama. <sup>6</sup> Er Bēngbe Bētsá, nda quem luare jobojátšama ora tojanmandá binýniñe ibetentšana chaóbcnana, chánaca tojama bēnga ainaniñe tšabá chabe soyēngama chaótsēsertánama, chca bēnga fchayobená juabuátmanana chē Bēngbe Bētsabe uámanana y obenanentšana inétsobocana osertánana, ndayá Crístbeñe bēnga mondonýá.

#### **Bēnga fsēndoyena Crístbeñe jtsošbuáchiyēse**

<sup>7</sup> Pero chē puerte tšabe y bēts soye, chē Crístbe buayenana soye, bēnga mondbomna cuerpiñe, bēngbe ainaniñe; y chē cuerpēnga jtsemnana nýe mo matbajēngcá, ndoñe yapa obenana ntsebomnana, chca, jinýanýiyama tša bēts obenana Bēngbe Bētsábíocana yóbocanama, y ndoñe bēngbentšana. <sup>8</sup> Y chca, bēnga nýetsca padecena soyēnguiñe vida fsēndbomna, pero ndoñe queftsátsmēna ndobenēnga chē padecena soyēnguentšana tšabá jabocanama; ndoñe queftsátsatšēmbo ndayá jamama šojtsamna, pero ndoñe queftsátsmēna ntsobencá jtsobátmanama quem padecena

soyënguentšana tšabá jabocnama. <sup>9</sup>Inyenga montsama bënga puerte fchaisufrima, pero Bëngbe Bëtsá ndoñe nÿe cachcá šontsabashejuana; mo nda ínÿabioye cuafjutšencá tmojtšentsjaná ora, ya jóbama jtseprontánana, uayayënga bënga jtšëbáyama imojtsejuabnangbe cucuatšinë fsëntsemna, pero cabá ndoñe ntjobáyana. <sup>10</sup>Inyenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca bëngaftaca endopasana, chca, ínÿenga chamobená jinÿama Jesús bëngbeñe vida yobomnama. <sup>11</sup>Er bënga vida fchabomnëntscuana, sempre puerte resjo bëngbiana jëftsemnana jóbana, Jesúsbioye servena causa; y chca endmëna, ínÿenga chamobená jinÿama Jesús vida yobomnama bëngbe cuerpiñe, chë canÿe te yochjopochóca cuerpo. <sup>12</sup>Y chca, bënga tša fsëndësufrina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nyetsca tescama yomna tšabe vida chašmotsebmnama.

<sup>13</sup>Bëngbe Bëtsabe uabemana palabrënguiñe endayana: “Atše sëntsanosbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca béngnaca Bëngbe Bëtsábeñe fsëntsošbuaché y chabiana fsëntsoyebuambná. <sup>14</sup>Er bënga fsëndétatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Cristoftaca cánÿiñe mo canÿacá jtsemnëse, bënga chámuatayenama, y tšëngaftangaftaca cánÿiñe cha yochtsemnoye šochjúshejango.

<sup>15</sup>Lempe ntšamo bënga fstsama y fstsësufrincá tšëngaftangbe tšabiana endmëna; chca, más becá entšanga chábeñe chamojtsošbuaché ora, ba tšabe bendicionënga Bëngbe Bëtsá entšangbiana jtsamëse, más becá entšángnaca chábioye chamotsatschuaná, ndayá chëngbiana cha yochjamama; y lempe chca, Bëngbe Bëtsá puerte uamaná y obená yomnama nyetsca entšanga chamotsichámuama.

<sup>16</sup>Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jtsopochócyana, Bëngbe Bëtsá jamana chë bëngbentsana nyets tempo vida yochtsebmna soye, cada te más obenana chaotsebmnama; y chca, bënga jtsemnana mo tsmëma entšangcá. <sup>17</sup>Ntšamo bënga mora fsëndësufrincá endmëna nÿe quem luarentše vida tmojtsebmnëntscuana, y chca, chë soye jtsemnana mo canÿe nduámana soyacá; pero ntšamo bënga fsëndësufrincá josérviana bënga jtsebmnama chë Bëngbe Bëtsá šochjatsataye puerte bëts uámanana y obenana, cháftaca nyets tempo vida jtsebmnama, chë ndayá yomna nyetsca soyëngama más bëts y uámana soye. <sup>18</sup>Er bënga nÿe chë tojtsopodena jinÿama soyënguiñe ndoñe nyets tempo queftsatsjuabná, ndayá chë ndoñe yondopodena jinÿama soyënguiñe; er chë bënga imobena jinÿama soyënga ndoñe nyetsca tescama ntsemnana; pero chë bënga ndoñe mondobena jinÿama soyënga cocayé nyetsca tescama jtsemnana.

**5** <sup>1</sup>Bënga mora mondbomna canÿe cuerpo quem luarentše vida jtsebmnama. Quem cuerpo yomna mo chë jtsatsjacama yopodena yebncá, cánÿentše ndoñe

nÿets tempo ntjéftsemnana. Bënga mondétatšëmbo, quem cuerpo canÿe te tojtsopochocase, Bëngbe Bëtsá yochjama bënga tsmëma cuerpënga chamotsatsbomnama, celoca nÿetsca tescama vida jtsebomnama, Bëngbe Bëtsabe pormana cuerpënga y ndoñe entsangbe pormana cuerpënga.

<sup>2</sup> Chíyeca, bënga quem luarentše chca vida tmojtsebomnëntscuana, yapa tmojtseufrina causa, bënga tša jtsebošana betesco Bëngbe Bëtsá celoye chašúyambama, y bënga nÿets tempo celoca jtсийenama tsëm cuerpo jtsebomnama cha chaomama; <sup>3</sup> chca, Cristo yochjésabo ora, bënga chë tsëm cuérpoca chamotsemnana, y ndoñe nÿe espíritu ndocna cuérpoca.

<sup>4</sup> Bënga quem cuerpiñe, chë quem luarentše vida jtsebomnama cuerpiñe chamojtсийenëntscuana, yapa padecena soyënguñe sufrina causa, bënga jabuache mochanjášachna; chca echántsemna ndoñe nÿe chë espíritu ndocna cuérpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fséntseboše chë béngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nÿetsca tescama vida jtsebomnama.

<sup>5</sup> Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espíritu bëngbe ainaniñe cháuamashënguama, chca béngbioye jinÿanÿiyama, bënga ndegombre mochjóyëngacñe ndayá Bëngbe Bëtsá tojašebuachenacá.

<sup>6</sup> Y chca, bënga sempre ainaniñe bëts añemo fchandbétsebomna. Bënga fsëndétatšëmbo, quem cuerpiñe cabá vida bënga mochjéftsebomnëntscuana,

bënga ndoñe mochántsemna Bëngbe Utabná yojtsemnentše. <sup>7</sup> Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nÿe ndayá jinÿama tmojtsobenama.

<sup>8</sup> Bëngbe fséntsemna ainaniñe bëts añémoca, y más fséntseboše jájbanana quem cuerpiñe vida jtsebomnana, jama Bëngbe Utabnáftaca nÿetsca tescama vida jtsebomnama. <sup>9</sup> Chíyeca bënga bëtscá fsëndëntšena Bëngbe Utabná sempre oyejuayá jabemama, masque bënga quem luarentše quem cuérpoca tmojtсийena, o ya ndoñe. <sup>10</sup> Er nÿetscanga šontsamna jashjanguana Crístbe puestoca tribunalentše, cada ona ntšamo yomerecencá chaóyëngacñama, ntšamo tsábá o ndoñe tsábá quem luarentše chabe cuerpiñe vida yojéftsebomnëntscuana tojéftsemcá.

**Jábuayenama ntšamo Bëngbe Bëtsá  
inama entsanga tempcá tsábá  
cháftaca chamotsatsmënama**

<sup>11</sup> Chcasna, Bëngbe Utabná nÿetscangbiama chë más bëtsá yomnama jtsejuabnyëse, bënga bëtscá fsëndama entsanga jáyëñjanama, bënga tsábá ftsamama chamotsejuabnama. Pero Bëngbe Bëtsá ya endétatšëmbo ntšamo bënga fstsmënama, y atše sentsobátmana tsëngaftángnaca chca tsábá chašmotsetátšëmbo, tsëngaftangbe ainantšša juabnéngaca, chë bëngbiama añe ca cmojtsëtsësná juabnénga. <sup>12</sup> Bënga ndoñe cachiñe cabëngbiama queftsatoyebuambná; chca fséntsichamo ndayá tsëngaftanga oyejuayënga bëngbiama chašmotsemnana, chca, tsëngaftanga jojuama chašmobenama, chë uámana soyënga tmojtsebiamnángbioye ndayá entsanga canÿe entsábeñe

tmojtsonyáca y ndoñe chca chë entšabe ainaniñe tomna soyëngaca. <sup>13</sup>Er bënga mo chë ndoñe corente juabna ndbomnëngcá ftsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnëngcá ftsamëse, jtsemnana tsëngaftangbe tsábiana. <sup>14</sup>Bënga chca fsëndmëna, Cristo šondábabuanyëshanayeca, y chë soye endama bënga nÿe cha fchaitseservënana, er bënga fsëdenojuabná y puerte tsábá fsëndëtatšëmbo, canÿa, Cristo, nÿetscangbiana tojanóbana; y cha nÿetscangbiana tojanóbana yca, endmëna mo cha tojanóbana ora, nÿetscanga cháftaca cuafjobancá. <sup>15</sup>Y Cristo nÿetscangbiana tojanóbana, chë quem luarentšë vida bomnënga ndoñe más nÿe cachëngbiana chamondëtsiyenana, sinó chabiana, nda chëngbiana tojanóbana y tojtanayena. <sup>16</sup>Chíyeca, bënga ya ndoñe ndocnabiana queftsatsjuabná ntšamo entšanga quem luarentšë jtsejuabnayama monduamancá; masque ndegombre bënga chca Cristbiana fsënjanjuabná, mora ya ndoñe chca chabiana queftsatsjuabná. <sup>17</sup>Chcasna, nderado nda Crístoftaca cánÿiñe mo canÿacá tojtsemna, Bëngbe Bëtsá tojama cha mo canÿe tsëm entšacá chaotsemnana. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inÿe soyënga y tsëm soyënga. <sup>18</sup>Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crístoftaca tojama bënga tempcá tsábá cháftaca chamotsatsmënama. Y cha bënga canÿe trabajo šonjanabanÿé, bënga

entšanga jábuayenama, Bëngbe Bëtsá inétsama entšanga tempcá tsábá cháftaca chamotsatsmënama, y entšanga jujabuáchama chca chamotsemnana. <sup>19</sup>O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tsábá cháftaca jtsatsmënama, y chca, chënga chamotsobena chëngbe bacna soyëngama perdonánënga jtsemnana, y chë soyëngama nÿetsca tescama castigánënga jtsemnana ndoñe chaondétsamnama. Y bënga šonjanabanÿé chë trabajo, entšanga jtsabuayiyayama ntšamo Bëngbe Bëtsá inama entšanga tempcá tsábá cháftaca chamotsatsmënama. <sup>20</sup>Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentšëna Bëngbe Bëtsáftaca tempcá tsábá jtsatsmënama. <sup>21</sup>Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canÿe bacna soyënga amá cuafsemncá, chca, bënga Crístoftaca cánÿiñe mo canÿacá jtsemnëse, Bëngbe Bëtsabe bominÿiñe tsábënga jtsemnana chamotsobenama.

**6** <sup>1</sup>Chcáyeca, bënga Bëngbe Bëtsáftaca cánÿiñe trabájayënga quetsomñecana, cbontsaimpadana ndoñe nÿe bonamente chašmondóyëngacñe chë Bëngbe Bëtsá yojtsama soyënga, tsëngaftangbiana tsabe juabna jtsebomnëse. <sup>2</sup>Er Bëngbe Bëtsá chabe uabemana palabrenguiñe mëntšá tojánayana:

Chë tsabe soye jamama tsábá šonjaninÿana ora, atšë tcbonjanoyeuná; chë ácbioye jatsbocama te, tcbonjanájabuache ca.



Šmochjinÿe. Mora entsemna chë mocna ora Bëngbe Bëtsá tsábá ibojtsinÿana tsábe soye jamama; mora entsemna chë mocna ora Bëngbe Bëtsá yojtseboše aca jatsbocama.

<sup>3</sup>Bënga ndocna bacna soye queftsátama, ndayá chaoma entsanga chë tsábe noticiënga chamotsábotema, chca, ndocná podesca chaondëtsóyebuambnama bëngbe trabajuama, Cristbiamá. <sup>4</sup>Inÿetsá, bëngna nÿetsca soyënguiñe fsënjaniyena mo Bëngbe Bëtsabe oservenëngcá; Bëngbe Bëtsábeñe obatmancá puerte uantadënga jtsemnëse, fstsésufrina ora; puerte padecena soyënguiñe bëtsemna causa, ndayá jamama ndoñe fséntsetatšëmbo ora; y ainaniñe puerte ngménaca fstsemna ora; <sup>5</sup>ínÿenga šojtsatsetšená ora; cárceloye šojautame ora; entsanga bëngbe contra tmojtsebouénana ora; jabuache trabájayiñe puerte uamëntšnayënga fstsemna ora; bayté ntsamanacá fstsemna ora; y jasama tondaye fséntsebmoma ora. <sup>6</sup>Bëngnaca fsëntsinÿanÿná Bëngbe Bëtsabe oservénënga fstsëmënama, puerte tsábe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; ínÿenga ntšamo šojáborlaye ora puerte uantadënga jtsemnëse; ínÿengbiyoye puerte bonshanánaca jtsëñÿayëse; Uámana Espíritu bëngbe ainaniñe jtsebmomnëse; y ndegombre nÿets ainánaca nÿetscanga jtsababuánÿeshanëse; <sup>7</sup>ntšamo Bëngbe Bëtsabiamá ndegombre yomncá jtsabuayiynayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyënjanama y chëngbiamá jenéuyanama soyënga jtsebmomnana, chë Satanásbiyoye jáyënjanama y chabiamá jenéuyanama

ndayá Bëngbe Bëtsá šojatšatacá jtsebmomnëse; y Bëngbe Bëtsá chca tojama, er cha tojama bënga chabe bominiñe tsábënga chamotsemnana. <sup>8</sup>Bënga fsëntsinÿanÿná Bëngbe Bëtsabe oservénënga fstsëmënama, ínÿenga bëngbiamá tsábe soyënga tmojtsejuabná ora y bënga nduámanënga jtsemnana chënga tmojtsama ora; ínÿenga tsábe soyënga bëngbiamá tmojtsoyebuambná ora y chënga bëngbiamá podesca tmojtsichamo ora; bënga áingñayënga fstsëmëna ca básëftanga tmojtsejuabná ora, pero bënga ntšamo ndegombre yomncá jtsóyebuambnayëse. <sup>9</sup>Mo nduamanëngcá bënga entsángbeñe jtsëñÿayana, pero banga corente tsábá bënga šondéubuatma; bëngbiamá sempre resjo endmëna jóbanama, pero šmochjinÿe, bënga sempre vídaca chentšana jatóbocañana; bënga juatsjínÿama jobenayama, Bëngbe Bëtsábeyeca castigánënga fchandbëtsemna, pero nÿa jóbanana ndoñe. <sup>10</sup>Masque ngménënga fstsemna, ainaniñe sempre oyejuayënga fchandbëtsoñe; masque ndbomñëjemëngcá, pero fchandbëtssama banga Bëngbe Bëtsábíocana bëtscá chamotsebmomnana; quem luarentša soyënga tondaye queftsátssomna, pero Bëngbe Bëtsabe entsanga quetsomñecana, ndegombre lempe fsëndëtsóbmomñe.

<sup>11</sup>Tšëngaftangbiamá, Corintoca entsanga, lempe fsëñjayana, tondaye ntjaitëmcá; nÿets ainánaca, corente cbondábabuanÿeshana. <sup>12</sup>Bënga puerte cbondábabuanÿeshana, pero tšëngaftangna ndoñe yapa queścátababuanÿeshana. <sup>13</sup>Atše cbontsaïmpadana, mo canÿe taitá chabe básënga cuaftsaimpadancá, atše

puerte chašmotsebobonshánama, er atše corente cbondábabuanÿeshana.

**Bënga mondmëna mo Bëngbe  
Bëtsabe bëts yebncá**

<sup>14</sup> Crístbeñe ndoşbuáchiyëngaftaca ndoñe şmatjenutaná ndayánaca jamama, er chca, chëngaftaca şmatjábocana mo chë jaárama uacnata ndoñe cachénchechata tbontsemncá. Ndegombre, chë tşabe soyënga amá y Bëngbe Bëtsabe bominÿiñe tşabia mëná, ñya tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entşangbe juabna binÿnayáftaca vida bomná, ñya tondaye ntsebomnana chë ñye mo ibetiñcá juabnayáftaca.

<sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe oşbuachiyá y chábeñe ndoşbuachiyáftaca. <sup>16</sup> Ndocna soyiñe cachcá ntsemnana, Bëngbe Bëtsabe bëts yebna, chë ñye canÿe Bëngbe Bëtsábioye jadórama yebna, y chë entşangbe pormana soyënga, mo díosënga cuaftsemncá jtsadoránana soyënga; chca endmëna, er bënga, ñyetscanga cánÿiñe Jesucrístbeñe oşbuachiyëngcá, mondmëna mo Bëngbe Bëtsá Ainabe bëts yebncá, ntşamo Bëngbe Bëtsá chabe uabemana palabrënguiñe chabe entşangbiama tojanayancá:

Chëngbeñe vida chántsebomna y chëngbenache chántšana; atše chëngbe Bëtsá chántsemna y chëngna atşbe entşanga ca.

<sup>17</sup> Chíyeca mëntşánaca Bëngbe Utabná chabe entşanga tojanéyana:  
“Chë bacna soye amëngbentsána şmochjésebocana, y

chëngbentsána şmochtsojuánañe; tondaye şmattsebana, ni şmattsama ndayá Bëngbe Bëtsabe entşangbiama ndoñe tşabá tontsemncá.

As cbochanjúbuaja, <sup>18</sup> y chántsemna mo canÿe taitacá tşëngaftangbiama, y tşëngaftangna mo atşbe uaquiñënga y bemiangcá. Chca séntsichamo atşe, tşëngaftangbe Utabná, ñyets obenana bomná ca” —chiñe enduábemana.

**7** <sup>1</sup> Chcasna, atşbe bonshánënga, chca endmëna ntşamo Bëngbe Bëtsá şojaşebuachenacá. Chíyeca şontsamna, Bëngbe Bëtsabe delante ñyetsca soyënguiñe tşábënga jtsemnana, bëngbe cuerpama o espíritu biama bacna soye ndoñe más ntamcá; y Bëngbe Bëtsá ñyetscangbiama más uamaná yomna ca mondejuabnáyeca, lempe ntşamo tmojobenacá mochtsiyena mo chabe entşangcá, ñyetsca soyënguiñe puerte tşábënga jtsemnëse.

**Ntşamo chë Corintoca entşanga  
juabna tmojantrocá**

<sup>2</sup> Bëngbiama şmochtsenójuabnaye tşëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más bacna entşá chaotsemnana, y ndocnábioye chibiatsingñé. <sup>3</sup> Atşe chca ndoñe quetsátichamo, ndoñe tşabá şmonjama ca tşëngaftangbiama jayanama, er ntşamo ya tcbonjauyancá, atşe tşëngaftangbiama sempre ainaniñe puerte bonshanánaca sëndbétsenójuabnaye; y chca, mo átşëftaca canÿiñcá şmochántsemna,

masque chayóbana o cabá vida chaitsóboñése. <sup>4</sup> Atše puerte tšabá sëndétatšëmbo, ntšamo tšabá yomncá šmochtsamama; y tšëngaftangbiana puerte oyejuayá sëntsemna. Lempe ntšamo tsésufrincá tsiyename, atšbe ainaniñe bëts añemo sëndëtsóboñe y corente sëntsoyejuá.

<sup>5</sup> Macedonia luaroye fsënjánashjajna orscana, ndoñe luare queftsátbomna jóchnama, sinó nyetsca soyënguñe fsëndëpadecena: chë bëngbe buayenana soyama contra tmojtsemnéngaftaca jabuachana enatsëtsnayëse, y bëngbe ainaniñe jtsauatjëse. <sup>6</sup> Pero Bëngbe Bëtsá, chë yapa añemo ndbomnéngbioye endbetsañemuayá, tojanma bënga ainaniñe más añemo fchaitsebomnama, Tito moye tonjánashjango ora. <sup>7</sup> Y cha tonjánabo ora, bënga ndoñe más añemo quefstétebomna nyë cha tojánashjanguama, sinó tšëngaftanga šmojanájabuachama y ainaniñe añemo chaotsebomnama šmojanmama. Cha šonjanéyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngménaca šmojamna, atšbiana ndoñe tšabá šmonjanma causa, y ntšamo tšëngaftangbiana atšbe tšabiana puerte iúamanana; y quem chabe noticiéngaca, cabá más sëntsoyejuá.

<sup>8</sup> Er masque tšëngaftanga tša ngménaca šmojamna chë tcbonjanëbuábiana tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatšëmbo chë tsbuanácha básefta tescama ngménënga tmojánabiamama, <sup>9</sup> mora atše puerte oyejuayá sëntsemna, ndoñe tšëngaftanga ngménënga šmojamnama, ndayá chë šmojánbomna

ngménana tojanmama tšëngaftanga chašmuenójuaboma ndoñe tšabá šmotsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiana chibiatsma.

<sup>10</sup> Ntšamo Bëngbe Bëtsá tojtsebošcá ngménana bomnentšana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entšábioye juanatsana atsbocaná chaotsemnama, y cha ndocna te ntjátsjuabnyana más tšabá yojamna ndoñe chca ntjatstrócana ca. Pero ntšamo chë nyë quem luarama enójuabnyaye entšanga mondbetsebomncá ngménana bomnentšana, ndoñe ntjóbcnana juabna jatrócana; chentšana jóbocnana nyë nyetsca tescama castiganá jtsemnana, mo nyetsca tescama cuafjobancá.

<sup>11</sup> Šmochjinÿe ndayá tojóbcna, ntšamo Bëngbe Bëtsá inabošcá ngménana bomnentšana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnana jtsauatjámncaca. Chentšana, tšëngaftanga tša šmojtšanboše atše jinÿama; y šmojtšanprontana lempe jamama chca bacna soye ndoñe más chaondëtsemnama y chca tojanmábioye jacastígama. Nyetsca chë soyënguñe tšëngaftanga šmonjinÿanÿé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnama chacmotsamnama. <sup>12</sup> Y chca, atše chë tsbuanácha tcbonjanëbuábiana

ora, ndoñe checbátanëbuabiamá chë puerte bacna soye tojanmábeyeca, ni chë bacna soye tojanoyëngacnábeyeca; ndayá tsëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminñanyé tsëngaftanga bëngbe tsábiamá puerte šmenójuabnoma.

<sup>13</sup> Chíyeca bënga más añemo ainaniñe fsëntsebomna.

Pero ntsachetšá añemo fstsombomna, masna puerte oyejuayënga fsëntsemna, er bënga fsënjinye Tito tša oyejuayá, er chabe ainaniñe lempe natjémbana yojtsemna nyetsca tsëngaftangbiama.

<sup>14</sup> Tito tsëngaftanga jányama cabá nda ora, atše cha sënjanianya tsëngaftanga šmochjanóyeunaye chë atše tcbonjanébuaja palabra ca; y tsëngaftanga ndoñe chešmatsma atše chaitšëuatjama chca tijánayanama. Inyetsá, lempe ntšamo tbojayuancá ndegombre endmëna; cachcá, ntšamo bënga Títbioye fsënjaniyancá ndegombre entsemna, chë tsëngaftangbiama ftsóyejuama. <sup>15</sup> Y mora Tito más cmontsababuánñeshana, ntšamo cha tcmojanamëndacá ndayá tsëngaftanga šmojanmama, y ntšamo puerte respétoca y mo uamaná cuaftsemncá chabiamá jtsejuabnayëse šmojanofjama tojtenojuabó ora. <sup>16</sup> Atše puerte oyejuayá sëntsemna, er atše sëndétatšëmbo tsëngaftanga ntšamo tsábá yomncá nyetsca soyënguñe šmochtsamama.

**Chënga jáñemuayama, inñe  
ošbuachiyëngbioye nyets  
ainánaca jujabuáchama**

**8** <sup>1</sup> Y mora, Jesucrístbeyeca catšátanga, bënga fsëntseboše tsëngaftanga chašmotsetátšëmbo ntšamo Bëngbe Bëtsá bëtscá tsábe

bendicionënga tojama Macedonia luarentše ošbuachiyëngcá enefjuanëngbiama. <sup>2</sup> Chënga puerte tmojasufrí, y chora chca, chënga tmojinñanyé becá imošbuáchema y tša imoyeuama; y masque puerte ndbomnëjëmënga, chënga nyets ainánaca bëtscá tmojanacaredadó Jerusalenentša ošbuachiyënga ndbomnëjëmëngbiama. <sup>3</sup> Atše sëndétatšëmbo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobenëtšana cabá más, chënga chca imobóseyeca. <sup>4</sup> Tša šonjánaimpadana chëngbioye jálesenciamá ndayánaca jamama, Jerusalenoca ošbuachiyëngbioye jujabuáchama. <sup>5</sup> Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianya lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. <sup>6</sup> Ndayá Macedonioca ošbuachiyënga tmojanmama bënga añemo fsënjányëngacñeyeca, bënga Tito fsënjaimpadá chë tsábe trabajo chaopochocama, chë tsëngaftangbeñe crocénana játbanana, Jerusalenoca ošbuachiyënga jujabuáchama, ndayá cha jamama tojanbojatšecá. <sup>7</sup> Y morna, ntšamo tsëngaftanga nyetsca soyënguñe tša šmomncá —puerte ošbuachiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jasërviamá y bëngbioye corente ababuánñeshanënga —cachcá, mórnaca bëtscá šmochjama quem trabajuñe chë ošbuachiyënga ndbomnëjëmëngbiama, tsëngaftangbe bonshánana jtsinñanyayëse.

<sup>8</sup> Chca ndoñe quecbatëtsëtsná mo canye mandcá; atse séntseboše ndayá nye tšëngaftanga jáuyanana ntšamo ínÿenga bëtscá tmojatrabajá chë ndbomnjémëngbiama, tšëngaftángnaca cachcá chašmotsamama; y chca, chašminÿanÿema chë tšëngaftanga šmobomna bonshánana ndegombre bëtsemnama. <sup>9</sup> Er tšëngaftanga šmondétatšëmbo ntšamo Bëngbe Utabná Jesucristo puerte tšabe soyënga bëngbiama tojamama, béngbioye puerte jtsababuánÿeshanëse. Celoca, cha cabá quem luaroye ndabo ora, cha bëtscá inabomna; pero tšëngaftanga ababuánÿeshanayeca, mo canye puerte nduamanacá tojanóbema. Y mora, Cristo mo canye nduamanacá tojóbmeyeca, Bëngbe Bëtsá puerte tšabe soyënga šojatšatá.

<sup>10</sup> Tšëngaftangbe tšabiama mëntšá cbabuayená, ntšamo quem soyiñe šmochjamama. Chë inÿe uata tšëngaftanga šmonjanbojatšé, ndoñe nye chë ndbomnjémëngbiama jacjayama, ndayá chca jamama jtsëbošámnaca. <sup>11</sup> Morna, chë ndbomnjémëngbiama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayëse. <sup>12</sup> Er canye entšá, jatšayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

<sup>13</sup> Ndoñe quenátsmëna, tšëngaftanga puerte ujabótënga chašmoquedá, ínÿengbioye atšatnaye causa, chënga ndoñe yapa ujabótënga chamondétsemnama. <sup>14</sup> Atšë

séntsichamo ndayá nyëtscanga chamotsenajabuachana, chca tojtšéjaboto ora ca. Mora, chë bëtscá šmobomnentšana šmontsobena chënga jujabuáchana, ndayá tojtsabuáshebencá jatšatayëse; y inÿe orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyëtscanga jójëngacñana ndayá tojtšéjaboto ora. <sup>15</sup> Ntšamo Bëngbe Bëtsabe uabemana palabrënguinië endayanacá:

Chë tša bomnábioye ndoñe chebatanójama;  
y chë nye batšá bomnábioye,  
ndoñe quebënjatanbuášhbena ca.

#### Tito y chabe enutënga

<sup>16</sup> Bëngbe Bëtsá šcuatschuá, tšëngaftanga jtsanÿenama Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá. <sup>17</sup> Er tšëngaftangbioye chaotsama bënga fsëñjanimpadá ora, cha oyejuayá añe ca tonjánayana choye jama; y chabiama puerte enduámama tšëngaftangbe tšabiana; chíyeca mora echanjá tšëngaftanga jányama, chca jamama cachá yobóšeyeca.

<sup>18</sup> Títoftaca, canya Jesucristbeyeca bëngbe catsata fséntsichamná; chabiama puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayinayama. <sup>19</sup> Y ndoñe nye chë soye, sinó quem luarentšë ošbuachiyëngcá enefjuanënga cha tmonjuábuayana béngaftaca Jerusalenoye jama, y jujabuáchama chë ndbomnjémëngbiama trabajuinië; chë trabajo endmëna bonshánana jinÿanÿiyama; chca fséntsama, Bëngbe Utabná jtsatschuanayama y jinÿanÿiyama bënga chca

jujabuáchama tša fstsošama.

<sup>20</sup> Títoftaca cha fsentsichamná, chca, ndocná chaondétsichamo bēnga ndoñe tšabá tifjama ca, ntšamo játbanama cmojtsamniñe, chē becá juabónana játbanama, ndbomnjémēnga jujabuáchama; <sup>21</sup> er bēnga fsēndama lempe ntšamo fstsobencá, ndoñe nye ntšamo Bēngbe Bētsabe bominyiñe tšabá yomncá jamama, ndayá ntšamo entšangbe bominyiñe tšabá yomncánaca.

<sup>22</sup> Chátaftaca inya Jesucristbeyeca bēngbe catsátnaca fsentsichamná; cha bēnga ba soyiñe šonjinñanýe cha yojtseboše bētsá jamama, Cristo jaserviama, y mora más, er cha puerte bētsá entsejuabná tšēngaftanga puerte tšabá šmochjamama.

<sup>23</sup> Y Titbiamna, cha quem trabajuiñe atšbe enutá endmēna, y atšcá tšēngaftangbiama endētrabája; y chē inýata Jesucristbeyeca bēngbe catsátatbiamna, chata bontsemna quemuentša ošbuachiyēngcá enefjuanēngbe ichmónata, chēngbiama chabóyebuambama; y chē bontsama sóyecna, chata Crístbioye corente jtsatschuanayana.

<sup>24</sup> Chíyeca, chēngbioca ošbuachiyēngcá enefjuanēnga chca chamotsetatšēmbuama, chē ichmona boyabásēngbioye šmochjínñanýiye tšēngaftanga ndegombre chēnga šmojtsababuánýeshanama, y bēnga razón fstsebonnama tšēngaftangbiama oyejuayēnga jtsemnama.

#### Chē inye ošbuachiyēngbiama crocénana játbanama

**9** <sup>1</sup> Chē Jerusalenoca Bēngbe Bētsabe entšangbiama crocénana játbanamna ndoñe quenátsiyta tšēngaftangbioye jatēbuabiamnayama, <sup>2</sup> er atše ndegombre séntsetatšēmo

tšēngaftanga tša šmojtseboše chca jujabuáchama. Macedonioca entšanga puerte oyejuayá sempre sēndbētsētsēsnaye, Acaya luaroquēnga chē inye uatscana quem trabajuiñe jujabuáchama šmoprontánama; y chē jujabuáchama tšēngaftangbe bētsá juabnēnga tmojama banga quem luarentšēnga bētsá añemo chamotsebonnama, chēngnaca chē trabajo jamama. <sup>3</sup> Pero Jesucristbeyeca quem catsátanga séntichamná, ntšamo bēnga oyejuayēnga tifjayancá tšēngaftanga chašmotsamama, chē tšēngaftanga quem trabajuiñe bētsá šmochjama ca; chca, ntšamo tijanayancá ndoñe nye bonamente chaondésemnama, y ntšamo sēnjanayancá tšēngaftanga chašmotseprontánama; <sup>4</sup> er nderado báseftanga Macedonioquēnga átšeftaca tmojá y choca ndēprontánēnga tcmojánýena chē ndbomnjémēngbiama ujabuáchenanaca, chē soye nanjama bēnga fchaitšēuatjama, er ba soye fsēnjayana bēnga ndegombre fstsetátšēmo tšēngaftanga prontánēnga šmochtsemna ca; y ndegombre, tšēngaftangbiama cabá más ouatjca nántsemna.

<sup>5</sup> Chíyeca, tšabá šonjuínñanana Jesucristbeyeca quem catsátanga jáimpadana chēnga atšbe natsana chamotsama tšēngaftanga jányama, y chacméjabuachama chē juabónana játbanama, ndayá tšēngaftanga tempo šmonjanašebuachenacá. Chca, atše choca chajáshjango ora, tšēngaftangbe juabónana chaotseprontana. Chca, tšēngaftanga šmochanjínñanýiye ndbomnjémēngbiama šmojacjá, chca jamama tša šmobóšeyeca, y ndoñe nye batšatema jatšatayama y tšēngaftangbiama bētsá jobuájuaama šmojtseboše.

<sup>6</sup> Quemuiñe šmochtsenójuabnaye: Nda nye batšá tojajé, cach batšá chentsána josháchiñana; y nda bëtscá tojajé, cach bëtscá chentsána josháchiñana. <sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngménaca o nye ínÿenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana. <sup>8</sup> Bëngbe Bëtsá endobena jamana chábentsána nyetsca tšabe bendicionënga y bëtscá soyënga tšëngaftanga chašmotsebonnama; chca, ntšamo nyetsca soyënguiñe cmojtsëjbotcá sempre chašmotsóbomñana, y cabá más bëtscá chašmotsebonnama, nyetsca tšabe obrënguiñe ínÿenga chašméjabuachama. <sup>9</sup> Bëngbe Bëtsabe uabemana palabrenguiñe, mëntšá endayana chë bëtscá tojacjabiana:

Cha nyets ainánaca  
 ndbomnjémënga bëtscá  
 jatšatayana;  
 y chë tšabe soyënga ntšamo  
 cha tojtsamcá nyets tempo  
 jëftsemnana.

<sup>10</sup> Bëngbe Bëtsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjbotcá, y echanjama, tšëngaftanga cabá más tšabe soyënga chašmotsamama. <sup>11</sup> Bëngbe Bëtsá echanjama tšëngaftanga nyetsca tšabe soyënga chašmotsebonnama, chca, tšëngaftanga nyets ainánaca puerte ínÿengbioye chašmatšatama, y bëngbeyeca, chë mochjóyëngacñënga Bëngbe Bëtsá chamotsatschuanama; <sup>12</sup> er chë ujabuáchenana Bëngbe Bëtsabe entšanga tojatšatá ora, ndoñe nye ndayá tojtsëjbotcá jatšatayana, ndayá chënga Bëngbe Bëtsá chamotsatschuanámna

jamana. <sup>13</sup> Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguiñe iuayancá tšëngaftanga šmobedecénama, y ntšamo tšëngaftanga tšabá jamëse, nyets ainánaca bëtscá soyënga chënga y nyetscanga šmojátšatama. <sup>14</sup> Y chënga tša mochántseboše tšëngaftanga jányama y tšëngaftangbiana Bëngbe Bëtsá mochántseimpadana, er cha bëtscá tšabe soyënga tšëngaftangbiana tojama. <sup>15</sup> iBëngbe Bëtsá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

**Ntšamo Pablo tojánayana ínÿenga  
 chabe contra imojtsichamo ora**

**10** <sup>1</sup> Y mora, atše Pablo, cbochanjáimpada, tšëngaftangbioye puerte bonshanánaca jtsënyayëse, y tšëngaftangbiana tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsenóbema atše tšëngaftangaftaca stsemna ora, pero corente añemo bomná tsenóbema jabuache soyënga jayanama tšëngaftangbentsána bënoca stsemna ora ca. <sup>2</sup> Tšëngaftanga cbontsaimpadana, tšëngaftanga jányama chaijá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá šëntsetatšëmbcá ndayá báseftangaftaca jamama šojtsotocana, chë ndëmuanyënga imojtsejuabná, nye bënga tšabá jtsomñama juabnéngaca bënga ftsiyena ca. <sup>3</sup> Ndegombre

bënga quem luarentşe fsëndoyena, pero ndoñe queftsátspelia Cristbiana, ntşamo quem luarentşa entşanga monduamancá; <sup>4</sup> er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nÿe quem luarama enójuabnaye entşanga japéliama monduamancá, ntşamo nÿe chënga tşabá jtsomñama juabnënga yomncá. Inÿetşá, chë ndaye soyëngaca bënga fsëndépelia, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayëñjanama, puerte jabuache soyënga jayëñjanama. Mo nda canÿe uayayábioye jtsepochocancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiana, <sup>5</sup> y Bëngbe Bëtsabe osertánana jtsabotema juabnënga bomnëngbiana, bënga fsëndama ntşamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntşamo Cristo yomandacá jtsamana. <sup>6</sup> Bënga fsëntseprontana chë Cristbiana nduauenanënga jácastigama, lempe ntşamo Cristo cmojtsamëndacá tşëngaftanga chaşmojtsama ora.

<sup>7</sup> Tşëngaftanga ndayánaca jtsonÿayana nÿe ntşamo tbojtsabinÿnécá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crístbenga fstsmënama, ntşamo cha yomncá. <sup>8</sup> Er atşe masque tşa sëndbétsoyebuambnaye chë Bëngbe Utabná şojatşatá mandama, chë ndáyeca bënga jamama tşëngaftanga puerte chaşmotsoşbuáchema y ainaniñe

bëts añemo chaşmotsebomnama, y ndoñe tşëngaftanga ntjapochócama, chama atşe ndoñe quetsátëuatja. <sup>9</sup> Atşe ndoñe quetsátşboşe tşëngaftanga chacmotsinÿana, tşëngaftanga jaútatjayama atşe stşeboşe ca, ndayá atşbe tsbuanáchangañe tijuábemama. <sup>10</sup> Er báseftanga mëntşá atşbiama imojtsichamo: “Chabe tsbuanáchangañe cha şontsamënda bëtsca soyënga jamama, y tşa obenacá cha jtsóyebuambnayana; pero cha bëngaftanga tojtsemna ora, cha jtsóyebuambnayana mo canÿe ndocna obenana ndbomnacá, y ntşamo tojtsichamcá tondaye ntsámanana ca.” <sup>11</sup> Chca entşanga entsamna jtsetatşëmbuana, ntşamo bënga fstsichamcá, tsbuanachangá juíchmuase, tşëngaftangaftaca cabá ndoñe fsëntsemna ora, tşëngaftangaftaca fchaitsemna órnaca, bënga chca fchjamama.

<sup>12</sup> Ndegombre bënga ndoñe tşa añemo queftsátşbomna jayanama nÿetşá uámanënga fstsmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tşábenga imomna ca, nÿe ntşamo cachëngbeñe inÿyenga imomnama jtsonÿayëse; y chca tmojtsama ora, chënga juabna ndbomnënga jtsemnana. <sup>13</sup> Bënga ndoñe yapa quifchatóyebuambaye cabëngbiana, chca, tşa tşábenga bënga imomna ca jtsenábotamnayama; fchanjóyebuambaye ndayá chë bënga tifjama tşabe trabajuama, ndayá Bëngbe Bëtsá şojabanÿecá, y chíñnaca entsemna ntşamo tşëngaftangbeñe Corintoca tifjamcá. <sup>14</sup> Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntşamo ndegombre nántsemna bënga tempo tşëngaftangaftaca



ndoñe mafsënjamnëse; er bënga chë natsanënga fsënjamna tšëngaftangbioye jama, Cristbiana tšabe noticiënga jábuayenama. <sup>15</sup>Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnyayeca. Chamna, bënga fsëntsobátmana tšëngaftanga Crístbeñe más chašmotsošbuáchema, y chca chaojtsemna ora, bënga fchayobená ba luariñe entšanga jábuayenana, ntšamo tšëngaftangbeñe fsëntsamcá. <sup>16</sup>Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entšángbioye; chca, bënga ndoñe yapa quifchatóyebuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

<sup>17</sup>Ntšamo Bëngbe Bëtsabe uabemana palabreñguíñe endayancá: “Nda tojtseboše jayanama cha canÿe uámana entšá yomna ca, más tšabá cha cháuyana Bëngbe Utabná puerte uamaná endmëna ca.” <sup>18</sup>Er Bëngbe Bëtsá jayanana canÿe entšá ndegombre tšabá tojama ca, ndoñe ñye cachá tojtšenábotamnabiama, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiama.

**Pablo y chë ndoñe  
ndegombre ichmónënga**

**11** <sup>1</sup>Malaye atše šmëntjéuánta, atše básefta soyënga mo canÿe opá tojtsoyebuambnacá stšichámëntscuana, cach atše stsenabotamná ora. Masque ntšámnaca šmochtsëuánta. <sup>2</sup>Bëngbe Bëtsábeyeca atše tša cbondábabuanÿeshana y cbondánÿena, tšëngaftanga

ñye cha chašmotséstonama y ndoñe ínÿengbioye. Er atše Cristo sënjašbuachená tšëngaftanga sempre cha šmochtséstonama, y sëntseboše, cha quem luaroye yochjésabo ora, chábioye tšëngaftanga júshejanguana, mo ñye chábioye sempre ustonëngcá, ntšamo canÿe taitá chabe bembe ndocna boyabása nduabuatmá ñye canÿe boyabásaftaca chaóbuamama jushjanguancá. <sup>3</sup>Mëtšcuaye Evábioye tbojaningñé, y cha tbojanínÿnana puerte osertanabe soyënga cuafatsatsétnacá, pero ndegombre ndoñe chca yonjamna. Atše sëntsauatja nderado cachcá ínÿenga tšëngaftangaftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana ñye Cristo ñyetsca soyënguíñe jtseservénama. <sup>4</sup>Atše chama sëntsauatja, er ndánaca jashjanguana y Jesusbiana tojtسابuayiyná, mo cha ínÿe entšá cuaftsemncá, ndoñe ntšamo bënga Jesusbiana fsëndabuayiynacá, y tojtsama tšëngaftanga chašmobená canÿe espíritu jtsebomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháumashënguama espiritcá, chë Uámana Espíritu, tšëngaftanga tšabá cha jtsëuántana. Y atše sëntsauatja, tšëngaftangbe ainaniñe ínÿe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentšana šmonjouencá, y chora tšëngaftanga chábioye becá tšabá jtsëuántana. <sup>5</sup>Pero atše sëntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiama. <sup>6</sup>Atše ndoñe sënjuatsjinÿe ntšamo corente tšabá

entsángaftaca jóyebuambayama; pero atše puerte tsábá sëndétatšëmbo ntšamo stsichámuama. Bënga puerte tsábá nyetsca soyënguïñe tsëngaftanga tcbonjanÿanjé, ndegombre chca osertánana ftsbomnama.

<sup>7</sup>¿O atše ndoñe tsábá sënjama, tsábe noticiënga cbonjanabuayiyiná ora, tsëngaftangbentšana atšbiana tondaye ntjotjañcá, nduamanacá jenóbemëse; chca, tsëngaftanga puerte uámanënga chašmotsemnama Bëngbe Bëtsá chaomama?

<sup>8</sup>Mo ínÿenache ošbuachiyëngcá enefjuanënga crocénana cuafjabaquécá, crocénana sënjanóyëngacñe chë ošbuachiyëngbentšana, tsëngaftanga jujabuáchama jobenayama. <sup>9</sup>Y tsëngaftangaftaca sënjamna ora y ndayánaca šojanájoboto ora, atše ndoñe checbátantjañe atšbe opresidama, chca, tsëngaftangbiana totcá ndoñe chaondëtsemnama; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanma, atšbe causa tsëngaftangbiana totcá ndoñe chaondëtsemnama; y sempre chca chántsama. <sup>10</sup>Serto, Cristbe ndegombre soyënga atšbe ainaniñe séntsebomna; chíyeca, atše corente séntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tsábe noticiënga stsabuayiyiná ora; y chca chanjama atšbe opresidama chašmoyema ínÿenga ntsamncá. <sup>11</sup>¿Y ndáyeca chca stsama? ¿Yojtsemna ndoñe cbondábabuanÿeshana causa? Ndoñe. Bëngbe Bëtsá endétatšëmbo tša cbondábabuanÿeshanama.

<sup>12</sup>Pero atše siempre chántsama ntšamo sëndamcá, chca, chë ínÿenga, chë Jesucristbe puerte uámana

ichmónënga imomna ca juabnayënga ndoñe chamondëtsebomna ndáyeca jatenábotamnayama, ntšamo bënga ftsamcá chënga imojtsetrabája ca. <sup>13</sup>Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entsanga chaotsinÿanama chënga mo Jesucristbe ndegombre ichmónënga cuaftsemncá. <sup>14</sup>Y chama ndoñe šmatjenjaná, er cach Satanásnaca endbëtsama mo canÿe buashinÿinÿana angelcá jtsinÿnama; <sup>15</sup>chíyeca, ndoñe muatjenjaná, chabe oservenëngnaca tmojtsumama mo tsábe entsangcá jtsinÿnama. Pero chënga mochanjopochóca, ntšamo tmojtsumerecencá, ndayá tmojamama.

**Ntšamo Pablo tojansufrí, Cristbe  
ichmoná bëtsemna causa**

<sup>16</sup>Cachiñe cbochtëtéyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átšnaca jtsenábotamnayama jobenayama. <sup>17</sup>Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tsábá jtsetatšëmbëse ndegombre stsebomna ndáyeca jobenayama jtsenábotamnayana. <sup>18</sup>Banga mondmëna, cachënga jtsenábotamnayana ndayá quem luarentše chënga tmojamama, as átšnaca chantsenábotamnaye. <sup>19</sup>Tsëngaftanga chë tša osertánënga, oyejuayënga opëngbioye jtsëuantánana. <sup>20</sup>Atše sëndétatšëmbo tsëngaftanga chë opëngbioye šmnetsëuantánama, er tsëngaftanga šmondébtsëuantana chë nyets tempo tsëngaftanga mo chëngbe oservenëngcá

tmojtsaméndayënga, o chë tšëngaftanga bëtscá tmojtsabacanga, o tmojtsaingñanga, o chë uámanënga tmojtsenobiamnanga tšëngaftanga mo nduamanëngcá jtsaméndayama, o chë tmojtsajuebjantšetayënga.

<sup>21</sup> Atše chca séntlichamo masque séntšéuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiama šmojayancá, tšëngaftangaftaca chca jamama.

Inyënga, chë tšëngaftangbeñe imotrabájanga, ndayama jtsenábotamnayama tmojtsebomnëse, puerte uámana ichmónënga imomna ca jtsichámëse, átšnaca añemo séntsebomna chama jtsenábotamnayama; chca stjaryana ora, mo canyë opá tojtsoyebuambnacá séntsoyebuambná. <sup>22</sup> Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahábentšana entšanga imomnama. Atšnaca Abrahábentšana entšá sëndmëna.

<sup>23</sup> Chënga jtsichámuana Cristo imoservenca. Atše chëngbiama cabá más tšabe oservená sëndmëna. Chca stjaryana ora, mo canyë opá tojtsoyebuambnacá séntsoyebuambná. Atše chëngbiama más tijatrabajá, más šmojutame, más šmojatsetšëná y ba soye atšbiama resjo endmëna jóbanama. <sup>24</sup> Shachna soye judiënga šmonjantsetšëná chë unga bnëtsana y esconëfta soye jasachënjëse, ntšamo chënga jacastígana monduamancá.

<sup>25</sup> Unga soye niñëbëngaca šmonjanétsjanganja, y ndëtsbéngaca canyë šmonjanatëchënganja. Unga soye chë atše sënjanenjaquena

barco tontsanenatjëmbe, y chca ora, canyë šonjanotocá, chë mar béjayoca tsachocana bënoca canyë ibeta jëftsebobínynana y canyë te jëftsejëtana. <sup>26</sup> Atše becá sënjanana, y chca atšbiama resjo enjamna bëtš fshajayënguine y uacucuatšënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëtš pueblënguentše, entšanga ndoyentšë y mar béjayoca. Atšbiámnaca resjo enjamna chë Jesucristbeyeca atšbiama catšátanga imomna ca jtsichámuana, pero ndegombre chca ndoñe mondmënéngbeñe. <sup>27</sup> Atše bëtscá tijatrabajá empás uamëntšnayá joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebomncá; tijasufri sësname y tondaye entšayama.

<sup>28</sup> Quem soyëngama y inyë ndoñe chiyátayana soyëngama más, atše cada te natjëmbana ainánaca ndoñe queschtatšëmbo, er ndoñe quetsátstatšëmbo ntšamo nyetsca ošbuachiyëngcá enefjuanënga imojtsiyenana. <sup>29</sup> Ndánaca tšabe soye jamama tondaye añemo tontsebomna ora, atše chabiama šochandbóngmia, mo átšnaca cach tondaye añémoca cuabndëtsemncá. Nderado inyënga tmojama ndánaca bacna soyiñe chaótsatsama, atše ndegombre puerte ngmëncaca chandbëtšesufrina.

<sup>30</sup> Nderado nya tojátisya atše ndayama jatenábotamnayama, as chë atše tondaye obenana ndbomná tsmënama inyanynaye soyëngama chtsenábotamnaye. <sup>31</sup> Bëngbe Bëtšá y Bëngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endétatšëmbo atše

ndegombre stsichámuama chë sëntsoyebuambná soyënguifne. <sup>32</sup>Atše Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanýama, atše chašmishachama chëjana stsebecana ora; <sup>33</sup>pero básefta enutënga, canýe sbarëcuifne šmonsanëštjango chë pueblentša shëconana tapiëšifne canýe atëfjnëjana, y chca atše sënjanobená chëngbe cucuatšentsana jótsbocana.

**Ndayá Pablo mo otjenayoquëcá tojáninýe y ndayá Satanás tojanma, Pablo chaosufrima**

**12** <sup>1</sup>Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinýe Bëngbe Bëtsabe soyëngama y Bëngbe Utabná šojinýinýe soyëngama. <sup>2</sup>Atše canýe entšá sënduábuatma, cha Crísoftaca cányifne mo canýacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tsbanánoye, Bëngbe Bëtsá yomnoye. Atše ndoñe quetsátstatšëmbo Bëngbe Bëtsá cha tbojanánatse chabe cuérpoca o nýe chabe espiritiñe. iNýe Bëngbe Bëtsá chama yotátšëmbo! <sup>3-4</sup>Atše sëndétatšëmbo Bëngbe Bëtsá chë entšábioye celoye tbojanánatsama, nýetscanga oyejuayënga imomnoye (atše ndoñe quetsátstatšëmbo Bëngbe Bëtsá tbojanánatse chabe cuérpoca o nýe chabe espiritiñe; nýe Bëngbe Bëtsá chama yotátšëmbo), y chentšë cha tojanuena palabrénga, ndocná bontsemna jayanama palabrénga, chë ndayama entšangbiama ndoñe yontselesenciana jatichámuana. <sup>5</sup>Atše chë entšá sëndmëna. Canýe entšá

ndáftaca chca tojopasabiama, tšabá nántsemna chama jtsenábotamnayana; pero cach atšbiamá jtsenábotamnayana ndoñe tšabá ntsemnana, ndayá nýe chë atše mo obenana ndbomnacá tsmënama inýinýnaye soyëngama chantsenábotamnaye. <sup>6</sup>Y nderado jtsenábotamnayama atše stseboše, chca ora atše ndoñe stsama mo canýe opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondëtsejuabná ntšamo atšbiamá tbojtsinýanama o ntšamo atšbiamá cha tojouenama atše más tsmëna ca. <sup>7</sup>Chíyeca, tša uamaná tsjamna ca atše ntjátsjuabnayama, atše chë Bëngbe Bëtsá tša bëts soyënga tbojaninýinýe entšá bëtsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canýe bëts uchmašëfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama. <sup>8</sup>Unga soye Bëngbe Utabná sënjaimpadá chca sufrínana chašotsebojuánama; <sup>9</sup>pero Bëngbe Utabná šonjauyana: “Nýe atšbe bonshánana endmëna lempe ntšamo cmojtsajabotcá; nýetscanga atšbe obenana más tšabá jinýana, chë obenana ndbomna entšangbeñe atšbe obenana stjínýanýiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama inýinýnaye soyëngama, Cristbe obenana átsbeñe sempre chaotsomñama. <sup>10</sup>Chíyeca, Cristo jasérviamá, oyejuayá chandbëtsemna atše mo obenana ndbomnacá stsemna ora, ínýenga šmojtsoyenguá ora, puerte padecena soyënga causa ndayá jamama ndoñe séntsetatšëmbo ora, atše puerte chaisufrima ínýenga tmojtsama ora

y puerte tšetšena ainánaca stsemna ora; er chca soyënguine stsemna ora, mo canya obenana ndbomnacá, chora Bëngbe Bëtsá jamana atše ainaniñe bëts añemo chaitsebomnana.

**Nderado ndayá Corintoca  
ošbuáchiyënga muanjamama  
Pablo yojánauatja**

<sup>11</sup> Atše chca chë soyëngama sentsenabotamná ora sënjoyebuambá mo canye opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondëmëna ndëmuanýënga yojsamna atšbiana puerte tšabá jtsichámuana, atše chca jtsenábotamnayama ndoñe chašondëtsemnana. Ndegombre, atše tondayiñe más batšá uamaná quetsátmëna, chë Jesucristbe puerte uamana ichmónënga imomna ca juabnyëngbiana, masque atše šontsebiona mo atše tondaye cuaftsamancá. <sup>12</sup> Canya Jesucristbe ndegombre ichmoná bëtsemnana inýinýnaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inýinýnaye soyënga y chë tšabe soyënga ntšamo chora tonjanopasacá, puerte tšabá jtsinýanýnayana atše canye ndegombre ichmoná tsmënama; y atše chca sënjanma, padecena soyënguine puerte uantado jtsemnëse. <sup>13</sup> ¿Ndayá tšëngaftanga ndoñe cachcá šmonjanóyëngacñe chë inye luarenache ošbuachiyëngcá enefjuanëngbiana? Canye soye añe, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inye ošbuáchiyënga añe sënjalesenciácá. Šmochtseperdóna chca bacna soye tšëngaftangbiana tijamama.

<sup>14</sup> Atše ya séntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chë tšëngaftanga šmobomna soye jatsbomnana, ndayá puerte séntseboše tšëngaftanga Cristo sempre chašmotseservënama. Atše chca jamama séntseboše, er atše tšëngaftangbiana mo canye taitacá, Crístbeñe šmontsanošbuachéyeca, atše chabiana tcbonjanabuayená ora; séntsejuabná chë taitanga inétsamna crocénana jájuabana básenga jtsanýenama, y ndoñe básenga chë taitangbiana. <sup>15</sup> Y atše corente oyejuayá lempe ntšamo tsbomncá chanjátšataye, y atše jopochócantscuanënaca, tšëngaftangbe tšabiana. Atše cada te más cbojtsabuanýeshanëse, ¿tšëngaftanga más batšá atše šmochtsebobonshana?

<sup>16</sup> Ndoñe; tšëngaftanga tšabá šmondétátšëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo inýënga ndayínnaca jáingñama atše tstátšëmbo ca, chëngbentšana crocénana josháchiñama; y atše catijama, inýënga jáingñase, nye ntšamo atše tsbošcá chamotsamama ca. <sup>17</sup> ¿O nderado atše tcbojaingné, canya chë tšëngaftangbioye sënjichamó chentšáftaca? <sup>18</sup> Tito sënjanimpadá tšëngaftanga jányama chaotsama, y cháftaca sënjanichmó chë inya bëngcá Crístbeyeca bëngbe catsata. ¿Nderado Tito tcmojaingné? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse fstsiyena? Ndegombre chca endmëna.

<sup>19</sup> Nderado tšëngaftanga šmojatsjuabná bënga jenéuyanama

chca chojtsétsétsná ca; pero ndoñe chca quenátsmèna. Inyetsá, bènga Crístoftaca cánýiñe mo canýaca entšangcá, Bèngbe Bètsabe delante fséntsoyebuambná, y lempe ntšamo tijayancá, Jesucristbeyeca atšbe bonshana catšátanga, tšèngaftangbe tšabiama tijayana, Crísteñe corente chašmotsošbuáchema y ainaniñe bèts añemo chašmotsebomnama. <sup>20</sup> Er atšbe sèntsauatja, atšbe jánýama chajjá ora, ndoñe chacbondánýena ntšamo tsbošcá, y tšèngaftanga atšbe ndoñe chašmondínýena ntšamo šmojtsebošcá. Sèntsauatja nderado bacna soyènga šmattsama: jtsenpenzentserana, ínýengaftaca yapa jtsenántšabošana, ndayánaca rábiaca jtsamana, nýe tšèngaftangbiama tšabe soyènga jtsebomnama jtsebošana, ínýengbiama podesca ichámuana, uayátsenayènga jtsemnana, ínýengbiama cachènga más uámanènga jtsenobiamnayana, y nyetscanga ndoñe cachcá ntsejuabnayana. Chca chacbojánýenèse, tšèngaftanga ndoñe quešmochátsbošana jóyèngacnána ntšamo tšèngaftanga júacánama atšbe šochtsemncá. <sup>21</sup> Atšbe sèntsauatja, cachiñe jánýama chajjá ora, atšbe Bètsá chaoma atšbe chaitsèuatja chca šmojtšamama, y chašotsemna puerte ngménaca jošachnama ba tšèngaftangbiama, ndèmuanyènga ya bayté bacna soyènga imojtsama y chca juabnayana ndoñe tmonjatrocá, y ndoñe tmonjajbaná chè bacna soyènga boyabása o shembásaftaca jtsamama juabnayana, y chca soyènga jtsamana y nyetsca bacna soyènga jtsamana, jenomándama ntsoencá.

**Inýe soyèngama jábuayenama  
y jádiošoftama**

**13** <sup>1</sup> Móraca ya unga soyama tšèngaftanga jánýama chanjá.

Atšbe chajjáshjango ora, tojtseytèse chanjayana ntšamo báseftanga tmojamcá tšabá o ndoñe tšabá bétsemnana. Nda bacna soye ntšamo Moisesbe leyiñe endèmandancá tojama ora, atšbe chanjayana cha ndoñe tšabá tonjama ca; pero útata o únganga tmojtsemnèse, chènga chamuayanama cha ndegombre chca tojamama.

<sup>2</sup> Atšbe tempo sènjnanabuayená, chè tšèngaftanguentšènga bacna soye tmojánamènga y chè ínýenga, atšbe šojtsanmèna jácastigana, chca soyènga amana ndoñe tmonjájbananga. Mora, tšèngaftangbentsána bènoça séntsemna ora, cachiñe cachcá cbètètabuayená, ntšamo sènjnamcá chè tšèngaftangaftaca uta soyama sènjamna ora: atšbe cachiñe jánýama chajjase, ndoñe quichatslesència bacna soyènga chašmotsamama y chama ntjacastigacá jatabáshejuanana. <sup>3</sup> Atšbe chca chanjama, er tšèngaftanga šmontsenguá ndayánaca tšabá chacminýanyema Cristo atšbiajana yoyebuambnama. Cristo ndoñe quenátsmèna mo canýa obenana ndbomnacá, ntšamo tšèngaftangaftaca cha tojamama; ndayá chabe bèts obenana tšèngaftangbeñe bètscá jtsinýanyayana. <sup>4</sup> Er cha tmojanrucificá mo canýa obenana ndbomnacá; pero mora, Bèngbe Bètsá puerte obená betsómñeyeca, cha tojtayena. Cachcá bèngnaca, cháftaca cánýiñe mo canýaca jtsemnèse, mo obenana ndbomnèngcá jtsemnana; pero cháftaca mochantsiyena, Bèngbe Bètsá puerte obená betsómñeyeca, tšèngaftanga jtsasèvenama.

<sup>5</sup> Tšèngaftanga cada ona šmochjshénojuaboje, tšabá jtsetatšèmbuama mocna entšanga bétsemnana, jtsetatšèmbuama aíne o ndoñe sempre Crísteñe

puerte tašmuetsošbuáchema. Šmochjšhénojuaboye chca šmošbuáchema ntšamo šmojtsemnama y tšabá ínÿenga šmochjínÿanÿiye. ¿Ndoñe šmondétatšëmbo Jesucristo tšëngaftangbe ainaniñe yoyenama? Ndóñesna, tšëngaftanga ndegombre ndoñe Crístbeñe ošbuáchiyënga šmontsemna. <sup>6</sup> Pero atše sentsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënema. <sup>7</sup> Y Bëngbe Bëtsá fséntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënema tšëngaftanga jinÿanÿiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinyäna mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënema mo ichmonëngcá, tšëngaftanga jábuayenama. Pero chë soye tondayana šattsentsámna, <sup>8</sup> er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aíñe. <sup>9</sup> Bënga fséntseboše ntšamo tšabá yomncá tšëngaftanga chašmotsamama, er bënga oyejuayënga fchandbétsemna, bënga mo chë obenana ndbomnëngcá fstsemna ora, bëngbe mando jácastigama ntjatinÿanÿaycá, y tšëngaftanga ainaniñe bëts añëmoca šmojtsemna ora y puerte tšabá šmojtsemománda ora. Bënga Bëngbe Bëtsá fchandbétseimpadana, chca bacna soyënga amana jtšajbanase, chašmobená jtsemnana nÿetsca soyënguñe tšábenga, y lempe ntšamo

tšëngaftanga chašmotsemnama Bëngbe Bëtsá yobošcá. <sup>10</sup> Quem tsbuanácha cbontsëbubiamná tšëngaftangaftaca cabá ndoñe séntsemna ora; chca, atše choye chajá ora ndoñe chašondétsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebomnama, y ndoñe tšëngaftanga jatapochócama.

<sup>11</sup> Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebomnama endamá, tšëngaftangaftaca echántsemna. <sup>12</sup> Nÿetscanga šmochjenchuyaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshánánaca šmondbetsacheuanaycá. <sup>13</sup> Nÿetsca quem luaroca ošbuáchiyënga cmontsacheuaná.

<sup>14</sup> Atše, Bëngbe Bëtsá séntseimpadana, Bëngbe Utabná Jesucristo chaoma, nÿetsca tšëngaftangbeñe tšabe bendicionënga chaotsemnama. Bëngbe Bëtsabe bonshánana sempre chašmotsóbmñe, y Uámana Espíritu sempre chašmotsóbmñe, y chë Uámana Espíritoftaca cánÿiñe mo canÿacá chašmotsomñe.

# Gálatas

**Pablo Galacia luaroca  
ošbuáchiyënga jacheuayama**

**1** <sup>1-2</sup> Atše Pablo, quem tsuanácha sentsabiamná Jesucristbeñe ošbuáchiyëngbiama, chë Galacia luaroca ošbuachiyëngcá enefjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. <sup>3</sup> Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebomnama. <sup>4</sup> Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentšana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerta bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endméná yojanbošcá.

<sup>5</sup> Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

**Nÿe canÿe ndegombre buayenana  
soyënga Cristbiama endmëna**

<sup>6</sup> Atše ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crísbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca. <sup>7</sup> Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiama tšabe noticiënguentšë, ba ndegombre soyënga jtsejuánama, inÿe soyënga jacjayama. <sup>8</sup> Nderado bënga o canÿe celoca ángel soyënga cmojtsabuayiyná, y ndoñe totsemna mo chë tšabe noticiënga bënga tempo tcbonjanabuayenacá, as chë chca tojtsamabiama iBëngbe Bëtsá chaoma infiernoca becá chaosufrima! <sup>9</sup> Tempo



ya chca sĕnjánayana; mora cachiĕne ſcutétayana: Nderado nda soyĕnga cmojtsabuayiyiná, y ndoĕne tontsemna mo chĕ tšabe noticiĕnga, ntšamo tempo ſmonjanoyĕngacñĕcá, iBĕngbe Bĕtsá chabiamana chaoma infiernoca puerte chaosufrima!

<sup>10</sup> Atše chca stjayana ora, ĩtšĕngaftanga cmojtsinŷana atše soyĕnga stsama entšanga oyejuayĕnga átšeftaca chamotsemnana? Ndoĕne chca quenátsmĕna. Atše sĕndboše ndayá Bĕngbe Bĕtsá átšeftaca oyejuayá chaotsemnana. Entšanga oyejuayĕnga chamotsemnana, atše cabá soyĕnga stsamĕse, atše ya ndoĕne Cristbe canŷe oservená stsemna.

**Ntšamo Bĕngbe Bĕtsá Páblĕbioye  
tbojanchembo, Jesucristbe  
ichmoná jtsemnana**

<sup>11</sup> Atše sĕntseboše tšĕngaftanga, Jesucristbeyeca atšbe catšátanga, chašmotsetátšĕmbo chĕ tšabe noticiĕnga ntšamo sĕndabuayiyinacá quem luarentša entšangbe juabnentšana ndoĕne yondóbocanama. <sup>12</sup> Ndocna entšá chĕ tšabe noticiĕnga chešnatanbuayená, ni chešnatanbuatĕmbá, ndayá cach Jesucristo ſonjaninŷinŷé.

<sup>13</sup> Tšĕngaftanga ſmojátatšĕmbona ntšamo atše tempo tsjanamana jtsiyenana, ntšamo judiĕnga Bĕngbe Bĕtsá mondadorancá atše cha sĕnjanadorana ora, ntšamo atše becá tsjánamama chĕ ošbuachiyĕngcá enefjuanĕnga puerte chamosufrima, y ntšamo atše becá tsjánamama ndocná Jesucristbeĕne chaondĕtšoſbuáchema. <sup>14</sup> Atše inŷe judiĕnga cach atšcá uata bomnĕngbiamana más sĕnjánama Bĕngbe Bĕtsá adórayiĕne, ntšamo judiĕnga cha jadórana monduamancá, y atše nŷets añémoca tša sĕnjantšĕna

jtsamama ntšamo bĕngbe bĕts taitanga básenga jabuátambama monjanamancá. <sup>15</sup> Pero Bĕngbe Bĕtsá atšbe tšabiamana yojanjuabná, y chíyeca, atše cabá ndonŷna ora, canŷe bĕts soyama cha ſoĵanbocacá. <sup>16</sup> Y cha tojánbošĕna ora, ſonjaninŷinŷé ntšamo ndegombre chabe Uaquiĕná yomnana, y ſonjanchembo. Cha chca tojanma, atše chĕ tšabe noticiĕnga ndoĕne judiĕngbeĕne chayábuayenama. Y atše ndocnábioye chiyataná ndayá jamama ſojtsanmĕnana chašobuayenama; <sup>17</sup> y Jerusalenoye cach ndoĕne chiyataná chĕ atšbiamana más natsana Jesucristbe ichmónĕnga imojamnĕngaftaca jencuĕntama. Chamna, cachora Arabia uabaina luaroye sĕntsanoĕne, y chentšana Damasco bĕts puebloye sĕntaná.

<sup>18</sup> Jesucristbeĕne jtšoſbuáchiyama sĕnjanóntša orscana, unga uatĕse Jerusalenoye sĕnjána Pédroftaca jencuĕntama, y cháftaca nŷe uta semana sĕnjĕftsemna. <sup>19</sup> Y ndocna chĕ Jesucristbe inŷe ichmónĕnga chiyáisananŷe; nŷe Santiago aĕne, Bĕngbe Utabnabe catšata. <sup>20</sup> Bĕngbe Bĕtsá ſontsonŷá, ntšamo tšĕngaftanga cbontsĕtsĕsnacá ndegombre bĕtsemnana.

<sup>21</sup> Jerusalenocana sĕnjĕftsanbocnentšana, Siria y Cilicia luarĕngoye sĕnjána. <sup>22</sup> Pero chĕ tempo, chĕ Jesucristbeĕne ošbuáchiyĕnga Judea luarĕne bomínŷeca ndoĕne quešmĕnjatanábuatma. <sup>23</sup> Nŷe ínŷyengbioye imojtsayaunana: “Nda tempo bĕnga puerte chamotsesufrínama enjanamá, mora entšanga entsabuayiyiná, Jesucristbeĕne jtšoſbuáchiyama caojtsamna ca. Y tempo cha tša enjánboše jamama entšanga Jesucristbeĕne ndoĕne chamondĕtšoſbuáchema ca” —chĕnga

imojtsichamo. <sup>24</sup>Y entsanga Bèngbe Bètsá imojtsatschuanaye, ndayá cha atšbiajana tojanmama.

**Chè inÿe ichmonènga tmojánayana Pablo aífne tšabá yojtsama ca**

**2** <sup>1</sup>Jerusalenoye sènjána orscana bnètsana canta uatèse, cachíne choye sènjesaná. Bernabé šonjantjèmbambá, y Tito bèndátaftaca fsènjéftsanbetše. <sup>2</sup>Choye sènjána, choye jama šojamnama Bèngbe Bètsá šonjaninÿanÿeyeca. Atše nÿe chë Jesucristbeñe ošbuáchiyèngbiamá uámanènga imojamnéngaftaca sènjanencuentá, ínÿengaftaca ndoñe; y chë tšabe noticièngama chë ndoñe judièngbeñe sèndabuayiyinama chènga sènjanacuntá. Chca sènjanma atše jtsetatšèmbuama, ntšamo tijanma y sènjéftsamcá ndoñe nÿe bonamente yonjamnama. <sup>3</sup>Pero chènga tmonjánayana atše aífne tšabá tijanma ca, y Tito, chë átšeftaca enjamná, masque Grecia luarocá enjamna, chènga ndoñe chematanmandá base bobachtema chë más delicadentše tètšená chaotsemnama, ntšamo judiènga monduamancá, Bèngbe Bètsábenga imomnama chaotsinÿyama. <sup>4</sup>Chca tonjanopasá, masque ínÿenga monjánboše Tito base bobachtema chë más delicadentše tètšená chaotsemnama. Chènga tmonjánayana bèngcá Jesucristbeñe ošbuáchiyènga imojamna ca, pero ndoñe chca quemènjatsmèna. Chènga chë Jesucristbeñe ošbuáchiyèngaftaca tmojanenutaná, ndayá yojtsanopasánama chë ošbuáchiyènga ntsetatšèmbcá, mo chë ošbuáchiyèngbiamá bacna soyènga jamama cuafseitèmena cuenta. Chènga tmojánabo jtsetatšèmbuama ntšamo Jesucristo bènga atsebácanènga

šojánabiamama, chë judièngbe leyèngaca ndèmandánènga, cháftaca cánÿiñe mo canÿacá jtsemnèse. Chènga chca tmojanma, er chènga imojtsanboše jamana, bènga chë judièngbe leyèngaca nÿets tempo mandánènga chamotsiyenama. <sup>5</sup>Pero bènga ndocna ora fchiyátanayana aífne ca chë ntšamo chènga monjánichamo bènga šojánamna jamama soyèngama, er bènga becá fsènjánboše tšèngaftanga nÿets tempo Jesucristbe ndegombre tšabe noticiènga chašmotsóbomñama.

<sup>6</sup>Pero chë ndèmuanyèngbiamá entsanga monjánichamo chë uánatsanènga imojamna ca (ndayá chènga tempo imojamna atšbiamá ndoñe quenatámana; Bèngbe Bètsabiamá nÿetscanga cachcá monduámana), chèngna tondaye chešmatanbuayená, ntšamo tempo tijanmama inÿetšá chaimama. <sup>7</sup>Masna, chènga tmonjántatšèmbona, Bèngbe Bètsá chë tšabe noticiènga ndoñe judiènga jábuayenama trabajo atše jamama šojanèntšabuáchema, ntšamo judiènga jábuayenama cachcá Pédrèbioye tbojanèntšabuachecá. <sup>8</sup>Er Bèngbe Bètsá atše chabe ichmoná šonjábema, ndoñe judiènga chabiamá jábuayenama, ntšamo cachá Pédrèbioye chabe ichmoná tbojanbemcá, judiènga chabiamá jábuayenama.

<sup>9</sup>Santiago, Pedro y Juan, chë ošbuachiyènguentša uánatsanènga, atše canÿe bèts trabajo chaitsebomnama Bèngbe Bètsá tojanmama tmonjántatšèmbona ora, cucuatše šontanatšataye atše y Bernabébioye, jinÿinÿiyama chènga šojanébuajama mo cachèngbe trabajo amatcá. Y fsènjanenoyeuná bèndata jama, masna ndoñe

judiënga jtsabuayiyayama trabajo jamama, y chëngna judiëngbeñe.

<sup>10</sup> Chënga nÿe šonjanaimpádaye chë ošbuáchiyënga ndbomnjémënga Jerusaleñoquëngbiama jtsenójuabnayama; y atše bëtsca séntsama chënga jujabuáchama.

**Pablo Antioquioca Pédrëbiama  
tojánayana cha ndoñe  
tšabá tojanma ca**

<sup>11</sup> Pero Pedro Antioquía bëts puebloye tonjánabo ora, chabe delante sënjánayana cha ndoñe tšabá tojanma ca, er ntšamo enjanamcá ndoñe tšabá quenjatsmëna. <sup>12</sup> Mëntšá tonjanopasá: Santiago básefta entšanga Antioquiöye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tétšenënga jtsemnama yojánamna ca tmojánayanënga, chabiama muanjájuaboyama yojtsauatja causa. <sup>13</sup> Chë inÿe judiënga ošbuachiýëngnaca tmojanontsé amana cachcá ntšamo Pedro yojtsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabénaca, ntšamo chënga imojtsamcá jtsonÿayëse, chëngcá yojtsama, jtsamëse ntšamo cha yojántatšëmbo chca jamama ndoñe ibonjamncá. <sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre soyënga endmëncá. Chca sënjáninÿe ora, Pédrëbioye nÿetsca ošbuáchiyëngbe delante sënjanianya:

“Aca canÿe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ðntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

**Bëngbe Bëtsá judiënga y  
ndoñe judiënga játsebacana,  
Jesucristbeñe tmojtsošbuáchema**

<sup>15</sup> Bënga judiënga fsëndmëna, bëngbe bëtsétsanga judiënga monjámnayeca, y ntšamo judiënga chë ndoñe judiëngbioye mondubobuatmca, chë “bacna soye amënga ca”, ndoñe queftsátsmëna. <sup>16</sup> Y bënga mondétatšëmbo, canÿe entšá Jesucristbeñe tojtssošbuáchema, Bëngbe Bëtsá jamana cha chabe bominiÿine tšabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtssošbuaché, Bëngbe Bëtsá chaomama bënga chabe bominiÿine tšábenga chamotsemnama, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canÿe entšá chabe bominiÿine tšabia chaotsemnama, ntšamo chë judiëngbe leyënguiñe iuayancá jamama ibomna ca cha tojamama.

<sup>17</sup> Pero, bënga bëtsca mondënguá, Bëngbe Bëtsá chaomama bënga chabe bominiÿine tšábenga chamotsemnama, bënga Crísoftaca cánÿine mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnama. Pero inÿe entšanga jtsichámuana bënga bacna soyënga amënga imomna

ca, ntšamo chë Moisesbe leyíñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! <sup>18</sup> Atše, ntšamo Bëngbe Bëtsá šojaninýinýecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplínana perdonánënga jtsemnana, atše stsemna mo nda ndayá cachá tojtsendbema y cachiñe tojtëtsjebuanacá; y ndegombre, atše stsemna canýa ntšamo ndoñe tšabá yondmëncá amá. <sup>19</sup> Chë judiëngbe leyëngaca atše sëndétatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiñi tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonýá, Jesucristbeñe jtsošbuáchiyama; y chca, atše chaitsobena jtšiyenana Bëngbe Bëtsá jtse servënëse. Atše Crísoftaca cányiñe mo canýacá sëndmënayeca, Cristo cruciñe tojanóbana ora enjamna mo átsnaca cuafjobancá; <sup>20</sup> y mora entsemna mo nýe atše ya ndoñe cuaftsiyencá, Cristo becá vida atšbe ainaniñe entsebómnyeca. Y ntšamo mora atše vida sëntse bomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtso bomñama cachcá tojanonýá y atšbe tšabiana tojanóbana. <sup>21</sup> Atše ndoñe quetsátobotena ntšamo Bëngbe Bëtsá entsangbe tšabiana juabna yobomncá. Nderado Bëngbe Bëtsá tojama canýe entsá chabe bominiñi

tšabia chaotsemnana, ntšamo chë leyíñe jamama yomna ca iuayancá cha tojtsamama, as Cristo nýe tondayama matënjanóbana.

**Ley jtso bedecënëse o  
Jesucristbeñe jtsošbuáchiyëse**

**3** <sup>1</sup> ¡Tšëngaftanga Galacientša entsanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátesertana ntšamo chca nanjopása, er cach atše botamana cbonjanabuayinýá, Jesucristo cruciñe tojanóbana. <sup>2</sup> Atše sëntseboše nýe canýe soye atše chašmëyana: ¿Uámana Espiritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyíñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchemo? <sup>3</sup> ¿Ndáyeca tša ndenójuabnayënga šmomna? Bëngbe Bëtsabe Espiritbeyeca tšëngaftanga šmonjanontšë mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nýe entsangbe juabnëngaca jtšiyenëse? <sup>4</sup> ¿Nýetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. <sup>5</sup> Bëngbe Bëtsá, chë Uámana Espiritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyíñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchemo? <sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá

endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominýiñe tšabia yojamna ca.”

<sup>7</sup>Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahám bentshana entsàngcá, cachcá ošbuáchiyana bëtsebomnama, chë chábentshana ndegombre entsàngbiamama. <sup>8</sup>Bëngbe Bëtsabe uabemana palabrenguñe endopodena jualáma, Bëngbe Bëtsá yochjanma chë ndoñe judiënga chabe bominýiñe tšábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrenguñe, cabá chca ndëma ora, Bëngbe Bëtsá Abrahám bioye quem tšabe noticiënga tbojanbuayená: “Acbeyeca, atše chanjama nyetsca quem luarentša entsànga tšabe bendicionënga chamotsebomnama ca.” <sup>9</sup>Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiamama tšabe soyënga tojanmcá.

<sup>10</sup>Chë Bëngbe Bëtsá chabe bominýiñe tšábenga yochjábiamama ca juabnyënga, ntšamo leyiñe jamama yomna ca iuayancá lempe tmojtsobedecénama, chënga nyets tempo jtsiyenana jtsetatšëmbëse Bëngbe Bëtsá nyetsca tescama chënga yochjácástigayama. Er Bëngbe Bëtsabe uabemana palabrenguñe mëntšá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguñe iuabemancá

ca.” <sup>11</sup>Ndegombre, puerte tšabá entsinýinýena, Bëngbe Bëtsá ndoñe yochanjama ndocná chabe bominýiñe tšabia chaotsemnama, ntšamo chë leyiñe jamama ibomna ca iuayancá tojtsobedecénëse. Chca ndegombre endmëna, er Bëngbe Bëtsabe uabemana palabrenguñe mëntšá endayana: “Nyë ndabiamama Bëngbe Bëtsá tojama chabe bominýiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebomna ca.” <sup>12</sup>Jtsamana ntšamo chë leyënguñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrenguñe endayancá: “Nda tojtsama nyetsca mandënga ntšamo chë leyënguñe endayancá, tšabe vida echántsebomna, nyets tempo chë leyëngaca mandaná ca.”

<sup>13</sup>Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrenguñe endayancá: “Nyetsca tescama castigo chaotsebomna, nda canýe niñëšinë tmojajonýá chaóbanama cha ca.” <sup>14</sup>Chca tojopasá, Bëngbe Bëtsá chaomama, chë tšabe bendicionënga ntšamo cha Abrahám bioye tbojanšbuachenacá, ndoñe judiëgnaca chamotsebomnama, Cristo Jesús beyeca; y Jesucristbeñe ošbuachiyánaca, Bëngbe Bëtsá chaomama chë Uámama Espiritu bëngbe ainaniñe cháumashëngo jtsemándayama, ntšamo Bëngbe Bëtsá tojanašebuachenacá.

**Ndocna ley quenátobena  
Bèngbe Bètsabe šbuachenana  
soye jatrócama**

<sup>15</sup> Jesucristbeyeca catšátanga, chë ndayá sèntsichamcá endmëna ntšamo nyets tempo entšángbeñe endbetsopasancá. Uta entšata tbojenoyeuná canye trato jénbemama, y ntšamo tbojenšbuachenacá chaotsinýnama chatbe uabaina tsbuanáchañe tbojuábemëse, ndocná inýa más ntobenanana jayanana ntšamo tbojentratacá ndoñe yontsoservena ca; y inýe soyënga chiñe jacjayama cach ndoñe. <sup>16</sup> Chcasna, Bèngbe Bètsá ba soye Abrahámbyoye tbojanšbuachená puerte tšabe bendicionënga chabiama jamama, y chabe entšanguentšana canýabiámnaca. Y Bèngbe Bètsabe uabemana palabrënguiñe ndoñe quenátayana: “chabe entšanguentšëngbiámnaca ca”, mo Bèngbe Bètsá ba entšangbiama cuaftsichamcá; sinó mëntšá endayana: “aceb entšanguentšana cánýabiama ca”. Y chca entsayana, nýe canye entšá ca; y cha endmëna Cristo. <sup>17</sup> Atše ndayá mëntšá cbontsëtsëtsná: Natsana, Bèngbe Bètsá Abrahánoftaca canye trato tojánbema, y tbojaniyana “añe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bèngbe Bètsá Moisesbe cucuatšinë chë leyënga tbojanántšaboshjona; chíyeca, chë leyënga ndoñe ntobenanana jamana chë Bèngbe Bètsá Abrahánoftaca tojánbema trato ndoñe chaondëtsosevénama, ni jamana ndayá Bèngbe Bètsá tojanšbuachenacá ndoñe chaondëtsosevénama. <sup>18</sup> Er ndayá Bèngbe Bètsá chabe entšanga tojatsatacá, tojtsemna chënga ntšamo chë leyinë jamama yomna ca iuayancá

tmojtsamama, chca, chë tšetana soyënga ya ndoñe nantsóbocana ndayá Bèngbe Bètsá jamama tojanašebuáchenantšana. Pero ba tšabe bendicionënga Abrahambiana jamama, Bèngbe Bètsá tbojanšbuachenáyeca, Bèngbe Bètsá chë soyënga Abrahambiana tojanma.

<sup>19</sup> Asna, ¿ndayama chë Moisesbe ley nantsosevna? Bèngbe Bètsá chë leyënga tojanáboshjona, ba tšabe soyënga jamama Abrahámbyoye tbojanšbuáchenantšana baytese. Bèngbe Bètsá yojanjuabná chë ley chaoservé entšanga jinýanyiyama ndayá tšabá o ndoñe tšabá jamama bëtsemnama, chë Abrahámbytšana Uámama Entšá jashjanguëntscuana, ndabiama Bèngbe Bètsá Abrahámbyoye tbojanšbuachená ba tšabe bendicionënga jamama. Bèngbe Bètsá angeléngaftaca chë ley Moisesbe cucuatšinë tbojanántšaboshjona, y chë entšá Moisés enjamna chë oyebuambnayá Bèngbe Bètsáftaca y entšángaftaca. <sup>20</sup> Uta entšata canye trato jénbemamna, jtseytana inýe entšá chë uta entšáftaca chaóyebuambama; pero Bèngbe Bètsá Abrahámbyoye ba tšabe soyënga jamama tbojanšbuachená ora, nýe canýa chca tojanma, y ndoñe bonjanájaboto inýa chabiama Abrahánoftaca chaóyebuambama.

**Ndayama chë ley yomna**

<sup>21</sup> ¿Chca nántsayana, ntšamo Moisesbe leyinë iuayancá, chë Bèngbe Bètsá tojanšbuachená soyëngama contra yomna ca? ¡Ndoñe, ndegombre ndoñe! Bèngbe Bètsá entšangbe cucuatšinë canye ley tojanáboshjona, y chë ley tojtsobena jamana entšanga ndegombre tšabe vida chamotsebomnama, as Bèngbe

Bëtsá nanjama entšanga chabe bominyiñe tšábenga chamotsemnana, ntšamo chë leyiñe jamama yomna ca iuayancá tmojtsamama. <sup>22</sup> Pero Bëngbe Bëtsabe uabemana palabrënguñe endayana, nyetsca quem luarentša entšanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jöyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašbuachenacá.

<sup>23</sup> Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama Bëngbe Bëtsá jinyanjyama tempo joshjanguëntscuana. <sup>24</sup> Cristo jabama tempo tonjanoshjanguëntscuana, chë ley bëngbiana enjamna mo canye pamillentsa oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominyiñe tšábenga chamotsemnana. <sup>25</sup> Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canye entšacá, ndayá tšabá yomncá bënga chamotsamama cuaftsamcá. <sup>26</sup> Cristo Jesúsbeñe šmojtsošbuáchema, nyetsca tšëngaftanga šmojobená Bëngbe Bëtsabe básenga jtsemnana, Cristo Jesúseftaca cányiñe mo

canyácá jtsemnëse. <sup>27</sup> Tšëngaftanga tcmonjanëbaye, y chca, Crístoftaca cányiñe mo canyácá šmontsemna. Y mora šmojobená mo cach Crístcá jtsemnana. <sup>28</sup> Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nyets tempo nye ínÿabiama oservëngënga y chë nye cachëngbiana trabájayënga cachcanga, y boyabásenga y shembásengnaca. Nyetsca tšëngaftanga mo canyácá šmondmëna, Cristo Jesúseftaca cányiñe mo canyácá jtsemnëse. <sup>29</sup> Tšëngaftanga Crístbe entšanga šmondmënayeca, šmontsemna mo Abrahámbentsana entšanga cuaftsemncá; y chca, ntšamo Bëngbe Bëtsá Abrahámbioye tbojašbuachenacá, tšëngaftanga šmochanjöyëngacñe.

**4** <sup>1</sup> Atšnaca séntseboše jayanama, chë uaqiñá nda yochjöyëngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canye basacá tojtsemnëntscuana, ndocna derecho chë soyënguñe ntsebomnana; y chca, cha jtsemnana mo canya nyets tempo nye ínÿabiama oservenacá, masque lempe ntšamo chabe taitá tbojašbuachenacá chë uaqiñabiama tojtsemna. <sup>2</sup> Chë uaqiñá tojtsobóchantscuana, entšanga jtsemnana ndëmuanyënga ntšamo cha tbojtsajabotcá jtsoinayana, y ínÿënga jtsejuabnayana ndayá chë taitabe soyëngaca jamama, chë uaqiñá otocana soyëngaca. Y chca jtsemnana, chë taitá tojayana tempëntscuana. <sup>3</sup> Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nyets tempo nye ínÿabiama oservëngcá, quem luarentše imománda espiriténgaca.

<sup>4</sup> Pero Bëngbe Bëtsá chabe Uaquiñá quem luaroye tbojanichmó, nãa chama tempo tojanóshjango ora; cha mo nÿetsca entšangcá, canÿe shembásabentšana tojanonÿná, y vojoyena jtsamëse ntšamo judiëngbe leyinë jamama ibojamna ca yojanayancá jtsamëse. <sup>5</sup> Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtsemnana, bënga chë tempo šonjánamna chë ley jtsobedecénana. <sup>6</sup> Y chca, tšëngaftanga ya chabe básenga šmojtsemnana jinÿanÿiyama, Bëngbe Bëtsá chabe Uaquiñabe Espíritu tbojanichmó, nÿetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”. <sup>7</sup> Mëntšá, cada ona tšëngaftanguentšá ya ndoñe quenátsmëna mo chë nÿets tempo nÿe ínÿabiamá oservenëngcá, quem luarentšë imománda espiriténgaca mandánënga, y aínë Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašëbuachenacá cha echanjóyëngacñe.

**Pablo, Galacia luaroquëngbiamá ngmënaca yojtšanjuabnaye**

<sup>8</sup> Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nÿets tempo nÿe ínÿabiamá oservenëngcá, ndoñe ndegombre diosënga mondmëna espiriténgaca mandánënga. <sup>9</sup> Pero mora, Bëngbe Bëtsábioye šmontsábuatma ora, o tšabá jayanama, Bëngbe Bëtsá cmojtsëbuatma ora, čntšámoyeca tšëngaftanga cachiñe chë quem luarentšë imománda espiriténga šmojtsayaunana? Chënga ndocna obenana quemátsbomna, y

nduámanënga mondmëna. ¿Ndayëca tšëngaftanga šmojtseboše cachiñe jtsemnana mo chë nÿets tempo nÿe ínÿabiamá oservenëngcá, chë espiriténgaca mandánënga? <sup>10</sup> Tšëngaftanga tša jtsejuabnayana diënguñe, shinÿënguñe, canÿe uatentša tempënguñe y uatënguñe, mo uámana tempëngcá Bëngbe Bëtsá tšabá jadórama, y chama bëts fiestënga jtsebomnana. <sup>11</sup> Atšë corente šontsengmena, nderado atšbe trabajo tšëngaftangbeñe tondayama tonjoservé. <sup>12</sup> Jesucristbeyëca atšbe catšátanga, bëtscá cbontsaïmpadana, šmochtsiyena jtsamëse ntšamo atšë sëndamcá, er átšnaca sënjóbëma ntšamo tšëngaftanga ndoñe judiënga šmondmëncá. Tšëngaftanga ndocna bacna soye atšë chešatsborlá. <sup>13</sup> Tšëngaftanga šmondëtatšëmbo, atšë sënjanobená chë natsana soyama tšëngaftanga chë tšabe noticiënga jábuayenama, canÿe šocana šonjanontšáshjango causa. <sup>14</sup> Atšë canÿe šocana sënjánbomna causa, tšëngaftangbiamá ndoñe paselo quenjatsmëna tšëngaftangbeñe atšë jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canÿe ángel Bëngbe Bëtsabe ichmoná šmojofjá, o cach Jesucristbioycá. <sup>15</sup> Ndayá chora tšëngaftangtaftaca enjanopasancá, puerte oyejuayënga tcomjánabiamá. ¿Y mora ndayá tojopasá? Ndegombre, atšë sëndëtatšëmbo y sentsobena jayanama, tšëngaftanga ndaye sóynaca atšbiamá mašmëñanmama. Chë más uámana šmojánbomna soyënga atšbe cucuatšinë mašmëñánboshjona, y nÿa mo chë bominjëngnaca masmëñánenobuchjatsëca atšë



jatšetayama. <sup>16</sup>Y morna, ÷ntšamo ndegombre yomncá cbojtsétsétsnama, atšbiana šmojtsejuabná mo tšëngaftangbe uayayá cuaftsemncá ca?

<sup>17</sup>Chë ndoñe ndegombre soyënga buátëmbayënga montsinÿinÿná mo tšëngaftangbiana ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiana ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnama, chentšana tšëngaftanga chëngaftaca jtsemnama chašmotsebošama y chënga chašmotsababuánÿeshanama.

<sup>18</sup>Puerte tšabá endmëna atše y ínÿenga chafstseboše tšëngaftangaftaca amiguënga jtsemnama, canÿe tšabe soye jamama tojtsemnëse; y sempre chca chauétsemna, tšabiana tojtsemnëse, y ndoñe nÿe atše chentše tšëngaftangaftaca stsemna ora. <sup>19</sup>Tšëngaftanga, chë atšbiana mo atšbe basengcá šmondmënënga, Jesucristbeñe chašmošbuáchema tčbonjanëjabuácheyeca; atše cachiñe séntsesufrina tšëngaftangbe causa, ntšamo canÿe šešona jtsebomnama ora canÿe shembásá jtsesufrinancá; y atše chca chanjéftsesentina, ntšamo Cristo endmëncá tšëngaftangbe vidiñe ndegombre chaojtsebinÿnëntscuana.

<sup>20</sup>Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiana tsëséntínana. Atše tša šontsecohëngmena tšëngaftangbiana.

#### **Ntšamo Agar y Sáraftaca tojanopasá**

<sup>21</sup>Canÿe soye šmochjauyana, tšëngaftanga chë Moisesbe

léyeca mandánënga jtsemnama šmojtsebošënga. ÷Ntšamo chë leyiñe endayancá tacmojtsésertana? <sup>22</sup>Chiñe endayana, Abraham uta uaquinãta yojánabamna ca; canÿana Agárbeñe, canÿa chabe shembiana nÿets tempo oservená; y chë ínÿana, cachabe shëmbëne, Sara, y mua ndocnabiana nÿets tempo oservená yonjamna. <sup>23</sup>Chë chabe shembiana nÿets tempo oservenabe šešona, tojanonÿná nÿe Abraham y Agar chca chaotsemnama tbojánbošenayeca; y cachabe shembe šešona tojanonÿná, Bëngbe Bëtsá chë soye jamama Abrahámioye tbojanšbuachenáyeca.

<sup>24</sup>Ntšamo Agar y Sara, y chatbe šešónataftaca tojanopasacá, bënga canÿe uámana soye šontsabuatambá. Ndayá chë uta shembásataftaca tojanopasacá, uta trato entsinÿinÿná: chë shembásá Agar, chë nÿets tempo nÿe ínÿabiana oservená yojamná, entsinÿinÿná chë trato Bëngbe Bëtsá y Israeloca entšángaftaca, chë Moisésoftaca Bëngbe Bëtsá leyënga entšangbe cucuatšiniñe tojanáboshjona ora. Agar básenga yojtšabamna ora, chëngnaca tmojanonÿná nÿe ínÿabiana nÿets tempo oservénënga jtsemnama, y chë tratentša leyiñe soyëngaca mandánënga jtsemnama tmojtsebošëngnaca jtsemnama mo nÿe ínÿabiana nÿets tempo oservénëngcá. <sup>25</sup>Ndayá Agáraftaca tojanopasacá entsinÿinÿná chë Sináí batsjoca tmojánbema trato, Arabia luaroca; y chë morsca bëts pueblo Jerusalénënaca entsinÿinÿná, er chentša entšanga montsemna chë leyëngaca mandánënga. Ntšamo Agar y chabe básenga nÿe ínÿabiana nÿets tempo oservénënga monjamncá, Jerusalenentša entšángnaca cachcá chëngcá mondmëna, chë

leyéngaca nyets tempo mandánënga bétsemnayeca. <sup>26</sup>Ndayá Sáraftaca tojanopasacá, chë nÿe cachabiamá trabájaye shembása, entsinÿinÿná chë trato, chë tšabe bendicionënga Abrahambiamá jamama chábioye tbojanšbuachená ora. Chánaca entsinÿinÿná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyéngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentšë joyénanama, y chca, ndegombre chënga mondmëna celocama entsanga. <sup>27</sup>Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiama, y chca endmëna mo canÿe shembása šešonga ndabamná y añe chaotsabamnama Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiama, y chca endmëna mo canÿe shembása añe boyaftaquécá, er Bëngbe Bëtsabe uabemana palabrengüñe chë shembásatbiama mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama, moyejuá y moyó oyejuayá cojtsemnama.

Chca moma, er aca, chë shembása chabe boyabiamá utšená, chë shembása boyá bomnabiamá más básenga cochántsabamna ca.

<sup>28</sup>Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbioye tbojanšbuachenáyeca; cachcá,

tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca.

<sup>29</sup>Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nÿe chata chca tbojánbošenayeca onÿnaná; Isaac, chë Bëngbe Bëtsabe Espíritbeyeca onÿnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. <sup>30</sup>Pero, žndayá Bëngbe Bëtsabe uabemana palabrengüñe Abrahambe básatbiama iuayana? Mëntšá endayana: “Moma, chë nyets tempo nÿe ínÿabiamá oservená y chabe basa acbe yebnentšana chábuaisebocnama, er chë nyets tempo nÿe ínÿabiamá oservenabe šešona ndoñe quenátobena chabe taitabe soyënga jtsebomnama. Nÿe chë propio shembe šešona añe, er chë shemna ndoñe nÿe ínÿabiamá nyets tempo oservená quenátšmëna.” <sup>31</sup>Chcasna, Jesucrístbeyeca atšbe catšátanga, bënga ndoñe quemuátšmëna mo canÿa nÿe ínÿabiamá nyets tempo oservenabe básenga cuaftsemncá, er mora ya ndoñe más quemuátšmëna chë léyeca nyets tempo mandánënga. Y añe montsemna mo canÿe shema ndoñe nÿe ínÿabiamá nyets tempo oservenabe básenga cuaftsemncá, er Bëngbe Bëtsabe básenga bënga mondmëna.

#### Cristo bënga šojatsebacá

**5** <sup>1</sup>Cristo bënga šojatsebacá, ndoñe más mo chë nyets tempo nÿe ínÿabiamá oservenëngcá chamondëtsiyenama, chë léyeca mandánënga. Nÿa šmochtsentšëna nyets tempo chca atsebácanënga

chašmoquedama, y ndoñe šmatjaleséncia tšéngaftanga cachiñe chë léyecá mandánënga ínÿenga chácmbiamama.

<sup>2</sup>Tšabá šmochjouena. Atše Pablo cbéyana: Nderado tšéngaftanga ndoñe judiënga, šmojalesenciá ínÿenga chë tšéngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšéngaftangbiamá tojanmcá tondayama nantsoservená. <sup>3</sup>Ndëmuanyë entsánaca, nda tojalesenciá ínÿenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nyetsca chë judiëngbe leyentša mandënga jtsobedecénana.

<sup>4</sup>Ndëmuanyënga tšéngaftangbentšana šmojtsenguá, Bëngbe Bëtsabe bominyiñe tšábënga jtsemnana, ntšamo leyiñe jamama yomna ca iuayancá jtsamëse, tšéngaftanga chca šmojtsamama, šmojama Crístoftaca cányiñe mo canÿacá ndoñe chašmondëtsemnana; Bëngbe Bëtsábentšanënga šmojtsoluaré, y chca, šmontsinÿanÿná tšéngaftanga ndoñe šmontseboše, Bëngbe Bëtsá tšéngaftangbe tšabiamá jtsejuabnayëse, chácmatsebacana. <sup>5</sup>Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominyiñe tšábënga nyets tempo chamotsemnana. Y bënga chca mondobátmana, Jesucristbeñe ošbuáchiyana bómnayeca, y chë ošbuáchiyana chë Uámana Espíritbiajana bëngbiyoe endobá.

<sup>6</sup>Er Crístoftaca cányiñe mo canÿacá tmojtsemna ora, aíñe base bobachtema tétšenënga tmojtsemna o ndoñe, tondaye ntsámanana; ndayá puerte enduámana endmëna chë

Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿenga jtsababuánÿeshanëse.

<sup>7</sup>Tšéngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, čnda tojama tšéngaftanga chašmotsajbanama chë Bëngbe Bëtsabe ndegombre soyënga jtsuenanama? <sup>8</sup>Ndegombre, Bëngbe Bëtsá ndoñe quenátsmëna, er cha tšéngaftanga tcmojáchembo chabe entsánga chašmotsemnana. <sup>9</sup>Ntšamo entsánga mondëntšayancá: “Nyë base levadura jamana nyetsana chauabochama ca”; cachcá, tšéngaftanga chë judiëngbe básefta leyëngaca mandánënga jtsemnana šmojabojátšese, šmuatjábocna nyetsca leyëngaca mandánënga. <sup>10</sup>Bënga Bëngbe Utabnáftaca cányiñe mo canÿacá bëtsemnayeca, atše corente séntsetatšëmbo, ntšamo atšbe juabna yomncá tšéngaftangnaca cachcá šmochtsejuabnayama; y átšnaca corente séntsetatšëmbo Bëngbe Bëtsá puerte bochjacistíga, nda tšéngaftanga natjémbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup>Y atšbiamá chanjayana, Jesucristbeyeca atšbe catsátanga, Jesucristbeñe ošbuáchiyënga base bobachtema chëngbe más delicadentše tétšenënga chamotsemnana entsánga cabá stsbuayiynase, entsánga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entsánga stsbuayiyná ora, chënga ya ndoñe átšeftaca nanjósentiaye. <sup>12</sup>Pero chë natjémbana ainánaca ndoñe chašmondëtsiyenama imojtsamëngna, imalaye cachënga muanjenocbóna!

<sup>13</sup> Pero tsëngaftanga, Jesucrístbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnana. Pero chca bëtsemnana, mora ndoñe šmatjátsjuabnaye šmojtsobena jalesénciana, nÿe tsëngaftangbe cuerpënga tšabá chamotsemnana juabnéngaca mandánënga jatiyenana. Chamna, tsëngaftanga šmuenbobonshánayeca, nÿetscanga šmochtsenájabuachana. <sup>14</sup> Er ntšamo Moisesbe leyentša nÿetsca mandënguine endayancá, nÿe canÿe mandíne lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” <sup>15</sup> Pero ínÿenga chamotsesufrínana jtsamëse tsëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsébomna. Ndóñese, nÿetscanga šmatjänenpochocaye.

**Ntšamo chë Bëngbe Bëtsabe  
Espíritbeyeca vida jtsebomnana**

<sup>16</sup> Chýyeca cbochjáuyana: Nÿets tempo šmochtsiyena ntšamo chë Uámana Espíritu cmojtsamëndacá, y chca, tsëngaftanga ndoñe quešmochátama soyënga, nÿe cach tsëngaftanga tšabá jtsomñana juabnéngaca. <sup>17</sup> Er ndayá bënga, nÿe entsangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nÿe entsangbe juábnaca jamama imobošcá contra. Chca endmënayeca, ntšamo chë Uámana Espíritu chašmomama yobošcá šmojtsamëse, ndoñe quešmátobena jamana, ndayá cach

tsëngaftanga, nÿe entsangbe juábnaca jamama šmojtsbošcá. <sup>18</sup> Tsëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyíne iuayancá játamama.

<sup>19</sup> Ntšamo entsanga, nÿe entsangbe juábnaca tmojtsamcá, nÿetscanga paselo jtsonÿayana: chënga bacna soye boyabása o shembásaftaca jtsamana, nÿe chca soyëngama jésejuabnayana, y ndoñe ntšobenana cachënga jenomándama, chca soyënga jtsamëse. <sup>20</sup> Ba uabouana soyënga jtsamana, diosënga yomna ca tmojtsjuabná soyënga jadórama, jtsencjuanayana, ínÿengaftaca jtšenáyayana, nÿetscanga ndoñe cachcá chamondëtsejuabnana jtsamana, ínÿengaftaca yapa jtšenántšabošana, soyënga nÿe rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana. <sup>21</sup> Nÿe jtsebošana ntšamo inÿa tojatashjachcá jtsebomnana, yapa tmoyënga jtsemnana, fiestënguine ndoñe tšabe soyënga jtsamana, y inÿe soyëngaca mo chë soyëngcá jtsamana. Y mora atše cbaúayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

<sup>22</sup> Pero, Uámana Espíritu ainaniñe tojtsemánda ora, quem soyënga chentšana jóbocnana: nÿetscanga jtsababuánÿeshanana, jtsóyejuayana, natjémbana ínÿengaftaca jtšiyenana, puerte uantado nÿetsca padecéniñe jtsemnana, nÿetscanga corente bonshanánaca jtšénÿayana, tšabe ainana jtsebomnana, y nÿetscañe tšabe palabra bomnënga jtsemnana, <sup>23</sup> jtsejuabnayana chë ínÿenga mo chabiamana más uámanënga

cuatsemná, y cachá nyetsca soyënguïñe jenomándama jtsobenana. Y ndocna ley quenátsmëna, chca soyënga tmojtsama entšangbiamá contra cháuyanama. <sup>24</sup> Jesucristbenga imomnënga tmojama, chënga chë nye entšangbe juabnéngaca mandánënga ndoñe ntsemnama; ya ndoñe más, chë nye cachënga tšabá jtsomñama bacna juabnéngaca mandánënga quemátsmëna, y chë nye cachëngbiamá soyënga jamama bëtsca juabnéngaca cach ndoñe. <sup>25</sup> Bënga ndegombre tšabe vida chamotsebomnama Uámana Espíritu yojtsámayeca, bënga mochsiyena jtsamëse lempe ntšamo Uámana Espíritu šojtsamëndacá. <sup>26</sup> Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiayama, y ndoñe nye mochjásboše ntšamo inÿa tojatashjachcá jatsbomnama.

#### Nyetscanga šmochtsenájabuachana

**6** <sup>1</sup> Jesucristbeyeca atšbe catsátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonÿayëse. Cuedado šmochtsebomna, er ndoñese, tšëngaftángnaca cmatjócochëngo cachcá soye jamama. <sup>2</sup> Chë soyënguïñe chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyabama šmojtsenájabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canÿe uámana entšá yomna ca,

pero ndoñe chca cha tondmënëse, cachá jtsenoíngñayana. <sup>4</sup> Cada ona chauenojuabó, ntšamo tojamcá tšabá o ndoñe tšabá bëtsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. <sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bëtsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntšayancá:

“Ndayá tcojajé y cachcá josháchiñana ca.” <sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nye cachá tšabá jtsomñama bacna juabnéngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna. <sup>9</sup> Chcasna, ndoñe chašondëmantšé tšabe soye jtsamama; er masque šojtsëmantsnasna, pero chë tšabe soyënga jtsamama ndoñe tmonjajbanase, canÿe bëts te echanjóshjango, bënga bëtsca tšabe soyënga josháchiñama, mo tša tšabe shajuanënga tmojashaquëcá. <sup>10</sup> Chíyeca, tmojtsobena ora, nyetscangbiamá

tšabe soyënga mochjama, pero masna chë Jesucristbeñe ošbuáchiyana bómnayeca, bëngcá Bëngbe Bëtsabe básenga imomnëngbiana.

**Quem tsbuanácha juapochócama  
cach Pablo tojanábema**

<sup>11</sup> iŠmochjinÿe, tša bëts letrëngaca cach atšbe cucuátšeca mora cbontsëbuabiamná!

<sup>12</sup> Ndëmuanÿenga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema tëtšënga chašmotsemnama, ntšamo judiënga monduamancá, chënga chca jtsamana nÿe chë judiëngaftaca tšabá joquédama. Y chca jtsamëndayana, chënga chamosufrima ínÿenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayinase. <sup>13</sup> Pero ni mo chë más delicadentše base bobachtema tëtšënga imomnënga, ndoñe quemátama lempe ntšamo chë leyinë iuayancá. Pero chënga jtsebošana tšëngaftanga chca tëtšënga chašmotsemna, chënga jtsenábotamnayama jobenayama, ínÿenga base bobachtema chacmatëtšama tšëngaftanga šmojalesenciam.

<sup>14</sup> Atšeftacna ndocna te chca chaondopasá. Atše nÿets tempo y

becá chanjëfťsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámana ntšamo entšanga quem luarentše imojuabnacá y chëngbiana puerte iuámana; y ndayá atšbiana puerte iuámana, entšangbiana tondaye quenatámana; y chë causa, atše chëngbiana mo obanacá sëndmëna. <sup>15</sup> Chë más delicadentše base bobachtema aiñe tëtšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábiana, Uámana Espíritu bëngbe ainaniñe jtsemándayëse. <sup>16</sup> Chë quem buatëmbana sóyeca jtsamëse šmoyenëngbiana, atše, Bëngbe Bëtsá séntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nÿe chëngbiana chca quetsatsimpadana, ndayá nÿetscanga Bëngbe Bëtsabe entšanga imomnëngbiámna.

<sup>17</sup> Y mora, nÿe canÿe soye cbochjáuyana: morskana ndocná chaondëtsama atše jasúfriama chašotsemnama; er atšbe cuerpiñe endëtinÿna ntšamo atše tijasufrí, Jesusbe oservená bëtsemnama.

<sup>18</sup> Jesucristbeyeca atšbe catšátanga, atše séntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

# Efesios

## Jacheuayama

**1** <sup>1</sup> Atše Pablo, Jesucristbe ichmoná Bèngbe Bètsá chca yobóšeyeca, quem tsbuanácha sèntsabiamná Efeso puebloca Bèngbe Bètsabe entšanga y Cristo Jesúsbeñe ošbuáchiyènga imomnèngbiamá. <sup>2</sup> Atše séntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tsabe bendicionènga chaotsemnana, y chata chaboma tsèngaftangbe ainaniñe tsabe ebionana chašmotsebomnana.

**Crístoftaca cányiñe mo canyáca jtsemnése, bènga mochántsebmna nyetsca tsabe soyènga, ntšamo celoca yobinýncá**

<sup>3</sup> Bèngbe Bètsá y Bèngbe Utabná Jesucristbe Taitábioye mochjètschuaye, er bènga Crístoftaca cányiñe mo canyáca mondménayeca, Bèngbe Bètsá tojama bènga nyetsca tsabe soyènga chamotsebomnana, ntšamo celoca yobinýncá. <sup>4</sup> Bèngbe Bètsá bènga šojanabacacá Crístoftaca cányiñe mo canyáca chamotsemnana, cabá quem luare cha ndama orscana, bènga chabe delante chamotsemnana chabe entšanga, bacna soyèngama perdonánènga y chabe oservénènga, y bènga ainaniñe bacna soye ndbomnènga imomna ca cha cháuyanama. <sup>5</sup> Bèngbe Bètsá šuababuánjèshanayeca, tempo

cha tojanjuabó y tojánbošena bènga mo cachabe basengcá jábiamama, chë Jesucristo yochjanma sóyeca. <sup>6</sup> Chíyeca bènga Bèngbe Bètsábioye sempre jtsatschuanayana, cha bèngbe tsábiamá juabna yobómnyayeca, ndayá chabe Bonshana Uaquiñáftaca bèngbe tsábiamá cha tojamama. <sup>7</sup> Bèngbe Bètsá puerte bonshanánaca bèngbe tsábiamá bètscá yojuabnáyeca, cha bèngbe bacna soyèngama šojtsaperdoná y šojatsebacá, er Jesús bèngbiamá tojanóbana, chabe buiñe juabuáshanése. <sup>8</sup> Bèngbe Bètsá tojama bènga nyets osertánana y becá juabna chamotsebomnana, cha becá bonshanánaca bèngbe tsábiamá juabna yobómnyayeca, <sup>9</sup> y tojama bènga chamotsetatšèmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanjé. Ndayá jamama Bèngbe Bètsá tempo yojanjuabnacá, ndayá cha tojama bènga chamotsetatšèmbuama, cachá yojanjuabná chca jamama. <sup>10</sup> Ndayá jamama Bèngbe Bètsá yojuabnacá, lempe echanjochnèngo nya chama tempo chaojóshjango ora, y quem Bèngbe Bètsabe juabna endmèna jamana, lempe ntšamo cha tojamcá celoca y quem luarentše, Cristo chamotsebomna nyetsca chë soyènguiñe

<sup>11</sup> Bèngbe Bètsá sempre jamana nyetsca soyènga ntšamo

tojtsejuabnacá y tojtsebošcá. Y Bèngbe Bètsá bènga šojabacacá, ntšamo cabá chca ndama ora yojanjuabnacá; chca, bènga Crístoftaca cányiñe mo canyácá jtsemnëse, bènga chamóyëngacñama ndayá Bèngbe Bètsá chabe entšanga jatšatayama tojašebuachená, mo chëngbe otocana soycá. <sup>12</sup>Y Bèngbe Bètsá chca tojama, bènga chë Crístbeñe natsana imojtsanošbuachenga, cha bènga šochjánatsebacama, tšabe soyënga jtšamëse chamotsiyenama, chca, chë inye entšanga Bèngbe Bètsabe obenanama cha chamotsatschuanama. <sup>13</sup>Y tšëngaftángnaca, chë ndegombre buayenánana šmojanuena ora, chë Bèngbe Bètsá bènga játsebacama buayenánana, y Crístbeñe šmojtsanošbuaché ora, Bèngbe Bètsá tojanma tšëngaftanga Crístoftaca cányiñe mo canyácá chašmotsemnama y tcmojanainyñaná tšëngaftanga chabe entšanga bétsemnama. Bèngbe Bètsá chca tojanma, Uámana Espíritu tšëngaftangbe ainaniñe cháuamashënguama tojanma ora, ntšamo tempo cha tojanašebuachenacá. <sup>14</sup>Bènga chë Uámana Espíritu bèngbe ainaniñe mondbómnyayeca, corente mondetátšëmbo ndayá Bèngbe Bètsá chabe entšanga tojašebuachenacá bènga mochjójëngacñama. Uámana Espíritbeyeca bènga montsobena chca puerte tšabá jtsetatšëmbuama, chë Bèngbe Bètsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiana inétsamama, nyetscanga cha mochántatschuanaye, cha bètsá y obená bétsemnama.

**Pablo Bèngbe Bètsábioye  
tbojanimpadá, ošbuáchiyënga  
osertánana chamotsebomnama.**

<sup>15-16</sup>Chcáyeca, atšna, Bèngbe Bètsá tšëngaftangbiana stseimpadana ora, sempre cha sëndbètsatschuanaye, er atše sënjátatšëmbona ntšamo tšëngaftanga Bèngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bèngbe Bètsábenga imomnënga šmababuányëshanama. <sup>17</sup>Bèngbe Bètsá, Bèngbe Utabná Jesucristbe Taitá, nda corente iuámana, séntseimpadana cha chaoma Uámana Espíritu chacméjabuachama, corente osertánënga chašmotsemnama, y chacminyanýë nda Bèngbe Bètsá yomnana, chca, más tšabá cha chašmotsábuatmama. <sup>18</sup>Atše, Bèngbe Bètsá séntseimpadana, cha chaoma tšëngaftanga Bèngbe Bètsabe soyënguiñe corente osertánana chašmotsebomnama, tšëngaftanga chašmotsetatšëmbuama, ndayá Bèngbe Bètsábeñe jtsošbuáchiyëse tšëngaftanga šmojtsobatmancá cha cmochjátšatayama. Bèngbe Bètsá tcmojáchembo chábeñe chca chašmotsobátmanama. Atše cha séntseimpadana, chaoma tšëngaftángnaca chašmotsetátšëmbo tša bëtscá y bëtš soyënga yomna ndayá chabe entšanga cha tojašebuachenacá; <sup>19</sup>y chašmotsetátšëmbo tša bëtš soye y ndocna te ntjéftopochócama chabe obenana yomnana, chë ndayá bèngbe ainaniñe tšabe soyënga yojtsama, bènga chë Crístbeñe ošbuachiyëngbeñe. Cach quem puerte bëtš obenana endmëna, <sup>20</sup>ndáyeca Bèngbe Bètsá tojanma Cristo cháuatayenama, y chabe catšbioica celoca tbojtantbema chaotsemándama. <sup>21</sup>Choca Cristo



nÿetsca soyënguine yojtsemánda, y más bëtsá obenana y mando yojtsebomna nÿetsca mándayëngbiana, chë mando y obenana bomnëngbiana, y cha yomna más uamaná y bëtsá nÿetsca chë entšangbiana mo bëtsëtsangcá utabnëngbiana, chëngbe uabaina respétoca jtsichámëse. Cristo puerte bëtsá endmëna lempe ntšamo quem luarentšë yobínÿnama y Cristo yochjésabentšana yochtsebinÿárnna. <sup>22</sup> Bëngbe Bëtsá tojama Cristo nÿetsca soyënguine chaotsemándama, y tbojanábuayana nÿetsca soyënguine chaotsemándama, chábeñe ošbuáchiyëngbe tšabiana. <sup>23</sup> Cha endmëna nÿetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nÿetsca luarënguifnaca, y lempe cha endëmánda.

**Atsebácanënga mondmëna, Bëngbe Bëtsá šuababuánÿeshanayeca**

**2** <sup>1</sup> Tempo tšëngaftanga Bëngbe Bëtsabiana mo obanëngcá šmonjamna, er tšëngaftanga šmonjaniyena, ntšamo Bëngbe Bëtsá yomandacá ntsamcá, y bëtscá bacna soyënga šmojánama. <sup>2</sup> Chca, tšëngaftanga šmonjánama mo chë nÿe quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsábioye ndëyeunanëngbe ainaniñe yománda espíritu. <sup>3</sup> Tempo bënga nÿetscanga fsënjaniyena ntšamo tšëngaftanga šmonjaniyencá. Bënga soyënga fsënjánama, nÿe ntšamo ftsjanbošcá nÿe bëngbe cuerpëngbe tšabiana, y nÿe ntšamo bëngbe juabna enjamncá

bacna soyënga jamama. Bënga fsënjaniyena soyënga jtsamëse mo chë Bëngbe Bëtsábioye nduabuatma entšanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá. <sup>4</sup> Pero Bëngbe Bëtsá sempre tša lastemado entšangbiana endmëna y sempre corente bënga šondábabuanÿeshana; <sup>5</sup> y chíyeca, bënga cabá mo obanëngcá chabiana fsënjamna ora, bacna soyënga fsënjánama causa, chora cha tojanma bënga tšabe vida chamotsebomnana y Crístoftaca cánÿiñe mo canÿacá chamotsemnana. Bëngbe Bëtsá tšëngaftanga tšabiana juabna bómnyeca, bacna soyënguentšana tcmojatsebacá. <sup>6</sup> Bënga Jesucrístoftaca cánÿiñe mo canÿacá bëtsemnayeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo béngnaca chámuatayenama Bëngbe Bëtsá cuafjamcá y Cristo Jesúseftaca celoca cuafatbiamcá. <sup>7</sup> Chca enjamna, Bëngbe Bëtsá entšanga cháuinÿanÿema nÿetsca joshjanguama tempënguine, ntšamo cha bëngbe tšabiana bëtscá juabna bëtsebomnana, cha Cristo Jesúseftaca béngbioye tšabe juábnaca šojánanÿe ora. <sup>8</sup> Er Bëngbe Bëtsá tšëngaftangbiana tšabe juabna yojánbomnayeca, tcmojatsebacá, Jesucrístbeñe šmojtsanošbuáchemá; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbočaná jtsemnana endmëna Bëngbe Bëtsabe canÿe tšetana soye. <sup>9</sup> Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtsenábotamnayana atsbočaná yojtsemnana. <sup>10</sup> Bëngbe

Bëtsá šojtabiama ntšamo bënga mondmëncá, y Cristo Jesúseftaca cányĩne mo canýacá bëtsemnayeca, Bëngbe Bëtsá mo tsmëma entšangcá cuaftsatsmëncá šojtabiama, tšabe soyënga jtsamëse jtsiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

**Cristbeyeca tempcá tšabá Bëngbe Bëtsáftaca jtsatsmënana**

<sup>11</sup> Tšëngaftanga ndoñe judiënga, ndëmuanýenga judiënga cmondubuatma “chë más delicadentšë base bobachtema ndëtëtšënenëga ca”, chëngcá uinýnanánënga ndoñe šmondmënama; chënga cachënga jtsenábobuatmana “chë más delicadentšë base bobachtema tëtšënenëga ca”, y cachëngbe cuerpënguĩne chca jtsamana. Mëntšá, tšëngaftanga chë ndoñe judiënga, <sup>12</sup> šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entšangbiana stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tšëngaftanga quem luarentšë šmonjaniyena ndocnábeñe ntsobatmancá y Bëngbe Bëtsá ntsabuatmcá. <sup>13</sup> Pero mora tšëngaftanga Cristo Jesúseftaca cányĩne mo canýacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buĩne juabuáshanëse, tšëngaftangbiana tojanóbana. <sup>14</sup> Cach Cristo yojtsama bënga tempcá tšabá Bëngbe Bëtsáftaca chamotsemnama. Cha tojama judiënga

y ndoñe judiënga nyetscanga mo cachca entšangcá chamotsemnama, mo nda canýe tapiëše tojtsendbemcá, chë ndayëšëca canýe luarentša entšanga tmojtsenjáta, chënga enáyaye causa. <sup>15</sup> Cristo chënga mo cachca entšangcá tojábiama, judiëngbe leyënga y mandënga ndocna obenana chamondëtšëbomnama jamëse. Chca tojama, cha jóbanëse, chë útoica entšanga mo nýe canýe tsmëma entšangcá jábiamama, cháftaca cányĩne mo canýacá jtsemnëse. Cha chca tojanma chënga nyetscanga tšabá chamotsiyenama; <sup>16</sup> y Cristo cruciñe tojanóbanayeca, cha tojanma chë útoica entšanga enáyayana chamotsajbanama, y tojanma chë útoica entšanga mo canýe entšangcá chamotsemnama, chënga tempcá tšabá Bëngbe Bëtsáftaca chamotsatsmënama.

<sup>17</sup> Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. <sup>18</sup> Er chábeyeca, canýánýenga y ínýenga montsobena chë Taitábioye jobéconana, er bënga nyetscanga cachca espíritu bëngbe ainaniñe mondbomna, chë Uámana Espiritu. <sup>19</sup> Chíyeca tšëngaftanga, Bëngbe Bëtsabe entšanguentšë ndoñe quešmátsmëna mo inýe luarocana ashjajnëngcá, y ni mo cachëngbe yebnentšë ndoyenëngcá, tondayama derecho ndbomnënga. Inýetšá endmëna; tšëngaftanga derecho šmondmëna cachcá ntšamo Bëngbe Bëtsabe entšanga mondbomncá, y Bëngbe Bëtsabe básënga šmondmëna. <sup>20</sup> Jesucristo

y chabe entsanga mondmëna mo canÿe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtsbënga ndayinë chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtsbecá. <sup>21</sup> Quem más uámana luarentše uashacuana ndëtsbeñe, nyetsca chë bëts yebnentša soyënga jtsëcuatjonana, y tsbanánoye más tmojatsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nyetsca chábeñe ošbuáchiyënga cháftaca cánÿiñe mo canÿacá chamotsemnana, y ínÿëngnaca cachcá chamotsemnana. Y nyetsca ošbuáchiyënga Crístoftaca cánÿiñe mo canÿacá tmojtsemna ora, chënga jtsemnana mo Bëngbe Utabnabiama canÿe bëts yebna jebncá, chábioye jtsatschuanayama. <sup>22</sup> Y tšëngaftanga Efesoca ošbuachiyëngbiámnaca Cristo entsama, chë inÿe chábeñe ošbuáchiyëngaftaca mo canÿe entsangcá chašmotsemnana. Y chë Uámana Espírítu bëngbe ainaniñe yojtsiyénayeca, bënga nyetscanga cánÿiñe mondmëna, mo canÿe bëts yebncá ndayentše Bëngbe Bëtsá soyena.

**Pablo Jesucristbe trabajo  
yojanbonÿena, chë ndoñe  
judiëngbeñe jamama**

**3** <sup>1</sup> Chca, atše Pablo utamená séntsemna, Cristo Jesusbiama soyënga entsanga abuyiyenaye causa, tšëngaftanga chë ndoñe judiëngbe tšabiama. <sup>2</sup> Er tšëngaftanga ya cmontsamna jtsetatšëmbuama,

Bëngbe Bëtsá tšëngaftangbe tšabiama juabna yobomnama; y chca, chë trabajo atše šojabonyé, tšëngaftangbe tšabiama jamama. <sup>3</sup> Tšëngaftangnaca cmontsamna jtsetatšëmbuama ndayá Bëngbe Bëtsá šojinÿinyé, ntšamo cha jamama tempo tojanjuabocá, pero entsanga chca ndoñe tonjaninÿanyé, y chë soyama ya batsatema tcbonjubuábiamana. <sup>4</sup> Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, <sup>5</sup> chë tempo Bëngbe Bëtsá ndocnábioye tbonjaninÿinyé soyënga; pero mora cha tojinÿanyé, Jesucristbe ichmónënga nÿe Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espírítuftaca. <sup>6</sup> Ndayá tempo Bëngbe Bëtsá ndoñe tonjaninÿanyecá mëntšá endmëna: chë ndoñe judiënga Jesucristbe tšabe noticiënguñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nyetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánÿiñe mo canÿacá bëtsemnayeca.

<sup>7</sup> Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénama,

tšabe noticiënga entšanga jtsabuayinyayëse; y cha átseftaca chca tojanma chabe obenánaca. <sup>8</sup> Atše nyetsca chë Bëngbe Bëtsabe entšanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtská tšabe soyënga chë ndoñe judiënga jábuayenama. Chë Cristbe soyënga tša bëtská endmëna, y chca, quenátopodena chë soyënguentsana lempe jtsabuatmana. <sup>9</sup> Y chë trabajo šonjabonýé jamama, nyetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Méntscónama Bëngbe Bëtsá chë soye ndocnábioye tbonjinýinýé, pero mora afñe. <sup>10</sup> Chca, Cristbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. <sup>11</sup> Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucristoftaca, Bëngbe Utabná. <sup>12</sup> Bënga Crístoftaca cányiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatjácá, y corente jtsetatšëmbëse cha ndoñe chašondubatemala. <sup>13</sup> Chýyeca atše cbontsaimpadana ndoñe chašmondëtsajbaná ainaniñe añemo bomnana, atše séntsesufrina causa, er chë tšëngaftangbe tšabiama tsësufrintentsana, tšëngaftangbiama tšabe soyënga endóbocana.

### **Cristbe bonshánana**

<sup>14-15</sup> Y chca, Bëngbe Bëtsá, chë Taitá, ndábentsana nyetsca

pamíllanga celoca y quem luarentše uabaina imóyëngacañe, chabe delante joshaméntšase, <sup>16</sup> séntseimpadana, chabe bëtská uámana bomnánaca chaoma, tšëngaftanga ainaniñe obenana y bëts añemo chašmotsebomnama, chabe Espiritbeyeca, <sup>17</sup> y tšëngaftanga Cristbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y inýenga nyets ainánaca jtsababuányeshanëse, <sup>18</sup> tšëngaftanga y nyetsca Bëngbe Bëtsabe entšángnaca tšëngaftangaftaca, chašmotsobena josértama Cristbe bonshánana bëngbiama tša bëtská yomnama. Nderado nda tojontsé chabe bonshánana jatšëmbonana mo canýe soye cuaftsemncá, cha ndocna te nanjobenaye jtsetatšëmbuana tëntšoye ndayéntscoca yomna y nyanëjoye ndayéntscoca, jashenoye ndayéntsoñe y tsbanánye ndayéntsoñe yomna. <sup>19</sup> Atše séntseimpadana tšëngaftanga chašmobená chë bonshánana juabuátmanana (chë bonshánana puerte bëtská endmëna causa, bënga ndocna te quemochatobenaye josértama ntšamo chë soye lempe yomnana). Pero séntseboše, tšëngaftangbe ainaniñe nyë Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

<sup>20</sup> Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsotjanaanë o tmojtsujuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemándá y yojtsama bënga ainaniñe sempre ošbuáchiyana chamotsebomnama. <sup>21</sup> ¡Entšanga

Bëngbe Bëtsá chamotsatschuaná nÿets tempo y nÿetsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

**Uámana Espíritbeyeca bënga cánÿiñe mo canÿacá jtsemnana**

**4** <sup>1</sup>As, atše chë cárceloye utamená, Bëngbe Utabnabiamá trabájaye causa, tšëngaftanga cbontsaimpadana, ndëmuanÿënga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanÿënga Bëngbe Bëtsá cach soyama tojánachembo y chca imomerecena. <sup>2</sup>Cada ona chamotsenojuabná mo chë ínÿënga chabiamá más uámanënga tmojtsemncá, y nÿetscángbiöyë puerte bonshánanaca šmochtsobátmana, y bëtscá bonshánana jtsebonnëse šmochtsenëuantana; <sup>3</sup>sempre šmochtsejuabnaye y šmochtsentšëna tšëngaftanga nÿets tempo cánÿiñe mo canÿacá chašmotsemnana, nÿetsca tšëngaftanga natjëmbana jtsemnëse. Y tšëngaftanga šmontsobëna cánÿiñe mo canÿacá jtsemnana chë Uámana Espíritbeyeca. <sup>4</sup>Bënga Jesucristbeñe ošbuáchiyënga bëtsemnayeca mondmëna mo cach cuerpentšëngcá, chë Cristbe cuerpo, y cachca Espiritu bënga nÿetscanga ainaniñe mondbomna. Bëngbe Bëtsá šojáchembo, bënga chábeñe jtšošbuáchiyëse, nÿetscanga cachcá šochjátšatayama chamotsobátmanama. <sup>5</sup>Bënga nÿetscanga cach Utabná mondbomna, cachca ošbuáchiyana Jesucristbeñe mondbomna, y bënga nÿetscanga uabáinënga mondmëna chca betsošbuáchiyama. <sup>6</sup>Bënga ošbuáchiyënga nÿetscangbiama cach

Bëngbe Bëtsá y Taitá endmëna. Cha bëngbe amëndayá endmëna, chabe obenana nÿetscángbeñe jtsinÿnana, y nÿetsca bëngbe ainaniñe chabe Espiritu endmëna.

<sup>7</sup>Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. <sup>8</sup>Chíyeca, Bëngbe Bëtsabe uabemana palabrënguiñe Jesucristbiamá mëntšá endayana:

Cha celoye tontantsjuá, y cháftaca tonjanéyamba nÿetsca chabe uayyënga, chë tojánayëñjananga, y chabe entšángbiöyë obenana tonjanatšatá, tšabe soyënga jamama ca.

<sup>9</sup>¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. <sup>10</sup>Y Cristo, chë tojanastjanguá, cachá endmëna nda celoca chë más tsbanánoyë tojtantsjuá; chca, canÿe ora nÿetscañe cha chaotsemnana. <sup>11</sup>Y cachá, chë tšabe soyënga jamama obenana tojanatšatá ora, tojanma chábeñe ošbuáchiyënguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiamá abuayinayënga, y ínÿengna ošbuáchiyënga anÿenënga y Bëngbe Bëtsabe soyëngama abuátambayënga. <sup>12</sup>Cristo tojanabacacangna chabe entšángbiöyë mochjanëjabuache, cha tojanabanÿé trabajo chënga chamotsamama, y nÿetsca ošbuáchiyënga, chë nÿetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebonnana, <sup>13</sup>bënga

nÿetscanga chamobenantscuana cachca ošbuáchiyana Jesucristbeñe jtsebmomna, y Bëngbe Bëtsabe Uaquiñabiana nÿetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsëtsanga bëtscá juabna bomnëngcá, <sup>14</sup> y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanyënga paselo jáingñama yomna. Mo canÿe barquësha nÿe ndaye bínÿiacnaca tojtsëyambancá, básefta entšanga nÿe ndaye buatëmbana soye tmojatuená jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatuenta tsëm sóyeca, ínÿengbioye áingñayënga. Chënga becá montsetátšëmbo ntšamo entšanga jáingñana, y montseboše chë montsabuatambá bostero soyënga bënga jtseyeunanama. <sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyebuamnyëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemadayancá. <sup>16</sup> Mo canÿe bestšašcá, chëše jamana nÿetsca chë cuerpentša soyënga ndayentše chamueneñjama y chiñe jobónjuama chamotsobenama, chë cuerpo saná chaotsebmomna jtsamëse, chca, nÿets cuerpo tšabá chaóbochema, cachcá Cristo, chë nÿetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebmomna. Cada cuerpentša soye tojtsama ntšamo chë soye chaotsamama tomncá, as

nÿets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nÿetsca ošbuáchiyënga cada te más ošbuáchiyana mochántsebmomna, puerte jtsebmomnshánëse.

**Cristoftaca cánÿiñe mo canÿacá jtsemnëse tsëm vida šmochtsebmomna**

<sup>17</sup> Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebmomna tsëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá.

<sup>18</sup> Chëngbe juabnoca obenana mondbomna nÿe ndoñe ndegombre soyëngama josértama. Chënga ndoñe quemátsbmomna chë Bëngbe Bëtsábioyana yóbocana tšabe vida, er chënga ndoñe quematslesencia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama.

<sup>19</sup> Chënga bacna soyënga tmojtsama ora, tondayama ntsenócochinÿenana; chënga nÿets tempo jesentšënanana nÿetsca bacna soyënga amana, y chca jtsamana tondayama ntjatenojwabnycá.

<sup>20</sup> Pero chca ndoñe quenjatsmëna ntšamo tsëngaftanga Cristbe soyëngama šmojanatsjinÿe y ntšamo chábioye šmojanabuatmancá.

<sup>21</sup> Ndegombre tsëngaftanga chabiana šmojanuena y ínÿenga tmojanabuatambá mo chábeñe

ošbuachiyëngcá y ntšamo chë ndegombre soyënga Jesucristbeñe endbinýncá. <sup>22</sup> Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canýe ondbiamnaye juabnentšana yojóbocana, tšëngaftanga bacna soyëngama juabnéngaca mandánënga jtsemñese, y chë juabnénga tšëngaftangbioye cmojánaingñaye. <sup>23</sup> Tšëngaftanga cmontsamna tšëngaftangbe juabniñe tsëm y tšabe juabnénga jtsebmnnana. <sup>24</sup> Tšëngaftanga cmontsamna jashjáchana mo tsmëma entsangcá jtsemnana, y chë ntšamo tempo šmojanamcá mora ndoñe cachcá chašmondétsamama. Chca, tšëngaftanga šmochanjashjache jtsemnana ntšamo Bëngbe Bëtsá yomncá. Bëngbe Bëtsá chca tsmëma entsangcá tcmojábiana, tšëngaftanga chašmotsiyenama jtsamëse Bëngbe Bëtsabe bominiñe tšabá yomna soyënga y chábioye jadórana soyënga, chë ndegombre soyënguentšana óbocana soyënga.

<sup>25</sup> Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nyetscanga cánýiñe mondmëna mo nye canýe entsangcá. <sup>26</sup> Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënana chacmetëna y ndoñe nyets tchacmondetëna. <sup>27</sup> Ndoñe šmatjaleséncia Satanás ndayánaca tšëngaftangftaca chaomama.

<sup>28</sup> Chë yojanatbëbaná chauajbaná atbëbanama y jatrabájama chaontsé;

cachabe cucuátseca tšabe trabajo chaotsóboma, chca, ndayánaca cha chaotsebomnana chë ujabótënga jatšatayama.

<sup>29</sup> Bacna palabrenga ndoñe šmattsichamo, pero aínne tšabe palabrenga y nýa chorsca ujabótama palabrenga, chë inýe entsángbioye jujabuáchama más Cristcá chamotsemnana, chënga Bëngbe Bëtsábíocana tšabe bendicionënga chamóyëngacñama, chë ndayá chašmojtsëtsësná sóyeca. <sup>30</sup> Ndoñe šmattsama soyënga, Bëngbe Bëtsabe Uámana Espiritu chabongmema. Bëngbe Bëtsá tojama Uámana Espiritu tšëngaftangbe ainaniñe cháumashënguama, y chca, tcmojanainýnaná chabe entsanga bëtsemnayeca, chë yochjóshjango tescama, Bëngbe Bëtsá chabe entsanga nyetsca tescama yochjatsebacaye orscama.

<sup>31</sup> Inýengbiana bacna juabnénga ainaniñe ndoñe chašmondétsebmna, etonánënga ndoñe chašmondétsemna, ní inýengftaca ndoñe chacmondetëna. Inýengbioye ndoñe chašmondétsabuachembuana, inýengbioye ndoñe šmatjoyánguango y ndaye bacna sóynaca ndoñe šmattsama. <sup>32</sup> Nyetscángaftaca tšábënga šmochtsemna, nyetscanga šmochtsenlastemana y šmochjenperdóna, ntšamo Bëngbe Bëtsá, Cristbeyeca tcmojaperdonacá.

#### Ntšamo yomna Bëngbe Bëtsabe básënga chamotsiyenama

**5** <sup>1</sup> Tšëngaftanga, Bëngbe Bëtsabe bonshana básënga quetsomñecá, nýa šmochtsentšëna cachacá jtsemnana. <sup>2</sup> Šmochtsiyena nyetsca soyënga bonshánánaca jtsamëse, ntšamo Cristo šojanababuanýeshancá;

chca, cha chabe derecho vida jtsobomñama cachcá tojanonýa y bēngbiana tojanóbana. Y ntšamo Cristo tojanmcá, yojamna Bēngbe Bētsábioye jētschuayama, y chabe bominiñe tša tšabá yojtsemna, mo ndaye ora Bēngbe Bētsá oyejuayá jóyēngacñana ndayá tcojóba y altaroca tcojajuinýese, y chē soye botamana jtsonguētšiyana.

<sup>3</sup>Tšēngaftanga, Bēngbe Bētsábēnga šmōmnēnga, ndoñe quecmátamna shembása o boyabásaftaca bacna soyēnga jtsamana, ni chca játamama jtsejuabnayana y jtsebošana, y chē nýe yapa jésebošana más soyēnga ínýēngbiana jtsebomnama cach ndoñe. Ni chē soyēngama ndoñe šmattsóyebuambnaye. <sup>4</sup>Bacna soye ndoñe šmattsóyebuambnaye, ni corente ntjenujaboycá, ni nýe ntšámna bacna soye jenbotatšēmbonana cach ndoñe, er chē soyēnga tšēngaftangbiana ndoñe tšabá ntsemnana. Chca játamamna, más tšabá, Bēngbe Bētsá šmochtsantschuanaye. <sup>5</sup>Er tšēngaftanga ya šmondétatšēmbō, ndocna chē shembása o boyabásaftaca bacna soye amá, ndocna chē nýe chabe bacna juabnéngaca soyēnga jtsamama oyená, o chē nýe más soyēnga ínýēngbiana jtsebomnama bošá y amá (chca jtsayanana chabiana más iuámama soyēnga jtsebomnana, Bēngbe Bētsábioye jatsbobonshánama), chca amēnguentšana ndocná tondaye queochatóyēngacñe ndayá Bēngbe Bētsá chabe entšāngbioye jatsatayama tojašebuachenantšana, Cristo y Bēngbe Bētsabe amēndayoca. <sup>6</sup>Ndocná chacmondaingñe ndoñe ndegombre tondmēna palabrēngaca, bacna soyēnga chašmotsamama, er chē causa chē uabouana castigo echanjobaye,

ndáyeca Bēngbe Bētsá chábioye ndēyeunanēnga yochjácastigaye. <sup>7</sup>Chíyeca, chca amēngbe soyēnga tondaye šmattsama.

<sup>8</sup>Tempo tšēngaftanga šmojaniiyena bacna juabnénga jtsebomnēse y bacna soyēnga jtsamēse, mo ibetiñe cuaftsiyencá, pero mora Bēngbe Utabnáftaca cánýiñe mo canýacá bētsemnayeca, chabe soyēnga šmontsetátšēmbō y sempre šmondētsemna cháftaca, chē entšāngbe juabnénga binýnayáftaca. Šmochtsiyena jtsamēse mo chē binýnayabe entšāngcá. <sup>9</sup>Chē binýnayábeyeca entšānga tšabe soyēnga jtsamana, chē Bēngbe Bētsabe bominiñe tšabá yomna soyēnga, y ndegombre soyēngnaca. <sup>10</sup>Nýa šmochtsentsēna soyēnga jamama, Bēngbe Bētsá oyejuayá chaotsemnana. <sup>11</sup>Chē mo ibetiñe cuaftsiyencá oyenēngbe bacna soyēnga tondayama ntoservénana, y tšēngaftanga chca ndoñe šmattsama. Chamna, chēngbioye šmochjínýanýiye chēnga ndoñe tšabá tmonjamama. <sup>12</sup>Ndegombre, nýe chē ndayá chēnga mo iytēmcá tmojamama jóyebuambayama ya cuantsēuatja; <sup>13</sup>pero nýetsca soyēnga binýniñe tmojacjá ora jtsopodénana tšabá jinýama ntšamo ndegombre tomncá. Cachcá, ntšamo entšānga tmojamcá chē binýnayá chaojinýanýe ora, echantsopodena jtsotatšēmbuama ntšamo chē soyēnga yomnana; <sup>14</sup>er ndayánaca binýniñe tojtsinýinýena, jtsopodénana jinýama ntšamo ndegombre chē soye tomncá. Cachcá, ntšamo entšānga iytēmcá tmojtsamcá chē binýnayá chaojinýanýe ora, chēnga mochántsetatšēmbō bacna soyēnga imojtsamama. Chíyeca mēntšá jtsichámuana:



Botamana cochjájuaboje, aca ndoñe quecátobena jenomándana, mo canya cuaftsomañcá;  
 chë bacna soyënga ama causa,  
 Bëngbe Bëtsabe bominiñe mo obanëngcá imomnënguentšana  
 šmochtsojuánañe,  
 y Cristo acbe juabnënga  
 echantsebínnyaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero añe chë chca soyëngama osertanëngcá. <sup>16</sup> Lempe ntšamo chašmojobenacá nyets tempo tšabe soyënga šmochtsama, er quem tempo entšanga yapa bacna soyënga montsama. <sup>17</sup> Ntjenojuaboycá ndoñe šmattsama, mo chë ndosertanëngcá. Pero añe bëtscá šmochtsentsëna ndayá Bëngbe Utabná jamama yobošcá chacmósertama. <sup>18</sup> Ndoñe šmattsótmenaye, er chë soye entšábioye juanatsana jenomándama ndoñe chaondësobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama. <sup>19</sup> Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nyets ainánaca Bëngbe Utabnabiama šmochjacántaye y cha šmochtsatschuanaye. <sup>20</sup> Nyets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

**Ntšamo yomna canye  
 yebntšënga chamotsemnana**

<sup>21</sup> Nyetscanga šmochtsenëyeunana, tšëngaftanga Crístbioye puerte šmorrespetánayeca.

<sup>22</sup> Shémanga, šmochtsetátšëmbo tšëngaftangbe boyanga chë yebntšša mándayënga imomnana; y nyets tempo chca šmochtsama, Bëngbe Utabná chašmotsobedecénama. <sup>23</sup> Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebacá y mora cha chënga entsamënda, mo chë bestšaše nyets cuerpo jtsemandayancá; <sup>24</sup> y chca, ntšamo chë ošbuáchiyënga, Cristo chëngbe amëndayá yomnana imotatšëmbcá y chca jtsamana, cachcá, chë shemángnaca entsamna jtsemnana nyetsca soyënguiñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuánjeshana, ntšamo Cristo chábeñe ošbuáchiyënga yojanababuanjeshancá, y chca, chabe derecho vida jtsobomñama cachcá tojanonýa y chëngbiama tojanóbana. <sup>26</sup> Chca tojanma, chënga chabe entšanga y puerte tšábenga jábiamama; y chënga tmojanenabayora, tmojaninyanýe Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiama buayenana soyënga tmojanuena ora. <sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiama chamotsemnana, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inýe cachca sóyeca. <sup>28</sup> Ntšamo canye boyá cachabe cuerpo endbetsebobonshancá, cachcá cha bontsemna chabe shëmbioye jtsebobonshánana. Nda chabe

shémbioye tbojtsebobonshana, cachábioye jtsenobobonshánana, er chata cánýiñe jtsemnana mo nye canýe entśá cuenta. <sup>29</sup>Er ndocná cachabe cuerpo jtsáboyenjána, ndayá saná janguangoñana y jtsinýenana, ntśamo Cristo bēnga chē ośbuáchiyēngaftaca endbetsamcá; <sup>30</sup>er bēnga nyetscanga cánýiñe mondmēna mo chabe cuerpo cuaftsemncá, y bēnga mo chabe cuerpentśa soyēnga cuaftsemncá.

<sup>31</sup>Ntśamo Bēngbe Bētsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútana, y chē útata mo canýacá bochántsemna ca.” <sup>32</sup>Chē soyēnga josértama puerte totcá comna, pero atśe ścuayana, chē soye entsoyebuambná ntśamo Cristo chábeñe ośbuáchiyēngaftaca yomnama. <sup>33</sup>Pero morna, tśēngaftanga cada ona cachabe shémbioye chabotsebobonshana, ntśamo cachá iuenobobonshancá, y shema boyábioye ndoñe stētsoye chabondēquedá.

**6** <sup>1</sup>Básenga, Bēngbe Utabnáftaca cánýiñe mo canýacá bétsemnayeca, tśēngaftangbe bētsétsangbioye śmochtsayaunana, er chca jamana tśabá endmēna. <sup>2</sup>Moisesbe leyiñe canýe mando endmēna, y chentśe endmēna chē Bēngbe Bētsabe natsana mando, ndayentśe cha tojaśbuachená tśabe bendicionēnga jamama: “Acbe taitá y acbe mamá ndoñe stētsoye catjēftsaquédaye, <sup>3</sup>tśabe vida chacuetsobomñana y quem luarentśe baytē chacuetsiyenama.”

<sup>4</sup>Taitanga, ndoñe śmattsama tśēngaftangbe básenga chauetēnama; más tśabana, chēnga śmochtsabéchaye jtsabuátambayēse y jucácanēse, ntśamo Bēngbe Utabná endbetsabuatambaycá.

<sup>5</sup>Tśēngaftanga, chē nyets tempo nye ínýabiana oservēnēnga, tśēngaftangbe nduiñēnga śmochtsayaunana; chca śmochtsama puerte respétoca, bētscá cuedádoca y nyets ainaniñe tśabe juabnéngaca, mo cach Crístbioye cuaftseservencá. <sup>6</sup>Y chca chē nduiñēngbioye śmochtsaservena, ndoñe nye chēnga chacmojtśēñya ora, mo nda nye entśangbe delante tśabá joquédama cuaftseboścá, ndayá Cristbe oservenēngcá, chēnga nyets ainánaca jtsamana ntśamo Bēngbe Bētsá tojtseboścá. <sup>7</sup>Nyetsca trabajotémēnga śmochtsama nyets tśēngaftangbe añémoca, mo Bēngbe Utabnabiana cuaftsetrabajacá, y ndoñe nye entśangbiana. <sup>8</sup>Er tśēngaftanga ya śmondétatśēmbo, cada ona, nyets tempo nye ínýabiana trabajayá o nye cachabiana trabajayá tomna, ntśamo tśabe soyēnga tojamcá Bēngbe Utabnábiocana yochjójyēngacñe.

<sup>9</sup>Y tśēngaftanga, ndēmuanýēngbiana ínýēnga nyets tempo imoservena, cachcá tśabá chēngaftaca śmochjamna, tondayama ntsaúatjñayēse. Śmochtsenójuabnaye, Bēngbe Utabná chē celoca endmēná, tśēngaftanga y chēngbe mandayá yomnama, y chabiana nyetscanga cachcá monduámama.

**Ndayá Bēngbe Bētsá entśanga  
tojatśatá Satanasbiana  
jenéuyanama**

<sup>10</sup>Y morna, Bēngbe Utabnáftaca cánýiñe mo canýacá jtsemnēse, ainaniñe bēts añemo śmochtsebomna, chē Bēngbe Utabnabe bēts obenanētsana óbocana añemo.

<sup>11</sup>Mo canýe soldadcá, ba soyēnga jtchētjuana chē tmojtśentsjananga ora uayayēngbiana jenéuyanama, tśēngaftángnaca cachcá, nyetsca chē

Bëngbe Bëtsá cmojatsatá soyéngaca šmochtseprontana jenéuyanama, tšëngaftanga jáingñama Satanás ntšámnaca tojtsama ora, ndoñe chacmondáyëñjanama. <sup>12</sup> Er bënga ndoñe quemuatenojuerzana cach quem luarentša entsángaftaca jenëyénjanama, ndayá bacna espíritënga mando bomnéngaftaca; bacna espíritënga obenana bomnéngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabatma causa, mo ibetiñe cuaftsoyencá oyena entsángbioye amëndaye espiritëngaftaca; y chë tsbanánoca luarënguñe imonna y bacna soyënga chaotsebínñnama ama espiritëngaftácnaca. <sup>13</sup> Chíyeca, lempe ntšamo Bëngbe Bëtsá cmojatsatacá šmochjóyëngacñe y chë soyënga jtsamëse šmochtsiyena jtseprontánama, mo canye soldado jenéuyanama y jáyëñjanama bëtsá soyënga tojtchëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyëñjanama, y jenéuyanama lempe jtsamëse, chašmobená cha jayëñjanama.

<sup>14</sup> Mo canye soldadacá, jabuache jtsanayana y cochaca canye morocho soye jenácochjatsana jtsevalentiana y ndoñe chamondëyëñjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominñiñe tšabá yomna soyënga jtsamëse, mo chë morocho soye cochaca cuaftenacochjatscá, chca, Satanás tšëngaftangaftaca tondaye chaondobená jamama. <sup>15</sup> Mo canye soldadacá jtshëcochëtjuana betscó jobónjuama jtseprontánama, tšëngaftángnaca cachcá, Bëngbe

Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënama. <sup>16</sup> Canye soldado escudo jtsebomnana chë uayayabe uajuinñinñana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. <sup>17</sup> Mo chë soldadacá, canye morocho buchtsanëse tojtabuchëtsëse chabe bestšaše jenéuyanama, tšëngaftángnaca cachcá, sempre šmochjësejuabnaye Bëngbe Bëtsá cmojátsebacama, y chë juabna cmochanjújabuache, mo canye morocho buchtsanëse cuaftsabuchëtsancá. Mo canye soldadacá, chë uayayábioye jayëñjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayëñjanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana. <sup>18</sup> Nyets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiana nyetscangbiana cha šmochtseimpadana.

<sup>19</sup> Atšbiámnaca Bëngbe Bëtsá šmochtseimpadana, atšë

jóyebuambayama chajontsé ora, cha chë buayenana soye chašúyanama; y atše chayobená tondayama ntjatauajcá jóyebuambayana, y chca, entšanga chayinjanýé Jesucristbiana tšabe noticiénga, ndayá chénga tempo ndoñe monjántatšëmbo. <sup>20</sup> Bëngbe Bëtsá šojichmó mo canya chabe cuenta oyeuambnayacá, chë buayénanama entšángbeñe jóyebuambayama, y chca bétsamama, mora atše utamená séntsemna. Atšbiana Bëngbe Bëtsá šmochtseimpadana, atše chayobenama Cristbe buayénanama tondayama ntjatauajcá jóyebuambayana, ntšamo atše jamama šojtsemncá.

**Pablo chénga jtadiósoftanama**

<sup>21</sup> Tíquico, Jesucristbeyeca bëngbe bonshana catšata y canye entšá tšabe palabra bomná, Bëngbe Utabnabe trabajo jamama oservéniñe, ntšamo

atše stsemnama y ndayá stsamama tšëngaftanga chašmotsetatšëmbuama, lempe cmochanjácuntaye. <sup>22</sup> Chama cha tšëngaftangbioye sënjichmó, ntšamo muentše fstsemnama chacméyanama, y tšëngaftanga ainaniñe añemo chašmotsebomnama chaomama.

<sup>23</sup> Atše séntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátange ainaniñe tšabe ebionana chašmotsebomnama, y Bëngbe Bëtsábioye y ínýengbioye puerte chašmotsababuánýeshanama, Jesucristbeñe tšëngaftangbe ošbuachiyánaca; <sup>24</sup> y chaboma, chë Bëngbe Utabná Jesucristbioye bëts bonshanánaca imobobonshanéngbeñe tšabe bendicionénga chaotsemnama, canye ndocná yondobena jatrócama bonshanánaca.

# Filipenses

## Jacheuayama

**1** <sup>1</sup> Pablo y Timoteo, Jesucristbiamá oservénata, quem tsbuanácha fséntsabiamná Filipos béts pueblocá Bèngbe Bètsabe entšanga imomnènga, y Jesucristoftaca cánÿiñe mo canÿacá imomnèngbiamá. Fséntsabiamná nÿetsca chë Jesucristbeñe ošbuáchiyèngbiamá, nÿetsca chentša uanatsanèngaftaca y chë inÿe ošbuáchiyènga ujabuáhaniñe trabajayéngaftaca. <sup>2</sup> Atše séntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tšèngaftangbeñe tšabe bendicionènga chaotsemnama, y chaboma tšèngaftanga ainaniñe tšabe ebionana chašmotseboomnama.

## Pablo Bèngbe Bètsábioye tbojtanchuá ošbuáchiyèngbiamá

<sup>3</sup> Cada tšèngaftangbiamá stenojuabó ora, Bèngbe Bètsá tšèngaftangbiamá sèndbétsatschuanaye; <sup>4</sup> y Bèngbe Bètsá tšèngaftangbe tšabiamá stseimpadana ora, atše corente oyejuayá chca sèndbétsama, <sup>5</sup> ntšamo tšèngaftanga atše šmojuájabuachama, tšabe noticiènga Jesucristbiamá entšanga abuaiyinañiñe, tšèngaftanga Jesucristbeñe jtsošbuáchiyama šmonjanbojatšé orscana y méntsoñama. <sup>6</sup> Atše corente séntsetatšëmbo, Bèngbe

Bètsá tojanbojatšé tšèngaftangbe ainaniñe tšabe soyènga jtsamama, y más tšabe soyènga yochtsamama. Y chca yochtsama, lempe ntšamo tšèngaftangbiamá cha yojtsejuabnacá chaochnènguèntscuana, y chca, Cristo Jesús yochjésabèntscuana. <sup>7</sup> Atše tšèngaftangbiamá sempre ainaniñe sèndbétsenojuabnaye, chíyeca atšbiamá puerte tšabá entsemna chca tšèngaftangbiamá jtsejuabnayana. Tšèngaftanga nÿetscanga atše šmonjuájabuache jamama chë Bèngbe Bètsá tša tšabia bétsemnayeca šonjanèntšabuaché trabajo. Atše chë Bèngbe Bètsabe trabajo sèndbomna jamama, mora séntsetámèna ora o natjèmbana shjoca stsana ora, nÿetscángbioye tšabá inÿinÿnayañiñe chë tšabe noticiènga ndegombre soyènga bétsemnama, y bétscá amiñe entšanga chë soyènguiñe corente chamotsošbuáchemá. <sup>8</sup> Bèngbe Bètsá yotátšëmbo ntšamo séntsihamcá ndegombre bétsemnama. Atše tša séntseboše tšèngaftanga jányama y cbontsababuanÿeshana cachcá ntšamo Cristo Jesús atše šondbobonshancá. <sup>9</sup> Atše, Bèngbe Bètsá séntseimpadana tšèngaftanga cada te más cha chašmotsebobonshánama y chë inÿèngbioynaca, chca, osertánana chašmotseboomnama ndayá chë ndegombre soye bétsemnama jtsetatšëmbuama, y chašmotsetátšëmbo

ndayá tsábá o ndayá ndoñe tsábá tondmënama; <sup>10</sup> y chca, chašmotsobena sempre jabocacayama chë puerte tsábá yojtsemna jamama soye. Chca, Cristo yochjésabo ora, tsëngaftanga puerte tsabe vida šmochántsebmna, bacna soyéngaca ndëmandánënga; y tondaye quešmochátama, chora chë entšanga chca ndoñe tsábá quenátsmëna ca chamuátichamuama. <sup>11</sup> Y lempe ntšamo chašmojtsemná ndegombre tsábá echántsemna, y nÿe Jesucristo endobena jamama entšanga chca chamotsamama. Nÿetsca chë tsabe soyënga echántsemna, Bëngbe Bëtsá puerte bëtsá y uamaná bëtsemnama jinÿanÿiyama.

**Atšbe vida endmëna  
Cristo jtseeservëna**

<sup>12</sup> Jesucristbeyeca atšbe catšátanga, atše séntseboše tsëngaftanga chašmotsetátšëmbo, ntšamo atše tijapasama, más bëtscá entšanga Jesucristbiana tsabe noticiënguine chamotsošbuáchema tojoservema. <sup>13</sup> Chca, nÿetsca chë romanëngbe mandadbe bëtš yebna bojanÿá soldadënga y chë inÿe entšanga quem luarentše montsetátšëmbo atše utamená stsemna, atše Cristbiana tstrábája causa. <sup>14</sup> Atše utamená séntsemnayeca, ošbuáchiyënguentshana banga ainaniñe más añemo montsebmna, y chíyeca chënga Bëngbe Bëtsabe palabra más y más añémoca y tondayama ntjatauatjca entšángbioye montsabuayiná.

<sup>15</sup> Ndegombre entsemna, báseftanga Cristbiana entšángbioye imojtsabuayiná, pero chënga nÿe ntšamo tijashjachcá šmojtšántšabošama chca, y chënga imojtseboše, bëtscá jtsemëse, atše chayotjáyana; chíyeca chca imojtsama. Pero inÿengna,

entšángbioye montsabuayiná tsabe soyënga inÿengbiana jamama ndegombre imojtsebošeyeca.

<sup>16</sup> Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondétatšëmboyecca, Jesucristbiana tsabe noticiënga ndegombre bëtsemnama entšanga jtsinÿanÿayana; <sup>17</sup> pero chë inÿengna chca imojtsama, ndoñe tsabe soyënga inÿengbiana imojtsebošeyeca, ndoñe chënga chë inÿengbiana tsabe soyënga imojtsebošeyeca. Chënga Jesucristbiana imojtsoyebuambná nÿe entšanga chënga chamotsarrespetánama, y nÿe cachëngbiana tsabe soyënga jtsebmna imojtsebošeyeca. Chënga jtsejuabnayana mochjobenaye jamama atše más chašotsengmënama ca, muentše utamená chjëftsemnëntscuana, chënga entšángbioye chca tmojtسابuatambá ora. <sup>18</sup> Pero ¿ndayase chë soye atšbiana? Masque ntšámnaca, tsabe soyënga inÿengbiana tmojtseboše o ndoñe, Cristbiana montsoyebuambná, y Cristbiana chënga montsoyebuambnama atše oyejuayá séntsemna.

Y cabá más chanjóyejuaye, <sup>19</sup> er atše séntsetatšëmbo quem utámenentsana atše chjëseboचना. Atše séntsetatšëmbo muentšana chjëseboचना, tsëngaftanga Bëngbe Bëtsá šmoimpadánayeca y Jesucristbe Uámana Espiritu šujabuachánayeca. <sup>20</sup> Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero añe nÿetscangbe delante becá añémoca chayoyebuambá, y nÿets tempo pero más mora, lempe ntšamo stsamama y stsihámuaama, atše chaima entšanga chaminÿanÿema

Cristo puerte bĕtsá y uamaná bĕtsemnama, y chca chántsama masque ainá o obaná chaitsemnĕse.

<sup>21</sup> Chca entsemna, er atĕbe vida Cristo jtseservĕnama endmĕna, y nderado atĕse chajjĕbanĕse, nyĕtsanga puerte bĕts soye mochanjĕftsashjache. <sup>22</sup> Pero atĕse ainá stsemnĕse, chanjobenaye más uamana trabajo Cristbiana jĕftsemama. Chĭyeca, atĕse ndoĕne corente quetsátstatĕmbo ntĕsamo mora jobuáyanana, ainá jtsemnama o ndoĕne. <sup>23</sup> Ndegombre mora puerte ŝontĕtĕmnana ntĕsamo jobuáyanana: atĕse tĕa sĕndboĕse ndoĕne más quem luarentĕse ntjĕftsemnana, Crĭstoftaca jtsatsmĕnama, y ndegombre chca atĕsbiana puerte tĕabá nántsemna; <sup>24</sup> pero, ínĕoicana tĕĕngaftangbiana ŝontsemna ainá jĕftsemnana.

<sup>25</sup> Atĕse corente sĕntsetatĕmbo chca ndegombre yochtsemnama, y chĭyeca sĕntsetatĕmbo atĕse cabá ainá chjĕftsemnama, tĕĕngaftanga jujabuáchama más Jesucrĭstbeĕne chaĕmotsoĕbuáchema, y chiĕne bĕtscá oyejuayana chaĕmotsebobomna. <sup>26</sup> Chca, atĕse tĕĕngaftanga jutsĕtsayama choye chajá ora, chaĕmobená inĕye soyama más Cristo Jesús jĕtschuayama.

<sup>27</sup> Morna, chĕ más uamana soye entsemna, tĕĕngaftanga chaĕmotsama ntĕsamo jtsiyenama ntĕsamo chĕ Cristbiana tĕabe noticiĕnguĭne endayancá. Y mĕntĕsá, cachcá, jutsĕtsayama chajá o ndoĕne, atĕse chántsetatĕmbo tĕĕngaftanga Jesucrĭstbeĕne oĕbuáchiyama ndoĕne ŝmontsajbanama, y afĭne becá oĕbuáchiyana chábeĕne ŝmotsobomĕnama; nyĕtsanga cachcá ŝmojtsejuabnáyeca y nyĕtsanga cach soye ŝmojtseboĕseyeca, cánĕyĭne nyĕtsanga enutanánĕnga jtsenojuerzánĕse, ndocná chĕ tĕabe

noticiĕnguĭne tĕĕngaftanga ŝmobomna oĕbuáchiyana chacmondábuajuanama. <sup>28</sup> Tĕĕngaftangbe uayayĕngbiana tondayama ŝmattsauatja, sempre bĕtscá añemo ŝmochtsebobomna. Chca tĕĕngaftanga ŝmochanjĭnyĕnyĕye chĕnga pochocánĕnga mochtsebnama, y tĕĕngaftangna atsebácánĕnga ŝmochtsebnama. Y chĕ soye Bĕngbe Bĕtsá tĕĕngaftangbiana echántsama, Crĭstbeĕne ŝmoĕbuachĕyeca. <sup>29</sup> Chca echanjopása, er Bĕngbe Bĕtsá tĕĕngaftangaftaca puerte tĕabia endmĕna, Crĭstbiana oservĕnga Bĕngbe Bĕtsá tmojábiana, pero ndoĕne nyĕ chábeĕne chaĕmotsoĕbuáchema, ndayá chabiana chaĕmosufrĭmnaca. <sup>30</sup> Tĕĕngaftanga y atĕse cachca soyama montsenojuerzana. Tĕĕngaftanga ya ŝmonjinĕye ntĕsamo atĕse sĕnjánenojuerzana, entsanga jinĕnyĕnyĕyama chĕ tĕabe noticiĕnga ndegombre soyĕnga bĕtsemnama. Y mora, tĕĕngaftanga noticiĕnga ŝmochanjĕyĕngacĕne ntĕsamo atĕse cach soyama cachcá stsamama.

**Ndoĕne uámanĕnga  
ŝmattsenobiamnaye, ntĕsamo  
Cristo ndoĕne tonjanmcá**

**2** <sup>1</sup> Tĕĕngaftanga, Crĭstoftaca cánĕyĭne mo canĕyacá jtsemnĕse, ainaniĕne bĕtscá añemo ŝmontsebobomna. Cristo cmondábuanĕyeshana, y chĕ soye tĕĕngaftanga cmontĕjĕjabuachana nyĕtsca trabajĕnguentĕšana tĕabá jabocanama. Y tĕĕngaftanga Crĭstbe Espĭritoftaca cánĕyĭne mo canĕyacá ŝmontsemna; tĕĕngaftanga nyĕtsanga ŝmondĕnbobonshana y nyĕtsangbiana jĕngmiama ŝmonduamana. <sup>2</sup> Tĕĕngaftanga lempe chca ŝmobómnyayeca, atĕse corente oyejuayá ŝmochjábema, er tĕĕngaftanga nyĕtsanga cachcá cánĕyĭne ŝmondĕjuabná, cachcá nyĕtsanga ŝmondĕnbobonshana,

nÿetscanga mo canÿe ainancá  
 ſmondbomna, y nÿetscanga cachca soye  
 ſmondboſe. <sup>3</sup>Todaye ſmattsama nÿe  
 ínÿenga chë sóyeca chamotjáyana, o  
 nÿe tſëngaftanga tſa bëts soyënga amënga  
 ſmomna ca entſanga chamotſejuabnama;  
 pero ndoñe yapa uámanënga ſmojtsemna  
 ca ſmochtſejuabnaye, y cada ona  
 chaotſejuabná chë ínÿenga bëngbiana  
 más uámanënga imomnana. <sup>4</sup>Y ndocná  
 tondaye chaondétsama, nÿe chabiana  
 tſabe soyënga jónÿenama, sinó ndayánaca  
 chaotsama nÿetscangbiámnaca tſabe  
 soyënga jónÿenama.

<sup>5</sup>Tſëngaftanga cmontsamna  
 jtsemnana ntſamo cach Cristo Jesús  
 yojanjuabná y yojanamcá:

<sup>6</sup>Cha nÿets tempo yomna cach  
 Bëngbe Bëtsacá y uamaná cach  
 Bëngbe Bëtsacá,  
 pero masque chca, ndocna te  
 yonjanjuabná:  
 “Atſe séntseboſe nÿetsca  
 entſanga nÿets tempo atſe  
 chaſmotſerſpetana, ntſamo  
 atſbe Taitá Bëngbe Bëtsá  
 mondërſpetaná ca.”

<sup>7</sup>Pero cha mo nduamanacá  
 tonjanóbema, nÿetsca chabe  
 bomna soyënga jéftſeboshjonëse,  
 y ndegombre, mo canÿe  
 oſervenacá tojanóbema.  
 Cha canÿe entſacá tojanonÿná,  
 y entſanga canÿe ndegombre  
 entſacá tmojáninÿe.

<sup>8</sup>Cachá tojanleſenciá nduamaná  
 jtsemnana,  
 y ſempre Bëngbe Bëtsábioye  
 ibnayeunana, y jobanámnaca,  
 cruciñe jóbanëse.

<sup>9</sup>Ndayá cha tonjanmama, Bëngbe  
 Bëtsá, chë celoca más uámana  
 luare tbojaninÿinÿe  
 y chë más uámana uabaina,  
 chë más bëtsétsangbe

uabainënguentſa uabaina  
 tbojabuajo;

<sup>10</sup>y chca, celoca imomnënga, y quem  
 luarentſe y fshantſe jashenoye  
 imomnëngnaca nÿetscanga  
 chamóſhamentſema,

Jesúsbioye jëtschuayama, chabe  
 uámana uabaina jayanëse;

<sup>11</sup>y chca, nÿetscanga chamuayana  
 Jesucristo chëngbe Utabná  
 yomna ca,  
 chca, Bëngbe Bëtsá  
 chë Taitá nÿetscanga  
 chamotsatschuanama.

**Cristbeñe oſbuáchiyënga  
 entsamna mo buaſhinÿinÿana  
 estrellëngcá jtsemnana**

<sup>12</sup>Chcasna, atſbe bonshana  
 catſátanga, ntſamo atſe  
 tſëngaftangaftaca ſënjamna ora,  
 atſe ſempre ſmonjanëyeunancá,  
 mora más ſmochtsatëñëyeunana,  
 mora atſe tſëngaftangbiana  
 bënoca ſtemna ora. Bëtsétsanga  
 ntjatenobiamnacyá y Bëngbe Bëtsá  
 jtſerſpetánëse ſmochtsama  
 soyënga, chca, tſëngaftangbe  
 tſabe videntſe, Jesucristbeñe  
 oſbuáchiyënga quetsomñecá, tondaye  
 chacmondëtsabuáſhebenama;  
<sup>13</sup>er Bëngbe Bëtsá nÿets tempo  
 tſëngaftangbe ainaniñe inétsama  
 tſëngaftanga ndayánaca  
 chaſmotſeboſama y chaſmotsamama,  
 ntſamo cha yojuaná y yoboſcá  
 chaotsemnana.

<sup>14</sup>Ndayánaca jamama  
 chacmojtſéjaboto ora, chë soye  
 ſmochjama, chca jamama yapa totcá  
 comna ca ntjatichamcá y ínÿengaftaca  
 jabuachana ntjatenatsëtsnacyá. <sup>15</sup>Chca  
 cmontsamna, chca, tſëngaftanga  
 ſmojtsama soyënguiñe ndocná ndocna  
 bacna soye chaondínÿenama, y puente



tšabe vida chašmotsebomnama. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canÿe luarentse puerte bacna entšàngbeñe y sempre bëtscá bacna soyënga jtsamana uamanéngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canÿe ibetiñe luarentse buashinÿinÿana estrellëngcá. <sup>16</sup>Chë tšabe soyëngaca entšàngbiöye chauinÿanÿé ntšamo muanjobenaye tšabe vida jtsebomnama. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínÿanÿiye atše ndoñe nÿe bonamente jabuache tijatrabájá. Chca atše chántsemna mo nda bëtscá tojoprontá, y chentšana ínÿengaftaca tojótjajo ora, chéngbiöye tojtsayëñjanacá. <sup>17</sup>Mo chë altaroca canÿe bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábïöye oyejuayá jabemama. Tšëngaftanga bëtscá šmojalemošná, Crístbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábïöye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábïöye oyejuayá jabemama. Atše chca stjobanëse, puerte oyejuayá stsemna, y stjama tšëngaftángnaca cachcá chašmotsóyejuama. <sup>18</sup>Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnana.

### Timoteo y Epafrodito

<sup>19</sup>Atše becá ošbuachiyánaca Bëngbe Utabná Jesúsbeñe jtsobatmanëse, sëntsejuabná pronto chjobenaye Timoteo tšëngaftangbiöye jíchmuama, tšëngaftangbiama chašuabocuéntama, y chca, atše más añemo chaitsatsbomnama. <sup>20</sup>Er nÿe cha endmëna canÿa cach atscá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; <sup>21</sup>chë ínÿengna nÿetscanga nÿe cachëngbe tšabiama ndayánaca jamama jtsejuabnayana, y tondaye ntsebošana Jesucristbiamama. <sup>22</sup>Pero cach tšëngaftanga ya šmondétatšëmbo, ntšamo Timoteo chë padecena soyënguentšana tšabá tonjétsobocñama, y ntšamo Timoteo y atše, mo canÿe uaquiñá chabe taitábïöye cuaftsajabuachancá, cánÿiñe fsëñjantrabájá, más bëtscá entšanga chë tšabe noticiënga chamóyëngacñama. <sup>23</sup>Chcasna, atše sëntsobátmana cha jíchmuana, ntšamo átšëftaca jopásama chaitsetátšëmbo y cachora; <sup>24</sup>pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

<sup>25</sup>Atše sëntsejuabná yojtsemna, Jesucristbeyeca bëngbe catsata Epafrodítnaca choye jíchmuana, nda átšëftaca cánÿiñe endëtrabájá y chë tšabe noticiënga ndegombre soyënga bëtsemnama jinÿanÿiyama endenojuerzana, nda tšëngaftanga šmojanichmó atše chašuabëuájabuachama. <sup>26</sup>Cha chanjíchmu; cha puerte entseboše tšëngaftanga jányama, y yapa ngmënaca entsemna, cha šocá enjamnama šmojátatšëmbonama. <sup>27</sup>Y ndegombre cha šocá enjamna, y

enjétsinýna mo jtsobanamcá; pero Bèngbe Bètsá tbonjalastemá, y ndoñe nýe chábioye sinó átšbioynaca, atše ndoñe más ngmenanènga chayátsbomnama, ntšamo mora séntsebomnama. <sup>28</sup> Chíyeca atše más séntseboše cha pronto jíchmuana, as tsèngaftanga cha chašmojtínýe ora, puerte oyejuayènga chašmotsemnama, y atše ndoñe yapa chašondétsengmenama. <sup>29</sup> Šmochjofja nýets oyejuayánaca, Bèngbe Utabnábeyeca catšátanga quetsomñecá; y nýets tempo chacá améngbioye mo bètsétsangcá šmochtsétabna, <sup>30</sup> er batšatema más y matènjétsobana, Cristbiana trabajayíne uajabuachaniñe. Cha chë trabajo tonjanma atše juajabuáchama, ntšamo cach tsèngaftanga ndoñe chešmatanobenacá, atše juajabuáchama.

**Ndayá Pablébiana ndegombre corente yojanámana**

**3** <sup>1</sup> Y morna, atšbe catšátanga, ndayá Bèngbe Utabná tojamama móyejuanga. Ndoñe bacá quešnatámana, ntšamo chë inýe tsbuanáchañe tcbonjanèbuabiamcá cachcá cachiñe jtétyanama; y chë soye bètscá cmochanjújabuache ndoñe resjuiñe chašmondétsemnama. <sup>2</sup> Cuedado šmochtsebmna chë ndoñe tsabe entšangbiana, mo quešngcá imomnènga, chë puerte bacna soyènga mondbétsamènga, y entšangbe más delicadentše base bobachtema jatétsana uamanènga; <sup>3</sup> er bènga mondmèna y ndoñe ínýenga, chë ndegombre uinýnanánana bomnènga, bènga Bèngbe Bètsabe entšanguentšènga bétsemnama, bènga chë Uámana Espíritbe uajabuáchenanaca Bèngbe Bètsá mondadóránama, bènga chë Cristo

Jesúseftaca cánýiñe mo canýacá bétsemnama mondbétsoyeuama, y bènga chë ntšamo ínýenga monduamancá bèngbe cuerpiñe jamama tondayama yondoservénama mondbétsejuabnayama.

<sup>4</sup> Masque atše razón sèndétsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebmna chë soyènga yoservena ca jtsejuabnayama, ndegombre atše chabiana más razón chama stsóbomñe. <sup>5</sup> Sènjanonýná y posufta tianoye base bobachtema chë más delicadentše šmojantétsè; atšbe nýets uta bètsétsata Israeloca entšanguentšata bonjamna, y atšna Benjaminbe bèts pamillentšá sèndmèna; atšbe tempsca bèts taitanga nýetscanga hebreunga immamna. Atšna fariseo sènjamna. Atše sènjánama, lempe ntšamo judièngbe leyènguiniè endayancá, ndayá jamama šojanmèncá. <sup>6</sup> Atše tša sènjánboše Bèngbe Bètsá jtse servénama, chíyeca Jesúsbeñe ošbuáchiyènga bètscá sènjanécamena; y ndayá canýe entšá ibntsemna jtsamama, Bèngbe Bètsabe bominýiñe tsábia jtsemnama, judièngbe ley jtso cumplínèse, chama ndocná tondaye quenjátsbmna jayanama, atše ndoñe tsábá séntsanama ca.

<sup>7</sup> Pero lempe chca ntšamo atše sènjamnama y ndayá sènjánamama, puerte sènjanjuabná atšbiana puerte yojanámana ca; pero mora, Cristo atšbe ainaniñe tonjámarshèngoyeca, chë soyènga atšbiana ya ndoñe quenatámana. <sup>8</sup> Y cabá más, tondaye atšbiana quenatámana, chë bèts soye jtsonýayèse, Cristo Jesús, Bèngbe Utabná jtsabuatmana. Chábeyeca, lempe chë nýe quem luarentša soyènga sènjéseboshjona, y lempe

chê soyënga atšbïama tondayama quenátoservena; y chca entsemna, chë bëts soye jëftsashjáchama, Cristo jtsabuutmama, <sup>9</sup>y cháftaca cánýiñe mo canýacá jtsemnama. Atše ya ndoñe quetsatsnguá Bëngbe Bëtsabe bominýiñe tšabia jtsemnama, nýe ntšamo atše tijamama chë judiëngbe ley jtsocumplínese, pero Crístbeñe jtsošbuáchiyëse añe; Bëngbe Bëtsá entsama atše chabe bominýiñe tšabia chaitsemnama, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca. <sup>10</sup>Atše séntseboše ndayá cha jtsabuutmana, chë obanënguentsána tojtanayenama cha tojaninýanyé obenana atše chaitsebomnama, atše cháftaca cánýiñe mo canýacá chaitsemna ora; y ntšamo bënga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; <sup>11</sup>y ntšámnaca, atše jëftsashjáchama Bëngbe Bëtsá chaoma atše chaitayenama.

**Yejuana jtsentšénese, Bëngbe  
Bëtsábiocana uacanána  
josháchiñama**

<sup>12</sup>Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominýiñe stsemna ca, pero sempre natsanoye séntsá, mo nda canýe luaroye jashjanguama cuafstëchamancá; y puerte jtsošbuáchiyëse séntsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabïama chaitsemnama. <sup>13</sup>Atšbe catšátanga, atše ndoñe quetsátichamo chca ya tijashjache ca. Pero chama canýe soye séntsama: chë tempo atše sënjánbomna

y sënjánama soyënga, mora lempe stëtšoye sënjaquedá, y bëtscá séntsama jobenayama chë jashjanguama yojtsemnoye jashjanguama, <sup>14</sup>chë ndémoca yojtsemna jashjanguama luaroye jobenayama jashjanguama, mo nda canýe luaroye jashjanguama ndayánaca juácanama bëtscá jenojuérsase cuafstëchamancá. Cachcá, átšnaca séntsá chë Bëngbe Bëtsá šojtsachembuana uacanána josháchiñama, Cristo Jesúsbeyeca; y chë uacanána entsemna chë nýetsca tescama yomna tšabe vida jtsebomna.

<sup>15</sup>Chca bënga šontsamna jtsejuabnayana, chë Jesucrístbeñe puerte ošbuáchiyana y nýets tempo cha ústonënga; y nderado tšëngaftanga ndayíñnaca inýetsá šmojatsjuabná ora, Bëngbe Bëtsá chë sóynaca tšabá cmochanjínýanyie. <sup>16</sup>Pero morna šontsamna jtsiyenana ntšamo méntscoñama Bëngbe Bëtsabe soyëngama šojosertacá.

<sup>17</sup>Jesucrístbeyeca catšátanga, ntšamo atše sëndmëncá tšëngaftanga šmochtsemna, y chë ntšamo jtsiyenama tcbonjaninýanyecá imojtsiyenëngbiyoye šmochtsénýaye.

<sup>18</sup>Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbëtsemna. Banga mondmëna, y chënga ntšamo vida imojtsebomnama montsinýinýná, lempe ntšamo Cristo chë cruciñe jóbánese bëngbïama iuayancá contra chënga imojtsemnama, <sup>19</sup>y chëngbiyoye nýetsca tescama infiernoca mochántsapochocaye. Chëngbïama chë más uámana soye yojtsemna jtsamana ntšamo cachënga tmojtsebošcá, nýe cachëngbe cuerpiñe tšabá jtsoññama. Chënga nýa mo bëts soye cuafjamcá

jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jësejuabnayana chë nÿe quem luarama enójuabnayëngbe soyëngama. <sup>20</sup>Chë cuenta bëngna, ndegombre celocama entsanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. <sup>21</sup>Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerpcá, chë obanënguentšana tojtayenabe cuerpcá; y cha chca echanjama, cha puerte obenana lempe jtsemándayama bómnayeca.

**Bëngbe Utabnáftaca cánÿiñe  
mo canÿacá jtsemnëse  
oyejuayana jtsebomnana**

**4** <sup>1</sup>Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánÿiñe mo canÿacá šmochtsemna. Corente cbondábabuanÿeshana y tša séntseboše tšëngaftanga jányama. Tšëngaftangbeyeca atše puerte oyejuayá séntsemna, y atše corente sëndbétsoyejuaye tšëngaftangbiamá inÿëngbioye jáuyanama.

<sup>2</sup>Evodia séntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá.

<sup>3</sup>Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noticiënga entsanga abuayinayíñe. Clemente y inÿe entsanga átšeftaca tmonjatrabajá cach soye amiñe. Nÿetsca chëngbe uabaina entsábemana chë librësañe,

ndayentše yojtsábemana chë tšabe vida mochjónÿenëngbe entsangbe uabaina.

<sup>4</sup>Sempre oyejuayënga šmochtsemna, Bëngbe Utabnáftaca cánÿiñe mo canÿacá jtsemnëse, y cachiñe šcutétayana: iMóyejuanga!

<sup>5</sup>Nÿetscanga chamotsetátšëmbo, tšëngaftanga tšabe juabna bomnënga šmomnama. Bëngbe Utabná jësabama tempo ya entsobeco.

<sup>6</sup>Todayama šmattsenócochinÿena, pero cada Bëngbe Bëtšáftaca chašmojtsencuënta ora, ndayá cmojtsëjabortama cha šmochjaimpáda. Y chca chašmojtsama ora, chánaca šochtsatschuanaye. <sup>7</sup>Chca, Bëngbe Bëtšá echanjama chë chabe ainaniñe tšabe ebionana tšëngaftanga chašmotsebomnana; chë tšabe ebionana puerte bëtscá endmëna, y bënga entsanga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguiñe y ainaniñe todayama quešmochátenocochinÿena, er tšëngaftanga cánÿiñe mo canÿacá Cristo Jesúseftaca šmondmëna.

**Lempe ntšamo tšabá yomncá  
soyëngama jtsejuabnayana**

<sup>8</sup>Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nÿetsca soyënguiñe entsangbe bominiñe tšabá yomniñe, nÿetsca corente tšabá yomniñe, nÿetsca soyënga entsanga yogusetániñe, y lempe chë ndayama entsanga tmojtsejuabná tša iuámana ca soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

<sup>9</sup>Sempre šmochtsama chë átšbentsana šmojuábouinÿe soyënga, chë atšbiajana šmojóyëngacñe

soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

**Pablo tojtanacheuá  
tmojanájabuachama**

<sup>10</sup> Atše corente sëndoyeuá Bëngbe Utabnáftaca cányiñe mo canýacá tsmënama, er tšëngaftanga ba ishinýe chentšana, cachiñe šmojatobená atše jatinýinýiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojtsanebnétjomba ca, ndayá ntšamo tšëngaftanga tšabá šmojuabnacá atše jinýinýiyama ndoñe yonjanopodena ca. <sup>11</sup> Atše chca, ndoñe quetsátichamo uajabotá stsemna ca, er atše sënjuatsjinýe sempre oyejuayá jëftsemnana, nýe ndaye soyiñe masque batšatémnaca stsebomñese. <sup>12</sup> Atše sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomñese. Atše tijuatsjinýe oyejuayá jtsemnana masque nýe ndaye soyënguínñaca stsemna ora, jasama bëtscá stsebomna ora o masque nýe shéntseca jtsemnama šojtsemna ora, atše jtsiyenama bëtscá soyënga stsebomñese o masque ndóñnaca. <sup>13</sup> Atše lempe chca sëndobena, atše obenana jtsebomnama Cristo endbétsamayeca. <sup>14</sup> Masque chcasna, tšëngaftanga tšabá šmonjama, atše padecena soyënguine sënjamna ora atše juajabuáchana.

<sup>15</sup> Tšëngaftanga, chë Filipos puebloca Jesucristbeñe ošbuáchiyënga, corente šmondétatšëmbo, Macedonia

luarentšana sënjëftsanbocna ora, nýe tšëngaftanga atše šmonjanájabuachama; inýe ošbuáchiyënga ndoñe. Chora enjamna atšbe bojatsena tempo tšëngaftangbe luarentše chë tšabe noticiënga entšanga abuayinayinýe; y nýe tšëngaftanga atše šmonjanájabuache. <sup>16</sup> Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja. <sup>17</sup> Chca ndoñe quenátayana atše tsjuabná nýe tšëngaftangbentšana ndayánaca jójyëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiana más chaotsóyejuama. <sup>18</sup> Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominiñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtšecá, chora cha oyejuayá chca jójyëngacñana. <sup>19</sup> Atšbe Bëtsá, chabe bëtscá uamana y bëts bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmóyëngacñama. <sup>20</sup> Entšanga nyets tempo chamotsinýanýná Bëngbe Bëtsá y Bëngbe Taitá puerte uamaná bëtsemnama. Chca chaotsemna.

**Chënga jtadióšoftanama**

<sup>21</sup> Atšbe cuenta, nyetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catšátangnaca cmontsacheuaná.

<sup>22</sup>Nyetscanga chë muentše Bëngbe  
Bëtsábenga imomnënga, y más chë  
romanëngbe mandadbe bëts yebnoca  
oyenënga, cmontsacheuaná.

<sup>23</sup>Atše séntseimpadana Bëngbe  
Utabná Jesucristo, chaoma  
tšëngaftangbeñe tšabe bendicionënga  
chaotsemnama.

# Colosenses

## Jacheuayama

**1** <sup>1</sup> Atše Pablo, Jesucristbe ichmoná Bèngbe Bètsá chca yobóseyeca, y Jesucristbeyeca bèngbe catsáta Timotéoftaca, <sup>2</sup> quem tsbuanácha sèntsabiamná chë Colosas puebloca Bèngbe Bètsábenga imomnèngbiana. Tšèngaftanga bèngcá Jesucristbeñe ošbuáchiyènga šmondmèna, y chca, Jesucristbeyeca bèngbe catsátanga. Atše séntseimpadana Bèngbe Bètsá Bèngbe Taitá, chaoma tšabe bendicionènga tšèngaftangbeñe chaotsemnana, y chaoma tšèngaftangbe ainaniñe tšabe ebionana chašmotsebomnana.

## Pablo, Bèngbe Bètsábioye tbojanimpadá Colosas puebloca ošbuáchiyèngbiana

<sup>3</sup> Bèngbe Bètsá, Bèngbe Utabná Jesucristbe Taitá tšèngaftangbiana fstseimpadana ora, cha sempre fchandbètsatschuanaye, <sup>4</sup> er bènga fsènjátatšèmbona ntšamo tšèngaftanga Cristo Jesúsbeñe tša šmojtsošbuáchemana, y ntšamo tšèngaftanga nyetscanga chë Bèngbe Bètsábenga imomnènga šmababuányeshanama. <sup>5</sup> Natsanama, chë tšabe noticiènga, tšèngaftanga tcmojanabuatambá ora, tšèngaftanga botamana šmojanuena ntšamo chë buayenániñe bejtsayancá,

chë tšèngaftanga šmojtsobena tšabe soyama jobátmana, Bèngbe Bètsábeñe jtsošbuáchiyèse. Chë šmontsobatmana soye entsama tšèngaftanga Jesucristbeñe puerte chašmotsobuáchemana y nyetscanga chašmotsababuányeshanama. Bèngbe Bètsá celoca enduaquécjná chë tšèngaftanga šmojtsobatmana tšabe soye. <sup>6</sup> Chë tšèngaftanga tcmojanabuayená tšabe noticiènga más bètscá entsanga montsuenana; y chca, nyets quem luarentšè entsanga montsiyena más tšabe soyènga jtsamèse. Chca entsemna ntšamo tšèngaftangbentšè tojopasacá, chë natsana te chë tšèngaftanga Bèngbe Bètsabe tšabiánama šmojanuena orscana, y ntšamo Bèngbe Bètsá puerte bonshanánaca y tšabiánaca bèngbioye šuanyenama ndegombre cmojanosérta orscana. <sup>7</sup> Y chca Epafras tšèngaftanga tcmojanabuatambá, Bèngbe Bètsabe bonshánama y tšabiánama. Epafras endmèna canya bèngaftaca Cristbiana oservená, y cha bènga fsèndbobonshana; cha Cristbiana endétrabája bèngbe cuenta tšèngaftangbentšè. <sup>8</sup> Cha šonjúyuna ntšamo chë Uámana Espíritu yojtsama, nyetscanga Jesucristbeñe ošbuáchiyèngbioye chašmotsababuányeshanama.

<sup>9</sup> Lempe ntšamo tšèngaftangaftaca tojopasama, chë natsana te

tšëngaftangbiama fsënjanuena orscana y mëntscoñama, Bëngbe Bëtsá sempre tšëngaftangbiama fchandbétseimpadana, cháftaca fstscuénata ora. Bëngbe Bëtsá fsëndëimpadana, chabe Espiritu chaoma tšëngaftanga chašmotsobena jtsetatšëmbuana y jtsoertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama. <sup>10</sup>Y chca, tšëngaftanga šmochantsobena jtšiyenana jtšamëse ntšamo Bëngbe Utabná yobošcá, y sempre šmochántsama ntšamo chabiama tšabá yomncá. Ntšamo tšëngaftanga chašmojtšiyencá tšabe soyënga jtšamëse, chentsana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma. <sup>11</sup>Atše, Bëngbe Bëtsá séntseimpadana, chabe puerte bëtscá obenánaca cha chaoma tšëngaftangbe ainaniñe bëts añemo chašmotseboimnana; y chca, tšëngaftanga chë padecena soyënguiñe chašmojtsemna ora, puerte uantadënga chašmojtsemna, y ainaniñe añémoca Bëngbe Bëtsábeñe becá chašmotsobátmanama. <sup>12</sup>Y puerte oyejuayënga Bëngbe Taitá šmochántsatschuanaye, nda iuama bënga chamotsobena ntšamo cha chabe entšanga jatšatayama tojašebuachenacá jtseboimnana. Tšëngaftanga šmochanjóyëngacñe ntšamo cmojtšëtocancá celoca, chë corente buashinjinñana luarentše. <sup>13</sup>Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšëntšana, y tojama chë chabe bonshana Uaquiñabe améndayana bëngbe ainaniñe chamotseboimnana; <sup>14</sup>chábeyeca Bëngbe Bëtsá Satanásbe

cucuatšëntšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

**Cristo tojanóbanayeca,  
entšanga Bëngbe Bëtsáftaca  
tšabá jtsatsmënana**

<sup>15</sup>Cristo tmonjáninñe ora, bënga tmojánatšëmbona ntšamo Bëngbe Bëtsá yomnana; entšanga imojobena cha jinñama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna. <sup>16</sup>Chábeyeca Bëngbe Bëtsá tojama lempe ntšamo celoca y quem luarentše yobinñcá, lempe ntšamo chë entšanga imobena o ndoñe mondobena jinñama soyënga, y chë espíritëgnaca chë imobena ínñengbioye jtšaméndayana y obenana imobomna. Bëngbe Bëtsá, chábeyeca y chabiama tojama, lempe ntšamo quem luarentše yobinñcá. <sup>17</sup>Bëngbe Bëtsá cabá nyetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnana yojamncá. <sup>18</sup>Cha endmëna nda nyetscanga Bëngbe Utabnábeñe ošbuáchiyënga iuaménda, ntšamo chë bestšaše nyetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotseboimnana, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachinñe ainënga mochatsmëñënguentšana, cha chë natsaná chaotsemnana; nyë cha canña chë más uámana luare chaotseboimnana, nyëtšcañe chaotsemándayama. <sup>19</sup>Er Bëngbe Bëtsá yojanjuabná cachabiama tšabá yojamna, lempe ntšamo cha yomncá,



chabe Uaquiñábeñnaca chaotsemnama,  
 20 y Bèngbe Bètsá tojánbošena,  
 Crístbeyeca nyetsca soyènga quem  
 luarentše y celoca, cháftaca tempcá  
 tšabá chaotsatsmènama. Bèngbe Bètsá  
 chè soye tojanma, chabe Uaquiñá  
 cruciñe tojanóbana ora y chabe buiñe  
 tojanábuashana ora; y chca, Bèngbe  
 Bètsá tojanma nyetsca soyènga quem  
 luarentše y celoca, cháftaca tempcá  
 tšabá chaotsatsmènama.

21 Tempo, tšèngaftanga Bèngbe Bètsá  
 stètšoye šmojanquedá y chábioye  
 uayayènga šmojamna, bacna soyènga  
 šmojanjuabná y šmojánama causa;  
 22 pero mora chabe Uaquiñáftaca, cha  
 mo canye entsacá jóbaneše, Bèngbe  
 Bètsá tojama tšèngaftanga tempcá  
 tšabá cháftaca chašmotsatsmènama;  
 y chca tojama, tšèngaftanga chabe  
 delante nyets tempo chašmotsemnama;  
 chora tšèngaftanga, chabe entsanga,  
 ainaniñe ndocna bacna soye  
 ndbomnènga chašmotsemnama,  
 y ndocná chaodayana ntšamo  
 šmojamcá ndoñe tšabá yontsemna ca.  
 23 Pero tšèngaftanga cmontsamna chè  
 bètsá ošbuáchiyana šmondobnana  
 nyets tempo jtsebomnana, Bèngbe  
 Utabnábeñe jtsošbuáchiyama  
 ndocna te ntjabanacá. Nyets  
 tempo chè tšabe noticiènguñe  
 šmochtsošbuáchiye, y ndoñe  
 šmatjaleséncia ndocná tšèngaftangbe  
 ošbuáchiyana chaotrocama; y nye  
 chca puerte jtsošbuáchiyèše Bèngbe  
 Bètsábeñe šmochtsobátmana,  
 ntšamo tšèngaftanga šmojanmcá,  
 Jesucristbiama buayenánama  
 šmojanuena ora. Chè buayenánana  
 endmèna ntšamo ba entsanga  
 nyetsca quem luarentša entsángbioye  
 tmojabuayenacá, y atšbe trabajo  
 endmèna cach tšabe noticièngama  
 entsanga jtsabuayiynayana.

**Pablo, ošbuáchiyènga jasérviamá  
 trabajo tmojanbonjé**

24 Atše corente sènjeseoyejuá  
 mora tšèngaftangbiama jasúfriama  
 stsobenama. Ba entsanga entsamna  
 jasúfriana Cristo jasérviamá, y  
 atše sèntsesufrina ntšamo Cristo  
 tojansufricá, mora atše jtseufrinèše  
 chabe cuenta, ntšamo jasúfriama  
 yomncá. Y ntšamo sèntsesufrinacá  
 entsemna Crístbeñe ošbuáchiyèngbe  
 tšabiama, chè chabe cuerpcá  
 imomnènga, chènga Crístbeñe  
 bètsemnama. 25 Bèngbe Bètsá  
 atše šojábema chè Jesucristbeñe  
 ošbuáchiyèngbe canye ujabuachaná.  
 Cachá chè trabajuama šojanábuayana,  
 chca jamèše, tšèngaftangbe tšabiama  
 chaotsemnama. Chè trabajo endmèna,  
 lempe ntšamo cha tojayancá entsanga  
 jábuayenana. 26 Bèngbe Bètsá nyetsca  
 entsanga ndoñe tonjanaleséncia,  
 quem luare jobojátšama orscana  
 y nyets tempo chè buayenánama  
 chamotsetatšèmbuama; pero mora,  
 chábenga imomnènga chè soye  
 cha tojinñanyé. 27 Bèngbe Bètsá  
 yoboše, chabe entsanga imomnènga  
 chamotsábuatmama ndayá tempo  
 chènga ndoñe tonjaninñanyecá;  
 y yoboše chè ndoñe judiènga  
 jinñanyiyama tša bèts y tšabe soye  
 yomna chè ndegombre buayenánana,  
 ndayá tempo inñenga ndoñe  
 tonjaninñanyecá. Chè tempo ndoñe  
 yonjanótatšèmbu buayenánana  
 entsemna, Cristo tšèngaftangbe  
 ainaniñe yojtšiyena, y chábeñe  
 puerte jtsošbuáchiyèše šmojtsovena  
 jtsobátmanana, Bèngbe Bètsá  
 puerte bètsétsanga y uámanènga  
 chácmbiamama, batsá ntšamo cachá  
 yomncá. 28 Bènga nyetscángbioye  
 Jesucristbiama fchandbètsubuayiynaye;

fchandbétsetsétsnaye ndayá chënga ndoñe yontsamna jtsamana, y fsëndbétsubuatambaye nyëts osertánána ndayá chënga aíñe yojtsamna jtsamana, y chca, nyëtscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguñe, chënga Crísoftaca cányiñe mo canyáca jtsemnëse.

<sup>29</sup>Chca chaotsemnana, atše bëtscá sëndëtrabája; y chca séntsama, chë Cristo yojtsama atše chaitsebomnana bët obenánaca.

**2** <sup>1</sup>Atše séntseboše tšëngaftanga chašmotsetátšëmo, Bëngbe Bëtsá becá tsimpadánama, tšëngaftangbioye jubabuáchama, chë Laodicea puebloquënga Jesucristbeñe ošbuáchiyënga y nyëtscanga chë ndocna te atše šmonjinye ošbuachiyëngnaca.

<sup>2</sup>Atše chca sëndama, tšëngaftanga y chënga ainaniñe bëtš añemo chašmotsebomnana, y cányiñe mo canyáca chašmotsemanama, nyëtscanga jtsenbobonshánëse. Chca, nyëts osertánana tšëngaftanga chašmotsebomnana, y chë tempo Bëngbe Bëtsá entšanga ndoñe tonjaninñanyé buayenánama chašmotsetatšëmbuama, y chë buayenánana Cristbe soye entsemna.

<sup>3</sup>Mo canye bëtscá bomnana iytémëna soycá pero mora ya uññenana, cachcá Crístbeñe entsemna nyëts osertánana y obenana Bëngbe Bëtsá jtsabuatmama. Chë soye tempo Bëngbe Bëtsá entšanga ndoñe tonjaninñanyé, pero mora Cristo yojtsama bënga chë uámana soyënga chamotsebomnana. <sup>4</sup>Atše chca séntsihamo, botamana palabréngaca ndocná chacmondáingñëma. <sup>5</sup>Er masque choca tšëngaftangaftaca atše ndoñe quetsátsmëna, atšbe ainana aíñe

choca tšëngaftangaftaca entsemna; y atše puerte séntsoyejuá tšëngaftanga šmatenëyeunanama y nyëts tempo Bëngbe Bëtsábeñe šmojtsošbuáchëma.

**Crísoftaca cányiñe mo canyáca jtsemnëse, entšanga ndegombre tšabe vida jtsebomnana**

<sup>6</sup>Tšëngaftanga Jesucristbeñe ošbuáchiyënga šmojanóbiamana ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cányiñe mo canyáca tojtsemnacá. <sup>7</sup>Chca šmontsobena jamana, cháftaca cányiñe mo canyáca nyëts tempo jtsemnëse. Šmochtsiyëna jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiamana buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

<sup>8</sup>Cuedado šmochtsebomna, ndoñe šmatjaleséncia ndocná chaondétsamama tšëngaftanga jtsajbanama Crístbeñe ošbuáchiyana jtsebomnana. Chca entšanga montseboše juabnéngaca tšëngaftanga jáingñama, nyë básefta entšangbe juabnénga y tondayama ndoservena juabnénga. Chë juabnénga jtsóbocanana ntšamo bëtš taitanga básëngbioye mondbetsabuátambayentsana y chë espíritëngbentsana, ndëmuanyëngbiama entšanga jtsejuabnayana chënga nyëtsca soyënguñe imománda ca; pero Crístbentsana chë juabnénga ndoñe ntsóbocanana.

<sup>9</sup>Cristo endmëna cachcá ntšamo Bëngbe Bëtsá yomncá, masque mo canye entšacá quem luarentšë

yojéftsiyena; <sup>10</sup> y Bèngbe Bètsá tojama tšèngaftanga ndegombre tšabe vida chašmotsebomnana, Crístoftaca cánýiñe mo canýacá bétsemnayeca; y Cristo, nyetsca chë mándayënga y obenana bomnëngbiana más uamaná endmëna. <sup>11</sup> Tšèngaftanga Crístoftaca cánýiñe mo canýacá bétsemnayeca, mo uinýnananëngcá šmontsemna, tšèngaftanga Bèngbe Bètsabe entšanga šmomnana. Quem uinýnanánana ndoñe quenátsmëna mo chë más delicadentše base bobachtema tmojatëtšcá, cach entšángbeyeca ntšamo judiënga monduamancá, pero aíñe entsemna cach Cristo nda tcmojauinýnaná; y chë uinýnanánana entsemna, tšèngaftangbe ainanentšana Cristo bacna juabnënga jabuajuánayana. <sup>12</sup> Tšèngaftanga šmojánenabaye ora, enjamna mo ntšamo cach Cristo tmojanatbontsacá tšèngaftanga utebuantsánënga cuaftsemncá, er tšèngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bèngbe Bètsá tojamcá, cachcá, tšèngaftanga šmojánenabaye ora, enjamna mo tšèngaftanga chašmatayenama Bèngbe Bètsá cuafjamcá, er mora tšèngaftanga mo tsmëma entšangcá šmondoyena. Chca tojanopasá, Bèngbe Bètsá obená bétsemnana tšèngaftanga šmojtsošbuáchema, y chë obenana tojama Cristo cháuatayenama.

<sup>13</sup> Inye tempo tšèngaftanga Bèngbe Bètsabiana mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bèngbe Bètsabe entšangcá ndoñe šmonjámnyeca, pero aíñe šmojanamana bacna soyënga jtsamana nye ntšamo šmojanbošcá. Morna Bèngbe Bètsá tojama tšèngaftanga

tšabe vida chašmotsebomnana, Crístoftaca cánýiñe mo canýacá jtsemnëse, y Bèngbe Bètsá bèngbe nyetsca bacna soyënga šojtsaperdoná. <sup>14</sup> Mo nda ba ndebënënga tojtsabamna y chama tsuanachangá tojtsamna y chiñe tojtsayana chënga obligacionaca imojtsemna chë ndebënana pronto jtbocana ca, pero chë entšá chëchangá tojtsandbiana chë entšanga cha ndoñe más chamondëtsendebënana, Bèngbe Bètsá cachcá tojama, bacna soyëngama bënga šojtsaperdoná ora. Jesús bèngbe bacna soyëngama cruciñe tojanóbana ora, enjamna mo Bèngbe Bètsá bèngbe ndebënana tojtsanpochocá cuenta. <sup>15</sup> Jesucristo cruciñe tojanóbanayeca, Bèngbe Bètsá tojanayëñaná Satanás y chabe bacna espíritënga obenana bomnënga y ínýngbiöye amëndayënga; y nyetsca entšangbe delante tojaninýanýé cha chënga jtsamëndayama yobenama, mo canýe reycá chë ínýnga tojayëñaná ora, chabe entšangaftaca natsana jtsayana y chë ayëñanánëngna ústonoye.

**Anianiñe becá jtsebošana  
chë ošbuáchiyëngbiana  
celoca yomna soyënga**

<sup>16</sup> Ndoñe caso šmattsabiamnaye, ndoñe tšabá šmontsama ca ínýnga tšèngaftangbiana tmojtsichamo ora, ndayá tšèngaftanga šmëtsesaye o šmësofšëšnayama, o ndayá aíñe o ndoñe šmondébëtsamama Bèngbe Bètsá jadórana fiestënga ora o shbojueta fiesta ora, o jóchnama tese. <sup>17</sup> Baytë entsemna, Bèngbe Bètsá entšangbe cucuatšiniñe chë mandënga tojánboshjona, chë soyëngama bënga jabuátambama. Chë mandëngaca Bèngbe Bètsá yojaninýanýnaye ndayá más chcoye jopásama;

entsángbiroye yojaninyānāyaye ndayá Cristo yochjanmama. <sup>18</sup>Báseftanga mondmēna y chēnga mo nduamanēngcá entsángbeñe jtsebínānana, pero tsoye cachēnga corente uámanēnga jtse nobiamnayana y angelēnga jtsadórayana, mo Bēngbe Bētsá cuaftsemncá. Ndoñe caso šmattsabiamnaye, tsēngaftanga ndoñe tsábá šmontsama ca chēnga tmojtsichamo ora, ntšamo chēnga tmojtsichamcá tsēngaftanga ndoñe šmontsámayeca. Chēnga jtsichámuana bēts soyēnga mo otjenayoquécá tmojinje ca, y nje chēnga puerte jtsenábotamnayana, pero chca chamotsamama razón ndoñe quemátsbomna, er nje ntšamo inje entsānga imnetsejuabnāyá chēngnaca cachcá jtsejuabnayana. <sup>19</sup>Chēnga Jesucristoftaca cānyīñe ndoñe tmonjoquedanga, y Cristo endmēna chē nyetsca ošbuáchiyēngbe amēndayá, mo chē bestšaše nyets cuerpo jtsemandayancá. Canje cuerpiñe chē bestšaše jtsamana nyets cuerpo chaóbochema, ntšamo Bēngbe Bētsá tojtsebošcá, chē cuerpo ndayá jasama chaotsebomnana jtsamēse, y nyetsca chē cuerpentša soyēnga chamenefjanama jtsamēse. Cachcá, Cristo jtsamana nyetsca ošbuáchiyēnga cānyīñe mo canyácá cháftaca chamotsemnana, y cada te más tsábá cha chašmotsábuatmama.

<sup>20</sup>Cristo tojanóbana ora enjamna mo tsēngaftāngnaca cuafjobancá, y Bēngbe Bētsá tsēngaftanga cmojatsebacá chē quem luarentše imománda espíritēngbe cucuatšentšana. As, ¿tsēngaftanga ndáyeca šmojtsiyena jtsamēse mo chē nje quem luarama enjuabnayēngcá? ¿Ndáyeca tsēngaftanga cabá šmobedecena chca mandēnga, mo: <sup>21</sup>“Chē soye ndoñe matsbanana, chca

soye ndoñe catjase, o chē soye acbe cucuatšeca ndoñe catjaca ca”? <sup>22</sup>Lempe chē mandēnga, chē ndayá canya ndoñe bontsemna jamana, nje soyēngama jtsayanana, y tempo tojochnēngo ora, chē soyēnga jtsopochócana y chora tondaye ntsámanana. Chē mandēnga jtse mnana nje ntšamo entsānga mondbetsamcá y ínnyēngbiroye mondbetsabuatambaycá. <sup>23</sup>Ndegombre, ba entsānga jtsejuabnayana chē mandēnga tmojamēngbiama, puerte osertanánaca chca tmojama ca, pero ndegombre chca ndoñe quenátsmēna; er chēnga jtsichámuana, ntšamo Bēngbe Bētsá jadórana yomncá imojtsabuatambá ca, jtsabuátambayana entsá cabnmēna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chē mandēnga tondaye ntsámanana, er chē mandēnga entsāngbe ainantšana ndoñe ntjajuánana chē bacna soyēnga jtsamama juabnēnga.

**3** <sup>1</sup>Cristo cháuatayenama Bēngbe Bētsá tojanma ora, enjamna mo tsēngaftāngnaca Crístbeñe ošbuáchiyēnga, chašmatayenama cha cuafjamcá. Chíyeca, tsēngaftangbe ainaniñe puerte šmochtseboše ndayá Bēngbe Bētsá celoca tsēngaftangbiama yobomncá; y choca, Cristo uámana puestentše endētbemana, Bēngbe Bētsabe catšbioica. Y šmochtsinjināyaye chca šmojtsebošama, ntšamo jtsamēse mora šmojtsiyenama. <sup>2</sup>Tsēngaftanga nyets tempo chē celoca soyēngama šmochtsejuabnaye, ndoñe chē nje quem luarentše yomna soyēngama. <sup>3</sup>Tsēngaftanga Crístoftaca cānyīñe mo canyácá jtse mnēse, jtse mnana mo tsēngaftanga ya cuafjobancá, er mora ya ndoñe quešmátiyena tempcá jtsamēse. Cristo, Bēngbe Bētsáftaca

cányiñe mo canýacá endmëna, y Cristo endmëna nda mora tsëngaftangbe vida vojtsinyëna. <sup>4</sup>Ndegombre, Cristo endmëna nda endama tsëngaftanga tsábe vida chašmotsebonnana; y quem luarentse cha cachiñe chaojtonýná ora, tsëngaftángnaca chentse cháftaca šmochántsemna, y chora ntšamo Cristo corente uamaná y bëtsá yomnana Bëngbe Bëtsá yochjinýanýiyá, tsëngaftangbiámnaca echanjínýanýiye más bëtsétsanga y uámanënga šmojtsemnana.

#### Tempscá vida y morsca vida

<sup>5</sup>Tsëngaftanga, ntšamo chë nye quem luarama enójuabnayënga mondbetsebošcá bošana lempe šmochtsajbaná. Ndocná chaondétseboše ndaye bacna soye boyabása o shembásaftaca jtsamana, ni chca soyënguñe ndoñe chaondétsejuabná; ndoñe chaondétsiyena nye ínýengbiama bacna juabnënga jtsebonnëse, y ndoñe chaondétseboše nye bëtscá soyënga ínýengbiama más jtsebonnana, er chca jtsamana jtsayanana, chabiama más vojtsámána soyënga jtsebonnana, Bëngbe Bëtsá jatsbobonshánana.

<sup>6</sup>Er entsanga mondmëna y chënga chca soyënga jtsamana jtsebošana, y Bëngbe Bëtsá ndoñe ntseyeananana. Chca entsángaftaca Bëngbe Bëtsá puerte bochanjetna, y echanjamánda chë uabouana castigo chéngbeñe chaotsemnana. <sup>7</sup>Y tempo, tsëngaftanga šmojaniyena jtsamëse, sempre nye chca bacna juabnéngaca, <sup>8</sup>pero mora tsëngaftanga cmontsamna lempe quem soyënga stëtšoye jaquédana: ínýengaftaca jetnana, ínýengaftaca rábiaca jtsemnana, ínýabioye ntšamo jáborlama jtsebošana, ínýengbioye joyánguanguana, y ndoñe

tsábe palabrënga jtsóyebuambnayana.

<sup>9</sup>Ndoñe šmattsenbuambnaye, er ntšamo tempo šmojamncá mora tsëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá. <sup>10</sup>Y mora tsëngaftanga šmojashjache jtsemnana mo tsmëma entsangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entsangcá tcmojábiana; y cha nyëts tempo vojtsama, tsëngaftanga cada te más ntšamo cha yomncá chašmotsemnana, chca, corente tsábá cha chašmuábuatmanana. <sup>11</sup>Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentse base bobachtema tétšenënga ndoñe más uámanënga quemátsmëna chë ndoñe chca mondmënëngbiama; chë inýe luarëngocana áshjajnënga, bën tjoye oyenënga, chë nye ínýabiana nyëts tempo oservénënga y chë cachëngbiama trabájayënga, nyëtscanga cachcanga mondmëna. Chë nye ndayá uámana endmëna Crístbeñe jtsóšbuáchiyana y nyëtsca ošbuáchiyëngbe ainaniñe cha vojtssemna jtsemándayama.

<sup>12</sup>Tsëngaftanga Bëngbe Bëtsábenga šmondmëna. Cha cmondábabuanýeshana y tcmojabacacá chabe entsanga chašmotsemnana; chíyeca, tsëngaftanga cmontsamna ínýenga jtsinýanýayana nyëtscangbiama jóngmiama šmuamanama, tsábe juabna ínýengbiama sempre šmnétsebonnana, cada ona chë ínýenga chabiama más uámanënga cuaftsemncá imnétsejuabnayama, nyëtscanga puerte bonshanánaca šmnétsënýayama, y nyëtsca padecena soyënguñe

corente uantadënga šmomonama.  
<sup>13</sup>Njëtscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojatsätsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿenga šmochjáperdonaye. <sup>14</sup>Lempe chë soyëngama más enduámama njëtscanga jtsenbobonshánana. Njëtscanga šmojtsenbobonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá. <sup>15</sup>Cristo endama tšëngaftangbe ainaniñe tšabe ebionana chašmotsebmomna. Chë tšëngaftangbe ainaniñe tšabe ebionánaca šmochtsiyena njëtscanga natjémbana, Jesucristbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga njëtscanga cánÿiñe mo canÿe cuerpcá chašmotsemnana, y chca, natjémbana chašmotsiyenama. Bëngbe Bëtsá siempre šmochtsatschuanaye.  
<sup>16</sup>Chë Cristbe puerte tšabe buayenana soyënga tšëngaftangbe ainaniñe njëts tempo šmochtsambaye. Njëts osertanánaca šmochtsenbuatëmbaye y šmochtsenbuaiynaye. Njëts ainánaca šmochjacánta chë Salmos librësañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuyama. <sup>17</sup>Y lempe ntšamo chašmojtsama o chašmotsichamcá, Bëngbe Utabná Jesúsbëñe ošbuáchiyënga quetsomñecá chca šmochjama, siempre Bëngbe Bëtsá Bëngbe Taitábioye, chábeyeca jtsatschuanayëse.

### Ntšamo ínÿengaftaca jtsiyenama

<sup>18</sup>Shémanga, šmochtsetátšëmbo tšëngaftangbe boyanga chë yebnentša mándayënga imomnana, y njëts tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna.

<sup>19</sup>Boyanga, tšëngaftangbe shémanga sempre šmochtsababuánÿeshana, y podesca palabréngaca ndoñe šmattsëtsësnaye.

<sup>20</sup>Básenga, tšëngaftangbe bëtsëtsanga njëtscañe šmochtsayaunana; chca šmojtsamëse, Bëngbe Bëtsá oyejuayá echántsemna.

<sup>21</sup>Taitanga, ndoñe šmattsama tšëngaftangbe básenga chautënama, ainaniñe tondaye añémoca chënga ndoñe chamondëtsatsmënana.

<sup>22</sup>Tšëngaftanga chë njëts tempo nÿe ínÿabiamama oservénënga, tšëngaftangbe nduiñënga njëtscañe šmochtsayaunana, y ndoñe nÿe chënga tcmojtsénÿa ora, mo nda nÿe entšangbe delante tšabá joquédama tojtsebošacá, ndayá chënga šmochtsayaunana njëts ainaniñe ndegombre tšabe juabnéngaca, er tšëngaftanga Bëngbe Utabnabiamama corente respeto šmondmbomna.

<sup>23</sup>Lempe ntšamo chašmojtsamcá, njëts tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nÿe entšangbioycá. <sup>24</sup>Tšëngaftanga ya šmondëtatšëmbo, ntšamo cha chabe entšanga tojašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábënga tšëngaftanga šmomonana, y cha šmondëserveda. <sup>25</sup>Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë

entśá bacna soyënga tojamcá, er Bëngbe Bëtsabiana nÿetscanga cachcá monduámána.

**4** <sup>1</sup>Y tšëngaftanga, ndëmuanÿengbiana ínÿenga nÿets tempo imoservena, nÿetsca soyënguine tšabá šmochtsama, y nÿetscangbiana cachcá šmochtsemna, chë nÿets tempo nÿe tšëngaftangbiana oservenëngaftaca, er tšëngaftanga šmondëtatšëmbo celoca canÿa endmëna, ndabiana tšëngaftángnaca oservenënga šmondmëna.

#### Ošbuáchiyënga jábuayenama

<sup>2</sup>Nÿets tempo Bëngbe Bëtsáftaca šmochtsencuéntaye, ntšamo šmojtsichámuama botamana jtsejubnayëse y Bëngbe Bëtsá jtsatschuanayëse. <sup>3</sup>Bëngbe Bëtsáftaca cha šmojtsencuénta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiana entšanga jábuayenama, chë buayenana soye ndayama tempo entšanga ndoñe monjántatšëmbo. Atše chë buayenana soye entšanga abuátambaye causa, mora cárceloye sentsëtámëna.

<sup>4</sup>Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

<sup>5</sup>Šmochtsiyena nÿetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nÿets tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bëtsemnama. <sup>6</sup>Inÿengaftaca chašmojtsencuénta ora, šmochtsama ntšamo šmojtsoyebuambnacá chëngbiana tšabá chaotsemnama, y

soyënga šmochtsichamo nÿetscanga oyejuayana chamotsebomnama; y šmochtsetátšëmbo ntšamo cmojtsamna cada cánÿabioye jojuana.

#### Jtadióšoftanama

<sup>7</sup>Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiana bëngaftaca oservená, tšëngaftangbioye noticiënga echanjuamba ndayá átšeftaca tojopasama. <sup>8</sup>Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañëmuayama. <sup>9</sup>Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muine yojtsopasancá.

<sup>10</sup>Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautšetsayama tojase. <sup>11</sup>Jesús, chë Justo cánaca uabainá, chánaca cmontsacheuaná. Quem pueblentša nÿetsca judiënga ošbuáchiyënguentsana, nÿe chë unga átšeftaca mondëtrabája, Bëngbe Bëtsabe amëndayana entšángbioye chaóshjanguama, y chënga mondama atše ainaniñe bëtš añemo chaitsebomnama.

<sup>12</sup>Epáfrasnaca cmontsacheuaná, inÿe tšëngaftangbiocá y cha Cristo Jesusbiana jatrabájama endoservena. Cha nÿets tempo tšëngaftangbiana Bëngbe Bëtsábioye tša bochandbëtseimpadana, tšëngaftanga

Bëngbe Utabnábeñe ošbuáchiyana ndocna te chašmondájbanama, y nÿets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana vojtsamncá; y chca, tšëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. <sup>13</sup> Cach atše sënjinÿe y sëntsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëngnaca. <sup>14</sup> Lucas, bëngbe bonshana ashnayá, cmontsacheuaná; y Démasnaca.

<sup>15</sup> Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nÿetsca ošbuáchiyënga chë Bëngbe Bëtsá jëtschuayama chabe yebnentše

jénefnama imuamanëngnaca.

<sup>16</sup> Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócncaca mëcha chamualiamá; y tšëngaftángnaca šmochjualiá chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuáshjango ora.

<sup>17</sup> Arquipo šmochjauyana yejuana chaotsantješna chë Bëngbe Bëtsá tbojabonÿé trabajo sempre tsabá chaotsocumplínama.

<sup>18</sup> Atše Pablo, nÿe quem palabrënga tšëngaftanga jacheuayama cach atšbe cucuátšeca sëntsabiamná. Šmochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tsabe bendicionënga tšëngaftangbeñe chaotsemnama.



# 1 Tesalonicenses

## Jacheuayama

**1** <sup>1</sup> Atše Pablo, Silvano y Timotéoftaca, quem tsbuanácha sèntsabiamná tšëngaftangbiana, chë Tesalónica bëts puebloca Jesucristbeñe ošbuáchiyëngbiana, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmognënga. Atše séntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebonnama.

## Pablo Bëngbe Bëtsábioye tbojtanchuá chë Tesalónica pueblentša entsangbe ošbuáchiyama

<sup>2</sup> Bënga sempre Bëngbe Bëtsá fsëndëtschuaná tšëngaftangbiana, y bënga cháftaca ftsencuënta ora, tšëngaftangbiana fchandbëtseimpadana. <sup>3</sup> Bënga, Bëngbe Bëtsá chë Taitáftaca ftsencuënta ora, fsëndbëtseñojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. <sup>4</sup> Jesucristbeyeca

catšátanga, bënga fsëndétatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnama. <sup>5</sup> Bënga chë tšabe noticiënga Jesucristbiana tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácna, y bënga corente jtsejuabnayëse chë buayénana ndegombre soye bëtsemnama. Tšëngaftanga corente šmondétatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiana nguayíñe.

<sup>6</sup> Chora, ntšamo bënga fsëñjanamcá y ntšamo Bëngbe Utabná enjanियená, tšëngaftanga šmonjanontšë amana; y chë buayénana šmonjanóyëngacñe chë Uámana Espiritu tcmojanatšatá oyejuayánaca, masque ínÿenga tmojamna tšëngaftanga puerte chašmosufrima. <sup>7</sup> Mëntšá, tšëngaftanga uánatsanënga šmonjanobiana ntšamo ndegombre jtsiyenama, nÿetsca Macedonia y Acaya luarentša Jesucristbeñe ošbuáchiyëngbiana.

<sup>8</sup> Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatšëmbo —nÿets luarenache entságnaca montsetátšëmbo ntšamo tšëngaftanga Bëngbe Bëtsábeñe

šmojtsošbuáchema —y chca, bēnga tondaye más quešnátejaboto tšēngaftangbiama jatichámuama. <sup>9</sup>Cach entšanga montsoyebuambná chē bēnga tčbonjánabuache ora tša tšabá tšēngaftanga šcojanébuajama. Chēngnaca montsichamo ntšamo tšēngaftanga šmojtsajbaná chē šmojanjuabná diosēnga yojamna soyēnga adórayana y šmojanontsé chē tšabe benache jtishachama, y chē Bēngbe Bētsá ndegombrá y ainá jaserviama, <sup>10</sup>y chca, chabe Uaquiñá Jesús jobátmama; mua celocana echanjésabo; chabíama Bēngbe Bētsá tojanma obanēnguentshana cháuatayenama, y cha šochanjátsebacaye chē uabouana castigüentshana, Bēngbe Bētsá entšangbe bacna soyēngama chēngbiama yobomnentshana.

**Ntšamo Pablo yojantrabája  
Tsalónica puebloa**

**2** <sup>1</sup>Cach tšēngaftanga, Jesucristbeyeca catšátanga, šmondétatšēmbó bēnga tčbonjánabuache ora ndoñe nye bonamente quenjatsmēnana. <sup>2</sup>Tšēngaftanga šmondétatšēmbó, bēnga cabá tšēngaftangbioye nda ora, Filiposoca šonjanēyánguango y bacá šonjánaborlama; y masque tšēngaftangbioca bēngbe contra entšanga monjamna, Bēngbe Bētsá tonjanma bēnga fchayobená chē tšabe noticiēnga bētsá añēmoca jabuátambama. <sup>3</sup>Er bēnga entšángbioye bostero soyēnga ndoñe queftsjatanabayiyná, tšēngaftangbiama bacna soyēnga ndoñe queftsjatanboše, y entšanga jáingñama ndoñe queftsjatanoyebuambná. <sup>4</sup>Bēngna inyētšá; Bēngbe Bētsá yojanjuabná

bēnga chabe trabajo jamama obenēnga ftsjamna ca, y chca, šonjanébuáyana chabe tšabe noticiēnga entšanga jabuátambama, y chca bēnga fsēndoyebuambná; chíyeca bēnga ndoñe nye entšangbe bominyiñe tšabá chaotsinynama queftsátama, ndayá nye Bēngbe Bētsabiama, nda chē ndayá bēngbe ainaniñe yomnama yotátšēmbó. <sup>5</sup>Ntšamo tšēngaftanga corente šmondétatšēmbcá, bēnga ndocna te tšēngaftangbiama tšabe soyēnga tifjánayana, tšēngaftanga bēngaftaca oyejuayēnga chašmotsemnana; y ntšamo tšēngaftanga cbonjanétsēsnacá ndoñe quenjatsmēna nye tšēngaftangbentshana ba soyēnga bēngbiama josháchiñama. Bēngbe Bētsá chama yotátšēmbó. <sup>6</sup>Ndocna te bēnga queftsatsngúá entšanga más uamanēngcá bēnga chašotsabiamnama, ni tšēngaftangbentshana, ni inyēngbentshana.

<sup>7</sup>Masque bēnga, Cristbe ichmónēnga bētsemnana, matifjanobená tšēngaftanga nye sempre jtsaméndayana, bēnga ndoñe chca chibiátanma; bēnga corente jtsababuányeshanēse cbonjánanyēna, ntšamo canye mamá chabe básēnga jtsabéchayana y corente bonshanánaca jtsanyēnana. <sup>8</sup>Tša cbonjánababuanýeshanayeca, bēnga ndoñe nye chē Bēngbe Bētsabe tšabe noticiēnga checbēnjatanabuayená, tšēngaftanga chiñe chašmotsošbuáchema ntšamo bēnga fsēndošbuachecá, ndayá bēngbe vidēnga jáshbiamnaca fsēnjanprontana tšēngaftangbe tšabiama. ¡Tša cbondábabuanýeshana! <sup>9</sup>Jesucristbeyeca bēngbe catšátanga, tšēngaftanga šmenabouíñna ntšamo bēnga bētscá y jabuache fsēnjantrabajama, Bēngbe Bētsabe

tšabe noticiënga abuayiyнайиñe y bëngbe vida onguayiyñe, chca, tšëngaftanga ndoñe chacmondëtsamnama bëngbe uajabótama bënga jatatsatnayama.

<sup>10</sup>Cach tšëngaftanga šmondëtatšëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjaniyena ntšamo Bëngbe Bëtsá tšabá tbojtsinýancá, nyetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjamncá ndoñe tšabá yonjamna ca. <sup>11-12</sup>Tšëngaftanga šmondëtatšëmbo, bënga bëtscá jóyebuambayëse cada ona tšëngaftanguentšá cbonjanéjabuachanama y cbonjánanëmuama, ntšamo canýe taitá chabe básëngaftaca endbetsamncá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

<sup>13</sup>Bënga, Bëngbe Bëtsabe tšabe soyënga cbonjanabuayiyná ora, ntšamo tcbonjanëyancá tšëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nýe entšangbe oyebuambnayancá. Y ndegombre Bëngbe Bëtsabe buayenánana endmëna, y chë palábraca, tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná. <sup>14</sup>Jesucristbeyeca catšátanga, cach tšëngaftangbe luarentša entšanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá nefjuanënga tmonjanpasacá, y

chëngna Cristo Jesusbe entšanga mondëmëna. Chënga tmonjansufrí cach luarentša entšanga, chë judiënga, chëngbioye monjanëcamena ora. <sup>15</sup>Chë judiëngbe bëts taitanga, Bëngbe Bëtsabe juabna oyebuambnayëngbioye tmojtsanëbaye, y ntšamo chëngbe bëts taitanga tmojanmncá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tšábënga Bëngbe Bëtsabe bominyñe quemátsmëna, y nyetsca entšangbe contra montsemna. <sup>16</sup>Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entšanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

**Pablo tša yojánboše, Tesalónica  
puebloca entšanga jányama**

<sup>17</sup>Jesucristbeyeca catšátanga, bënga tšëngaftangbentšana baseftayté jëftsebocnama šonjanotocá ora, masque ndoñe choca tšëngaftangaftaca queftsátanmëna, sempre tšëngaftangbiama fsënjanenajuabná, y tša fsënjánboše tšëngaftangbioye jtësana jautsëtsayama. <sup>18</sup>Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama. <sup>19</sup>Atše séntsanboše tšëngaftanga jautsëtsayama, er

tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerte jtsošbuáchiyëse fchantsobátmana, corente oyejuayënga fchtsemnama y más bëtsétsanga fchtsemnama. <sup>20</sup> Aíñe, ndegombre, ntšamo tšëngaftanga šmoyenama, bënga bëtsá añémoca ntšamo tšëngaftangbeñe tifjamama fsëndbétsoyebuambnaye, y tša oyejuayënga fséntsemna.

**3** <sup>1</sup> Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nÿe bëndata Atenas bëts pueblentšë joquédana, <sup>2</sup> y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservéniñe, tšabe noticiënga Cristbiama entsanga abuyayñe. Fsëjanichmó chacmañémuayama y chaotsamama tšëngaftanga Jesucristbeñe más chašmotsošbuáchema; <sup>3</sup> y chca, ndocná Jesucristbeñe ošbuáchiyana chaondájbanama, masque tšëngaftanga Jesúsbeñe ošbuáchiyënga bétsemnama, ínÿenga imojtsama chašmotsesufrínama. Er cach tšëngaftanga šmondétatšëmbo bënga šojtsamna chca quem luarentšë jëftsepapadecánana. <sup>4</sup> Y cabá tšëngaftangftaca fsënjëftsemna ora, tcbonjanéyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondétatšëmbcá. <sup>5</sup> As y chë tšëngaftangbiana jtsetatšëmbuama más jatobátmanana ndoñe quetstétsobenayeca, sënjanjuabó šojétsemna Timoteo jíchmuana. Sënjanichmó atšë jtsetatšëmbuama aíñe bëtsá o ndoñe tšëngaftangbe

ošbuáchiyana Jesucristbeñe tayoamnama, er atšë yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo tondayama chaondëtsosevénama.

<sup>6</sup> Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fséntsemna, ntšamo tšëngaftanga bëtsá Jesucristbeñe šmojtsošbuáchema y nÿetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiana šmuatenjuabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá.

<sup>7</sup> Quem sóyeca, Jesucristbeyeca catšátanga, y mora chë bënga nÿetsca chë padecena soyënga ftsebobomna ora y ínÿenga bënga jasúfriana imojtsama ora, bëts añemo fséntsebobomna, ntšamo tšëngaftanga tša Jesucristbeñe šmojtsošbuáchema jtsetatšëmbëse.

<sup>8</sup> Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. <sup>9</sup> Mora fchantsobena Bëngbe Bëtsá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámnaca. <sup>10</sup> Cada te, bnété y ibeta, tša Bëngbe Bëtsá fsëndétseimpadana jobenayama tšëngaftanga jautsëtsayama chašualesenciama, Bëngbe Bëtsabe palabra tšabá chašmobedecema, chë buayenánana ntšamo yojtsashbencá jabuátambama.

<sup>11</sup> Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga

fchayobenama tsëngaftangbioye jama jautsëtsayama. <sup>12</sup> Y Bëngbe Utabná chaoma más bëtská chašmotsenbobonshánama, y cachá corente nyëtskángaftaca, ntšamo bënga cbondababuanyëshancá. <sup>13</sup> Chca, tsëngaftangbe ainaniñe bëtská añemo šmochántsebonna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaodayana, ntšamo tsëngaftanga šmojamcá ndoñe tsábá yontsemna ca, er tsëngaftanga šmondmëna Bëngbe Bëtsábenga, nyë cha jtseservénama.

**Ntšamo jtsiyenama, Bëngbe Bëtsá oyejuayá chaotsemnana**

**4** <sup>1</sup> Y mora inye palabra šmochjatspasencia. Jesucristbeyeca bëngbe catšátanga, tsëngaftanga bëngbentsana šmonjanatsjinye ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tsëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsësná más chca chašmotsamama.

<sup>2</sup> Tsëngaftanga šmondétatšëmbo ndayá tifjánayana ntšamo tsëngaftanga chašmotsiyenama, y chca fsëñjanma Bëngbe Utabná Jesús chca jamama šonjanamëndáyeca.

<sup>3</sup> Bëngbe Bëtsá endboše tsëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondétsamama, <sup>4</sup> y nyëtscanga chamotsobena ntšamo canye shema jonguanguana, chë ntšamo canya Bëngbe Bëtsábia yomná jamama ibomncá, y ntšamo entsangbe bominjiñe tsábá yomncá, <sup>5</sup> y ndoñe

chabondónguango nyë cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá. <sup>6</sup> Chë palabrine ndocná chabe catšátbioye chabondëingñe, chë catšatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtská chama tcbonjabuayená. <sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tsábá yomncá jtsamama, ntšamo chabe entsanga mondbetsamcá. <sup>8</sup> Mëntsá, nda quem buatëmbana soyënga tojtsábotena, cha ndoñe nyë entsanga jtsëbáténana, ndayá Bëngbe Bëtsábioye, nda tsëngaftangbe ainaniñe Uámana Espiritu cháumashënguama tojama.

<sup>9</sup> Atše ndoñe quešnátsmëna juabuábiamana ntšamo cmojtsamna inyënga Jesucristbeñe ošbuáchiyënga jtsababuányëshanama, er cach Bëngbe Bëtsá tcbonjabuatambá nyëtscanga chašmotsenbobonshánama. <sup>10</sup> Y ndegombre, tsëngaftanga chca šmondama nyëtsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

<sup>11</sup> Nyá sempre quem soyënguiñe šmochtsentsëna: natjëmbana jtsiyenana, inyëngbe soyënguiñe ndoñe ntsonremeténana, y ndoñe ntjatobatmanana nyë inyënga tsëngaftangbiama chamotsetrabájama, ntšamo tcbonjanëyancá tsëngaftangaftaca fsëñjamna ora; <sup>12</sup> chca šmochtsama, chë inyënga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

**Bëngbe Utabná quem  
luaroye yochjésabo ora**

<sup>13</sup> Bëngbe catsátanga, bënga fséntseboše tsëngaftanga ndegombre chašmotsetátšëmbo ntšamo chë obanéngaftaca yochjopásama, y chca, tsëngaftanga ndoñe ngmenánaca chašmondétsemnana, mo chë inyengcá, chë tcojóbanentsana ndoñe yontsemna jtayenama ca juabnayëngcá. <sup>14</sup> Bënga fsëndošbuaché Jesús tojanóbana y tojtayanenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiana yochjama chë nyetsca tescama yomna tšabe vida Jesucrístoftaca chamotsebmomnana, y quem luaroye cháftaca chamuatábama.

<sup>15</sup> Chë soyama bënga cbontsëtsësná ntšamo cach Bëngbe Utabná tojfétsanabatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiana. <sup>16</sup> Er entsanga mochanjouena canyë mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéfjua juajatétámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; <sup>17</sup> chentsána, chë ainënga chamojtsemnënga chëngaftaca cányine Bëngbe Bëtsá sochanjúyamba, Bëngbe Utabná yochtsemnoca jashjanguama, chë celoca jantšetëshënga endmënocá; as chentsána nyetsca tescama cháftaca bënga mochántsemna. <sup>18</sup> Quem palabréngaca nyetscanga ndoñe más ngmënanana ainaniñe chašmondétsebmomna.

**5** <sup>1</sup> Jesucrístbeyeca catsátanga, ndoñe quenátsiyta atše jubuábiamana mocna ora chë soyënga yochjopásama. <sup>2</sup> Cach tsëngaftanga corente šmondétatšëmbo, Bëngbe Utabná yochjésabo chama ndocná chaondétsejuabná ora, mo canyë atbëbanacá jashjanguana ibeta ndocná chama tonjatsjuabná ora. <sup>3</sup> Entšanga chamojayana: “Lempe tšabá endëtsomñe y tondayama quešnátamna játauatjana ca”, chora nyë ndeolpe chë entsangbiana tša jasúfriama echanjóshjango, mo canyë shembása šešona jtsebmomnana ora nyë ndeolpe jasúfriama jóntšancá; y ndegombre, entsanga chca jasúfriama quemochatotsbocá. <sup>4</sup> Pero tsëngaftanga catsátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tsëngaftanga ndoñe auatjanánënga quešmochátsmëna, mo ndábioye canyë atbëbaná tbojotbá ora, chábioye cuaftsauatjanacá. <sup>5</sup> Nyetsca tsëngaftanga šmondmëna entsangbe juabna binýnayabe básenga, y mo binýniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; <sup>6</sup> chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuafsemangcá oyenënga. Pero aíñe šontsamna mo chë fšnëngcá jtsiyenana, bëngbe cuerpo jtsemándayëse y nyets tempo jtseprontánëse. <sup>7</sup> Ibeta ora entsanga jtsemangana, y cach ibeta tojtsemna ora entsanga jotmenangana; <sup>8</sup> pero bënga, chë binýnentšëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtsošbuáchiyana y cha

jtsebobonshánana, chë uayaná Satanasbiama jenéuyanama y cha jayénjanama, mo canye soldadca, canye morocho soye cochaca jenáčochjatsana jtsevalentiana y ndoñe chamondëyénjanama. Y chë castigüentsana Bëngbe Bëtsá šochjátsebacamnaca puerta jtsošbuáchiyëse jtsobátmanana; y chca, bënga mochántsemna mo canye soldadca, cha canye casquëse juabuchëtsana jenéuyanama. <sup>9</sup>Er Bëngbe Bëtsá ndoñe šonjáchembo bënga chašotsamna chë nyetsca tescama castigo jtsebonnana. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama. <sup>10</sup>Cha bëngbiama tojanóbana, bënga cháftaca cányiñe jtseyenama chamotsobenama, masque ainënga o obanënga chamojtsemnëse, cha chaojésabo ora. <sup>11</sup>Chíyeca, nyetscanga šmochtsenañëmuaye y šmochtsenájabuachana más jtsošbuáchiyama, ntšamo tšëngaftanga mora ya šmotsamca.

**Pablo choca ošbuáchiyënga jábuayenama**

<sup>12</sup>Jesucristbeyeca catsátanga, cbontsaimpadana chašotsarrespetana chë Bëngbe Bëtsabiama tšëngaftangbeñe trabajayëngbiyoe, y chë Bëngbe Utabná tšëngaftanguentše tojábacacanga uánatsanënga chamotsemnana y ntšamo jtseyenama cmojtsamnana chácmbuayenama. <sup>13</sup>Cmotsamna chënga jtsarrespetánana y jtšababuányëshanana, ndaye trabajo chënga imojtsamama. Natjëmbana nyetscángaftaca šmochtsiyena.

<sup>14</sup>Quem soyënga chašmotsamámna cbontsaimpadana: jatrabájama ndoñe tmtontsebošëngbiyoe šmochjucacana,

añemo ndbomnéngbiyoe šmochjáñëmuaye, bëtsca ošbuáchiyana ndbomnéngbiyoe šmochjújabuache, y uantadënga nyetscángaftaca šmochtsemna.

<sup>15</sup>Cuedado šmochtsebonna, nderado nda bacna soye tbojaborlase, ndocná ndoñe cachcá chabondëtachnënguama. Masna, nye šmochtsentsena nyets tempo tšabe soyënga jtsamama cach tšëngaftanguentšëngaftaca y nyetsca entšangaftácnaca.

<sup>16</sup>Nyets tempo oyejuayënga chašmotsemna. <sup>17</sup>Sempre Bëngbe Bëtsáftaca šmochtsencuëntaye.

<sup>18</sup>Nyetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

<sup>19</sup>Ndoñe šmattsama ntšamo chë Uámana Espiritu tšëngaftangbeñe yojtsamcá chaotsopochocama. <sup>20</sup>Ndoñe šmattsábotena chë Bëngbe Bëtsabe juabna oyebuambnayëngbe buayenana soye. <sup>21</sup>Yeuana šmochjájabuoye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. <sup>22</sup>Nyetsca bacna soyënguentšana šmochtojuánañe.

<sup>23</sup>Cach Bëngbe Bëtsá, chë bëngbe ainaniñe tšabe ebionana chamotsebonnana endamá, nyetsca soyiñe tšábenga chacá chacmabiama, y nyets tšëngaftangbe espíritu, ainana y cuerpo chaotsinyena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaondayanama. <sup>24</sup>Nda tcmojúbuaja chábenga

chašmotsemnama, cha sempre  
jtsamana ntšamo tojayancá, y lempe  
cha echanjama.

**Inye rueguënga chëngbiana  
y jtadióšoftanama**

<sup>25</sup> Jesucristbeyeca catšátanga,  
Diosmanda, bëngbiámnaca Bëngbe  
Bëtsá šmochtseimpadana.

<sup>26</sup> Nyetscángbioye mo  
Jesucristbeyeca catšatangá  
šmochjácheuaye, jtenámochëse,

ntšamo cach tšëngaftangbe  
pamíllanga puerte bonshanánaca  
šmondbetsacheuanaycá.

<sup>27</sup> Cbontsaménda quem tsbuanácha  
nyetsca Jesucristbeñe ošbuáchiyënga  
chašmëbuáliama, y chca séntsama,  
Bëngbe Utabná chca jamama  
šojanmandáyeca.

<sup>28</sup> Atše séntseimpadana Bëngbe  
Utabná Jesucristo, chaoma tšabe  
bendicionënga tšëngaftangbeñe  
chaotsemnama.



## 2 Tesalonicenses

### Jacheuayama

**1** <sup>1</sup> Atše Pablo, Silvano y Timotéoftaca, quem tsbuanácha sèntsabiamná tšèngaftangbiana, chë Tesalónica bëts pueblocá Jesucristbeñe ošbuáchiyëngbiana, tšèngaftanga Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmognënga. <sup>2</sup> Atše sèntseimpadana Bëngbe Bëtsá, chaoma tšabe bendicionënga tšèngaftangbeñe chaotsemnana, y tšèngaftangbe ainaniñe tšabe ebionana chašmotseboznana.

**Cristo chaojésabo ora, ntšamo entšanga tmojamama Bëngbe Bëtsá echanjayana**

<sup>3</sup> Jesucristbeyeca bëngbe catšátanga, šontsamna nyets tempo Bëngbe Bëtsá tšèngaftangbiana jtsatschuanayana, ntšamo tšèngaftangbiana jamama šojtsëtocancá, er tšèngaftanga cada te más ošbuáchiyana šmontseboznana, y ntšamo tšèngaftanga nyetscanga šmojtsenbobonshana, tempscama más yojtsemna. <sup>4</sup> Tšèngaftangbe ošbuáchiyama y bonshánama, bënga nyets tempo oyejuayënga fchandbëtsemna, chë ínÿenache Bëngbe Bëtsábeñe ošbuachiyëngcá enefjuanëngbeñe tšèngaftangbiana jóyebuambayama. Bënga fchandbëtsoyebuambnaye ntšamo

tšèngaftanga inÿetšá ntjatsjuabnaycá Jesucristo šmëstonama, y ntšamo tšèngaftanga chábeñe tša šmošbuachémnaca, masque ínÿenga tša cmécamena y chašmosufrima bëtscá imojtsama, tšèngaftanga Jesucristbeñe ošbuáchiyënga bëtsemnana. <sup>5</sup> Tšèngaftanga chca Cristo šmëstonayeca, corente entsinÿinÿena Bëngbe Bëtsá nyetsca soyënguiñe tšabá amá yomnana, y entšanga ntšamo tmojamama tšabá o ndoñe tšabá bëtsemnana jayanama ora, cha chca echanjayana ntšamo entšanga tmojtsomerecencá. Y chca entsayana tšèngaftanga aiñe merecido šmotsobuájoñe chabe amëndayoye jamashënguama ca; y mora, tšèngaftanga choye jobenayama jashjanguama šmojtsamama, ínÿenga imojtsama chašmotsesufrínama.

<sup>6</sup> Bëngbe Bëtsá echanjama ntšamo jamama ibomncá; echanjama chë tšèngaftanga chašmosufrima imojtsamënga bëtscá chamosufrima; <sup>7</sup> y echanjama tšèngaftanga y bënga chë mondësufrinëngbiana, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inëtšënga echántsemna. <sup>8</sup> Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama,

y chë tšabe noticiënga Bëngbe Utabná Jesusbiamá ndoñe montsuenanéngbioynaca. <sup>9</sup>Chënga Bëngbe Bëtsá echanjácastigaye, nyëtsca tescama jtsapochócase; y Bëngbe Utabná bentšana bënoca mochantsemnënga, y ndocna te quemochatobenaye jinýama Bëngbe Utabná tša bëtsá y obená bëtsemnama. <sup>10</sup>Quem puerte uámana te, Bëngbe Utabná chaojésabo ora, nyëtsca chabe entšanga, nyëtsca chábeñe ošbuáchiyënga cha mochántatschuanaye y mochántasichamo: “iTša obená cha yomna ca!” Y tšëngaftanga chëngaftaca šmochántsemna, er tšëngaftanga šmontsanosbuaché bënga ndegombre fsënjántatšëmbo soyënguñe, chë bënga tcbonjanabuayená soyënguñe.

<sup>11</sup>Chýyeca, chca chaotsemnama, nyëts tempo Bëngbe Bëtsábioye tšëngaftangbiama fsëndëmpadana merecido bomnënga chácmabiamama, chë vida chašmotsebomnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nyëtsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtšamcá, Jesucristbeñe šmojtsošbuáchemá.

<sup>12</sup>Chca jtsamëse, tšëngaftanga šmochanjínýanyíye Bëngbe Utabná puerte bëtsá y uamaná bëtsemnama, y cha echanjama tšëngaftanga más uámanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiama tšabe juabna ibobomna.

### Chë Bëngbe Bëtsabe contra yomná

**2** <sup>1-2</sup>Mora atše séntseboše Bëngbe Utabná Jesucristo jésabama orscama jáuyanama, chë bënga

cháftaca tsbanánoca jteninýenama ora. Básefta entšanga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaïmpadana, Jesucristbeyeca catsátanga, bëtscá šmochtsentšena chënga ndoñe chamondobená jamana tšëngaftanga inýetšá juabna tšëngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojtšëtsëtsná ora: “Canýe Bëngbe Bëtsabe juabna oyebuambnayá šonjáuyana chë Bëngbe Bëtsabe uámana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”. <sup>3</sup>Bëtscá šmochtsentšena ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entšanga Bëngbe Bëtsabe amëndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infiernoca pochocaná jtsemnama. <sup>4</sup>Chca Bëngbe Bëtsabe contra echanjóyeubuamaya, chë ndëmuanyëngbiama y ndaye soyëngama entšanga imojuabná diosënga imomnama contra echanjóyeubuamaya. Chentšana cha echanjayana chëngbiama más obená yomna ca. Y Bëngbe Bëtsabe bëtš yebnóynaca cha echanjámashëngo, choca echanjót'bema y entšanga echantsëtsëtsnaye ndegombre cha Bëngbe Bëtsá yojtsemna ca.

<sup>5</sup>¿Chë soyama tšëngaftanga ndoñe šmondenabouínýna? Atše cabá tšëngaftangaftaca sënjamna ora, chama sënjanoyebuambná. <sup>6</sup>Y tšëngaftanga šmondétatšëmbo, nda mora yojtsama chë Bëngbe Bëtsabe contra yomná ndoñe chaondonýnama,

cabá chë tempo chca jopásama ndóshjango ora. <sup>7</sup>Mora ya mallajta entšanga puerte bacna soyënga tmojontsé amana, ndoñe ntšamo Bëngbe Bëtsá tojayancá chënga jamama yojsamna ca, y bënga chë soyënga josértama ndoñe quemuátobena, ndayá nÿe Bëngbe Bëtsá chca šojinÿanyese; pero ntšamo tbonjauyancá chë Bëngbe Bëtsabe contra yomnabiama ndoñe queochatëchnëngo, nÿa nda chë soyënga ndoñe chaondëtsemnana yojsamábioye Bëngbe Bëtsá chabojtsejuaná ora aifne. <sup>8</sup>Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinÿinÿanánaca y obenánaca echanjábocnama, chábioye bochantsepochoáca. <sup>9</sup>Chë Bëngbe Bëtsabe contra yomná, Satanasbe obenánaca echanjabo, y entšanga bëts obenana echanjínÿanÿiye, y chë bëts soyëngaca entšanga ingñëñënga mochántsemna. <sup>10</sup>Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entšángbioye nÿetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiama chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnana. <sup>11</sup>Chca causa, Bëngbe Bëtsá entseleséncia entšanga ingñëñënga chamotsemnana, y chë ndoñe ndegombre soyënguiñe chamotsošbuáchema. <sup>12</sup>Bëngbe Bëtsá chca echanjama, nÿetscanga chë ndegombre soyënguiñe Jesucristbiama

ndoñe tmontsošbuáchenga, chë bacna soyënga amama oyejuayënga tmojtsemnënga, chë nÿetsca tescama castigo chamotsebomnana jayanama.

**Bëngbe Bëtsá šojabacacá  
atsebácanënga jtsemnana**

<sup>13</sup>Pero bënga šontsamna nÿets tempo Bëngbe Bëtsá jtsatschuanayana tšëngaftangbiama, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnana tcmojánabacacama. Bëngbe Bëtsá tcmojatsebacá er chë Uámana Espiritu Bëngbe Bëtsabe entšanga tcmojábiana, y tšëngaftanga chë ndegombre soyënguiñe šmojtsošbuaché. <sup>14</sup>Chë tšabe noticiënga bënga cbondábuaiynayeca, Bëngbe Bëtsá tcmojúbuaja chábinga chašmotsemnana. Cha tcmojúbuaja Bëngbe Utabná Jesucristbe obenana y buashinÿinÿanánëñaca chašmotsebomnana.

<sup>15</sup>Chcasna, ndocna te šmattsajbaná ošbuáchiyana chë ndegombre soyënguiñe ntšamo tbonjabuatambacá, cach tšëngaftangbeñe jóyebuambayëse y tsuanácha jubuábiamëse, y ndocna te inÿetšá šmatjátsjuabnaye. <sup>16</sup>Bëngbe Bëtsá puerte tšabia endmëñayeca, cha šuababuánÿeshana y tojama bënga sempre añemo ainaniñe chamotsebomnana y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, <sup>17</sup>chata chaboma tšëngaftanga bëtscá añemo ainaniñe chašmotsebomnana, y tšëngaftanga nÿets tempo chašmotsobena ntšamo tšabá yomncá jtsichámuama y jtsamama.

**Bëngbiama Bëngbe Bëtsá  
šmochtseimpadana**

**3** <sup>1</sup>Y morna, Jesucristbeyeca bëngbe catsátanga, Diosmanda bëngbiama Bëngbe Bëtsá šmochtseimpadana, nyetsca luarenache más ba entsanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tsëngaftanga šmonjanmcá. <sup>2</sup>Bëngbe Bëtsánaca šmochtseimpadana cha chašotsëbuáuyayama, y chë puerte bacna entsanga ndoñe chamondobenama jamama bënga fchaisufrima, er nyetscanga ndoñe quemochatošbuáchiye chë fsëndbuayiyná palabriñe. <sup>3</sup>Pero Bëngbe Utabná sempre jtsamana ntšamo tojayancá, y cha echanjama tsëngaftanga más chábeñe chašmotsošbuáchema, y ndoñe nye cachcá quecmaténya chë bacna soyënga mandayá nye ntšamnaca ndoñe chacmondáborlama. <sup>4</sup>Y Bëngbe Utabná entsama bënga ndegombre ainaniñe fchaitsejuabnama, ntšamo bënga tcojanamëndacá mora šmojtsamama y cachcá sempre šmochtsamámnnaca. <sup>5</sup>Bënga, Bëngbe Bëtsá fséntseimpadana, Bëngbe Utabná benache chacmanýanyé bonshánana jtsebomnama ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnama, ntšamo Cristo tojansufrí ora yojanbomncá.

**Nyetscanga entsamna  
jtsetrabájayama**

<sup>6</sup>Jesucristbeyeca catsátanga, Bëngbe Utabná Jesucristbe mándoca cbontsaménda, ndëmua Jesucristbeñe

ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. <sup>7</sup>Cach tsëngaftanga tsábá šmondétatšëmbo ntšamo cmojtsamna jtsiyenana, ntšamo bënga fsënjoyencá: bënga tsëngaftangbeñe fsënjaniyena ora, nye ntjatrabajacá oyënjayënga ndoñe queftsjatsmëna, <sup>8</sup>ni ndocnabe saná chibiáise, tondaye ntabuencyá. Inyetsá enjamna; cada te bnëté y ibeta jabuache fsënjantrabája, chca, tsëngaftanga ndoñe chacmondétsamnna bëngbe uajabótama bënga jatatsatnayama. <sup>9</sup>Y ndegombre, bënga derecho fsënjánbomna tsëngaftanga jamëndama chašcújabuachama; pero masque chca, bënga jabuache fsënjantrabája tsëngaftanga chašmotsetatšëmbuama ntšamo yomna jtsiyenama, y chca chašmotsamama. <sup>10</sup>Bënga tsëngaftangaftaca fsënjamna ora, mëntsá tcbonjanamëndá: Nda ndoñe tontseboše jatrabájama, cha cach ndoñe chaondétsesá. <sup>11</sup>Chca fséntsichamo, er bënga fsënjátatšëmbona, báseftanga tsëngaftanguentsënga imojtsiyena tondaye ntsamcá, pero tša chë ínýengbe soyënguiñe jtsontremeténese. <sup>12</sup>Chca oyena entsángbioye fséntsabuayiyná y fséntsaménda Bëngbe Utabná Jesucristbe mándoca, natjémbana cachëngbe vida onguayíñe chamotsotrabájanama.

<sup>13</sup>Jesucristbeyeca catsátanga, ndoñe chacmondëumantšé tsábe soyënga amana. <sup>14</sup>Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama. <sup>15</sup>Mo canye uayayacá

ndoñe šmattsonýaye; šmochjabuayená  
mo canýe catšatcá, chca ndoñe  
chaondétsamama.

**Jtadióšoftanama**

<sup>16</sup>Běngbe Utabná fséntseimpadana,  
cha, chě entšanga tšabe ebionana  
ainaniñe chamotsebmna iuamá,  
chaoma tšěngaftanga nýets  
tempo y nýetsca tescama chca  
chašmotsebmnama. Běngbe Utabná  
tšěngaftangaftaca chaotsemna.

<sup>17</sup>Nýe quem palabrěnga  
tšěngaftanga jacheuayama cach atšbe  
cucuátšeca sěntsabiamná. Atše chca  
sěndbauapochóca atšbe tsbuanachangá  
juabemama; ntšamo muentše  
entsabemancá entsinýinýná quem  
tsbuanácha atšbíacha iuamnama.

<sup>18</sup>Atše, Běngbe Bětsá  
sěntseimpadana, Běngbe  
Utabná Jesucristo chaoma tšabe  
bendicioněnga tšěngaftangbeñe  
chaotsemnama.

# 1 Timoteo

## Jachuayama

**1** <sup>1</sup>Atše Pablo, Jesucristbe ichmoná sëndmëna. Bëngbe Bëtsá bëngbe atsebacyá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiama cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. <sup>2</sup>Timoteo, atše quem tsbuanácha cbontsabobiamná. Atše Bëngbe Bëtsabe soyëngama entsanga sënjanabuayiyná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše séntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tsabe bendicionënga chacotsebomnama, chata chacmolastemama y ainaniñe tsábiana ebionana chacotsebomnama.

**Pablo chë ndoñe ndegombre soyënga abuátambayëngbiama chënga tojanabuayená**

<sup>3</sup>Ntšamo chë Macedonia luaroye chocana sënjëftsanbocna ora tbonjanimpadacá, mora cachiñe cbochtësimpáda. Efeso puebloca cochjoquéda, básefta entsanga chácuamëndama chë ndoñe ndegombre soyënga ndoñe chamondëtsabuatambama, <sup>4</sup>ni nyets tempo ndoñe nye chamondetsejuabná

anteungbe cuentëngama, ni chë ba uabemana uabáinënga chë tempsca bëts taitangbiama. Er nye chca yapa jesejuabnayanentsana, jóbocnana nye ínÿengaftaca jabuachana enatsëtsnayiñe, y chca chëngbioye tondayama ntjujabuáchana ntšamo Bëngbe Bëtsá jamama yojuabnacá chaósertama. Chë soyna nye chábeñe jtsošbuáchiyëse jobenayana josértana.

<sup>5</sup>Chca mando entsemna nyetscanga chamotsenbobonshánama, y chë bonshánana endóbcana nda chabe ainanentše ndocna bacna soyënga tondbomnábentsana, ntšamo tojtsamcá tsábá yojtsemna ca ainaniñe tojtsejuabná y tojtsetatšëmbuábentsana, y Jesucristbeñe ndegombre ošbuachiyábentsana. <sup>6</sup>Báseftanga tmojtsajbaná chca jtsemnana y inÿe soyëngama tmojontšé juabnayana; chíyeca chënga mora imojtsentsëna nye ndayámnaca ndoserverna soyëngama enatsëtsnayana. <sup>7</sup>Chënga jtsebošana Bëngbe Bëtsabe ley abuátambayënga jtsemnama, pero chënga ndoñe yontsósertana ni ntšamo imojtsabuatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

<sup>8</sup>Pero bënga mondëtatšëmbo chë leyënga tsábá yomnama; tsábá endmëna, chë ndayama chë leyënga tmojuamcá entsá chë leyëngaca tojtsamëse. <sup>9</sup>Béngnaca mondëtatšëmbo,

chê leyënga ndoñe tmonjuama chë nyetsca soyënguine tšabá amëngbiana. Chë leyënga tmonjuama quemëntša entsanga jácastigama: ntšamo leyënguine ndoñe tontselesenciancá amënga y ntšamo Bëngbe Bëtsá yobošcá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsošbuáchiyana y Bëngbe Bëtsá jtsadoránana tondaye yondoservena ca juabnayënga, cachabe taitá o mamá obánayënga y ndëmuanyënga imomna entsanga obánayënga, <sup>10</sup> boyabásaftaca o shembásaftaca bacna soye amënga y boyabásenga cach boyabásengaftaca bacna soye amënga, entsanga enënga nye ínñabiama nyets tempo chamotseservénama, bosterënga y chë nye bonamente Bëngbe Bëtsabiama júrayënga; chca entsayana, chë leyënga yomna jácastigama nyetscanga ndëmuanyënga ndoñe tmontsama ntšamo chë ndegombre buatëmbana soyënguine iuayancá. <sup>11</sup> Ntšamo muentše chë leyëngama tijayancá, entsebuátëmbana chë Bëngbe Bëtsábiocana puerte tšabe noticiënguine, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entsanga jabuátambama.

**Pablo Bëngbe Bëtsábioye  
tbojtanchuá, tbojanlastemama**

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjéteprontanama, y chíyeca šojanábuayana atše chabiama chaitrabajama; y cha endmëna nda inétsama atše obenana chaitsebomnama chë trabajo jamama.

<sup>13</sup> Cha chca átšeftaca tonjanma, masque tempo atše chabe contra ba soyënga sënjánichamo, chabe ústonënga sënjanécamena, y chabiama tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama. <sup>14</sup> Y chca, Bëngbe Utabná ba tšabe bendicionënga atšbiama tonjanma, y chabeñe ošbuachiyá šonjánbema, y tonjanma atše cha chaitsebobonshánama y ínñengbioynaca. Cha chca bëngbiana tojama, bënga cánñiñe mo canñycá Cristo Jesúseftaca bétsemnayeca.

<sup>15</sup> Ntšamo chanjayancá ndoñe nye bostero soye quenátsmëna, y nyetscanga entsamna chca ndegombre bétsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna. <sup>16</sup> Chíyeca, Bëngbe Bëtsá šonjanlastemá, jinñanyiyama cha puerte uantado entsángaftaca yomnama. Y chë soye ínñengbioye tojaninñanyé, chë nyetsca tescama yomna tšabe vida jtsebomnama, chë chabeñe mochtsanošbuachéngbioye; chca tonjaninñinñyé cachá átšeftaca uantado jtsemnëse, atše nyetscangbiana chë más bëts bacna soye amá jtsemnëse. <sup>17</sup> ¡Entsanga nyets tempo chamotsinñanyá, chë Utabná nyets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entsanga ndoñe ntsobenana jinñamá y chë nye canñe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaquiñacá condmëna. Atše

tcbonjaimpadá, ntšamo tcbonjauyancá entšanga chacúyanama, ntšamo báseftanga Bèngbe Bètsabe juabna oyebuambnayènga acbiama tmojanayancá, y chiñe jtsejuabnayèse chë Jesucristbe soyèngama chacopeliá y nyets tempo chca chacotsama, Jesucristbeñe puerte jtsošbuáchiyèse, y lempe ntšamo tcojtsamama tšabá yojtsemnama ainaniñe jtsetatšembèse. Báseftanga, chënga ndoñe tšabá imonjétsama ca chë ainanoca juabnènga tmojánayana ora, chë soye ndoñe tmonjanuena y chë causa, Jesucristbe soyènguiñe ošbuáchiyana tmojtsanajbananga y tmojanontšé inye buatëmbana soyènguiñe jtsošbuáchiyana. <sup>20</sup>Chca tonjopasá Himeneo y Alejandroftaca, y atše sënjalesenciá Satanás chaoma chata chabosufrima; y chca, chata chabuatsjinýe Bèngbe Bètsabiama ndoñe bacá ntsoyebuambnayana.

**Pablo tojanabuayená ntšamo  
Bèngbe Bètsá jtsadoránama**

**2** <sup>1</sup>Nyetsca soyama más cbontsaimpadana ndayá chë Jesucristbeñe ošbuáchiyènga Bèngbe Bètsáftaca chamojtsencuénta ora, nyetsca soyèngama ntšamo tojtséjabotcá cha chamotseimpadana, nyetsca entšangbiama, y cha sempre chamotsatschuaná. <sup>2</sup>Entsemna, nyetscangbe tšabiama Bèngbe Bètsá jtseimpadánama, pero masna quem luarentša reyèngbiama y inye mándayèngbiama, chca, nyetscanga puerte natjémbana jtsiyenama chamuetsobenama, y nyetsca soyènguiñe tšabá jtsamèse, Bèngbe Bètsá jtsatschuanayama, y entšangbe juabniñe tšabá chamotsemnama. <sup>3</sup>Chca jtsamana tšabá endmèna, y Bèngbe Bètsá, bèngbe Atsebacayá, chama

jtsoyejuayana; <sup>4</sup>y chca jtsoyejuayana, er cha endboše nyetsca entšanga atsebácanènga chamotsemnama y chë ndegombre buayenánana chamotsábuatmama. <sup>5</sup>Chca nyetsca entšangbiama endmèna, er nye canýe Bèngbe Bètsá nyetscangbiama endmèna, y nye canýa endmèna nda yobena jamama entšanga tempcá tšabá Bèngbe Bètsáftaca chamotsemnama; cha endmèna Jesucristo, cach entšá. <sup>6</sup>Er Jesucristo, mo canýa ínýenga játsebacama cuaftopagacá, chabe derecho vida jtsobomñama cachcá tojanonýá y tojanóbana, chca, nyetsca entšanga chamotsobenama atsebácanènga jtsemnama. Chë soye cha tonjaninýanyé, nýa chama tempo yojtsemna ora, chë Bèngbe Bètsá nyetsca entšanga atsebácanènga chamotsemnama yobošama. <sup>7</sup>Bèngbe Bètsá chca nyetsca entšangbiama yobóseyeca, Jesucristo šojanábuayana chabe ichmoná jtsemnama, chabe soyènga entšanga jtsabuayiynayama; ndegombre soye sèntsoyebuambná, ndoñe quetsátsbostero. Šonjanmandá chë ndegombre buayenánana chë ndoñe judièngbioye jabuátambama, y chënga entsamna chiñe jtsošbuáchiyana.

<sup>8</sup>Ntšamo sënjayancá, atše sèntseboše nyetsca chë Jesucristbeñe ošbuachiyèngcá enefjuana luarènguenache, boyabásenga Bèngbe Bètsáftaca chamotsencuénta, y chora celoye, Bèngbe Bètsábioye cucuatše chamatsbaná; pero chamna, ainaniñe bacna soyènga ntsebmncá, ínýengaftaca ntjatentjayanaycá, y ínýengaftaca jabuachana ntjatenatsètsnacyá chënga chamotsemna.

<sup>9</sup>Y atše sèntseboše shembásenga entšayangá chamuatíchëtjo,



mo chë tšabe shembásenga mondbetsichëtjoncá, ndoñe nÿe entšanga chamotsëbuáuatjama y ntšamo tmojisichëtjonama chëngna uámanënga imomna ca entšanga chamotsejuabnama. Ndoñe quenátamna jtšenóbotamnayana, nÿa mo chca chquëcnënga jtsemnëse, ni castellano soyëngaca o uámana fiantse ndëtšbëngaca, o yapa uámana entšayangaca, chca, nÿe entšanga jinÿyama tšabá jtsemnama. <sup>10</sup> Pero aíñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

<sup>11</sup> Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayaunana. <sup>12</sup> Atše ndoñe quichatsleséncia, canÿe shembása boyabásenga chaotsabuatambá, ni chaotsaménda. Canÿe boyabása tojtsabuatambá o tojtsaménda ora, shembása ndocá chaondétsichamo. <sup>13</sup> Chca chaotsemna, er Bëngbe Bëtsá natsana Adán tbojanpormá, y chentšana Eva; <sup>14</sup> y er Satanás Adánbioye ndoñe tbonjaningñé, ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciácá. <sup>15</sup> Pero shembása atsbočaná echántsemna, básenga quem luaroye endbaúshejangoyeca, pero chamna, aíñe nÿets tempo Bëngbe Bëtsábeñe tojtsobuáchese, nÿetscanga tojtsababuánÿeshanëse, cachá nÿetsca soyënguñe jenomándama tojtsobenëse, y nÿets tempo tšabe soyënga tojtsamëse, ntšamo Bëngbe Bëtsabe entšanga mondbetsamcá.

**Ntšamo ibojtsemna  
chë ošbuachiyëngcá  
enefjuanëngbeñe mandayá**

**3** <sup>1</sup> Mëntšá ndegombre endmëna: nderado nda tojtseboše canÿe

trabajo jtsebomnama, cánÿentšë ošbuachiyëngcá enefjuanentšë chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo. <sup>2</sup> Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondétsichamuama. Y mëntšánaca cha bontsemna jtsemnama: nÿe canÿe shembásabe boyá; ntšamo jtsiyenama tšabá juabnayá chaotsemna, cachá nÿetsca soyënguñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentšë posada entšanga júyentšamiama, y chaotsobena botamana abuatambayá jtsemnama. <sup>3</sup> Ndoñe yapa tmoyá o penzentero chaondëtsemna; pero chaotsemna tšabá mandbomná, entšanga natjémbana chamotsiyenama bošá, y ndoñe chaondëtsejuabná nÿe crocéna jésebomnama. <sup>4</sup> Chaotsetátšëmbo ntšamo nÿetsca chabe yebnentša entšanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtšoye chamondëquedama; <sup>5</sup> er, nda cachabe yebnentša entšanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanÿenama? <sup>6</sup> Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nÿe cachá uámana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastíga. <sup>7</sup> Chánaca bontsemna

jtsiyenana jtsamëse, y chca chaojtsama ora, chë Jesucristbeñe ndoşbuáchiyënga tşabá chabiamama chamotsichamo. Chë entsá ndoñe chca tontsamëse, chënga chabiamama mochanjayana ndoñe tşabá yontsamama, y Satanás echanjama chachabócochëngo bacna soyënga jamama.

**Ntşamo ibojtsemna chë oşbuachiyëngcá enefjuanënga ujabuachaná**

<sup>8</sup> Cachcá, chë mándayëngbe ujabuáchanënga mëntşá entsamna: uámana entsangcá nyëtscanga chamotsétabna, uta palabra ndbomnënga; ndoñe yapa vínoye chamondétsetmó, y ndoñe chamondétseboşe nye paselo becá crocénana jtsebomnama. <sup>9</sup> Chënga entsamna ndegombre jtsoşbuáchiyana chë Bëngbe Bëtsá tojinÿanyë soyënguiñe, chë ndayiñe bënga mondoşbuaché, chëngbe ainaniñe inÿetsá juabnënga ntjatsbomncá. <sup>10</sup> Natsana, chëngbiama botamana şmochjshauarrepára jtsetatşëmbuama chënga añe o ndoñe montsobena mo chë oşbuachiyëngbeñe mándayëngbe ujabuachanëngcá joserviama. Chënga nyëtsca soyënguiñe tşabá tmojtsemnëse, şmochjálesenciaye chiñe chamoservema. <sup>11</sup> Cachcá, chë shémanga mëntşá entsamna: nyëtscangbiama mo uámana entsangcá utabnënga, ndoñe uayátšenayënga, cachënga nyëtsca soyënguiñe jenomándama obenënga, y nyëtscañe tşabe palabra bomnënga. <sup>12</sup> Canÿe ujabuachaná chaotsemna nye canÿe shembásabe boyá, y chaotsetátşëmbo ntşamo chabe básenga y nyëtsca chabe yebnentşa oyenënga jtsamëndayana. <sup>13</sup> Chë ujabuáchanënga tşabá chiñe tmoservënëse, canÿe uámana

puesto mochanjashjache, y chënga mochantsobena bëts añémoca jtsóyebuambnayama ntşamo Cristo Jesúsbeñe tmoşbuáchema.

**Ndayá Bëngbe Bëtsá bënga şojinÿanyëcá, canÿe bëts buatëmbana soye endmëna**

<sup>14</sup> Atşe sëntsobátmana pronto chjobenaye jama aca jauatsëtsayama; pero chca cbontsabobiamná, <sup>15</sup> nderado atşe betesco jama ndoñe sënjobenase, chacotsetatşëmbuama ntşamo canÿa ibojtsemna nyëtsca chë Bëngbe Bëtsábënga imomnëngaftaca. Chënga mondmëna chë Jesucristbeñe oşbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentşe, y tşa mondëntşena chama ínÿengbioye jáyënjanama. <sup>16</sup> Nÿa ndegombre endmëna, Bëngbe Bëtsá soyënga şojinÿanyë, y chë soyëngaca bënga montsobena jtsiyenana, chë Bëngbe Bëtsabe entsanga imomnëngcá; chë soyënga bëngbiama ndegombre bëts buatëmbana soye endmëna, y chë buatëmbana soye mëntşá endmëna:

Cristo quem luarentşe cach entsacá entsángbioye tojánëbëbuacna.

Chë Uámana Espiritu tonjinÿanyë cha nyëtsca soyënguiñe tşabá amá yomnama.

Angelënga cha tmojáninÿe, y chabiamama ba luarënguentşa entsángbioye tmojanabuayená.

Ba entsanga quem luarentşe chábeñe montsanoşbuaché, y Bëngbe Bëtsá celoye tbontanatsbaná, cha puerte bëtsá y obená yomnama jinÿanyiyëse.

**Báseftanga chë tšabe  
benachentšana mochtsojuánañe**

**4** <sup>1</sup>Uámána Espiritu, nyetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chë ndayiñe bënga Jesucristbiana mondošbuaché soyënguñe ca. Chëngna, espíritënga entšanga áingñayënga mochántsayauana, y chë ndoñe ndegombre soyënga chë bacna bayëjënga entšángbioye mochtسابuátambaye soyënguñnaca. <sup>2</sup>Chca buatëmbana soye jtsóbocanana chë bacna entšanga ntšamo ndegombre tmojuabnacá ndinÿinÿinayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nyë chca chëngbe ainaniñe jésejuabnayana. <sup>3</sup>Quem entšanga ndoñe ntjalesénciana ínÿyënga chamotsobouamama, y jtsemándayana básefta sananga entšanga ndoñe chamondétsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. <sup>4</sup>Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe queñátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase; <sup>5</sup>er chca saná Bëngbe Bëtsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

**Jesucristbiana trabájayiñe  
canÿe tšabe oservená**

<sup>6</sup>Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canÿe tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebmna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguñe endayancá sempre icuámayeca.

<sup>7</sup>Pero ndoñe nyë quem luarentša entšangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebmnama, mo nda bëts añemo jtsebomnama cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse; <sup>8</sup>cachabe cuérpoca ba soyënga jamana más añemo jtsebomnama, aíñe batšatema endoservena; pero jtsiyenana Bëngbe Bëtsábioye jadórama yomncá jtsamëse, puerte enduámama y juajabuáchana nyetsca soyënga tšabá chaotsemnama; chca jtsamana puerte tšabá endmëna cachabe vidama quem luarentše, y chë inÿe vidócnaca. <sup>9</sup>Ntšamo tijayancá ndegombre entsemna, y nyetscanga entsamna jtsejuabnayana chca ndegombre bëtsemnama. <sup>10</sup>Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiana. Cha endmëna chë nyetsca entšangbe atsebacayá, pero ndegombre masna,

chábeñe ošbuáchiyëngbe atsebacayá cha endmëna.

<sup>11</sup> Ntšamo quem soyëngama tcbonjauyancá entsãnga cochtsamëndaye y cochtsabuátambaye.

<sup>12</sup> Ndoñe catjaleséncia, aca bobontse comnama, ndánaca chacmotsáboyënjama. Pero aínë bêtsá cochtsama, chënga puerte chacmotserrespetánama, chca jtsamëse icoyenama jtsonyâyëse, cachcá chamotsamama: botamana jtsóyebuambnayëse, nyëts tempo tšabe soyënga jtsamëse, nyëtscanga jtsababuányëshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná.

<sup>13</sup> Atše choca chaijashjanguëntscuana, cochtsentsëna chë Bëngbe Bëtsabe uabemana palabrenga entsãngbeñe jtsaláyama, y chënga jtsabuátambayama y jtsabuayinyayama.

<sup>14</sup> Acbioye Bëngbe Bëtsá obenana tcmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyebuambayënga acbiama tmojanoyebuambá ora, y chë ošbuáchiyënguentša bêtsëjëmënga chëngbe cucuatšënga ácebeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinyëna.

<sup>15</sup> As, aca cmontsemna sempre jtsamana chë soyënga ntšamo tcbonjauyancá. Cochtsentsëna chë soyënga tšabá jtsamama, chca, entsãnga chamobená jinýama, aca cada te más tšabá lempe cojtsamama.

<sup>16</sup> Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínýenga cojtsabuátambama.

Cada te chca cochtsama, y chca, cach aca cochanjenájabuache atsbocaná jtsemnana y chë ácbioye ouenanëngnaca játsebacama.

**Ntšamo Timoteo ibojtsemna chë inýe ošbuáchiyëngaftaca jtsemnana**

**5** <sup>1</sup> Bëtsëjëmënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontsëngaftaca cochjama, mo chënga acbe catsátanga cuaftsemncá. <sup>2</sup> Chë bêtsanana shembásëngaftaca tšabá cochtsemna, chënga mo cach acbe mamá cuaftsemncá; y chë tobiasšëngaftaca cochjama, chënga mo acbe uabënganga cuaftsemncá; chëngaftaca cmontsemna puerte tšabia jtsemnana, chëngbiama ndocna bacna juabnënga ainaniñe ntsebomncá.

**Ošbuáchiyëngbenache viudanga tmojtsemna ora**

<sup>3</sup> Chë ndegombre viudanga, chë ndocná mondbomna chaújabuachama, chënga cochtsarrespetana y cochtséjabuachana. <sup>4</sup> Pero canýe viudá nderado básenga o nietënga tuabamna, chënga entsamna natsana jshauatsjínýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanyëñëse, y chëngbe bêtsëtsangaftaca tšabá chamotsama, ntšamo chënga chëngaftaca tmojanmncá, er chca jtsamama, Bëngbe Bëtsá jtsóyejuayana. <sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nyëts tempo jtseimpadánana, bnëté y ibeta, cha chabuájabuachama. <sup>6</sup> Pero

canÿe viudá, nÿe quem luarentsa entsángaftaca oyejuayá jtsemnama soyènga tojtsamése, cha masque ainá tojtsemna, Bèngbe Bètsabe bominÿiñe mo canÿe obanacá jtsemnana, er chábioye ndoñe ntseservénana. <sup>7</sup>Lempe chë soyènga chamotsamama ošbuáchiyènga cochtsaméndaye, chca, ndocná ndocna bacna soye chèngbiana jatichámuama chaondétsebomnama. <sup>8</sup>Er, nda cachabe entsanga y más, cachabe pamíllanga ndoñe tontsacuedana, cha chca jtsinÿinÿnayana chë buatèmbana soyènga, ndayiñe bènga mondošbuaché, ndegombre soyènga ndoñe yondmèna ca yojtsejuabnama, y cha chë ndoñe ošbuáchiyèngbiana más bacna entsá jtsemnana.

<sup>9</sup>Chë jujabuáchama viudanga imuábemana lístañe, chaotsábemana chë viudá chnénguana bnétsana uatama más yobomná, y nÿe canÿe boyá ibnabomná. <sup>10</sup>Entsanga cha chamotsábuatma mo canÿe tsabe soyènga amacá: chabe básenga botamana tojabèché, áshjajnènga chabe yebnentse posada júyentsámíama prontaná, Bèngbe Bètsabe entsanga imomnènga tojushecjabebé, chë imosufrínènga tojújabuache; jayanana, nda sempre nÿetsca tsabe soyènga jamama yontšená.

<sup>11</sup>Pero chë lístañe, chë viudanga chnénguana bnétsana uata cabá ndbomnènga ndoñe catjúbiana; er chë chéfta uata ndbomnènga, yapa nÿe cachènga tsabá jtsemnama juabnènga jtsebomnana y soyènga jtsamana. Chcase, chènga Jesucristbioye ya ndoñe ntseservénana, y chora jtsebošana cachiñe jtétóbouamayama; <sup>12</sup>y chca, ínÿenga chèngbiana mochanjayana ndoñe tsabá montsama

ca, chènga chë ntšamo tempo Bèngbe Bètsá tmojanšbuachenacá chènga ndoñe tmonjamama. <sup>13</sup>Y cabá más, tondaye ntsamcá tmojtsemna ora, chènga juabouinÿana oyènjayènga jtsemnama, y yebnènguenache jtsanama; y ndoñe nÿe oyènjayènga, sinó oinÿanéngnaca, ínÿengbe soyènguñe jtseyentšbètsjuanése, y ndoñe yontsemna jayanama soyènga jtsichámése. <sup>14</sup>Chíyeca, atše séntseboše, chë viudanga cabá tobiasèngna chamuatobouamá, básenga chamotsabamna, y chamotsobena cachèngbe yebnènguenache jtsemándayana; y tondaye chamondétsama, chca, béngbioye uayayènga chamuayana, chènga chca ndoñe tsabá montsama ca. <sup>15</sup>Atše chca séntichamo, er básefta viudanga cabá tobiasènga tmojtsajbaná Jesucristo obedecénana, y tmojontsé Satanás joyeunayana.

<sup>16</sup>Canÿe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chènga jujabuáchana, chca, chë ošbuachiyèngcá enefjuanènga ndoñe chaondétsamna chèngbiana játantješnana; chca, chë ošbuáchiyènga mochanjobenaye chë ndegombre viudanga, chë chaujúbuachama ndocná mondbomnèngbioye jujabuáchama.

**Ntšamo cuantsemna  
chë ošbuachiyèngbeñe  
amèndayéngaftaca**

<sup>17</sup>Chë bètsèjémènga, tsabá chë ošbuachiyèngcá enefjuanènga tmamèndangna, jtsomarecénana entsanga más chamotsarrespetánama, chca trabajo bétsamama, y más, chë sempre entsanga jtsabuayinayama y jtsabuátambayama imontšenéngbioye.

<sup>18</sup> Er Bëngbe Bëtsabe uabemana palabrënguiñe endayana, mëntšá: “Aca canye toróftaca shajuana tmojtsatbaná luariñe chacojstetrabája ora, ndoñe catjuanguëtsenaye ca”; ínÿoca: “Chë trabajayá mercedo jtsebuájonana juácanama ca”. Chíyeca, chë bëtsëjemëngcá amëndayënga jtsoмерecénana entšanga chamotsarrespetánama.

<sup>19</sup> Nderado nda tcmojáuyana canye bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

#### Inÿe soyëngama jábuayenama

<sup>20</sup> Chë bëtsëjemënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebomnana.

<sup>21</sup> Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entšá ínÿengbiamá más tšabá ntjatabacnacaycá. <sup>22</sup> Ndocnabe bestšašine cucuatšënga catjájajua, Bëngbe Bëtsábioye chabiamá jaimpádama, jinÿinÿiyama cha mo canye bëtsëjema amëndayacá joserviama yojtsobenama, nÿe betsko, juabuáyanama botamana ntjenouaboycá. Pero nÿe ntjenouaboycá chca tcojamëse, y cha canye bacna soye amá tomnëсна, ácnaca cochántsemna mo chabe bacna soyënga cuafjamcá. Cochtsantješna

ndocna bacna soyënga ainaniñe chacondëtsëbomnana.

<sup>23</sup> Aca ba soye uafsbica condbëtsešoca causa, ndoñe más nÿe ena búyeshe cattseftmana, sinó base vínoynaca.

<sup>24</sup> Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana ntjájaye ora; pero ínÿengbe bacna soyëngama, nÿe tcojájayentšana entšanga chama jtsetatšëmbuana.

<sup>25</sup> Cachcá, báseftanga entšangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmncá tšabe soyënga jamana, pero masque chca, ndayténaca chë tmojanma tšabe soyëngama ínÿengna mochanjátatšëmbona.

**6** <sup>1</sup> Chë nÿets tempo nÿe ínÿabiamá oservënënga entsamna, chëngbe nduiñëngbiamá jtsejuabnayana, chënga uámana entšanga imomnana y nÿets respeto jtsebomnana imomercénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entšanga mondbëtsabuátambaye, ínÿengna podesca ndoñe chamondëtsóyëbuambnana. <sup>2</sup> Y chë imobomna Jesucristbeñe ošbuáchiyënga nduiñënga, chëngbioye nÿe batsá ndoñe chamondëtsarrespetana, er chënga Jesucristbeyeca chëngbe catsátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

**Jtsiyenana Bëngbe Bëtsá jadórama  
soyënga jtsamëse, endmëna  
chë ndegombre bomnana**

Quem soyënga cmontsamna entšanga jtsabuátambayana, y becá

jtsétsétsnayana chca chacmóyaunama:  
<sup>3</sup>Nderado nda inye soyënga  
 tojtsabuatambá, y ntšamo bënga  
 mondëjuabnacá, chë Bëngbe Utabná  
 Jesucristbiana ndegombre buatëmbana  
 soyama, ni chë buatëmbánana  
 ntšamo jtsiyenama Bëngbe Bëtsábioye  
 jadórama yomna soyënga jtsamëse,  
 ndoñe cachcá bëngcá tontsejuabnase,  
<sup>4</sup>cha nÿe cachá puerte uámana entšá  
 yojtsenobiamná, y tondaye ndosertaná  
 yojtsemna. Cha tša jtsogustánana  
 ba soyëngama y palabrëngama  
 jabuachana jtsenatsétsnayana, y cha  
 nÿe chama vida jésebomnana. Cha  
 chca yomna causa, nÿe jtsebošana chë  
 inÿa tojashjache soyënga jtsebomnana,  
 nÿetscanga ndoñe cachcá  
 chamondétsejuabnama jtsamana,  
 ínÿengbioye joyánguanguama  
 jtsebošana, bacna soyënga ndoñe  
 ndegombre soyënga ínÿengbiana  
 jtsejuabnayana, <sup>5</sup>y ínÿengaftaca  
 nÿe sempre jtsenpenzétsiyana, er  
 chëngbe juabniñe nÿe bacna soyënga  
 jtsebomnana, chë ndegombre  
 soyënga quematábuatma, y  
 jtsejuabnayana chë soyënga Bëngbe  
 Bëtsá jadórama jtsamana, nÿe más  
 soyënga jóyëngacñama yoserverna  
 ca. <sup>6</sup>Ndegombre canÿe entšá bëtscá  
 tšabiana jéftsashjáchana, cha  
 tojtsiyena Bëngbe Bëtsábioye jadórama  
 soyënga jtsamëse, y sempre oyejuayá  
 nÿe chë tojtsebomna soyëngaca  
 tojtsemnëse. <sup>7</sup>Er bënga tmojanonÿná  
 ora, quem luaroye bëngaftaca tondaye  
 tmonjániyëbo, y quem luarentšana  
 cach tondaye quemochatobenaye  
 jéftsocñama. <sup>8</sup>As, bënga ndayá jasama  
 y ndayá jtichëtjuama tmojtsebomnëse,  
 chë soyëngaca oyejuayënga  
 mochtsemna. <sup>9</sup>Pero chë bomnënga  
 jtsemnana tmojtsebošënga, bacna  
 soyënga jamama tojócochëngo ora,

ndoñe ntsemorochana y pronto chiñe  
 jotsatšana, mo bayá uachmaniñe  
 cuafjotsatšcá, chë entšanga Satanasbe  
 cucuatšiñe ndeolpe jotsatšana;  
 chora chënga jtsamana soyënga mo  
 chë juabna ndbomnëngcá, y chë  
 cachëngbiana ndoñe tšabe soyënga  
 tmojtsamëngbe juabnëngaca. Y mo  
 chë uándbemana barco, bëtš búsyeshe  
 asentoye tojtsenatjëmbcá, cachcá,  
 chë bacna juabnënga bomnana,  
 chëngbioye mochántsapochocaye y  
 nÿetsca tescama mochántsacastigaye.  
<sup>10</sup>Crocénana jtsebomnana yapa  
 jtsebošana, jamana entšabe  
 ainantšana nÿetsca bacna juabnënga  
 y soyënga chaóboconama; y básefta  
 entšanga, crocénana jtsebomnana  
 yapa jtsebošana causa, tmojtsajbaná  
 ošbuáchiyana chë Bëngbe Bëtsabe  
 soyënguiñe, chë bënga mondošbuaché  
 soyënguiñe, y chca cachëngbiana  
 tmojama puerte chamosufrima y bëtš  
 ngmënana jtsebomnana.

**Chë tšabe soyama  
 jtsenojuerzánama, ošbuáchiyana  
 siempre chaotsemnana**

<sup>11</sup>Pero aca, Bëngbe Bëtsabiana  
 oserverná, chca benachentshana  
 cochtsojuánañe. Nÿa cochtsentsëna,  
 chë Bëngbe Bëtsabe bominÿiñe tšabá  
 yomncá jtsamama, chë ndayá Bëngbe  
 Bëtsá jadórama yomncá jtsamama,  
 Jesucristbeñe puerte jtsošbuáchiyama,  
 nÿetscanga jtsababuánÿeshanama,  
 Bëngbe Bëtsábeñe jtsobátmanëse  
 puerte uantado padecena  
 soyënguiñe jtsemnana, y corente  
 jtsababuánÿeshanëse nÿetscanga  
 chacotsënÿayama. <sup>12</sup>Chë tšabe  
 soyama, ošbuáchiyana joboguiyanama  
 cochtsenojuerzana. Chë nÿetsca  
 tescama yomna tšabe vida  
 cochjashjache; chama Bëngbe

Bëtsá tcmojanchembo y bëtscá entsangbe delante tconjánayana tšabe soyënga Jesucristbiana, ndayíne aca icošbuaché. <sup>13</sup>Y mora, Bëngbe Bëtsabe delante, nda endbama lempe ntšamo quem luarentše yobinýncá vida chaotsebomnama, y Jesucristbe delante, ntšamo cachabiana ndegombre bemncá Poncio Pilatbe delante lempe tojanayaná, chatbe delante cbontsemánda, <sup>14</sup>lempe cochjama ntšamo tcbonjauyancá, ndocna soye chacmondëntsashbe jamama, y cochtsiyena, ntšamo ndocná tondaye chaondëtsebomna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana. <sup>15</sup>Y nýa chë soyama chë tempo chaojóshjango ora, Bëngbe Bëtsá chca echanjínýanýiye, er cha endmëna chë corente bendición bomná y chë nýe canýe Mandado. Cha nýetsca reyëngbiana, chë más uámana Rey, y nýetsca amëndayëngbiana, chë más uámana Utabná. <sup>16</sup>Nýe cha ndoñe bondmëna ndocna te ntjóbanana, y cha canýe bëts buashinýinýana luarentše endoyena y choye ndocná yondobena jobéconana. Cha ndocná tbonjinýe y ndocná yondobena jinýana. ¡Entšanga nýets tempo chamotsinýanýná cha puerte bëtsá y obená bëtsemnama! Chca chaotsemna.

<sup>17</sup>Chë quem luarentša soyëngaca bomnënga imomnënga, cochjámëndaye enábotamnyënga ndoñe chamondëtsemnama, ni lempe tšabá yochjóbcnana, bëtscá soyënga bëtsebomnama ndoñe chamondëtsobátmana, er chë tcobomna soyëngama ndoñe ntsótatšëmbuana ndayëntsoñama

chca mochtsebomnama; pero aínë, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtscá soyënga šnëtsatšatnayá; y chca, cha jamana bënga chamotsobena nýetsca chë soyëngaca oyejuayënga jtsemnama. <sup>18</sup>Ntšamo tšabá yomncá chënga chamotsama, ba tšabe soyënga chamotsama, y siempre tšabe ainánaca chamotseprontana entsanga ba soyënga jatsatayama, y ndaye tmobomna soye entsángaftaca jenáatayama. <sup>19</sup>Mo nda bëtscá shajuana tojtsábuajo y jtsetatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtscá tšabe bendicionënga más chcoye mochtsebomnama. Y chënga chë soyënga tmojtsamëse, chënga chë ndegombre vida, chë nýetsca tescama yomna tšabe vida mochanjéftsashjache.

#### Inýe soye Timotéobioye tbojanbonýé

<sup>20</sup>Timoteo, ndayá Bëngbe Bëtsá tcmojabonýecá, botamana cochtsinýena. Entšanga nýe quem luarentša soyëngama encuëntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entsanga jtsichámuana beca osertánanentsana chca yóbocana ca, pero ndegombre chca ndoñe ntsemnana. <sup>21</sup>Atše chca séntsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguñe ošbuáchiyana tmojtsajbaná.

Atše, Bëngbe Bëtsá séntseimpadana, ácbeñe tšabe bendicionënga chaotsemnama.



## 2 Timoteo

### Jachuayama

**1** <sup>1</sup> Atše Pablo, Jesucristbe ichmoná sëndmëna, Bëngbe Bëtsá chca yobóseyeca. Jesucristo šonjichmó entsanga jábuayenama Bëngbe Bëtsabe šbuachenánama, ntšamo cha inétsamama entsanga chë nyetsca tescama yomna tšabe vida chamotsebmoma; y chca vida montsebmoma Cristo Jesúseftaca cánÿiñe mo canÿacá bétsemnayeca. <sup>2</sup> Atše quem tsbuanácha cbontsabobiamná, acbiamá Timoteo, aca mo atšbe bonshana uaquiñacá, Crístbeñe condošbuachema. Atše séntseimpadana, Bëngbe Bëtsá, Bëngbe Taitá, y Jesucristo, Bëngbe Utabná, chaboma ácebeñe tšabe bendicionënga chaotsemnana, chata ácbioye chacmolastemama, y acbe ainaniñe tšabe ebionana chacotsebmoma.

### Ndoñe ntsëuatjana entsángbeñe Jesucristbiamá jóyebuambayama

<sup>3</sup> Sempre Bëngbe Bëtsáftaca tsencuénta ora, acbiamá sëndbétsenojuabnaye, y acbiamá sëndbétsatschuanaye bnëté y ibeta; y Bëngbe Bëtsá endmëna nda atše sëndëservena, ainánaca jtsejuabnayëse y jtsetatšëmbëse, ntšamo atše stsamcá tšabá bétsemnana, cachcá ntšamo atšbe bëts taitanga tmojanmcá. <sup>4</sup> Atše sëndbëtétenojuaboye ntšamo aca,

chocana atše séntanabo ora shëchbuiye tconjanoperdema, y chíyeca atše tša séntseboše aca jtétinÿama, atše puerte oyejuayá chaitsemnana. <sup>5</sup> Bëngbe Bëtsá acbiamá sëndbatschuaye, er atše sëndbátenojuaboye aca Jesucristbeñe ndegombre ošbuáchiyana condpomnana. Natsana, acbe bëts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sëndétatšëmbo.

<sup>6</sup> Chíyeca sempre cochtsantješna quem uámána soyama: Mo nda canÿe shinÿañe tojtsajuinÿinÿnacá, chentše sempre chaotsoiñama, cachcá aca, chë Bëngbe Bëtsá tcmojatšetá obenana tšabe soyënga jamama, sempre cochtsinÿena. Chë obenana aca conjanóyëngacñe, atšbe cucuatšënga acbe bestšašniñe sënjanjajó y Bëngbe Bëtsá acbiamá sënjanimpadá ora. <sup>7</sup> Er Bëngbe Bëtsá tonjama bëngbe ainaniñe Uámána Espíritu chaotsemándama, uatjana ndoñe ntsebmoma, ndayá obenana bënga chamotsebmoma, bonshánana Bëngbe Bëtsabiamá y nyetscangbiamá chamotsebmoma, y cabënga jenomándama chamotsobenama. <sup>8</sup> Chíyeca, ndoñe cattseuatja entsanga jáuyanama, ntšamo tcojinÿe y cojtsetatšëmbcá Bëngbe Utabnabiamá ndegombre bétsemnana; ni atšbiamá ndoñe cattseuatja, atše cárceloye

sëndutámenama, chabiama oservena causa. Chamna, chë Bëngbe Bëtsá cmochanjátsetaye obenánaca, sempre cochtseprontana jasúfriama, átseftaca y ínÿengaftaca, entsànga tšabe noticiënga abuaiyinye causa. <sup>9</sup>Bëngbe Bëtsá endmëna nda bënga šojatsebacá, y šojáchembo jtsiyenama mo chábinga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnama inabóseyeca y bëngbe tšabiama juabna bómnayeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiana jamama sóyeca. <sup>10</sup>Y mora, Bëngbe Atsebacayá Jesucristo tojáboyeca, Bëngbe Bëtsá šojinÿanÿé cha bëngbe tšabiama juabna yobomnama. Jesucristo tonjama, entsànga nÿetsca tescama obanënga ndoñe chamondétsemnama, y tonjama bënga chamotsetatšëmbuama, chë tšabe noticiënga chabiama jouenëse y joyeunayëse, bënga chë nÿetsca tescama yomna tšabe vida mochjábomnama, ndoñe nÿe jopochócama cuerpënguiñe.

<sup>11</sup>Bëngbe Bëtsá šojanábuayana tšabe noticiënga entsànga jábuayenama, Jesucristbe ichmoná jtsemnama y entsànga jabuátambama. <sup>12</sup>Chë causa, atšë mora cárceloca quem soyënga séntsesufrina; pero chama atšë ndoñe quetsátëuatja, er atšë sëndétatšëmbo ndábeñe atšë stsošbuáchema, y corente sëndétatšëmbo cha yobena jtsinÿenana ndayá šojabonÿecá, chë ndaytë cha yochjésabëntscuana.

<sup>13</sup>Nÿets tempo, chë ndegombre buayenánana, ndayá átšbentšana tconjanuencá, entsànga cochtsabuaiyinye, entsànga jtsinÿanÿayëse aca Jesucristbeñe

icošbuáchema, y Bëngbe Bëtsá y nÿetscanga icuababuánÿeshanama, y chca yomna aca Cristo Jesúseftaca cánÿiñe mo canÿacá bëtsemnayeca. <sup>14</sup>Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonÿecá sempre cochtsinÿena.

<sup>15</sup>Ntšamo ya condétatšëmbcá, nÿetsca ošbuáchiyënga Asia luaroquënga cachcá šmonjesonÿá, y chentšë bontsemna Figelo y Hermógenes. <sup>16</sup>Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atšë cárceloye utámenama cha ndoñe quenjatëuatja. <sup>17</sup>Masna, Romoye tojabánashjango ora, cha botamana šojánguango y šonjáninÿena. <sup>18</sup>Bëngbe Utabná lastemado cháftaca chaotsemna, ntšamo nÿetscanga tmojamcá tšabá o ndoñe tšabá yontsemnama cha yochjayana ora. Aca corente condétatšëmbo ntsachetšá Onesíforo Efeso puebloca šonjanéjabuachama.

#### Jesucristbiana canÿe tšabe soldado

**2** <sup>1</sup>Y aca, atšbe uaquiñá, chë Cristo Jesús acbiana tšabe juabna yobomnentšana, bëtscá añemo ainaniñe cochtsebomna. <sup>2</sup>Ntšamo ba entsàngbe delante šconjoyeunacá, cach buayenánana, boyabásenga nÿetscañe tšabe palabra bomnënga cochjábanÿiye, y chamotsobena ínÿenga cachcá jabuátambama.

<sup>3</sup>Aca, chë bënga fséndbomna padecena soyëngama jasúfriama chacmojtsemna ora, Jesucristbe soyëngama entsànga abuaiyinye causa, ainaniñe bëtš añemo cochtsebomna, mo canÿe tšabe soldadcá, cha chabe mándayabiama

jasúfriana. <sup>4</sup>Ndocna soldado ntjatanana shjoca soyènguiñe vida jtsebomnama o crocénana juácanama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. <sup>5</sup>Y canye travisiayá, ínÿenga jáyèñjanama, canye soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. <sup>6</sup>Chë jajañe trabajayá derecho jtsebomnama chë natsaná jtsemnama, chë tmojatbaná sananguentsána ndayánaca jtsebomnama. Acaftaca cachcá echanjopása, chë trabajo tšabá chacojamëse. <sup>7</sup>Chë cbontsatsëtsnañe cochtsenójuabnaye, y Bèngbe Utabná echanjama lempe chacmósertama.

<sup>8</sup>Sempre cochtsenójuabnaye Jesucristbiama, ndabiama Bèngbe Bëtsá tojanma cháuatayenama y enjamna canya rey Davídbentšana entšá, ntšamo atše chabiama sëndabuayiyiná tšabe noticiènguiñe endmëncá. <sup>9</sup>Chca abuayiyinaye causa, atše séntsesufrina, ñya cadenëjuangácnaca utsbuaná, mo canye bëts bacna soye ochjajnayacá. Pero masque atše chca séntsemna, chë Bèngbe Bëtsabe soyèngama buayenánana ínÿenga entšángbioye montsabatambá. <sup>10</sup>Chíyeca atše ñyetsca padecena soyèngaca sëndëtsóboyana, Bèngbe Bëtsabe bocacánèngbe tšabiama, chéngnaca atsebácanènga chamotsemnama, Crístbeñe jtsošbuáchiyëse; y Cristo Jesús bëtsétsanga cháuabiamama, y cháftaca ñyetsca tescama chamotsiyenama.

<sup>11</sup>Mëntšá ndegombre endmëna: Cristo Jesús tojanóbana ora, enjamna mo béngnaca

cuafjobancá, er bènga tmontsajbaná oyenana ntšamo tempo monjanियencá y Jesucrístbeñe montsošbuaché; y chca, béngnaca cháftaca mochantsiyena;

<sup>12</sup>bènga chë padecena soyèngaca tmojtsesufrina ora, tmojtsemorochëse, béngnaca Jesucrístoftaca mochántsemandaye.

Bènga tmojayana, cha ndoñe monduabatma ca, as cha bèngbiámna cachcá echanjajana;

<sup>13</sup>bènga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá, er cha lempe jamana, ntšamo sempre iuetsemncá jtsinñanyñayëse.

**Canye trabajayá, ndáftaca Bèngbe Bëtsá jtsóyejuayana**

<sup>14</sup>Chë tcbonjauyana soyèngama, cochjama chë entšanga chamotsenójuabnama, y Bèngbe Bëtsabe delante cochjábuaenaye chënga ndoñe yontsamna ñye palabrèngama jabuachana enatsëtsnayana; er chca, ndocna tšabe soye ntjamana, y chca tmojtсенatsëtsná ora, jamana chë soye ouenanènga más batšá chamotsošbuácheme, y jujabuáchana chéngbe tšabe juabnènga jtsondbiamama. <sup>15</sup>Lempe ntšamo icobencá cochtsama, aca chacotsemnama mo canye entšá ndabiama Bèngbe Bëtsá cháuyana ñyetsca soyènguiñe tšabá amá yomna ca; aca chacotsemnama mo canye trabajayacá, nda tondaye tontsebomna ndayama jatëuatjama; y chacotsemnama chë ndegombre

buayenánana corente tšabá  
 buatëmbayá. <sup>16</sup>Entšanga nÿe quem  
 luarentša soyëngama, ndoservena  
 palabrënga tmojtsencuénta ora, chë  
 soye ndoñe cattsuena; er chë soye  
 jamana entšanga puerte inÿetšá  
 chamobocanama, ntšamo Bëngbe  
 Bëtsá ndoñe yondmëncá, inÿetšá  
 jtsejuabnayëse y jtsamëse. <sup>17</sup>Chëngbe  
 buatëmbana soyëngaca puerte bacá  
 ínÿengbioye jáborlana, nÿa mo canÿe  
 uabouana šocana chamotsebomnama  
 cuafjamcá. Chca buatëmbayënguentšë  
 Himeneo y Fileto bontsemna. <sup>18</sup>Chata  
 chë ndegombre benachentšana  
 tbojtsujuánañe, y ibojtsichamo  
 chë obanënga chámuatayenama  
 Bëngbe Bëtsá ya catënjama ca, y  
 Jesús chaojésabo ora, nÿetscanga  
 chámuatayenama Bëngbe Bëtsá ndoñe  
 yochanjama ca. Chë causa, chata  
 bontsama básefta entšanga chë ntšamo  
 Jesucrístbeñe imojanošbuachecá, mora  
 ya ndoñe chamondëtsošbuáchema.  
<sup>19</sup>Pero Bëngbe Bëtsabe ndegombre  
 buayenánana nÿets tempo cachcá  
 endesomñe, y ndocná quenátobena  
 chë soye jatrócama. Chca endmëna  
 mo chë ndëtšbënga ndayiñe canÿe  
 bëts yebna tojebncá, ndayiñe  
 mëntšá yojtsábemana: “Bëngbe  
 Utabná endëubuatma chë chábënga  
 imomnënga”, y “Nÿetscanga chë  
 Bëngbe Utabnábënga imomnënga  
 ca tmojtsichámënga, chamuajbaná  
 nÿetsca bacna soyënga amana ca”.

<sup>20</sup>Canÿe uámana entšabe yebnentšë,  
 tsafjoca soyënga ndoñe nÿe castellano  
 o midio soyënga ntsemnana, ndayá  
 niñëse y fshantse soyëngnaca; chë  
 natsana soyënga uámana tescama  
 jtsebuájonana, pero chë inÿe soyëngna,  
 nÿe nÿets tempo chauetsoservénama.

<sup>21</sup>Chca endmëna chë Jesucrístbeñe  
 imojtsošbuachëngbeñe, ndoñe

nÿetscanga tmontsajbaná bacna  
 soyënga juabnayana y amana, ni chë  
 chca tmojtsama entšángbentšana  
 ndoñe tmontsojuaná. Pero,  
 chca jtsojuánañama tojtsebošá,  
 echántsemna canÿa Bëngbe  
 Utabnabiama tšabe trabajayá; y  
 chca, mo chë tsafjoca castellano  
 y midio soyëngcá, canÿe uámana  
 trabajuñe echanjosérvia, y cha sempre  
 echántseprontana ndaye tšabe soye  
 jamama.

<sup>22</sup>Chíyeca, ntšamo básefta  
 bobontsënga bacna soyënga jamama  
 mondbošcá, ndoñe cattsama; pero  
 añe cochtsiyena ntšamo Bëngbe  
 Bëtsabe bominiñe tšabá yomncá  
 jtsamëse, Jesucrístbeñe puerte  
 cochtsošbuáchiye, Bëngbe Bëtsá  
 y ínÿenga cochtsababuánÿeshana  
 y nÿetscángaftaca  
 natjëmbana cochtsomñe, chë  
 chaújabuachama Bëngbe Utabná  
 mondbetsotsëmbuanëngaftaca  
 cánÿiñe, ndocna bacna soye  
 ainaniñe ntsebomncá. <sup>23</sup>Ndoservena  
 soyëngama palabrënga y  
 ndosertánentšana óbocana soyëngama  
 ndoñe cattsuena; aca corente  
 condétatšëmbo chë soyënguentšana  
 entšanga nÿe jabuachana  
 enatsëtsnayiñe jabocanana. <sup>24</sup>Pero  
 chë Bëngbe Utabnabiama oservená  
 ndoñe quebnátsmëna ínÿengaftaca  
 jabuachana ntsenatsëtsnayana; chamna,  
 cha bontsemna jtsababuánÿeshanëse  
 nÿetscanga jtsëñÿayana, jtsemnana  
 tšabe buatëmbayá y ínÿengaftaca  
 uantadá. <sup>25</sup>Cha bontsemna, chë  
 chabe contra y chabe buayenánama  
 contra imomnënga, chë ndegombre  
 soyënga jabuátambama, pero ndoñe  
 ntjatenabotamnaycá. Chca bontsemna,  
 nderado Bëngbe Bëtsá nanjama chca  
 juabnayana chamotrocama, y chca,

chënga chë ndegombre soyëngama chamotsetatšëmbuama; <sup>26</sup> chënga botamana chamuatsjuaboma, y Bëngbe Bëtsá, Satanásbe cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

**Ntšamo entšanga mochtsemna,  
Cristo jésabama chaojtsobeco ora**

**3** <sup>1</sup> Pero aca cmontsemna jtsatetšëmbuana, Cristo jésabama tempo chaojtsobeco ora, entšanga echántsamna puerta padecena soyënguiñe jtsiyenana. <sup>2</sup> Chca echántsemna, er entšanga, cada ona nÿe cachabe tšabiana echanjésenojuabnaye, crocénana jtsebmnama tša mochántseboše, mochántsemna enábotamnayënga y ínÿengbiöye mo nduamanëngcá mochantsënÿaye. Bëngbe Bëtsabiana y ínÿengbiana bacá mochantsóyebuambnaye, chëngbe bëtsétsangbiöye ndoñe quemochátayaunana, ni chëngbiana tšabe soyënga tmojtsamëngbiöye quemochtëtacheuanaye, y Bëngbe Bëtsabiana y chabe soyëngama ndoñe respeto quemochátsbmna, <sup>3</sup> ni cachëngbe pamíllangbiöye quemochátababuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uabotënënga. <sup>4</sup> Chënga, uayayëngbe cucuatšëne entšanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entšangcá mochántsenobiamnaye;

chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše.

<sup>5</sup> Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnama chënga ndoñe mondošbuáchemá.

Nÿa tondayama chëngaftaca cattsencuëntaye. <sup>6</sup> Chënguentšë báseftanga mondmëna, y chëngna botamana palabréngaca yebnënguenache jamahjñana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchemá. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnama, ntšamo tmojtsebošcá. <sup>7</sup> Chënga nÿets tempo nÿe ndaye tsëm soye jatóntsana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama. <sup>8</sup> Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entšanga chëngbe juabniñe nÿe bacna soyënga jtsebmnama, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa. <sup>9</sup> Pero chënga ndoñe quemochatobenaye bëtscá entšanga jáyëñanama, er nÿetsca entšanga mochanjátatšëmbona chënga nÿe bacna soyënga juabnayënga imomnama, mo chë Israeloca entšanga tmojantatšëmboncá Janes y Jambres nÿe chca juabnayata bëtsemnama.

### Inÿe soye Timotéobioye tbojanbonÿé

<sup>10</sup> Pero acna, puerte tšabá condétatšëmbo ntšamo atše tijabuatambacá, ntšamo jtsamése atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse, <sup>11</sup> ínÿenga šmonjanacmena ora; y sënjansufrina ora, padecena soyënguñe bëts añemo tsjánbomna. Acnaca condétatšëmbo ntšamo atše chama Antioquía, Iconio y Listra bëts pueblëngoca tsjansufrínama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentšana šonjanatsbocá. <sup>12</sup> Ndegombre endmëna, nÿetscanga chë Bëngbe Bëtsá jadórana soyënga jtsamése jtsiyenama bošënga, y Cristo Jesuſeftaca canÿiñe mo canÿacá imomnënga, puerte mochanjasúfria, chca bëtsemnana, chënga chamosufrima ínÿenga chamojtsama ora; <sup>13</sup> pero chë bacna entšanga y chë ínÿenga áingñayënga, cada te más bacna entšanga mochántsemna, más bacna soyënga jtsamése; chënga ínÿengbioye mochántsaingñaye, pero cachëgnaca ingñënënga mochántsemna.

<sup>14</sup> Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsosbuácheñe, er ca tšabá condëubuatma chë tcmojanbuátëmbanga; <sup>15</sup> y aca, cabá básetema conjamna orscana, chë Bëngbe Bëtsabe uabemana palabrengama condétatšëmbo,

chë ndaye sóyeca aca contsobena juatsjínÿana, Bëngbe Bëtsá chacmatsbocama, Cristo Jesúsbeñe jtsošbuáchiyëse. <sup>16</sup> Bëngbe Bëtsá, Uámama Espíritbeyeca tonjama, lempe ntšamo Bëngbe Bëtsabe uabemana palabrenguiñe yobinÿncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamése; <sup>17</sup> chca, canÿe entšá Bëngbe Bëtsabiamama oservená y obená chaotsemnana, tšabá chaotsetatšëmbo y sempre chaotseprontana nÿetsca tšabe soyënga jtsamama.

**4** <sup>1</sup> Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiama y chë ya mochjóbanëngbiama, ntšamo chëngbe vidënguñe tmojftsemcá tšabá o ndoñe tšabá bëtsemnana, chatbe delante cbomandá, <sup>2</sup> Bëngbe Bëtsabe palabra entšanga chacotsabuayinayama; siempre chca jamama cochtseprontana, masque entšanga añe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetatšëmbo, chca tmojtsamama cochjucácana y cochjábuayenaye ndayá jamama yojtsamnana. Siempre chca cochtsabuátambaye, chca ora puerte uantado jtsemnëse. <sup>3</sup> Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana;

chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsuchamo soyënga nÿe ntšamo cach entsãnga jouenama tmojtsebošcá. <sup>4</sup>Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. <sup>5</sup>Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiana tsabe noticiënga entsãnga abuayinyayabe trabajo cochtsama; y nÿa cochtsentsëna ndayá Bëngbe Bëtsá tcmojabonÿecá tsábá jtsamama.

<sup>6</sup>Er mo Bëngbe Bëtsábioye jÿtschuayama, canÿe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atšë jóbana bécõe entsemna; chanjóbana ora echántsemna Bëngbe Bëtsá oyejuayá chaotsemnama.

<sup>7</sup>Cristo Jesusbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átsnaca ya, ntšamo Bëngbe Bëtsá yobošcá atšë jtsamëse, atšbe trabajo ya tijapochocá. Atšë nÿets tempo Jesucristbeñe sëndošbuaché.

<sup>8</sup>Chcasna, atšbiana canÿe uacanana soye echántsemna, er Bëngbe Bëtsá tojama atšë chabe bominÿiñe tsabia chaitsemnama. Bëngbe Utabná endmëna chë ndegombre tsábá ichamuá entsãnga aĩñe o ndoñe tsábá tmonjamama, y cha chë uacanana soye šochántatšetaye, entsãnga ntšamo tmojamama cha chaojabáyana ora. Pero cha nÿe atšë ndoñe chë uacanana soye quešochtétatšetaye, ndayá nÿetscángbioye chca, ndëmuanÿenga puerte imoboše cha cachiñe cháuesabama, cha imobobonshánayeca.

### Inÿe soyënga Timoteobiana

<sup>9</sup>Lempe ntšamo tcojobenacá cochjama betesco jabama atšë jabínÿama; <sup>10</sup>er Demas, cha yapa nÿe quem luarentša entsãngbe soyënga bošá enjamna, cha cachcá šonjesonÿá y Tesalónica pueblroye tojtsoñe. Crescente Galacia luaroye tonjá y Tito Dalmacia luaroye. <sup>11</sup>Nÿe Lucas, chë šmonjanájabuachanënguentšana, mora átšeftaca entsemna. Marcos cochjafstsenguango y ácaftaca cochjéftsbetše, er cha atšbe trabajuama puerte oservená endmëna. <sup>12</sup>Tíquico, Efesoye sënjichmó. <sup>13</sup>Chacojabo ora, uabonjanía šcochjesacñe, atšë Troas bëts puebloca, Carpbe yebnoca tijësaboshjona; chë librëšangánaca, pero chë uámana uabemana tsbuanachangá ndoñe chacmondétsenatjëmbe.

<sup>14</sup>Alejandro, chë cobre soyënga pormayá, puerte bacá šonjaborlá. Bëngbe Utabná bochanjacistíga, ntšamo atšë šojaborlama. <sup>15</sup>Chabiana cuedado cochtsebomna; cha tojobenase ntšámna cmatjabórla, er cha chë bënga mondabuayiná soyëngama contra entsemna.

<sup>16</sup>Chë natsana soyama, mándayëngbe delante šonjanotocá jenëuyanama ora, atšë ndocná chešnátanajabuache; nÿetscanga cachcá šmonjésonÿaye. Pero atšë sëntsobátmana, Bëngbe Bëtsá chama chënga chaotsaperdoná. <sup>17</sup>Pero Bëngbe Utabná aĩñe šonjanájabuache y tonjanma atšë bëts añemo jtsebomna, y chcase, atšë sënjanobená Jesucristbiana nÿetsca chabe tsabe noticiënga entsãnga jábuayenama, y chë luarentša ndoñe judiënga tmonjanobená chë soye jouenama. Mëntšá,

Bëngbe Utabná canÿe uabouana resjuentšana šonjanatsbocá, mo canÿe león jtsosañámentšana ndábioye cuafjatsbocá, <sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinÿenëse, celoye, chë ndayentše cha yománda luaroye šochanjesbetše. iNÿetscanga nÿetsca tescama cha chamotsatschuaná! Chca chaotsemna.

**Pablo Timotéobioye jadiósoftanama**

<sup>19</sup> Atšbe cuenta cochjácheuaye Prisca y Aquila, y Onesíforbe

pamílnaca. <sup>20</sup> Erasto, Corinto puebloca tontsoquedañe, y Trófimo Mileto puebloca šocá sënjëftseboshjona. <sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

<sup>22</sup> Atše séntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.



# Tito

## Jachuyama

**1** <sup>1</sup> Atše Pablo, Bëngbe Bëtsabe oservená sëndmëna y Jesucristbe ichmoná entsãnga jábuayenama, chë Bëngbe Bëtsá chabe entsãnga chamotsemnana tojábacacanga, Jesucristbeñe chamotsošbuáchema y chë ndegombre soyëngama chamotsetatsëmbuama; chë soyënga endmëna ntšamo bënga, Bëngbe Bëtsabe básenga bëtsemnana, mondoyena jtsamëse. <sup>2</sup> Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tescama yomna tšabe vida jtsebonnana. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entsãnga chca vida jtsebonnana; <sup>3</sup> y nya chama tempo tojóshjango ora, chë entsãnga jábuayenama, soyëngaca Bëngbe Bëtsá chabe palabra šojinjanjé, ndayá Jesucristo entsãngbiana yochjanmama; y chca jábuayenama atše palabra šmonjabonyé, Bëngbe Bëtsá, bëngbe Atsebacayabe mándoca. <sup>4</sup> Tito, quem tsbuanácha cbontsabobiamná. Atše Jesucristbe soyëngama entsãnga sënjanabuayiná ora, aca chábeñe consanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaqiñacá condmëna. Atše séntseimpadana,

Bëngbe Bëtsá Bëngbe Taitá y Jesucristo Bëngbe Atsebacayá, ácebeñe tšabe bendicionënga chaotsemnana chata chaboma, y chaboma aca ainaniñe tšabe ebionana chacotsebonnana.

## Titbe trabajo Creta luaroca

<sup>5</sup> Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnana chacubuáyanama, ntšamo tcbonjftsemandacá. <sup>6</sup> Canya bëtsëjemama uabuayaná mëntšá bontsemna: chaotsiyena ntšamo chabiana ndocná chaondétsichamo ndoñe tšabá yontsama ca; nye canye shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nye jenomándama ntsobecá y nye ntšamo tmojtsebošcá imojtsiyena ca, o chënga chëngbe bëtsétsanga o mándayënga ndoñe montsayaunana ca. <sup>7</sup> Er cánjëntse ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonyéyeca, cha bontsemna jtсийenana, ntšamo ndocná chaodayana cha ndoñe tšabá yontsama ca; ntjajuaboycá, nye ntšamo cha tojtsebošcá ndoñe chaondétsama;

ndoñe chaondétsiyena nÿe rábiaca jtsemnama; ndoñe chaondétsetmó; penzentsero ndoñe chaondétsemna; y ndoñe chaondétseboše nÿe paselo becá crocénana jtsebomnama.

<sup>8</sup> Pero chabe yebnentše posada entšanga júyentsamiama sempre chaotseprontana, tšabe soyènga chaotsebínÿnana sempre chaotsentšena, botamana juabnayá chaotsemna, ntšamo Bèngbe Bètsabe bominÿiñe tšabá yomncá chaotsiyena, nÿets tempo Bèngbe Bètsábioye chabotsadorana, y cachá nÿetsca soyènguine jenomándama chaotsobena.

<sup>9</sup> Cha bontsemna nÿets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyéngaca ínÿenga añemo chaotsatšatnama, y chë soyama contra tmojtsemnènga jáyénjanama, ndoñe tšabá montsamama.

<sup>10</sup> Cha chca bontsemna, banga nÿe ndëmandánènga jtsiyenama bošènga mondmèna causa, y chènga mondmèna, nÿe ndaye ndoservena soyèngama yapa oyebuambnayènga y ínÿenga áingñayènga, y chcanga más mondmèna chë nÿetsca ošbuáchiyènga base bobachtema chë más delicadentše tétšenènga jtsemnama yojtšamna ca mondbétsichamènguentsè. <sup>11</sup> Y entseyta chéngbioye jtayáchetana, er chènga jamana ba pamíllanguentsè nÿetscanga Jesucristbeñe ošbuáchiyana chamotsajbanama. Chènga chca mondbétsama, chë ndoñe yontsamna jtsabuátambayama soyènga jtsabuátambayèše, nÿe paselo crocénana jongánama.

<sup>12</sup> Enjamna canÿa, ndabiama entšanga jtsichámuana cach Creta luarentša diosèngbiana

oyebuambnayá canjamna ca, y cha cachabe luarentša oyenèngbiana mèntšá tonjánayana: “Creta luarentše oyenènga, nÿets tempo bosterènga mondmèna, ainana ndbomnènga y oyènjayènga nÿe becá jasama bošènga ca.” <sup>13</sup> Y chca ndegombre cha tonjánayana; chíyeca chènga jabuache cochjucácana, chca, chènga Jesucristbeñe chamotsošbuáchemana y chamotsobedecena chë buatëmbana soyènga, chë ndayiñe bènga mondošbuaché; <sup>14</sup> y cach judièngbe cuentènga ndoñe chamondétsuenana, ni chë ndegombre soyènga uabotenèngbe mandènga.

<sup>15</sup> Chë ainaniñe bacna juabnènga ndbomnènga y chca juabnéngaca ndëmandánènga, nÿetsca soyèngama jtsejuabnayana mo ndegombre tšabe soyènga cuaftsemncá; pero chë bacna soyéngaca mandánènga y Jesucristbeñe ndošbuáchiyènga, nÿe ndayámnaca jtsejuabnayana mo bacna soye cuaftsemncá. Chca entsemna, er chéngbe juabnoca nÿe ena bacna soyènga jésebmnnana, y ndaye bacna soye tmojama ora, chéngbe ainaniñe juabnènga ndoñe ntsebmnnana, bacna soye tmojamama chaúyanama.

<sup>16</sup> Chènga jtsichámuana Bèngbe Bètsá imuábuatma ca, pero ntšamo tmojtsama soyéngaca jtsinÿinÿnayana chca ndoñe ndegombre yondmènama. Chènga Bèngbe Bètsabe bominÿiñe puerte bacna entšanga mondmèna, y ntšamo cha tomandacá ndoñe ntsamana; chë causa chènga ndoñe ntsobenana ndaye tšabe soye jamama.

#### Soyènga ntšamo chë ndegombre buatëmbánana endmèncá

**2** <sup>1</sup> Ntšamo chacojtsoyebuambnacá sempre chaotsemna ntšamo chë ndegombre buatëmbánana endmèncá.

<sup>2</sup> Cochjayana chë bëtsëjëmëngna chamotsemna cachënga nÿetsca soyënguïñe jenomándama obenënga, nÿetscangbiama mo uámana entšangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguïñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguïñe puerte uantadënga chamotsemna.

<sup>3</sup> Cachcá, chë bëtsanana shembásenga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoýënga. Entsamna chamotsiyena tšabe soyënga jtsamëse; <sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básenga jtsababuánÿeshanana, <sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentsénana, nÿetscángaftaca tšábënga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatšatnaye cachënga jenomándama chamotsobenama, <sup>7</sup> y chënga cochjñyanÿiye ntšamo yomna jtsiyenana, cach aca nÿetsca soyënguïñe tšabá jtsamëse. Chca chacojtsabuatambá ora, nÿe chë ndegombre buayénana cochtsabuátambaye y corente respétoca chca cochtsama, <sup>8</sup> chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe

contra ichámënga chamotséuatja, er ndocna bacna soye quemochatobenaye bëngbiama jayanama.

<sup>9</sup> Chë nÿets tempo nÿe ínÿabiam a oservénënga cochjábuaenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnana. <sup>10</sup> Ndoñe chamondëtsatbëbana, pero añe nÿetscañe tšabe palabra bomnënga chamotsemna. Chënga chca entsamna, chca, ínÿënga chámuinÿe y chamujuabó tša botamana chë buatëmbana soyënga, Bëngbe Bëtsá bëngbe Atsebacayabiam yomna ca.

<sup>11</sup> Er Bëngbe Bëtsá bënga šonjinÿanÿé cha bëngbe tšabiam juabnënga yobomnana, y chca, cha tojama nÿetsca entšanga chamotsobena atsebácanënga jtsemnana. <sup>12</sup> Chë Bëngbe Bëtsabe juabna bëngbe tšabiam, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna ca šontsabuatambá, cabënga jenomándama jtsobenëse, ntšamo Bëngbe Bëtsabe bominÿiñe tšabá yomncá y cha jadórama soyënga jtsamëse. <sup>13</sup> Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. <sup>14</sup> Cha chabe derecho vida jtsobomñama cachcá tojanonÿá y bëngbiama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga

játsebacama, ainaniñe ndocna bacna soye ndbomnënga jábiamama, bënga chábinga chamotsemnana, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga beca añemo jtsatšatnayëse, y jtsinñanñayëse chënga bacna soye tmojamama, chë nyets condbomna mándoca jucacánëse. Ndoñe catjaleséncia ndocná chaundayana aca mando ndoñe condbomna ca.

**Ndayá Jesucristbeñe ošbuáchiyënga  
yojtsamna jamana**

**3** <sup>1</sup> Cochtsama chënga chamuatenójuaboma chë mandadënga y inñe mándayënga chamotsayaunanama, chamotsobedecénama, y tšabá yomncá jamama siempre chamotseprontánama. <sup>2</sup> Ndocnabiama ndocna bacna soye chamondëtsoyebuambná, penzentserënga ndoñe chamondëtsemna, ndayá nyëtscángaftaca natjëmbana jtsiyenama bošënga, tšabá mándbomnënga, nyëtscanga tšabe ainánaca imojtsénñyama entšanga jtsinñanñayëse.

<sup>3</sup> Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñëñënga y mandánënga monjamna nyëtsca bacna soyënga jamama juabnéngaca y nyë quem luarentše tšabá jtsemnana juabnéngaca. Bënga monjaniyena nyë bacna soyënguiñe juabnaye, inñyenga uantšaboše. Inñyenga bënga šonjanébuayënja y bënga nyëtscanga monjanenáboyënja. <sup>4</sup> Pero Bëngbe Bëtsá, bëngbe Atsebacayá, bëngbe

tšabiama juabna yobómnyeyca y tša šuababuánñeshanama šonjaninñanýé ora, <sup>5</sup> cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espiritu jujabuáchëse, bënga mo tsmëma entšangcá chamotsemnana, ntšamo tempo yojamncá ntjatsjuabnacyá y ntjatamcá. <sup>6</sup> Bëngbe Atsebacayá Jesucristbeyeca, Bëngbe Bëtsá tojanma Uámana Espiritu bëngbe ainaniñe nyëts tempo chaotsemándama y bënga chašotséjabuachanama, <sup>7</sup> chca bënga, Bëngbe Bëtsá bacna soyëngama šojaperdónanga y bëngbe tšabiama juabna bómnyeyca tojayana chabe bominýiñe tšábënga imomnënga, chamotsobena cha yobomna soyënguentshana bënga mo ndayá cuaftsëtocancá jóyëngacñama, y chca, chábeñe jtsošbuáchiyëse, chë nyëtsca tescama yomna tšabe vida chamotsobátmanama.

<sup>8</sup> Chca, lempé ntšamo tijayancá nyä ndegombre endmëna, y atše séntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentsëna chë tšabe soyënga jtsamama. Chë buatëmbánana puerte tšabá endmëna y nyëtscangbiama bëtscá endoservena. <sup>9</sup> Inñyenga nyë ndoservena soyëngama jabuachana tmojtsenatsëtsná ora, y anteungbe cuentëngama chamojtsoyebuambná ora, ndoñe cattsonremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe inñyengaftaca cattsenpéliaye. Chca jtsamana tundayama ntososervénana, y nyë bonamente chca jtsamana.

<sup>10</sup>Nderado nda tojtsama entšanga ndoñe cachá nyetscanga chamondétsejuabnama y chamotsenpéliama, canye o uta soye cochjabuayená ndoñe tšabá tonjamama; pero cha ndoñe tcmónjýeunase, chentšana cháftaca ndoñe más cattsóyebuambnaye. <sup>11</sup>Chca cochjama, er aca cochanjátatsšëmbona canya chca tojtsemná, chabe juabna tojatrocá bacna soyënga jtsejuabnayama. Chë soye y chë inye bacna soyënga ntšamo cha tojtsamcá, jtsinýanýnayana cha ibojtsemna castiganá chama jtsemnama.

#### Inye soyënga Titbiamama

<sup>12</sup>Atše, Artemas o Tíquico ácbioye chaijichmó y choca chaojáshjango ora, ndayánaca cochjama Nicópolis puebloye aca jama atše jinýama, er atše sënjuabó chentše chë uaftenëntscuana jëftsemnana. <sup>13</sup>Lempe ntšamo chacojobenacá,

cochjuájabuache chë ínýenga obuauyayá Zenas, y Apólosnaca; lempe ntšamo chata ibojtsëjabotcá cochjátšataye, ínýoye jama jatóntšama chamobenama y benachëjana tondaye chaondëtsabuáshebenama. <sup>14</sup>Atše séntseboše, bëngbe entšanga, chë bëngcá Jesucristbeñe ošbuáchiyënga, chamotsentšena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoservena vidënga ndoñe chamondétsebomnama.

#### Pablo Títbioye jadiósoftanama

<sup>15</sup>Nyetscanga chë átšeftaca montsemnéngnaca cmontsechuaná. Atšbe cuenta cochjácheuaye nyetscanga chë bënga imuababuanýeshanëngbioye, cach bëngcá Jesucristbeñe ošbuáchiyana bómnyeca. Atše, Bëngbe Bëtsá séntseimpadana, cha chaoma ácbëñe tšabe bendicionënga chaotsemnama.

# Filemón

## Jachuayama

<sup>1</sup> Atše Pablo, mora utamená Cristo Jesusbiana oservena causa, quem tsbuanácha séntsabiamná, Jesucristbeyeca bēngbe catšata Timotéoftaca, acbiana Filemón, bēngbe bonshaná y nda bēngaftaca condētrabája Jesucristo jaserviama. <sup>2</sup> Atše séntsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenojuerzana; y nyetsca ošbuachiyéngnaca, ndēmuanýenga imuamana acbe yebnentše jénefjnama Bēngbe Bētsá jētschuayama. <sup>3</sup> Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēnga tsēngaftangbeñe chaotsemnama, y chaboma tsēngaftangbe ainaniñe tsabe ebionana chašmotsebmnama.

## Filemonbe bonshánana y ošbuáchiyana

<sup>4</sup> Bēngbe Bētsáftaca stsencuénta ora, acbiana sēndbētsenojuabnaye, y sempre acbiana Bēngbe Bētsá sēndbētsatschuanaye, <sup>5</sup> er atše sēnjátatsēmbona ntšamo aca nyetsca chē Bēngbe Bētsábenga imonnēnga icuababuánýeshanama, y ntšamo aca Bēngbe Utabná Jesúsbeñe tša icošbuáchema. <sup>6</sup> Bēnga, Jesucristbeñe ošbuachiyēnga

quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá séntseimpadana, tsēngaftanga chašmobená más botamana josértana nyetsca chē Bēngbe Bētsábicocana tmojóyēngacñe tsabe bendicionēnga, bēnga Cristo Jesúsēftaca cánýiñe mo canýacá bētsemnayeca. <sup>7</sup> Jesucristbeyeca atšbe bonshana catšata, aca chē Jesucristbeñe ošbuachiyēnga tša condábabuanýeshanama, atše corente oyejuayá séntsemna y bēts añemo séntsebmoma. Y aca tcojama, nyetscanga chē Bēngbe Bētsábenga imonnēnga chēngbe ainaniñe ngménaca ndoñe chamondētsemnama, chēnga jujabuáchese.

## Pablo, Filemónbiroye Onésimbiana tbojanimpadá

<sup>8</sup> Y chca, atše Cristbe ichmoná quetsomñecá séntsobena, aca nyē jamándana ntšamo yomncá chacotsamama, pero atše chca ndoñe quichatsma. <sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiana oservena causa, <sup>10</sup> canýe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyiná. Cha

Cristbeñe tonjanošbuachéyeca, cha mo atšbe uaquiñacá tonjanóbema.

<sup>11</sup>Tempo, cha ácbioye tondayama quecmēnjátanservena, pero mora cha becá entsámama, acbiama y atšbiama. <sup>12</sup>Mora ácbioye séntsatichamná, y atšbe sempre chabiama sēndbétsenojuabnaye y sēndbobonshana. <sup>13</sup>Atšbiama puerte tšabá manmēna cha átšeftaca matēnjoquedase, acbe cuenta atšbe chašoservema, cárceloye utamená séntsemnēntscuana, chē tšabe noticiēnga entšanga abuayiynaye causa. <sup>14</sup>Pero atšbe ndoñe chiyatsma cha chaoquedama atšbe chašujabuachama, er atšbe ndoñe quetsátsboše aca obligaciónaca chacotsemnama, atšbe juajabuáchama ndayánaca chacomama; y séntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma, chē soye chca chaotsemnama aca cabá ndocá ntjyancá. <sup>15</sup>Atšbe séntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnama ca, <sup>16</sup>y ndoñe nyē acbiama mo nyets tempo canyē oservenacá, ndayá chama más uamanacá, mo Jesucristbeyeca canyē bonshana catšatcá. Atšbe puerte Onésimo sēndbobonshana, y acna cmontsemna más cha jtsebobonshánana, er cha mora ndoñe quenátsmēna canyā nyē acbiama nyets tempo oservená, ndayá Bēngbe Utabnábeyeca canyē catšata, ntšamo cach aca condmēncá.

<sup>17</sup>Chca, aca atšbiama condējuabná mo ácaftaca cányiñe Bēngbe Utabnabiama trabajayacá; chíyecna cmontsemna cha jtófjana, mo

atšbe šcojofjá. <sup>18</sup>Nderado ntšamo cha tcmojanborlá o ndayánaca tcmonebena, atšbe chama cbochjētséntsabuachiye. <sup>19</sup>Atšbe Pablo, cach atšbe cucuátšeca quem soye séntsabiamná. Atšbe chama cbochanjētséntsabuachiye. Ndegombre, ndoñe quenátsiyta atšbe chachbēyana becá šcondebena ca, ntšamo atsbočaná jtsemnama atšbe tcojájnbuayenama. <sup>20</sup>Chcasna, Jesucristbeyeca atšbe catšata, Bēngbe Utabnáftaca cányiñe mo canyáca quetsomñecá, Diosmanda chē pavor šcochtsebema. Diosmanda cochjama atšbe ainana ngmēnaca ndoñe chaondētsemnama.

<sup>21</sup>Atšbe chca cbontsabobiamná, er atšbe tšabá sēndétatšēmo, ntšamo cbontseimpadancá cochjamama, y cabá más chama cochjatsmama. <sup>22</sup>Y mora inyē soye, Diosmanda posada šcochjaboprónta, atšbe jányama chajábocna orscama, er atšbe puerte jtsošbuáchiyēse Bēngbe Bētsábeñe sēndobátmana, cha tšēngaftangbiama yochjama lempe ntšamo atšbiama chašmojtjañcá, y chca, cha šochjaleséncia atšbe tšēngaftangbiocyte jésama.

#### **Pablo Filemónbioye jadióšoftanama**

<sup>23</sup>Epafras, muentše átšeftaca cárceloye utamená, Cristo Jesusbiama entšanga abuayiynaye causa, chánaca cmontsechuaná. <sup>24</sup>Y Marcos, Aristarco, Demas y Lucas, chē bēngaftaca mondētrabájanga Cristo jasérviamá, chēngnaca cmontsechuaná.

<sup>25</sup>Atšbe séntseimpadana Bēngbe Utabná Jesucristo, chaoma tšabe bendicionēnga tšēngaftangbeñe chaotsemnama.

# Hebreos

**Bèngbe Bètsá béngaftaca  
tojoyebuambá, chabe Uaquiñáftaca**

**1** <sup>1</sup> Tempo, Bèngbe Bètsá ba soye y ba soyéngaca bèngbe bèts taitángbioye tojanéyana, chë chabe juabna oyebuambnayéngaftaca. <sup>2</sup> Pero quem tempo béngaftaca tojoyebuambá, chabe Uaquiñá jíchmuase, béngbioye cha chašúyanama. Bèngbe Bètsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bèngbe Bètsá quem luare y nyetsca inyë luarénga tojama. <sup>3</sup> Cha endinýanýná Bèngbe Bètsabe corente buashinýinýanana y uámanana, y cha endmëna cach Bèngbe Bètsacá, y chábeñe bënga mondobena jinýama ntšamo Bèngbe Bètsá yomncá. Chabe bèts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bèngbe bacna soyénga jabuajuánama, y chentsana Bèngbe Bètsá tojaninýanyé cha puerte bètsá y uamaná bétsemnama, celoca játbemëse, Bèngbe Bètsabe catšbioica, nyetscanga jtsaméndayama.

**Bèngbe Bètsabe Uaquiñá chë  
angeléngbiama más bètsá yomna**

<sup>4</sup> Y chca, Bèngbe Bètsá tbojánbema chë angeléngbiama más uamaná y obená, er Bèngbe Bètsá tbojanbuajó

canýe más uámana uabaina y chë angeléngbiama canýe más uámana trabajo tbojanbonýé. <sup>5</sup> Ndegombre chca endmëna, er Bèngbe Bètsá ndocna te ndocna ángelbioye mëntšá tbonjaniyana, ntšamo chabe Uaquiñábioye tbojaniyancá:

Aca atšbe Uaquiñá condmëna.

Mënté entsanga sënjinýanyé aca atšbe Uaquiñá comnama ca.

Ni ndocna angelbiama mëntšá tojánayana, ntšamo chabe Uaquiñabiama tojanayancá:

Atše canýe taitá chabiama chántsemna,

y cha canýe Uaquiñá atšbiama ca.

<sup>6</sup> Quem Bèngbe Bètsabe Uaquiñá endmëna nyetscangbiama más uamaná. Chca Bèngbe Bètsá tojánayana, chabe natsana Uaquiñá quem luaroye cháuashjanguama cha tojanma ora:

Bèngbe Bètsabe nyetsca angelénga cha chamotsatschuaná ca.

<sup>7</sup> Y chabe angeléngbiama, mëntšá tojánayana:

Atše sëndama atšbe angelénga, chë atšbe buayinayénga, mo binýiéngcá chamotsemnama, y chénga, atšbe oservénénga, mo inéjéngcá ca.

<sup>8</sup> Pero chabe Uaquiñabiama Bèngbe Bètsá tojánayana:

Utabná, acbe améndayana nyetsca tescama echántsemna,



y aca nyetsca soyënguiñe  
condbétsemandaye, ntšamo  
tšabá yomncá jtsamëse.

<sup>9</sup> Aca icontšena ntšamo tšabá  
yomncá nyetsca soyënguiñe  
jtsamama, y sempre chca  
jtsamama tša icoboše,  
pero nŷa tondayama

cmondogustana bacna soyënga  
jtsamana, chë ndayá Bëngbe  
Bëtsá ndoñe yondboše soye;  
chíyeca Bëngbe Bëtsá  
tcmojabocacá,

y tojama aca puerta oyejuayá  
chacotsemnama,

chë ínŷengbiamá más oyejuayá ca  
—Bëngbe Bëtsá tojánayana.

<sup>10</sup> Bëngbe Bëtsá mëntšánaca chabiamá  
tojánayana:

Utabná, quem luare jobojátšama  
ora, aca quem luare tconjanma,  
y lempe chë celoca yomna  
soyëngnaca.

<sup>11</sup> Lempe chë soyënga nyets tempo  
ndoñe queochátsmëna;  
aca nyetsca tescama  
cochántsemna.

Lempe chë soyënga  
echanjopochóca, mo  
tojuatanguaná entšayacá.

<sup>12</sup> Aca chë luarënga cochanjátrocaye,  
mo tsmëcá cuafjabiamcá.  
Chca, chë luarëngaca cochanjama,  
mo entšayá tcojtenëjonëtse y  
tcojenotrocacá.

Pero aca nyets tempo cach aca  
cochandeshomñe,  
y nyets tempo vida  
cochandeshóbmñe ca —cha  
tojánayana.

<sup>13</sup> Bëngbe Bëtsá ndocna te ndocna  
ángelbioye mëntšá tbonjaniyana,  
ntšamo chabe Uaquiñábioye  
tbojaniyancá:

Atšbe catšbioica cochtsetbemana,

acbe uayayënga acbe cucuatšinë  
chamoquedama atšbe  
obenánaca chjamëntscuana ca.

<sup>14</sup> Ndegombre, nyetsca angelënga  
espíritënga mond mëna Bëngbe Bëtsá  
jaserviama, ndëmuanŷenga cha  
tojanichamó bënga jabújabuachama,  
chë atsebácanënga mochtsemnëngbe  
tšabiamá.

**Canŷe bëts soye endmëna  
atsebácanënga jtsemnana**

**2** <sup>1</sup> Chíyeca, bënga šontsamna  
sempre Bëngbe Bëtsabe soyënga  
jtsuananana, chë bënga tmonjouena  
soyënga, chë tšabe benachentšana  
ndoñe chamondujánama. <sup>2</sup> Ndayá  
Bëngbe Bëtsá tempo angelëngaca  
entšanga tojanamëndacá, canŷe  
ndegombre soye endmëna, y entšanga  
entsamna chca jtsobedecënaná; y chë  
bacna soye tmojanmënga y ntšamo  
Bëngbe Bëtsá tojanmandacá ndoñe  
tmonjanmënga castigo tojanatšatá,  
chca tmojanma causa; y chca, <sup>3</sup> bënga  
chca bacna soyënga tmojtsemëse,  
čntšamo mochjobenaye jtsejuabnayana  
Bëngbe Bëtsá chama ndoñe  
šochanjacastígaye ca? Ndegombre  
cha chca echanjama, bënga chábeñe  
ndoñe tmontsošbuáchese, chë bëts  
soye jëftsashjáchama, atsebácanënga  
jtsemnana. Bëngbe Utabná chë  
natsaná yojtsemna nda entšanga  
tojanabuayená Bëngbe Bëtsá entšanga  
yochjánatsebacama; y ínŷenga  
bënga šonjanabuayená cachcá  
ntšamo chábioye tmojanoyeunacá.  
<sup>4</sup> Y Bëngbe Bëtsánaca tonjaninŷanŷé,  
ndayá chënga tmojanabuayenacá  
ndegombre bëtsemnana, chabe  
obenana jinŷanŷiyama soyëngaca,  
entšanga chamenjnaná soyëngaca, bëts  
soyëngaca, y entšanga chë Uámana  
Espíritu ainaniñe chamotsebmnama

cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

**Bëngbe Bëtsá tojanma Jesucristo entšangcá chaotsemnama**

<sup>5</sup> Bëngbe Bëtsá angelënga ndoñe tonjubuáyana chamotsemándama ndayá quem luarentše yochtsemniñe, lempe mo tsmécá chaotsemnama Bëngbe Bëtsá chaojama ora, chë ndayama mora bënga montsoyebuambná. <sup>6</sup> Chamna, ínÿoca Bëngbe Bëtsabe uabemana palabrënguiñe mëntsá endayana, ntšamo chábioye canÿa tbojaniancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjésejuabnaye? Chënga entšanga mondmëna. ¿Ndáyeca tša chënga cuanjésanÿena?

<sup>7</sup> Aca tcojama entšá puerte uamaná chaotsemnama, y chë angelëngna nÿe batsatema chabiamá más uámanënga mondmëna.

Aca tcojama cha puerte uamaná y respeto merecido bomná chaotsemnama,

<sup>8</sup> y cha chaotsemándama nÿetsca chë inÿe soyënguiñe, chë quem luarentše aca tcojamiñe —chiñe canÿa tojánayana.

Entšá lempe chaotsemándama Bëngbe Bëtsá tojanma ora, tondaye tonjánboshjona entšáftaca ndëmandana soye ca. Pero mëntscoñama ndoñe nÿa chca quemëntinÿe, chë entšá lempe ntšamo quem luarentše yomncá jtsemándayana. <sup>9</sup> Pero bënga mondëtatšëmbo y corente mondonÿá Jesús aññe chca tojanmama. Bëngbe Bëtsá tojanma cha nduamaná

chaotsemnama, mo canÿe entšacá, baseftayté chë angelëngbiamá más batšá uamaná. Bëngbe Bëtsá, entšangbe tšabiamá jtsejuabnaye, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nÿets luarentša entšangbe tšabiamá. Y Jesús ya chca tojánmayeca, Bëngbe Bëtsá ya tojinÿanÿe cha puerte bëtsá y uamaná bëtsemnama.

<sup>10</sup> Nÿetsca soyënga yobinÿna Bëngbe Bëtsabiamá y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entšanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnama unachayá, chaosufrima jamëse, chca, ba entšanga celoca, mo chabe basengcá, cháftaca bëtšétsanga chamotsemnama. <sup>11</sup> Er Bëngbe Bëtsá cach Taitá nÿetscangbiamá endmëna: Jesús, chë entšanga Bëngbe Bëtsábenga chamotsemnama iuamabiamá, y chë entšanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama. <sup>12</sup> Bëngbe Bëtsabe uabemana palabrënguiñe Bëngbe Bëtsábioye cha mëntsá tbojaniancá:

Atšbe uabentséngbeñe acbiamá chanjóyebuambaye, y jacántase cbochanjëtshuaye, ácbioye adórayënguentše ca.

<sup>13</sup> Y mëntsánaca cha Bëngbe Bëtsabiamá tojánayana:

Atše atšbe Bëtsábeñe chantsošbuáchiye ca.

Y más chcoye mëntsá tojánayana: Muentše Bëngbe Bëtsabe básengaftaca séntsemna,

chê atšbe cucuatšîne  
tojábashejuanënga, atše  
jtsanÿenama ca.

<sup>14</sup>Quem Bëngbe Bëtsabe básenga nÿetsca entšangcá mondménayeca, Jesúsna canÿe entšá chëngcá tojanóbema. Cha chca tojanma, jóbanëse, chë entšanga jóbanama chaotsamna obenana bomná Satanás, jayénjanama. <sup>15</sup>Y chca, cha tojama chë jóbanama y ndayá chentšana yochjopásama auatjënga ndoñe chamondétsauatjama; chënga nÿets tempo corente ngménaca innoyena, jóbanama auatja causa. <sup>16</sup>Er ndegombre, cha ndoñe tonjánabo chë angelënga jabújabuachama, ndayá chë Abrahábentsana entšángbioye. <sup>17</sup>Y chama cha ibojamna jtsemnana nÿetsca soyënguiñe cachcá mo chabe uabentsëngcá, chë entšanga, chca, jobenayama jtsemnana chëngbiana mo bachnangbe canÿe más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuaperdonama, puerte lastemado mëná y sempre ntšamo Bëngbe Bëtsá tbojayancá amá. Chca, cha jóbanëse jamama entšanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama. <sup>18</sup>Y mora cha entsobena, ndëmuanÿenga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

**Cristo Moisesbiana más  
uamaná endmëna**

**3** <sup>1</sup>Chíyeca, Jesucristbeyeca  
catšátanga, Bëngbe  
Bëtsábenga, ndëmuanÿenga

Bëngbe Bëtsá tojáchembo chabe entšanga chamotsemnana, corente Jesucristbeñe šmochjësejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe. <sup>2</sup>Er Jesús nÿets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema. <sup>3</sup>Canÿe yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsoмерecénana Bëngbe Bëtsá cha puerte bëtsá y uamaná bëtsemnana cháuinÿanÿema, nÿe ntšamo Moisés, canÿa Bëngbe Bëtsabe entšanguentšá yojanomerecénama. <sup>4</sup>Ndëmuanÿe yébnëna canÿe jebuaná jtsebomnana, pero Bëngbe Bëtsá endmëna nda tojanma lempe ntšamo yobinÿncá. <sup>5</sup>Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nÿetsca Bëngbe Bëtsabe entšángbeñe, y yojamna canÿa corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama. <sup>6</sup>Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canÿe uaquiñá jtsemándayana ndayá nÿetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá.

Bënga chë pamillentša entsànga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiama yochjamama tmojtsobátmanëse, y bënga chca jtsebomnama puerte oyejuayënga tmojtsemnëse.

**Chë jóchnama uámana luare  
Bëngbe Bëtsabe entsàngbiama**

<sup>7</sup>Chcasna, ntšamo chë Uámana Espíritu Bëngbe Bëtsabe uabemana palabrenguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama, mo chë entsànga ndoyena luaroca Moisésoftaca imojéftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinýama ntsachetšá más muanjobenaye jamana y Bëngbe Bëtsá cabá uantado chëngaftaca tajojtssemnana.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinýama ndayéntscoñe atše uantado chëngaftaca tsjamnama; chca chënga tmonjanma, masque canta bnétsana uatëntscuana chënga chentše tmonjáninye chë atše sënjánama bëts soyënga.

<sup>10</sup> Chíyeca, atše chorsca entsàngaftaca šonjánetna y sënjánayana:

“Tšëngaftanga mora átšeftaca ndoñe quešmátajna, mo chë otšenënga tmojtsemnëngcá,

y ndoñe šmonjábošena jtsiyenana ntšamo atše tšoščá jtsamëse.’

<sup>11</sup> Chíyeca, atše chëngaftaca etonaná sënjánayana, mo nda cuafjajuracá, chënga ndocna te mochjéftsashjache chë átšeftaca jóchnama uámana luaroye jashjanguama ca” —cha tojánayana.

<sup>12</sup> Jesucrístbeyeca catsátanga, yejuana šmochtsantješna ndocná tšëngaftanguentsá chaondétssebomna canye ainana bëtscá bacna juabnéngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemná bentšana chaotsojuánañe.

<sup>13</sup> Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrenguiñe “mënté ca” uabaina tempo. Chca cmontsamna, ndocná tšëngaftanguentsá chaondétsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnéngaca ingñená. <sup>14</sup>Er, ndayá Jesús chabe améndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bétsemnana, ntšamo bënga chábeñe jtšošbuáchiyama tmonjanontsé ora monjanamcá.

<sup>15</sup>Ntšamo Bëngbe Bëtsabe uabemana palabrenguiñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entšanga ndoyena luaroca  
Moisésoftaca imojéftsemnëngcá,  
Bëngbe Bëtsabe contra nyetsca  
soyënguiñe imojtsemna ca.

<sup>16</sup> ¿Y ndëmuanýenga imojamna,  
chë Bëngbe Bëtsá tojanéyancá  
tmojanuenentsana, nyetsca  
soyënguiñe chabe contra  
imojtsanmëna? Co chë Moisésbeyeca  
Egiptocana tmojánbocanënga. <sup>17</sup> ¿Y  
ndëmuanýengaftaca Bëngbe Bëtsá  
etonaná canta bnëtsana uatëntscuana  
yojtsemna? Co chë bacna soyënga  
tmojanmëngaftaca, ndëmuanýenga  
entsanga ndoyena luaroca  
tmojanóbana y chëngbe cuerpo chentše  
tojanoquedá. <sup>18</sup> ¿Y ndëmuanýenga  
tojanéyana, mo nda cuafjajuracá,  
chënga ndocna te mochjéftsashjache  
chë cháftaca jóchnama uámana  
luaroye jashjanguama ca? Co  
chë ndëmuanýenga ntšamo  
cha tojanmandacá ndoñe  
tmonjanmënga. <sup>19</sup> Y ndegombre,  
bënga montsobena jinýama chënga  
ndoñe tmonjéftsashjache chë  
cháftaca jóchnama uámana luaroye  
jashjanguama, Bëngbe Bëtsábeñe  
ndoñe imontsošbuaché causa.

**4** <sup>1</sup> Chíyeca, bënga chë Bëngbe  
Bëtsáftaca jóchnama  
uámana luare jashjáchama cabá  
imobenëntscuana, ntšamo cha  
šojanašebuachenacá cachcá  
mëntscoñama iutésemna, puerte  
cuedado mochtsebomna, nderado  
ndánaca tšëngaftanguentsá ndoñe  
nanjobenaye chca jashjáchama.  
<sup>2</sup> Er béngnaca chë tšabe noticiënga  
tmonjouena, cachcá chë Bëngbe  
Bëtsabe buayenana soyënga chëngbe  
ainaniñe ndoñe chaondómashënguama  
tmojanmëngcá; pero chënga chë  
buayenana soyënga tmojanuena  
ora, ndocna tšabe soye chëngbeñe

tonjanopasá, er chca tmojanuena  
ora, chë palabrenguiñe ndoñe  
montsanošbuaché. <sup>3</sup> Pero bënga, chë  
Jesucristbeñe tmojošbuachengna,  
mochanjobenaye chë jóchnama  
uámana luaroye jashjanguama,  
chë ndayama Bëngbe Bëtsá  
tojánayana, chë tempo chábioye chca  
tmojtsanábotengbiama cha mëntšá  
tojánayana ora:

Chíyeca, atše chëngaftaca  
etonaná, sënjánayana mo nda  
cuafjajuracá,  
ndegombre chënga ndoñe  
mochjéftsashjache chë jóchnama  
uámana luaroye jashjanguama  
ca.

Pero cha chabe trabajo tojanpochocá,  
quem luare tojanma ora; <sup>4</sup> er Bëngbe  
Bëtsabe uabemana palabrenguiñe  
cányëntše mëntšá endayana, chë  
cányšëfta tianoye ndayá cha  
tojanmama:

Bëngbe Bëtsá nyetsca  
trabajëngama tonjanochná chë  
cányšëfta tianoye ca.

<sup>5</sup> Y cachentše Bëngbe Bëtsabe  
uabemana palabrenguiñe  
endayana, chë tempo chábioye chca  
tmojtsanábotengbiama:

Chënga ndocna te  
quemocháisashjache chë  
átšëftaca jóchnama uámana  
luaroye jashjanguama ca.

<sup>6</sup> Chë entšanga monjamna chë  
natsanënga chë tšabe noticiënga  
jouenama, pero chë Bëngbe Bëtsáftaca  
jóchnama uámana luare ndoñe  
tmonjéftsashjache, ntšamo cha  
inabošcá chënga ndoñe tmonjanma  
causa. Chcasna, cabá ndegombre  
endëtsomñe báseftanga, chë Bëngbe  
Bëtsá tojánayana soyënguiñe  
tmojtsošbuachengna, mochjéftsashjache  
chë Bëngbe Bëtsáftaca jóchnama

uámana luaroye jashjanguama. <sup>7</sup>Chê entšanga ndoyena luaroca, Bëngbe Bëtsá entšanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canye tempo tojuinýnaná, chora entšanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrenguñe mëntšá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entšanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnana cha choca matënjanmëse, Bëngbe Bëtsá bayté chentšana, David yojëftsiyena ora, inye tempuama ndoñe matënjanoyebuambá, chë ndaye ora entšanga muanjobenaye chë cháftaca jóchnama uámana luare jashjáchama. <sup>9</sup>Y chca, cabá endmëna canye uámana luare ndayentšë Bëngbe Bëtsabe entšanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora; <sup>10</sup>er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora. <sup>11</sup>Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye

ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjëftsashjache.

<sup>12</sup>Er Bëngbe Bëtsabe palabra endmëna mo canye aina soyca, nyets tempo entšángbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efsana espadëjaquécá, jobenayana puerte jashenoye jatëtsana canye cuerpo tcojatëtse ora, cachcá y cabá puerte más Bëngbe Bëtsabe palábraca, cha bënga jinýanýiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinýinyé sóynaca; y chë palábraca cha endobena jáuyanana ntšamo bënga tmojajuabó y tmojabošencá añe o ndoñe tšabá bëtsemnana. <sup>13</sup>Ntšamo Bëngbe Bëtsá tojamentšana tondaye quenátopodena chabiama iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiama lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

**Jesús endmëna chë más uámana bachnangbe bëtš amëndayá**

<sup>14</sup>Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiama ibuëtseimpadana, mo chë bachnangbe canye más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entšángbeñe tmojayana. <sup>15</sup>Er chë bëngbiama impadaná, mo bachnangbe canye

más uámana bēngbe amēndayacá, Jesús, yobena bēngbiana jóngmiana, bēnga inye ora ndoñe yapa obenana tmontsebmoma ora, tšabe soye o ndaye sóynaca jamama. Chca endmēna, er Satanás tša yojsentsēna Jesúsbioye ba juabnēnga chabotsontšáshjajuanama, jayēnjanama bacna soye chaomama, nyetsca juabnēnga ntšamo bēngnaca mondbetsebmocná, pero Jesús ndocna te ndocna bacna soye tonjéftsema. <sup>16</sup> As, ndauatjca Bēngbe Bētsá mochjótšēmbona, mo chábioye cuaftsobecocnangcá; cha canye uámana tbemaniñe yojsetbemana canye bēts reycá; chca mochjama, bēnga chášualastemama, y bēngbiana tšabe juabna jtsebmone, chašújabuachama bēnga chca chašojtséjaboto ora.

**5** <sup>1</sup> Ndēmuanye bachnangbe más uámana amēndayánaca jtsemnana entšanguentšana bocacaná, y uabuayaná chēngbe cuenta Bēngbe Bētsá jaserviama, chábioye juatšēmbonama y bayēnga jobáyama Bēngbe Bētsá jētschuayama, chca, Bēngbe Bētsá chē bacna soyēnga entšanga tmojamama cháuperdonama. <sup>2</sup> Chē bachna jtsobenana jóngmiana, chē bacna soyēnga amēngbiana chama ntsetatšēmbcá, y chē bacna soyēnga jamama ingñēnēnga imomnēnga, mo otšenēngcá imomnēngbiana, er cachánaca inye ora ndoñe yapa obenana ntsebmomana, chē bacna soyēnga jamama juabnēngama jtocochbuáchama. <sup>3</sup> Y chíyeca cha jtsemnana bayēnga jobáyama Bēngbe Bētsá juatšēmbonama, ndoñe nye entšangbioye bacna soyēngama cháuperdonama, ndayá chábioye chaboperdonámnaca. <sup>4</sup> Ndocná quenátobena cachá quem uámana trabajo jentsetayana, bachnangbe

más uámana amēndayá jtsemnana; cha jtsemnana, Bēngbe Bētsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. <sup>5</sup> Cachcá, Cristo ndoñe cachá tonjanenábuayana jtsemnana chē Bēngbe Bētsabe delante sempre bēngbiana impadaná, mo bachnangbe canye más uámana amēndayacá, ndayá Bēngbe Bētsá tbojanábuayana chē uámana trabajo jtsebmomana. Cha endmēna nda Jesúsbioye mēntšá tbojaniana:

Aca atšbe Uaquiñá condmēna.

Mēnté entšanga sēnjinyanyé aca atšbe Uaquiñá comnana ca.

<sup>6</sup> Y ínycocnaca, Bēngbe Bētsabe uabemana palabrenguine mēntšá tbojaniana:

Aca nyetsca tescama canye bachna condmēna, canye bēts bachna ntšamo Melquisedec yojamncá ca.

<sup>7</sup> Jesús quem luarentše yojeftsiyenēntscuana, cha juayebuáchēse y shēchbuíyeca Bēngbe Bētsáftaca ibnéncuentaye y ibnaimpadana, cha chē jobanámentšana jatsbocama yojanobená; y Jesús ntšamo Bēngbe Bētsá yojanbošcá tojánmayeca y tša respeto chabiana bómnyeyeca, chábioye tbojanoyeuná. <sup>8</sup> Chca, Cristo masque Bēngbe Bētsabe Uaquiñá inamna, jasúfriase tojanábouinye ntšamo jamana ndayá Bēngbe Bētsá tojtsebošcá. <sup>9</sup> Chca, Bēngbe Bētsá chábioye tbojánbema lempe ntšamo entšanga tmojtsajabotcá, nda chēngbe bacna soyēngama cháuatsebacama; chentšana cha, Cristo, tojanma lempe ntšamo yojaniytcá, nyetscanga chē entšanga chábioye imojánēyeunanēnga chamotsobenama nyetsca tescama

atsebácanënga jtsemnma; <sup>10</sup> y Bëngbe Bëtsá tbojanábuayana, chë chabe delante sempre bëngbiama impadaná, mo bachnangbe canÿe más uámána amëndayacá chaotsemnma, canÿe bëts bachna ntšamo Melquisedec yojamncá.

**Resjo endmëna, ošbuáchiyana  
jtsajbanana**

<sup>11</sup> Bëtsá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana. <sup>12</sup> Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana ínÿengbioye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontšë ora natsana jshauatsjínÿana soyëngama. Y chca, tšëngaftanga šmojobiama mo šësonatemëngcá, jtsëjabótana létšiyee jofšiyana y ndoñe jobenayana jasana chë jabmuánama ndoñe paselo tontsemna soyënga. <sup>13</sup> Chë nÿetsca soyënguinië ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šësonatemcá, nda vida jtsebonnana nÿe létšiyee jtseftmanëse. <sup>14</sup> Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoymenma, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

**6** <sup>1</sup> Chcasna, bënga šontsamna jtsajbanana nÿe jésebošana

jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontšë ora tmojanatsjinÿe soyënga, y šontsamna jtsatsjëndayana chabiama nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattatsjëndaye, mo chë ndayá yomna bacna soyënga jtsamana y chë bënga ndoñe vida ntsebonnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; <sup>2</sup> chë juabáyana ndayá yomna; chë ínÿabe bestšašiñe cucuatšënga jacjayana Bëngbe Bëtsábioye chabiama jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebonnana o nÿetsca tescama castigánënga chamotsemnma. <sup>3</sup> Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

<sup>4</sup> Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábenga bëtsemnma, y chë Uámána Espíritu chëngbe ainaniñe chaotsemándama imobomna, <sup>5</sup> y chë Bëngbe Bëtsá ntšamo tojašëbuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora, <sup>6</sup> chënga Jesucristbeñe ošbuáchiyana



lempe tmojtsajbanase, tondaye quenátsmèna ndayá jamama cachiñe Bèngbe Bètsábioye jtobéconama; er Bèngbe Bètsabe Uaquiñá chca stètsoye jaquédana, y jtsemnana mo Bèngbe Bètsabe Uaquiñábioye cachiñe chènga tmojtsecrucificacá, y entsanga cachiñe cha chamotsáboyejuanama chènga cuafjamcá. <sup>7</sup>Šmochjinýe: fshantse jamana chë ba uafténenga chiñe chaómashènguama, y chë chiñe trabájayèngbiama bètscá jaja sananga tojóbcnèse, Bèngbe Bètsá jamana, chë fshantsentsána bètscá tšabe soyènga entsangbiama chaotsebínýama.

<sup>8</sup>Pero nýe uchmašèshangá y matènga uchmèfjangaca chiñe tojuábocnèse, chë fshantse tondaye ntsámanana; y nderado Bèngbe Bètsá nanjama chiñe ndocna tšabe mata chaonduábocnama, y cabana, entsanga chiñe mochantsashaniñá. Cachcá, chë ošbuáchiyana tmojtsajbananga castigánènga mochántsemna.

**Bèngbe Bètsábeñe sempre  
chamotsóbátmanama y ainaniñe  
bètscá añemo chamotsebomnama**

<sup>9</sup>Pero masque chca montsoyebuambná, atšbe bonshánènga, bènga tšabá fséndétatšëmbo tšèngaftangbeñe chë más tšabe soyènga echántsemna, chë atsbočaná jtsemnana tojtsá cha yobomna soyènga. <sup>10</sup>Er Bèngbe Bètsá sempre ntšamo tšabá yomncá nýetsca soyènguiñe jtsamana, cha ndegombre echántsejuabnaye ndayá tšèngaftanga šmojamama, y chë chabiama šmojinýinýe bonshánama, chabe entsángbioye jtsèjabuáchanèse, ntšamo mórnaca šmojtsama. <sup>11</sup>Pero bènga fséntseboše, cada ona tšèngaftanguentsá, nýets tempo y Jesús chaojésabèntscuana chaotsinýanýná

corente yoboše chca jtsamama, Bèngbe Bètsábeñe chca jtsosbuáchiyèse, chábeñe sempre chašmotsóbátmanama, tšèngaftanga tšabiama cha chaomama.

<sup>12</sup>Ndoñe queftsátsboše tšèngaftanga oyènjayènga chašmotsobiama chë Bèngbe Bètsá tcmojabanýe trabajo jtsamama, ndayá Jesucristbeñe ošbuáchiyana bomnèngcá y padecena soyènguiñe uantado mènèngcá šmochtsama. Chca, chènga mochanjóyèngacñe ndayá Bèngbe Bètsá jatšatayama tojašebuachenacá, chabe entsanga bétsemnama.

<sup>13</sup>Bèngbe Bètsá Abrahámbioye tbojanšbuachená ora, chca tbojanianyana cachabe uabaina jayanèse, er inýa chabiama más uamaná ndoñe yontsemna ndabiama jajúrama, ntšamo tbojanšbuachenacá ndegombre chaotsemnama; <sup>14</sup>cha mèntšá tbojanšbuachená: “Añe, atše chanjama aca bètscá tšabe bendicionènga chacotsebomnama, y chanjama acbentša pamillentsána mallajta entsanga chamotsemnama ca.” <sup>15</sup>Y chca, Abraham Bèngbe Bètsábeñe jtsosbuáchiyèse, puerte uantadiñe yojanobátmana ntšamo tbojanšbuachenacá Bèngbe Bètsá yochjanmama, y pronto chca tojanóyèngacñe.

<sup>16</sup>Entsanga tmojajurá ora, chca jamana chèngbiama canýe puerte más uámanabe uabaina jayanèse, y chca chèngbiama más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsètsnayana. <sup>17</sup>Y chca, Bèngbe Bètsá tojánbošena botamana jinýanýiyana, ntšamo cha tojanašebuachenacá mochjanoyèngacñèngbioye, ntšamo tojanašebuachenacá cha ndegombre

yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninÿanyé cha chca yochjanmana, cachabiamama jajúrase, chë ntšamo tojanašebuachenacá yochjanmama ndegombre bétsemnama. <sup>18</sup> Bëngbe Bëtsabe šbuachenana soye y chama jinÿanyiyama ntšamo tojanayancá, ntšamo tojanašebuachenacá ndegombre yochjanmama, chë uta soye ndocná ntsoberenana jatrócama; y chca tojayana ora, ndoñe ntspodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chášuatsebacama y chašotsanÿenama, mo canÿe bëts resjuentsana tmojtsachetëngcá, ntšamo chentšana atsebácanënga jtsemnama cuafstenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëts añémoca chábeñe jtsošbuáchiyëse, cha yejuana šochtsanÿenama mondobátmana. <sup>19</sup> Mo ntšamo chë bëjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántssashatiyinmana, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucrístbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entšëjua ujonÿana stëtsoica, Bëngbe Bëtsabe delante jtsemnama, <sup>20</sup> ndayentšë Jesús celoca,

Bëngbe Bëtsabe delante tojámashëngo bëngbe tšabiamama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nÿetsca tescama, canÿe bëts bachna ntšamo Melquisedec yojamncá.

**Jesús, canÿe bëts bachna ntšamo  
Melquisedec yojamncá**

**7** <sup>1</sup> Quem Melquisedec yojamna Salem puebloca rey y bachna chë celoca Bëngbe Bëtsabiamama; Bëngbe Bëtsá, chë nÿetscangbiamama más uamaná. Abraham chë reyënga y chëngbe soldadëngaftaca imojentsjaná y tojanayëñjaná chentšana yojtsatabó ora, Melquisedec tojánbocna cha jajébenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. <sup>2</sup> Chora Abraham chábioye tbojanatšëta, chë reyëngaftaca imojentsjaná ora, lempe tojanosháchiñentšana, bnëtsanentšana canÿe soye. Chë palabra Melquisedec endayana “nÿetsca soyënguñe tšabá ama rey ca”; y chánaca yojamna Salem puebloca rey, y chca endayana “nÿetscanga natjëmbana chamotsiyenama ama rey ca”. <sup>3</sup> Chabe pamíllangbiamama tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo ntseco tojanonÿinama, ni ntseco tojanóbanama; chca, inÿe soyënguñe cha yojamna mo Bëngbe Bëtsabe Uaquinacá, y endmëna mo nÿetsca tescama bachna cuafstsemncá. <sup>4</sup> Y mora, šmochjajúaboyme tša uamaná Melquisedec inamnama, er bëngbe tempsca uámana bëts taitá Abraham chábioye tbojanatšëta, chë

reyéngaftaca imojentsjaná ora lempe tojanosháchiñentšana bnétsanentšana canýe soye. <sup>5</sup>Ntšamo Moisesbe leyíñe endémandacá, chë bachnangbe más uámana amëndayá Leví, Aarónënaca ca uabainabe pamillentsana tmomna bachnanga, jtsamnana chë Israeloca entsángbioye nyetsca chë tmobomna soyénguentšana bnétsanentšana canýe soye jtsayéngacayana; y chca jtsamnana masque chë entsanga cachéngbe pamillentsénga tmomna y Abrahámbentsšana pamillentséngnaca. <sup>6</sup>Pero Melquisedec, masque Aaronbe pamillentsá ndoñe yonjamna, Abraham, chë ntšamo Bèngbe Bètsá tbojanšbuachenacá tojanóyèngacñabentsšana, cha tojanóyèngacñe nyetsca soyénguentšana bnétsanentšana canýe soye, y Bèngbe Bètsábioye tbojanimpadá, Abraham bètsca tšabe bendicionénga chaotsebomnama chaomama. <sup>7</sup>Y ndocná quenátobena jayanama ndoñe ndegombre yondmëna ca, chë Bèngbe Bètsábioye impadaná ínÿabiana tšabe soyénga chaomama, más uamaná inétsemna chë chca tojóyèngacñabiana, inÿa chabiana Bèngbe Bètsábioye tbojaimpadá ora. <sup>8</sup>Quem tempo, bachnanga mochjóbanénga, entsángbioye jtsayéngacayana nyetsca chë tmobomna soyénguentšana bnétsanentšana canýe soye, pero chë Bèngbe Bètsabe uabemana palabra, Melquisedebiana endoyebuambná cha mo canÿa cabá ainá totsomñcá. <sup>9</sup>Y benga montsobena jayanama, Abraham Melquisedécbioye chë nyetsca soyénguentšana bnétsanentšana canýe soye tbojanoyé ora, yojamna mo Leví, chë nyetscángbioye nyetsca soyénguentšana bnétsanentšana canýe soye ayéngacayá, Melquisedécbioye

chca cuaftopagacá; <sup>10</sup>er cha Abrahambe pamillentsá inamna. Melquisedec vojtsabó ora y chábioye chë lempe tojanosháchiñentšana bnétsanentšana canýe soye Abraham tbojanatsetá ora, yojamna mo nyetscanga, chë Abrahámbentsšana entsanga más chcoye mochtsaniyenénga, chéngnaca chë bnétsanentšana canýe soye cuafjajajocá, masque Abraham chca tojanma ora, Leví y chë Abrahámbentsšana inÿe entsanga cabá ndoñe tmonjanonÿná.

<sup>11</sup>Israeloca entsanga Moisesbe ley tmojanáyéngaca, chë bèts taitá Levibe pamillentsénga bachnanga imojamnénga Bèngbe Bètsá imojtseservena ora, y chénga monjamna Aarónbentsšana entsanga. Ntšamo chë leyíñe yomandancá imojánaménga perdonánénga jtsemnama y Bèngbe Bètsabe bominÿiñe tšábenga jtsemnama quem bachnanga jamama matmënjanobenase, ndoñe manjanéyta Bèngbe Bètsá inÿe bachna chabuatschembuama, nda ndoñe yonjamna mo chë bèts bachna Aaroncá, ndayá ntšamo chë bèts bachna Melquisedec yojamncá. <sup>12</sup>Er, canýe bachnanga Bèngbe Bètsábioye jtsseservénama tmojajbaná y inÿe bachnanga chábioye jaserviama tmojatontsé ora, jtseytana chë natsana bachnanga imojanoservena ora mándaye leyéngnaca jtsetrócama. <sup>13</sup>Bèngbe Utabná, ndabiana quem soyénga jtsóyebuambnayana, ndoñe Aaronbe pamillentsá quenjatsmëna, ndayá inÿe pamillentsá, y quem pamillentsá entsanga ndocna te bachnangcá Bèngbe Bètsá tmonjanservé, chë altar ndirichiñe Bèngbe Bètsabe bèts yebnoca. <sup>14</sup>Er nyetscanga mondétatšëmbo Bèngbe Utabná Judabe pamillentsana

bétsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jtseservénama.

<sup>15</sup> Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. <sup>16</sup> Cha bachna yojamna, ndoñe chë bachnanga chabe pamillentšana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca. <sup>17</sup> Er mëntšá endmëna, ndayá Bëngbe Bëtsá chabiamama tojánayana:

Aca bachna nyetsca tescama  
condmëna,  
canye bëts bachna ntšamo  
Melquisedec yojamncá ca.

<sup>18</sup> Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jubabuáchama atsebácanënga jtsemnama, y chca, chëngbiamama ndoñe bëtscá yonjanoservena. <sup>19</sup> Er Moisesbe léyeca, entšanga ndoñe tmonjanobená Bëngbe Bëtsabe bominyiñe tšábenga jtsemnama, pero mora chama canye corente más uámana soye montsebozna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chášubiamama, y chca, Bëngbe Bëtsábioye bënga jtobéconama.

<sup>20</sup> Y Bëngbe Bëtsá lempe chca tojanma, cachabiamama jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentšëngbioye tmojanëbuáyana ora, Bëngbe Bëtsá ndoñe chca tonjánayana, <sup>21</sup> pero mo bachnëcá chaoservema Bëngbe Utabnábioye tbojanábuayana ora aña; cach Bëngbe Bëtsabiamama

jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrënguiñe endayancá:

Bëngbe Utabná Bëngbe Bëtsá,  
Jesucristbioye tbojanianama,  
cachabiamama jajúrase, ntšamo  
tojanayancá ndegombre  
chaotsemnama,  
y juabna ndoñe ntjatrócama:  
“Aca bachna nyetsca tescama  
condmëna ca.”

<sup>22</sup> Bëngbe Bëtsá chca tojánayanama, Jesúsbeñe bënga corente mondétatšëmbo, ndayá Bëngbe Bëtsá bëngbiamama jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entšangbiamama tojanašebuachená soyama. <sup>23</sup> Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jtseservénana; cada ona básefta uatëngama tojëftsanoservé, tojanóbana y inyábioye chë trabajo jatontšabuáchana. <sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjéftseservena, y ndocna te chabe trabajo inyábioye bochanjëftsinininyiye, chë inya cachcá jtsamama chauatontšëma. <sup>25</sup> Chíyeca, cha yobena nyetsca tescama játsebacana ndëmuanyënga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiamama jtseimpadánama. <sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiamama chabotseimpadánama, mo chë bëngbe bachnangbe más uámana amëndayacá.

Cha sempre uamaná endmëna, ndocna te ni mo canÿe juabna inÿabe contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bëngbe Bëtsá tojanma celoca más bëtsá y obená nyetscangbiama cha chaotsemnama.

<sup>27</sup>Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsanga tmojanmámna, mo chë inÿe bachnangbe más uamana amëndayënga mondbetsamcá, cachëngbiama y chë judiëngbiámna. Cha tojanma lempe ntšamo yojaniytcá canÿe soye y nyetsca tescama, entsanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsoptomñama cachcá tojanonÿná ora; y tojanóbana entsanga chamotsobenama perdonánënga jtsemnama. <sup>28</sup>Ntšamo Moisesbe leyinë yojanmandacá, chëngbiama mo chë bachnangbe más uamana amëndayëngcá tmojanëbuáyana entsanga inÿe ora bacna soye amënga; pero Bëngbe Bëtsá cabá chë ley entsangbe cucuatšinë tojanáboshjonentsana baytese, cha chabe Uaquiñábioye chë bachnangbe más uamana amëndayacá tbojanábuayana, cachabiama jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entsanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

**Cristo, nda jóbanëse tojanma entsanga Bëngbe Bëtsáftaca mo canÿacá chamotsemnama**

**8** <sup>1</sup>Chë más uamana soye ndayama bënga montsichamo,

chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canÿa nyetsca tescama Bëngbe Bëtsabe delante bëngbiama impadaná, mo chë bëngbe bachnangbe más uamana amëndayacá, Bëngbe Bëtsabe catsbioica yojtsetbemana jtsemándayama, y Bëngbe Bëtsá chë más uamana tbemanentše. <sup>2</sup>Chë inÿe bachnanga Bëngbe Bëtsabe bëts yebnentše tmojánamashjna chë “más uamana ca” uabaina luaroye, Bëngbe Bëtsabe delante jtsemnama; pero chë luare celoca ndayentše nyets tempo Cristo mo chë bachnangbe más uamana amëndayacá yoservena, entsanga ndoñe chca tmonjanpormá, ndayá Bëngbe Bëtsá.

<sup>3</sup>Nyetscanga chë bachnangbe más uamana amëndayënga tmojanëbuáyana, entsangbiama soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama.

<sup>4</sup>Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyinë yomandancá. Y chca, ndoñe nantseyta cha chca chauatoservënama. <sup>5</sup>Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentše Jesucristo celoca yoservena luarcá, ni ntšamo cha yoservencá; nÿe batšatema bëngbioye šuinÿanÿná ntšamo chë celoca luare yomnama, ndayentše Cristo

mo bachnecá yoserverna. Y bēnga mondéatatsēmbó quem luarentsē chē soyēnga chca yomnama, er chē Bēngbe Bētsábioye jadórama yebna, chē jatsjacama opodena yebna Moisés japórmama ora, Bēngbe Bētsá mēntśá tbojanianyana: “Cuedado cochtsebmna chē atśbiamá yebniñe nyetsca soyēnga jamama, ntśamo tbonjaninýinýecá chacomama, chē tjoca bonjamna ora ca.” <sup>6</sup> Pero bēngbe bachnangbe más uámana amēndayá Cristo, tojashjache canye más bēts trabajo jtsebmnama, ntśamo chē inye bachnanga imobomna trabajuama; cachcá, ndayá Bēngbe Bētsá tojayancá Crístoftaca bēngbiamá jamama, bēnga tempcá tśabá Bēngbe Bētsáftaca jtsemnama jtsamēse, puerte más tśabá endmēna, chē ndayá tempo chabe entśangbiamá jamama tojanašebuachená soyama. Ntśamo mora cha tojayancá puerte más tśabá entsemna, er tojašebuachená más tśabe soyēnga bēngbiamá jamama.

<sup>7</sup> Chē Bēngbe Bētsá natsana tojanašebuachená soyēngaca matēnjanopodé entśanga chamotsamama ntśamo yojanamncá, ntśamo tojanašebuachenacá jóyēngacñama, as ndoñe manjanēyta Bēngbe Bētsá cachiñe canye trato chauátsbemama entśangbiamá.

<sup>8</sup> Pero Bēngbe Bētsá tojáninýe ntśamo yojanamncá entśanga ndoñe tmonjanmama, ntśamo cha tojanašebuachenacá jóyēngacñama, y Bēngbe Utabná Bēngbe Bētsá chēngbiamá mēntśá tojánayana:

Canye tempo echanjóshjango, y chora Israel y Judabe pamillentsá entśangbiamá básefta soyēnga jamama chanjašebuachená, chēnga átseftaca tempcá tśabá jtsemnama chamotsobenama.

<sup>9</sup> Chē chanjašebuachená soye ndoñe queochátsmēna cachcá ntśamo chē chēngbe bēts taitanga sēnjanašebuachená soye enjamncá, atśe chēnga sēnjanēnatse ora, Egiptó luarocana sēnjésanēbuacna ora; pero chēngna, ntśamo jamama enjanamncá, chē sēnjanašebuachená soye jóyēngacñama ndoñe chemátanma causa, atśe cachcá chēnga sēnjesanēnyaya ca, Bēngbe Utabná tojánayana.

<sup>10</sup> Chē Israeloca entśangbiamá ndayá jamama canye tempo chentśana chanjašebuachená soye, mēntśá entsemna ca, Bēngbe Utabná tojánayana: Atśe chanjama chē chēngbe juabniñe chaitsemánda soyama chēnga chamotsejuabnama, y chamotseboše jtsamana ndayá chēngbe ainaniñe chaitsemánda soye.

Atśe chēngbe Bētsá chántsemna, y chēnga atśbe entśanga.

<sup>11</sup> Chē tempo ndoñe queochátsiyta cánýenga ínýenga chamotsabuátambama, cachabe luariñe oyanábioye o cachabe pamillentsá entśábioye, atśe chē chēngbe Utabná chašmotsábuatmama. Ndoñe queochátsēyta, er nyetscanga uámanēnga y nduámanēnga, corente tśabá atśbe šmochantsábuatma.

<sup>12</sup> Chēnga chanjálastemaye y chēngbe bacna soyēngama chanjáperdonaye, y ndocna te más chē bacna soyēnga chēnga tmojamama

quichátsjuabnaye ca —cha tojánayana.

<sup>13</sup>Bëngbe Bëtsá, chë entsangbiana mora jamama tojásebuachenama tojtsichamo ora, chca jtsemnana, er cha tojama chë tempo entsangbiana jamama tojanašebuachená soye, mora ya ndoñe chaondëtsosevénama; ndayá mo tanguá soycá tojtsemna y ya ndoñe tontsosevna, chë soyna nÿe batšatema más y ya jtsopochócana.

**Bëngbe Bëtsá jadórama muentša luare y chë celoca luare**

**9** <sup>1</sup>Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiana pormana yebnentše quem luarentše. <sup>2</sup>Chíyeca, Bëngbe Bëtsá tojanmandá chaotsemna canÿe jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiana yebnentše inauabaina “chë uámana luare ca”; chentše inamna chë canÿséfta quinÿenëfjuangá castellano candelerëšiñe, y canÿe mesésha ndayiñe yojacjana chë luarentše Bëngbe Bëtsá bétsemnana inÿinÿnaye tandëšënga.

<sup>3</sup>Inÿe ujonÿana entsëjua chentšana, inÿe luare inamna; inauabaina “chë más uámana luare ca”. <sup>4</sup>Chentše inamna chë castellano altar, inciense jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye quem soyënga inabomna:

canÿe castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entsangbiana chaótsatsama saná; Aaronbe varëfja, chë tojanantšëfjonëfja; y chë ndëtšbé tablëbenga ndayiñe Bëngbe Bëtsá tojanábema chë bnëtsana uámana mandënga. <sup>5</sup>Chë cajontema juatsboca inamna chë juatëngmiášha uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chéntšnaca bétsemnana. Chënga, chë juatëngmiášhangaca chë cajontëmentša nÿets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyëngama lempe jatóyëbuambnayama.

<sup>6</sup>Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. <sup>7</sup>Pero nÿe chë bachnangbe más uámana amëndayá yojobena chë inÿe luaroye jamashënguana, y nÿe canÿe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca. <sup>8</sup>Chca, chë Uámana Espiritu jamana bënga chašósertama, chë natsana luare cabá tojtsemnëntscuana y chë

bachnanga cabá chë soyënga chentše tmojtsamëntscuana, nyëtscanga cabá ndoñe tmonjanobená chë inye luaroye jamashnama, chë “más uámana luaroye”. <sup>9</sup>Chë soyéngaca jtsopodénana béngbioye jinyanjyana, chë tempo, chë Bëngbe Bëtsábioye jadórana yebnentše entsànga uta luare imojábomna ora, ndoñe yonjopodena Bëngbe Bëtsabe delante nyëtscanga jatsmënana, mo chë bachnangbe más uámana amëndayacá. Y chë soyéngaca jtsayanana, chë Bëngbe Bëtsabiana uátšëmbona soyéngaca y bachnanga tmojanóba bayéngaca, ndoñe tonjanopodé jamana canya Bëngbe Bëtsábioye adorayá, Bëngbe Bëtsáftaca tempcá tsábá chaotsatsmënana y Bëngbe Bëtsá chabe bacna soyéngama tbojaperdonama ainaniñe corente chaotsetatšëmbuama. <sup>10</sup>Chënga, chë uátšëmbona soyéngaca y tmojanóba bayéngaca tmojanma nye ntšamo Moisesbe leyine yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tsabe entsàngacá Bëngbe Bëtsabe delante jtsatsmënana; nyëtsca mandënga nye cuerpama, pero ainanama tondaye ntjamana. Pero chë entsànga chca yojánamna jtsamana, nye Bëngbe Bëtsá inye soyënga, más tsabe soyënga jamama tojamandantscuana, chë tsëm trato tojábema ora.

<sup>11</sup>Pero Cristo ya tojánabo, y cha yomna chë Bëngbe Bëtsabe delante béngbiana impadaná mo chë béngbe bachnangbe más uámana amëndayacá, chca, béngbiana chaotsemnama chë tsabe soyënga ntšamo mochjoyëngacñécá. Chë luare celoca ndayentše cha Bëngbe Bëtsabe delante mo bachnécá yotrabája,

puerte tsabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entsàngbiana jamama inajuabnycá. Chë luare ndoñe entsàngbe cucuátšëca yondëpormana, y chca jtsayanana, quem luarentša soye ndoñe yondmëna ca. <sup>12</sup>Cha, canye y nyëtsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbanëse, chabe buiñe juabuáshanëse, cha tojanma entsànga atsebácanënga jtsëmnama chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyëtsca tescama yomna tsabe vida jtsebomnama chamotsobenama.

<sup>13</sup>Ndëmuanjyënga ndayámncaca chë leyama tmojanoquedá mo chë Bëngbe Bëtsabe delante ndoñe tsábengcá, chë bachnanga imojuamana chëngbioye toronga y chivëngbe buiñe jabuéscacjana, y chë altaroca tcojajuinýe ternerabe jatinjýa chëngbioye jatbótotana, chca, chënga jábiamama Bëngbe Bëtsabe delante mo tsábengcá. Chca tmojamentšana, chë bachnanga tmojánayana chënga imojtsobena chë inyëngaftaca jabama, Bëngbe Bëtsá jadórana, y cachiñe mo tsábengcá Bëngbe Bëtsabe delante imojtsatsmëna ca. <sup>14</sup>Ndayá bachnanga tmojanmcá yojánamana entsànga cachiñe mo tsábengcá Bëngbe Bëtsabe delante imojtsatsmëna ca jayanama; y chca, chë inyëngaftaca Bëngbe Bëtsábioye jadórana tmojanobenase, intsachetšá más yojsámama Cristbe buiñe, ndëmuanjyëye tojanábuashana



bëngbiana cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsobomñama cachcá tojanonýa y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canýe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebonnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservénëse.

<sup>15</sup> Chíyeca, Cristo jóbanëse tojama entšanga Bëngbe Bëtsáftaca cánýiñe mo canýacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebonna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

<sup>16</sup> Ntšamo canýe testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama.

<sup>17</sup> Canýe testamento tondaye ntsámanana, chë chca jamama tojašbuachená cha cabá ainá

totsomñëntscuana; nýa cha tojóbanana orna aiñe. <sup>18</sup> Chíyeca chë Bëngbe Bëtsabe natsana trato, entšangbeñe tojanobojatšé, chora tmojanóba bayëngbe buiñe jabuéšcjëse. <sup>19</sup> Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshëca enajuabnëyiñe tojanfchecuacuá, y chora chë leyënga librëšañe tojanbuéscacja, y nyetsca entšangbeñnaca. <sup>20</sup> Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnama, y tšëngaftangbiana puerte yochtsámanama ca.”

<sup>21</sup> Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoserverna. <sup>22</sup> Er ntšamo leyiñe iuayancá, yojtsemna nýa mo nyetsca soyënguiñe buiñe jabuéscacjana, Bëngbe Bëtsábioye jadórama tšabá chaoserverna; y buiñe ndoñe tonjuábuashanësa, ndoñe ntsopodénana entšanga bacna soyëngama perdonánënga chamotsemnama.

**Cristo jasúfriase y jóbanëse,  
tojanma entšanga bacna soyëngama  
perdonánënga chamotsemnama**

<sup>23</sup> Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoserverna, chë Bëngbe Bëtsábioye jëtschuayama tmojóba bayëngbe buiñëca. Chë soyënga batsatema jtsinýanýanayana ntšamo chë celoca luare yomnana

Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše inmëtsama soyëngama. <sup>24</sup> Er Cristo ndoñe tonjánamashëngo canye luarentše Bëngbe Bëtsá jadórama nye entšangbe pormánentše, ndaye luare nye batšatema jtsinýanýnayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiama jtseimpadánama. <sup>25</sup> Chë bachnangbe más uámana amëndayana chë “más uámana luaroye” jamashënguana canye cada uata, bayëngbe buñeca, ndoñe cachabe buñeca, chca, ndayánaca jamama entšanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentšana jtéseboncama, y chabe buñe juabuáshanëse cachiñe jatóbanama, y ba soye cachcá chauëtsemnana. <sup>26</sup> Chca tojtsemnëse, Cristbiama manjanmëna jasúfriana y jóbana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonýinyé quem luarentša entšanga bacna soyënga jabuajuánama, chëngbiama jóbana, mo entšangbe bacna soyëngama canye tmojóba bayá, Bëngbe Bëtsábioye uatšëmbonacá. <sup>27</sup> Cachcá, ntšamo nyetsca entšanga jtsamnana nye canye jóbana, y chentšana Bëngbe Bëtsá chëngbiama

jayanana chë imojëtsiyenëntscuana ntšamo tmojanmcá tšabá o ndoñe tšabá bëtsemnana, y chëngaftaca jamana ntšamo chora tojajuabocá, <sup>28</sup> cachcá, Crístnaca, nye canye chabe derecho vida jtsobomñama cachcá tojanonýá, chabe buñe juabuáshanëse jóbana, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

**10** <sup>1</sup> Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inye soyëngaca, ndoñe ntsinýanýnayana lempe chë Bëngbe Bëtsá chabe entšanga jatsatayana puerte tšabe soyënga, pero añe batšatema jtsinýanýnayana ntšamo chë soyënga yochtsemnana. Chíyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnana. <sup>2</sup> Er ndayá tcojtsamama Bëngbe Bëtsabiama uatšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnana matmëñanobenase, chënga chë bacna soyënga tmojanmama ainaniñe ngmënaca y ndoñe mamëñjëtsemna, y matmëñsanajbaná soyënga amana chë tmojóba bayëngaca. <sup>3</sup> Pero juatšëmbonama entšanga bayënga tmojóba ora, josérviana

entšanga bacna soyënga tmojamama cada uata chamuatenójuaboma; <sup>4</sup>er chë toronga y chivënga tmojóbanëngbe buñëca ndoñe ntsopodénana entšángbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntšá tbojanianyana:

Ndoñe tconjábošena entšanga chacmátšëmbona soyënga, ni tmojobaye bayënga, pero aiñe tcojama atše canye entšacá chaitsemnama.

<sup>6</sup> Ndoñe tšabá quecmátinýana chë tmojóba y tmojajuinýé bayënga, entšanga bacna soyëngama chacotsaperdonama.

<sup>7</sup> As atše Bëngbe Bëtsá sënjanianyana: “Bëngbe Bëtsá, muentšë séntsemna, ntšamo aca icobošcá atše chaimama, ntšamo acbe uabemana palabrenguñe atšbiamá endayancá, chë ndayá atše chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjanínýnana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýé bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyíñe uiayancá ndayá chënga jamama yojsamna. <sup>9</sup>Y chentšana, Cristo Bëngbe Bëtsábioye tbojátaniyana: “Muentšë sënjabo, chë ntšamo aca icobošcá atše chaimama ca.” Chca, Cristo tojinýanyé chë jtsamana soyënga tmojóba bayëngaca, tondaye yonduámama entšanga bacna soyënga

jabuajuánama, y entšangbe bacna soyëngama jóbanëse tojaninýanyé chë ntšamo Bëngbe Bëtsá yobošcá jtsamana, más iuámama chë inye soyënga játamama. <sup>10</sup>Bëngbe Bëtsá tojama, bënga chabe entšanga y chabe delante tšábenga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbanëse, canye y nyetsca tescama.

<sup>11</sup>Judiëngbe nyetsca bachnanga nyets tempo ba soye altarentšë natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama.

<sup>12</sup>Pero Jesucristo entšangbe bacna soyëngama tojanóbana ora, yojamna mo canye tmojóba bayacá, Bëngbe Bëtsá entšanga bacna soyëngama cháuaperdonama; nye canye y nyetsca tescama chca tojanma, y chentšana Bëngbe Bëtsabe catšbioica tojtantóbema, canye uámama puentestšë, jtsemándayama. <sup>13</sup>Chentšë cha yobátmana, Bëngbe Bëtsá chabe obenánaca Cristbe uayayënga chabe cucuatšíñe chamoquedama yochjamëntscuana. <sup>14</sup>Er nye canye, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábënga jtsemnama chëmbonënga, chabe delante nyetsca tescama tšabengcá chamotsemnama. <sup>15</sup>Y Uámama Espíritnaca, Bëngbe Bëtsabe uabenana palabrenguñe šontsinýanyé chca ndegombre bëtsemnama, mëntšá tojánayana ora:

<sup>16</sup> Ndayá entšangbiamá chjama, canye tempo chentšana chanjašebuachená soye mëntšá

entsemna ca, Bëngbe Utabná  
tojánayana:

Atše chanjana chënga  
chamotseboše jtsamana ndayá  
chëngbe ainaniñe chaitsemánda  
soye,  
y chamotsejuabnama chë chëngbe  
juabniñe chaitsemánda soyama  
ca.

<sup>17</sup>Y chentshana mëntšá tojánayana:  
Ndocna te más quichátsjuabnaye  
chënga bacna soyënga  
tmojamama,  
y ntšamo atše tsebošcá contra  
soyënga chënga tmojamama ca.

<sup>18</sup>Chcasna, Bëngbe Bëtsá nyetsca  
tescama entšanga bacna soyëngama  
tojaperdoná ora, ya ndoñe ntjásiytana  
inÿe soyënga más játamama, mo  
bayënga cuafjobaycá, entšanga  
bacna soyëngama perdonánënga  
chamotsemnama.

### **Sontsamna Bëngbe Bëtsábioye jtobéconana**

<sup>19</sup>Y chca, Jesucrístbeyeca catšátanga,  
Jesusbe buiñe tojanábuashanama y  
bëngbiana tojanóbanama, chábeñe  
jtsošbuáchiyëse, bënga montsobena,  
tondayama ntjatauatjácá Bëngbe  
Bëtsabe delante jamashënguama.

<sup>20</sup>Bënga montsobena jamashënguama  
chë tsëm benachëjana, Cristo  
bëngbiana tojamëjana; cha nda  
inétsama chë nyetsca tescama yomna  
tšabe vida chamotsebomnama. Mo chë  
quem luarentše chë bachnangbe más  
uámána amëndayacá, chë ujonÿana  
entšëjuajana jamashënguana chë “más  
uámána ca” uabaina luaroye, Bëngbe  
Bëtsabe delante jtsemnama, cachcá,  
Cristo bëngbe bacna soyëngama mo  
entšacá tojanóbanayeca, bëngnaca  
montsobena Bëngbe Bëtsabe delante  
luaroye jamashënguama. <sup>21</sup>Bënga

mondombna canÿe bëts bachnangbe  
más uámána amëndayá, Bëngbe  
Bëtsabe entšángbeñe jtsamándayama,  
y cha endmëna Jesús. <sup>22</sup>Chíyeca,  
Bëngbe Bëtsá jaserviama ndegombre  
ainaniñe corente jtsebošëse, y chábeñe  
puerte jtsošbuáchiyëse, šontsamna  
Bëngbe Bëtsábioye jobéconana.  
Ntšamo chë bachnángbioye buñëca  
tmojanabuešcaccjá, Bëngbe Bëtsabe  
delante tšabengcá chamotsemnama  
cha jaserviama, cachcá, Cristbe  
buiñe juabuáshanëse y bëngbiana  
jóbanëse, bënga ainaniñe corente  
montsetátšëmbo Bëngbe Bëtsá nyetsca  
tescama bëngbe bacna soyëngama  
šojtsaperdonama. Y bënga béjayeca  
uabainéngnaca mondmëna; chíyeca  
bënga jtsobenana Bëngbe Bëtsábioye  
chca jobéconana.

<sup>23</sup>Bënga šontsamna nyets  
tempo Bëngbe Bëtsábeñe puerte  
jtsošbuáchiyana, y ndocna te nÿe  
ndayámnaca játajbanana entšángbeñe  
ichámuana, chë Bëngbe Bëtsábeñe  
jtsošbuáchiyëse bënga imobatmana  
soyënga cha yochjamama, er chë  
soyënga šojašëbuachená cha, sempre  
jamana ntšamo tojayancá. <sup>24</sup>Bënga  
šontsamna janguanguana ntšamo  
muatjobenaye añemo jenatšëtayana,  
nyetscanga jtsenbobonshánana, y  
ntšamo tšabá yomncá jtsamana;  
<sup>25</sup>pero ndoñe quešnátamna  
játajbanana, Bëngbe Bëtsábioye  
jadórama enefjuanana mo Cristbeñe  
ošbuáchiyënga quetsomñëcá, ntšamo  
báseftanga imojtsamcá. Chamna,  
nyetscanga añemo mochtsenatšëtnaye  
Cristo nyets tempo jtseservénama, y  
más mora, chë ndayá imojtsonÿama,  
Bëngbe Utabná yochjésabama ya  
yojtsobecuama montsetátšëmbo ora.

<sup>26</sup>Er chë ndegombre soyëngama  
tšabá tmojátatšëmonentšana y chë

soyënga tmojoyeuná chentshana, bacna soyënga jtsamëse tmojtsiyena, nÿe chca jamama tmojtseboše causa, muattsaboté ndayá Cristo bëngbiana tojanmcá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama. <sup>27</sup>Y chca, ndayá bënga muattsobena jobátmana soye nántsemna nÿe chë Bëngbe Bëtsábicana castigo, chë ndayama šojtsamna uatjana jtsebomnana; y nÿe jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñesheca yochtsapochóca. <sup>28</sup>Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entšábioye jtsóbana, tondaye ntjalastemacá. <sup>29</sup>Canÿa, nÿets ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe, chë ndémuanÿeye tojanábuashana bëngbiana tojanóbana ora, tondaye yonduámana ca, ndayá nÿe ndaye entšabe buiñá ca, chë buiñe chë ndémuanÿeye šojtsinÿanÿná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entšanga šojábiana, cha jaserviama; chë entšá Uámana Espíritbioye tbojóyenguango, nda inétsama bënga tšabe soyënga chamotsebomnama; y canÿa chca amá, ítšëngaftanga ndoñe šmontsejuabná cha ibojtsomerecena Bëngbe Bëtsábicana canÿe puerte más uabouana castigo, chë Moisesbe leyama tondaye yondovalena ca tojayanabiama? <sup>30</sup>Bënga nÿetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínÿenga chamosufrima

tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbiana echanjayana ntšamo tmojëftsemcá tšabá o ndoñe tšabá bëtsemnana, y chëngaftaca echanjama ntšamo chora chaojajuabocá ca.” <sup>31</sup>Ítša uabouana, Bëngbe Bëtsá chë nÿets tempo ainabe cucuatšíñe joquédana, castiganá jtsemnana!

<sup>32</sup>Pero ntšamo tempo yojamnama šmochtsenójuabnaye, chë ndegombre soyënga Jesucristbiana cabá chora šmonjanábuatmana ora, y chora tša jenojuérzana cmonjanotocá padecena soyënguiñe, y chë causa tša šmojansufrí. <sup>33</sup>Báseftanga tšëngaftanguentšëngbioye entšangbe delante tcmojanoyánguango, y ínÿenga tmojanma puerte chašmotsesufrínama; y ínÿenga tšëngaftanguentšënga chca imojansufrinëngaftaca šmojanama, chënga jujabuáchama. <sup>34</sup>Tšëngaftanga šmojánalastemana chë chënguentšënga cárceloye imojanëtámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatšëmbona Bëngbe Bëtsábicana más tšabe soyënga šmojtsebomnama, chë nÿetsca tescama šmochtsebomna soyënga. <sup>35</sup>Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobatmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábicana chašmotsebomnama. <sup>36</sup>Tšëngaftanga cmontsamna corente uantadënga jtsemnana, padecéniñe chašmojtsachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá

Bëngbe Bëtsá tojanašebuachenacá chašmóyëngacñiama. <sup>37</sup>Er Bëngbe Bëtsabe uabemana palabrenguine cha mëntsá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

<sup>38</sup>Nye chë ndabiama atše chajjama atšbe bominyiñe tsabia

chaotsemnama,

átšbeñe cha betsošbuáchema,

cha ndegombre chë nyetsca

tescama yomna tsabe vida

echántsebomna;

pero uatjana causa, átšbeñe

ošbuáchiyana tojtsajbanase, atše

cháftaca ndoñe quichátoyejuaye

ca —cha tojánayana.

<sup>39</sup>Pero bënga ndoñe quemátmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnama imojtsajnënga; pero aíñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácánënga jtsemnama mochjashjáchënga.

### Bëngbe Bëtsábeñe

#### ošbuáchiyana jtsebomnana

**11** <sup>1</sup>Ošbuáchiyana jtsebomnana endmëna corente jtsetatšëmbuana, ndayá tmojtsobatomancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnama. <sup>2</sup>Bëngbe Bëtsá tojánayana bëngbe bëts taitanga tsábá imojánama ca, chënga chábeñe imojtsošbuachéyeca.

<sup>3</sup>Bënga, Bëngbe Bëtsábeñe mondošbuachéyeca, mondéatšëmbo cha quem luare y nyetsca luarënga tojanmama, chca chaotsemnama cha

tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentšana.

<sup>4</sup>Abel Bëngbe Bëtsábeñe vojanošbuachéyeca, oveshatémënga chábioye tbojanátšëmbona, y chë soye Bëngbe Bëtsabiama más tsábá yojtsemna, chë ndayá Caín, chabe catsata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominyiñe tsabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe vojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup>Enoc Bëngbe Bëtsábeñe puerte vojanošbuachéyeca, Bëngbe Bëtsá celoye tbojesanbëtšëñe, ntjobancá. Chentšana ndocná tonjanobená cha jtsinyenana, Bëngbe Bëtsá tbojesanbëtšëñe causa. Y Bëngbe Bëtsabe uabemana palabrenguine endayana, Bëngbe Bëtsá Enócaftaca oyejuayá canjamna ca, ntšamo jtsamëse vojoyenama, y chentšana celoye tbojtsanámbañe. <sup>6</sup>Pero Bëngbe Bëtsábeñe ntsošbuachiyáca, ndoñe quenátopodena cha oyejuayá béngaftaca jabemama, er chábioye jobéconamna, entšá jtsemnana jtsosbuáchiyana cha ndegombre bëtsemnama, y cha inétsamama chë cha jtsabuatmama tsá tmobošëngbiama bëtsca tsabe soyënga chamotsebomnama, mo chábiocana uacanana soyëngcá.

<sup>7</sup>Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe vojanošbuachéyeca, tojanma

ntšamo Bëngbe Bëtsá tbojanmandacá y barquésa tojanapormá chabe pamíllanga játsebacama. Cha chca tojanma ora, ošbuáchiyana bómnayeca, cha tojaninýanyé entsanga tša bacna soyënga tmojanmama y chë causa castigánënga jtsemnama yojtsamnama. Chabe ošbuachiyánacna Noé tojánashjache Bëngbe Bëtsabe bominýiñe tšabia jtsemnama, y chca entšá jashjáchana, nye Bëngbe Bëtsábeñe jtsošbuáchiyëse.

<sup>8</sup>Bëngbe Bëtsá Abrahámioye tbojanchembo, inýe luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatsetayama luaroye, masque Abraham ndoñe yontsetátšëmbo ndémoye yochjánama. <sup>9</sup>Bëngbe Bëtsábeñe yojanošbuachéyeca, yojobena mo inýe luarocana ashjanganacá jtсийenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguñe yojoyena, cachá ntšamo chë chábéntšana básenga Isaac y Jacob ibojéftsiyecá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámioye tbojanšbuachenacá. <sup>10</sup>Er Abraham corente uantadá yojanobátmana chë canýe luaroye celoca jamashënguama tempo; chë luare inamna canýe bëts pueblo, puerte tšabe ucuatjoniñe pormana pueblo, canýe luare chë ndayentšama Bëngbe Bëtsá tojanjuabó ntšamo chaotsemnama, y cachabe pormana luare inamna.

<sup>11</sup>Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canýe šëšona chabotsebomnama, masque chora

ya bëtsanánëjema yojtsemna, šëšona jtsebomnama. Bëngbe Bëtsá chca tojanma, er Sara corente yojanjuabná, cha chë canýe šëšona yochtsanbomnama tbojanšbuachená cha, nyets tempo ntšamo tojayancá amá yojamna ca. <sup>12</sup>Y chca, quem entšá Abraham, chë šëšonga jtsabamnama ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar béjayoca chënyañentša cascajca, ndocná jacúntama ntjobenayana.

<sup>13</sup>Nyetsca quem entsanga imojéftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojanayana quem luarentše chënga imojoyena mo cachëngbe luarentše ndoyëngcá, y quem luarëjana mo nye achñëjuanëngcá ca. <sup>14</sup>Y chca tmojtsichámëngna, puerte jtsinýanýnayana chënga tša imojtseboše inýe luaroca joyénanama, canýe luare cachëngbiamá. <sup>15</sup>Chënga nye chë ndayentšana tmojéftsanbocna luarama manjánjuabnase, matmënjanobená tšabá cachoye jesshéconama. <sup>16</sup>Pero chëngna canýe más tšabe luare inmaboše, canýe luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canýe bëts luare, mo canýe bëts pueblécá chëngbiamá tojanprontá.

<sup>17</sup>Bèngbe Bètsá Abrahámioye jin'yama, ndegombre a'ñe o ndoñe Bèngbe Bètsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jètschuayama, ntšamo Abraham chë tojóba bayéngaftaca jamama yojanamancá. Cha Bèngbe Bètsábeñe yojanošbuachéyeca, yojtseprontana chë n'ye can'ye uaquiñá ibnabomná jóbama, Bèngbe Bètsábioye jètschuayama, masque Bèngbe Bètsá mēntšá tbojanšbuachená: <sup>18</sup>“Chë ácbentšana entsānga n'ye Isaacbiajana mochanjabo ca.” <sup>19</sup>Abraham corente yojanjuabná y yojátatšēmo, Bèngbe Bètsá ndegombre obenana bomná bétsemnama, chë obanēnga chámuatayenama jamama. Chíyeca, Bèngbe Bètsá Abrahámioye tbojtsanauyaná Isaac jóbama ora, yojamna mo Abraham obanēnguentšana chábioye cuaftoyēngacācá. Y chca, ntšamo Isaácaftaca tojanopasacá, batšá yojtsin'yan'ynaye ntšamo Jesucristoftaca yochjanopasacá.

<sup>20</sup>Isaac Bèngbe Bètsábeñe yojanošbuachéyeca, Bèngbe Bètsábioye tbojanimpadá chabe uaquiñáatbiama, Jacob y Esaú, bētsá tšabe bendicionēnga chabotsebomnama, chë joshjanguama tempēnga ora.

<sup>21</sup>Jacob Bèngbe Bètsábeñe yojanošbuachéyeca, ya jóbana ora, tbojanimpadá cada ona chë Josebe básengbiana, Bèngbe Bètsá chaoma bētsá tšabe bendicionēnga chamotsebomnama. Cha chca tojanma, jotsejbénase Bèngbe Bètsábioye jadórana, y chabe jatjonēfjiñe tshanánoca jojuáchase.

<sup>22</sup>José Bèngbe Bètsábeñe yojanošbuachéyeca, ya jóbana ora, tojánayana más chcoye

chë Israeloca entsānga Egipto luarentšana mochjēftsanbocna ca, y tojēftsanmandá ndayá jamana chabe óbana cuérpoca.

<sup>23</sup>Moisesbe bētsétsata Bèngbe Bètsábeñe ibojanošbuachéyeca, cha tojanon'yná ora, unga shin'yēntscuana cha tmojtsaniytēme, er chata tbojánin'ye cha can'ye botamana bāsetema bétsemnama, y ndoñe tbonjanēuatjaná chë reybe mandama, chë n'yetsca judiēngbe basetēmēnga boyabāsetemēnga jtsébáyana.

<sup>24</sup>Moisés Bèngbe Bètsábeñe yojanošbuachéyeca, ya bētsá yojtsemna ora, ndoñe tonjánbošena chë Egiptoca reybe bembēbe uaquiñacá chamotsábuatmama. <sup>25</sup>Chamna, tojánbošena cha jasúfriama ín'yenga chamotsamama, cán'yiñe chë Bèngbe Bètsabe entsāngaftaca, y ndoñe n'ye baseftayté tšabá jatsmēnana, bacna soyēnga jtsamēse, ntšamo cachá tojtsejuabnacá, n'ye cachá tšabá jtsomñama. <sup>26</sup>Chamna, cha yojanjuabná, chë padecena soyēnguiñe jasúfriana ntšamo Cristo tojansufricá, más tšabá yojamna chë Egiptoca uámana soyēngama, er cha Bèngbe Bètsábeñe jtsošbuáchiyēse chábeñe yojanobátmana, ba tšabe soyēnga mo can'ye uacanana soycá cha ibochjanatšetayama.

<sup>27</sup>Bèngbe Bètsábeñe yojanošbuachéyeca, Moisés Egiptocana tojēftsanbocna, chë luarentša rey cháftaca chábuetnama ntjatauatjca. Cha ainaniñe n'yets tempo añemo yojtsebomna, y chca yojánin'ya mo chë ndocná jin'yama tondobenacá, Bèngbe Bètsábioye cuaftsonyáca. <sup>28</sup>Bèngbe Bètsábeñe yojanošbuachéyeca, ntšamo Bèngbe Bètsá tbojanmandacá, Moisés chë judiēnga tojanabuayená Bashco fiesta



jamama, y chë Israeloca entsángaftaca yebnëngoye amashjuaniñe buñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaqiñënga ndocá chaondámama.

<sup>29</sup> Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuafstomñcá; chentšana, chë Egiptoca entsanga cachcá jamama tmojánbošena ora, nyetscanga chiyiñe tojtsanatajo.

<sup>30</sup> Israeloca entsanga Bëngbe Bëtsábeñe imojanošbuachéyeca, chë Jericó bëts pueblentša tapišënga shéconana canýsëfta tentscuama chënga imojánajntensana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínýengaftaca, chë bëts pueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentsana ichmónënga tšabá tojanébuaja, chë jarrepárama tmojánanga ntšámose chë luarentše oyenënga jáyëñjanama jobenayama.

<sup>32</sup> Atše sentsobena bangbiama más jóyebuambayama, Bëngbe Bëtsábeñe ošbuáchiyëngbiama, pero luare šattsëshbe chcangbiama jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayëngcá. <sup>33</sup> Chënga Bëngbe Bëtsábeñe imojanošbuachéyeca ínýengbe mandadëngbe entsángbioye tmojanayëñjaná, bëtscá imojánama nyetsca entsángaftaca ntšamo tšabá yomncá jtsamama y nyetscanga cachcá chamotsámanama, ndayá Bëngbe

Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsëmna ora, chënga chamuatenáyebengoma, chentšana báseftangbioye ndocá chamondámama. <sup>34</sup> Ošbuáchiyana bómnyeyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadéjaca jobanámentšana; ya tondaye añemo béntsebmna ora, Bëngbe Bëtsá tojanma bëts obenana y puerte añemo chamotsebmnama; tmojánashjache bëts obenana jtsebmnama ínýenga jáyëñjanama, chëngaftaca imojtsentsjaná ora; y tmojanobená ínýe mandadënga y chëngbe soldadënga jáyëñjanama, chamotsachetama jamëse.

<sup>35</sup> Ošbuáchiyana bómnyeyeca, básefta shembásenga chëngbe óbana pamíllangbioye cachiñe ainënga tmojtananýe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeyeca, ínýenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nyetsca tescama yomna tšabe vida jtsebmnnana, y ndoñe nýe chë jótsbocana batsatema más vida jtsebmnnama.

<sup>36</sup> Ošbuáchiyana bómnyeyeca, ínýenga corente tmojansufrí, ínýenga chëngbioye tmojanoyánguango ora y tmojanatsetšená ora; y ínýenga tmojansufrí y cárceloye cadenëjuangaca utámenënga joquédamnaca. <sup>37</sup> Inýengbioye ndëtšbéngaca tmojtsanatëchénganja, serruchéshaca tmojtsanätëjtacacaye, espadéjaca tmojtsanëbaye. Inýenga imojánajna cánýentšana ínýecnoye

nÿe oveshá y chivêbe bobáchea uichétjonënga, ujabótënga, ainana tsetšanënga, y ínÿengbeyeca mocá borlánënga. <sup>38</sup> Chê nÿe quem luarama enójuabnayënga ndoñe monjanomerecena chënga méngaftaca jtsiyenama, chënga chê vida imojábomna cánÿentšana ínÿecnoye aniñe, entšanga ndoyena luarënguenache, tjañenache, fshantsiñe atëbëfjniñe y cuevëshënguïñe.

<sup>39</sup> Nÿetsca quem entšanga, ndëmuanyëngbiana muentše tmonjoyebuambá, Bëngbe Bëtsá tšabá chëngbiana tojánayana, ošbuáchiyana imojánbomna ca; pero ni canÿa chënguentsá tonjanóyëngacñe, ndayá Bëngbe Bëtsá chëngbe entšanga jatšatayama tojanašebuachenacá, nÿetsca tescama jtsebomnama.

<sup>40</sup> Bëngbe Bëtsá, bëngbeñe jtsejuabnayëse, tojanjuabó canÿe más tšabe soye bëngbiana jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñe.

**Bënga mochtsejuabnaye ndayá Jesús tojanmama**

**12** <sup>1</sup> Chíyeca, bënga mochtsejuabnaye ba entšangbiana, chê bëngbiana más natsana imojaniyënga, ndëmuanyënga puerte tšabá bënga jtsinÿanÿnayana ntšamo ndegombreyomnana Bëngbe Bëtsábeñe ošbuáchiyana jtsebomnana, mo chënga ndayá bënga tmojtsamama cuaftsonÿangcá. Chcasna, mo chê tmochamanëngcá, ínÿengaftaca jenëÿÿëñjanama, chê jashjanguama tojtsemna luaroye natsana jashjanguama, chënga jotjajuamna,

chê chorscama nduaserverna entsáyá jtsenátsejcana, y lempe ndayá tojtsama más uenana chamotjajuama soyëngnaca jtsenójacana; bëngnaca cachcá, ndoñe matjaleséncia bënga Crístbioye ndoñe tšabá ndëtsooservénama, ni chê bacna soyënga jamama juabnënga, chê bëngbioye paselo jáÿënjanama juabnënga cachcá chamotsamama. Chamna, šontsamna sempre Bëngbe Bëtsá jtserservénana, puerte uantadënga jtsemnëse masque padecena soyënguïñe tmoyena, bënga chamobená chê trabajo jamama, chê ndayama Bëngbe Bëtsá šojáchembo. <sup>2</sup> Jesusbiana mochtsejuabnaye, nda šuebënatsana bënga ošbuáchiyana chamotsebomnama, y šuinÿanÿná ntšamo nÿets tempo nÿetsca soyënguïñe Bëngbe Bëtsábeñe jtsošbuáchiyama. Cha chê cruzoca jóbanama sufrínana lempe tojanoboyá, er cha yojanobátmana chê chentšana yochtsanbomna bëts oyejuayánama; y yojanjuabná, chê más bacá uamana entšangcá jóbanana, chabiana ndoñe canÿe uamana soye yonjamna ca; y chentšana chê uamana puestentše tojtanoítbema, Bëngbe Bëtsabe catšbioica, jtsemándayama.

<sup>3</sup> Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chê bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiana oservëniñe ndoñe chacmondëumantšema, ni ainaniñe añemo jtsebomnana ndoñe chašmondájbanama. <sup>4</sup> Tšëngaftanga padecena soyënguïñe šmojachnëngo, entšanga bacna soyënga imojtsama causa, pero méntsoñama ndoñe cmontsamna jóbanama, Crístbe

soyëngama enojuerzániñe; <sup>5</sup> y tcmojtsébnëtjomba ndayá Bëngbe Bëtsá tsëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguine mëntśá endayana:

Atśbe uaqiñá, Bëngbe Utabná aca jábuayenama tojtseboşe ora, aca jasúfriase y padecena soyënga jauántase,

chora ndoñe catjásjuabnaye chiñe mo canye nduámana soye cuaftsemncá;

y cha chacmojuácacana ora, ndoñe cattsjabaná ainaniñe añemo jtsebmomnana.

<sup>6</sup> Er Bëngbe Utabná jábuayenana nda cha tbobobonshanábioye, y jacastígana chë mo chabe uaqiñacá tbojofjábioye ca —chiñe endayana.

<sup>7</sup> Padecena soyënguine chaşmojtseufrina ora, şmochtsejuabnaye chë soye yojtsemna tsëngaftangbioye jábuayenama, y chca, Bëngbe Bëtsá tsëngaftangaftaca jtsamana mo chabe básenga quetsomñecá. ¿Nderado nántsemna canye uaqiñá, y chábioye chabe taitá ndocna te buanjuácacana, más tsábá chaotsamama? <sup>8</sup> Nderado Bëngbe Bëtsá tsëngaftanga ndoñe tcmonjabuayená, ntşamo nyetsca chabe básengaftaca cha endbetsamcá, as tsëngaftanga ndoñe ntsemnana ndegombre chabe básenga. <sup>9</sup> Y bënga básenga monjamna ora, bëngbe bëtsétsanga quem luarentşe monjanamana bënga jácastigana, y bënga chëngbioye ndoñe stëtşoye ntjaquédana. Y mora, bënga más şontsamna, jtsobedecénana y más bëts respeto jtsebmomnana celoca Bëngbe Taitabiama, nda tojama entşanga espíritu chamotsebmomnana, y chca,

bënga tsabe vida chamotsebmomnana.

<sup>10</sup> Bëngbe bëtsétsanga quem luarentşe, nye bášefta tescama, bënga jëftsabuayinyana, y chca jamana chënga tsábá tojtsinyana ora; pero Bëngbe Bëtsá bënga şojtsabuayiná ora, sempre chca jtsamana bëngbe tsábiamama, bënga chabe entşanga jábiamama, cachacá puerte tsábenga, ntşamo cha nyets tempo yomncá.

<sup>11</sup> Sempre bënga ndaye castigo tmojtsebmomna ora, chora bënga chama ndoñe oyejuayënga ntsemnana, pero añe cochtsetşenánënga. Pero bënga chë castigüentsana tmojuatsjinye ndayá Bëngbe Bëtsá chë sóyeca tbojtsabuayinacá, as chentsana jóbocnana natjémbana oyenana, nyetsca soyënguine ntşamo tsábá yomncá jtsamëse.

**Bëngbe Bëtsábioye  
jtsabotena, entşangbiamama  
ndoñe tsábá ntsemnana.**

<sup>12</sup> Mo nda puerte uamëntşnayacá, jatrabájama tondaye añemo ntjtsebmomncá, tsátşena buacuatsëngaca y puerte uamëntşena ntsamiasëngaca, tsëngaftangbentşe bášeftanga ya uamëntşnayënga şmojtsemna Bëngbe Utabnabiama trabájayíñe, y ainaniñe ndoñe añemo şmontsebmomna. Cachiñe bëts añemo şmochtishache, y Bëngbe Bëtsabe obenana cachiñe şmochtsatsbmomna. <sup>13</sup> Mo chë canye benache tsábá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tsábá jtsatanama chamuatatsjinyama, y chë benachentsana ndoñe chamondëtsebmocanama; cachcá tsëngaftanga, chë bëtscá oşbuáchiyana y Cristo jaserviama corente añemo şmobomnënga, chë nye batsatema

ošbuáchiyana y chca jatrabájama nýe tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinýañiyëse, y ntjalesenciácá ndocna soye chaotsama chë tšabe benachentsana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nyetscángaftaca natjémbana jtsiyenama, y ntšamo Bëngbe Bëtsabe entsanga mondbetsamcá jtsamëse chašmotsiyenama, cha jtseservénëse; er chca ntjamcá, canýa ndoñe ntsobenana Bëngbe Utabnábioye jinýama. <sup>15</sup> Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entsángbioye yochjatšataye tšabe soyënga chënga ndoñe chamondashjache. Šmochtsantješna, tšëngaftanguentše ndocná chaondëtsemna, mo canýe untja tbëtëjcá, chë chcaja sayëngbioye jásoçayana, nda chaotsama, ínýenga natjémbana ainana ndoñe chamondëtsebonnama y bacna soyënga jtsamëse chamotsiyenama. <sup>16</sup> Yejuana šmochtsantješna ndocná tšëngaftanguentše shembása o boyabásaftaca bacna soye amá chaondëtsemnama, ni canýa ndabiama Bëngbe Bëtsabe soyënga tondaye chaondëtsámama. Esaú chca tojanma, chë lempe yochjanashjachcá, mayor uaquiná bëtsemnama, chabe uabentsábioye canýe šcnena sanama tbojtaname ora. <sup>17</sup> Y tšëngaftanga šmondëtátšëmbo, chca tojanopasá chentsána, Esaú tojánbošena chabe taitá Bëngbe Bëtsábioye chaboimpadama, chabiama tšabe bendicionënga chaomama, chë mayor uaquiná bëtsemnama yojanobena

jtsebomnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsoapasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tšëngaftanga ndoñe chešmatobeconá, mo chë entsanga Israeloca Sinái ca uabaina tjoye tmojanobeconacá, ndayá chënga imojobena jabojuuama, y íñeshca yojtsángbototjuana, tondaye binýniñe luare, tša ibetiñe y puerte jabuache binýiëngaca; <sup>19</sup> ni chešmatuena chëngcá, canýe trompetéffjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama. <sup>20</sup> Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canýe bayá chaotsomñe, entsemna chana ndëtšbéngaca chamotsatëchënjanga jtsóbama ca.” <sup>21</sup> Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša šontsengmëmná auatjananá séntsemna causa ca.”

<sup>22</sup> Pero tšëngaftanga Bëngbe Bëtsábioye šmojobeconá, y chca endmëna mo tšëngaftanga canýe Sión ca uabaina tjoye celoca cuafjobeconacá, chë Bëngbe Bëtsá nyets tempo vida bomnabe bëts puebloye, mo celoca Jerusalén cuenta; y ba uaranga angeléngbioye šmojobeconá, cánýiñe oyejuayënga enefjuanënga imojtsemnéngbioye, Bëngbe Bëtsá jtsatschuanayama. <sup>23</sup> Endmëna mo

tšëngaftanga chë Bëngbe Bëtsabe entšángbioye cuafjobeconangcá, chentšë enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jýyëngacñama, ndëmuanýënga Bëngbe Bëtsá chabe librëšañe tojúbiam. Tšëngaftanga šmojobeconá Bëngbe Bëtsábioye, ntšamo nyetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tšëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëtsiyenëngbe espiriténgbioye, chë entšanga ndëmuanýëngbiam Bëngbe Bëtsá tojanma chamotsemnama lempe ntšamo chabe entšangbiam yojanjuabnacá, chca, cháftaca sempre vida jëftsebomnama. <sup>24</sup>Tšëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiam cha tojanóbana ora tojanábuashana buiño ye tšëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéscacjama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesúsbe buiñeca, bënga montsobena atsebácanënga jtsemnama.

<sup>25</sup>Cuedado šmochtsebomna, bëngbioye tojtsoyebuambná ora cha joyeunayama. Chë Israeloca entšanga

ndoñe tmonjánbošena Bëngbe Bëtsá joyeunayama, chë Sinaí tjoca quem luarentšë tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiyayá, ndoñe cachcá ndëcastigánënga quešochátabashejuana, ntšamo cha šojtsëtsësnacá ndoñe tmontseyeunanëse. <sup>26</sup>Bëngbe Bëtsá Sinaí tjoca chë entšángbioye tojanoyebuambá ora, chabe oyebuambnayánaca tojanma quem luare chauangmëmanama, pero mora cha chabe uabemana palabrénguiñe tojašebuachená: “Atšë cachiñe chanjatsma chauangmëmanama, ndoñe nýe quem luare, sinó celócnaca ca.” <sup>27</sup>Bëngbe Bëtsá “cachiñe ca” tojánayana ora, chë sóyeca yojsichamo, chë ndayté lempe chaongmëmanama cha cachiñe yochjama ora, chë quem luarentšë tmojama soyënga y chë jatrócama yopodena soyënga yochtsejuána ca, chca, nýe chë nyetsca tescama yomna soyënga y ndoñe jatrócama soyënga chaoquedama. <sup>28</sup>Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nyetsca tescama y ndocna te ntjotrócana. Bëngbe Bëtsá chama mochjëtshuaye, y ntšamo cha tšabá tbojtsinýancá mochtsadorana, chabiam bëtš respeto jtsebomnëse, y nyetscangbiam más bëtš cha yomnama jtsejuabnyëse. <sup>29</sup>Er Bëngbe Bëtsá puerte etonaná chë chabiam nduauenanënga jabuache echanjácastigaye, y chca, cha jtsemnana mo canýe ñeshe lempe jtsepochoamcá.

**Ntšamo jtsiyenama, Bëngbe Bëtsá oyejuayá bëngaftaca chaotsemnama.**

**13** <sup>1</sup>Sempre nyetscanga šmochtsebobonshana,

Jesucristbeyeca catšátanga quetsomñecá. <sup>2</sup> Sempre tšabá chë tšëngaftangbe yebnoye inye luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanébuaja.

<sup>3</sup> Chë utámenëngbiama sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiama šmochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanenšbuachenacá nÿetscanga chamotserrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayéngnaca.

<sup>5</sup> Ndoñe šmattsiyena jtsejuabnayëse nÿe mallajta crocénana jëftsebomnama. Nÿe chë šmombna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” <sup>6</sup> Y chca, bënga montsobena corente añémoca jayanama:

Bëngbe Utabná endmëna nda atšë šonduájabuachana; tondayama quichátauatja.

¿Ndayá canÿe entšá nanjobenaye átšëftaca jamama ca?

<sup>7</sup> Tšëngaftangbe amëndayëngbiama, chë Bëngbe Bëtsabe buayenana soyënga tcmojábuatambangbiama, sempre šmochtsenójuabnaye. Sempre šmochtsenójuabnaye chë ntšamo

chënga imojaniyentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnama.

<sup>8</sup> Jesucristo cachá nÿets tempo iuétsemna, tempo, mora y nÿetsca tescama. <sup>9</sup> Ndoñe šmatjaleséncia ínÿenga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiama yobómnayeca, y ndoñe chë sanama, chë ndayá aíñe o ndoñe šontsamna jtseyayana soyëngama mandënga tcojtsamëse. Chca mandënga ndocna te chë Israeloca entšangbiama tempo tonjanoservé.

<sup>10</sup> Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnama. Bënga mondbomna chë Jesucristo bëngbiama tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga. <sup>11</sup> Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuaperdonama, y chë bayëngbe cuerpënga jtsejuinÿiyana entšangba tmoyena luarentšana chaboca. <sup>12</sup> Cachcá, Jesúsna tojansufrí y

tojanóbana bêts pueblentsana chaboca, chabe buiñe tojanábuashana ora jóbanëse, entsanga Bëngbe Bëtsábenga chamotsemnama, y chabe delante mo tšabengcá chamotsemnama.

<sup>13</sup> Chíyeca bënga šontsamna Jesúsbioye jobéconana, nda entsanga tmojtsanaboté y bêts pueblentsana chaboca tojanóbana. Cha mochjuasto, y ntšamo cha tojansufricá béngnaca mochjasúfria. <sup>14</sup> Er quem luarentše bënga ndoñe quemátsbomna canye bêts pueblo bëngbiama, nyets tempo chauesomñe bêts pueblo, ndayá bënga tša mondoño y puerte mondobátmana bënga joyéanama chë celoca yochtsemna Bëngbe Bëtsabe bêts pueblentse. <sup>15</sup> Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canye soye cuafjuatšëmboncá. Chcasna, jtsóyebuambnayëse cha mochtsadorana. <sup>16</sup> Sempre ntšamo tšabá yomncá šmochtsama, y chë šmobomncá inyëngbiámna chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiama tcojama ca, y jtsinynana bënga Bëngbe Bëtsá imojtsatschuanama, ndayá cha tojamama.

<sup>17</sup> Sempre šmochtsama ntšamo chë tšëngaftanga ošbuachiyëncá enefjuanéngbeñe amëndayënga tmojayancá, y sempre šmochtsiyena jtsamëse nye ntšamo chënga tmojtsebošcá. Chënga sempre tšëngaftangbioye jtsanýenana, tšëngaftangbe tšabiama, ntšamo cmojánanyenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe

trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

<sup>18</sup> Bëngbe Bëtsá bëngbiama šmochtseimpadana, er bënga ainaniñe corente fsëndétatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. <sup>19</sup> Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciama tšëngaftangaftaca cachiñe jtsatsmënama.

**Bëngbe Bëtsábioye chëngbiama  
jaimpádama y chënga jacheuayama**

<sup>20</sup> Atše, Bëngbe Bëtsá séntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánýena mo oveshëngbe tšabe abujënyácá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entsanga jinýanyiyama ndegombre bëtsemnama ntšamo Bëngbe Bëtsá chabe entsangbiama tojanašebuachenacá nyetsca tescama jamama. <sup>21</sup> Cha séntseimpadana chaoma tšëngaftanga chašmotsebomnama nyetsca tšabe soyënga ntšamo cmojtsëjbotcá, chca, lempe ntšamo cha yobošcá tšëngaftanga chašmotsamama; y cha Jesucrísoftaca chaboma béngaftaca ntšamo cha tšabá tbojtsinýancá. inýetscanga nyetsca tescama Cristo chamotsatschuaná! Chca chaotsemna.

<sup>22</sup> Jesucristbeyeca catšátanga, tšëngaftanga cbontsaimpadana, jábuayenama ntšamo tcbonjauyancá,

puerte uantádoca tšabá  
 chašmóyëngacñama, er nÿe básefta  
 palabrëngaca chama tçbonjubuábiama.  
<sup>23</sup> Atše séntseboše tšëngaftanga  
 chašmotsetátšëmbo, Timoteo  
 Jesucrístbeyeca bëngbe catšata, ya  
 ndoñe utamená yontsemnama, y cha  
 betsco átšbioye chaojtabëse, átšeftaca  
 chanjëftsbetše tšëngaftanga jányama  
 chajá ora.

<sup>24</sup> Tšëngaftanga ošbuachiyëngbeñe  
 nÿetsca amëndayënga šmochjácheuaye,  
 y nÿetsca Bëngbe Bëtsabe entšángnaca  
 choca. Chë Italia luaroquënga  
 ošbuáchiyënga tšëngaftanga  
 cmontsacheuaná.

<sup>25</sup> Atše, Bëngbe Bëtsá  
 séntseimpadana, cha chaoma tšabe  
 bendicionënga tšëngaftangbeñe  
 chaotsemnama.



# Santiago

## Jacheuayama

**1** <sup>1</sup> Atše Santiago, Bèngbe Bètsá y Bèngbe Utabná Jesucristbe canÿe oservená, tšèngaftanga cbontsèbuabiamná, tšèngaftanga chè bnètsana uta Israeloca bèts pamíllangbioye nÿets luarèjana ujquèshenènga. Atše cbontsacheuaná.

## Chè Bèngbe Bètsábiocana osertánana

<sup>2</sup> Jesucristbeyeca atšbe catsátanga, tšèngaftanga ndaye padecena soyènguiñe chašmojtziyena ora, chiñe šmochjájuaoye mo chca tšèngaftangbe tšabiama cuaftsemncá y šmochjóyejuaye; <sup>3</sup> er tšèngaftanga šmondétatšëmbo, chcañe chašmojtsajna ora, šmochtsetátšëmbo cach tšèngaftanga Jesucristbeñe puerte šmošbuaché o ndoñe. Chca ora bèts ošbuáchiyana chašmojtsebomnèse, šmochanjobenaye, Bèngbe Bètsábeñe jtsobátmanèse añémoca jtsemnana, masque padecena soyènguiñe chašmotsomñèse.

<sup>4</sup> Pero chca chašmojtsemnèse, šmochtsentšena jashjáchama ntšamo canÿe entšá Bèngbe Bètsabe soyèngama corente osertaná yomncá chašmotsemnana, ntšamo Bèngbe Bètsá yobošcá chašmotsiyenama, chiñe ni mo canÿe soye jamama chacmondétsabuashebenèse.

<sup>5</sup> Nderado nda tšèngaftanguentsana ndoñe tontsobena corente osertánana jtsebomnana, cha bontsemna Bèngbe Bètsá jaimpádana cha chaoma aíñe chana jtsebomnana, y Bèngbe Bètsá chana bochanjátsetaye; er Bèngbe Bètsá nÿetscanga bètscá endbètsatšatnaye y ndocnábioye jatáboyènjana. <sup>6</sup> Pero cha bontsemna, Bèngbe Bètsábeñe puerte jtsošbuáchiyèse chama cha jaimpádana, y cha nderado ndoñe bochanjóyeunayama ntjatatèmnancá. Nda mèntšá tojtsamèse, inÿe ora aíñe Bèngbe Bètsábeñe cuaftsošbuachecá y inÿe ora ndoñe, cha entsemna mo canÿe olèshcá, mar béjayoca binÿia nÿe cátatoye jtsambayana. <sup>7</sup> Chca ama entšá ndoñe chaondètsejuabná, Bèngbe Utabnábéntšana ndayánaca jatóyèngacñama. <sup>8</sup> Cha jtsemnana canÿe entšá, mora canÿe soye juabnayá, pero chentsana inÿetšá jatójuabnañana. Chca, cha jtsiyenana nÿetsca soyèngama uta soye jtsejuabnayèse, y chca cha ndoñe ntsoobenana tondaye puerte tšabá jamama.

<sup>9</sup> Chè Jesucristbeñe ošbuachiyá, ndbomnjema y ndoñe yapa uámana entšá tomná, corente oyejuayá chaotsemna, er Bèngbe Bètsabe bominÿiñe cha canÿe uámana entšá jtsemnana; <sup>10</sup> y chè bomnánaca puerte oyejuayá chaotsemna, Bèngbe Bètsá chábioye nduámana

entsá chabojábema ora, er mo chë shacuaníne uantšefjushacá, cha ndoñe nyets tempo quem luarentšë ntjéftsiyenana. <sup>11</sup> Shinýe tojábocna y becá tojojënyana ora, chë shácuaa jtsebuashana, chë uantšefjúsha jtsátsatsána y chabe uabótamanana ya ndoñe más ntsebínynana. Cachá chë bomná, echanjóbana nye cachabiamá más becá crocénana onguayíne chaojtsemna ora.

**Bacna soye ocochënguentsána  
tšabá jabocnana**

<sup>12</sup> Oyejuayá chaotsemna chë entsá chë padecena soyënguentsána tšabá tojtšbocná, cabá Jesucristbeñe ošbuachiyá; chama Bëngbe Bëtsá chabiamá oyejuayá echántsemna y echanjama chë nyetsca tescama yomna tšabe vida cha chaotsebomnama, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbiye. <sup>13</sup> Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca vojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínýenga bacna soye jamama chaócochënguama. <sup>14</sup> Inýetšá endmëna, canya bacna soye jamama jócochënguana, bacna juabnënga tojtsebomna ora; cha chiñe nye jésejuabnayana y chë soye jtsasjayana cha chca jamama. <sup>15</sup> Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nyetsca tescama bochanjacistíga.

<sup>16</sup> Atšbe bonshana catšátanga, ndoñe matenoíngñana, jtsejuabnayëse Bëngbe Bëtsá vojtsama tšëngaftanga bacna

soyënga chašmotsamama ca. <sup>17</sup> Nyetsca tšabe soyënga y chë puerte tšabe soyënga tšbanánocana endobá, Bëngbe Bëtsá chë Taitábiocana. Y cha chë shinýe, juashcona, y nyetsca chë celoca yobuashinýinýana soyënga tojamá, nyets tempo nye cachá uesomñe y ndoñe inya ntjátsmënana. <sup>18</sup> Cachá jamama tojánbošenayeca, bënga chábenga šojánabiamá, bënga chabe ndegombre palabrënga jouenëse. Cha chca tojama, lempe ntšamo Bëngbe Bëtsá quem luarentšë tojamentsána, bënga chë natsanënga chábenga chamotsemnama.

**Ntšamo ndegombre yomna Bëngbe  
Bëtsábíoye tšabá jadórama**

<sup>19</sup> Atšbe bonshana catšátanga, quem soyama šmochtsenójuabnaye: nyetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínýengaftaca jetnámnaca. <sup>20</sup> Inýaftaca tbojetna ora, canye entsá ndoñe ntsamana ntšamo Bëngbe Bëtsá yobošcá, chë nyetsca soyënguiñe tšabá jtsamana. <sup>21</sup> Chcasna, šmochtsajbaná bacna soyënga jtsamëse oyenana, y amana nyetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjójyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnama.

<sup>22</sup> Ndoñe quecmátamna nye chë Bëngbe Bëtsabe buayenánana jouenana, ndayá ntšamo cha tojayancá añe jtsamana; ndoñe chca šmontsamëse, cach tšëngaftanga šmontsenoíngña. <sup>23</sup> Nda nye chë buayenánana tojouena, pero betesco tbojtsebnatjëmbe y ndoñe

tontsama ntšamo chiñe tojtsayancá, cha jtsemnana mo canye entšá chabe jubíá espejuíñe tojtsenonýacá: <sup>24</sup> chana cachá jtseónýayana, pero chë espejo tojabuertaná ora, jtsebnatjëmbana ntšamo cha bëtsemnama. <sup>25</sup> Pero nda ntšamo tojouencá ndoñe tbonjebnatjëmba, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguëntse endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nyetsca soyënga ntšamo tojtsamcá Bëngbe Bëtsá jadórama, chabiana tondaye ntsámanana. <sup>27</sup> Bëngbe Bëtsá chë Taitabe bominýiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nye quem luarama enójuabnayënga mondbetsamcá.

**Nyetscanga tšabá  
jtsatenonýayëngana**

**2** <sup>1</sup> Tšëngaftanga, Jesucristbeyeca atšbe catsátanga, šmondošbuachë Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nyetsca entšanga cachcá jtsatenonýayëngana. <sup>2-3</sup> Nderado tšëngaftanga cányëntse šmojënefjna, y chora canye bomna entšá tojášhango castellano ntšabuchëtjonëfjangaca y uamana

entsáyëjuangaca bopormaná, cha botamana šmojúmashëngo y mëntšá šmojuayana: “Moca quëfseroca mabesótbema ca”. Pero cachca ora, canye ndbomnjëjema tojášhango uandocuenta entsáyá uichëtjoná, y cha šmojuayana: “Acna choca tsanana cochtsemna o chafjoca mótbema ca”. <sup>4</sup> Chca tšëngaftanga ya šmontsama cach tšëngaftanguëntse báseftanga más uámanënga ínÿengbiana chamotsemnana, y chca šmojtsama, ana bacna juabnënga šmojtsebomna causa.

<sup>5</sup> Atšbe bonshana catsátanga, quem soye šmochjouena: Bëngbe Bëtsá quem luarentse ndbomnënga imomnënga tojabacacá, chënga canye puerte uámana soye chamotsebomnana, Jesucristbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye jatsatayama tojašebuachená; <sup>6</sup> pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsënyayana. Ndegombre, chë bomnënga mondmëna chë nye sempre cmondbëtsamëndayënga y chë sjojónana chë pueblentsá mandadëngbioye cmondbáunatsënga. <sup>7</sup> Y cach bomnëngnaca mondmëna chë Cristbiana podescá oyebuambnayënga, ndábenga tšëngaftanga šmondmëna, y chabe uabaina tšëngaftangbiana puerte enduámana.

<sup>8</sup> Bëngbe Bëtsabe uabemana palabrenguiñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá

šmochántsama. <sup>9</sup> Pero tšëngaftanga ndoñe cachcá šmotsenonjase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá. <sup>10</sup> Y mora, canye entsá nyetsca chë leyentša mandënga tojtsobedecena, pero ndoñe tontsama ntšamo nye mo canye mando ntšamo iuayancá, cha Bëngbe Bëtsabiama jtsemnana canya ntšamo nyetsca chë leyentša mandënguine ndoñe yondëlesenciancá amá. <sup>11</sup> Cach Bëngbe Bëtsá, chë “acbe shema o boyábioye ínÿaftaca ndoñe cattsefngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shémbioye ínÿaftaca ndoñe tbonjaingñé, pero aíñe ínÿabioye tbojóba, chca, Bëngbe Bëtsabiama cha jtsemnana canya nyetsca chë leyentša mandënga ndocumpliná.

<sup>12</sup> Tšëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entsangcá, er Bëngbe Bëtsá echanjayana ntšamo tmojamcá aíñe o ndoñe tšabá bëtsemnana. <sup>13</sup> Er chë ínÿengbiana ndoñe ngménana bomnëngbiana, Bëngbe Bëtsá ntjongmiacá echanjayana ntšamo tmojamcá aíñe o ndoñe tšabá bëtsemnana; pero chë ínÿengbiana aíñe ngménana bomnëngbiana, ntšamo tmojamcá aíñe o ndoñe tšabá bëtsemnana Bëngbe Bëtsá chaojayana ora, chënga tšabá chentšana mochanjábocana.

**Chë ndegombre ošbuáchiyana,  
soyëngaca jinÿanÿiyana**

<sup>14</sup> Atšbe catšátanga, ñdayama cánÿabioye buanjosérvia jayanana aíñe Jesucristbeñe sëntsošbuaché ca, pero cha ínÿengbiana tšabe

soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchemá? Ndegombre, cha nye chca tojtsichámëse, ndoñe ntsopodénana cha atsbočaná chaotsemnana. <sup>15</sup> Nderado canye boyabása o shembása ošbuachiyá entsáyá tbojtsabuáshbena y saná chë te jasámnaca tbojtsebuáshbena, <sup>16</sup> y canya tšëngaftanguentšá tbojauyana: “Diošoftá, sësnama ndoñe chacondëtsepadecena y becá chacuatoshachá ca”, pero chca chaotsemnana chábioye tondaye tbonjatšetase, ñdayama nantsoserverna chca jayanana? <sup>17</sup> Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnana jinÿanÿiyama, nye chca ošbuáchiyana jtsebomnana tondayama ntsoservénana.

<sup>18</sup> Pero nderado ndánaca mëntšá echanjayana: “Aca Jesucristbeñe icošbuaché, pero atšna ínÿengbiana tšabe soyënga séntsama ca.” Chora atše stjojuá: “Šminÿinÿé ntšamo canya nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” <sup>19</sup> Aca condošbuaché nye canye Bëngbe Bëtsá yomnama y chca tšabá contsama; pero chë bacna bayëjëngnaca chiñe jtsošbuáchiyana, y chë causa chënga uatjana jtsebomnana y jtsangmëmnyana. <sup>20</sup> Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsosbuaché, pero tondaye tontsama chca chaotsinÿnama, chabe ošbuáchiyana tondayama ntsoservénana. <sup>21</sup> Bëngbe Bëtsá tojánayana chabe bominÿiñe Abraham, bëngbe tempsca bëtš taitá, tšabia

yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtschuayama. <sup>22</sup> Aca contsobena Abrahámbeñe jinýama, cha Bëngbe Bëtsábeñe yojanošbuáchema, y soyënga yojánama chca chaotsinýnama; y ndayá cha tojanmama entsinýinýena, cha ndegombre puerte bëtscá yojanošbuáchema. <sup>23</sup> Chca tojanopasá ntšamo Bëngbe Bëtsabe uabemana palabrenguiñe endayancá, mëntsá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominýiñe cha tšabia yojamna ca.” Y Abraham entsanabaina Bëngbe Bëtsabe amigo ca.

<sup>24</sup> Y tšëngaftanga šmontsetátšëmbo, Bëngbe Bëtsá ináyana canýe entšá chabe bominýiñe tšabia yomna ca, chë entšá ndayá tojtsamama, chabe ošbuáchiyana chaotsinýnama, y ndoñe nýe ošbuáchiyana tojtsebomnama.

<sup>25</sup> Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominýiñe cha tšabia yojamna ca, er cha canýe tšabe soye tojanma. Cha chë noticia uambaye judiënga posada tojanéyentšame, y chentšana tojanéjabuache inýe benachëjana chamuáisebocanama, chë pueblentšá soldadëngbiana chamotsachetama.

<sup>26</sup> Lempe básefta palabrenguiñe jayanamna mëntsá entsemna: ntšamo canýe cuerpo, espíritu ndbomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinýnama, tondayama ntoservénana.

### Bichtájaca tšabá jóyebuambayama endmëna

**3** <sup>1</sup> Jesucristbeyeca atšbe catšátanga, ndoñe yapa

buatëmbayënga tšëngaftangbeñe chamondëtsemna; er tšëngaftanga ya šmondétatšëmbo, bënga, chë entšanga abuátambayëngbiana, chë castigo más bëtscá yochtsemnama, Bëngbe Bëtsá ndoñe tmonjóyeunase, ntšamo entšanga tmojamama aíñe o ndoñe tšabá bëtsemnama cha chaojayana ora. <sup>2</sup> Bënga nýetscanga nýetsca bacna soyënga mondbëtsama. Nderado nda oyebuambnanyiñe ni mo canýe bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtsobena cachá sempre jtse nomándayama.

<sup>3</sup> Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nýets chëngbe cuérpoca tmojtsamcá jtsemándayana, y ndoñe nýe chëngbe bestšaše. <sup>4</sup> Barquëshamnaca šmochjenójuaboje. Masque tša bëtsëtsacuemëngá y tša jabuache binýiënga chë barco jtsëjuatsëntšayana, chë uamanéjayënga chë barco juyambana ndayëjana tmojtsebošcá, y chca, nýe canýe base soyetëmaca, timón ca uabainëtëmaca. <sup>5</sup> Cachcá, chë bichtajaca cuerpiñe canýe base soyetema endmëna, pero chë bichtájaca entšanga jtse nábotamnayana bëts soyënga tmojamama. Šmochjouena, canýe base íñeshe jtsobenana canýe bëts tjañe juangbotjuama. <sup>6</sup> Y chë bichtajaca endmëna mo canýe íñeshcá, mo canýe luare ndayentse puerte bacna soyënga tobinýncá. Chë bichtajaca jtsobenana bëngbe cuerpentse puerte bacna soyënga bëngbiana jamama. Mo canýe íñeshe becá tojtse ndiamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiana jamama nýets tempo quem

luarentše tmuetsiyenentscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

<sup>7</sup>Entsá endobena jtsaméndayana nyetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsaménda; <sup>8</sup>pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtscá bacna soyënga cada te chauétsabinñyama, y mo canýe mëtscuaycá veneno jtsobmnana jóbama, chë bichtájñaca cachcá endmëna. <sup>9</sup>Bichtájaca bënga puerte tšabá Bëngbe Bëtsá y Taitabiana jtsichámuana, y cach bichtájaca bënga puerte bacá entsangbiana mondbëtsichamo, masque Bëngbe Bëtsá cachacá enoparecénënga chënga tojábiana. <sup>10</sup>Cach uayásëntšana jtsóbocanana Bëngbe Bëtsabiana tšabe palabrénga y entsangbiana bacna palabrénga. Jesucrístbeyeca atšbe catšátanga, chca ndoñe chaondëtsemna.

<sup>11</sup>Canýe béjaye obocantšana ndoñe ntsopodénana tšabe býyeshe chaóbcnoma y cachentšana untja býyeshnaca. <sup>12</sup>Ntšamo canýe higo betiyentšana ndoñe ntsopodénana olivosëšënga jashacama, y canýe uvas betiyentšana ndoñe ntsopodénana higuëbenga jashacama, cachcá, atšbe catšátanga, tamona býyeshentšana ndoñe ntsopodénana tšabe býyeshe chaóbcnoma.

**Bëngbe Bëtsábicana  
óbocana osertánana**

<sup>13</sup>Nderado tšëngaftanguentše tojtsemna canýe puerte tatšëmbuá y osertaná, cha bontsemna, chca yomnama entsanga jinýanñiyana,

tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama.

<sup>14</sup>Pero tšëngaftangbe ainaniñe yapa ínýabioye šmojtsántšaboše y nýe ínýenga chamotjáyana soyënga šmojtsama, as ndoñe šmattsenábotamnaye osertánënga y tšábënga šmomnama, er ndegombre Bëngbe Bëtsabe osertánana tšëngaftanga ndoñe šmontsebomna. <sup>15</sup>Er chca osertánana, Bëngbe Bëtsábicana ndoñe ntsóbocanana, ndayá nýe quem luarama enójuabnayëngbentšana, nýe entsangbe juabnentšana, y canýe bacna bayéjbentšana. <sup>16</sup>Ndayentše entsanga yapa tmojtsenántšaboše, y nýe ínýenga chamotjáyana soyënga tmojtsama, chentše tondayama quemochátenëyeunana y nyetsca bacna soyënga mochántsama.

<sup>17</sup>Pero chë Bëngbe Bëtsábicana óbocana osertánana bomnënga, nyetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínýenga ndoñe chamondétsentsjanama amënga, tšábënga y sempre jtseprontánana ínýenga joyaunayama. Y cach quemënga jtsemnana ínýengbiana ngménana bomnënga, sempre tšabe soyënga jtsamana, cachcá nyetsca entsángbioye jtsénñayana, y ntšamo ndegombre tojtsemncá jtsichámuana y jtsamana. <sup>18</sup>Ntšamo canýe jená, botamana shajuana jtsebomnama tšabe jénaye jájena, cachcá, siempre natjémbana jtsiyenama bošënga, natjémbana ínýengaftaca jtsiyenana, chca, nyetsca entsanga chamotsamama ntšamo Bëngbe Bëtsabe bominiñe tšabá yomncá.

**Šmochtsiyena Bëngbe Bëtsá  
tšëngaftangbeñe jtsemándayëse**

**4** <sup>1</sup>¿Ndayentsana chë  
tšëngaftanga jtsentsjanayama  
y jtsepenzétsiyama yóbocana?  
Endóbocana chë tšëngaftangbe  
bacna juabnënguentsana, nÿe cach  
tšëngaftanga tšabá jtsomñama; y  
chë soyënga tšëngaftangbe ainaniñe  
sempre chë tšabe juabnëngama contra  
jësemnana. <sup>2</sup>Tšëngaftanga ndayánaca  
jtsebomnama šmojtseboše, pero chca  
jtsebomnama ndoñe šmontsobena,  
as jtseprontánana ínÿengbioye  
jtsëbáyama. Inÿa ntšamo toбомncá  
tšëngaftanga tša jtsántšabošana, y chë  
soye jashjáchama ndoñe šmontsobena  
ora, ínÿengaftaca jentjáyanganana  
y jtsepenzétsiyana. Ntšamo  
šmojtsebošcá ndoñe ntjobenayana  
jtsebomnama, Bëngbe Bëtsá chama  
ndoñe šmondbotjañe causa; <sup>3</sup>y chë  
soye šmojtjañe ora, tšëngaftanga  
ndoñe ntjójyëngacñana, ndoñe  
botamana chë soye šmondbotjañe  
causa, er tšëngaftanga chë soye  
jtsebošana nÿe chaoservema  
oyejuayënga bacna soyënguñie  
jtsomñama.

<sup>4</sup>iTšëngaftanga, Bëngbe Bëtsá  
bobonshánana šmojtšajbananga!  
¿Ndoñe šmondétatšëmbo, chë  
jtsebošana nÿe quem luarama  
enójuabnayëngbe amigo jtsemnama  
y nÿe quem luarentša soyënga  
jtsebomnama, chca, canÿe entsá  
Bëngbe Bëtsabe uayayá jtsemnana?  
Ndánaca tojajuabó nÿe quem luarama  
enójuabnayëngbe amigo jtsemnama,  
chca, canÿe Bëngbe Bëtsábioye  
uayayá jóbemana. <sup>5</sup>Ndoñe nÿe  
bonamente Bëngbe Bëtsabe uabemana  
palabrënguñie mëntsá endayana:  
“Chë Bëngbe Bëtsá tbojanichmó

bëngbe ainaniñe chaotsiyenama  
Uámana Espíritu, puerte entseboše  
nÿe Bëngbe Bëtsá canÿa bëngbe  
amëndayá chaotsemnana ca.” <sup>6</sup>Pero  
Bëngbe Bëtsá, bëngbe tšabiamna  
jtsejuabnayëse bënga jtsejabuáchanana,  
chíyeca Bëngbe Bëtsabe uabemana  
palabrënguñie mëntsá endayana:

Bëngbe Bëtsá chë nÿe  
cachënga uámanënga  
tmojtse nobiamnangbe contra  
entsemna,  
y chë ndoñe uámanënga  
montsenobiamnangbiamna,  
Bëngbe Bëtsá más tšabe juabna  
entsebomna ca.

<sup>7</sup>Asna, tšëngaftanga  
šmochtseprontana nÿe Bëngbe  
Bëtsá chacmotsamëndama;  
ntšamo Satanás tcmojtšamëndacá  
ndoñe šmattsama, y cha cachora  
tšëngaftangbentsana echantsachá.  
<sup>8</sup>Bëngbe Bëtsábioye šmochtobeconá, y  
cha echanjama tšëngaftanga ntšamo  
cha yomnama chacmotsësertánama.  
Tšëngaftanga bacna soye amënga,  
cach tšëngaftangbe cucuatšëngaca  
tšabe soyënga šmochtsama, bacna  
soyënga ndoñe. Tšëngaftanga chë  
inÿe ora jtsejuabnayana Bëngbe Bëtsá  
jtsebobonshánama, y inÿe orna, nÿe  
quem luarentša soyënga jtsebomnama,  
šmochtsajbaná bacna soyënga  
jamama bošana, chca, nÿe tšabe  
juabnënga tšëngaftangbe ainaniñe  
chašmotsebomnama. <sup>9</sup>Tšëngaftangbe  
bacna soyëngama ngménaca  
šmochtsemna, šmochjenóbošachna  
y cochtsetšenánënga  
šmochjójyebuambaye.  
Jatenbiajuayamna,  
šmochjenóbošachna; y  
joyejuayëngamna, ngménaca  
šmochtsemna. <sup>10</sup>Bëngbe Bëtsabe  
delante bëtsétsanga ndoñe

šmattsenobiamnaye, y cha más uámanënga cmochanjábiana.

**Inyëngbiama ndoñe ntsichámuana  
ndoñe tšabá tmonjama ca**

<sup>11</sup> Jesucristbeyeca catšátanga, inyëngbiama bacna soyënga ndoñe šmattsóyebuambnaye. Nda cachabe catšatbiama bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsocumplínana y jtsichámuana chë leyentša mandënga tondayama yontsoserverna ca. Y chë leyama chca tcojtsichámëse, cach ley jocúmplia cuenta, contsobiamná canye ichamuá chë ley aïne o ndoñe yondoservénama, y chca ndoñe quecmátsmëna jtsamana. <sup>12</sup> Chë ley tojuapormá cha nÿe canÿa endmëna, Bëngbe Bëtsá, y cachá endmëna ntšamo entšanga tmojamcá aïne o ndoñe tšabá bëtsemnana ichamuá, y cachánaca entsobena entšanga játsebacama o nÿetsca tescama jácastigama. Y acna, ÷ndase cmëna ndëmua entšabiámnaca jobjayama jatichámuama ntšamo tojamcá aïne o ndoñe tšabá bëtsemnana?

**Ndayá yëfse yochjatëchnënguama  
ndoñe ntsótatšëmbuana**

<sup>13</sup> Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inÿe bëtš puebløye fchanjanga, y chentšë canÿe uata fchanjëftsemna ba soyënguine trabájayiñe, y ndegombre becá fchanjónÿena ca.” <sup>14</sup> ¡Pero ni mo ndayá yëfse tšëngaftangafaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebmna,

y chca, tšëngaftanga šmondmëna mo canÿe jantšëtëshcá, chëshe mora jónÿnana y nÿe ndeolpe jatenatjëmbana. Tšëngaftangafaca cachcá echanjopása. <sup>15</sup> Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” <sup>16</sup> Pero chë cuenta, tšëngaftanga bëtš soyënga šmochjamama sempre jtsenábotamnayana, ndayá tšëngaftanga chašmomama Bëngbe Bëtsá yochjalesenciácá ntsetatšëmbo; y chca jtsamana ndoñe tšabá quenátsmëna. <sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canÿe bacna soye jtsamana.

**Chë bomnënga jábuayenama**

**5** <sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtesufrínama šmochjenóbošachna y uatjananënga šmochtseyoye! <sup>2</sup> Tšëngaftangbe bomnana buajónana janguánana entsemna, tondayama quenátoserverna, y chë entšayëjuangá mejëjonga montsasá. <sup>3</sup> Tšëngaftangbe castellano y midio tojtsengúsheshe; y chë ngúsheshna echántsinÿinÿenaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nÿetsca tescama cmochántsapochocaye, ntšamo chë íñeshe canÿe soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. <sup>4</sup> Tšëngaftanga chë tšëngaftangbe fshantsënguine tmojëftsetrabajanga ndoñe šmontanëbuénaye, y mora šmochjouena, chënga chama



cmontsachembuanama. Bëngbe Utabná n̄yets obenana bomná, chë trabajayëngbe chembuanana ya tojouena. <sup>5</sup> Quem luarentse tšëngaftanga šmondoyena ba botamana soyëngaca y n̄ye ntšamo cach tšëngaftanga šmobošcá jtsamëse. Ntšamo can̄ye uacná jóbana, min̄yicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnama, er puerte bacna soyënga šmojama. ¡Chë castigo jtsebín̄yana tempo ya entsobeco! <sup>6</sup> Tšëngaftanga, chë puerte tšabá amëngbiana šmojayana jóbana yojtsemna ca y šmojtšëbaye, chca ndoñe chaondëtsemnama chënga ndocá jamama ntšobencá.

**Chë uantado jtsemnana y chë Bëngbe Bëtsáftaca jencuëntama ora**

<sup>7</sup> Pero tšëngaftanga, catšátanga, uantádoca šmochjóbátma Bëngbe Utabná yochjésabo orscama. Chë jajañe trabajaya tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. <sup>8</sup> Tšëngaftángnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catšátanga, ntšamo ín̄yenga tmojtsamama ndoñe n̄ye šmattsoquejana, Bëngbe Bëtsá tšëngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aín̄e o ndoñe tšabá bëtsemnama, ya entsebeconá. <sup>10</sup> Atšbe catšátanga, chë

tempsquënga Bëngbe Bëtsabe juabna oyebuambnayënga, ndëmuanyënga entšanga tmonjanabuayená Bëngbe Utabná jótšëmbonëse, chënga bëngbiyoe šonjëftsanin̄yan̄iyiye ntšamo tmojansufrima, ntšamo šojtsamna uantadënga jtsemnana tmojtšesufrina ora; y chca tšëngaftanga cmontsamna jtsamana. <sup>11</sup> Bënga chëngbiana fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebonnëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguiñe yojasufrina ora; y šmondétatšëmbo ntšamo Bëngbe Bëtsá cabana chábiyoe tbojancuedama, y chca yojamna Bëngbe Utabná entšangbiana puerte ngmená yóm̄nayecca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúruse ni celocama, ni quem luarama, ni ndocna in̄ye soyama. Tšëngaftanga aín̄e ca jayanama šmojtsebošëse, n̄ye aín̄e ca šmochjayana, y ndoñe casna n̄ye ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

<sup>13</sup> Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama. <sup>14</sup> Nderado nda šocá tojtsemna, cha bontsemna chentšá ošbuachiyëngcá anefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye

chamuanëtjuama. <sup>15</sup>Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinyena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna. <sup>16</sup>Chíyecna, chë bacna soyënga šmojtsamama šmochjobuambaye, y Bëngbe Bëtsá nyetscangbiamama šmochtseimpadana, chca, tšabá mo shnanëngcá chašmotsemnama. Canya ndabiamama Bëngbe Bëtsá tojayana chabe bominyiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëts soyënga jamama. <sup>17</sup>Bëngbe Bëtsabe juabna oyebuambnayá Elías, mo cach bëngcá canye entšá inamna, y puerte jtsošbuáchiyëse ndoñe

chaonduaftema Bëngbe Bëtsábioye tbojanimpadá ora, quem luariñe mo unga uata y tséntsañe ndoñe tonjanafté. <sup>18</sup>Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsatsbinýna.

<sup>19</sup>Atšbe catšátanga, nderado nda tšëngaftanguentšá tojtsajbaná chë ndegombre soyënga jtsamama, pero inya chábioye tbojuájabuache cachiñe chë tšabe benache cháuatishachama, <sup>20</sup>tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnana, cha chë nyetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnana.

# 1 San Pedro

## Jacheuayama

**1** <sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mondoyenëngbiana, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiana. <sup>2</sup> Sentsabiamná chë Bëngbe Bëtsá Bëngbe Taitá tojánabacacangbiana, ntšamo cachá jamama yojanjuabnacá y ntšamo jopásama yojantatsëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entsanga chašmotsemnama, Jesucristo chašmotseyeunanama y Bëngbe Bëtsabe delante tsábá chašmotsatsmënama, bacna soyënga abujuánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtsá séntseimpadana Bëngbe Bëtsá, chaoma tsábe bendicionënga tsëngaftangbeñe chaotsemnama, y chaoma tsëngaftangbe ainaniñe tsábe ebionana chašmotsebomnama.

## Bëngbe Bëtsábeñe

**jtsošbuáchiyëse vida jtsebomnana,  
atsebácanënga jtsemnama**

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado ín'yengaftaca

yómnayeca, tojanma bënga tsëm juábnaca vida chamotsebomnama, bëngbioye bacna soyënga jabujuánase, Jesucristo cháuatayenama tonjánmayeca. Chýeca bënga montsobena chábeñe jtsobátmanana sempre y n'yetsca tescama, ndayá cha šochjátšatayama. <sup>4</sup> Ndayá bënga šochjátšataycá ndoñe quenátsmëna jëftsoepochócama opodena soyënga, ndayá n'yets tempo tsábe soyënga. Y bënga mondobátmana jóyëngacñama ndayá Bëngbe Bëtsá chabe entsanga jatšatayama tojašebuachenacá, ndayá celoca bëngbiana cha yojtsin'yena.

<sup>5</sup> Chë soyënga tsëngaftangbiana entsemna, Bëngbe Bëtsábeñe šmošbuáchemá; cha chabe obenánaca cmondán'yena, tsëngaftanga játsebacama. Cha chca jamama ya tojaprontá y echanjín'an'yíye, Cristo jésabama tempo chaojóshjango ora.

<sup>6</sup> Chýeca tsëngaftanga tša oyejuayënga šmojtsemna, masque nderado jtseytana in'yë ora, n'yetsca padecena soyënguiñe jasúfriase chašmuachnënguama. <sup>7</sup> Mo chë castellanama jtsetatsëmbuama aíñe o ndoñe tsábe castellano tomnama iñiñe fjuchnëngcá, padecena soyënguiñe tsábá chašmojachnënguse, Bëngbe Bëtsá echanjín'an'yíye tsëngaftanga ndegombre taišmošbuáchemá. Chë castellano pronto endbetsopochóca, masque

chca, chana puerte endbetsámama.  
Y tšəngaftangbe ošbuáchiyana  
chě castellanama puerte más  
enduámama. Tšəngaftanga padecena  
soyənguentšana bəts ošbuachiyánaca  
chašmojábočnəse, Jesucristo  
chaojésabo ora, entsanga mochanjinjə  
tšəngaftanga šmojtsomerecena  
chacmotsatacheuanama, más  
bətsətsanga y obenənga  
chácmabiamama y uámanəngnaca.

<sup>8</sup>Tšəngaftanga Jesucristo  
šmondobonshana, y chábioye ndoñe  
chešmátaninjə; masque mora cha  
ndoñe quešmatonjá, tšəngaftanga  
chábeñe šmontsošbuaché, y  
šmontsebmna canjə puerte tšabe  
oyejuayana, y ntsachetsá chana  
yomnana ndoñe quešmátobena  
jayanama, tša bətsá causa.

<sup>9</sup>Chca oyejuayana tšəngaftanga  
šmontsebmna, er ndayá tšəngaftanga  
jtsošbuáchiyěse šmobatmancá, ya  
šmojtsosháchichana, chě Bəngbe Bətsá  
tšəngaftanga jtsatsebacayana.

<sup>10</sup>Bəngbe Bətsabe juabna  
oyebuambnayənga ya imojanatsjendá  
y imojuaná jtsetatšəmbuama, ntšamo  
Bəngbe Bətsá entsanga jətsebacama,  
y tmojanoyebuambá ndayá Bəngbe  
Bətsá tšəngaftanga jatšatayama,  
tšəngaftangbiama tšabe juabna cha  
yobómnayeca. <sup>11</sup>Chəngbe ainaniñe  
yojsemna Cristbe espíritu, y ntšamo  
tojanəyancá, cabá chca ndochnəngo  
ora, yojamna Cristo jasúfriama y  
ntšamo chentšana Bəngbe Bətsá  
chábioye puerte bətsá bochjánbemama,  
Bəngbe Bətsabe juabna  
oyebuambnayənga imojuabná  
y imojanatsjendá jtsetatšəmbuama  
chě soyənga yochjanopása ora,  
ndaye tempo y ntšamo chě tempo  
yochtsemnama. <sup>12</sup>Pero tempo Bəngbe  
Bətsá chəngbioye tojaninjanjé, chca

jtsamana ndoñe cachəngbe tšabiama  
yonjamnama, ndayá chca jtsamana  
yojamna tšəngaftangbe tšabiama.  
Chənga tmojanoyebuambá, ntšamo chě  
tšabe noticiənga oyebuambnayənga  
tšəngaftanga tcmojauyancá. Y chca  
tcmojáuyana chě Uámama Espíritbe  
obenánaca, nda Bəngbe Bətsá celocana  
tbojichmó. Chě soyənga endməna  
ndayá chě angelənga muantseboše  
tšabá jinjama, chənga chaósertama.

**Bəngbe Bətsá entsanga  
jtsachembuanana chabe  
entsangcá chamotsiyenama**

<sup>13</sup>Chíyeca, botamana jtsejuabnayəse  
tšabá jatrabájama, y cach tšəngaftanga  
jenomándama jtsobenəse, yejuana  
šmochtsobátmana, Bəngbe Bətsá  
soyənga cmochjátšatayama  
tšəngaftangbe tšabiama jtsejuabnayəse,  
Jesucristo quem luaroye yochjésabo  
ora. <sup>14</sup>Tšəngaftanga Bəngbe Bətsabe  
básenga uauenanənga quetsomñecá,  
ndoñe šmattsiyena ntšamo cach  
tšəngaftangbe bacna juabnənga  
yomncá nje tšabá jtsomñama, ntšamo  
Bəngbe Bətsábioye cabá nduabtuama  
ora šmonjanbomncá. <sup>15</sup>Chamna,  
šmochtsiyena mo chě Bəngbe Bətsabe  
entsangcá, puerte tšabe entsangcá  
jtsaməse, er Bəngbe Bətsá, nda  
tcmojáchembo chca chašmotsemnama,  
sempre uamaná endməna. <sup>16</sup>Er Bəngbe  
Bətsabe uabemana palabrenguñe  
məntšá endayana: “Tšəngaftanga  
Bəngbe Bətsábeñe uámanənga  
šmochtssemna, er atše uamaná  
səndməna ca.”

<sup>17</sup>Tšəngaftanga Bəngbe  
Bətsábioye šmondbuyana “Taita  
ca”, šmondbótšəmbona ora. Bəngbe  
Bətsabiama njetscanga cachcá  
mondməna. Chíyeca, ntšamo  
njetscanga tmojamama tšabá o ndoñe

tšabá yontsemna ca cha yochjayana ora, cha chca echanjama n̄ye ntšamo chēnga tmojamcá jtsónyáyese. “Taita ca” chábioye šmondbuyánayeca, quem luarentše šmochtsiyenēntscuana sempre šmochtsejuabnaye cha n̄yetscangbiana más bētsá yomnama, chē šmojtsama sóyeca chca jtsin̄yan̄yayese. <sup>18</sup> Tšēngaftanga šmondētatsēmbo, Jesucristo, mo nda ín̄yengbioye játsebacama crocénana cuafjētsajocá, tonjanóbana tšēngaftanga játsebacama, chē n̄yetsca soyēnga n̄ye bonamente jtsamēse oyenentsana, ntšamo jtsiyenama tšēngaftangbe bēts taitāngbentsana šmojanatsjin̄ycá. Cristo ndoñe checmatanatsēbacá, yopodena jtsopochócama soyēnga jētsjájuaese, mo crocénana o castellancá, <sup>19</sup> ndayá cachá jóbānēse, chabe uámana buiñe juabuáshanēse. Cristo chē ndocna bacna soye ndbomná, tonjanóbana ora enjamna mo can̄ye oveshatemcá, tondaye ndbemaná, ni tsengana ndbomná, Bēngbe Bētsábioye jētschuayama altaroca obaná. <sup>20</sup> Chama Bēngbe Bētsá Crístbeñe tojanjuabó y tbojanábuayana, cabá quem luare ndētsemna ora; pero quem tempo, Cristo entšāngbeñe tonjábocna tšēngaftangbe tšabiana. <sup>21</sup> Crístbeyeca, tšēngaftanga šmondošbuaché Bēngbe Bētsábeñe, nda tonjanma Cristo cháuatayenama y puerta uamaná tbonjánbema. Mēntšá, ndábeñe tšēngaftanga šmošbuaché y šmobátmana, Bēngbe Bētsábeñe endmēna. <sup>22</sup> Tšēngaftanga šmojama ndocna bacna soyēnga ainaniñe ntsebomnama, Jesucristbeyeca catšātangbioye ndegombre jtsababuán̄yeshanama, er tšēngaftanga ntšamo ndegombre yomncá jtsamēse, Bēngbe Bētsá

šmoyeunana. Chcasna, sempre n̄yets ainánaca n̄yetscanga šmochtsenbobonshana. <sup>23</sup> Bēngbe Bētsá tojama tšēngaftanga tsēm vida chašmotsebomnama; pero tšēngaftanga tsēm vida šmontsebomna, ndoñe n̄ye quem luarentša entšanga ndayá tmojamama, sinó ndayá Bēngbe Bētsá chē ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebomnama y chē palabra ndocna te queochaisopochóca. <sup>24</sup> Ntšamo Bēngbe Bētsabe uabemana palabrēnguñe endayancá:

N̄yetsca entšanga mondmēna mo shacuancá,  
y chēnga imobomna tšabe soyēnga,  
endmēna mo chē shacuanentša  
uantšefjushangacá.

Chē shácuana jtsanctana  
y chē uantšefjushangá  
jtsatquécjanana;  
entšanga cachcá, n̄yets tempo  
quem luarentše ndoñe  
quemochátiyena;

<sup>25</sup> pero Bēngbe Bētsabe palabra n̄yets  
tempo echanjesomñe ca —chiñe  
endayana.

Y chē palabra endmēna chē Jesucristbe tšabe noticiēnga, chē buayenánana ntšamo ín̄yenga tcmojabuayenacá.

**2** <sup>1</sup> Chcáyecna, n̄yetsca tescama šmochtsajbaná n̄yetsca bacna soyēnga amana, ín̄yengbioye áingñayana, bacna entšanga chē ntšamo ndegombre šmojuabnacá ndin̄yín̄yayēnga ntsemnana, ín̄yengbioye untšabošana, y ín̄yengbiana uayátsenayana. <sup>2</sup> Mo cabá mora on̄yanana šešoncá, tša jtsebošana chabe mamabe létšiyē, cachcá tšēngaftanga cmontsamna puerta jtsebošana n̄yets tempo Bēngbe

Bëtsabe soyënga jtsebomnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnama; <sup>3</sup> ntšamo Bëngbe Bëtsabe uabemana palabrenguiñe endayancá: “Tšëngaftanga šmojátatšëmbona Bëngbe Utabná puerte tšabia nyetscángaftaca yomnama ca.”

**Cristo, chë mo aina ndëtšbecá endmëna**

<sup>4</sup> Bëngbe Utabnábioye šmochtobeconá, nda endmëna mo canye aina ndëtšbecá, ndëmuanyëse tojtsama entshanga tšabe vida chamotsebomnama. Báseftanga cha tmojtsaboté, mo ntšamo chë ndëtšbéngaca canye yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominyiñe cha puerte uamaná endmëna. <sup>5</sup> Chábioye šmochtobeconá, tšëngaftanga chë tšabe vida šmojóyëngacñënga, cányiñe mo aina ndëtšbéngcá, Bëngbe Bëtsabiana jajebuama canye yebnentšama chašmotsemnama; mo Bëngbe Bëtsabiana bachnangcá chašmotsemnama, nye Bëngbe Bëtsábioye jtseservénama jtsentshëne, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinyanana, ndayá Jesucristo tojanmama. <sup>6</sup> Chca ndegombre endmëna, er Bëngbe Bëtsabe uabemana palabrenguiñe, Bëngbe Bëtsá Jesucristbiana mëntšá tojánayana:

Šmochjinye, atše sënjama  
Jerusalenentše canya  
chaotsemna,  
y cha endmëna mo chë canye  
yebna jajebuámentše chë más

bëts uashacuanëšentše jajona ndëtšbecá.

Cha atšbe Uabuayaná endmëna, y atšbiana puerte enduámama.

Nda chábeñe tojtsošbuaché,  
ndocna te nye bonamente  
chábeñe queochátobatmana ca.

<sup>7</sup> Tšëngaftanga, chábeñe ošbuáchiyëngbiana, nda endmëna mo chë yebna jajebuámentše más bëts uashacuanëšentše jajona ndëtšbecá, cha puerte enduámama; pero chábeñe ndošbuáchiyëngbiamna, entsopasana ntšamo Bëngbe Bëtsabe uabemana palabrenguiñe Cristbiana endayancá:  
Chë yebna jebuanënga  
tmtantsanaboté ndëtšbé,  
mora chë más bëts  
uashacuanëšentše entsejájona ca.

<sup>8</sup> Inyoca, Bëngbe Bëtsabe uabemana palabrenguiñe mëntšánaca chabiana endayana:

Cha endmëna mo ndëtšbé  
ndayentše jtsojestjiyamcá;  
y mo peñëšcá yomna chënga  
chamotsótsatsama ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

<sup>9</sup> Pero tšëngaftanga šmondmëna Bëngbe Bëtsábeyeca bocacánënga, y mo canye rey tmojtsseservena bachnangcá, y šmondmëna Bëngbe Bëtsabe entshanga nye chabiana jtsetrabájayama, y chë nye Bëngbe Bëtsábënga šmomnënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayiynama. Cha endmëna nda tcmojáchembo chašmotsajbanama oyanana mo ndoñe binýniñcá jtsejuabnayeşe y jtsamëşe, cháftaca jtsemnama chašmotsobenama, chë tšëngaftangbe juabnënga puerte

binÿnayáftaca. <sup>10</sup>Tempo tsëngaftanga ni mo cánÿentša entsangá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsanga šmontsemna; tempo šmonjamna entsanga ndocná tonjánalastemanga, pero mora, Bëngbe Bëtsá aíñe lastemado tsëngaftangaftaca entsemna.

**Bëngbe Bëtsá jtseservënama  
jtsiyenana**

<sup>11</sup>Atšbe bonshánënga, ndayentšë tsëngaftangbe ndegombre luare yomna, celoca endmëna, y muentšë quem luarentšë, tsëngaftanga šmondmëna mo ínÿoicana ashjajnëngcá, y mo canÿe luarëjana nÿe achnejuanëngcá, cach tsëngaftangbe luaroye átayíñe. Chíyeca cbontsaïmpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsenpenzétsiyana, chentšë jtsemándayama y Uámana Espíritu ndoñe chaondëtsemándama. <sup>12</sup>Chë Bëngbe Bëtsábïoye nduabatmëngbeñe sempre šmochtsiyena tsábá jtsamëse; chca chënga, masque mora tsëngaftangbe contra imojtsoyebuambná, tsëngaftanga mo bacá uamana entsanga cuaftsemnëngcá, chë tsábe soyënga ntšamo tsëngaftanga šmojtsamcá chamuinÿama, y chca, Bëngbe Bëtsá chëngbïoye chaojenonÿinÿé te, chábïoye chënga chamotsatschuanama.

<sup>13</sup>Bëngbe Bëtsá šmoyeunanama, nÿetsca entsanga mando bomnëngbïoye šmochtsobedecena; chë Romoca bëts mandádbïoye, cha chë quem luarentša más uámana puesto jtsemándayama endbómnyeyca; <sup>14</sup>y chë tsëngaftangbeñe mandadëngbióynaca, ndëmuanÿenga

cha jíchamuana chë bacna soyënga amënga jácastigama, y chë tsábe soyënga amëngbiama tsábá imojtsama ca chamuayanama. <sup>15</sup>Chë mando bomnëngbïoye šmochtsobedecena, er Bëngbe Bëtsá endboše tsëngaftanga tsábe soyënga chašmotsamama, chca, chë ndosertánënga chë tsëngaftangbiama podesca ichámënga, ntšamo ndegombre yomncá ntsetatšëmbcá, tondaye chamondëtsebomna tsëngaftangbe contra jayanama.

<sup>16</sup>Šmochtsiyena tsábá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnana ndoñe šmattsejuabnaye nÿe ndaye bacna soye jamama šmojtsobena ca, y nÿe chca šmochjátama. Más tsábá endmëna jtsiyenana, mo chë Bëngbe Bëtsá imoservenëngcá. <sup>17</sup>Nÿetscangbiama respeto šmochtsobomna, chë Jesucrístbeyeca catšátangbïoye šmochtsababuánÿeshana, sempre šmochtsiyena Bëngbe Bëtsabiama jtsejuabnayëse cha chë más bëtsá yomnama, y chë Romoca bëts mandado šmochtsesrespetana.

**Cristo chabe entsanga tojinÿanÿé  
ntšamo yomna jasúfrïana**

<sup>18</sup>Tsëngaftanga, chë nÿets tempo ínÿabiama canÿe yebnentšë oservënënga, tsëngaftangbe nduiñëngbïoye šmochtsayaunana, puerte respeto chëngbiama jtsebomnëse; y ndoñe nÿe chë tsábëngbïoye y nÿe tsábá mandbomnëngbïoye, ndayá chë bacá mandbomnëngbióynaca. <sup>19</sup>Nderado nda, ntšamo Bëngbe Bëtsá yobošcá jamama bošama, tojboyoá chabe nduiño cha chaosufrima tojtsama ora, masque chama jasúfrïana ndoñe

tbondmëna, chca jamëse, Bëngbe Bëtsá corente tšabá jtsinÿanana. <sup>20</sup> Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinÿanana. <sup>21</sup> Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiamna tonjansufrí, y chca cha tcmonjaninÿanyé, ntšamo jamama cmojtsamna, tšëngaftanga chca chašmotsamama. <sup>22</sup> Cristo ndocna te ndocna bacna soye chenáiseama, ni ndocnábioye chebnaiseingñé. <sup>23</sup> Chábioye tmojtsoyenguá ora, chëngbioye ndoñe ntéyánguanguana. Cha chaosufrima tmonjanma ora, cha ndocá ntjatëtsëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nyëtscanga tmojamama tšabá o ndoñe tšabá yonjamna ca yochjayana ora, chca echanjama nyë ntšamo chënga tmojamcá jtsonÿayëse. <sup>24</sup> Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnéngaca ndoñe más mandánënga chamondëtsemnana, y bënga ntšamo Bëngbe Bëtsabe bominiñe tšabá yomncá jtsamëse chamotsiyenama. Er Crístbioye chënga tmonjanlísia chaóbanama y tonjansufrí jobanëntscuana, y chca, bënga šonjanatsebacá. <sup>25</sup> Er tšëngaftanga, tempo Bëngbe Bëtsábentsana bënoca šmonjamna, mo ótsena oveshëngcá;

pero mora Cristbe benache šmojtishache, y cha cmontsanÿena, mo oveshëngbe canÿe abujajënyacá, y cha entsantješna tšëngaftanga tšabá chašmotsemnana.

**Ntšamo iuamna chë  
bouamnëngbioye jtsiyenana**

**3** <sup>1</sup> Cachcá mo chë oservenëngcá, tšëngaftángnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguñe ndošbuáchiye boyángbioye chašmobená jáyëjanama, Jesucristbeñe chamotsošbuáchema, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnayana, <sup>2</sup> er chënga mochanjinÿe tšëngaftanga šmojtsiyena, Bëngbe Bëtsá nyëtscangbiamna más bëtsá yomnana sempre jtsejuabnayëse, y ntšamo šmojtsamcá chca yojtsinÿinÿáyeca. <sup>3</sup> Cach tšëngaftangbiamna ndoñe mëntšá šmattsejuabnaye: “Entšanga atše botamaná tsmëna ca chamotsejuabnana atše nÿa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”; <sup>4</sup> ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnana, cmëbionama y šmobošama; ndocna te ndopochócaye botamanana jtsebomnana, ainaniñe nyë cach tšëngaftanga uámanënga jenobiamama juabnénga ntsebomncá, pero añe ainaniñe tšabe ebionana jtsebomnëse. Chë soyënga Bëngbe Bëtsabe bominiñe puerte enduámana. <sup>5</sup> Tempo chca, chë puerte tšabe shembásenga, chë Bëngbe Bëtsabe bocacanënguentšënga, imojanamana



jtenóbotamayana; chënga Bëngbe Bëtsábeñe imojtsanošbuaché y chábeñe imojanobátmana, y nyetscanga chëngbe boyángbioye imojánayaunana.

<sup>6</sup> Chca yojamna Sara, Abrahámioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebojnëse.

<sup>7</sup> Cachcá, tšëngaftanga boyanga, cada ona cachabe shémaftaca chaotsiyena, tšabá jtseñeyuanëse, y cha respeto buajoná chaotsemnana jtsamëse; pero chca, ndoñe nye cha acbiana más batšá obenana bomná bëtsemnana, ndayá Bëngbe Bëtsá chabiana tšabe juabna yobómnayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuéntama totcá chaondëtsemnana.

**Chë tšabe soyënga amama  
jasúfriama yojtsamënga**

<sup>8</sup> Y morna, nyetsca tšëngaftanga cachcá šmochtsejuabnaye, ínÿenga šmochtsalastemana, chë Jesucristbeyeca catšátangbioye šmochtsababuánÿeshana, ínÿengbiana chacmóngmiaye, y cada ona chaotsejuabná chë ínÿenga chabiana más uamanënga imomna ca. <sup>9</sup> Inÿenga tšëngaftangbiana ntšamo tcmojaborlá ora, ndoñe šmattéchenanguaye; ni chacmojtsëyanguá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnana cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábilocana tšabe bendicionënga chašmoháchiñama.

<sup>10</sup> Ntšamo Bëngbe Bëtsabe uabemana palabrënguiñe endayancá:

Nda toboše tšabe vida  
jëftsebojnama y puerte  
oyejuayá tempënga  
jtsebojnama,  
yejuana chaochtsenojuabná  
bacna soyëngama ndoñe  
chaondëtsoyëbuambnana,  
y ndoñe chaondëtsebojsterama.

<sup>11</sup> Bacna soyënguentšana  
chaotsojuánañe y tšabe soyënga  
chaotsama,  
natjëmbana nyetscángaftaca  
jtsiyenama chaotseboše, y  
chca chaotsemnana sempre  
chaotsentšëna.

<sup>12</sup> Chca bontsemna jamana, er  
Bëngbe Utabná, chabe  
bominÿiñe tšabe soyënga  
amëngbioye jtsanÿenana,  
chëngbiana sempre  
jtsantješnëse;  
y sempre chëngbioye  
jtsayaunanana, chábioye  
ndayámnaca tmojtsotjanañe ora;  
pero chë bacna soyënga jamana  
uamanëngbe contra cha  
jtsemnana ca —chiñe endayana.

<sup>13</sup> ¿Nda nanjobenaye  
tšëngaftangbiana bacna soyënga  
jamama, tšëngaftanga chë  
tšabe soyënga jamama sempre  
šmojtsentšënëse? <sup>14</sup> Pero masque  
tšëngaftanga cmojtsamna jasúfriama  
tšabe soyënga šmojtsamama,  
Bëngbe Bëtsá chama tšabe  
soyënga cmochántatšataye. Chë  
tšëngaftanga chašmosufrima  
amëngbiana ndoñe matauatjëngana,  
ni ainaa tsetšenánënga ndoñe  
matsmënëngana, <sup>15</sup> ndayá ainaniñe  
sempre šmochtsejuabnaye Cristbiana  
mo Bëngbe Utabnacá y chabiana  
respeto šmochtsebojnana; y sempre

šmochtseprontana jojuama ndēmuanýenga tmojttsatjaná ndáyeca tsěngaftanga Běngbe Bětsábeñe jtsošbuáchiyěse, chabiamama ainaniñe šmobátmanama. <sup>16</sup> Pero chca šmochjama tsabe ainánaca jtsěnyayěse y Běngbe Bětsabiamama respeto jtsebomněse. Šmochtsiyena tsábá jtsaměse, y chama ainaniñe ndoñe chašmondětsebomna juabněnga y chamuayana chca ndegombre ndoñe tsábá šmontsamacca, chca, inýenga tsěngaftangbiamapodesca chamojtsoyebuambná ora, tsěngaftanga Crístbeñe ošbuáchiyěnga quetsomñecá tsabe soyěnga šmojtsamama, chěnga chamotsěuatjachca tmojtsóyebuambnamama.

<sup>17</sup> Más tsábá endměna jasúfriana tsabe soyěnga tcojamama, nderado Běngbe Bětsá chca chaotsemnamatojtsebošěse, y ndoñe chě jasúfriana ndaye bacna soye tcojamama. <sup>18</sup> Er Cristo nýe canýe tonjanóbana běnga bacna soyěngama jáperdonama; chě nýetsca soyěnguiñe tsábá amá, chě Běngbe Bětsabe bominiñe ndoñe tsábá yondměna soyěnga aměngbiamama, tsěngaftanga Běngbe Bětsáftaca chašmotsatsměnamama. Entšacá, Cristo tonjanóbana, pero Běngbe Bětsá tonjanmama, cha cachiñe vida chabe espiritiñe chaotsatsbomnamama. <sup>19</sup> Pero Cristo cháuatayenama Běngbe Bětsá cabá nděma ora, chabe espiritiñe cha tojánama chě ndoñe tsabe entšanga imonjamněngbe espíritěnga utámeněnga imojamnoye, chěngbiamama castigo tojtsemněntscuana; y cha tojanayěñjanama chěnga tojanabuayená. <sup>20</sup> Quem espíritěnga baytě entsemnana, Běngbe Bětsábioye ndoñe monjáněyeunana, Noebe yojěftsiyena ora, chě bacna soyěnga aměnga chca amama

chamotsajbanama y tsabe benache chámuatishachama Běngbe Bětsá bēn yojanobátmana ora, barquěsha canduapormantscuana. Chentšana chě barquěshañe báseftanga tmojanotsbocá, posufta entšanga, búyeshe juatsbuacá chě barquěsha yojtsámnyayeca. <sup>21</sup> Chě chěnga chamótsbocama tojanějabuache bėjaye, enjamna mo chě mora jenábayama buyeshcá, chca, atsebácaněnga běnga chamotsemnamama. Pero tmojenábaye ora, běnga atsebácaněnga jtsemnana, ndoñe chě cuerpentša tsengá tmojtseñobolimpíama, ndayá běngbe ainaniñe ndocna bacna juabněnga ntsebomnamama Běngbe Bětsá tmojtseimpadánama; y běnga atsebácaněnga mondměna, Jesucristo cháuatayenama Běngbe Bětsá tojánmayeca. <sup>22</sup> Cristo celoye tojtantsjuá y Běngbe Bětsabe catšbioica yomna jamándama. Cha endměna chě aměndayá angelěngbiamama y espíritěnga mando y obenana bomněngbiamama.

#### Entšanga entsamna jtsiyenana ntšamo Běngbe Bětsá yobošcá

**4** <sup>1</sup> Chcasna, ntšamo Cristo tojansufricá, chabe cuerpiñe mo entšacá játsetšeněse, tsěngaftángnacacmontsamna jtseprontánana chca jasúfriama. Er chě Crístbeñe ošbuachiyá nda chabe cuerpiñe tojasufrí, chě bacna soyěnga amentšana tojtsojuánañe, <sup>2</sup> chca, chabe vidiñe, morscana y jobaněntscuana, jěftsiyenama ntšamo Běngbe Bětsá yobošcá, y ndoñe nýe entšangbe bacna juabněngaca, nýe quem luarentšě tsábá jěftsemnamama. <sup>3</sup> Tempo, baytě enjamna, ndayěntscuana tsěngaftanga šmonjánama soyěnga, mo chě Běngbe Bětsábioye nduabuátměnga mondbetsamcá; nýa ndoñe

más. Chë tempo, tsëngaftanga šmonjaniyena nyetsca bacna soyënga jtsamëse, jenomándama ntsobencá; tsëngaftanga šmonjánama soyënga nÿe ntšamo šmojanboščá, nÿe tsëngaftanga tsábá jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama. <sup>4</sup>Morna, chë Bëngbe Bëtsábioye nduabuátmënga montsenjaná, tsëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntsobencá; y chë causa, chënga bacna soyënga tsëngaftangbiama jtsóyebuambnayana. <sup>5</sup>Pero chënga echanjótocaye jayanama ndáyeca chca tmojamama, chë entsangbiama, chë ainënga y chë ya mochjóbanëngbiama, ntšamo tmojamama, aíñe o ndoñe tsábá bëtsemnama jayanama entseprontanabe delante. <sup>6</sup>Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿenga chë tsabe noticiëngama chëngbiyoe monjanabuayiyná, chënga chamobenama chë nyetsca tescama yomna tsabe vida chëngbe espíritoftaca jtsebomnana, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nyetsca entsanga yojsamna jóbanama ca. <sup>7</sup>Ndoñe bayté y nyetsca soyënga echanjopochóca. Chíyeca, tsëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuéntama

chašmotsobenama. <sup>8</sup>Nyetsca soyëngama, masna, sempre nyetscanga puerte šmochtsenbobonshana, er nda ínÿenga puerte tojtsababuanÿeshaná, sempre jtseprontánana ínÿenga jáperdonama, chëngbiama bacna soyënga tmojamama. <sup>9</sup>Nyetscanga šmochtsamana tsëngaftangbe yebniñe jenofjana, chca jamama totcá yojtsemna ntjatichamcá. <sup>10</sup>Nyetsca tsëngaftanga Bëngbe Bëtsá tmojatšatá obenana tsabe soyënga jamama; chca, chë obenánaca cmontsamna jtsamana soyënga chë ínÿengbe tsabiama, chë Bëngbe Bëtsá cmojatšatá nyets obenánaca ínÿengbiyoe jujabuáchama, nyets tempo tsabe soyënga jtsamëse. <sup>11</sup>Nda tojtsabuayiyná, Bëngbe Bëtsabe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿenga tojtsaserverna, chca chaotsama chë Bëngbe Bëtsá yojsama cha chaotsebomnana obenánaca. Nyetsca soyënga ntšamo šmojtsamcá chaotsinÿanÿná Bëngbe Bëtsá puerte uamaná y obená bëtsemnama, Jesucrístbeyeca. Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

**Puerte tsábá endmëna,  
Crístbeñe tcošbuáchemá,  
jasúfriama tbojtsemnëse**

<sup>12</sup>Atšbe bonshana entsanga, ndoñe šmattsenjanaye padecena soyënguñe šmojtsesufrínama; chiñe jtsinÿnana ntsachetšá ošbuáchiyana šmobomnana. Chca ora ndoñe šmattsejuabnaye, tsëngaftanga ndoñe cmondamna chca soyiñe jtsachñëjuayana ca; <sup>13</sup>chamna, šmochjóyejuaye chë ntšamo Cristo tojansufricá šmojtsesufrina ora, chca, Cristo corente obenánaca y uamanacá entsángbeñe chaojtonÿná te,

tšëngaftanga puerte chašmotsóyejuama.

<sup>14</sup> Puerte šmochtsóyejuaye, nderado nda tcmojoyánguango Cristbiamá bétsoervenayeca, er Bëngbe Bëtsabe Espíritu, chë corente bëtásá endmëná, sempre tšëngaftangbe ainaniñe iuétsemna. <sup>15</sup> Tšëngaftanguentšë ndocná chabondëtsemna jasúfriama inya óbanaye causa, atbëbanama, bacna soyënga ínÿengbiama amama, o ínÿengbe soyënguñe ontremeténama. <sup>16</sup> Pero Cristbe ustóná tomnama tojasufrí, chama ndoñe chaondëtséuatja; chamna, Bëngbe Bëtsábioye chabotsatschuaná, cha Cristbe ustóná bétsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiama, chabe entšangbiama, tšabá o ndoñe tšabá tmonjamama. Cha chca bëngbiama jayanama tojontšëse, chë chabe palabra ndobedecenëngaftaca yochjanopasacá puerte uabouana echántsemna, cha chëngbiama chca chaojayana ora. <sup>18</sup> Y chca, chë Bëngbe Bëtsabe bominÿiñe tšabá amabiamá ndoñe paselo atsbocaná jtsemnama tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca?

<sup>19</sup> Chcasna, chë imosufriñëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšíñe chëngbe espíritu chamoboshjona cha chaotsinÿenama, er cha chënga tojánabiama, y nyetsca soyënguñe tšabe palabra bomná cha endmëna.

**Crístbeñe ošbuáchiyënga  
jábuayenama**

**5** <sup>1</sup> Y mora, chë tšëngaftangbentšë ošbuachiyëngcá enefjuanëngbeñe bëtšëjemëngcá amëndayënga

chanjabuayená, atšë cach tšëngaftangcá bëtšëjema, canya ntšamo Cristo tonjansufriacá tonjaninÿá y chama ínÿenga tonjanéyana, y canya ndábioye cach tšëngaftangcá Bëngbe Bëtsá bochjábema más uamana y bëtásá, Cristo entšángbeñe chaojtonÿná ora; tšëngaftanga cbaruayená.

<sup>2</sup> Ošbuáchiyënga šmochtsanÿena; chënga chašotsanÿenama Bëngbe Bëtsá chca tcmojábiamá. Chca, chentšá ošbuachiyëngbeñe šmochtsama ntšamo canye tšabe abujénÿa chabe ovehëngaftaca endbetsamcá. Bëngbe Bëtsabe trabajo ndoñe šmattsama, nÿe cmojtšétocanama, ndayá chca jamama šmojtsebóseyeca. Chca ndoñe šmatjama nÿe paselo crocénana juácanama, ndayá ínÿengbioye jujabuáchama tša šmobóseyeca.

<sup>3</sup> Chë cmojtsamna jtsanÿenama ošbuáchiyënga ndoñe nÿe bëtscá šmattsaméndaye, mo chëngbe nduiñënga cuafjatsmëñëngcá, ndayá ntšamo tšëngaftanga šmojtsiyenama, chënga šmochjínÿanÿiye ntšamo yojtsamna jtsiyenana. <sup>4</sup> Chca, chë bënga nyetscanga, mo chë tšabe abujénÿacá šuanÿená, quem luaroye yochjésabo ora, mo canye uabuashinÿinÿana coronésha ndocna te tontsandbemëshacá, tšëngaftanga canye bëtš uacanana soye šmochanjóyëngacñe, y chë soye endmëna nyetsca tescama; Bëngbe Bëtsá uámanënga y bëtšétsanga cmochanjábiamá, cháftaca nyets tempo oyejuayënga jtsemnëse.

<sup>5</sup> Cachcá, tšëngaftanga chë bobontšëngnaca cbaruayená, sempre šmochtsejuabnaye chë bëtšëjëmënga tšëngaftangbe amëndayënga imomnama, y chca šmochtsama. Cada ona tšëngaftanguentšá bontsemna jtsejuabnayana chë

ínýenga tšëngaftangbiana más uámanënga cuaftsemncá, ínýengbioye šmojtšaservena ora; er ntšamo Bëngbe Bëtsabe uabemana palabrenguiñe endayancá:

Bëngbe Bëtsá chë nyë  
cachënga uámanënga  
tmojtšenobiamnangbe contra  
entsemna,  
y chë ndoñe uámanënga  
montsenobiamnangbiamna,  
Bëngbe Bëtsá más tšabe juabna  
entsebomna ca.

<sup>6</sup> Siempre šmochtsejuabnaye Bëngbe Bëtsá chë más bëtsá nyëtscangbiana yomnana, y nyëts mando y obenana bomná yomnana, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora. <sup>7</sup>Nyëtsca soyënga ndayama šmuenócochinýenama Bëngbe Bëtsabe cucuatšíñe šmochjáboshjona, er cha tšëngaftanga yejuana cmondánýena.

<sup>8</sup> Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canýe león tojtsejató, nda jtsósañama tojtšana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama.

<sup>9</sup> Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nyëts luarënguenache cachcá jasúfriama yojtsamnama jtsetatšëmbëse. <sup>10</sup> Pero tšëngaftanga baseftaytë chašmojasufrí chentšana, Bëngbe Bëtsá cmochanjábiana nyëtsca soyënguiñe puerte tšábenga, puerte chašmotsemorochama, bëtscá ošbuáchiyana y bonshánana bomnënga

jtsemnëse, y ainaniñe corente añemo bomnënga chašmotsemnana; Bëngbe Bëtsá, chë bëngbiana tšabe juabna bomná, bënga nyëtsca tšabe soyënga šonjatšatá, y nda bënga sojáchembo nyëtsca tescama bëtšétsanga jtsemnana, chca echanjama. <sup>11</sup> Cha nyëts obenana nyëts tempo y nyëtsca tescama chaotsebomna. Chca chaotsemna.

#### Jtadióšoftanama

<sup>12</sup> Silvano, ndabiana sëndëjuabná atšbiana canýe tšabe palabra bomná Jesucristbeyeca catšata yomnana, cháftaca quem base tsbuanácha tcbonjubuábiana. Atšë séntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chíyeca, siempre šmochjéftsiyena jtsamëse ntšamo chabe tšabe juabna tšëngaftangbiana yomncá.

<sup>13</sup> Ošbuáchiyënga muentšë átšeftaca montsemnënga cmontsachewaná. Chënga quem bëtš pueblentšë mondoyena bacá uamana entšángaftaca, mo chë tempo, Babilonia bëtš puebloca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaquíñacá endmënë, chánaca cmontsachewaná. <sup>14</sup> Nyëtscanga Jesucristbeyeca catšatangcá šmochjenchuaye, jtenámochëse tša šmojtšenbobonshánama.

Atšë, Bëngbe Bëtsá séntseimpadana cha chaoma tšëngaftanga chë Jesucristoftaca cánýiñe mo canýacá šmognënga, nyëtscanga ainaniñe tšabe ebionana chašmotsebomnana.

## 2 San Pedro

### Jacheuyama

**1** <sup>1</sup> Atše Simón Pedro, Jesucristbe oservená y chabe ichmoná, quem tsbuanácha séntsabiamná tšëngaftangbiama, ndëmuanyënga šmojashjache jtsebonnama canyë ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nyëtscanga chábeñe chamotsošbuáchema.

<sup>2</sup> Atše séntseimpadana, tšëngaftanga Bëngbe Bëtsabiana y Bëngbe Utabná Jesusbiana cada te más jtsetatšëmbëse, Bëngbe Bëtsá chaoma tšabe bendicionënga tšëngaftangbeñe chaotsemnama y chaoma tšëngaftanga ainaniñe tšabe ebionana chašmotsebonnama.

### Chë Jesucristbeñe ošbuáchiyëngbe tšabe soyënga

<sup>3</sup> Bëngbe Bëtsá chabe obenánaca tojama bënga chamobená jtsebonnama, lempe ntšamo tmojtšëjbotcá tšabe vida jtsebonnama y jtsiyenama, Bëngbe Bëtsá jadórana soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëts soyënga jamëse, chabe entšanga chamotsemnama. <sup>4</sup> Chca, Bëngbe Bëtsá šojatšatá ntšamo bënga jatšatayama

tojanašebuachenacá, bëts y uámana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebínynana, entšanga nÿe cachëngbe bacna juabnéngaca jtsiyenama yapa boše causa. Chánaca chë tšabe soyënga šojatšatá, tšëngaftanga cháftaca cányñe mo canyacá chašmotsemnama, cachacá jtsemnama jashjáchëse. <sup>5</sup> Chca, ndoñe quenátsmëna nÿe Jesucristbeñe ošbuáchiyana jtsebonnama; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama; <sup>6</sup> chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque padecena soyënguiñe chašmojtsachñëjuana, ainaniñe puerte añemo jtsebonnëse, puerte uantadënga chašmotsemnama; y chentšana bëtscá šmochtsama, tšëngaftanga Bëngbe Bëtsá šmojtsadoránama jinñanyiyama; y <sup>7</sup> chca, nyëtsca tšëngaftanga ošbuáchiyënga chašmotsenbobonshana; y chca, nyëtsca entšanga chašmotsababuánÿeshana.

<sup>8</sup> Tšëngaftanga lempe chë soyënga šmojtsebonna, y bëtscá chca šmojtsamëse, šmochantsiyena becá oservena soyënga jtsamëse, y chentšana puerte tšabe soyënga echantsóbocana,

corente tšabá Bëngbe Utabná Jesucristo chašmotsábuatmama. <sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canye jtaná o nduabinýnacá jtsemnana; cha tbojtsebnatjëmbe Bëngbe Bëtsá chabe tempca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënema tojamama. <sup>10</sup> Chíyeca, Jesucristbeyeca atšbe catsátanga, nýa šmochtsentsëna chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnama tcmojáchembuama y tcmojábacama; y chca jtsamëse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bëngbe Bëtsá oyejuayá tšëngaftangbiana echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atše sëntsejuabná tšëngaftangbiye sempre chë soyëngama jtsabuayiynayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtсийena, chë mora šmojtsetátšëmbo soyënguiñe.

<sup>13</sup> Sëntsejuabná, chajjéftsainëntscuana tšabá yojtsemna jamana, ainaniñe bëtscá añemo chašmotsebomnana chë soyënga jtsamama, ntšamo tijayancá jtsabuayiynayëse. <sup>14</sup> Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjéftsanbuayenacá; <sup>15</sup> pero bëtscá chanjéftsema, atše chajjóbana chentšánënaca tšëngaftanga nýets tempo chë soyëngama chašmotsenójuabnama.

### **Cristo corente uamaná y obená vojammama tmojaninýe ora**

<sup>16</sup> Bëngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmëna entšangbe osertánanaca pormana cuentëngaca, er cach bënga botamana fsënjáninýe chabe uámanana y obenana. <sup>17</sup> Bëngbe Bëtsá chë Taitá, Jesucristo puerte obenana bomná bëtsemnana y cha corente bëtsá y uamaná bëtsemnana tonjaninýinýé ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtšabiocana oyebuambnayana Jesúsbioye mëntšá tbonjaniyana ora: “Mua atšbe bonshana Uaquiñá endmëna, atše chabiana sëntsoyejuá ca.”

<sup>18</sup> Cach bënga chë oyebuambnayana fsënjauena, chë celocana tonjanóbcnana, er bënga Bëngbe Utabnáftaca fsënjannmëna, chë uámana tjoca.

<sup>19</sup> Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnana, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabréngaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canye uajuinýanésha canye ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nýetsca soyënga cmochanjínýanýiye, mo tšëngaftangbiana canye tsëm te cuafjabinýncá, y chë jabínýnama ora bínýnaye estrella tojábocna tšëngaftanga jabuabinýnamcá.

<sup>20</sup> Pero natsana chacmésertá, ndocna palabra Bëngbe Bëtsabe uabemana palabrënguine tojayana canye soye yochjopása ca, cabá chca ndopása ora, nye cach Bëngbe Bëtsabe juabna oyebuambnayëngbe juabnentsana tojanóbocnama; <sup>21</sup> er Bëngbe Bëtsabe juabna oyebuambnayënga ndoñe monjanoyebuambná nye chënga chca jamama imnabóseyeca, ndayá Bëngbe Bëtsabe cuenta tmojanoyebuambá, chë Uámana Espiritu chënga chca chamóyeuambama tojánmayeca.

**Chë ndoñe ndegombre soyënga  
buátëmbayënga**  
(Judas 4-13)

**2** <sup>1</sup> Chë Bëngbe Bëtsabe juabna oyebuambnayëngbe tempo, Israeloca entsángbeñe baseftángnaca imojamna, ndëmuanýënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tsëngaftangbeñe abuátambayënga mochántsemna, y chënga ndoñe ndegombre soyënga mochántsubuatambaye, pero ndegombre soyëngaca cánýiñe, chca, chënga chca imojtsabuátambama entsanga ndoñe chamondétatsëmbonama. Chë buátëmbana soyënga echanjama, entsanga ndoñe ndegombre soyënga y bacna soyënga chamotsamama. Ntsámo chënga mochántsama y mochántsubuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínýenga játsebacama crocénana cuafjétsajocá. Y chca, nye ndeolpe, chë Bëngbe Bëtsábiocana uabouana castigo nyetsca tescama mochántsebmna. <sup>2</sup> Banga chëngbioye

mochantsésetona, nyetscna bacna soye, jenomándama ntsobencá jtsamëse; y chëngbe causa, ínýenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. <sup>3</sup> Chënga bëtscá crocénana jtsebomnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nyetsca tescama chaotsemnámna.

<sup>4</sup> Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infiernoye tojtsanatsatše y puerte ibetiñe tojtsanabáshejuana, chë uabouana tboca chamoquedama, Bëngbe Bëtsá chëngbiana nyetsca tescama castigo chamotsebmnama yochjayana orscama. <sup>5</sup> Y cach ndoñe quem luarentša entsángbioye tonjanaperdoná Noé yojéftsiyena ora, y chënga jácastigama aíñe tojanma chë uabouana uaftena chëngbeñe chaotsemnama, chë nduauenana y bacna entsanga jtsapochócama. Chentsana, nye Noébioye, tbojanatsbocá, nda entsanga yojanabuayiyiná ntsámo jtsiyenana, Bëngbe Bëtsabe bominýiñe tšabá yomncá jtsamëse; cha y inye canýsëftangnaca tojanatsebacá. <sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entsanga, yapa bacna entsanga imojamnama, bëts castigo jtsebomnama yojánamnama; y ínesheca tojtsanapochocá, chë pueblënga y chentsá entsanga jatinýá jtsabiamëntscuana. Y chë sóyeca Bëngbe Bëtsá tojaninýanyé ntsámo bacna entsángaftaca yochjama, chë chentsana mochtsiyena bacna



entsangbiam. <sup>7</sup> Pero Bëngbe Bëtsá Lótbioye tbojanatsbocá, chë bëts pueblënga pochócaentšana. Cha yojamna Bëngbe Bëtsabe bominÿinë tšabá amá, y ntšamo chë luarentša entsanga imojaniyenama, nyetscna bacna soye jtsamëse, jenomándama ntsobencá, cha puerte ngménana inabomna. <sup>8</sup> Er quem tšabe entšá, chëngbeñe oyená, chë entsanga imojtsama bacna soyënga cada te yojanonÿaye y yojanuenana ora, puerte chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyetsca tescama chë bëts castigo chamotsebomnama jamándama.

<sup>10</sup> Chca ndegombre endmëna, y más chë ndëmuanyënga nÿe cachëngbe cuerpëngama bacna juabnëngaca jtsamëse imoyenëngbiam, chënga chë Bëngbe Utabnabe mando jtsaboténana. Chënga bacá buátšenanënga mondmëna y jtsebošana nÿe ntšamo cachënga tmojtsejuabnacá chaotsemnama, y ndoñe ntsauatjana chë espíritënga obenana bomnëngbiam puerte bacna soyënga jtsóyebuambnayama.

<sup>11</sup> Chamna chë angelënga, masque más añemo y obenana bomnënga mondmëna, ndoñe jennëmuana chë espíritënga obenana bomnëngbiam chca jayanama, chëngbiam ndoñe tšabe soyënga jtsóyebuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsésertana

soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

<sup>13</sup> Chënga mochanjasúfria, ínÿyenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe mo ošbuachiyëngcá tmojtsesá ora, tšëngaftangbiam ouatjácá jtsemnana y chëngbe causa, ínÿyenga tšëngaftangbiam podesca mochántsicamo, er chënga chentšë oyejuayënga jtsemnana, nÿe chënga tšabá jtsemnama jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntsobenana canÿe shembása jinÿyana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuáchiyana bomnënga jtsaíngñayana, y siempre jtsentšënanana nÿe más soyënga jésebošama y jésebomnama, ínÿyenga tmobomnama más soyënga jashjáchama; chënga montsemna pochocánënga jtsemnama.

<sup>15</sup> Chënga chë tšabe benachentšana tmojtsojuánañe, y mora mo otšëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uoquiñá. Cha yapa inaboše bëtscá crocénana juácánama ínÿyëngbiam bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácacana,

cachabe asno chábioye chabuatsêtsama jamëse; y chca, ndoñe tbonjanlesenciá jama chë ndocna juábnaca soye jamama.

<sup>17</sup>Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntoservénana, y chca, chënga jtsemnana mo búyeshe obocantšë tojtsebuashjá; y chënga mora canye soye jtsejuabnayana y chentšana injëtšá; chca chënga jtsemnana mo jantšetëshënga bëtš bínjiaca bonjnëshëngcá. Chëngbiama Bëngbe Bëtšá tojayana castigo chamotsebomnana, chë más ibetoca, tondaye binjñiñe luarentše.

<sup>18</sup>Chënga ba botamana palabréngaca jtšenábotamnayana, pero tondayama ntoservénana; y chë cabá mora Jesucristbeñe tmojtsošbuachéngbioye jtšaiñgñayama, chënga ntšamo chëngbe enutënga Bëngbe Bëtšábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñjanase, nje cachënga tšabá jtsomñama bacna juabnéngaca soyënga chamotsamama, cachënga jenomándama ntosobencá. <sup>19</sup>Chë abuátambayënga jašebuachenana tšabe vida jónyënama, nje ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnéngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë njëtš tempo tobedecena sóyeca.

<sup>20</sup>Er ndëmuanjyënga, Bëngbe Utabná y Atsebacayá Jesucristo tmojtšábuatmama, tmojtsajbaná oyenana mo chë nje quem luarama enójuabnaye entšangcá, njëtšca bacna soye amana y tša bacna juabnénga

ainaniñe bomnana, pero mora cachiñe chë soyënguñe tmojtšajna, y cachiñe mandánënga tmojtsemna chë bacna juabnéngaca, chënga mora más bacá tempscama jabocanana.

<sup>21</sup>Chëngbiama más tšabá manjamna ndoñe ntjobenayana jtsetatšëmbuana ntšamo Bëngbe Bëtšabe bominjñiñe tšabá yomncá inétsamama, chë soye jatabuátmanana y chentšana játajbanana chë buátëmbana soyënga y chë abuayiyayéngaftaca chëngbioye Bëngbe Bëtšá tojanoyé mandënga jtsobedecénana. <sup>22</sup>Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jeshéconana ca” y “chë cotše cabá chora bebená, ngüichetšoye jana jetsójanduouoyama ca”.

### Jesucristo quem luaroye jésabama ora

**3** <sup>1</sup>Jesucristbeyeca atšbe bonshana catšátanga, móraca ya uta soyama chbontsëbuabiamná. Quem uta tsbuanáchaca atše sënjábošena jamama tšëngaftangbe juabna nje ena tšabe soyëngaca chaotsemnana, y chca chaotsemnamna atše jtsabuayiyayëse chë tmojanabuatambá soyëngama.

<sup>2</sup>Atše séntseboše tšëngaftanga chašmotsenujuabná, ntšamo chë inye tempënga ora, chë nje Bëngbe Bëtšábioye jtsoservénëse, chabe juabna oyebuambnayënga tmojánayanama, y chë Bëngbe Utabná y Atsebacayabe buátëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

<sup>3</sup>Pero masna quem soye chacmotsésertana: Jesucristo quem luaroye jésabama tempo chaojtsobeco

ora, mochántsemna entsanga y chënga  
 mochantsiyena nÿe cachënga tšabá  
 jtsomñama bacna juabnéngaca, y  
 cmochantsébuayajuana, chë Cristo  
 yochjésabama šmošbuáchema. <sup>4</sup>Chënga  
 mëntšá mochántsicamo: “Cristo  
 tcmojanašebuachená quem luaroye  
 jésabama. ¿Ndegombre chca? Chcase,  
 ¿ndayentše cha yojtsemna? Bëngbe  
 bëtsétsanga, ndémuanÿengbioye  
 cha tojanašebuachená quem luaroye  
 jésabama, ya tmonjóbana, y quem  
 luarentše lempe cachca endesomñe,  
 ntšamo quem luare tojanobojatšé  
 orscana enjamná ca.” <sup>5</sup>Chë entsanga  
 ndoñe ntsebošana jtsejuabnayana  
 ya bayté yojtsemna, Bëngbe Bëtsá  
 tojanmandá y chca tojanma celoca  
 y quem luare chaotsemnama. Cha  
 quem luare tojanma búyeshentsana  
 y búyesheca; <sup>6</sup>y cach búyeshecnaca,  
 chë uabouana uaftenentša béjayeca,  
 ya bayté yojtsemna, cha lempe quem  
 luarentše yojanbinÿncá tojtsanpochocá.  
<sup>7</sup>Pero chë mora entsemna celoca y  
 quem luare, cach Bëngbe Bëtsabe  
 mándoca, ndoñe quenátópodena  
 chamotsepochochama, chë Bëngbe  
 Bëtsá jayanama chábioye ndoñe  
 mondadoránënga ntšamo tmojamcá  
 ndoñe tšabá yonjamnama, y chë bacna  
 soyënga tmojamama nÿetsca tescama  
 castigo chamotsebochnama jamándama  
 tempo candóshjanguëntscuana. Chora  
 Bëngbe Bëtsá, celoca y quem luare  
 ñesheca echantsepochóca.

<sup>8</sup>Pero, atšbe bonshánënga, canÿe  
 soye endmëna y chë soye ndoñe  
 chacmondébnëtjomba: Bëngbe  
 Utabnabe juabnama, canÿe te  
 endmëna mo canÿe uaranga uatcá,  
 y canÿe uaranga uata mo canÿe  
 tecá. <sup>9</sup>Ndoñe quenátšmëna, ntšamo  
 báseftanga jtsejuabnayana, ntšamo  
 tojašebuachenacá cha ndoñe betscó

yochanjama ca, chë cha quem luaroye  
 jésabama, ndayá chana puerte uantado  
 tšëngaftangaftaca comna; er cha  
 jtsebošana ndocná nÿetsca tescama  
 castigo chaondétsebochnama, ndayá  
 nÿetscanga bacna soyënga amana  
 jtsajbanase, Bëngbe Bëtsabe tšabe  
 benache chamuashjáchama.

<sup>10</sup>Pero Bëngbe Utabná echanjésabo  
 ndocná chama chaondétsejuabná ora,  
 mo canÿe atbëbanacá jashjanguana,  
 ndocná chama tontsejuabná ora. Chora  
 celoca echanjopochóca, canÿe jabuache  
 shauenanánaca, y quem luare ndaye  
 soyënguentšana yomnana ñesheca  
 echántsefjatëjo, y ndayá Bëngbe Bëtsá  
 y entsanga quem luarentše tmojamcá,  
 lempe echántsejuinÿe.

<sup>11</sup>Lempe chca japochócama  
 entsémnayeca, ndegombre  
 tšëngaftanga cmontsamna jtsiyenana  
 ntšamo chë Bëngbe Bëtsabe entsanga  
 jtsiyenana entsamná, y nÿets tempo  
 jtsamëse chë Bëngbe Bëtsábioye  
 jtsatschuanayama yomna soyënga,  
<sup>12</sup>tšëngaftanga chë Jesucristo quem  
 luaroye jésabama chaóshjanguama  
 šmojtsobátmanëntscuana; y nÿa  
 šmochtsentšena cha más betscó  
 cháuesabama. Chë te ñesheca  
 celoca echántsejuinÿe, y ndaye  
 soyënguentšana quem luare yomnana  
 cach ñesheca echántsefjatëjo. <sup>13</sup>Pero  
 bënga mondobátmana ntšamo cha  
 šojašebuachenacá: canÿe tsëm luare,  
 mo canÿe tsëm celoca y tsëm fshantscá,  
 y chentše nÿetscanga mochantsiyena  
 ntšamo Bëngbe Bëtsabe bominÿiñe  
 tšabá yomncá jtsamëse.

<sup>14</sup>Chíyeca, atšbe bonshánënga,  
 chë soyënga chaotsemnama  
 šmojtsobátmanëntscuana, nÿa chiñe  
 šmochtsentšena, chca, cha yochjésabo  
 ora, chacmanÿena oyeniñe tšabá  
 Bëngbe Bëtsáftaca jtsatsmëñese,

ínÿengaftaca natjémbara jtsiyenése; chacmanÿena ainaniñe ndocna bacna soye ndbomnënga, y puerte tšabá jtsamése oyeniñe; chca, ndocná chaondobená jayanama tšengaftanga ndaye bacna soye šmojama ca.

<sup>15</sup> Quem soye šmochtsejuabnaye: Bëngbe Atsebacayá ndoñe yapa betesco tonjésabësna, chca jtsemnana cha puerte uantado nÿetscángaftaca yómnayeca; chca cha yomna, ba entsanga chë bacna soyënga amana chámajbanama y chabe benache chámuatishachama y chca, atsebácanënga chamotsemnana. Cach quem soyëngámnaca, Jesucristbeyeca bëngbe bonshana catšata Pablo tcmönjanëbuábiama, chë Bëngbe Bëtsá tojanma cha chaotsebomnana osertanánaca. <sup>16</sup> Chë soyëngama, Pablo nÿetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentsšana inÿetšá juabnayënga, jtsejuabnayana y ínÿengbioye

jtسابuayiynayana ndoñe ndegombre yondmëna ca. Y cachcá jtsamana inÿe soyëngaca, Bëngbe Bëtsabe uabemana palabrënguiñe. Chca chënga montsajna pochocánënga jtsemnana.

<sup>17</sup> Chíyeca, atšbe bonshánënga, tšengaftanga chë ya šmojtsetátšëmbo chë ndoñe ndegombre soyënga abuátambayënga mochtsemnana, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínÿënga jáingñama, tšengaftanga ndoñe chašmondëtsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá.

<sup>18</sup> Pero atšna, Bëngbe Utabná y Atsebacayá Jesucristo séntseimpadana, tšengaftanga chašmotsiyena jtsamése, chë chábentšana šmojóyëngacñe ba soyënga ntšamo tomnana jtsejuabnayëse, y chaoma tšengaftanga cada te más tšabá cha chašmotsábuatmama. iNÿetscanga cha chamotsatschuaná, mora y nÿetsca tescama! Chca chaotsemna.

# 1 San Juan

Cristo, chë nyetsca tescama  
yomna tšabe vida entšanga  
chamotsebomnama amá

**1** <sup>1</sup>Bënga cbontsëbuabiamná chë Bëngbe Bëtsá ndabiajana inétsoyebuambnabiamna, chë nyetsca tescama yomna tšabe vida entšanga chamotsebomnama iuamabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašëngaca chabe oyebuambnayana fsënjouena y bëngbe bomínýeca cha tonjama soyënga fsënjínýe. Aíñe bënga cha fsënjínýe y bëngbe cucuatšëca fsënjábojajo. <sup>2</sup>Cha béngbentšë tonjanonýná y fsënjáninýe; chíyeca bënga chabiamna cbontsëtsëtsná y cbontsabuayiyná, nda sempre vida yobomna y nda chë nyetsca tescama yomna tšabe vida entšanga chamotsebomnama iuama. Chana, chë Taitá Bëngbe Bëtsáftaca inamna, pero mora béngbioye šojinýanyé. <sup>3</sup>Bënga tšëngaftanga cbontsabuayiyná ntšamo tifjinýe y tifjouencá, tšëngaftanga cánýiñe mo canýacá béngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaqiñá Jesucrístoftaca. <sup>4</sup>Bënga quem soyënga tšëngaftanga cbontsëbuabiamná, béngbe oyejuayana corente bëtsá cháotsemnama.

Bëngbe Bëtsá endmëna chë  
entšangbiamna binýnayá

<sup>5</sup>Mëntšá entsemna ntšamo Jesucrístbentšana tifjouencá y chca tšëngaftanga cbontsabuayiyná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. <sup>6</sup>Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatšëne, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. <sup>7</sup>Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaqiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabuanayaye, y echanjama bënga chabe delante tšabá chamotsatsmënama.

<sup>8</sup>Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjóyëngacñe; <sup>9</sup>pero bënga ndegombre bacna soye amënga fsëndmëna ca, Bëngbe Bëtsá tmojuayanëse, cha bënga šochanjínýanyíye cachá chë ntšamo

šojijtsašebuachecá amá y nyetsca soyënguine tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. <sup>10</sup>Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canye bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjójyëngacñe.

### Cristo, bëngbe obuauyayá

**2** <sup>1</sup>Tšëngaftanga mo atšbe basengcá, er atšbe tcbonjanéjabuache Jesucristbe tšabe noticiënguine chašmotsošbuáchema, quem soyënga cbontsëbuabiamná bacna soyënga ndoñe chašmondétsamama. Pero ndánaca Crístbeñe ošbuachiyënguentšá bacna soye tojamëse, bënga canye obuauyayá Bëngbe Bëtsabe delante montsebmoma, y cha endmëna Jesucristo, chë nyetsca soyënguine tšabá amá. <sup>2</sup>Jesucristo tonjanóbana ndoñe nye Bëngbe Bëtsá bënga chášuaperdonama bëngbe bacna soyëngama, ndayá quem luarentša nyetsca entšángnaca chëngbe bacna soyëngama cháuaperdonama.

<sup>3</sup>Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. <sup>4</sup>Pero nda tojayana: “Atšbe Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjójyëngacñe. <sup>5</sup>Pero nda ntšamo Bëngbe Bëtsá ibuamëndacá tojtsama, jtsinýanýanayana chabe ainaniñe Bëngbe Bëtsabiana corente bonshánana yomnama, y

chca, mochántsetatšëmbo bënga sempre cánýiñe mo canýacá cháftaca imomnama. <sup>6</sup>Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojéftsiyencá.

### Canye tsëm mando

<sup>7</sup>Atšbe bonshana entšanga, ntšamo mora cbontsëbuabiamnacá, ndoñe canye tsëm mando quenátsmëna, pero aine canye tempca mando; entsemna cach tšëngaftanga Cristbe ústonënga šmonjanobiana ora šmonjanóyëngacñe mando. Quem tempca mando entsemna ntšamo tšëngaftanga bëngbentšana šmonjouencá.

<sup>8</sup>Pero masque chca endmëne, quem cbontsëbuabiamná soye tšëngaftangbiana echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tšëngaftángnaca cachcá šmondoyena, er chë bacna juabnënga jtsebmönëse mo ibetiñcá jtsiyenana tempo ya echanjochnëngo, y chë entšangbe juabna ndegombre binýnayá ya entsebuashinýinýana.

<sup>9</sup>Nda tojayana chë binýnayáftaca yojtsemna ca, pero cha chabe catšátbiye tbojtsáboyënja, cha cabá tempcá, bacna juabnënga jtsebmönëse yojtsiyena, mo ibetiñcá. <sup>10</sup>Nda chabe catšátbiye tbojtsebobonshana, cha chë binýnayáftaca jtsiyenana, y tondaye queochátsmëna cha bacna soye chaotsamama. <sup>11</sup>Pero nda chabe catšátbiye tbojtsáboyënja, cha bacna juabnënga jtsebmönëse jtsiyenana, mo canýa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebmönëse jtsiyenana chábíoye ndoñe

ntjalesénciana ntšamo tšabá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca. <sup>13</sup> Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátšama orscana ya inamná. Tšëngaftanga bobontsëngnaca cbontsëbuabiamná, er tšëngaftanga ya chë nyetsca bacna soyënga mandayá Sanatás šmonjayëñjaná.

<sup>14</sup> Básenga, tšëngaftanga tcbonjubaábiana, er tšëngaftanga chë Taitá ya šmonjuábuatmana. Taitanga, tšëngaftanga tcbonjubaábiana, er tšëngaftanga ya šmonjuábuatmana chë quem luare jobojátšama orscana ya inamná. Bobontsënga, tšëngaftángnaca tcbonjubaábiana, er tšëngaftanga bëtsá añemo ainaniñe šmambá, y Bëngbe Bëtsabe palabrama sempre tšëngaftangbe ainaniñe šmondëjuabná, y chë nyetsca bacna soyënga mandayá šmonjayëñjaná.

<sup>15</sup> Ndoñe matsbošana oyejuayënga jtsemnana nye quem luarentša soyëngaca, ni nye chë soyënga jtsebmomnama. Nda yapa tojtseboše quem luarentša bacna soyënga jtsebmomnama, cha ndoñe chë Taitábioye bondbobonshana. <sup>16</sup> Er chë nye quem luarama enójuabnayënga mëntšá juabnënga mondbomna: yapa jtsebošana jtsebmomnama ntšamo chë ainaniñe bacna juabnënga bomnënga mondbetsebošcá; yapa jtsebošana nye ndayá tmojatinye soye; y yapa jtseñábotamnayana chë tmobomna soyëngama. Chë juabnënga Bëngbe Bëtsábíocana ndoñe ntsóbocanana, ndayá nye chë quem luarama enójuabnayëngbentsana. <sup>17</sup> Pero quem luare echanjopochóca y nyetsca

chentša soyënga, chë entšanga bacna juabnëngaca yapa imoboše jtsebmomnama soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebmomna.

#### Chë Cristbe contra yomná

<sup>18</sup> Básenga, quem luare jopochócamá tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócamá tempo ya yojtsobecuama. <sup>19</sup> Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

<sup>20</sup> Pero Cristo, chë Uamaná, tšëngaftanga tcmonjabacacá, y cha tonjama chë Uamana Espiritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondétatšëmbo. <sup>21</sup> Atše cbontsëbuabiamná, ndoñe chë ndegombre soyëngama ndoñe šmondétatšëmbuama, ndayá aíñe šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cányíñe jtsemnana ndoñe yondopodénama. <sup>22</sup> Nda tojayana Jesús chë Bëngbe Bëtsabe Uamana Uabuayaná, chë Cristo ndoñe

yondmëna ca, chana jtseboosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnama. <sup>23</sup>Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canýacá ndoñe ntsemnana. Pero nda entsángbeñe tojayana, Cristo aïñe Bëngbe Bëtsabe Uaquiñá endmëna ca, chana aïñe chë Taitáftaca cányiñe mo canýacá jtsemnana.

<sup>24</sup>Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canýacá šmochántsemna.

<sup>25</sup>Y quem soye entsemna ntšamo Cristo šojëftsasëbuachená: chë nyetsca tescama yomna tšabe vida jtsebomnana.

<sup>26</sup>Atše chca cbontsëbuabiamná, chë tšëngaftanga jáingñayama imojtsebošëngbiana. <sup>27</sup>Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebomna, y ndoñe quenátsiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntšá, ntšamo chë Uámana Espíritu tcmojabuatambacá jtsiyenëse, Crístoftaca cányiñe mo canýacá šmochtssemna.

<sup>28</sup>Y mora básenga, Crístoftaca cányiñe mo canýacá šmochtssemna,

chca, cha chaojabáisebocna ora, chábeñe jtsošbuáchiyëse, bënga añémoca chamotsemnama y ndoñe chamondëtsëuatjama, bënga chabe delante chamojtsemna ora. <sup>29</sup>Tšëngaftanga šmontsetátšëmbo Jesucristo nyetsca soyënguiñe tšabá amá yomnama. Chcasna, cmontsamna jtsetatšëmbuana, nyetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnama.

### Cristbeñe ošbuáchiyënga, Bëngbe Bëtsabe básenga

**3** <sup>1</sup>Menójuabonga, ntsachetšá Bëngbe Bëtsá chë Taitá šondábabuanýeshanama. Chabe bonshánana tša bëtscá endmënayeca, bënga šondëubuabuatma chabe básenga ca, y ndegombre bënga chca mondmëna. Chë causa chë nye quem luarama enójuabnayënga ndoñe quenátësertana ntšamo bënga imomnama, er chënga cha ndoñe tmonjanábuatmana. <sup>2</sup>Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuatstatšëmbo ntšamo más chcoye bënga mochjamnama, aïñe mondëtatšëmbo, Jesucristo chaojabáisebocna ora bënga cachacá mochtsemnama, er bënga mochanjobenaye jinýama ntšamo cha ndegombre yomncá. <sup>3</sup>Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnama, ntšamo cach Cristo yomncá, lempe tšabia y bacna soye ndbomná.

<sup>4</sup>Pero nda bacna soye tojama, chana ntšamo Bëngbe Bëtsá tojëftsemnadacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemnadacá. <sup>5</sup>Tšëngaftanga ya šmondëtatšëmbo Jesucristo quem



luaroye tojánabo bəngbe bacna soyənga jabətsabuajuanama, y cha ni mo canyə bacna soye ndoñe yondbomnama. <sup>6</sup>Chcasna, nda cānyīñe mo canyáca cháftaca nyetsa tempo tojtsemna, ndoñe ntsiyenana bacna soyənga jtsaməse. Pero nda tojtsiyena bacna soyənga jtsaməse, Jesucristbiama ndoñe tbonjosertá y ndoñe yondétatšəmbo ntšamo cha bétsemnama. <sup>7</sup>Atšbe básenga, ndocná chacmondaingñe: nda nyetsca soyənguñe tšabá tojtsama, cha canyə tšabá mándbomna entšá jtsemnana, ntšamo Jesucristo yomncá; <sup>8</sup>pero nda tojtsiyena bacna soyənga jtsaməse, chabe ainaniñe Satanás jtsemádayana, er Satanás quem luare jobojátšama orscana bacna soyənga iuétšama. Bəngbe Bətsabe Uaquiñá nya quem soyama tojabo: chə Satanasbe soyənga jabətseepochocama.

<sup>9</sup>Ndocná Bəngbe Bətsabe uaquiñá tojtsemná jtsiyenana bacna soyənga jtsaməse, er cha jtsebmomnana chə Bəngbe Bətsá tbojuántšame tšabe vida, y Bəngbe Bətsá chabe Taitá endmēna. Chiyeca cha ndoñe ntsiyenana bacna soyənga jtsaməse. <sup>10</sup>Corente jtsotatšəmbuana ndəmuanyənga Bəngbe Bətsabe básenga imomnana y ndəmuanyənga Satanasbe básenga; ndəmuanyəngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bəngbe Bətsabe básenga.

#### Nyetscanga jtsenbobonshánana

<sup>11</sup>Quem buayenana entsemna ntšamo tšəngaftanga šmojanuena, tšəngaftanga Cristbe ústonənga šmonjanobiama orscana: nyetscanga šontsamna jtsenbobonshánama.

<sup>12</sup>Ndoñe Caincá muatjama. Chabe

ainaniñe Satanás yojamánda, y chiyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chiyeca tbojtsanóba.

<sup>13</sup>Jesucristbeyeca atšbe catšátanga, ndoñe šmattsenjanayə chə nyə quem luarama enójuabnyənga cmojtsébuayənjama. <sup>14</sup>Bənga mondetatšəmbo, bənga tempo monjaniyena chə nyə quem luarama enójuabnyənga mondoyencá, y chca, Bəngbe Bətsabiama mo obanəngcá monjamna, er bənga monjaniyena ntšamo Bəngbe Bətsá ndoñe yondəmandacá. Pero Bəngbe Bətsá tonjama mora bənga tsəm vida chamotsebmomnana, y chca, mo ndegombre ainəngcá montsemna. Chca mondetatšəmbo, er bənga bəngbe catšátangbioye mondábuanyëshana. Nda chabe catšátbioye ndoñe tbonsebobonshana, cha cabá mo obanacá jtsiyenana. <sup>15</sup>Nda cachabe catšátbioye tbojtsáboyənja, cha jtsemnana mo entšanga obanayacá. Y tšəngaftanga šmondətətšəmbo entšanga obanayá ndoñe ntsobenana jtsiyenana, chə nyetsca tescama yomna tšabe vida chabe ainaniñe jtsebmomnəse.

<sup>16</sup>Ndayá chə jtsenbobonshánana bétsemnama mēntšá montsetátšəmbo: Jesucristo chabe derecho vida jtsobomñama cachcá tojanonjá y bəngbiama tojanóbana; cachcá bənga šontsamna jtsemnana, sempre jtseprontánana chə Jesucristbeyeca bəngbe catšátangbiama jóbanama. <sup>17</sup>Canyə bomnana tojtsebmomna y catšátbioye uajabotá tbojtsónjá, pero chabiama ndoñe tbonjongmé y ndoñe tbonjuájabuache, cha ndoñe ntsobenana Bəngbe Bətsabiama ainaniñe bonshánana jtsebmomnana. <sup>18</sup>Atšbe básenga,

ndoñe quešnátamna nÿe bÿngbe catšátanga imuababuánÿeshana ca jatichámuana, y nÿe chÿ bonshánama jatóyebuambnayana; pero ndegombre šontsamna ndayánaca jamana, chca, jinÿanÿiyama, bÿnga ndegombre inÿengbiana imuababuánÿeshanama.

**Bÿngbe Bÿtsabe delante  
natjÿmbana ainánaca entšanga**

<sup>19</sup> Chcase bÿnga mochántsetatšÿmbo, ntšamo chÿ Bÿngbe Bÿtsabe ndegombre soyÿnga yomncá bÿnga imojtsamama. Y bÿnga ndoñe quemochátenocochinÿena, Bÿngbe Bÿtsábica jtsemnana mercedo ndoñe mondbuájona ca tmojtsejuabná ora; y bÿngbe ainana natjÿmbana Bÿngbe Bÿtsabe delante echántsemna. <sup>20</sup> Bÿnga chca bÿngbe ainaniñe tmojtsejuabná ora, bÿnga montsobena natjÿmbana ainana jtsebomnana, er Bÿngbe Bÿtsá corente jtsotatšÿmbñana ntšamo bÿngbe ainana yomnana, y cha lempe yotátšÿmbo. <sup>21</sup> Atšbe bonshana entšanga, bÿnga ndoñe bacna soye tmonjama ca bÿngbe ainaniñe tmojtsejuabnase, jtsobenana añémoca jtsemnana y tondayama ntsauatjácá Bÿngbe Bÿtsabe delante jtsemnana. <sup>22</sup> Y cha lempe ntšamo chamojotjañácá šochanjátšataye, er bÿnga montsama ntšamo Bÿngbe Bÿtsá ibuamandacá y ndayá chabe bominÿiñe tšabá yomncá. <sup>23</sup> Y chabe mando endmëna: bÿnga chabe Uaquiñá Jesucristbeñe jtsošbuáchiyana, y bÿnga nÿetscanga jtsebomnana ntšamo Jesús šojÿftsamëndacá. <sup>24</sup> Ntšamo Bÿngbe Bÿtsá tojÿftsemandacá amënga, Bÿngbe Bÿtsáftaca cánÿiñe mo canÿacá jtsemnana, y cha sempre chëngaftaca cánÿiñe mo canÿacá echanjÿftsemna. Y quem sóyeca bÿnga montsobena jtsetatšÿmbuana cha bÿngaftaca

iuétsemnana: Uámama Espiritu bÿngbe ainaniñe cháumashënguama cha tojama.

**Chÿ Bÿngbe Bÿtsabe Espiritu y  
chÿ Cristbe uayayabe espíritu**

**4** <sup>1</sup> Atšbe bonshana entšanga, nÿetscanga chÿ Bÿngbe Bÿtsabe juábncaca imoyebuambná ca ichámëngbiocyte ndoñe šmattsayaunana; botamana šmochjuarrepára corente jtsetatšÿmbuama chënga aínë o ndoñe chÿ Bÿngbe Bÿtsabe juábncaca imóyebuambnama. Quem tempo banga Bÿngbe Bÿtsabe ndoñe ndegombre juabna oyebuambnayënga quem luarëjana mondajna. Chÿ causa tšëngaftanga cmontsamna botamana chëngbiana juarrepárana. <sup>2</sup> Chÿ Bÿngbe Bÿtsabe Espiritu ndegombre imobomnëngbiana tšëngaftanga mëntšá šmontsobena jtsetatšÿmbuana: nda tojayana Jesucristo quem luaroye aínë entšacá tojánabo ca, cha ndegombre chÿ Bÿngbe Bÿtsabe Espiritu yojtsebomna. <sup>3</sup> Pero nda ndoñe chca Jesucristbiana tonjayana, cha Bÿngbe Bÿtsabe Espiritu ndoñe yontsebomna; inÿetšá, chana chÿ Cristbe contra yomnabe espíritu yojtsebomna. Tšëngaftanga šmojouena chÿ espíritu yochjabama; pero ndegombre cha ya quem luarentšë entsemna.

<sup>4</sup> Atšbe básenga, tšëngaftanga Bÿngbe Bÿtsábenga šmondmëna y ndoñe šmonjalesenciá chÿ Bÿngbe Bÿtsabe ndoñe ndegombre juabna oyebuambnayënga tšëngaftangbiocyte chacmaingñëma, er chÿ nÿets tempo tšëngaftangbe ainaniñe vida endbomná, chÿ nÿe quem luarama enójuabnayëngbe ainaniñe mándayabiama más obená endmëna. <sup>5</sup> Chÿ Bÿngbe Bÿtsabe ndoñe

ndegombre juabna oyebuambnayëngna chë nÿe quem luarama enójuabnayënguentshana mondmëna, chíyeca chënga nÿe quem luarentša soyëngama jtsóyebuambnayana, y chë nÿe quem luarama enójuabnayënga chënga jtsayaunanana. <sup>6</sup> Pero bënga Bëngbe Bëtsábënga mondmëna. Nda Bëngbe Bëtsábïoye tbojtsabatma, béngbïoye jtsayaunanana; pero nda Bëngbe Bëtsábïoye ndoñe tbontsabatma, cha bënga ndoñe ntsayaunanana. Chiñe bënga montsobena jtsetatšëmbuana nda chë ndegombre soyënga jóyebuambayama ama espíritu yobomnabiama, y nda chë ínÿëngbïoye jáingñama ama espíritu yobomnabiámna.

**Chë bonshánana Bëngbe  
Bëtsábïocana yóbocana**

<sup>7</sup> Atšbe bonshana entšanga, chë bonshánana Bëngbe Bëtsábïocana endóvocana; hc case, bënga šontsamna nÿetscanga jtsenbobonshánana. Nda Bëngbe Bëtsábïoye y chë inÿe entšangbïoye tojtsababuánÿeshana, cha Bëngbe Bëtsabe uaqiñá jtsemnana y Bëngbe Bëtsábïoye jtsabatmana. <sup>8</sup> Nda ndoñe chca tontsebobonshana, cha Bëngbe Bëtsábïoye ndoñe ntsábuatmana, er Bëngbe Bëtsá bonshanánaca nÿetsca soyënga jamana. <sup>9</sup> Bëngbe Bëtsá šonjinÿanÿé bënga šuababuánÿeshanana, cha chë nÿe canÿe Uaqiñá ibobomná quem luaroye jíchmuase; cha tbojanichmó, bënga chábeyeca chë nÿetsca tescama yomna tšabe vida chamotsebonnama. <sup>10</sup> Bëngbe Bëtsabe bonshánana mëntšá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuanÿeshanayeca, y chabe Uaqiñá tbojanichmó, cha jóbanëse,

bënga bëngbe bacna soyëngama perdonánënga chamotsebonnama.

<sup>11</sup> Atšbe bonshana entšanga, Bëngbe Bëtsá chca šuababuánÿeshana; hc case, béngnaca šontsamna nÿetscanga jtsenbobonshánana. <sup>12</sup> Ndocná ndocna te Bëngbe Bëtsábïoye tbojinÿe. Bënga nÿetscanga tmojtsenbobonshánëse, Bëngbe Bëtsá nÿets tempo béngaftaca echántsemna, y chabe bonshánana puerte bëtscá béngbeñe echántsemna. <sup>13</sup> Bënga mëntšá montsobena ndegombre jtsetatšëmbuana bënga Bëngbe Bëtsáftaca imomnana y cha béngaftaca: cha tonjanma chabe Espíritu bëngbe ainaniñe cháumashënguama. <sup>14</sup> Y cach bënga fsënjinÿe y entšanga fsëntsëtsëtná, chë Taitá chabe Uaqiñá tbojichmoma, quem luarentša entšanga jabátsebacama. <sup>15</sup> Ndánaca tojayana Jesús Bëngbe Bëtsabe Uaqiñá yomna ca, cha Bëngbe Bëtsáftaca cánÿiñe echántsemna y Bëngbe Bëtsánaca sempre cháftaca cánÿiñe mo canÿacá. <sup>16</sup> Hc case bënga montsetatšëmbo y montsošbuaché ndegombre Bëngbe Bëtsá bënga šuababuánÿeshanama. Bëngbe Bëtsá nÿetsca soyënga bonshanánaca jamana y nda Bëngbe Bëtsá y chë inÿe entšanga sempre tojtsababuánÿeshana, cha Bëngbe Bëtsáftaca cánÿiñe mo canÿacá jtsemnana y Bëngbe Bëtsánaca sempre cháftaca cánÿiñe mo canÿacá. <sup>17</sup> Hc case, Bëngbe Bëtsabe bonshánana puerte bëtscá béngbeñe echántsemna, bënga bëts añémoca y tondayama ntsauatjca chamotsebonnama, chë tšabá o ndoñe tšabá tmonjamama entšangbïama jayanama Cristo yochjésaco orscama; er bënga Jesucrístoftaca cánÿiñe mo canÿacá jtsemnëse, quem luarentše mondmëna ntsámo Jesucristo endmëncá. <sup>18</sup> Nda Bëngbe Bëtsá y chë

inye entsanga tojtsababuányeshana, tondayama ntsauatjana; bēnga corente tmojtsebobonshana ora, ndoñe ntsopodénana uatjana jtsebmomnana. Canye entsá tojtsauatja ora, jtsemnana mo chabe castigo ya cuafjobjatsecá. Chca, nda uatjana tojtsebmomna, Bēngbe Bētsábioye y chē inye entsanga cha ndoñe corente yondábabuanýeshana, ntšamo Bēngbe Bētsá bēnga šuababuanýeshancá.

<sup>19</sup>Natsana Bēngbe Bētsá šojánababuanýeshana, y chíyeca bēnga, cha y chē inye entsanga imuababuányeshana. <sup>20</sup>Nda tojayana: “Atše Bēngbe Bētsábioye séndbobonshana ca”, pero cachca ora cachabe catšátbioye tbojtsáboyēnja, cha canye bostero jtsemnana. Canya añe jtsobenana chabe catšata jinýama; y cha chē catšátbioye ndoñe tbontsebobonshana, ndegombre cha Bēngbe Bētsábioye ndoñe bondbobonshana, ndábioye jinýama ndoñe ntsobenana.

<sup>21</sup>Y bēnga quem mando chábentšana tmonjanóyēngacñe: nda Bēngbe Bētsábioye tbojtsebobonshana, cachabe catšátbioynaca chabotsebobonshana ca.

**Chē Jesucristeñe ošbuachiyá  
endobena Satanase  
soyēnga jayénjanana**

**5** <sup>1</sup>Nda tojtsošbuaché Jesús chē Uámana Uabuyaná, chē Cristo yomnana, cha Bēngbe Bētsabe uaquiñá jtsemnana; y nda canye taitábioye tbojtsebobonshana, chē taitabe uaquiñábioynaca cha jtsebobonshánana. <sup>2</sup>Bēnga Bēngbe Bētsá tmojtsebobonshana y ntšamo cha tojtsemandacá tmojtsamēse, bēnga ndegombre mochántsetatšēmo, chē Bēngbe Bētsabe basengbioynaca

bēnga imuababuányeshanama. <sup>3</sup>Bēnga Bēngbe Bētsábioye imobobonshánama quem soyiñe jtsinýnana: bēnga ntšamo Bēngbe Bētsá tomandacá tmojtsamēse. Y ndayá Bēngbe Bētsá yomandacá ndoñe yapa totcá quenátsmēna bēnga chamotsamama. <sup>4</sup>Nda Bēngbe Bētsabe uaquiñá tomna, chana jáyēnjanana quem luarentša entsanga y soyēnga ntšamo Satanás yomandacá. Quem luarentša entsanga y soyēnga ntšamo Satanás yomandacá, Crístbeñe bēnga imošbuachéyeca montsobena bēnga jáyēnjanana. <sup>5</sup>Nye nda, Jesús Bēngbe Bētsabe Uaquiñá yomnana tojtsošbuaché, cha jtsobenana chē entsanga y soyēnga ntšamo Satanás yomandacá jayénjanana; ndocná más.

**Bēngbe Bētsá tojinýanýé  
ntšamo chabe Uaquiñabiana  
ndegombre yomncá**

<sup>6</sup>Cach Jesucristo endmēna nda quem luaroye tojánabo y mēntšá tojanenonýinýe: býyesheca cha tmojanabaye ora, y buiñe juabuáshanēse cha tonjanóbana ora. Cha ndoñe tonjanenonýinýe nye býyesheca, ndayá býyesheca y buiñeca. Cach Uámana Espiritu entsobena jayanana chca ndegombre bétsemnana Jesusbiana, er chē Espiritu endmēna chē sempre ndegombre oyebuambnayá. <sup>7</sup>Endmēna unga soyēnga, ndayá iuinýanýná ntšamo ndegombre yomncá Jesusbiana: <sup>8</sup>Espiritu, býyeshca y buiñe; y chē unga soyēnga lempe cachcá Jesusbiana jtsinýanýanana. <sup>9</sup>Bēnga mondbétsejuabnaye, ndayá entsanga tmojinýe ca tmojtsichámuama mo ndegombre cuaftsemncá, pero ndayá Bēngbe Bētsá tojtsichamcá chē ndegombre soye jtsemnana y puerte jtsámanana, er chē ndegombre soye ntšamo cha tojtsichamcá, endmēna

ndayá chabe Uaquiñabiamá iuichamcá.

<sup>10</sup>Nda Bëngbe Bëtsabe Uaquiñábeñe tojtsošbuaché, cha chca nÿets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canÿe booster cuaftsemncá, er chë Bëngbe Bëtsá chabe Uaquiñabiamá tojayana soyama cha jtsejuabnayana ndoñe ndegombre yontsemna ca. <sup>11</sup>Ntsámo Bëngbe Bëtsá chabe Uaquiñabiamá tojayancá mëntšá entsemna: Bëngbe Bëtsá bëngbiama tojama chë nÿetsca tescama yomna tšabe vida chamotsebomnama; y quem vida chabe Uaquiñábeñe entsemna.

<sup>12</sup>Nda Bëngbe Bëtsabe Uaquiñáftaca cánÿiñe mo canÿacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánÿiñe mo canÿacá ndoñe tontsemna, cha chë nÿetsca tescama yomna tšabe vida ndoñe ntsebomnana ca.

**Inÿe soyëngama jábuayenama  
y jtadióšoftanama**

<sup>13</sup>Tšëngaftanga, chë Bëngbe Bëtsabe Uaquiñábeñe šmošbuachëngbioye quem soyënga cbontsëbuiamná, ndegombre chašmotsetatšëmbuama chë nÿetsca tescama yomna tšabe vida šmojtsebomnama.

<sup>14</sup>Bënga bëts añémoca y ndauatjá Bëngbe Bëtsabe delante mondmëna, er bënga mondétatšëmbo, nderado ntšamo chaotsemnama cha tojtsebošcá bënga tmojtjañe ora, cha bënga šnétsayaunanama. <sup>15</sup>Nderado ndayá chca Bëngbe Bëtsábioye tmojtsotjanañe ora, cha bënga jyaunayana; bënga mondétatšëmbo chca ndegombre yomnama, y chca, bëngnaca montsetátšëmbo, ndayánaca chábioye bënga chamojotjañcá cha šochjátšatayama.

<sup>16</sup>Nda cachabe catšátbioye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnama cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nÿetsca tescama yomna tšabe vida chaotsebomnama, cha chca tojamentšana perdonaná jtsemnama cabá tojtsopodénëse. Pero canÿe bacna soye endmëna, y chca tojamama canÿa ndoñe ntsobenana perdonaná jtsemnana, y chca, cha jabocnana canÿa nÿetsca tescama castiganá chaotsemnama, y atšë ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. <sup>17</sup>Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nÿetsca bacna soyënga ntšamo canÿa tojtsamcá, ndoñe ntjamana cha ndëperdonaná chaotsemnama.

<sup>18</sup>Bënga mondétatšëmbo, nda Bëngbe Bëtsábioye mo taitacá tbojtsebomna, cha ndoñe ntсийenana bacna soyënga jtsamëse, er chë Bëngbe Bëtsábentšana Onÿnaná chábioye jtsinÿenana, y Satanás, chë nÿetsca bacna soyënga amëndayá, tondaye ntsobenana chábioye jabórlana. <sup>19</sup>Bënga mondétatšëmbo, bënga chë Crístbeñe ošbuáchiyënga Bëngbe Bëtsábënga imomnama, y chë quem luarentša inÿe entšanga Satanasbe cucuatšinë imomnama. <sup>20</sup>Bëngnaca mondétatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatmama. Bënga chë ndegombráftaca cánÿiñe mo canÿacá mondmëna, bënga chabe

Uaquiñáftaca cánýiñe bétsemnayeca.  
Cha chë ndegombre Bëngbe Bëtsá  
endmëna, y nda chë nyetsca  
tescama yomna tšabe vida entšanga  
chamotsebofnama iuamá. <sup>21</sup>Atšbe

básenga, ndoñe šmattsadorana  
cach entšangbe pormana  
soyënga, chë ndayama ínýenga  
mondbétsejuabnaye diosënga yomna  
ca.

## 2 San Juan

---

### Jtsiyenana ndegombre soyéngaca y nyetscanga jtsenbobonshánèse

<sup>1</sup>Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacaná y chabe basengbiámnaca, ndëmuanyënga atše ndegombre sëndábabuanýeshana. Y ndoñe nyë atše chënga quetsátababuanýeshana, ndayá nyetscanga chë Bëngbe Bëtsabe ndegombre soyënga uabuátméngnaca.

<sup>2</sup>Atše cbontsababuanýeshana, chë ndegombre soyënga bëngbe ainaniñe mondbómnyayeca, y chë soyënga bëngbe ainaniñe sempre echántsemna.

<sup>3</sup>Atše séntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotseboamna. Quem soyënga, bënga chë ndegombre soyënga uabuátmënga y nyetscanga mondenbobonshánëngaftaca echántsemna.

<sup>4</sup>Puerte sënjoyejuá, er atše acbe básenguëntše báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse. <sup>5</sup>Y mora, uámana mamá, cbontseimpadana Diosmanda nyetscanga chamotsenbobonshana.

Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando. <sup>6</sup>Bënga, Bëngbe Bëtsá y chë inyë entsánga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inyë entsánga jtsababuánýeshanëse.

### Chë entsángbioye áingñayënga

<sup>7</sup>Quem luarëjana banga entsángbioye áingñayënga mondajna, y chënga jtsejuabnayana Jesucristo quem luaroye ndoñe mo canýe ndegombre entsácá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná.

<sup>8</sup>Chëngbiana cuedado šmochtseboamna. Ndoñe chcace, tsëngaftanga ndoñe quešmochátsboamna chë Cristbiana cach tsëngaftangbe trabajuentsana tojóbozna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup>Ndánaca chë Cristo tojanabuatambá soyëngama inyë soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana;

pero nda sempre ntšamo  
 Cristo tojanbuatëmbacá  
 tojtsabuatambá, cha aíñe chë  
 Taitáftaca y chabe Uaquiñáftaca  
 cányiñe mo canyáca jtsemnana.  
<sup>10</sup>Ndánaca tsëngaftangbioye  
 tojá jabuátambama, pero ndoñe  
 ndayá Cristo tojanabuatambacá  
 tojtsebuatëmbase, cha ndoñe  
 šmatjofja, ni mo šmatjachuaye. <sup>11</sup>Er  
 nda chábioye tbojachuase, chábioye  
 jtsajabuáchanana chë bacna soye  
 chaomama.

### Jtadióšoftanama

<sup>12</sup>Atše ba soyënga séntsebmna  
 tsëngaftanga jáuyanama, pero  
 ndoñe quetsátsboše tsbuanáchañe  
 jubuábiamama. Atše séntsejuabná  
 aíñe chjobenaye tsëngaftangbioye  
 jama, jobenayama nyetscángaftaca  
 jencuéntama, chca, bëngbe oyejuayana  
 puerte bëtscá chaotsemnana.

<sup>13</sup>Crístbeyeca acbe quenata, chë  
 Bëngbe Bëtsabe bocacaná, chabe  
 básenga cmontsacheuaná.



## 3 San Juan

---

### Juan Gaybiana puerte tšabá tojanoyebuambá

<sup>1</sup>Atše chë bëtsějema, quem tsbuanácha atšbe bonshana amigo Gaybiana sentsabiamná. Chábioye atše ndegombre séndbobonshana.

<sup>2</sup>Atšbe bonshaná y Crístbeyeca atšbe catsata, Běngbe Bětsá sěntseimpadana aca tšabia njetasca soyěnguiñe chacotsemnama y salud bomnánaca. Atše sěntsetatšěmbo aca ainaniñe tšabá cotsomñama, Běngbe Bětsabiana bětsá tšabe juabněga chentše jtsebomněse. <sup>3</sup>Er báseftanga Jesucristbeñe ošbuáchiyěnga átšbioye tmonjabo y šmonjacuentá ntšamo aca chë ndegombre soyěnga yomncá icuamama, aca chë ndegombre soyěnga jtsaměse icoyenama. Chíyeca atše bětsá sěntsoyejuá. <sup>4</sup>Todaye jamana atše njetšá oyejuayá chaitsemnama, ndayá nje jouenana chë atšbe basengcá imoquedáněnga ntšamo chë ndegombre soyěnga yomncá jtsaměse imoyenama.

<sup>5</sup>Atšbe bonshaná, aca contsama ntšamo Jesucristo tonjanbuatěmbacá, aca chë ín्यenga Jesucristbeñe ošbuáchiyěnga jujabuáchama ndayánaca tcojama ora, y masna, chë inye luaroquěngocana ashjajněngbiana ndayánaca tcojtsama ora. <sup>6</sup>Chë átšbioye tmonjaběnga tmonjoyebuambá, chë Jesucristbeñe ošbuáchiyěnga quem

luarentše mondbenenefjněngbe delante, aca tša chěnga icuababuán्यeshanama. Diosmanda, ntšamo tojtsějabotcá chěnga cochjújabuache, chca, chěnga chamobená tšabá inye luarěngoye játama. Chěnga mondměna Běngbe Bětsabiana trabájayěnga; chcasna, chěngaftaca cochjama ntšamo chěnga chama merecido imobuajoncá. <sup>7</sup>Chca cochjama, er chěnga chěngbe pueblěnguentšana tmojěftsebecana Jesucristbe soyěngama entšángbioye jábuayenama, y chěnga chama todaye crocěnana quematóyěngacañe chë Jesucristbeñe ndošbuáchiyěngbe cucuatšěntšana. <sup>8</sup>Chíyeca běnga šontsamna chěngbiana jtsantješnana y jtsějabuáchanana, chca, běnga chamobená cánñiñe chěngaftaca jatrabájana, entšángbioye chë ndegombre soyěngama jábuayenama, ndayá chěnga mondama.

### Diótfrefes ndoñe tšabá tonjanma; Demetrio añe

<sup>9</sup>Atše canye tsbuanácha chë Jesucristbeñe ošbuáchiyěnga chentše mondbenenefjněngbioye sěnjubuábiana, pero Diótfrefes ndoñe yontsuenana ntšamo atše sěntsichamcá, er cha yojtseboše chë ín्यěngbioye nje jtsaměndayana. <sup>10</sup>Chíyeca atše choye chajá ora, ndayá cha yojtsamama chanjauácacana. Cha sempre bacá yojtsoínýana y uayátsenaye soyěnga

bëngbe contra yojsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebioye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bétsemnama imnétsenefjuana luarentšana yojsatëbuacana.

<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondétatšëmbo ntšamo Bëngbe Bëtsá yomnama.

<sup>12</sup> Jesucristbeñe ošbuáchiyënga nÿetscanga tšabe soyënga

Demetriëbiana montsichamo, y Jesucristbe ndegombre soyënga entsinÿna ntšamo cha soyënga yojsiyenama. Bëngnaca chabiana tšabá fsëntsichamo, y aca condétatšëmbo ntšamo bënga fsëntsichamcá, ndegombre yomnama.

#### Jadióšoftanama

<sup>13</sup> Atše ba soyënga séntsebmoma aca jauyanama, pero ndoñe quetsátsboše tsbuanáchañe juábobemana. <sup>14</sup> Atše séntsejuabná betesco chjobenaye ácbioye jama jauatsétsayama y jobenayana ácaftaca jencuéntama.

<sup>15</sup> Puerte tšabe ebionana ainaniñe chacotsebmoma. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

# San Judas

## Jacheuayama

<sup>1</sup> Atše Judas, Jesucristbe oservená y Santiagbe catsata, quem tsbuanácha sentsabiamná, ndémuanÿengbioye Bëngbe Bëtsá, chë Taitá chabe entsanga chamotsemnama tojáchembo, chabe bonshánënga, y ndémuanÿenga Jesucristo endánÿena. <sup>2</sup> Atše, Bëngbe Bëtsá séntseimpadana, cha puerte lastemado tsëngaftangaftaca chaotsemnama, cha chaoma tsëngaftanga ainaniñe tsabe ebionana chašmotsebonnama, y chaoma tsëngaftanga cada te más Bëngbe Bëtsábioye y ínÿengbioye chašmotsababuánÿeshanama.

## Chë ndoñe ndegombre soyënga buátëmbayënga

<sup>3</sup> Atšbe bonshánënga, atše tša séndboše tsëngaftanga jubuábiamama, ntšamo Jesucristo bëngbe bacna soyënguentsana šojátsebacama, tsëngaftangbioye y bëngbioynaca; pero atše séntsejuabná atše šojtsemna tsëngaftanga jubuábiamana, jáimpadama bëtscá chašmotsama Jesucristbe soyëngama, chë mondošbuaché soyëngama jenujuérezama, ndoñe chaondopochocama. Chë soyënga Bëngbe Bëtsá chabe entsanga canÿe tojatsatá, y nÿetsca tescama.

<sup>4</sup> Er tsëngaftanga ntšamo ínÿenga

imomnama ntjatatsëmboncá, básefta entsanga tsëngaftangaftaca tmojenutaná. Chënga mondmëna Bëngbe Bëtsá ndoñe adórayënga, y chë buátëmbana soyënga tmojtsetrocá. Bëngbe Bëtsá bëngbe tsabiama juabna yobómnyeyeca, chënga jtsichámuana tsëngaftanga šmojtsovena nÿetsca bacna soyënga jtsamëse jtsiyenana, jenomándama ntšobencá ca; y chca, chënga montseboše jinÿanÿiyama, Jesucristo ndoñe bëngbe canÿe Nduiño y Bëngbe Utabná chëngbiana yondmëna ca. Y bayté, Bëngbe Bëtsabe uabemana palabrënguiñe tmojanábema, chë chca amëngna jtsamnana nÿetsca tescama castigánënga jtsemnama ca.

<sup>5</sup> Masque tsëngaftanga lempe quem soyama ya šmondétatsëmbo, atše séntseboše jamama tsëngaftanga chašmotsenojuabná, Bëngbe Utabná, Israeloca entsanga Egiptoquëngbe cucuatšentsana tojanatsebacá chentsana, cachá chë Israeloquënguentše chábeñe ndošbuáchiyënga tojánapochocama; <sup>6</sup> y cachcá chë angelëngbiámnaca, ndémuanÿenga ndoñe tmonjanoquedá chë tmojanóyëngacñe mándoca, pero aíñe chëngbe luarënga cachcá imojéftsonÿaye. Chë causa, Bëngbe Bëtsá tojanmandá cadenëjuangaca nÿetsca tescama chamoquedama, chë más ibetiñe, tondaye binÿiniñe

luarentše, chënga bacna soyënga tmojanmama nyetsca tescama castigánënga jtsemnana vojtsamna ca, cha jayanama tescama. <sup>7</sup>Y chë Sodoma y Gomorra, y chë béconana pueblënguentše entsangbiámnaca; chëngnaca cach angelëngcá ndoñe tšabá monjánama, y nyetsca bacna soyënga imojánama boyabása o shembásaftaca, y ínÿengaftaca y bayëngaftácnaca. Chíyeca chënga tmonjansufrí chë íñeshca castigo nyetsca tescama, y chca, nyetsca yochjopása chë chca Bëngbe Bëtsábioye ndoñe tbontsobedecenáftaca.

<sup>8</sup>Cachcá, chë ndoñe ndegombre soyënga buátëmbayëgnaca chë mo otjenayoquécá tmojáninÿe soyëngama jtsichámuana, y chë causa cachëngbe cuerpëngama bacna soyënga jtsamana, chë mando bomnëngbioye jtsébátenana, y chë espíritënga obenana bomnëngbiama ndoñe tšabá ntsichámuana, mo chëngbioye cuafjoyanguangcá. <sup>9</sup>Pero ni mo chë angelëngbe mandaya Miguel quem buátëmbayëngcá tojanama. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsëtsnaye ora, ndoñe tonjanenñemó jayanama chë diablëbiama podesca soyënga, jóyenguanguse, ndayá nÿe mëntšá ibojauyana: “Bëngbe Utabná chacmácacana ca.” <sup>10</sup>Pero quem buátëmbayëngna, chë ndoñe tontsésertana soyëngama podesca jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tšabá josértama juabna ndbomnënga, ndayá chentšana tmojtšesertancá jtsamëse, jamana chënga nyetsca tescama castigánënga jtsemnana chamotsajnama.

<sup>11</sup>¡Tša lastema quem buátëmbayëngbiama! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catsátbioye tbojanóba. Chënga crocénana juácanama, mo Balaam yojanamcá, Bëngbe Bëtsabe tšabe benachentšana tmojtsojuánafe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

<sup>12</sup>Chëngna tsëngaftangbiama jtsemnana mo canÿe ndëtsenga luarentše canÿe bëts tsengacá, tsëngaftangaftaca tmojenutaná ora, cánÿiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nÿe chënga tšabá jtsomñama soyënga jtsamëse, y chënga chama ndoñe ntsëuatjana. Chënga nÿe cachëngbiama jtsantješnana, ínÿengbiama ndoñe. Chënga tša jtsašebuachiyana, pero chëngbe buátëmbana soyënga ínÿengbiama tondayama ntoservénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa. <sup>13</sup>Chënga nyets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga

imobomnama. Chca, chënga jtsemnana mo mar béjayoca oleshëngcá, chentšana espumushënga bëtscá tsenguéshëca jtsóboconana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binýniñe luarentše nyetsca tescama chënga chamoquedama.

<sup>14</sup> Adánbentšana chnénguana pamillo entšanga tmojánachnéjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntšá tojánayana ora: “Šmochjinýe, Bëngbe Utabná echanjabo bëtscá uaranga angelëngaftaca, <sup>15</sup> nyetsca entšangbiama jabáyanama ntšamo tmojamcá tšabá o ndoñe tšabá bëtsemnama; y cha echanjamánda chë Bëngbe Bëtsábioye ndoñe adórayënga nyetsca tescama castigánënga chamotsemnama, tša bacna soyënga chabe contra tmojamama, y bacna soyënga chabe contra tmojanayana, chënga, chë puerte bacna soyënga amënga ca” —tojánayana. <sup>16</sup> Chënga mondmëna chë tšabe soyëngama nyets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nýe cachënga tšabá jtsomñama, y puerte botamana palabrénga jtsichámuana uámanënga jtsenobiamnayëse, y tšabe soyënga ínýengbioye jtsëtsënyayana, chënga tšabá joquédama y chëngbentšana ndayánaca josháchiñama.

#### Ošbuáchiyënga jábuayenama

<sup>17</sup> Pero tšëngaftanga, atšbe bonshánëngna, šmochtsenójuabnaye

ndayá chë Bëngbe Utabná Jesucristbe ichmónënga tmojanéyanama, mëntšá: <sup>18</sup> “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nýe cachënga tšabá jtsomñama bacna juabnéngaca, y tšëngaftanga cmochantsébuayajuana ca.” <sup>19</sup> Chënga mondmëna chë ošbuáchiyënguentše nyetscanga ndoñe cachcá chamondétsejuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espiritu, chëngbe ainaniñe chaotsemándama.

<sup>20</sup> Pero tšëngaftanga, atšbe bonshánënga, nyets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóboconana ošbuáchiyana, y Bëngbe Bëtsáftaca šmochjencuénta, ntšamo Uámana Espiritu tmojtsamëndacá. <sup>21</sup> Yejuana šmochtsantješna tšëngaftanga nyets tempo chašmotsiyenama, Bëngbe Bëtsá cmababuánýeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nyetsca tescama yomna tšabe vida chašmotsebomnama.

<sup>22</sup> Chë inýe ora aíñe y inýe ora ndoñe Jesucristbeñe ošbuáchiyana bomnënga šmochtsalastemana.

<sup>23</sup> Bëtscá šmochtsama, báseftanga chë uabouana castigüentšana atsebácanënga chamotsemnama, mo chënga íneshentšana cuaftëbuacancá. Inýengbiama chacmotsangmena, pero cuedado šmochtsabomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondétsamama; y chë bacna soyënga ntšamo chënga

tmojtsiyena jtsamëse, chëngbe  
bacna juabnëngaca, nÿa tondaye  
chacmondétsogusetana.

**Judas, Bëngbe Bëtsá jëtschuayama**

<sup>24-25</sup> Chë nÿe canÿe Bëngbe Bëtsá,  
bëngbe Atsebacayá obenana endbomna  
tšëngaftanga jtsanÿenama, chca,  
tondaye chaondëma tšëngaftanga  
Jesucristbeñe ošbuáchiyana  
chašmotsajbanama; y obenana  
endbomna tšëngaftanga ainaniñe

ndocna bacna soye ndbomnënga  
chašmotsemnana y puerte  
oyejuayënga cachabe delante  
chašmotsemnana, cha canÿe puerte  
uamaná y obená bëtsemnana  
chaojinÿanÿé ora. Bëngbe Utabná  
Jesucristbeyeca, nÿetscanga Bëngbe  
Bëtsá chamotsatschuaná; y cha puerte  
bëtsá chausomñe, nÿets obenana  
bomná y nÿets mando bomná, nÿets  
tempscana, tempo, mora y nÿetsca  
tescama. Chca chaotsemna.

# Apocalipsis

**Ndayá quem librésañe yomna**

**1** <sup>1</sup> Quemuentše entsábemana ndayá Bëngbe Bëtsá Jesucristbioye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojtsobecuama chënga chamotsetatšëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinÿinÿema. <sup>2</sup> Y atše sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjanianana ndegombre bëtsemna soyëngama.

<sup>3</sup> Oyejuayá nda tojtsalía, y oyejuayënga ndëmuanÿenga botamana tmojtsuenana quem yochjopása soyëngama, chë muentše entsabemancá ndegombre tmojóyeunanga, er chca jopasa tempo entsobeco.

**Asia luaroca ošbuachiyëngcá enefjuanënga jacheuayama**

<sup>4</sup> Atše Juan, sëntsabiamná chë Asia luaroca canÿsëftañe ošbuachiyëngcá enefjuanëngbiama. Atše, Bëngbe Bëtsá sëntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebumna, Bëngbe Bëtsábentšana, chë

canÿsëfta espíritëngbentšana y Jesucristbentšana. Bëngbe Bëtsá, chë mora endméná, enjamná y sempre echantsemná; chë canÿsëfta espíritënga, chabe uámana puesto natsanoica mondmënënga; <sup>5-6</sup> y Jesucristo, chë ntšamo Bëngbe Bëtsabiama yotatšëmbcá ndegombre oyebuambnayá, chë natsaná ndabiama Bëngbe Bëtsá tojama obanënguentšana cháuatayenama, y nyetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservénama. iNyetscanga nyets tempo chamotsinÿanÿná Cristo puerte bëtsá y uamaná bëtsemnama y obenana nyetsca tescama yobomnama! Chca chaotsemna.

<sup>7</sup> Mouenënga. Cristo

jantšetëshënguiñe echanjésabo. Chábioye nyetscanga mochanjinÿe, chë tmonjancrucificáncana; y quem luarentša nyetsca ëntšanga puerte ngménaca mochántsemna y mochantsošachna chábeyeca. Ndegombre, chca chaotsemna.

<sup>8</sup>“Atše sëndmëna chë nyetsca soyënga bojatsáyá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nyets tempo echantsemná, chë nyets obenana bomná.

**Juan mo otjenayoquëcá  
Cristbiana tojáninÿe**

<sup>9</sup>Atše Juan, Jesucristbeyeca tsëngaftangbe catšata, cháftaca cánÿiñe mo canÿacá bëtsemnama, cach tsëngaftangcá sëndëpadecena, tsëngaftangcá chanjéftsashjache Bëngbe Bëtsabe amëndayoye jamashënguama, y tsëngaftangcá Bëngbe Bëtsábeñe jtsobátmanëse, uantado sëndmëna chë padecena soyënguïñe. Bëngbe Bëtsabe palabra sënjanabuayiynama y Jesusbiana ntšamo ndegombre endmëncá sënjanóyebuambnama, atše šmonjetsanëtšena mar béjayoca canÿe fshantsentše, Patmos ca uabáinoca. <sup>10</sup>Y tonjanopasá, canÿe tmengo, chë ošbuáchiyënga Bëngbe Utabnábiyoe cánÿiñe jëtschuayama te, atše sënjanoquedá chë Uámana Espíritbeyeca corente mandaná, mo otjenayoquëcá soyënga sënjëtsonÿaye, y atšbe stëtšoica canÿe jabuache oyebuambnayana sënjanuena, mo canÿe trompetéftjua cuafjuajatëtcá; <sup>11</sup>mëntšá šontsanatsëtsná: “Canÿe librëšañe mábema lempe ntšamo contsonÿacá y cochjuíchmua chë Asia luaroca canÿsëftañe ošbuachiyëngcá enefjuanëngbiyoe: Efeso, Esmirna, Pérgamo, Tiatira, Sardis, Filadelfia y Laodiceoquëngbiyoe ca.”

<sup>12</sup>Sënjanobuértana jinÿama nda chca šojtsanatsëtsná, y chca sënjanma ora, sënjáninÿe canÿsëfta castellano candelerëšënga; <sup>13</sup>y chë canÿsëfta castellano

candelerëšënguïñe tsëntsaca canÿa sënjáninÿe, mo entšacá inÿná, canÿe bën entšayá uichëtjoná, y cochóntscoca canÿe tëntša castellano uasnanéjaca. <sup>14</sup>Chabe stjënashana uafjantsésha, puerte uafjantsésha mo canÿe oveshabe boboshëshacá, y chabe fšñëbenga mo inëshcá enjëtšinÿana. <sup>15</sup>Chabe shecuatšënga enjëtsebuashinÿinÿana mo bronscá, ndaybé natsana inëjana tcojuchnëngo enabé chaotsemnama y chentšana entšëjuaca becá tcojajojó corente chaotsebuashinÿinÿanama; y chabe oyebuambnayana jabuache enjëtšenana mo bëtscá bëjaye cuaftsebuachquëcjancá. <sup>16</sup>Chabe catšbioica cucuatšïñe enjëtšatbëna canÿsëfta estrellënga, y chabe uayoicana enjëtšobocana canÿe espadëja, nyets utoicajana puerte eššánëja, y chabe jubíá tša enjëtsebuashinÿinÿana, mo chë shinÿe corente, lempe ntšamo tojobenacá tojtsebuashinÿinÿana orcá.

<sup>17</sup>Cha sënjáninÿe ora, chabe shecuatšëntše mo obanacá sënjánshajaye. Pero cha, chabe catšbioica cucuatšë átšbeñe jajájuase, šonjaniyana: “Ndoñe matauatjana; atše sëndmëna chë nyetsca soyënga bojatsáyá y pochocayá, <sup>18</sup>chë sempre vida bomná. Atše obaná sënjamna, pero mora nyetsca tescama vida sëntsebomna. Atše obenana sëndbomna, y chë obenánaca entšángbiyoe ndoñe quenátamna infiernoca nyetsca tescama castigánënga jtsemnana, mo nyets tempo cuaftsobancá. <sup>19</sup>Ntšamo tconjinÿcá mábema, chë quem tempo endmëna soyëngama y chë más chcoye echántsemna soyëngama. <sup>20</sup>Mëntšá endmëna chë atšbe catšbioica cucuatšïñe



tconjinÿe canÿsÿefta estrellÿngaca  
y chÿ canÿsÿefta castellano  
candelerÿsÿÿngaca: chÿ canÿsÿefta  
estrellÿnga montsinÿinÿná chÿ  
canÿsÿÿftañe oÿbuachiyÿngcá  
enefjuanÿngbeñe chamotsemándama  
uámana ichmónÿnga, y chÿ canÿsÿefta  
candelerÿsÿÿngca chÿ canÿsÿÿftañe  
oÿbuachiyÿngcá enefjuanÿnga.”

**Efesoca oÿbuachiyÿngcá  
enefjuanÿnga jábuayenama**

**2** <sup>1</sup>Mÿntśánaca cha ſonjaniyana:  
“Mÿntśá mabobema chÿ Efesoca  
oÿbuachiyÿngcá enefjuanÿngbeñe  
chaotsemándama uámana  
ichmonábioye:

Mÿntśá entsichamo chÿ chabe  
catſbioica cucuatſiñe canÿsÿefta  
estrellÿnga entsatbÿená y chÿ  
canÿsÿefta castellano candelerÿsÿÿnga  
luarÿjana entsaná: <sup>2</sup>Atſe  
lempe ſëndétatſÿembo ntſamo  
tſÿÿngaftanga ſmoyenana; atſe  
corente ſëndétatſÿembo tſÿÿngaftanga  
jabuache ſmotrabájama, y ntſamo  
tſÿÿngaftanga Bÿngbe Bÿtsábeñe  
jtsóbátmanÿe ſmnÿſauantana  
padecena soyÿÿnguiñe ſmojtsemna  
ora. Y átſnaca ſëndétatſÿembo  
tſÿÿngaftanga ndoñe ſmontsobena  
jtsÿeuantánana ntſamo bacna  
entſanga tmojtsamcá. Atſnaca  
ſëndétatſÿembo tſÿÿngaftanga yejuana  
ſmojarrepará y becá ſmojenojuabó  
jinÿyama chÿ Jesucristbe ichmónÿnga  
imomna ca tmojtsichamÿngbiama;  
pero ndegombre chÿnga ndoñe  
chca quemátſmÿna; y chca  
ſmojámayeca, tſÿÿngaftanga mora  
ſmontſetátſÿembo chÿnga boſterÿnga  
imomnama. <sup>3</sup>Padecena soyÿÿnguiñe  
becá ſmojoboyá y chca ora, Bÿngbe  
Bÿtsábeñe ſmobátmana. Chÿ  
soyÿÿnguiñe ſmojasufrí, tſÿÿngaftanga

atſe ſmoservénama; y tſÿÿngaftanga  
chca ſmondÿservena, ainaniñe  
añemo jtsebmomnama ntjajbanacá.

<sup>4</sup>Pero canÿe soye ſÿntsebmomna  
tſÿÿngaftangbe contra jayanama:  
Tſÿÿngaftanga mora ya ndoñe  
cachca bonſhánana queſmátſbmomna  
ni atſbiamna ni nÿetsca  
entſangbiama, ntſamo átſbeñe  
jtsoſbuáchiyama ſmonjanbojatſé  
orcá. <sup>5</sup>Menójuabonga ntſamo chÿ  
tempo ſmonjánbobonshanama,  
juabnayana motrocanga y  
cachiñe ſmochtsama ntſamo  
chÿ átſbeñe jtsoſbuáchiyama  
ſmonjanbojatſé orcá. Ndoñe  
chcace, atſe tſÿÿngaftangbioye  
chanjá jabuache jetsacastígama,  
jtsapochócantscuana, mo chÿ  
tſÿÿngaftangbe cuenta entsemna  
candelerÿſe chabe puestentſana  
cuaftejuanacá. Chca chanjama,  
tſÿÿngaftanga juabnayana  
ndoñe chaſmonjatrocace. <sup>6</sup>Pero  
tſÿÿngaftangbe pavor quem tſabe  
soye ſmontsebmomna: Tſÿÿngaftanga  
ſmonduábotena lempe ntſamo  
chÿ nicolaíta ca uabaina entſanga  
tmojtsamcá, ndayá átſnaca  
ſÿnduábotena.

<sup>7</sup>Chÿ jouenama tmojtsobenÿnga,  
chamouena ndayá Espíritu chÿ  
ndayenache oÿbuachiyÿngcá  
enefjuanÿnga yojtsÿſſſnacá. Chÿ  
padecena soyÿÿnguentſana tſabá  
chamojábocana mo ayÿñjanayÿngcá,  
chÿngbiama chanjama chÿ  
nÿetsca tescama yomna tſabe  
vida chamotsebmomnama, y chca  
chÿnga mochántsemna mo chÿ  
nÿetsca tescama yomna tſabe vida  
jtsebmomnama betiyeshentſana  
cuafteſſſſacá, chÿ entſanga ſempre  
oyejuayÿnga mondbetsemnoca ca”  
—cha ſonjaniyana.

**Esmirnoca ošbuachiyëngcá  
nefjuanënga jábuayenama**

<sup>8</sup>Mëntšánaca cha šonjaniana:  
“Esmirna bëts pueblentše  
ošbuachiyëngcá nefjuanëngbeñe  
chaotsemándama uámana  
ichmonábioynaca mëntšá mabobema:

Mëntšá entsichamo chë nyetsca  
soyënga bojatšayá y pochocayá, chë  
tonjanobaná y ndabiama Bëngbe  
Bëtsá tonjama cháuatayenama:

<sup>9</sup>Atše sëndétatšëmbo tšëngaftanga  
tša jabuache šmojasufrima y  
ndbomnjëmënga šmomnama,  
pero ndegombre Bëngbe  
Bëtsábíocana bëtscá tšabe soyënga  
šmondëtsóbobmñe. Y sëndétatšëmbo  
tša bacá tšëngaftangbiana  
mondoyebuambná chë judiënga  
imomna ca ichámënga, pero ndoñe  
ntsamana mo chë Bëngbe Bëtsabe  
bocacana entsängcá; chca, chënga  
mondmëna mo Satanásbe entsängcá,  
nye chábioye jtseservënëse y  
jtsatschuanayëse.

<sup>10</sup>Ndoñe matauatjëngana chë  
ndoñe yapa bën y tšëngaftanga  
šmochjasufrima, er Satanás  
echanjama tšëngaftanguentsënga  
báseftanga cárceloye ínÿenga  
chacmëtámíama, jinÿama ntsachetšá  
Cristbeñe ošbuáchiyana šmobomnama,  
padecena soyënguiñe šmojtsemna  
ora; y entsamna baseftayté jasúfriana.  
Sempre bëtscá ošbuáchiyana, y  
ainaniñe bëts añemo šmochtsebomna,  
masque jobanámnaca chacmotsamna,  
Cristbiana trabájaye causa. Chca  
chašmojtsamëse, atše chanjama  
tšëngaftanga chašmotsebomnama mo  
canÿe uacanana soycá, chë nyetsca  
tescama yomna tšabe vida.

<sup>11</sup>Chë jouenama tmojtsobenënga,  
chamouena ndayá Espíritu chë

ndayenache ošbuachiyëngcá  
nefjuanënga yojsëtsëtsnacá. Chë  
padecena soyënguentsana tšabá  
chamojábocana mo ayëjanayëngcá,  
ndegombre chënga ndoñe  
queochátamna játauatjana nyetsca  
tescama castigánënga jatsmënama  
ca” —cha šonjaniana.

**Pérgamoca ošbuachiyëngcá  
nefjuanënga jábuayenama**

<sup>12</sup>Mëntšánaca cha šonjaniana:  
“Pérgamo bëts pueblentše  
ošbuachiyëngcá nefjuanëngbeñe  
chaotsemándama uámana  
ichmonábioynaca mëntšá mabobema:

Mëntšá entsichamo chë nyets  
utoicajana puerte efsana espadëja  
entsatbëná: <sup>13</sup>Atše sëndétatšëmbo  
ntšamo yomna tšëngaftangbe  
oyenentše, canÿe luare ndayentše  
Satanás entsängbioye puerte  
iuamënda. Masque chca,  
tšëngaftanga sempre nye atše  
šmondëtseservena, y ndocna te  
chešmáisayana átšbeñe ndoñe  
šmondošbuaché ca, ni mo Antipas,  
chë canÿe nyets tempo atšbe  
ustoná y atšbiana ndegombre  
oyebuambnayá, ínÿenga tmonjanóba  
ora. Y lempe chca tojopasá  
tšëngaftangbe pueblentše, ndayentše  
Satanás bëtscá entsana.

<sup>14</sup>Pero básefta soyënga séntsebomna  
tšëngaftangbe contra jayanama:  
Chentše tšëngaftangbeñe  
báseftanga montsemna, soyënga  
montsabuatambá ntšamo bayté  
entsemna Balaam enjanabuatambacá.  
Cha rey Balácbioye tbojanbuayená  
ntšamo jamana Israeloca  
entsängbioye jáingñama, chënga  
chë ntšamo ndoñe tšabá yomncá  
chamotsamama; y chca, Balac  
tojanma chë ínÿenga diosënga

yojamna ca imojanajuabná soyënga jadórana uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama. <sup>15</sup> Chéntsñaca ínÿenga montsemna, y chënga chë nicolaitëngbe buatëmbana soyënguïñe mondošbuaché, y chca buatëmbana soyënga ndoñe tšabá quenátsmëna. <sup>16</sup> Šmochtsejuabnaye ntšamo šmojtsamama, chëngbioye tšëngaftangbeñe šmojsëuantana ora, y chca jtsamana šmochjajbaná; er ndóñese, atše betso tšëngaftangbioye chanjá, y chë chca buatëmbana soyënguïñe ošbuáchiyana ndoñe tmonjajbanángaftaca chanjétsja chë atše uayoicana endóbocana espadéjaca.

<sup>17</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentšana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëše, ndayá Bëngbe Bëtsá tempo entšángbioye ndoñe tonjinÿanÿé; y canÿe fjantse ndëtšëtema chanjáyentsbuachiye, chënga oyejuayënga šmojábemama. Chiñe canÿe tsëm uabaina echantsábemana; ndocná chë uabaina quenátabatma, ndayá nÿe chë chamojójyëngacñënga ca” —cha šonjanianyana.

**Tiatiroca ošbuachiyëngcá enefjuanënga jábuayenama**

<sup>18</sup> Mëntsánaca cha šonjanianyana:  
“Tiatira bëts puebloca ošbuachiyëngcá enefjuanëngbeñe chaotsemándama

uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronce shecuatsënga bomná: <sup>19</sup> Atše sëndétatšëmbo ntšamo tšëngaftanga šmoyenama; sëndétatšëmbo ntsachetšá tšëngaftanga Bëngbe Bëtsábioye y nÿetścángbioye šmababuánÿeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservënama, ntšamo tšëngaftanga ínÿenga šmojujabuache y ntšamo Bëngbe Bëtsábeñe jtsobátmanëse becá šmojoboyá padecena soyënguïñe; y séntsetatšëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatsé orscama.

<sup>20</sup> Pero canÿe soye séntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservënënga entsaíngña, shembása o boyabásaftaca bacna soyënga chënga chamotsamama, y chë ínÿenga diosënga yojamna ca imojanajuabná soyënga jadórana uátšëmbona saná chamosama. <sup>21</sup> Cha sënjuená atše chjacastíga ca, chca juabnyana ndoñe tonjatrocasa, y canÿe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca,

pero ndoñe chenátsbošena. <sup>22</sup> Mora atše chanjama bêts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiana chanjama puerte chamosufrima; <sup>23</sup> y chë shembásabe básenga chantsëbaye. Chca, nyetsquénache ošbuachiyëngcá enefjuanënga mochántsetatšëmbo, ndayá entsãnga juabniñe y ainaniñe tmojuabnacá atše tsuábuatmama; y cada ona tšëngaftanguentsá, chca bacna soye cháftaca tojamá, ntšamo ibojtsomerecencá chanjacastíga. <sup>24</sup> Pero tšëngaftangbentše, ínÿenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachenga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inÿe más toto soye chašmotsamama. <sup>25</sup> Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana. <sup>26</sup> Chë padecena soyënguentsana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nyetsca mándayëngbentša entsãngbeñe jtemádayama, <sup>27</sup> ntšamo atšbe Taitá chabe obenana šojatšetacá; y chënga entsãngbioye puerte obenánaca mochántsamëndaye, mo canÿe hierro varëfjaquëcá, y chëngbe

contra chamojtsemnëngbioye mochántsapochocaye, mo nÿe matbajënga tmojtsëtsjanjncá. <sup>28</sup> Y chë jabínÿnama ora bínÿnaye estréllnaca chanjátšataye. <sup>29</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniana.

**Sardisoca ošbuachiyëngcá enefjuanënga jábuayenama**

**3** <sup>1</sup> Mëntšánaca cha šonjaniana: “Sardis bêts pueblentše ošbuachiyëngcá enefjuanëngbeñe chaotsemándama uámána ichmonábioynaca mëntšá mabobema: Mëntšá entsichamo chë Bëngbe Bëtsabe canÿsëfta espíritënga y chë canÿsëfta estrellënga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiana ínÿenga tša jtsichámuana Bëngbe Bëtsá jaserviama bëtscá šmojtsama ca, pero ndegombre tšëngaftanga nÿe batšatema šmotsama, y chca, chabiana mo obanëngcá šmondmëna. <sup>2</sup> Botamana šmochjenóbobonÿe y más šmochtsama chë Bëngbe Bëtsá jaserviama cabá šmondama básefta soyënga. Ndoñe yapa quenatájamna chë tšabe soyëngnaca chašmotsajbanama, er atše sënjinÿe chë Bëngbe Bëtsábioye jaserviama ntšamo jtsamëse šmoyencá, atšbe Bëtsabiana ndoñe yapa tšabá quenátsmëna. <sup>3</sup> Asna, šmochtsenójuabnaye ndayá Bëngbe Bëtsábiocana šmojóyëngacñama, y chabiana šmojouena soyënguiñnaca. Ntšamo chë soyënga yomncá šmochtsiyena, juabnayana

šmochjatróca y šmochjónťša bĕťscá jtsamana Bĕngbe Bĕťsá jasĕrvíama. Ndoñe tšabá cach tšĕngaftanga chašmonjenójuabose y juabnyana ndoñe chašmonjatrocace, ñe ndeolpe chanjá tšĕngaftangbioye, mo canĕ atbĕbanacá, chabíama ndocná tontsejuabná ora, y ndegombre tšĕngaftanga ndoñe quešmochátstatšĕmbo mocna ora atše tšĕngaftangbioye chjama. <sup>4</sup>Masque chca, Sardisentše tšĕngaftangbeñe básefta entšanga mondmĕna, chĕnga ndoñe chematajbaná oyenana tšabe soyĕnga jtsamĕse, bacna soyĕnga játamama. Chĕngna átšeftaca mochántšajna uafjantsĕjuangá uichĕťjonĕnga, chĕnga chca mercedo montsebuajónayeca. <sup>5</sup>Chĕ padecena soyĕnguentsšana tšabá chamojábocana mo ayĕnjanayĕngcá, chca uafjantsĕjuangá uichĕťjonĕnga mochántsemna, y chĕngbe uabaina ndoñe quichatsjuána chĕ tšabe vida mochjónĕnĕngbe uabaina enduábemana librĕšentsšana, ndayá atše, Bĕngbe Bĕťsabe delante y chabe angelĕngbe delante, chĕnga atšbe entšanga imomna ca chanjayana. <sup>6</sup>Chĕ jouenama tmojtsobenĕnga, chamouena ndayá Espírítu chĕ ndayenache ošbuachiyĕngcá enefjuanĕnga vojtsĕťsĕťsnacá ca” —cha šonjaníyana.

**Filadelfiaca ošbuachiyĕngcá  
enefjuanĕnga jábuayenama**

<sup>7</sup>Mĕntšánaca cha šonjaníyana:  
“Filadelfia bĕťs puebloca  
ošbuachiyĕngcá enefjuanĕngbeñe  
chaotsemándama uámana  
ichmonábíoyanaca mĕntšá mabobema:  
Mĕntšá entsichamo chĕ uamaná  
y ndegombre oyebuambnyá, chĕ

jtsemándayama puerte obenana bomná, ntšamo Rey David enjanbomncá, chĕ nda ndayá chaotsemnama tojamandá ora, ndocná ntšobenana jamama chca ndoñe chaondĕťsemnama, y ndayá ndoñe chaondĕťsemnama tojamandá ora, ndocná ntšobenana jamama aíñe chaotsemnama: <sup>8</sup>Atše lempe sĕndĕťatšĕmbo ntšamo tšĕngaftanga šmoyenama. Minĕyĕnga, atše sĕnjama tšĕngaftanga bĕťscá tšabe soyĕnga chašmotsebomnama, y ndocná quenátobena jamama chca ndoñe chaondĕťsemnama; y chca entsemna mo atše tšĕngaftangbíama canĕ bĕšáša cuafjatĕťcá, y chĕša jtatámíama ndocná quenátobena. Atše sĕndĕťatšĕmbo tšĕngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmĕna ca. <sup>9</sup>Atše chanjama, chĕ mo Satanasbe entšangcá imomnĕnga, ñe chábioye jtseservĕñese y jtsatschuanayĕse, chĕ judiĕnga imomna ca íchámĕnga, pero chĕ Bĕngbe Bĕťsabe bocacana entšangcá ndámĕnga y bosterĕnga, chĕnga tšĕngaftangbioye chamua y tšĕngaftangbe delante chamoshamentšĕ, tšĕngaftangbíama respeto jinĕyanĕiyama, y chca, chĕnga chamotsetátšĕmbo atše sempre cbababuánĕšhanama. <sup>10</sup>Atše tcbonjanamĕndá, Bĕngbe Bĕťsabeñe jtsobátmanĕse, lempe chašmotsoboyá padecena soyĕnguĩne, y tšĕngaftanga chca šmonjama. Chíyeca, atše puerte tšabá cbochántšanyĕna, chĕ quem luarentše oyenĕnga ñĕťscanga jasúfriama y padecena soyĕnguĩne jtsemnama chaojtsemna ora,

Bëngbe Bëtsábeñe aíñe o ndoñe mondošbuáchema jinýanýiyama.  
<sup>11</sup> Cachiñe quem luaroye betesco chanjésabo. Sempre šmochtsama ntšamo mora šmondamcá, y Bëngbe Bëtsábíocana šmojóyëngacñe soyënga šmochtsinýena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábíoye jtseservénama ndoñe tmontsajbanángbiyoye yochjatsataycá, chëngbe uacanana soye. <sup>12</sup> Chë padecena soyënguentšana tšabá chamojábocana mo ayëñjanayëngcá, chëngbiama atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábíocana. Y chëngbeñnaca chanjuábema atšbe tsëm uabaina. Lempe chca chanjama jinýanýiyama chënga Bëngbe Bëtsábenga mochtsemnama.  
<sup>13</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá ca” —cha šonjaniyana.

**Laodiceoca ošbuachiyëngcá  
 enefjuanënga jábuayenama**

<sup>14</sup> Mëntšánaca cha šonjaniyana:  
 “Laodicea bëts puebloca  
 ošbuachiyëngcá enefjuanëngbeñe  
 chaotsemándama uámana  
 ichmonábioynaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyeubambnayá, y chë ndábeyeca Bëngbe Bëtsá quem luare tojanmá:  
<sup>15</sup> Atše lempe sëndétatšëmbo ntšamo šmoyenama. Atše sëntsetatšëmbo tšëngaftanga ndoñe yapa šmontseboše Bëngbe Bëtsá jasérvíama, pero Bëngbe Bëtsabe buayenana soyënga ndoñe lempe šmontsaboté. Y chca, nyë batsatema šmojtseboše Bëngbe Bëtsá jasérvíama; chca, tšëngaftanga šmontsemna mo tibiye buyeshcá, ni ntšniñiye, ni shécbaniye.  
 ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye! <sup>16</sup> Chca, tšëngaftanga tibiye buyeshcá šmondmëna, y ndoñe quešmátsoše bëtscá jamama, pero Bëngbe Bëtsabe soyënga ndoñe lempe šmontsaboté. Chíyeca atše sëntsejuabná jtsébatena, mo nda tibiye býeshe tojëtšbuashëtjácá, chcaye ndoñe bondogustana causa.  
<sup>17</sup> Er tšëngaftanga jtsichámuana bomnënga šmomna ca, puerte tšabá šmojábocana y tondaye cmontsabuáshebenaca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebenama. Chca, tšëngaftanga šmontsemna nyë ndoñe tšabá, ínýenga ngmënanaca chacmotsabamna, mo ndbomnjëmëngcá, mo jtanëngcá, Bëngbe Bëtsabe soyëngama ntosertancá, y mo enašëngcá, bëtscá Bëngbe Bëtsabe soyënga ntsebošncá.  
<sup>18</sup> Chíyeca cbabuayená, átšbentšana chašmuatsjinýe chë Bëngbe Bëtsabe soyënga y uámana soyënga, mo chë ena castellano jabemama,

iñejana fjëchnënguëse castellano átsbïoye šmojtsontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonýá chë ba bacna soyënga ntšamo tšëngaftanga šmojtsamcá. Šmochjaleséncia atše chacbëjabuache tšëngaftanga Bëngbe Bëtsabe bominyiñe tšábenga chašmotsemnama, mo juichëtuama uafjantse entšayá átsbïoye šmojtsantšabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsëuatjama. Šmochjaleséncia atše chacbëjabuache tšëngaftanga Bëngbe Bëtsabe soyëngama chacmósertama, mo tšëngaftanga bominye šocanama shnana átsbïoye šmojtsontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

<sup>19</sup> Atše chë sëndábabuanýëshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jaserviama, y juabnayana šmochjatróca, y nyets tempo puerte šmochtseboše Bëngbe Bëtsá jtseservénana. <sup>20</sup> Nderado canýe tšabe amigo yebnoye tojabo y tojachembo, tšëngaftanga šmojouenëse y bësháša šmojebiatëfjëse, cha jamashënguana, y cánýiñe cháftaca joyejuayana y jasana. Cachcá, atše entšanga sëntsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámarshëngo chabe ainaniñe jtsiyenama, y nyets tempo cháftaca cánýiñe mo canýacá chanjëftsemna.

<sup>21</sup> Chë padecena soyënguentšana tšabá chamojábocana mo

ayëñjanayëngcá, atše chanjama chënga puerte bëtsétsanga chamotsemnama ntšamo atše sëndmëncá, y átsëftaca chamótbemama, atšbe uámana tbemanentše jtsemándayama, ntšamo atše atšbe uayayëngbïoye sënjayëñjanacá, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá” —cha šonjanianya.

**Chë Ainënga Bëngbe Utabnabe  
uámana tbemanentša  
natsana imojtsechuanaye**

**4** <sup>1</sup> Chentšana mo otjenayoquëcá sënjáninye. Sënjanrrepará y sënjáninye celoca canýe bësháša enjétsatëfjna, y chë natsana sënjanuena oyebuambnayana, chë enjamna mo canýe trompetëfjua cuafjuajatëtcá, mëntsá šonjétsatsaye: “Moye mášëngo, atše bochanjinýinýiye ntšamo más chcoye yochjopasacá ca.”

<sup>2</sup> Cachora, chë Uámana Espiritbeyeca, mo atšbe ainana celoca cuaftsemncá atše sënjanoquedá, y sënjáninye celoca enjëtsemna canýe reybe uámana puesto, y chentše canýa enjëtsetbemana. <sup>3</sup> Chentše enjëtsetbemaná enjamna, puerte tëshinýná mo jaspe ndëtsbecá, puerte buanganá mo cornalina ndëtsbecá, y chë uámana puesto shéconana canýe tsëfcuacuatjo enjamna, y enjëtsebuashinýinýana mo canýe esmeralda ndëtsbecá.

<sup>4</sup> Chë reybe uámana puesto juachajana, inyë uta bnëtsana y canta puesto sënjáninye, y chiñe uta bnëtsana y canta bëtsëjëmënga

améndayënga monjëtsetbiamana, uafjantsëjuangá uichétjonënga, y castellano coronëshangá monjëtstabestšajona. <sup>5</sup> Chë uámana puestentšana enjët sobocana tcuinjējēnga, becá shauenanana y juesasanana; y chë uámana tbemaniñentša natsanoicna, canjësēfta uajuinjanésha enjët sangbototjuana; chë uajuinjanëshangá entsayana chë Bëngbe Bëtsabe canjësēfta espíritënga. <sup>6</sup> Y chë uámana puestentša natsanoica enjët semna mo canjē mar bejaycá, tēshínjēniye mo canjē cristal ca uabaina ndëtšbecá.

Chë luariñe tsëntsaca, chë uámana puesto enjët semnentše y chë shëconánējana monjët semna canta Ainënga, nyëtsañe fšnëbéngaca, natsanoica y stëtsoica. <sup>7</sup> Chë natsana Ainá enjamna mo canjē leoncá, chë injē Ainá mo canjē torošcá, chë injē Ainá enjánbomna mo canjē entšabe jubiacá, y chë injē Ainá mo canjē águila tojtsongüefjncá. <sup>8</sup> Chë canta Ainënga, cada ona chnénguana juatëngmiáša enjanábomna, y tsoicajana y shjoicajana nyëtsañe fšnëbénga monjánbomna. Y chënga nyets tempo, ntjochnacá mëntšá monjánichamo:

iUamaná, Uamaná, Uamaná,  
Bëngbe Utabná,  
Bëngbe Bëtsá nyets obenana  
bomná,  
nda enjamná, endmëná y sempre  
echanjëftsemná ca!

<sup>9-10</sup> Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentše tbemaná, chë nyets tempo y nyetsca tescama oyená. Chënga puerte respeto chabiana monjëtse bomna y bëtscá tmontanchuá. Cada ora chënga chca tmonjanma ora, chë uta bnëtsana y canta bëtsejémënga

améndayënga, chë uámana puestentše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

<sup>11</sup> Aca nyets merecido  
condët sobuájoñe, Bëngbe  
Utabná y Bëngbe Bëtsá,  
entšanga chamotsinjanñnama,  
aca puerte bëtscá comnama,  
y chamotsichamo aca nyets  
respeto buajoná comna, y nyets  
obenana bomná comna ca,  
er aca nyetsca soyënga tcojama;  
aca icnabóseyeca chë soyënga  
yojtsemna y aca chca tcojanma  
ca.

**Chë uabemana uándmanana  
tsbuanácha y chë Oveshatema**

**5** <sup>1</sup> Chë uámana puestentše enjëtsetbemanabe catšbioica cucuatšñe canjē uándmanana tsbuanáchanaca sënjaninjē, y nyëtsañe enjët sabemana tsoicajana y shjoicajana, y canjësēfta tsengájaše sellëngaca enjët sajandmanana. <sup>2</sup> Y canjē ángel puerte obenana bomná sënjaninjē, y cha mëntšá enjët sayebuache: “¿Nda merecido yobuájona, quem uándmanana tsbuanácha jutëfjonama y chë sellënga jutsécama ca?”

<sup>3</sup> Pero, ni celoca, ni quem luarentše, ni quem luarentša jashenoye, ndocná quenjatsmëna obenánaca chë uándmanana tsbuanácha jutëfjonama, ni juinjama. <sup>4</sup> Y atše puerte sënjanenobošachna, er ndocná ntjónynana merecido buajoná chë uándmanana tsbuanácha chautëfjonama, ni chauinjama.

<sup>5</sup> Pero canjā chë bëtsejemënguentšá šonjaniana: “Ndoñe más matenóbošachena; mouena, chë



Judabe pamillentšá, León ca uabobainá, mando y obenana bétsebomnama, chë rey Davídbentšana Entšá, tonjayênjaná; cha entsobena chë uándmanana tsbuanácha jutéfjonama, y chë canýsëfta sellënga jutsécama ca.”

<sup>6</sup>Chora sënjáninýe, chë uámana puesto y chë canta Ainënga y chë bëtsëjémëngbe tsëntsaca, canýe Oveshatema tsanana, pero enjétsinýna mo cuafetsobacá. Chë Oveshatema enjánbomna canýsëfta tsëtjonëse y canýsëfta fšněbé. Chë canýsëfta fšněbé monjaninýinýná chë Bëngbe Bëtsabe canýsëfta espíritënga, chë Bëngbe Bëtsá nýets quem luarëjana tojánichamonga. <sup>7</sup>Chë Oveshatema tonjanobeconá y chë uándmanana tsbuanácha tonjanaca, chë uámana puestentše tbemanabe catšbioica cucuatšentsana; <sup>8</sup>y chabe cucuatšinë tonjanaca ora, chë canta Ainënga y chë uta bnétsana y canta bëtsëjémënga améndayënga chë Oveshatembe shecuatšentše tmonjanoshamentšé. Nýetscanga monjétsëtbëna arpangá y castellano codbenga jútjena inciensiýeca; chë codbenga inciensiýeca enjamna chë Bëngbe Bëtsabe entšanga tmojayana palabrénga, cháftaca jencuéntama ora.

<sup>9</sup>Y quem tsëm canto montsancántaye: Aca mercedo condëtsobuájoñe, chë uándmanana tsbuanácha chacuacama y chë sellënga chacutsécama; er acbe buiñe juabuáshanëse tconjanóbana, y chca enjamna mo crocénana cuafjëtšajocá, Bëngbe Bëtsabiama chamotsemnana, entšanga nýetsca cachca buiñe bomnënguentsána, nýetsca biyana bomnënguentsána, nýetsca canýe entšanguentsána,

y nýetsca mándayëngbentša entšanguentsána.

<sup>10</sup>Aca tcojama chënga chamotsobena ácaftaca jtsemándayama y uámanënga chamotsemnana, Bëngbe Bëtsábioye mo bachnangcá chamotseservënama, y quem luarentše chënga montsemánda ca —chënga monjétsesversiaye.

<sup>11</sup>Y chca sënjëtsonýaye ora, mallajta angelëngbe oyebuambnayana sënjanuena, y chënga monjésemna chë uámana puestentše, chë Ainënga y chë bëtsëjémënga améndayëngbe shéconana. Nýetsá bëtscá angelënga monjétssemna, corente mallajta; <sup>12</sup>y chënga mëntšá monjétsayebuache: ¡Chë Oveshatema cuafjobacá endmëná, mercedo endëtsobuájoñe, nýets obenana, nýets bomnana, nýets osertánana y nýets añemo chaotsebomnama, y entšanga chabiama chamotsichamo cha nýets respeto buajona yomna ca, y chamotsinýanýnama cha puerta bëtsá y uamaná yomnama, y nýetscanga chamotsatschuanama ca! —chënga monjétsayebuache.

<sup>13</sup>Y sënjanuena, lempe ntšamo Bëngbe Bëtsá tojanmcá aina soyënga, celoca, quem luarentše, quem luarentša jashenoye y chë mar béjayoca, chëngnaca mëntšá monjétsichamo: ¡Chë uámana puestentše tbemanábioye y chë Oveshatema nýetscanga nýets tempo y nýetsca tescama chamótsatacheuanaye y chamotsichamo chata puerta uámanata y nýets respeto buajonata ibomna ca,

y chamotsinÿanÿná chata  
puerte bëtsétsata y obenata  
bëtsemnama ca!

<sup>14</sup> Y chë canta Ainëngna  
monjétsichamo: “Chca chaotsemna ca.”  
Y chë bëtsëjémënga amëndayëngna  
tmonjanoshamentsé y chátbioye monjët  
satacheuanaye.

**Chë Oveshatema chë canÿsëfta  
sellënga tonjanëtsécá**

**6** <sup>1</sup> Chentšana más sënjáninÿe; chë  
Oveshatema chë canÿsëftentšana  
natsana sello tonjanëtsécá ora,  
sënjanuena canÿa canta  
Ainënguentšana puerte jabuache, mo  
cuafjajuesascá, mëntšá enjétsichamo:  
“iMabo ca!” <sup>2</sup> Sënjanrrepará y  
sënjáninÿe canÿe fjantse couaye, y  
chábeñe enjetsenjaquená canÿe  
arquëja enjétsatbëna. Chábioye canÿe  
coronëshá tmonjaniyé, y mo canÿe  
ayëñjanayacá tonjétsanbocna, y cabá  
más jatsÿénjanámnaca.

<sup>3</sup> Chë Oveshatema chë inÿe sello  
tonjanëtsécá ora, sënjanuena chë  
inÿa chë canta Ainënguentšana  
mëntšá enjétsichamo: “iMabo ca!”  
<sup>4</sup> Y inÿe couaye tonjánbocna, canÿe  
buanganá; y chë enjetsenjaquená  
obenana tonjanóyëngacñe jamama  
chë fshantsentša natjëmbana vida  
chaotsopochocama, entšanga  
chamotsenóbama; y canÿe bëts  
espadëja tmonjanoyé.

<sup>5</sup> Chë Oveshatema chë inÿe sello  
tonjanëtsécá ora, sënjanuena chë  
inÿa chë canta Ainënguentšana  
mëntšá enjétsichamo: “iMabo ca!”  
Sënjanontjësé y canÿe ftsenga couaye  
sënjáninÿe, y chë enjetsenjaquená  
canÿe romanëshá enjétsëtbëna.

<sup>6</sup> Y chë canta Ainëngbeñe canÿe  
oyebuambnayana mëntšá sënjanuena:  
“Nÿe canÿe kilo trigo canÿe tesca

trabajuama, y unga kilo cebadá canÿe  
tesca trabajuama; pero chë aceitiye y  
chë vínoyna ndoñe cattsepochócaye ca.”

<sup>7</sup> Chë Oveshatema chë inÿe sello  
tonjanëtsécá ora, chë ústonoca  
Ainá enjétsichamo: “iMabo ca!”  
<sup>8</sup> Sënjanontjësé y canÿe shatsësiye  
couaye sënjáninÿe; chë enjetsenjaquená  
Obanana ca enjanabaina, y stëtšoica  
bonjétsëstona canÿa, Obanënga imomna  
luare ca uabainá; y chátbioye obenana  
tmonjanatsatá cántañentšana cánÿentse  
quem luarentse jtsepochócama, chentša  
entšanga jtsapochócace, entšanga  
tmojtsentsjanama, bëts shëntsanëngaca,  
šocanëngaca y quem luarentša tsátjaye  
bayëngaca.

<sup>9</sup> Chë inÿe sello tonjanëtsécá ora,  
sënjáninÿe chë altarentša tajsoye chë  
tmojanóbanëngbe espíritënga, chë  
Bëngbe Bëtsabe palabra entšanga  
abuayiyayama tmojanóbanënga.

<sup>10</sup> Chora chënga tmonjanontsé tša  
uayebuáchana: “Uamaná y ntšamo  
tojašebuachenacá lempe amá bëngbe  
Nduiño, ïntseco quem luarentša  
entšangbiama cochjayana ndoñe  
tšabá tmonjamama, y chë bëngbioye  
obanayama cochjácastigaye ca?”

<sup>11</sup> Chentšana nÿetscángbioye uafjantse  
entšayá tmonjaniyé y tmonjanéyana  
batšatema más chamobatmá ca, chë  
cachëngcá Crístbeyeca catsátanga  
y oservënënga, chë cachëngcá  
mochjanóbanënga, nÿetscanga choca  
chamojtsemnëntscuana.

<sup>12</sup> Y más sënjáninÿe; chë inÿe  
sello cha tonjanëtsécá ora, jabuache  
fshantse tontsanangmëmëmana; shinÿe  
tontsanftsénganga, mo chë obaná  
tojtsemnama juichëtjuama entšayacá, y  
nÿets juashcona mo buiñcá enjétsinÿna,  
<sup>13</sup> y estrellatëmënga celocana  
fshantsoye tontsantquécjana, mo  
canÿe higo betiye jabuache bínÿiaca

tojtseshatíyeyna ora, chë nguëfshna higuëbenga cuafjatquécjancá. <sup>14</sup>Y celoca luare tontsanenatjëmba mo canÿe tsbuanácha cuafjuandmanacá, y nÿetsca tjañe y béjayoca fshantsënga, chë ndayentse enjamnentsana tontsanojuaná; <sup>15</sup>y nÿetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nÿetscanga chë nÿets tempo nÿe ínÿabiama oservënënga y chë cachëngbiama trabájayëngnaca, chë cuevëshënguiñe y bëts ndëtšbenguenache tjañe tmontsanóitana; <sup>16</sup>y chë tjañëngoye y chë ndëtšbengoye montsanichamo: “iBëngbiowe šmotsëtebuantsá y šmotsaitame, chë uámana puestentše tbemanabe bominÿentsana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnama! <sup>17</sup>Er chë uachuana te chabe castigo jtsebínÿnama te tojóshjango; y mora ñnda nanjobenaye chë sóyeca ndoñe chamondëtsepochochocama ca?” —chënga montsanichamo.

**Chë Bëngbe Bëtsábiowe oservënënga  
chë uabouana castigüentsana  
mochántsatsëbacana**

**7** <sup>1</sup>Chca tonjanopasá chentsana, canta angelënga sënjananÿe, monjétsatsana chë quem luarentša canta opochócyenache; chënga ndoñe quemënjatanleséncia chë canta binÿiënga jtsebínÿnama, ndoñe chaondëtsebinÿiayama, ni fshantsentse, ni mar béjayoca, ni ndocna betiyeshënguiñe. <sup>2</sup>Inÿe ángelnaca sënjaninÿe, shinÿe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inÿe canta angelëngbiowe, ndémuanÿengbiowe

obenana tmojanatsatá chë fshantsentse y mar béjayoca lempe jtsepochochocama, chëngbiowe jabuache tonjánabachembo: <sup>3</sup>“iTondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiama oservënëngbiowe chë sëlloca juentsaca fchayauinÿnanantscuana, ndoñe chamondëtsepochochocama ca!”

<sup>4</sup>Y sënjanuena buétanga chë sëlloca tmojanauinÿnanayama: canÿe patse, canta bnétsana y canta uaranga entsanga uinÿnanánënga nÿetsca Israeloquentša bëts pamillanguentsana.

<sup>5</sup> Judabe pamillentsana, bnétsana uta uaranga uinÿnanánënga; Rubenbe pamillentsana, bnétsana uta uaranga; Gadbe pamillentsana, bnétsana uta uaranga;

<sup>6</sup> Aserbe pamillentsana, bnétsana uta uaranga; Neftalibe pamillentsana, bnétsana uta uaranga; Manasesbe pamillentsana, bnétsana uta uaranga;

<sup>7</sup> Simeonbe pamillentsana, bnétsana uta uaranga; Levibe pamillentsana, bnétsana uta uaranga; Isacarbe pamillentsana, bnétsana uta uaranga;

<sup>8</sup> Zabulonbe pamillentsana, bnétsana uta uaranga; Josebe pamillentsana, bnétsana uta uaranga; y Benjaminbe pamillentsana, bnétsana uta uaranga entsanga.

**Chë mallajta entsanga  
uafjantsëjuangá uichëtjonënga**

<sup>9</sup>Chentsana, sënjanrrepará y mallajta entsanga sënjananÿe, ndocna quentaisobenaye jacúntana, nÿetsca

mándayënguentšana, nÿetsca cachca buiñe bomnënguentšana, nÿetsca canÿe entšanguentšana, y nÿetsca biyana bomnënguentšana; chënga monjétsatsana chë uámana puesto chë Oveshatembe natsanentše, uafjantsëjuangá uichétjonënga y ramëshangá monjétsëtbëna.

<sup>10</sup>Nÿetscanga tša monjétsayebuache:

iBënga atsebacayana endobá,  
Bëngbe Bëtsá,  
chë uámana puestentše  
entsetbemanábentšana,  
y chë Oveshatémbentšana ca!

<sup>11</sup>Y nÿetsca angelënga, chë uámana puesto y chë bëtsëjëmënga amëndayënga y chë canta ainëngbe shéconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, <sup>12</sup>mëntšá jayanëse:

iChca chaotsemna!  
Bëngbe Bëtsábioye nÿets  
tempo y nÿetsca tescama  
chamotsadorana  
y nÿets ainánaca cha  
chamotsatschuaná.  
Entšanga chamotsinÿanÿná  
cha puerte bëtsá y uamaná  
bëtsemnama;  
cha endmëna nÿets osertánana  
bomná, y nÿets respeto buajoná,  
y nÿets obenana y añemo  
bomná.

iChca chaotsemna ca! —chënga monjétsichamo.

<sup>13</sup>Chentšana, canÿa chë bëtsëjemënguentšá tonjanoyebuambá y šonjantjá: “¿Ndëmuanÿënga imomna chë uafjantsëjuangá uichétjonënga, y ndëmocana tmojabo ca?”

<sup>14</sup>“Taita, aca chëngbiama cotátšëmbo ca” —atše sënjanjuá.

Y cha šonjaniana: “Chënga montsemna chë jabuache ngmenënguentšana tšabá tmojabocanënga; chë Oveshatema chëngbiama tojóbana y chëngbe bacna soyëngama perdonánënga montsemna; chëngbe uichétjonëjuangá tmojtsaboshabé y chë Oveshatembe buñeca tmojtabofjantsé.

<sup>15</sup>Chíyeca chënga chë Bëngbe Bëtsabe uámana puestentša natsanoica montsemna, y chábioye nÿets tempo chabe delante mondëservena, y chë uámana puestentše entsetbemaná, chëngbenache jtsemnëse, chënga echántsanÿëna, mo cuafjutsebotscá.

<sup>16</sup>Ya ndoñe más shëntsana, ni uajuendayana quemochátsbomna; shinÿama, ni yapa jënÿama ya ndoñe más quemochátsufrina;

<sup>17</sup>er chë Oveshatema, chë uámana puestentša natsana tsëntsaca entsemná, chëngbioye mo oveshëngcá echantsabuajënÿa, y echanjunatse béjaye vida bomniye yóbocana luaroye, y Bëngbe Bëtsá echanjama ya ndoñe más ngmënana chamondétsebomnama ca” —cha šonjanjuá.

#### Chë ústonoca sello

**8** <sup>1</sup>Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsa hora nÿetšá.

<sup>2</sup>Chora sënjananÿe chë canÿsëfta angelënga, chë Bëngbe Bëtsabe delante monjétsatsanënga; chëngbioye canÿsëfta trompetëfjuangá tmonjaníyé.

<sup>3</sup> Chentshana inye ángel tonjánashjango, canye castellano matbêtémaca incienso jajuinÿiyama, y altar natsanoica tonjantsá; chábioye bêtscá incienso tmonjanoyé chaojuinÿema chë castellano altaroca, chë uámana tbemana natsanoica enjêtsemnoca. Chë ángel incienso tonjanjuinÿé Bëngbe Utabná jëtschuayama, cánÿiñe nÿetsca chë Bëngbe Bëtsabe entsanga tmojoyebuambá palabrëngaca, cháftaca jencuéntama ora. <sup>4</sup> Y chë incienso juinÿnentša ngona, chë ángelbe cucuatšentshana Bëngbe Bëtsabe delante tonjanótsjua, cánÿiñe chë Bëngbe Bëtsabe entsanga cháftaca jencuéntama palabrëngaca. <sup>5</sup> Chentshana chë ángel chë incienso jajuinÿiyama matbëtema tonjanca, chë altarentša chebánbengaca tonjanajutjé, y quem luaroye tonjanëtsana. Chora enjêtsemna tša juevesasanana, corente shauenanana, bêtscá tcuinÿënga, y quem luare tontsanangmémama.

#### Chë trompetéfjuangá

<sup>6</sup> Chora chë canÿsëfta angelënga, chë canÿsëfta trompetéfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetéfjua tonjanájatëto, y quem luaroye tmonjanëtsana bëntstá y íñeshe, cánÿiñe buíñeca. Ungañentshana cánÿëntse quem luarentse tontsanjuinÿe, úngañentshana cánÿëntse betiyeshënguínë y nÿetsca nguëfshna shacuanënguínënga.

<sup>8</sup> Chë inye ángel chabe trompetéfjua tonjanájatëto, y chora chë mar bëjayoye tmonjanëtsana canÿe soye mo canÿe bëts tjañe tojtsangbototjuancá, y chë mar bëjayiñe úngañentshana cánÿëntse buíñe tontsanóbema.

<sup>9</sup> Chë mar bëjayiñe vida imobomnëngbeñe úngañentshana cánÿëntse tontsanopochocá, y chë barquënguëtsnaca úngañentshana cánÿëntse.

<sup>10</sup> Chentshana chë inye ángel chabe trompetéfjua tonjanájatëto, y canÿe bëts estrella, mo canÿe uajuinÿyanëshacá enjëtšangbototjuana, celocana tonjanótsatse chë úngañentshana cánÿëntse bëjayënguínë, y bëjaye óbocanenache. <sup>11</sup> Chë estrella enjanabaina Untjana ca; y chë úngañentshana cánÿëntse buyeshënguínë untjiye tontsanóbema, y chë untja búyeshe causa ba entsanga tmonjanóbana.

<sup>12</sup> Chë inye ángel chabe trompetéfjua tonjanájatëto, y chora tontsanóndbema chë úngañentshana cánÿëntse shinÿiñe, y chë úngañentshana cánÿëntse juashconiñe y chë estrellënguínënga. Chca, nÿetsca chentsha úngañentshana cánÿëntse ibetiñe tonjanoquedá, y chë causa ndoñe quemëntétebinÿnaye posufta horëntscuana, bnëté canta hora y ibeta canta hora.

<sup>13</sup> Chentshana, sënjanrepará y sënjanuena canÿe águila, tsbanánoca celoca enjetsongüëfjná, jabuache mëntšá enjëtšichamo: “Ítša lastema, tša lastema, tša lastema quem luarentša entsangbiama, chë inye trompetéfjuangá chë inye unga angelënga chamojuájatëto ora ca!”

**9** <sup>1</sup> Chentshana chë inye ángel chabe trompetéfjua tonjanájatëto, y sënjaninÿe canÿe ángel quem luaroye jastjanguana y enjëtšinÿna mo canÿe estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atëfjñentša llavëfja. <sup>2</sup> Chë uabouana tboca atëfjñentse tonjánatëfjo, y chentshana

becá ngona tonjanótsjua, mo bêts hornentša ngoncá; y chë uabouana tboye atëfjñentše ngona causa shinÿe tontsanibétata y nÿets celoca ena ngona enjëtsemna. <sup>3</sup>Chë ngonentšana ba tsátjaye chapulinga tmonjánbocana, y nÿets quem fshantséjána tmonjánáshana; y chéngbioye obenana tmonjanatšatá, chánaca jándbemama, mo chë juetjuama alacranëngbe obenancá. <sup>4</sup>Chéngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sélloca nduinÿananana entšangna aíñe. <sup>5</sup>Pero ndoñe chematanalesenciá entšángbioye jobáyana, ndayá nÿe jamama chënga shachna shinÿëntscuana tsetšanana chamotsebomnama; y chë chënga monjánama chamotsebomnama tsetšanana enjamna mo canÿe alacranbe uetjoniñcá.

<sup>6</sup>Chca tempo chaojtsemna ora, entšanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamëse jtsóbanama; y masque tša mochántseboše jóbanama, chora chéngaftaca ndoñe chca queochatopása, mo jóbanama ndoñe tmontsobencá.

<sup>7</sup>Chë tsátjaye chapulinga monjétsinÿna mo couayëngcá prontánënga jama entšángaftaca jéntsjava; chëngbe bestšašaiñe monjánábomna mo castellano coronëshangacá, y chëngbe jubiá enjamna mo entšabe jubiácá.

<sup>8</sup>Stjénashe monjánbomna mo shembásabe stjénashacá, y chëngbe juatsašënga mo leonbe juatsašëngcá.

<sup>9</sup>Chëngbe cuerpënga jenéuyanama cochaca monjánbomna morocho

soyënga, mo hierro soyëngcá, y chëngbe juatëngmiashangá tmojtsabonjáná ora, chë shauenanana bëtscá enjamna, mo ba cochëshangá couayënga cuafstasjojnácá, chë inÿengaftaca jéntsjava tmojëftsátjajo ora tojtseshauenancá. <sup>10</sup>Chënga monjánábomna mo alacranbe uascuatšëjuacá, ba uetotjéffjngaca, y chë uascuatšëjuaca obenana monjánbomna shachna shinÿëntscuana entšanga mal chamotsepasama. <sup>11</sup>Chë tsátjaye chapulinga canÿe amëndayá monjánbomna, chë uabouana tbocha mándaye ángel; hebreo biyaña cha uabainá Abadón ca y grieguiña Apolión o pochocayá ca.

<sup>12</sup>Chë natsana pochócyana ya tocjochnëngo, pero más chcoye cabá inÿe uta soye más pochócyana cachcá echántsemna.

<sup>13</sup>Chentšana chë inÿe ángel chabe trompetéffjua tonjanátatëto, y canÿe oyebuambnayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentšana enjëtsoyocana. <sup>14</sup>Y chë oyebuambnayana, chë trompetéffjua tonjanátatëto y enjétsëtbëna ángelbioye tbonjaniyana: “Chë canta angelënga chë Eufrates bêts fshájaye tsachoca utsbuanënga mëjafjoná ca.” <sup>15</sup>Y chë canta angelënga tmonjanëjafjoná; y nÿa chë ora, chë te, chë shinÿe y chë uatama chéngbioye tmojanaprontá, chë quem luarentša entšángbeñe úngañentšana cánÿentšënga jtsëbáyama. <sup>16</sup>Atse sënjanuena buétanga imojamna chë angelëngaftaca tmojáná soldadënga, couayënguiñe: uta patse millonënga ca.

<sup>17</sup>Mëntsá sënjananÿe mo otjenayoquécá chë couayënga y chë chëngbeñe enjaquenënga: Chë

enjaquenënga monjánbomna morocho soyënga cochaca, jenéuyanama, y chë soye buanganana enjáninÿna, mo iñcá, y fchendana mo chë uámana ndëtsbé jacintcá y tsësiyana inÿnana mo azufrcá; y chë couayënga monjánbomna mo leonbe bestšašcá, y chëngbe uayoicana enjétsobocana iñe, ngona y azufrana. <sup>18</sup>Y chë úngañentšana canÿentše entsanga tmonjanóbana quem unga uabouana pochócaye soyëngaca, chë couayëngbe uayoicana enjétsobocanana: iñe, ngona y azufrana. <sup>19</sup>Er chëngbe obenana entsanga japochócama monjánbomna uayáshañe y uascuatšéjuañe; er chëngbe uascuatšéjua enjuamna mo mëtscuayëngcá, bestšašëngaca, y chëjuanga causa entsanga mal montsanpásaye.

<sup>20</sup>Pero chë inÿe entsanga, chë uabouana pochócaye soyëngaca ndoñe tmonjanopochocanga, juabna ndoñe chematanrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtsbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama. <sup>21</sup>Juabna ndoñe chematanrocá y ndoñe chematanajbaná entsanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

**Chë ángel base uándmanana  
tsbuanáchaca**

**10** <sup>1</sup>Chentshana sënjaninÿe inÿe ángel, puerta obenana bomná; celocana enjétsastjajuana, y chabe shéconana canÿe jantšetëshe

enjésemna; chabe bestšaše tatsëtsacá canÿe tsëfcuácuatjo. Chabe jubiá shinÿcá enjétsbuashinÿinÿana, y chabe shecuatšënga mo úcuatjona niñëbenga cuaftsoiñcá. <sup>2</sup>Chabe cucuatšinë enjétsëtbëna canÿe base uándmanana y utëfjna tsbuanácha. Chabe catsbioica shecuátšeca chë mar béjayoca tonjantsá, y chë uañicuayóicatsecna, quem fshantsentše. <sup>3</sup>Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasantša jabuache shauenanana sënjanuena. <sup>4</sup>Chë canÿsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canÿe oyebuambnayana celocana sënjanuena, mëntšá šonjétsatsaye: “Nÿe aca cochtsójuabnañe ntšamo chë canÿsëfta juesasana tmonjayancá, ndocnábioye catjauyana, y chë soye ndoñe catjuábema ca.”

<sup>5</sup>Chora chë ángel, chë mar béjayoca y quem fshantsentše atsaná sënjaninÿá, chabe catsbioica cucuatše celoye tonjanatsbaná, <sup>6</sup>y tonjanjurá Bëngbe Bëtsabiama, chë nÿets tempo y nÿetsca tescama oyenabiama, chë celoca, quem luare, chë mar béjaye, y lempe chë luarënguiñe yobinÿncá tojanmabiama. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá, <sup>7</sup>er chë tempo chaojóshjango, chë ústonoye ángel chabe trompetéjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yujuabnacá; chë soye nÿetsca entsángbioye cha ndoñe chenatinÿanÿé, ntšamo tempo cha chabe oservënëngbioye, chë chabe juabna oyebuambnayëngbioye tojanabuayenacá ca” —cha tonjánayana.

<sup>8</sup> Chê atše sënjanuena oyebuambnayana celocana enjétsobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catsbioica cucuatšíñe base uándmanana y utëfjna tsbuanácha ca.”

<sup>9</sup> As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemécha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

<sup>10</sup> As chë base uándmanana tsbuanácha chë ángelbe cucuatšentsána sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema. <sup>11</sup> Chora šmonjaniyana: “Aca cmontsemna cachiñe jtétabuayenana, ntšamo Bëngbe Bëtsá tojayancá chë ntšamo yochjopásama, ba canye luarentša entsángaftaca, ba mándayëngbentsha entsángaftaca, ba biyana lomna entsánguentšéngaftaca y quem luarentša reyéngaftaca ca.”

#### Chë útata Bëngbe Bëtsabe juabna oyebuambnayata

**11** <sup>1</sup> Chentšana canye medídaye niñëfja šmonjanoyé, mo jatšëmbonëfjá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácutayate bueta entsanga chentše Bëngbe Bëtsábioye imojtsadorana. <sup>2</sup> Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiamer endmëna; y chënga, chë uámana ca uabaina bëts pueblama, canta bnëtsana y uta shinjëntscuana

soyënga mochántsama chiñe jtsepochócama, mo cuaftsebotajnaycá. <sup>3</sup> Pero atše, útata atšbiamer tatsëmbuata y oyebuambnayata chanjichamuá atšbe cuenta entsángbioye jábuayenama, canye uaranga y uta patse y chnénguana bnëtsana tentscuana. Chatna uajojësha entsayangá uichëtjonata bochántsemna, chca, ngmena bomnama jinýanýiyama ca” —chata tbonjánayana.

<sup>4</sup> Quem útata atšbiamer tatsëmbuata y oyebuambnayata bontsinýinjena chë uta olivos betíyeca y chë uta candeleréseca, ntšamo Bëngbe Bëtsá, chë quem luarentše mandayabe delante endmëncá. <sup>5</sup> Nderado nda tojtseboše chatbiamer bacna soye jamama, ndoñe quantatobenayer ntšámncara jáborlana, er uayoicana íñeshe nanjóbcara y chë uayayéngbioyer nantsapochócayer; nderado nda tojábosena chatbiamer bacna soye jamama, cachcá cha buántsemna jóbanama. <sup>6</sup> Chë útata obenana bondbomna celoca jtsachtama, ndoñe chaonduaftema, entsángbioyer Bëngbe Bëtsabiamer chabojtsabuayiná tesse; obenana béjayënga buiñe jtsebiaramer, y jamama quem luarentše chaotsóndbemamer, nyetscna pochócayer soyëngaca, bueta sóynara ntšamo chata tbojtsebošcá.

<sup>7</sup> Pero ntšamo Bëngbe Bëtsabiamer ibotatsëmbcá entsángbioyer jábuayenama chata chabojapochocá ora, chë uabouana bayá, chë corente bëts tboicara chaojabocná, chátbioyer echantsatsjayer, echantsayëñaná y echantsëbaye. <sup>8</sup> Y chatbe óbana cuerpo, chë corente bëts pueblentsha tsáshenañe echanjoquéda, chë chatbe Utabná tmojancrucificá luarentše, y chë bëts pueblo inýetsá juabáyamner nántsemner mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá,



er chentše chë entsanga yapa bacna soyënga jtsamana. <sup>9</sup>Y unga y tsëntsa tentscuana, chë obanatbe cuerpo mochantsonÿaye, nÿetsca canÿe luarentša entsanga, nÿetsca cachca buiñe bomna entsanga, ba biyana bomna entsanguentsana y ba mándayëngbentsa entsanga; ndoñe quenátslesenciana chata jutabuantsama. <sup>10</sup>Chata bochjóbanama, quem luarentše oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerta chamosufrima.

<sup>11</sup>Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantjeshnënga tša uatjana tonjanëbuache. <sup>12</sup>Chora canÿe jabuache oyebuambnayana tbonjanuena, celocana mëntšá enjétsëtsësnaye: “Moye mašënguata ca.” Y chatna canÿe jantšetshiñe tbonjántsjua, y chatbe uayayënga chca monjétsontÿaye. <sup>13</sup>Cachora quem fshantse jabuache tontsanangmémana, y chë bëts pueblentse bnëtsanentšana cánÿentše tontsanáshajaye, y canÿsëfta uaranga entsanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup>iChë inÿe uabouana soye quem luare japochócama, mora tocjochnëngo, pero betesco chë ústonoye uabouana pochócaye soye echanjóshjango!

**Chë ústonoye ángelbe trompetéjua**

<sup>15</sup>Chë ústonoye ángel chabe trompetéjua tonjanátatëto ora,

celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnama, y chë amëndayana echántsemna nÿets tempo y nÿetsca tescama ca.

<sup>16</sup>Y chë uta bnëtsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjétsëtbiananënga, tmonjanoshamentšé, fshantsótscoñe jotsejbénase, y Bëngbe Bëtsá tmonjanadorá, <sup>17</sup>mëntšá jayanëse:

Bëngbe Utabná, Bëngbe Bëtsá nÿets obenana bomná, aca chë mora cha condmëná y chë tempo cha conjamná cbontsatschuaná, er nÿa mora acbe bëts obenánaca soyënga cochjama, acbe amëndayana jóntšama.

<sup>18</sup>Ba luarentša entsanga ácaftaca tmonjanotšatjayená; pero chëngaftaca cmojetnama chë uabouana castigo jtsebínÿnama te tocjóshjango, chë tempo tmojanóbanëngbiama jayanama tšabá o ndoñe tšabá tmonjéftsemama. Tonjóshjango chë hora, uacanámana jtatšatayama chë acbiama oservëngbioye, chë acbe juabna oyebuambnayëngbioye, chë acbe entsángbioye, y chë acbe uabaina nÿetscangbiama más bëts uabainana yomnama juabnayëngbioye, uámanënga y nduámanënga; y chë tempo tonjóshjango, quem luare pochocayënga

jtsapochócayama ca —chënga  
tmonjánayana.

<sup>19</sup>Chora, Bëngbe Bëtsabe bëts  
yebna celoca tonjantëfjo, y choye  
enjëtsebinÿna chë cajontema,  
ndayëtema yojaninÿanÿná  
ntšamo Bëngbe Bëtsá chabe  
entšángbiöye tojanašebuachenacá;  
y chora enjëtsemna tcuinÿënga, tša  
shauenanana, juesasanana, quem  
fshantse tontsanangmëmmana y bëtscá  
bëntstá tonjantquécjana.

**Chë shembása y chë uabouana bayá**

**12** <sup>1</sup>Chentšana, canÿe bëtš  
soye celoca tonjanonÿná  
entšanga canÿe soye jinÿanÿiyama:  
canÿe shembása, shinÿe mo chabe  
uichëtjoniaca, juashcona chabe  
shecuatsëntša tajsoye, y chabe  
bestšašinë canÿe coronëshá bnëtsana  
uta estrelléngaca. <sup>2</sup>Chë shembása  
ngomamaná enjëtsemna, y chë šëšona  
jónÿnama yojétsobecuama jabuache  
enjëtseyoye, chë šëšona jónÿnama  
cha puerte jasúfriama ibojamna  
causa. <sup>3</sup>Y chora inÿe bëtš soye celoca  
tonjanonÿná, entšanga inÿe soye  
jinÿanÿiyama: canÿe uabouana dragón  
buanganá, canÿsëfta bestšašéngaca  
y bnëtsana tsëtjonëšéngaca y chë  
bestšašénguiñe enjanábomna  
canÿsëfta coronëshangá. <sup>4</sup>Chabe  
uascuatšéjuaca úngañentšana  
cánÿentše chë estrellatémënga  
celocana tontsansjójó, y quem  
fshantsoye chëtémënga tontsanëtsana.  
Y chë dragón chë šëšona jtsebomnama  
shembásabe delante tonjantsá, chë  
šëšonatëmbiöye jtsosañama, cha  
tojonÿná ora. <sup>5</sup>Chora chë shembása  
canÿe šëšona boyabásetema  
bontsanbomna, nda nÿets luarenache  
entšángbiöye yochtsaméndaye mo  
canÿe hierro varëfjaquécá. Pero chë

šëšona cháentšana tmontsanjuaná  
y Bëngbe Bëtsábioye, chabe uámana  
puestoye tmontsanámibañe. <sup>6</sup>Chë  
shembásana entšanga ndoyena luaroye  
tontsanachá, Bëngbe Bëtsá canÿe luare  
ibojabopróna choye, chentše saná  
chamocaredadoma, canÿe uaranga  
y uta patse y chnénguana bnëtsana  
tentscuana.

<sup>7</sup>Chentšana celoca canÿe  
entsjanayana enjëtsemna: Miguel,  
chë angelëngbe amëndayá, y  
chabe angelënga chë dragónaftaca  
monjëtsestsjanaye. Chë dragón y chabe  
angelënga monjëtsestsjanaye, <sup>8</sup>pero  
ndoñe chematanobená jáyëñjanama, y  
chëngbiama ya ndoñe más luare celoca  
quentëtsemna. <sup>9</sup>Chcase, chë uabouana  
dragón chocana tmontanábocna,  
chë tempsca mëtšcuaye, chë Diablo  
y Satanás ca uabainá, y chë bëtscá  
entšángbiöye aingñayá; quem  
fshantsoye cha tmontsantsatše, y chë  
cha yojanaménda angeléngnaca.

<sup>10</sup>Chora canÿe jabuache  
oyebuambnayana celoca sënjanuena,  
mëntšá enjëtšichamo:

Chë Bëngbe Bëtsá entšanga  
játsebacama tempo ya  
tonjòshjango.  
Mora Bëngbe Bëtsá  
echanjínÿanÿiye chabe obenana  
y mándayana,  
y chabe Uámana Uabuayaná  
Jesucristbe obenana  
jtsemándayama;  
er chë Cristbe delante bëngbe  
catšátanga mal aquedayá ya  
tmontábocna,  
nda nÿets tempo Bëngbe Bëtsabe  
delante mal enjaaquedayá.

<sup>11</sup>Bëngbe catšátanga cha  
tmonjayëñjaná,  
er Cristo, chë mo tmójóba  
Oveshatemcá, Bëngbe Bëtsá

bacna soyëngama entsànga  
 cháuperdonama,  
 tonjanóbana, chabe buiñe  
 juabuáshanëse,  
 y chë ndegombre soyëngama  
 chënga monjanóyebuambnáyeca;  
 er chëngbe vida chëngbiana  
 ndoñe quenjatámana;  
 Jesucristo jasérviama jóbanama  
 chënga monjanprontana.

<sup>12</sup> ¡Chcasna, celoca corente  
 oyejuayana chaotsemna,  
 y tsëngaftanga chë choca  
 oyenëngbeñnaca!  
 ¡Pero tša lastema chë fshantsoca y  
 mar béjayoca oyenëngbiana,  
 er chë diablo tsëngaftangbioye  
 tonjástjango, corente tsätjayá,  
 er cha entsetátšëmbo ya një  
 batšá yojtšábojamna chë  
 chábioye mochjacastígama ca!  
 —enjétsichamo.

<sup>13</sup> Chë dragón quem fshantsoye  
 tmojtsantsatsáma tonjáninýe ora, chë  
 šešona boyabásetema tbonjanéshjango  
 shembásabioye tbonsanacmé.  
<sup>14</sup> Pero uta juatëngmiáša, chë bëts  
 aguilbeshá, chë shembásabioye  
 tmonjaniyé, chabiama tmojanprontá  
 luaroye chaongüefjoma, entsànga  
 ndoyena luaroca, chë dragónbentsana  
 bënoca; y chentše enjamna chë  
 shembásabioye saná chamuájuatšema,  
 unga y tsëntsa uatëntscuana. <sup>15</sup> Chora  
 chë dragón, chabe uayoicana  
 bëts béjaye tonjanbuashëtjo chë  
 shembásabe stëtsoica, chaobuama y  
 chabotsambama; <sup>16</sup> pero quem fshantse  
 chë shembásabioye tbonjanájabuache,  
 er chë fshantse mo uayašacá  
 tonjantëfjo, y chë dragonbe uayoicana  
 béjaye obocniye tontsanobmuánañe.  
<sup>17</sup> Y chë dragón chë shembásabioye  
 tondaye jamana chenatanobená causa,  
 corente cacháftaca tbonjánetna, y

tonjáná chë ínýenga, chë shembásabe  
 basengcá mondmënënga játsjayama,  
 ntšamo Bëngbe Bëtsá yomandacá  
 imobedecénënga, y ntšamo Jesucristo  
 tonjanabuayená ndegombre soyëngaca  
 sempre imoyenënga. <sup>18</sup> Y chë dragón  
 chë mar béjaye tsachañe tonjantsá.

**Chë dragón tonjanma, chë mar  
 béjayoca uabouana bayá chabe  
 obenana chaotsebonnama**

**13** <sup>1</sup> Chentšana atše sënjaninýe,  
 canýe uabouana bayá chë mar  
 bejajoicana tonjánbocna; enjánbomna  
 canýsëfta bestšašënga y bnëtsana  
 tsëtjonëšënga, y chëšënguñe bnëtsana  
 coronëshangá, y chë bestšašënguñe  
 bañe enjétsabemana Bëngbe  
 Bëtsabiama contra oyebuambnaye  
 uabaina. <sup>2</sup> Chë uabouana bayá  
 sënjaninýa enjamna mo canýe  
 leopardcá, mo osbe shecuášangaca, y  
 chë uayáshana mo leonbeshacá. Chora  
 chë dragón tonjanma chë uabouana  
 bayá chaotsebonnama chabe  
 obenana, y chabe uámana puesto  
 jtsemándayama, y chabe bëts mando.  
<sup>3</sup> Canýe chabe bestšašënguentšë  
 enjétsinýna mo jóbanama tëtšeniñcá;  
 pero chentše tbontanóbema; y chora  
 quem luarentša njëtsca entsànga  
 ojnánánënga monjëtsemna, y chë  
 uabouana bayábioye montsanëyeunana.  
<sup>4</sup> Y chë dragón montsanadorana,  
 chë uabouana bayábioye obenana  
 tbojánatsetama; y chë uabouana  
 bayábioynaca montsanadorana,  
 mëntšá jayanëse: “Ndocná obenana  
 quenátsbomna quem uabouana bayacá,  
 y ndocná quenátobena chábioye  
 jayénjanama ca.”

<sup>5</sup> Chë uabouana bayábioye  
 tbonjanlesenciá corente  
 podësca Bëngbe Bëtsabiama  
 chaotsóyebuambnama, y obenana

tbonjanatšetá, canta bnétsana y uta shinýentscuana chaotsemándama. <sup>6</sup>Y podesca Bèngbe Bètsabiana tonjánayana, soyènga chabe contra, chabe bèts yebnama y chë celoca oyenèngbe contra. <sup>7</sup>Chábioynaca tbonjanlesenciá chë Bèngbe Bètsábenga imomnènga játsjayama, jáyénjanantscuana; y obenana tbonjanatšetá chaotsemándama nyetsca cachca buiñe bomna entsángbeñe, nyetsca canye entsángbeñe, nyetsca biyañe bomnèngbeñe, y nyetsca mándayèngbentša entsángbeñe. <sup>8</sup>Chë uabouana bayá nyetsca quem luarentša entsanga mochántadorana. Chë entsanga mondmèna ndëmuanýengbe uabaina ndoñe yontsábemana, chë Bèngbe Bètsábioye jëtschuayama mo canye oveshatemcá, tojanóbanabe librésañe. Bèngbe Bètsá quem luare cabá ndëma ora, quem librésañe tojanábema nyetscanga chë tsábe vida mochjónýenèngbe uabaina.

<sup>9</sup>Chë jouenama obenènga, chamouena.

<sup>10</sup>Chë cárceloye jama ibomná, cárceloye bochanjotóca jama; chë espadéjaca jobanamá, espadéjaca echanjóbana.

Chýeca quem luarentše entseyta, chë Bèngbe Bètsábenga imomnènga padecena soyènguiñe tmojtsemna ora, puerta uantadènga jtsemnana y Bèngbe Bètsábeñe jtsošbuáchiyana, mo chë Bèngbe Bètsabe entsángcá.

<sup>11</sup>Chentšana inye uabouana bayá sënjáninýe, quem fshantsentsana enjëtsebocana; uta tsëtjonëse mo oveshabešcá enjánbomna, pero mo canye dragoncá, mo canya Satanásbeyeca mandanacá enjëtsoyebuambnaye. <sup>12</sup>Y enjánama soyènga chë natsana uabouana bayabe nyets obenánaca, chabe delante. Chë

fshantsentsá bayá tonjanma nyetsca luarentše oyenènga chamotsadoránama chë natsana uabouana bayábioye, chë jóbanama tëtšeniñe tbontanobemá.

<sup>13</sup>Cha ba bèts soyèngnaca enjánama chabe obenana entsanga jinýanýiyama, entsángbe delante jamana inñe celocana fshantsoye chaótsatšamnaca. <sup>14</sup>Y cha tbonjanlesenciá chaoma chabe obenana jinýanýiyama chë natsana uabouana bayabe delante. Chë soyèngaca entsanga tonjanaíngñé, y quem luarentša entsanga tonjanéyana canye soye chamopormá, y chë soye cháotsinýna mo chë natsana uabouana bayacá, chë espadéjaca tëtšená enjamná, y chora tsábá enjetsatsmèná. <sup>15</sup>Y chë inye uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entsanga tmonjanma soye vida chaotsebomnama, y chë soye jóyebuambayama chaotsobenámnaca, y jamama chë chábioye ndoñe tmontsadoránènga chamóbanama. <sup>16</sup>Y tonjanma, nyetscángbioye, básenga y bètsétsanga, bomnènga y ndbomnènga, cachèngbiama trabájayènga y nýe ínýabiana nyets tempo oservénènga, catšbioica cucuatšíñe o juentsaca chamuínýnanama. <sup>17</sup>Y ndocná quenjátanobena ni jiyama, ni jobuámiñama, chë uinýnanánana ndoñe tontsebomnëse; chë uabouana bayabe uabaina o chë chabe uabainama yomna número.

<sup>18</sup>Chë número jinýenamna bètscá osertánana jtseytana. Chë becá osertánana bomná cháuinýena ntšamo chë uabouana bayabe número iuayancá, er canye entsábe número endmèna. Chë número endmèna chë chnénguana patse y chnénguana bnétsana y chnénguana.

**Chë canÿe patse y canta bnétsana  
y canta uaranga entsangbe canto**

**14** <sup>1</sup> Y más séntsanonÿá. Sënjáninÿe, chë Oveshatema, enjétsatsjabna Sión ca uabaina tjoca, y cháftaca monjésemna canÿe patse y canta bnétsana y canta uaranga entsanga, y chëngbe juentsaca enjétsabemana chë Oveshatembe y chabe Taitabe uabaina. <sup>2</sup> Chora sënjanuena celocana canÿe shauenanana, mo bëtsá béjayënga y bëts juesasana shauenanancá; y chë shauenanana enjamna mo chë arpésha uenanayënga chëngbe arpëshangá tmojtsabuastocá. <sup>3</sup> Chënga canÿe tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtséjémënga améndayëngbe natsantéshë. Y ndocná quenjátanobena chë canto juatsjínÿana, nÿe chë canÿe patse y canta bnétsana y canta uaranga quem luarentséngbentšana atsebácanënga aínë. <sup>4</sup> Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñë ntsamama; chë Oveshatema ndémoye tojtsá y chëngnaca choye jtséstonana. Chënga imojamna chë natsanënga chë quem luarentša entsanguentšë atsebácanënga jtsemnana, y chënga atsebácanënga imojtsemna Bëngbe Bëtsá y chë Oveshatema jtsaservénama. <sup>5</sup> Chënga ndocna te tmonjanobosteró; ndocná quenátobena jayanama chënga bacna soye tmojanma ca.

**Ntšamo chë unga angelënga  
tmojánayana**

<sup>6</sup> Chentšana inÿe ángel sënjáninÿe, tsbanánoca celëjana enjétsongüëfjnaye. Cha enjánbomna canÿe nÿets

tempscama oserverna buayanena soye, entsángbioye jáuyanama, nÿets quem luarentšë oyenënga, nÿetsca mándayëngbentša entsanga, nÿetsca cachca buiñe bomna entsanga, nÿetsca biyañe bomnéngbeñe y nÿetsca canÿe entsangbiana. <sup>7</sup> Y jabuache mëntšá enjétsichamo: “iBëngbe Bëtsabiana šmochjájua boye cha nÿetscangbiana chë más uamaná endmënama, y cha šmochtsatschuanaye, er ya tonjóshjango chë tempo ntšamo entsanga tmojamama tsábá o ndoñë tsábá bëtsemnana cha cháuyanama! iChë celoca y quem luare, chë mar béjaye y nÿetsca chë fshantsentšana óbocana béjayënga tojamá šmochtsadorana ca!”

<sup>8</sup> Chábentšana inÿe ángel mëntšá enjétsichamo: “iYa bëts castigo, ya bëts castigo chë Babilonia bëts pueblota entsángbeñe echántsemna!, ndëmuanÿenga tmojinÿanÿë ntšamo puerte bacna soyënga shembása o boyabásaftaca jtsamama y inÿe corente bacna soyëngnaca, y chentšana nÿets quem luarentša entsanga mo cach Babilonioquëngcá tmojama. Chë causa, Bëngbe Bëtsá echanjama chëngbiámnaca chabe uabouana castigo chaotsemnana ca.”

<sup>9</sup> Chë útatbentšana inÿe ángel jabuache mëntšá enjétsichamo: “Nderado nda chë uabouana bayábioye y chë chábioye jadórana pormana soye tojtsadorana, y tojalesenciá chabe uinÿananana soye juentsaca o cucuatšinë chamojajoma, <sup>10</sup> chánaca bontsemna, chë Bëngbe Bëtsabe uabouana castigo jasúfriana. Entšanga puerte bacna soye tmojamama, Bëngbe Bëtsá puerte tbojetna, y chë causa echanjama chë castigo chëngbeñe chaotsemnana. Y chë uámana angelënga y chë Oveshatembe

delante, chë bayá adorayábioye puerte mochanjatsesšená, íneshe y azúfrecá.

<sup>11</sup> Chca chamojtsesufrina ora, beca ngona echantsóbocana, y chë ngona nyets tempo chca echantsótsjuaye; y chënga, chë uabouana bayá y chábioye jadórana pormana soye adórayënga, y chabe uinýnanana soye bomnëngbiama, ndocna te chë tsetshanana queochatëjbana ca” —cha enjétsichamo.

<sup>12</sup> Chíyeca quem luarentše entseyta, chë Bëngbe Bëtsabe mandënga obedecëngë y Jesúsbeñe puerte ošbuáchiyana bomnënga, chë Bëngbe Bëtsabe entšanga, padecena soyënguiñe tmojtsemna ora, puerte uantana jtsemnana.

<sup>13</sup> Chentšana canýe oyeuambnayana celocana sënjanuena, mëntšá šonjétsatsaye: “Mëntšá mábema: ‘Tša oyejuayënga mochántsemna chë mëntescana mochjóbanënga, Bëngbe Utabnáftaca cánýiñe mo canýaca jtsonñëse ca.’”

“Aíñe ca” —chë Uamana Espíritu tonjayana—, “chënga ya ndoñe más queochátama jatrabájana, ni jasúfriana, er chënga tmojama tšabe soyënga Jesús jasérviana, y chë soyëngama chënga tšabe bendicionënga mo uacanancá celoca mochanjóyëngacñe ca.”

**Ndayá chë angelënga quem luarentše tmojanatbaná**

<sup>14</sup> Chora más sënjáninýe; sënjáninýe canýe fjantse jantšetëshe, y chëshiñe canýa enjétsabemana. Cha enjamna mo canýe entšacá; chabe bestšašíñe enjanábomna canýe castellano coronésha, y cucuatšíñe canýe puerte efsana mëntšá enjétsatbëna.

<sup>15</sup> Chentšana, chë celoca Bëngbe Bëtsabe bëts yebnentšana inýe

ángel tonjánbocna, y jabuache bonjétsatsaye chë jantšetëshiñe tbemanábioye: “iAcbe mëntšaca machbonja y shajuanënga matbaná, er chë játbanama tempo ya tonjóshjango; chë quem luarentša shajuana ya tonjaboche ca!” <sup>16</sup> Y chë jantšetëshiñe enjantbemaná chabe mëntšaca quem luariñe tonjánachbonja, y nyets quem luarentše atbanániñe tonjanoquedá.

<sup>17</sup> Chentšana inýe ángel chë celoca Bëngbe Bëtsabe bëts yebnentšana tonjánbocna; chánaca canýe puerte efsana mëntšaca. <sup>18</sup> Y chë altarentšana inýe ángel tonjánbocna, chë mando bomná ínesheca castigo entšangbiama jamama; y chë puerte efsana mëntšá bomna ángelbioye jabuache tbonjaniyana: “iAcbe mëntšaca machbonja y chë fshantsoca nyetsca uvas betiyeshënguentša uvasëšangá mátabe, er ya uabochenëšangá entsamna ca!” <sup>19</sup> Y chë ángelna chabe mëntšaca quem luariñe tonjánachbonja, y nyetsca quem luarentša uvasëšangá tonjanátabe, y lempe chë juantšëtetjama luaroye tonjanëtsana. Chë soye entsinýinýná ntšamo yochtsemnana Bëngbe Bëtsabe uabouana castigo. <sup>20</sup> Chë uvasëšangana, chë bëts pueblentsana chaboye tmonjanantšëtetje, y chë luarentšana tša buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanáb uashana.

**Chë angelënga chë canýsëfta pochócaye soyëngaca**

**15** <sup>1</sup> Chentšana, inýe bëts soye entšanga inýe soyama jinýanýiyama, celoca sënjáninýe, canýe puerte bëts soye: canýsëfta angelënga canýsëfta pochócaye soyëngaca, chë ústonoye pochócaye soyënga. Chë

soyënga chaojtsemnentsana ya ndoñe inye pochócaye soye yochántsemna, er chéntscoñe Bëngbe Bëtsá yochjacastíga, lempe ntšamo cha jamama tojanjuabocá.

<sup>2</sup> Canye mar béjaynaca sënjáninye, mo cristalcá enjétsinýna íneca enájuaabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chéngbeñe chaotsemnana ndoñe tmonjanlesencianga. Nyetscanga chënga monjétsabomna Bëngbe Bëtsá tojanëtsatá arpangá. <sup>3</sup> Chënga, canye canto monjésecantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntšá monjésecantaye:

Puerte bëts soyënga y tšabe soyënga entsemna lempe ntšamo aca tcojamcá, Bëngbe Utabná Bëngbe Bëtsá nyets obenana bomná; lempe ntšamo jtsamëse aca icoyena, acbe bominýiñe puerte tšabe y ndegombre soyënga yomna, nyets luarënguenache entsangbe Rey.

<sup>4</sup> Bëngbe Utabná, ¿nda nanjájuaoboye aca nyetscangbiana ndoñe más bëtsá condmëna ca, o ndoñe cmantsatschuanaye? Nyë aca uamaná condmëna; nyetsca mándayëngbentsá entsanga ácbioye mochanjabo, ácbentše mochanjoshamentšiyë aca jadórama, er ntšamo tcojamcá lempe entsángbioye mora tcojinýanjé,

y lempe ntšamo aca tcojamcá tšabá jtsemnana ca —monjésecantaye.

<sup>5</sup> Chca chentšana sënjanontješé y sënjáninye chë celoca Bëngbe Bëtsabe bëts yebna tonjantéfjo, chë Bëngbe Bëtsá Moisésbioye tbojaníyë leyënga uajajóntëse. <sup>6</sup> Y Bëngbe Bëtsabe bëts yebnentsana tmonjánbocna chë canýsëfta angelënga, chë canýsëfta pochócaye soyënga uambayënga, uafjantse lino entsëjuangá uabuashinýinýanëjuangá uichétjonënga, y tëntša castellano uasnanéjëngaca cochóntscoñe.

<sup>7</sup> Chentšana, canya chë canta Ainënguentšá chë canýsëfta angelëngbioye tonjanoyé canýsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nyets tempo y nyetsca tescama vida bomná. <sup>8</sup> Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentsana, chabe buashinýinýanana y obenana jtsinýanýnayëse; y Bëngbe Bëtsabe bëts yebnoye ndocná quenjátanobena jamashënguana, chë canýsëfta angelënga canýsëfta pochócaye soyënga candochnënguëntsuaana.

### Chë castígoca copbenga

**16** <sup>1</sup> Chentšana, canye jabuache oyebuambnayana sënjanuena, chë celoca Bëngbe Bëtsabe bëts yebnentsana enjétsobocana, y chë canýsëfta angelëngbioye mëntšá enjétsëtsësnaye: “Motsajna y quem canýsëfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjáná y chabe copbé quem luariñe

tonjanbuashcja, y nÿetsca entsãnga chë uabouana bayabe uinÿnanana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

<sup>3</sup>Chentsãna, chë inÿe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canÿe entsá obanabe buiñcá, y nÿetscanga chë mar béjayoca vida bomnënga tmonsanóbana.

<sup>4</sup>Chora chë inÿe ángel chabe copbé béjayënguïñe y béjaye obocanënguïñe tonjanbuashcja, y buiñe tontsanobiama.

<sup>5</sup>Chentsãna sënjanuena, chë béjayënguïñe mando bomna ángel mëntšá enjétsichamo:

Aca nÿetsca soyënguïñe tšabá amá condmëna,  
er aca tcojayana chë quem  
luarentša entsãnga chca  
castigánënga chamotsemnama.  
Bëngbe Bëtsá, Uamaná, mora chca  
condmëna y chca conjamna;

<sup>6</sup>er chënga tmonjama, chë acbe entsãnga  
y acbe juabna oyebuambnayëngbe  
buiñe chauábuashanama,  
jtsëbáyëse;  
y mora tconjama chënga buiñe  
chamofsema.

Nÿets mercedo imobuájona chca  
japásama ca —cha enjétsichamo.

<sup>7</sup>Altarcánënaca canÿe oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nÿets obenana bomná condmëna, y ntšamo entsãnga contscastigacá, ndegombre y tšabá entsemna ca.”

<sup>8</sup>Chentsãna, chë inÿe ángel chabe copbé shinÿiñe tonjanbuashcja; chë shinÿe corente tontsanobonÿaná y chíyeca entsãngbioye ññeshca

tontsanajuinÿé. <sup>9</sup>Y nÿetscanga uabouancá juinÿnënga tmonjanouquedá; pero chënga ndoñe chemátanbošëna bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

<sup>10</sup>Chentsãna chë inÿe ángel chabe copbé chë uabouana bayabe uámana puestiñe tonjanbuashcja, y nÿets chabe amëndayiñe ibetiñe tonjanouquedá. Chë entsãnga bichtaja montsanenójantsnaye, yapa tsetše causa; <sup>11</sup>pero ni chca, chë entsãnga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup>Chentsãna chë inÿe ángel chabe copbé chë bëts fshájaye Eufrates ca uabáiniyíñe tonjanbuashcja y chë béjaye tontsanbuashjo, japróntama chë shinÿe bocanoica luarënguentša reyënga y chëngbe soldadënga chëjana chámuachnëjnama.

<sup>13</sup>Atše sënjáninÿe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinÿna. <sup>14</sup>Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nÿets luarentša reyënga jáchembuama, chë uámana te, ndayté Bëngbe Bëtsá, chë nÿets obenana bomná yochjabo



entsangbiana jabáyana ntsamo chënga tmojamama, chë te chënga chabe contra chamotsetsjama.

<sup>15</sup> Bëngbe Utabná Jesucristo mëntšá tojayana: “Šmochjinÿe, atše nÿe ndeolpe chanjabo, mo canÿe atbëbanacá, chabiana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entsáyá totsaboprontañacá, nÿe enašá ndoñe chaondëtsemnana, y entsanga chca tmojinÿe ora ndoñe chaondëtseuatjama ca.” <sup>16</sup> Y chë bacna espíritënga chë reyëngbioye tmonjanënatse canÿe luare, hebreuñe Armagedón ca uabáinoe.

<sup>17</sup> Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canÿe jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tocjochnëngo ca!”

<sup>18</sup> Chora enjëtsemna tcuinÿënga, shauenanana y juezasanana, y quem luariñe tontsanangmëmána, yapa jabuache quem luare tontsanëbanjó causa; quem luarentše entsanga imobinÿna orscana, ndocna te nÿa chca quem luare tontsanëbanjó. <sup>19</sup> Chë puerte bëts pueblo úngañe tontsanajatá, y nÿets luarentša bëts poblënga tontsanáshajaye, y Bëngbe Bëtsá tojanenojuabó chë puerte bëts pueblama, Babilonia ca uabaina pueblama, chentša entsanga chë uabouana castigo chamotsebomnana, Bëngbe Bëtsá tša tbojanetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanajatá ora, cha chënga tonjanacastigá. <sup>20</sup> Mar béjayoca nÿetsca fshantsënga y quem luarentša nÿetsca

tjañe tontsanenatjëmba. <sup>21</sup> Celocana bëtsëtsa bëntstbenga entsángbeñe tonjantquécjana, chëbenga canta bnëtsana kilama más utbenga; y entsanga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnana.

### Chë puerte bacna vida bomna shembásabe castigo

**17** <sup>1</sup> Canÿa chë canÿsëfta angelënguentsá, chë canÿsëfta copbenga monjanatbënënguentsá, tonjánabo y šonjaniyana: “Mabo; cbochanjinÿinÿiye ntsamo yochtsemna chë puerte bacna vida bomna shembása, chë béjayënguñe entsetbemanabe castigo. <sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vinyocya puerte cuafjotmenangcá ca.”

<sup>3</sup> Chentšana chë ángel, atše chë Uámana Espíritbeyeca corente mandaná jtsemnëse, šonjanánatse entsanga ndoyena luaroye. Choca sënjáninÿe canÿe shembása, canÿe uabouana buángana bayábeñe enjaquená; chë bayabe cuerpiñe nÿëtsañe Bëngbe Bëtsabiana puerte bacá oyebuambnaye uabaina enjétsabemana, y enjánbomna canÿsëfta bestšaše y bnëtsana tsëtjonëse. <sup>4</sup> Chë shembása enjanichëtjona uámana shbuenda uafjatsënga y buángana entsáyá, y entsanbotamana castellánoca, uámana botamana ndëtšëtëmëngaca y pérlaca. Chabe cucuatšinë canÿe

castellano copbé enjétsatbéna, jútjena puerte uaboyénja soyéngaca, y ché boyabásengaftaca cha tojanma puerte bacna soyéngaca. <sup>5</sup> Y chabe juentsaca canye uabaina enjétsabemana, ndoñe josérta soye, mëntśá: “Ché puerte béts pueblo Babilonia, tśa bacna entsanga chentśe, mo ché puerte bacna vida bomna shembásengbe bebmá cuaftsemncá; chentśana tojanóbocna quem luarentśa nyetsca puerte uaboyénja soyéngaca.” <sup>6</sup> Atśe sënjáninýe ché shembása tēmiá, er cha tojanofśé ché Bēngbe Bētsábenga imojamnēngbe buiñe, ndēmuanýengbioye tmojanēbaye Jesusbiamá oyebuambnaye causa.

Chca sënjáninýe ora, tśa sënjanenjaná. <sup>7</sup> Chora ché ángel šonjanianá: “¿Ndáyeca tcojenjaná ca? Atśe cbochanjauyana ntśamo yojsayana ché shembása y ché chábioye bontsambá uabouana bayá, ché canýsēfta bestśaše bomná y bnétsana tsētjonēše; ché soye ndocná quenátstatśēmbo. <sup>8</sup> Ché tconjinýe uabouana bayá, tempo chca enjamna, pero mora ya ndoñe. Ché corente béts tboicana cha echanjesetsjuá, pero lempe pochocaná jtsemnma chca echántsaye. Quem luarentśe oyenēnga, ndēmuanýengbe uabaina quem luare jobojátśama orscana ndoñe yonduábemana, ché tśabe vida mochjónýenēngbe uabaina iuábemana librésañe, chēnga mochandenjaná, ché bayá ché tempo enjanianá y mora ya ndoñe, pero cachiñe yochjésabama chamojinýe ora.

<sup>9</sup> “Muentśe canye soye entsemna ché chca josértama chamojobenangbiamá: ché bayabe canýsēfta bestśaše endmēna canýsēfta tjañe ndayinē ché shembása entsetbemana; ché bestśaśēngnaca mondmēna

canýsēfta mandadēnga. <sup>10</sup> Chentśana, shachnēngbe amēndayana ya tonjochnēngo, canya mora entsetbemana jtsamēndayama y ché inya cabá ndoñe tonjášhango. Y cha chaojášhango ora, ndoñe bēnama cha queochaisemánda. <sup>11</sup> Ché tempo enjanianá uabouana bayá pero mora ya ndoñe, endmēna ché canýsēfta mandadēnguentśana inye mandado, pero chánaca ché inye canýsēftangcá endmēna y lempe pochocaná jtsemnma entsá.

<sup>12</sup> “Ché tconjinýe bnétsana tsētjonēše mondmēna bnétsana mandadēnga, jamēndama cabá ndoñe tmonjójayenga; pero básefta tescama cánýiñe ché uabouana bayáftaca, mando mo reyēngcá mochanjójyēngacñe. <sup>13</sup> Quem bnétsanēnga nyetscanga cachcá mochántsejuabnaye, y ché uabouana bayábioye chēngbe obenana y mando mochanjátsetaye. <sup>14</sup> Ché Oveshatembe contra mochántsestsjanaye; pero ché Oveshatema echantsayēnjaná, er ché Oveshatema endmēna nyetsca amēndayēngbiamá ché más uámana Utabná y nyetsca reyēngbiamá ché más uámana Rey. Ché bnétsana mandadēnga cháftaca mochántsestsjanaye ora, cha chentśe chabe entsángaftaca cánýiñe echántsemna. Chēnga mondmēna ché cha tojáchembo y tojubuáyanēnga y chábeñe sempre ośbuáchiyēnga ca” —cha šonjanianá.

<sup>15</sup> Ché ángel mëntśánaca šonjanianá: “Ché tconjinýe bėjayēnga, ndayinē ché bacna vida bomna shembása entsetbemana, mondmēna nyetsca canye luarentśa entsanga, enutanana entsanga, nyetsca biyañe oyebuambnayeñga y nyetsca mándayēngbentśa entsanga. <sup>16</sup> Y ché uabouana bayábeñe tcojinýe

bnétsana tsétjonése y chë uabouana bayá, chë bacna vida bomna shembásabioye mochantsáboyënja; enasá cachá mochanjesonÿaye; chabe cuerpentša mëntšena mochantsósañe y ínesheca mochántsejuinÿiye, chaopochocantscuana. <sup>17</sup>Bëngbe Bëtsá tojama chë bnétsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chajopasantscuana. <sup>18</sup>Chë tconjinÿe shembása chë puerte bëts pueblo endmëna, chë ndayentša mandadënga nÿets quem luarentša mandadëngbeñe mando mondbomna ca” —cha šonjaniana.

#### Babilonia japochócama

**18** <sup>1</sup>Chentšana inÿe ángel sënjáninÿe, celocana enjétsastjajuana, puerte obenana bomná, y chabe buashinÿinÿanánaca nÿets quem luariñe entsanbinÿna. <sup>2</sup>Chë ángel jabuache mëntšá enjétsichamo: iYa mochantsepochoá, ya mochantsepochoá chë uámana pueblo Babilonia! iChentše tojtsóbema diablëngbe oyeñe, nÿetsca bacna espíritëngbe oyeñe, y ndoñe tsabe y uaboyënja shloftšëngbe oyeñe!

<sup>3</sup>Er nÿetsca quem luariñe mándayëngbentša entšanga puerte bacna soyënga tmojama chentša entšangbe causa, mo chë bacna vida bomna shembásaftaca bacna soyënga cuafjamcá, mo puerte cuafjotmenangcá chë bacna vida bomna shembásabe vínoyeca.

Nÿetsca luarënguentša mandadënga puerte bacna soyënga tmojama, mo chë shembásaftaca bacna soye cuafjamcá, y quem luarentša obuámnañënga y enënga, bomnënga tmojobiama chentša entšanga yapa crocénana nÿe ndayíñnaca ntsejuabnycá gástaye causa ca —cha enjétsichamo.

<sup>4</sup>Chentšana, celocana inÿe oyebuambnayana sënjanuena, mëntšá enjétsichamo:

iChë bëts pueblentšana maisebocana!, tšëngaftanga chë atšbe entšanga šmommënga, chë chentša entšanga mondbétsama bacna soyënga ndoñe chašmondétsamama, ni chë chëngbioye japochócama soyënga tšëngaftangbiama cach ndoñe chaondétsemnana.

<sup>5</sup>Chënga tša bacna soyënga tmojama, tša bëtscá nÿa mo celóntscõe cuafjotjécá, y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

<sup>6</sup>Ntšamo chentša entšanga ínÿëngbiama ndoñe tšabá tmonjamcá, chë entšangbiámnaca cachcá chaotsemna; ntšamo tmojamama, cabá uta soye más cachca soye chëngbiama chaotsemna; ntšamo chentša entšanga ínÿënga chamosufrima tmojamcá, chëngnaca cachcá uta soye más chamosufrí.

<sup>7</sup>Chënga corente jtsenábotamnayana y yapa crocénana nÿe ndayíñnaca ntsejuabnycá jtsegástayana;

chë causa, chënga entsamna  
puerte jasúfriama y becá  
tsetšanana jtsebomnama.

Er chëngbe ainaniñe mëntšá  
jtsejuabnayana:

“Muentše mo reyëngcá  
mondëtbiámána.

Viudacá ngménaca ndoñe  
quemuátsmëna; tondayama  
quemochátssufrina ca.”

<sup>8</sup> Chíyeca, canye ora pochócaye  
soyënga chëngbiama  
echanjóshjango:

jóbanama šocanënga, puerte  
ngménana y jabuache  
shëntsana,

íñesheca lempe chëngbeñe  
echántsejuinye;

er Bëngbe Bëtsá corente obenana  
bomná endmëna,

Bëngbe Utabná chë chënga chca  
castigo chamotsebomnama  
tojayaná ca —cha enjétsichamo.

<sup>9</sup> Quem luarentša mandadënga,  
chentša entsángaftaca puerte bacna  
soyënga tmojamënga, y chëngaftaca  
nye ndayínnaca yapa crocénana,  
ntsejuabnaycá tmojagastanga,  
mochanjošachna y puerte ngmenánaca  
mochántsemna, chë bëts pueblo  
chaojtsangbototjuantëša ngona  
chamojinye ora. <sup>10</sup> Chentšana bënoca  
mochanjoquéda antješna, chë  
uabouana castiguama auatja causa, y  
chentša entsángbiama mochanjayana:

íTša lastema, tša lastema  
tšëngaftanga chë uámána  
bëts pueblo, Babilonientše  
oyenëngbiama, chë tša obenana  
binýnentše!

Canye ora tšëngaftangbe  
castigo tojóshjango ca  
—mochántsihamo.

<sup>11</sup> Chë quem luarentša  
obuámnañënga y enëngnaca

mochanjošachna y ngmenánaca  
mochántsemna chë pueblentša  
entsángbiama, er chora ya  
ndocná queochátsmëna chë  
chënga tmojúshjango soyënga  
chamobuámiñama: <sup>12</sup> tmojúshjango  
castellano soyënga, midio soyënga,  
uámána y botamana ndëtšbënga,  
perlënga, uámána lino y shbuenda  
uafjatsënga entsáyá y sedéjua y  
uámána uabuángana entsáyá; nyetsca  
botamana uanguëtše betiyënga,  
marfiloca pormana soyënga, uámána  
niñëšëngaca pormana soyënga,  
bronce soyënga, hierro y marmol  
soyënga; <sup>13</sup> bëtscá canela y inyë  
botamana uanguëtše y tamna  
soyënga, botamana uanguëtše  
béjayënga, incienso y mirra; vínoye,  
aceitiye, uámána arninýá, trigo;  
bayënga ndayánaca uasmëmnayënga,  
oveshënga, couayënga, cochëshangá y  
entsanga nyets tempo nye ínýabiama  
oservenëngnaca. <sup>14</sup> Y chë pueblentša  
entsángbiama mochanjayana:

íChë tša cmonjanogúsetana  
jtsebomnama soyënga, mora ya  
ndoñe quešmátšbomna;  
chë uámána y buashinýinýana  
soyënga y tša bomnana lempe  
šmojobuetše,  
y ndocna te más cachca soye  
quešmochátšbomna ca!

<sup>15</sup> Chë soyënga enënga, chë  
bëts pueblentša entsángbeyeca  
bomnënga tmojanobiamënga,  
bënoca mochanjoquéda antješna,  
chë bëts pueblentša entsángbiama  
tša bëts castiguama auatja causa;  
mochanjošachna, puerte ngmenánaca  
mochántsemna. <sup>16</sup> Y mëntšá chentša  
entsángbiama mochanjayana:

íTša lastema, tša lastema  
tšëngaftanga chë uámána bëts  
pueblentše oyenëngbiama!

Chë enjáninÿna mo canÿe  
shembasacá, uámana lino  
entšéjua uichëtjoná,  
uámana shbuenda uafjatsenga y  
uabuángana entšayá uichëtjoná,  
botamananá castellanóca,  
perlënga y uámana botamana  
ndëtsbéngaca.

<sup>17</sup> iY canÿe ora chabe tša bomnana  
lempe tojtsoepochocá ca!  
—mochanjayana.

Nÿetsca chë barquënguentša  
mándayënga, chentša entsanga  
inÿe luaroye ajnënga y chentša  
trabájayënga, y nÿetscanga chë  
vida onguayinë mar béjayoca  
trabájayëngnaca, chentšana bënoca  
mochanjoquéda antješna, <sup>18</sup> y chë  
bëts pueblo chaojtsangbototjuanentša  
ngona chamojinÿe ora, jabuache  
mochanjayana: “¡Quem uámana  
bëts pueblécá ndocna inÿe pueblo  
cachcá quenátsmëna ca!” <sup>19</sup> Chca  
chamojinÿe ora, ngménama bestšašinë  
polvëshe mochántsenotboto, y mëntšá  
mochántseyona ošachiyënga y puerte  
cochtsetšenánënga:

iTša lastema, tša lastema  
tšëngaftanga chë uámana bëts  
pueblentše oyenëngbiama!  
Chentša bomnánaca bomnënga  
tmojanobiama nÿetscanga chë  
mar béjayoca barco bomnënga.  
iCanÿe ora lempe tojtsoepochocá  
ca! —chënga mochántseyona.

Chora chë ángel tonjánayana:

<sup>20</sup> iCeloca oyenënga móyejuanga  
chë pueblo chca tojapasama;  
y tšëngaftángnaca móyejuanga,  
Bëngbe Bëtsabe entsanga,  
Jesucristbe ichmónënga  
y Bëngbe Bëtsabe juabna  
oyebuambnayënga,  
er chca jacastígase, Bëngbe Bëtsá  
tojama chënga chamosufrima,

ntšamo tšëngaftanga  
chašmosufrima chënga  
tmojanmcá ca! —cha  
tonjánayana.

<sup>21</sup> Chentšana, canÿe ángel puerte  
obenana bomná, canÿe ndëtsbé  
tonjanatsbaná, mo canÿe bëts  
nantsnëbé ndëtsbecá, mar béjayoye  
tonjanashbuetše y mëntšá tonjánayana:

Mëntšá, nÿe ndeolpe y jabuache,  
Babilonia chë uámana bëts  
pueblo mochántsetsatsše,  
y ndocna te más quem pueblo  
queochátsmëna.

<sup>22</sup> Chentše, ndocna te más  
quemochátuenana  
arpaná uabuástoyana, ni  
cantayana, flautëfjënga y  
trompetëfjuangá cach ndoñe;  
ndocna te más quemochátsmëna  
obrerënga,  
ni chë nantsnëbeñe trabájayana  
quemochátuenana.

<sup>23</sup> Chentše, ndocna te más  
ndocna uajuinÿanëšna  
queochátshinÿnaye,  
ni casamento fiestentša  
ensbouenanana quemochátuenana.  
Er chë bëts pueblo chca  
mochantsepochóca,  
masque chentša obuámnañënga  
y enënga nÿets quem luarentše  
chë más bomnënga monjamna,  
y chentša bocjuanáca nÿetsca  
luarënguentša entsanga  
ingñëngënga monjamna ca —cha  
tonjánayana.

<sup>24</sup> Bëngbe Bëtsá chca chë bëts  
pueblentše echanjama, er chentše  
tmojinÿena chë Bëngbe Bëtsabiama  
trabájaye causa tmojanóbänëngbe  
buiñe; chë chabe juabna  
oyebuambnayënga, chabe entsanga, y  
chë chábioye oservénama nÿets quem  
luarentše tmojtsëbayëngbe buiñe.

**19** <sup>1</sup>Chentshana celoca  
sënjanuena mo mallajta  
entsanga cuafstayebuachcá, mëntšá  
monjétsichamo:

iBëngbe Utabná matschuanga!  
Bëngbe Bëtsá endmëna nda chabe  
entsanga tojatsebácá;  
cha puerte uámanana,  
buashinÿinÿana y mando  
endbomna,

<sup>2</sup>er ndayama cha tojayancá  
ndegombre jtsemnana,  
y ntšamo tšabá chama tojtsemncá.  
Cha chë uachuana bacna vida  
bomna shembásabioye  
tbojacastigá.

Chë shembásabe puerte bacna  
soyënga causa,  
nyets luarentša entságnaca bacna  
soyënga tmojama.

Chábioye chca jacastígase,  
Bëngbe Bëtsá tojama ntšamo  
jamama ibomerecencá,  
chábioye oservénënga chë  
shembásabeyeca tmojóbana  
causa ca —chënga  
monjétsichamo.

<sup>3</sup>Y cachiñe mëntšá tmonjánayana:  
iBëngbe Utabná matschuanga!  
iChë bëts pueblo japochócama  
uangbototjuanentša ngona  
nyetsca tescama chca  
echanjótsjuaye ca!

<sup>4</sup>Y chora, chë uta bnëtsana y canta  
bëtsëjmënga amëndayënga y chë  
canta Ainënga tmonjanoshamentšé,  
y Bëngbe Bëtsá, chë uamana  
tbemanentše enjëtsetbemanabioye  
tmonjanadorá, mëntšá jayanëse:  
“iChca chaotsemna! iBëngbe Utabná  
matschuanga ca!” <sup>5</sup>Y chë uamana  
puestentšana canÿe oyebuambnayana  
tonjanóbocna, mëntšá:

Bëngbe Bëtsá matschuanga,  
nyetsca chabe oservénënga

y chë nyetscangbiana cha chë más  
uamaná yomnana juabnayënga,  
básenga y bëtsétsanga ca.

**Chë Oveshatembe casamento fiesta**

<sup>6</sup>Y sënjanuena mo mallajta  
entsangbe oyebuambnayancá, mo  
bëtscá béjaye cuafsobonjnácá y mo  
bëts juezasanana shauenanancá;  
mëntšá monjétsichamo:

iBëngbe Utabná matschuanga!  
Er Bëngbe Utabná, Bëngbe Bëtsá  
nyets obenana bomná tojontšë  
jamándana.

<sup>7</sup>Puerta móyejuanga y  
mochjínÿanyïye  
Bëngbe Bëtsá puerte bëtsá y  
uamaná bëtsemnana,  
er mora entsemna mo chë  
Oveshatembe casamento te  
cuafjoshjancá;  
chabe shema yochjabocná puerte  
tojtenobotamá;

<sup>8</sup>tmojalesenciá cha chauatíchëtjo  
uamana, nduatsenga uafjantse y  
uabuashinÿinÿana lino entsáyá.  
Chë shema entsinÿinÿná chë  
Bëngbe Bëtsabe entsanga;  
y chë lino entsáyá jtsichétjonana  
entsinÿinÿná  
chënga lempe ntšamo tšabá  
yomncá jtsamëse imoyena ca  
—chënga monjétsichamo.

<sup>9</sup>Chentshana chë ángel šonjaniyana:  
“Mëntšá mábema: ‘Oyejuayënga chë  
Oveshatembe casamento fiestama  
ófjanënga ca.’ ” Y mëntšánaca  
šonjaniyana: “Chca, ndegombre  
Bëngbe Bëtsabe palabrénga endmëna  
ca.”

<sup>10</sup>As chabe shecuatšentšë  
sënjanoshamentšé cha jadórama, pero  
cha šonjaniyana: “Ndoñe, átšeftaca  
ndoñe chca mátamana, er atšë Bëngbe  
Bëtsabe canÿe oservená sëndmëna,

ntšamo aca condmëncá, y chë Crístbeyeca acbe catšátanga, ntšamo chabiana motatšëmbcá y chabe ndegombre palabrenga nyets tempo imabuayinanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebomnama, chë soyëngama entšángbioye jábuayenama.

### Chë fiantse couayiñe enjaquená

<sup>11</sup> Chora sënjáninye celoca atëfjniñe; canye fiantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayéngaftaca monjánentsjanaye. <sup>12</sup> Chabe fšñëbenga mo iñeshcá enjáninýna, bestšašiniñe ba uabuashinýinýana coronëshangá enjanábomna, y canye uabaina chábeñe enjanábemana; nye cha chë uabaina yojanábuatma. <sup>13</sup> Cha enjanichétjona buíñeca unétjona entšayá y chabe uabaina enjamna “Bëngbe Bëtsabe palabra ca”. <sup>14</sup> Y chabe ústonoye monjétsajna mallajta soldadënga celouënga, nduatsenga uafiantse y uámana lino entšayá uichétjonënga, fiantse couayënguñe enjaquenënga. <sup>15</sup> Chë enjëtsebnatsanabe uayoicana enjanóbocana canye puerte eřšana espadëja, chë Bëngbe Bëtsábeñe ndošbuáchiyënga játatsetšama. Cha puerte obenánaca echántsamëndaye, mo canye hierro varëfjaquëcá. Cha echanjama entšángaftaca mo nda uvasëšangá juantšëtetjama

tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtsá chë nyets obenana bomná tbojetna causa. <sup>16</sup> Chabe uabonjaníyañe y chabe mëntjoca canye uabaina enjanábemana: “Nyetsca reyëngbiana chë más uámana Rey, y nyetsca amëndayëngbiana chë más uámana Utabná ca”.

<sup>17</sup> Chentšana canye ángel sënjáninye, shinýiñe enjétsatsana, chë celoca tsbanánoca nyetsca monjanongüëfjná shloftšënga jabuache mëntšá enjétsétsétsnaye: “iMabënga, menefjna chë Bëngbe Bëtsá tojaprontá bëts saná jasama; <sup>18</sup> chašmosama reyëngbe mëntšëna, soldadënga amëndayëngbe mëntšëna y valente entšangbe mëntšëna, couayënga y chëngbeñe enjaquenëngbe mëntšëna, y nyetsca entšangbe mëntšëna, cachëngbiana trabájayënga y nye ínýabiana nyets tempo trabájayënga, básesenga y bëtsétsanga ca!”

<sup>19</sup> Chora atše sënjáninye chë uabouana bayá y quem luarentša reyënga chëngbe soldadëngaftaca tmojánenefjna, chë fiantse couayiñe enjaquená y chabe soldadëngaftaca jétsajama. <sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinýanýiyama; y cha chë soyëngaca tojanaingñe chë uabouana bayabe uinýnanana soye chamuayentšajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmonsanatmetše chë iñesheca uafajónayoye, chë azufre endëjuinýinýanentše. <sup>21</sup> Chë ínýengbioyna tmonsanapochocá chë fiantse couayiñe enjaquenabe

uayoicana enjanóbocana espadéjaca, y nyetsca shloftšénga chéngbe mēntšénaca yapa tmontanoshachá.

### Chē uaranga uata

**20** <sup>1</sup>Chentsana canye ángel sēnjáninye celocana entsanastjajuana chē corente asentoye tboca llavéjaca, y canye bēts cadenējua entsanētvena. <sup>2</sup>Chē ángel tbontsanbá chē dragónbioye, chē tempsca mētšcuaye, chē Diablo y Satanás endméná, y canye uaranga uatama tbontsanbátséca. <sup>3</sup>Chē corente asentoye tboye tbontsantsatše, chentše tbontsanētame, y chentše bēšáša tsengájašeca tonjaninynaná, ndotatsēmbcá jatēfjuama ndocná chaondobenama; y chca, chē dragón ndoñe chaondobená jabocnama entšanga jáingñama, chē uaranga uata candochnguēntscuana; y chora, básefta tescama chē dragón mochanjétsboshjona.

<sup>4</sup>Uámana puestēnga sēnjáninye, y chiñe tmonjanotbiama chē entšanga tšabá y ndoñe tšabá tmonjamama jayanama obenana tmojanóyēngacñēnga. Chē bestšaše jtsēstjanguēse tmojanóbanēngbe espíritēngnaca sēnjánanýe. Chēnga chca tmojanóbana, Jesús tojánayana soyēnguiñe y chē Bēngbe Bētsabe buayenana soyēnguiñe sempre ošbuáchiye causa. Chēnga ndoñe tmonjanadorá ni chē uabouana bayá, ni chē chábioye jadórama pormana soye, y ndoñe tmonjanlesenciá chē bayabe uinñanana soye juentsaca o cucuatšínē chamuayentšajoma. Y sēnjáninýe chēngna tmontanayena y Crístoftaca canye uaranga uatama montsanmánda. <sup>5</sup>Chē entšanga mondmēna chē natsanēnga jtayenama, pero chē tempo chē inye

obanēnga ndoñe chemētétanayena, ndayá nye chē canye uaranga uata chentsana. <sup>6</sup>iOyejuayēnga y Bēngbe Bētsabe entšanga, chē tmojtanayenēnga chē obanēnga chámuatayenama Bēngbe Bētsá tojanma ora! Chēnga ndoñe quenátamna chē nyetsca tescama castigo jtsebomnana, ndayá Bēngbe Bētsá y Crístbioye mo bachnangcá chēnga mochántseservena, y Crístoftaca chē uaranga uatama mochántsemandaye.

### Satanás japochócama

<sup>7</sup>Chē uaranga uata chaojochñēngo ora, Satanás chabe utámenocana mochanjétsboshjona; <sup>8</sup>y cha echanjábocna nyets luarentša entšángbioye, chē Bēngbe Bētsabe soyēngama contra imomnēngbioye jáingñama, chē ntšamo Bēngbe Bētsabe contra Gog y Magog tempo ibojamncá imomnēnga. Satanás, chē entšanga echanjáchembo Bēngbe Bētsabe contra jétsjsama, y tša chéftanga cha echanjáchembo, nýa mo chē mar béjaye chēnyoca casajcá mochántsemna.

<sup>9</sup>Chēnga nyetscanga nyets luarējana mochanjátsjua, y chē Bēngbe Bētsabe entšanga oyentētsē y chabe bonshana entšangbe bēts pueblo shéconana mochanjotsaye. Pero celocana iñe echanjatquécjana y chē Bēngbe Bētsabe contra imomnēnga lempe echántsjuinýe. <sup>10</sup>Y Satanás, chē aingñayá, mochántsatmetše chē iñeshe y azúfreca uafjónayoye, ndayentše chē uabouana bayá y chē Bēngbe Bētsabe ndoñe ndegombre juabna oyebuambnayá tmonsanatmetše. Chentše bēts castigo nyets tempo, bnēté y ibeta mochanjasufrina.



**Chë obanëngbiama tmonjánayana  
ntšamo chéngaftaca  
jamama yojtsemnana**

<sup>11</sup> Chentshana sënjáninÿe canÿe bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmbe, y ndócñentše más chenatanobinÿná. <sup>12</sup> Y chë obanënga sënjánanÿe, bëtsétsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inÿe librëšanaca, ndëmuanÿenga nyetsca tescama tšabe vida mochlónÿenëngbe uabaina uabemana librëša. Chë obanëngbiama tmonjánayana ntšamo chéngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá. <sup>13</sup> Chë mar bëjayoye tmojanóbanënga choicana tmontanbocna, y chë obanënga tmojanoquedanga luarënguentsana tmontanbocna, y cada cánÿabiama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. <sup>14</sup> Chentshana ya ndoñe más obenana quentétsemna entsanga chamóbanama chaomama, mo chë obenana chë ññesheca uafjajónayoye cuaftšëtšencá; quem ññesheca uafjajónayoye endmëna chë nyetsca tescama castigo jtsebomnama luare; chë choca castigánënga jtsamnama yojtsamnëngbiama entsemna mo chënga cachiñe cuafjatobancá; <sup>15</sup> y ndëmuanÿengbe uabaina chë tšabe vida mochlónÿenëngbe uabaina iuábemana librëšañe ndoñe yonjanabemana, chë ññesheca uafjajónayoye tmontsanatmetše.

**Celoca tsmiñe y fshantse tsmiñe**

**21** <sup>1</sup> Chentshana atše sënjáninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentétsemna, y chë mar bëjaye chora cach tondaye. <sup>2</sup> Sënjáninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábíocana celocana enjétsostjajuana, puerte botamaniñe, mo canÿe shembásaca puerte botamanancá, chabe boyá jábocñabiama. <sup>3</sup> Y chora canÿe jabuache oyebuambnayana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entsángaftaca echántsemna y cha chéngbeñe echantsiyena. Chënga chabe entsanga mochlántsemna, cach Bëngbe Bëtsá chéngaftaca echántsemna, y cha chëngbe Bëtsá echántsemna. <sup>4</sup> Cha echanjama chënga ndocna te más ngmënënga chamondétsemnama, y ndoñe más chamondóbanama, ndoñe más chamondošachema, ni ngmënaca ndoñe chamondëtšóyebuambnama y ndoñe más tsetšanana chamondétsebomnama; er ntšamo chënga entsangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrenga endmëna ntšamo ndegombre yomncá, y nyetscanga mondobena chiñe corente jtšošbuáchiyana ca.”

<sup>6</sup> Chentshana šonjaniyana: “Lempe tonjochnëngo. Atše sëndmëna chë nyetsca soyënga bojatsayá

y pochocayá, chë natsaná y chë ustonoyá. Mo nda tša uajuendayana tojtsebomná canÿe bėjaye fshantsiñe obocanentsšana cuafjofšecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nÿetsca tescama yomna tšabe vídnaca, chca jtsebomnama chábioye tondaye ntsotjañcá. <sup>7</sup>Nda nÿetsca soyënguentšana tšabá chaojabocná mo ayëñjanayacá, lempe echanjóyëngacñe ntsamo atšbe entsángbioye jatsatayama tijašebuachenacá, y atše chabe Bëtsá chántsemna y cha atšbe uaquiñá. <sup>8</sup>Pero chë auatja causa Crístbioye ndoñe mondëservënga, chábeñe ndošbuáchiyënga, chë bacna soyënga causa Bëngbe Bëtsabiana puerte uaboyëñjanënga imomnënga, chë ínÿengbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnaye, y nÿetscanga bosterënga imomnëngbiamna, chënga entsamna chë ññeshca uafjajónayoca jasúfriana, chë azufre yojuinÿinÿanentšë. Chentšë puerte castigánënga sempre mochanjëftsemna, mo uta soyama cuafjobancá ca.”

#### Chë tsëm bëts pueblo Jerusalén

<sup>9</sup>Chentšana canÿa chë angelënguentšá, chë canÿsëfta codbenga bomnënga jútjena chë canÿsëfta ústonoye pochócaye soyëngaca, átšbioye tonjánabo y šonjaniyana: “Mabo, cbochanjinÿinÿiye chë tojobouamá shembása, chë Oveshatembe shema ca.” <sup>10</sup>Y atše chë Uámana Espíritofraca corente mandaná jtsemnëse, chë ángel šonjanánatse canÿe bëts y tsbanana tjoye, y šonjaninÿinÿé chë tsëm bëts

pueblo Jerusalén, chë “uámana ca” uabaina pueblo, celocana Bëngbe Bëtsábiocana enjëtsostjajuana. <sup>11</sup>Chë bëts pueblo enjëtsëbuashinÿinÿana Bëngbe Bëtsabe buashinÿinÿanánaca; enjëtsëbuashinÿinÿana mo canÿe uámana botamana ndëtšbecá, mo jaspe ndëtšbecá, pero mo cristalcá tëshínÿiñe. <sup>12</sup>Chë bëts pueblo shéconana canÿe bëts y tsbanana tapiëse enjamna, chë tapiëšiñe bnëtsana uta bëshashangá y cada bëshashentse canÿe ángel, y chë bëshashangañe enjanábemana chë Israëloca bnëtsana uta bëts pamíllangbe uabaina. <sup>13</sup>Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá. <sup>14</sup>Chë tapiëse enjanécutajona bnëtsana uta ndëtšbenguíñe, y chëbenguíñe enjanábemana Jesucristo chë Oveshatembe bnëtsana uta ichmónëngbe uabaina.

<sup>15</sup>Chë ángel átšeftaca oyeuambnayá canÿe castellano juinÿinanëšëfja enjánatbëna jamedídama chë bëts pueblo, chentša bëshashangá y chentša tapiëse. <sup>16</sup>Chë bëts pueblo cach medida enjánbomna nÿets cantoica, cach medida tëntšoye y nÿanëjoye. Chë ángel chabe juinÿinanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntšoye, tsbanánoye y nÿanëjoye cach medida enjánbomna. <sup>17</sup>Chentšana chë tapiëse tonjanmedidá, enjánbomna chnénguana bnëtsana y shachna metrënga; ntsamo entsanga chca soyënga jamedídama mondëtatšëmbcá chë ángel tonjanmedidá.

<sup>18</sup>Chë tapiëse enjanpormana jaspe ndëtšbeca, y chë bëts pueblo ena castellánoca, tša chca nÿa mo

cristalcá tëshínýniñe enjáninýna.  
 19 Chë ndëtsbenga ndayiñe chë tapiëse  
 enjanécuatjona enjánbotamanana  
 nyetsca uámana botamana  
 ndëtsbéngaca: canýebé jaspe ndëtsbéca,  
 chë inýebé zafiroca, chë inýebé ágata  
 ndëtsbéca, chë inýebé esmeráldaca,  
 20 chë inýebé ónice ndëtsbéca, chë  
 inýebé cornalina ndëtsbéca, chë inýebé  
 crisólito ndëtsbéca, chë inýebé berilo  
 ndëtsbéca, chë inýebé topácioca, chë  
 inýebé crisoprása ndëtsbéca, chë  
 inýebé jacíntoca y chë inýebena  
 amatista ndëtsbéca. 21 Chë bnëtsana  
 uta bëshashangá enjuamna bnëtsana  
 uta perlénga; cada bësháša nýe  
 canýe pérlaca uapormanésha. Y chë  
 más bëts tsáshenëjana enjamna ena  
 castellanóca; mo cristalcá tëshínýniñe  
 enjáninýna.

22 Chë bëts pueblentse ndocna  
 Bëngbe Bëtsabe bëts yebna  
 chiyátaninýe, er Bëngbe Utabná,  
 chë Bëngbe Bëtsá nyets obenana  
 bomná y chë Oveshatema chentse  
 bonjamna, y chata nyetscangbiana  
 chë bëts pueblentse ndayéntsnaca  
 adoránata bonjëtsemna. 23 Chë bëts  
 pueblentse ndoñe quenjatsiyta shinýe o  
 juashcona chaotsebínýnaye, er Bëngbe  
 Bëtsabe buashinýinýanana chentse  
 enjëtsebinýnaye, y chë Oveshatembe  
 buashinýinýanana mo uajuinýanëshacá  
 enjamna chë bëts pueblama. 24 Chentša  
 binýnayánaca, entšanga nyetsca  
 mándayëngbentse mochantsiyena, y  
 quem luarentša mandadënga chëngbe  
 uámana y bëts soyënga chë bëts  
 puebloye mochanjijëbo. 25 Chë bëts  
 pueblentša bëshashangá ndocna te  
 quemochtétatame, y chentse ndocna  
 ora ibeta queochátsmëna. 26 Chë  
 bëts puebloye mochanjijëbo chë  
 nyetsca luarënguentša entšangbe  
 uámana y bëts soyënga, y chë

nyetsca luarënguentša entšangbeñe  
 bëtsëtsanga y uámanënga iuabiamná  
 soyëngnaca. 27 Pero ndocna te  
 queochátomashëngo ndayánaca,  
 y chë soye chaotsama entšanga  
 ndoñe tsábenga chamotsemnama  
 Bëngbe Bëtsá jadórama; ni ndocná  
 queochátamashëngo, Bëngbe  
 Bëtsabiama nýa tondayama ogustana  
 soyënga amá o ínýengbioye jáingñama  
 soyënga amá. Choye mochanjámashjna  
 nýe chë ndëmuanyëngbe uabaina  
 yojtsábemana chë Oveshatembe  
 librësañe, chë nyetsca tescama tsábe  
 vida mochjónýenëngbe uabaina  
 uábemanentse.

**22** 1 Chë ángel šonjaninýinýe  
 chë enjanobëjna béjaye  
 vida bomniye. Chë býyeshe enjamna  
 ndëtsenguive y tëshínýniye mo  
 cristalcá. Enjanóbocana chë Bëngbe  
 Bëtsá y chë Oveshatembe uámana  
 puestocana, 2 y chë más bëts tsashená  
 tsëntsajana enjanobëjna. Chë  
 fshajayentša catoica lado enjanójuajna  
 betiyeshënga chë nyetsca tescama  
 yomna tsábe vida jtsebomnana, canýe  
 uatiñe bnëtsana uta soye jashájonana,  
 canýe cada shinýe; chë betiyeshentša  
 tsbuanáchënga josérviana nyetsca  
 mándayëngbentša entšanga jáshnama.  
 3 Choca ndocna soye queochátsmëna  
 chë ndayama Bëngbe Bëtsá tojayana  
 ndoñe tsábá yondmëna ca, y ndaye  
 bacna soye japásama chaotsemna soye.  
 Chë Bëngbe Bëtsá y chë Oveshatembe  
 uámana puesto chë bëts pueblentse  
 echántsemna, y chatbe oservénënga  
 mochántsadórana. 4 Chënga  
 mochanjinýe Bëngbe Bëtsabe jubíá,  
 y chabe uabaina chëngbe juentsaca  
 mochantsambaye. 5 Chentse ndocna  
 ora ibeta queochátsmëna, y chentša  
 oyenënga ndoñe queochátëjáboto  
 canýe uajuinýanëshá o shinýe

chaotsebínynaye, er Bëngbe Bëtsá Bëngbe Utabnabe buashinÿinÿanana chëngbiana echantsebínynaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemandaye.

#### Jesucristo jésabama entsobeco

<sup>6</sup>Chentšana chë ángel šonjaniyana: “Quem palabrënga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbiyoe jinÿanÿiyama ndayá betscó yojtsemna jopásama ca.”

<sup>7</sup>Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyeuambana soye tojoyeuná, chë ndayama quem librësañe entsábemana ca.”

<sup>8</sup>Atše Juan, chë soyënga sënjanuena y sënjaninÿe. Y chca sënjanuena y sënjaninÿentšana, chë chca šonjaninÿinÿé ángelbe delante atše sënjanoshamentšé, cha jadórama.

<sup>9</sup>Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyeuambnayënga y nÿetscanga chë ndayá quem librësañe endayanama tmojoyeunanga mondmëncá. Aca cmontsemna Bëngbe Bëtsá jadórama ca.”

<sup>10</sup>Chora mëntšánaca šonjaniyana: “Ndoñe mo iytëmencá catjáboshjona

ndayá quem librësañe entsabemancá, chë ndegombre jochnënguama soyënga, er chca jopásama chë tempo ya entsobeco. <sup>11</sup>Cachcá monÿá chë bacna entšá bacna soyënga chaotsama; chë puerte bacna soyënguiñe jtсийenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entšá, nÿets tempo nÿets ainánaca chábioye chabotseservena ca” —cha šonjaniyana.

<sup>12</sup>Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. <sup>13</sup>Atše sëndmëna chë nÿetsca soyënga bojatsayá y pochocayá, chë natsaná y ustonyá, chë ndábeyeca y ndabiama lempe yomna ca” —šonjaniyana.

<sup>14</sup>Oyejuayënga chë bacna soyëngama perdonánënga imojtsemnënga, mo chënga chëngbe entsayá botamana cuaftsaboshabecá. Chca chënga mochantsobena chë nÿetsca tescama yomna tšabe vida jtsebomnama uacanánana jashjáchama, mo chë nÿetsca tescama yomna tšabe vida jtsebomnama betiyeshentšana cuaftsesacá, y mochanjobenaye chë tsëm bëts pueblöye bëšášajana tšabá jamashjnama. <sup>15</sup>Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë inÿenga obánayënga, chë soyënga adórayënga diosënga yomna ca jtsejuabnyëse, y nÿetscanga chë bostero soyënga oyušetánënga y chca jtsamëse oyenënga.

<sup>16</sup>Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá

ndayenache ošbuachiyëngcá  
 enefjuanëngbioye lempe  
 chámabuayenama. Atše sëndmëna  
 chë Rey Davídbentšana Entšá. Atše  
 sëndmëna mo chë bínyanoye puerta  
 bínñyaye estrellcá ca.”

<sup>17</sup>Chë Uámana Espíritu y chë  
 Oveshatembe shema bondbétsichamo:  
 “iMabo ca!” Y nda chca chajouená  
 cháuayana: “iMabo ca!” Y mo nda tša  
 uajuendayana tojtsebojna, tojabo  
 y bëtscá bėjaye cuafjofsecá, cachcá  
 nda tša tojtseboše Jesusbe soyënga  
 jtsebojna, chábioye chaobeconá  
 y cha echanjama chë soyënga cha  
 chaotsebojna y chë nyetsca  
 tescama yomna tšabe vídnaca, chca  
 jtsebojna tondaye ntsotjañcá.


<sup>18</sup>Nyetscanga ntšamo quem  
 librëšaňe entsabemancá, chë  
 ndegombre echanjopásama  
 chamojouenëngbioye šcuabuayená.  
 Nderado nda chë soyëngama más

chajaboté, Bëngbe Bëtsá echanjama  
 cha chaosufrí chë quem librëšaňe  
 entsábemana pochócaye soyënga. <sup>19</sup>Y  
 nderado nda ntšamo quem librëšaňe  
 entsabemancá, chë ndegombre  
 echanjopásama soyënguiňe ndayánaca  
 tojajuaná, Bëngbe Bëtsá chábioye  
 bochantsebojuána ntšamo chabiana  
 yomncá chë nyetsca tescama  
 yomna tšabe vida jtsebojna  
 betiyeshentšana y chë tsëm bëts  
 pueblentšana, chë ndayama quem  
 librëšaňe entsábemana.


<sup>20</sup>Quem soyënga oyebuambnayá,  
 chë lempe ndegombre  
 echantsemnama tonjayaná, atše,  
 Jesús séntsicamo: “Aíňe, betesco  
 chanjésabo ca.”

Chca chaotsemna. iCochjabo, Bëngbe  
 Utabná Jesús!


<sup>21</sup>Bëngbe Utabná Jesús chaoma  
 tšabe bendicionënga tšëngaftangbeňe  
 chaotsemnama.



**PRIMER VIAJE MISIONERO DE PABLO**



**SEGUNDO VIAJE MISIONERO DE PABLO**




**TERCER VIAJE MISIONERO DE PABLO**




**VIAJE DE PABLO A ROMA**

# El Templo en el tiempo de Jesucristo



Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines



